


Tẹsitamenti Ikne
n'Ọnu Ikwere



New Testament in Ikwere

Tesitamenti Ikne n'O_{nu} Ikwere

New Testament in Ikwere

copyright © 2010 Wycliffe

Language: Ikwere

Translation by: Wycliffe

Ikwere - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwere people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89

Contents

Matiyu	1
Makı	61
Lukwu	99
Jõni	162
Ernu Ele Izi	208
Ele Rom	265
1 Ele Kõrinti	291
2 Ele Kõrinti	317
Ele Galasia	334
Ele Efesõsi	343
Ele Filipai	353
Ele Kõlosi	360
1 Ele Tẽsalonika	367
2 Ele Tẽsalonika	373
1 Timoti	377
2 Timoti	385
Taitosi	391
Filemoni	395
Ele Hiburu	397
Jemisi	416
1 Pita	423
2 Pita	431
1 Jõni	436
2 Jõni	443
3 Jõni	444
Judu	446
Okpume	449

**Izi ọma lele kpa
Matiyu
gbaru a n'okwukwo
Nhne gbasiri
okwukwo ka**

Izi ọma lele kpa Matiyu gbaru a n'okwukwo nookwu oka izi ọma nū Jizọsi bụ Nye Ọznohia Chiokike kweru mkwna a. Ọmumu Jizọsi nye Nazareti gwebnanyarnu ẹli-eze ikne n'owa, ke bụ ọchichi Chiokike. Izi ọma Matiyu neegesi ẹli-eze ikne ka hite nū nhne Jizọsi, nye bụ Mezaya, znirni nū nhne o mernu. Matiyu gesiri kpa Jizọsi mezuru kpakara nhne be gbaru nū Teshitamenti Oknani gbasiri a. O gesiri nū be murnu Jizọsi hite n'avnurnu ele eze. Nne a Meri bụ woknornokno máa nyerukna. Matiyu tukparu ẹhni gba nū ele bụo ele Ju nwernu igwe n'ẹli-eze Chiokike lele kpa ele Ju nwernu. O kwuru nhne gbasiri ẹnwu Jizọsi, olizo n'ẹnwu a, nū iwu o nyernu ele sno apna be zni kpakara ele zị n'owa izi ọma a.

Nhne zị n'okwukwo ka

Budnu wikoro Jizọsi (1:1--4:25)

Ikwu-ọnu Chiokike o kwuru n'olu rugwu (5:1--7:29)

Nhne o znirni, elulu nū nhne berere nū Galili (8:1--18:35)

Izne a dū Jeruselem (19:1--20:34)

Ikwezu ipne-aznū Jizọsi nū

rime Jeruselem (21:1--27:66)

Olizo n'ẹnwu a (28:1-20)

Nye gbaru okwukwo ka: Matiyu (Livaị)

Risi nhne o kwno gba a: O gesi nū Jizọsi bụ Mezaya, nye gweyarū ẹli-eze ke bụ ọchichi Chiokike n'owa.

*Osnusno ọmumu Jizọsi
(Luk 3:23-38)*

¹ Okwukwo osnusno ọmumu Jizọsi Karaịsi, nnwọ Devidi, nnwọ Ebereham.

² Ebereham murnu Aziki, Aziki mụhia Jekọpu, Jekọpu mụhia Juda nū rumu nne a.

³ Juda mụhia Pẹzezi nū Zera, nne be bụ Tama, Pẹzezi mụhia Hezirọni, Hezirọni mụhia Ram,

⁴ Ram mụhia Aminadabū, Aminadabū mụhia Nasọni, Nasọni mụhia Salịmoni,

⁵ Salịmoni mụhia Boazi, nne a bụ Rehabū, Boazi mụhia Obedi, nne a bụ Rutu, Obedi mụhia Jesi,

⁶ Jesi mụhia Eze Devidi.

Devidi mụhia Solomọni, nne a bụ nnwerne Uraya,

⁷ Solomọni mụhia Rehoboam, Rehoboam mụhia Abija, Abija mụhia Asa,

⁸ Asa mụhia Jehosafati, Jehosafati mụhia Joram, Joram mụhia Uzaya,

⁹ Uzaya mụhia Jotam, Jotam mụhia Ehazị, Ehazị mụhia Hezikaya,

¹⁰ Hezikaya mụhia Manase, Manase mụhia Amọni, Amọni mụhia Josaya,

¹¹ Josaya mụhia Jekonaya nū rumu nne a. Ka bụ ige

ele Babiloni vuru be la n'eli Babiloni.

12 Nga be vukworu be zne nū Babiloni, Jekonaya mūhia Seateli, Seateli mūhia Zerubabeli,

13 Zerubabeli mūhia Abiudu, Abiudu mūhia Eliakim, Eliakim mūhia Azọ,

14 Azọ mūhia Zadoku, Zadoku mūhia Akim, Akim mūhia Eliudu,

15 Eliudu mūhia Eleza, Eleza mūhia Matani, Matani mūhia Jekọpu,

16 Jekọpu mūhia Josefu nzi Meri. Meri bụ nye mụrnu Jizosi, nye be kwu Karaịsi.

17 Kpakara ẹbnurnu hite n'Ebereham dū Devidi bụ nri ẹbnurnu nū ẹno, hite nū Devidi dū nga be vuru be zne n'eli Babiloni bụ nri ẹbnurnu nū ẹno, hite nū nga be wuru nū Babiloni dū nū ọmumu Karaịsi bụ nri ẹbnurnu nū ẹno.

*Ọmumu Jizosi Karaịsi
(Luk 2:1-7)*

18 Ka bụ kpa be jiri mụ Jizosi Karaịsi. Nga be kweru nū Josefu jọolu nne a Meri,* nga be yáadnanyina, be whnurnu nū ọ zị rime hite n'Enine Nso.

19 Josefu bụ nzi a bụ ọmamarna badnū, ọ chọla ọ kpasị a iwhnerne nū ruwhnu ọhna, o pioru ọ gba a nnam nū mgwugwa.

20 Kọvu nga ọ zị naari kpakara nhne ka nū mkpoma a, enine izi Nyenwe aị vakwnusiri a nū mboro, kaa, "Josefu, nnwọ Devidi, i tuko ogwnu o kwuru nnwerne i

Meri, nnwọ ọ zị rime a hi n'aka Enine Nso.

21 O joomuhia nnwọ rukna, i jookwu a Jizosi, kwnornu nū o jooznohia ele ke a nū kpakara mmehie be."

22 Ka bụ ma nhne Nyenwe aị kwuru hite n'onu nye ọwhnurninya mezu,

23 "Otu woknornokno máa nyerukna jootu rime, ọ joomuhia nnwọ rukna, be jookwu a Imanueli," ke bụ, "Chiokike zinu aị."

24 Nga Josefu tnenyarnu nū anyarna, o lizo, o mee kpa enine izi Nyenwe aị nyernu a iwu, o kwuru Meri nnwerne a.

25 Kọvu ya nū a dnányina dū nga ọ mūhiaru nnwọ rukna, ọ jita rẹwhna a Jizosi.

2

Ele ako varu

1 Nga be mụrnu Jizosi nū Betilehem n'eli Judiya, nga Erọdu bụ eze, ele ako* hiri n'obosi ẹhnam vaduru Jeruselem,

2 neesikwa, "Ndaa hne ọ zị bụ nye be mụrnu, eze ele Ju? Kwnornu nū a whnurnu mbọ a n'obosi ẹhnam, a varu ma a kponu a risi eli."

3 Nga Eze Erọdu nurnu nhne ka, mkpoma laru a mini, ya nū kpakara ele zị nū Jeruselem.

4 Nga o sukwukotaru kpakara ele risi ariohna nū ele zni iwu ele Ju, ọ sika be hne be joomu Karaịsi wam.

* 1:18 Mọbu ọgbasi ọmu n'aka ke neegesi nū aka ji a.

nhne gbasiri mbọ.

* 2:1 Ele ako: bụ ele nọmu

⁵ Be kanu a nu Betlehem n'eli Judiya, o bu kpa be gbaru a n'okwukwo hite n'onu nye owhnurninya, kaa,

⁶ "Ji Betlehem, n'eli Juda, i zila mati kakwo n'esilawuru risi eli Juda rira rira, kwnornu nu hite nu ji hne nye risi jeehi whuya, nye jooznu ele ke m Izireli lele aturu."

⁷ Nga Erudu sukwuru ele ako wam nu mgwugwa, o sikwahia be nga mbo wam whuyaru iwhne.

⁸ O kanu be zne Betlehem, kaa, "Anu zne piosi nnwo ikne wam rikne, nga anu pihiaru a, anu va kanu m, m jeezne kponu a risi eli masi."

⁹ Nga be nuru oka Eze Erudu, be whoga, le mbo wam ke be whuru n'obosi ehnam neezne nu ruwhnu be du nga o varu gwuzoru n'olu hne nnwo wam zi.

¹⁰ Nga be whuru n'obosi mbo wam, be nwudnarnu k'agida.

¹¹ Be bna nu rime oro, whnu nnwo ikne wam, ya nu Meri nne a, be dna n'eli kponu a risi eli. Be kpume igbe ekwu be, nyee a nkesi, golu, franki-isensi nu maa.

¹² Chiokike do be aka nu nsni nu mboro be lahnakwadia ke Erudu, be garu apna berere la eli be.

Be gbazne n'eli Ijipiti

¹³ Nga be laru, enine izi Nyenwe ai mernu Josefu whnu a anya nu mboro, kaa, "Lizo, kwuru watakiri wam nu nne a gbazne Ijipiti, daziri nu pii du nga me jaakanu

i, kwnornu nu Erudu joo pio nnwo wam ma o gbu a."

¹⁴ O lizo, kwuru nnwo wam nu nne a n'abali gbazne Ijipiti.

¹⁵ Be zi n'Ijipiti tem Erudu nwuma, ma nhne Nyenwe ai kwuru hite n'onu nye owhnurninya a mezu, "M sukwuharu m nnwo m hite Ijipiti."

Erudu gburu rumu takiri

¹⁶ Nga Erudu whuru n'obosi nu ele ako wam nyernu a mkpari, o weru ehni k'agida, o zizne ele ogwu kaa be gbu kpakara rumu rukna zi nu Betlehem ma eli zi be ndundu, hite nu ele gbaru awha lawuru ya eli. Ka bu hite n'ige wam o sikwahiaru oka n'onu ele ako wam.

¹⁷ N'ige wam bu hne be mezuru nhne Jerimaya nye owhnurninya kwuru, naakaa,

¹⁸ "Be nuru akpiti nu rime eli Rama, naakwana ekwana nu okne ogba mkpe,

Reheli naakwanu rumu a ekwana,

o kwéle be kasi a mkpoma kwnornu nu be zima."

Be hiri n'Ijipiti yahna

¹⁹ Nga Erudu nwuru, enine izi Nyenwe ai mernu Josefu whnu a anya nu mboro n'Ijipiti,

²⁰ kaa, "Lizo kwuru nnwo wam nu nne a zne n'eli Izireli, ele noopio budnu a nwunam."

²¹ O lizo kwuru nnwo wam nu nne a, va n'eli Izireli.

²² Kovu nga o nuru nu Akelosi nnwo Erudu bu eze

Judiya nū ngadna nda a, ọ tūru ogwnu o zne p̄i. Nga Chiokike d̄oru a aka nū ns̄n̄i nū mb̄oro, Josefu t̄uhnasna zne Galili.

²³ Be zne wuru n'ẹli mat̄i be kwu Nazareti, ma nhne be kwuru hite n'ọnu nye ọwhnurninya mezu, "Be jookwu a nye Nazareti."

3

Ikwu-ọnu J̄oni Nye W̄u Mini
(Mak 1:1-8; Luk 3:1-18; J̄on 1:19-28)

¹ N'ige wam J̄oni Nye W̄u Mini var̄u n̄ookpo okwo ikwu-ọnu Chiokike n'ẹli-ikpa ke Judiya,

² naakaa, "Anū t̄uhnasna mkp̄oma, kwnornu nū ẹli-eze Chiokike z̄i ndundu."

³ J̄oni b̄u nye wam Azaya nye ọwhnurninya kwuru ọka gbas̄iri a, naakaa,

"Akp̄iri otu badnū n̄ookpo okwo n'ẹli-ikpa, naakaa,
'Anū mekwata apna Nyenwe āi,
anū mee apna a sn̄i as̄n̄i."

⁴ J̄oni wogwu iwo be jiri rijni akp̄ukpo an̄ohia be kwu kameli mee, ajn̄i ọ sn̄u n'ikwnu b̄u akp̄ukpo an̄ohia, wiri a b̄u igwurube nū m̄ono ebeka ọhia.

⁵ Ele Jeruselem nū kpakara ele Judiya nū kpakara ele wugwu nū ngeri Osimini J̄odani gburugburu wh̄okwnusiri a,

⁶ ọ w̄u be mini n'Osimini J̄odani, be nookwuh̄ia mmehie be.

⁷ K̄ovu nga ọ whnurnu agida ele Farisi nū ele Sadusi hne be naava ma ọ w̄u be mini, ọ kanū be, "Anū ẹbnurnu agw̄o, nyele kannū anū, anū gbanah̄oru oву owe ẹhni Chiokike ke jaava?"

⁸ Anū m̄i mkp̄uru ke jeegesi nū anū t̄uhnasnarnu mkp̄oma hite nū mmehie.

⁹ Anū r̄iko nū rime anū, naakaa, 'Ebereham b̄u nda āi,' me kanū anū nū Chiokike nwernu rikne mee kpakara akaworugwu ka gh̄o r̄umu Ebereham.

¹⁰ K̄itna, be t̄ukwasilam eh̄nigwe n'ikwnu kpakara isisi, ke b̄u nū be joogbudna isisi ọbula ke m̄inyala mkp̄uru ọma, be j̄ootubna a nū rime b̄ekwnu.

¹¹ "M̄ ji m̄ mini n̄owu anū mini ke neegesi nū anū t̄uhnasnarnu mkp̄oma hite nū mmehie anū, k̄ovu nye kagw̄u m̄ rikne naava n'aznū m, nye me d̄ugwo n'owhudnahie ch̄iri okoro-ọchi a, nye wam jeeji Enine Ns̄o nū b̄ekwnu n̄owu anū mini.

¹² Nye nhne ọwhusna ikpa z̄i n'aka a, ọ j̄owhusna ikpa a nkari, ọ jaach̄ikota ikpa a yisi n'ọbna a, k̄ovu o jeeji b̄ekwnu ke ch̄ni echni rnes-nama ruznurnuznu ikpa."

Ọwuwu mini Jiz̄osi

(Mak 1:9-11; Luk 3:21,22)

¹³ N'ige wam, Jiz̄osi hiri nū Galili vadu Osimini J̄odani znekwnusi J̄oni ma ọ w̄u a mini.

¹⁴ K̄ovu nū J̄oni kw̄ele a, ọ kaa, "Ọ z̄i m̄ mkpa i w̄u m

mini, jì n'iwihuru i, ì naavakwnusi m?"

¹⁵ Jizòsi kanu a, "Gharu a kpam kitna, kwnornu nu o buru oma kpam ma a mezu kpakara nhne buru oma n'omume." Joni gharu a.

¹⁶ Nga Joni wuru Jizòsi mini, ngangam o hiri nu mini noowhuya, le, oligwe kpumernu, Jizòsi whnu Enine ke Chiokike hne o neewhedna lele nduru, neebekwasi a.

¹⁷ Otu akpìri hiri n'oligwe, naakaa, "Ka bu Nnwò m me whnurnu n'anya, nhne a masiri m."

4

Ornurna Jizòsi

(Mak 1:12,13; Luk 4:1-13)

¹ Enine Nso duru Jizòsi zne n'eli-ikpa ma Ekwensu rna a Ornurna.

² Nga o vukworu onu nri obochi eno iwhnehnie nu abali, wiri gwnurnu a.

³ Nye ornurna wam vakwnusiri a, kanu a, "O buru nu i bu Nnwò Chiokike, kanu akaworugwu ele ka be ghò brèdi."

⁴ Jizòsi saru a, "Be gbaru a n'okwukwo nso, kaa,

'O búo brèdi bu nhne badnu jeeri kpò ziri budnu, kovu nu o bu kpakara ikwu-onu ke hiri n'onu Chiokike whuya.' "

⁵ Ekwensu kwuru a zne Jeruselem, eli-ohna nso, gwuzote a n'olu towa Oro Nso Chiokike,

⁶ o kanu a, "O buru nu i bu Nnwò Chiokike, gbudna ehni

i n'eli hna, kwnornu nu be gbaru a n'okwukwo nso, kaa, 'O jeenye ele enine izi a iwu gbasiri i, be jeegheru i n'aka be, ma i gharu o kpòbi ochi i nu rugwu.' "

⁷ Jizòsi saru a, "Berere kwno, be gbaru a n'okwukwo nso, kaa, 'I rnako Nyenwe i Chiokike i ornurna.' "

⁸ Berere kwno, Ekwensu kwuru a zne rugwu zi n'olu k'agida, gerisi a kpakara eli-eze ke owa nu igwugwu be.

⁹ O kanu a, "M jeenye i kpakara nhne ka, o buru nu i jaadna n'eli kponu m risi eli."

¹⁰ Jizòsi saru a, "Whoga m nu ruwhnu m, Setani, kwnornu nu be gbaru a n'okwukwo nso, kaa, 'I jòokponu Nyenwe i, Chiokike i risi eli. O bu ya kpò bu nye i jeekpenu.' "

¹¹ Ige wam Ekwensu sigbasiri Jizòsi, ele enine izi vakwnusiri a, neeznenu a izi.

Jizòsi panizoru ernu a

(Mak 1:14,15; Luk 4:14,15)

¹² Nga Jizòsi nurnu nu be yisiri Joni n'ikelu, o lahna Galili.

¹³ O whoga nu Nazareti zne wuru nu Kapanom, ke zi nu ngeri osimini, n'eli Zebuloni nu Nafitali,

¹⁴ ma oka be kwuru hite n'onu Azaya nye owhnurninya mezu, kaa,

¹⁵ "Eli Zebuloni nu eli Nafitali, n'apna okne osimini, n'aznu Osimini Jodani, Galili eli ele búo ele Ju.

¹⁶ Ele wu n'ochichiri whnunam agida iwhne,

ele wu n'eli ẹnwu kpusnigwu
bụ ele iwhne nọomukwasi.”

17 Hite n'ige wam Jizọsi
panizoru nọokpo okwo,
naakaa, “Anụ tũhnasna
mkpọma, kwnornu nụ ẹli-eze
Chiokike zị ndundu.”

*Ele mbọm sno apna Jizọsi
(Mak 1:16-20; Luk 5:1-11)*

18 Nga Jizọsi neezne izne
n'ọnu mini Osimini Galili,
ọ whnụ rumu nne lawuru,
Saimoni nye be nookwu Pita
nụ Anduru nwene a, hne
be nọowu igbo n'osimini,
kwnornu nụ be bụ ele
noogbu aznụ.

19 Jizọsi kanụ be, “Anụ
snornu m, m jeeme anụ bụru
ele jọokwuhia ele badnụ lele
kpa anụ noogbu aznụ.”

20 Ngangam, be sigbasi igbo
be sno a.

21 Nga o zneturu nụ
ruwhnu, ọ whnurnu rumu
nne lawuru berere, Jemisi
nnwọ Zebidi nụ Jọni nwene
a, nụ Zebidi nda be. Be zị nụ
rime ọgbo neemekwa igbo be.
Jizọsi sukwu be.

22 Ngangam be sigbasi ọgbo
wam nụ nda be sno a.

*Jizọsi znirni nhne,
gwọ ele nrịria
(Luk 6:17-19)*

23 Jizọsi znernu nụ kpakara
Galili neezni nhne n'oro
ọgbako ele Ju, nọokpo okwo izi
ọma ẹli-eze Chiokike, nọogwo
ele nrịria zị ọdo n'ọdo nụ
ẹhni igbugbu zị ọdo n'ọdo
n'esilawuru be.

24 Ọtnutnu a gazuru
kpakara Siriya, be kwuyanụ

a kpakara ele naaria nrịria
nụ ele ẹhni igbugbu zị ọdo
n'ọdo, nụ ele nọowhnusi anya,
ele renwu ọjo nwugwu, nụ ele
akwukwu nụ ele ngeri ẹhni be
dọnwurnu dọnwu. Jizọsi gwo
kpakara be.

25 Agida ele badnụ hi
nụ Galili, Dekapolisi nụ
Jeruselem nụ Judiya nụ aznụ
Osimini Jodani snornu a.

5

*Jizọsi znirni nhne
n'olu rugwu*

1 Nga Jizọsi whnurnu agida
badnụ wam, o pnezne n'olu
rugwu, daziri ẹli, ele sno apna
a vakwnusi a,

2 ọ panizo neezni be nhne,
naakaa,

*Mkpọma ọso n'ọnu n'ezị
(Luk 6:20-23)*

3 “Ọwa ọma zinu ele mboni nụ
mkpọma,*

kwnornu nụ ẹli-eze
Chiokike bụ ke be.

4 Ọwa ọma zinu ele naagba
mkpe,

kwnornu nụ be jaakasi
be ovu.

5 Ọwa ọma zinu ele zị enwerne
nụ mkpọma,

kwnornu nụ ele kam
jeekehia ọwa.

6 Ọwa ọma zinu ele wiri
nọogwnu nụ ele akpịri
kpọga bẹkwnu n'ome

nhne bụru ọma,
kwnornu nụ ruwho jeeji

be.

7 Ọwa ọma zinu ele nwernu
obirizi

kwnornu nụ be jọdonu
be obirizi.

* 5:3 ke bụ ele noopio Chiokike

8 Ọwa ọma z̄inu ele z̄i r̄ichna n̄u
mkp̄oma,
kwnornu n̄u be j̄owhnu
Chiokike.

9 Ọwa ọma z̄inu ele neeme
udno,
kwnornu n̄u be j̄ookwu
be r̄umu Chiokike.

10 Ọwa ọma z̄inu ele be naak-
pakna ẹhni kwnornu
imerne ọma,
kwnornu n̄u ẹli-eze
Chiokike b̄u ke be.

11 “Ọwa ọma z̄inu an̄u
nga ele badn̄u jaakpari
an̄u, neemekpa an̄u ẹhni,
nookwunu an̄u ọnu ọjo,
naaghagidne an̄u akebne
aghalaghala z̄i ichne ichne
kwnornu n̄u me.

12 An̄u nw̄urnihoru,
mkp̄oma s̄o an̄u n'ọnu k'aḡida,
kwnornu n̄u ọgwo ẹrnu an̄u z̄i
aḡida n'oligwe. Ọ b̄u kpa be
jiri kpakna ele ọwhnurninya
ele be an̄u ọsno ẹhni.

Arua n̄u iwhne
(Mak 9:50; Luk 14:34,35)

13 “An̄u b̄u arua ke ọwa,
k̄ovu ọ b̄uru arua tuwhu ọso
n'ọnu a, be jeeji k̄ini mee a ọ
so n'ọnu? Ọ z̄ia iru ọ bnarn̄u
berere, okwolem be tuwhu a
n'ederezi, ele badn̄u z̄o a ọchi.

14 “An̄u b̄u iwhne ke
ọwa. Mba wu n'olu rugwu
b̄ootugwali.

15 Be z̄a n̄omusi t̄onji b̄ita a
n̄u mkpururu nk̄ita, t̄n̄numa,
n'olu nhne be b̄ita t̄onji, o
neenye kpakara ele z̄i n'oro
wam iwhne.

16 An̄u mee kpa iwhne an̄u
jaazi noonwu n̄u ruwhnu ele
badn̄u, ma be n̄owhnu ẹrnu
ọma an̄u, znarni Nda an̄u ke z̄i
n'oligwe.

Iwu Mozizi

17 “An̄u ch̄eko n̄u m varu
m o lulu iwu Chiokike m̄obu
nhne ele ọwhnurninya gbaru,
m v̄age m o lulu be, m varu m
o mezu be.

18 N'ezi, me kanu an̄u, tem
oligwe n̄u ọwa whume, ọ z̄a
otu nhne ọbula z̄i mat̄i, ke
z̄ikakworu mat̄i ke be jeeg-
weme n'iwu, du nga kpakara
be jeemezu.

19 Nye ọbula ke joolulu otu
n̄u rime iwu ele ka, ọ b̄urubedi
iwu ke kakwo mat̄i, ke jeezni
ele badn̄u kpam, be jookwu
a nye kakwo mat̄i n'ẹli-eze
Chiokike. K̄ovu nye ọbula
ke jaab̄ita iwu, neezni be,
nye wam b̄u nye be jookwu
nye kakwo n'olu n'ẹli-eze
Chiokike.

20 Me naakanu an̄u, ọ b̄uru
n̄u agwa ọma an̄u k̄ala ke ele
zni iwu n̄u ele Farisi mma,
n'ezi, an̄u j̄aabna n'ẹli-eze
Chiokike.

Ovu owe ẹhni

21 “An̄u n̄urnu n̄u be kannu
ele gbaka, ‘I gb̄uk̄o badn̄u,
nye ọbula ke gburu badn̄u
jaabna n'aka ikpe.’

22 K̄ovu me kanu an̄u, nye
nwernu ovu ẹhni megidne
nwene a jaabna n'ikpe. Nye
ọbula ke jaakanu nwene a,
‘Ọ z̄ia iru i bnagwu,’ jeenye
ẹhni a n'aka ele eze-ikpe.
Nye ọbula ke jaakaa, ‘Nye
iwhnirniwhno,’ jeenye ẹhni
a n'aka b̄ekwnu ẹli r̄enwu.

23 Kam kpayaru, ọ b̄uru n̄u
i gweyaru nkesi i n̄u ruwhnu
Chiokike n'ọjo ar̄iohna, i chen-
wanya n̄u nwene i karu n̄u i
mernu a nhne ọjo,

²⁴ sigbasi nkesi i nū p̄i nū ruwhnu ojo ariohna, la, beru ɔsno mee ma j̄i nū nwene i z̄iri n'udno, yahna, nyega nkesi i.

²⁵ “Mee ma j̄i nū nye kwu i neezne ikpe b̄uru ɔma wara wara, nga j̄i nū ya z̄i n'apna, ma nye wam kwu i neezne ikpe gharu o gweru i nyee n'aka nye risi ikpe, nye risi ikpe gweru i nyee n'aka nye neezne izi, be t̄ubna i ikelu.

²⁶ Me kanu i ezi oka, i j̄owhuya p̄i tem i kwuhnata kpakara iwai ipne-aznu i jigwu.

Iznizni gbasiri ome oyi

²⁷ “Anu nuna m nū be kannu ele gbaka, ‘I méko oyi.’

²⁸ K̄ovu nū m naakanu anu, nū nyerukna obula ke jeele nyerinya anya o masi a ma ya nū nwerinya wam dnanyi, o mesilem a oyi nū mkpoma a.

²⁹ O b̄uru nū anya akarikwnunga i jeeme i, i mee mmehie, ghnahia a, tuwhu a n'ehni i, kwnornu nū o jaakanu i mma nū otu nhne zi i n'ehni whogaru, tnunuma be t̄ubna kpakara ehni i nū rime bekwnu eli renwu.

³⁰ O b̄uru nū akarikwnunga i jeeme i, i mee mmehie, gubime a, tuwhu a n'ehni i, kwnornu nū o jaakanu i mma nū otu nū nhne zi i n'ehni whogaru, tnunuma be jootubna kpakara ehni i nū rime bekwnu eli renwu.

Ogba nnam

(*Mat 19:9; Mak 10:11,12; Luk 16:18*)

³¹ “Be kakwnornu nū, ‘Nye obula ke jaagba nnwerne a

nnam, o nyega a okwukwo nnam.’

³² K̄ovu m naakanu anu, nye obula ke jaagba nnwerne a nnam, hne o buo nū o mernu oyi, o neeme nyerinya wam b̄uru nye neeme oyi, nye obula ke j̄olu nnwerne be gbaru nnam bu nye neeme oyi.

Okwe mkwna

³³ “Berere, anu nuna m nū be kannu ele gbaka, kaa, ‘Bita mkwna i kweru, i lahnna aznu nū o mee mkwna i kweru, k̄ovu mee nhne i kweru mkwna nū ruwhnu Nyenwe ai.’

³⁴ K̄ovu me naakanu anu, anu ji nhne obula du risi, anu ji oligwe du risi, kwnornu nū o bu ngadna eze Chiokike.

³⁵ Anu ji owa du risi, kwnornu nū ikpechi otukwasi ochi a, anu ji Jeruselem du risi, kwnornu nū o bu eli-ohna ke eze kwu wam.

³⁶ I ji risi i du risi, kwnornu nū i nwée rikne mee otu rukeri-ize o chna richna m̄obu o ji riji.

³⁷ K̄ovu ikwu-onu anu b̄uru ‘Owe, m jeeme mee a,’ m̄obu, ‘Oza, m jéeme mee a.’ Kwnornu nū nhne obula kariri ka hi nū nye ojo wam.

Iznizni gbasiri omegwnarnu

(*Luk 6:29,30*)

³⁸ “Anu nurnu nū be karu, ‘Anyalanu anya, ize lanu ize.’

³⁹ K̄ovu me naakanu anu, anu megwnarnu ele mernu anu nhne ojo. Nye obula ke gb̄oru i aka nū nsni akarikwnunga, t̄uhnasnanu a nsni berere.

40 Ọ bụrụ nụ nye ọbula pioru o mesị i ọka ma ọ nahọru ị iwo rime i, sịgbasinu a iwo i ke olu masị.

41 Nye ọbula ke jeeme i ma i zne otu maịli, snornu a zne maịli lawuru.

42 Nyega nye ọbula nọorio ị nhne, ị gwákọ nye noopio ma i gbaznisi a nhne njo.

*Whnụ ele irno anụ n'anya
(Luk 6:27,28,32-36)*

43 “Anụ nuna m nụ be karụ, ‘Whnụ nye agbatibi i n'anya, sno nye irno i irno.’

44 Kọvu me naakanụ anụ, anụ whnụ ele irno anụ n'anya,† kpenu ele neemekpa anụ ẹhni okpukpe.

45 Anụ mee kpa, anụ jọobu rụmu Nda anụ ke zị n'oligwe, kwnornu nụ o neeme ma ẹhnam a nọomukwasi badnụ ojo nụ badnụ ọma, o neeme masị ma mini zokwasị ele ome mma nụ ele ojo.

46 Ọ bụrụ nụ anụ whnurnu ele wam n'anya bụ ele nọowhnu anụ n'anya, kini bụ ọgwo ẹrnu anụ? Ọ bụ nụ ele ọna ntụ mée kpam sa?

47 Ọ bụrụ masị nụ ọ bụ rụmu nwene anụ kpọi bụ ele anụ neebekwu rẹwhna, kini bụ nhne anụ mernu karụ ele berere? Ọ bụ nụ ele máa Chiokike mée kpam sa?

48 Anụ jọobu ele zuru ozu lele kpa Nda anụ ke oligwe zuru ozu.

6

Iznizni gbasiri okesi nhne

1 “Anụ whnụ nụ anụ zá neeme nhne ọma anụ nụ ruwhnu badnụ, ma be whnurnu anụ. Anụ mee kpam, anụ nwée ọgwo ẹrnu nụ hne Nda anụ ke oligwe zị.

2 “Ke bụ nụ nga ị nọornu ẹrnu obirizi i, i jíkọ ọkwodu kpọ okwo lele kpa ele ruwhnu lawuru mee n'oro ọgbako ele Ju, ma n'apna, ma ele badnụ ja be mma. Owe, m naakanụ anụ ezi ọka, be nwezulem ọgwo ẹrnu ke be.

3 Kọvu nga ị nọornu ẹrnu obirizi, i kwéko akarita ị mahia nhne akarikwnunga ị neeme,

4 ma ẹrnu obirizi ị bụrụ nhne zị mgwụgwa. Nda ị ke nọowhnu nhne zị nụ mgwụgwa jọokwuhmata ị.

*Iznizni gbasiri okpukpe
(Luk 11:2-4)*

5 “Nga anụ neekpe okpukpe, anụ mékọ lele ele ruwhnu lawuru, kwnornu nụ ọ naamasị be o gwuzoru n'oro ọgbako ele Ju ma ngeri apna neekpe okpukpe ma ele badnụ whnurnu be. Owe, m naakanụ anụ ezi ọka, be nwezulem ọgwo ẹrnu be.

6 Kọvu nga i neekpe okpukpe, bnazne nụ rime oro ị, nga ị gbasnimernu mgbo ị, kpenu Nda ị ke zị nụ mgwụgwa, Nda ị ke nọowhnu nhne zị nụ mgwụgwa jọokwuhmata ị.

7 Nga anụ neekpe okpukpe, anụ kwúkọ agịda ọka etekne, lele kpa ele máa Chiokike mee, kwnornu nụ be naari

† 5:44 Agwna ọkwukwo kamasiri: ọzi ele nọovu anụ ọnu, menu ele sno anụ irno nhne ọma

nụ be jọonu ogologo okpukpe be.

⁸ Anụ kpákwadia agwa lele be, kwnornu nụ Nda anụ magwụ kpakara nhne ke zị anụ mkpa, sụ anụ ke rjọ a.

⁹ “Anụ kpe okpukpe kpa, ‘Nda aị ke zị n'oligwe, rẹwhna ị bụru nhne zị nsọ,

¹⁰ ẹli-eze ị va, be mee nhne i pioga,

kpa be mee a n'oligwe, be mee a kпам n'ọwa.

¹¹ Nyega aị wiri tna, ke joozunu aị ọbochi tna.

¹² Gbarụnu aị nhne ojo a mernu, lele kpa a naagbarụnu ele mernu aị nhne ojo.

¹³ I yísi aị nụ rime nhne ọrnurna, kọvu dọhia aị n'aka nye ojo.’*

¹⁴ Ọ bụru nụ anụ gbarụnu badnụ ọgahie be, Nda anụ ke oligwe jaagbarụnu anụ masị.

¹⁵ Kọvu ọ bụru nụ anụ jáagbarụnu badnụ ọgahie be, Nda anụ ke zị oligwe jáagbarụnu anụ.

Iznizni gbasiri ovu ọnu

¹⁶ “Nga anụ noovu ọnu, anụ mékọ lele ele ruwhnu lawuru, ele naagbarụ ruwhnu, dọnwuta ruwhnu ma ọ zị kpa ele badnụ mahia nụ be noovu ọnu. Owe, m naakanụ anụ ezi ọka, be nwezulem ọgwo ẹrnu be.

¹⁷ Kọvu nga ị noovu ọnu, gweru mọno te nụ risi i, snụ ruwhnu i,

¹⁸ ma ele badnụ gharu ọ mahia nụ ị noovu ọnu. Kọvu Nda ị nye nọowhnu nhne zị nụ mgwugwa jaamahia, Nda ị jọokwu ị ọgwo.

Ekwnu ke zị n'oligwe (Luk 12:33,34)

¹⁹ “Anụ kpábitanu ẹhni anụ ẹkwnu n'ọwa, hne akịka nụ ajari naata, hne ele buznu neeliwa ọro nooznu buznu,

²⁰ kọvu anụ kpabitanu ẹhni anụ ẹkwnu n'oligwe, hne akịka nụ ajari zá naata, ele buznu zá neeliwa ọro nooznu buznu.

²¹ Kwnornu nụ hne ẹkwnu ị zị, bụ hne mkpoma ị jaazi masi.

Iwhne ke ẹhni (Luk 11:34-36)

²² “Iwhne ke ẹhni bụ anya, ke bụ nụ ọ bụru nụ anya ị bụru ọma, kpakara ẹhni ị jọobu iwhne iwhne.

²³ Kọvu ọ bụru nụ anya ị zila budnu, kpakara ẹhni ị jeejipiya n'ọchichiri. Ọ bụru nụ iwhne ke zị ị n'ẹhni bụ ọchichiri, ọchichiri wam jaahna ezi.

Chiokike nụ ẹkwnu (Luk 16:13; 12:22-31)

²⁴ “Ọ zá nye nwernu rikne bụru ọhi nda kwu lawuru. Ọ bụru kпам, o jooznu otu irno, whnụ ke berere n'anya. Mọbu ọ jọsobisinu otu k'agida, ledna ibne a anya. Anụ jọbuli ọhi Chiokike nụ ọhi ẹkwnu.

²⁵ “Ka bụ nhne me kwno naakanụ anụ, anụ rígbuko ẹhni anụ n'oriri gbasiri budnu

* **6:13** Agwna ọkwukwo kwuru: *kwnornu nụ ẹli-eze bụ ke i, ma iknerna, ma igwugwu, tim tom. Amim.*

anụ, nhne anụ jeeri mọbu nhne anụ jọonwo, mọbu gbasiri ẹhni anụ iwo anụ joowo. Ọ bụo bụdnu kakwo wiri? Ọ bụo ẹhni kakwo iwo sa?

²⁶ Anụ le wọnunu ke oligwe, be ghá mkpuru, be gwémasia nhne n'ekwu, ọ zía nhne be chibna n'ọbna, kọvu Nda anụ ke oligwe nọoznu be. Anụ bụo nhne gburu okne ọnu ahia karu be?

²⁷ Ndaa nye n'esilawuru anụ nwernu rikne tukwasi nhne matị n'ogologo bụdnu a hite n'origbu ẹhni a?

²⁸ “Kini mernu anụ naarigbu ẹhni anụ gbasiri iwo anụ joowo? Anụ lekọm okoko zị n'ohia, kpa be nooso, be zá nọdogbu ẹhni be n'ernu, be kwné ikpe.

²⁹ Kọvu me kanu anụ ọ bụbedi Solomoni n'iwhuru a, nụ kpakara igwugwu a, yige eyi lele otu nụ rime be.

³⁰ Ọ bụru nụ Chiokike wosiri achara ke ohia iwo kpa, ke zị tna, ekile be túbna a n'ite bẹkwnu, ọ bụ nụ o jóowosi anụ iwo ke kakwo, anụ ele ọkwnata ovu matị?

³¹ Anụ rígbuko ẹhni anụ, naakaa, ‘Ndaa nhne a jeeri?’ mọbu, ‘Ndaa nhne a jọonwo?’ mọbu, ‘Ndaa nhne a joowo?’

³² Kwnornu nụ kpakara nhne ele ka bụ nhne ele máa Chiokike noopio, Nda anụ ke oligwe magwu nụ kpakara nhne ka zị anụ mkpa.

³³ Kọvu anụ beru ọsno pio ẹli-eze Chiokike, nụ ome ọma a, be jootukwasinu anụ kpakara nhne ele ka.

³⁴ Kam kpayarụ, anụ rígbuko ẹhni anụ n'oriri gbasiri ekile, ekile jaarhianu ẹhni a. Mmekpẹhni ke ọbochi ọbula zunnem a.

7

O kpe ele berere ikpe
(Luk 6:37,38,41,42)

¹ “Anụ kpé ikpe, ma Chiokike gharu o kpe anụ ikpe.

² Kwnornu nụ ikpe anụ kperu bụ nhne Chiokike jeeji kpe anụ, nhne anụ jiri tūnu nye berere bụ nhne Chiokike jeeji tūnu anụ.

³ Kini kpayarụ i ji neele nhne matị ke zị n'anya nwene i, kọvu i zá naari ọriri gbasiri igwe-isisi ke zị n'anya i?

⁴ Ndaa kpa i jeeji kanu nwene i, ‘Nwene, sete me gweme nhne matị ke zị i n'anya,’ ma, le, igwe-isisi zị n'anya ke i?

⁵ Jị nye ruwhnu lawuru, beru ọsno gweme igwe-isisi ke zị n'anya ke i, ngam, i jọowhnusnama ọsno o gweme nhne matị wam n'anya nwene i.

⁶ “Anụ nyéko nkita nhne zị nsọ, ọ zị be tūhnasna dọka anụ. Anụ túsako palị nụ ruwhnu ezni, ọ zị be zọkwasi be ọchi.

Rio, pio, znu aka nụ mgbo
(Luk 11:9-13)

⁷ “Anụ rio, be jeenye anụ, anụ pio, anụ joopiohia, anụ znu aka n'ọnu-mgbo, be jaag-bamanu anụ.

⁸ Kwnornu nụ nye ọbula ke nọorio, nọoriohia, nye noopio,

noopiohia, nye nooznu aka nu mgbo, be jaagbamanu a.

9 “Ndaa nda n'esilawuru anu nye nnwo a jorio bredi, o nyee a akaworugwu?

10 Mōbu nu o rjo a aznu, o nyee a agwo?

11 O buru nu anu, anu bu ele ojo, magwu kpa be nyee rumu anu nkesi buru oma, o ko buru Nda anu ke zi n'oligwe, o bu nu o jeenye ele norio a nhne buru oma?

12 Kpakara nhne ke anu pioru ma badnu menu anu, anu menu masi ele badnu kpa. Kwnornu nu ka bu nhne iwu nu ele owhnurninya kwuru.

*Apna zi nworonwo
(Luk 13:24)*

13 “Anu garu onu-mgbo ke zi nworonwo bna. Kwnornu nu onu-mgbo nu apna wam ke noodubna badnu nu mwhu zi rude, ele naaga a masi zi agida.

14 Kovu nu onu-mgbo wam zi nworonwo, apna wam ke noodubna nu budnu naara ehni nu oguga, ele noopohia zi ele nu ele.

*Isisi nu mkpuru a
(Luk 6:43,44)*

15 “Anu zeri ele owhnurninya aghalaghala, ele naavakwnusi anu niwo aturu, kovu nu rime be, be bu edu nōdogbu aturu.

16 Anu jaamahia be hite nu mkpuru be neemi. Ele badnu be nōghohia mkpuru vai ni n'isisi akukara, mōbu mkpuru figi n'igwnu-ogna?

17 Kpa masi, omamarna isisi miga mkpuru oma, kovu isisi buo oma miga mkpuru ojo.

18 Omamarna isisi nwée rikne mi mkpuru ojo, isisi ojo nwée rikne mi mkpuru oma.

19 Isisi obula ke minyala mkpuru oma, be jeegbudna a, tubna a nu rime bekwnu.

20 Kam kpararu, anu jeehi nu mkpuru be mahia be.

*Odo aka nu nsu
(Luk 13:25-27)*

21 “O buo nye obula ke noosukwu m, ‘Nyenwe ai, Nyenwe ai,’ jaabna n'eli-eze Chiokike, okwolem nye neeme nhne Nda m ke zi n'oligwe noopio.

22 Agida badnu jaakanu m n'obochi wam, ‘Nyenwe ai, Nyenwe ai, a jile rewhna i whnu owhnurninya? A jile rewhna i chihala ele renwu ojo? A jile rewhna i rnu ernu ndu-ehni zi odo n'odo?’

23 M jaakanu be, ‘M maam nye anu bu, anu whoga nu hne me zi, ele aruru-eli.’

*Ntu-eli lawuru
(Luk 6:47-49)*

24 “Nye obula ke nonu kpakara ikwu-onu m neeme be, m jeeji a sninu nyerukna ke marnu nhne, nye wuru oro a n'olu rugwu.

25 Mini zo, mini-eli gba, ruwhere whe masi, kwana oro wam, kovu o dnana, kwnornu nu o turu ntū-eli a n'olu rugwu.

26 Nye obula ke nonu kpakara ikwu-onu m ka, o za neeme be, m jeeji a sninu nye

iwhnirniwhno, nye wuru ọro a n'olu rịzna.

²⁷ Mini zo, mini-ẹli gba, ruwhere whe masi, kwana ọro wam, ọro wam dna girigidim, tọ ogwnu.”

Rikne Jizọsi

²⁸ Ọ dọ nga Jizọsi kwukworu kpakara ikwu-ọnu ka, nhne o znirni du kpa be hna ẹhni.

²⁹ Kwnornu nọ o neezni nhne lele nye nwernu rikne, ọ bọo lele ele zni iwu ele Ju.

8

Jizọsi gwọru nye nchnichna (Mak 1:40-45; Luk 5:12-16)

¹ Nga Jizọsi hiri n'olu rugwu hiedna, igbudu ele badnọ snornu a.

² Otu nye naarija nchnichna vakwnusiri a, gbonu a mpnerne ọchi, kaa, “Nyenwe aị, ọ bọru nọ i pioru, i nwernu rikne mee m, m ziri rịchna.”

³ Jizọsi dọsnima aka kpatu a, kaa, “M pioru m, ziri rịchna.” Ngangam, nchnichna wam whọgaru n'ẹhni a.

⁴ Jizọsi kanu a, “Ọ zá nye ọbula i kanu, kọvu la, gweru ẹhni gesi nye ọkwa ariọhna, gweru masi nhne Mozizi nyernu n'iwu kwa ariọhna ma ọ bọru nhne akebe nyee be.”

Jizọsi gwọru nnwọ izi *nye risi ogwnu*

(Luk 7:1-10)

⁵ Nga Jizọsi bnanyarnu Kapanom, otu nye neechi otu riwhu ele ogwnu vakwnusiri a, rịo a,

⁶ kaa, “Nyenwe aị, nnwọ izi m dnanyi gwu n'oro, otu

ngeri ẹhni a nwurnu onwu, ọ zi n'igbugbu k'agida.”

⁷ Jizọsi kanu a, “M jaava, gwọ a.”

⁸ Nye wam neechi otu riwhu ele ogwnu kanu a, “Nyenwe aị, m duge m nu nye i jaabnanya ọro a, kọvu kwu ọka kpọi, i jọogwo nnwọ izi m.

⁹ Kwnornu nọ m bu m nye zi nu mkpururu ọchichi ele kakwo m, m nwernu m ele ogwnu zi nu mkpururu m, me kanu nye ka, ‘Zne,’ o zne, m kanu nye berere, ‘Vaa,’ ọ vaa, m kanu nnwọ izi m, ‘Mee ka,’ o mee a.”

¹⁰ Nga Jizọsi nurnu ọka ka, o duru a ẹhni, ọ kanu ele sno a n'aznu, “N'ezi, me kanu anu, m whnulele m okwnata ovu hna kpa, ma nu ovu nye Izireli.

¹¹ Me kanu anu nu agida badnọ jeehi n'obosi ẹhnam nu odidna ẹhnam va, snornu Eberham, nu Aziki, nu Jekọpu, daziri ẹli n'ẹli-eze Chiokike,

¹² kọvu nu be jaachibna ele kwesiri ọ bna n'ẹli-eze Chiokike nu rime ọchichiri, hne be jaazi naakwna ẹkwna, naata rukwnurnu-ize.”

¹³ Jizọsi kanu nye wam neechi otu riwhu ele ogwnu, “La, be menu i lele kpa i kweru.” ẹhni bọru nnwọ izi a ọma ngangam.

Jizọsi gwọru ele nrịria

(Mak 1:29-34; Luk 4:38-41)

¹⁴ Nga Jizọsi bnarnu ọro Pita, ọ whnurnu nne nnwerne a hne ọ dnanyi n'okpata naarija ẹhni orne bekwnu.

15 Ọ nwụgwuru a aka, ẹhni orne bẹkwnu wam sigbasi a, o lizọ, bete neeznenu be izi.

16 N'ogbednachi, be kwuyanụ a agida ele ẹnwu ojo nwụgwu, ọ ji ikwu-ọnu chihala ele ẹnwu ojo, gwọ kpakara ele naariya nriria.

17 Ọ gwọru be, ma nhne Azaya nye ọwhnurninya kwuru mezu, kaa, "Ya n'iwuhuru a vumernu kpakara ẹhni igbugbu a, vuru masi nriria aji zị ọdo n'odo."

*Nhne o joowhu
ele sno Jizosi
(Luk 9:57-62)*

18 Nga Jizosi whnurnu agida ele badnu gbaru a gburugburu, ọ kanu ele sno apna a ma be whe aznu osimini kiyari.

19 Otu nye zni iwu ele Ju vakwnusiri a, kanu a, "Nye-zni-nhne, m joosno i, penupe obula i neezne."

20 Jizosi kanu a, "Edu nwernu mkpewu hne be dnanyi, onunu oligwe nwernu alikwu hne be zukwa inwe, kovu Nnwọ ke Badnu nwée hne ọ jaabita risi a."

21 Nye ke berere n'esilawuru ele sno apna a, kanu a, "Nyenwe aji, kweru m me beru osno lite nda m."

22 Kovu Jizosi kanu a, "Sno m, gharu ele nwurnu onwu ma be lite ele nwurnu onwu ibne be."

*Jizosi bigboru
ruwhere osimini
(Mak 4:35-41; Luk 8:22-25)*

23 Nga Jizosi bnarnu nu rime ogbo, ele sno apna a sno a.

24 Ngangam, okne ruwhere beteru ewhe n'olu osimini, ke mernu mini nonwubna nu rime ogbo, kovu Jizosi n'iwuhuru a neezni anyarna.

25 Ele sno apna a vakwnusiri a, kpatnenya a, kanu a, "Nyenwe aji, dokia aji, a noowhu."

26 Ọ kanu be, "Kini mernu anu notu ogwnu, anu ele okwnata ovu mati?" O lizo, bigbo ruwhere osimini, ohna dna bii.

27 O du kpa be hna ẹhni, be naakaa, "Nye ka bu ọdo badnu kini? Ruwhere nu okne osimini noobnotenu a nsni."

*Jizosi gworu
ele rukna lawuru*

(Mak 5:1-20; Luk 8:26-39)

28 Nga ọ varu n'aka osimini kiyari n'eli ele Gadara, ele rukna lawuru ele ẹnwu ojo nwụgwu, ele hi nu hne be li iznu whuya, ele ruwhnu be tu ogwnu, ke kpayaru ọ za nye neewhe n'apna wam.

29 Be siwama okokoba, kaa, "Aji nu ji nwekogwu kini, Jizosi, ji Nnwọ Chiokike? I varu ma i ta aji awnwhnu hne ige aji yoduge?"

30 Agida ezni zị hne zila ikere naata wiri.

31 Ẹnwu ojo wam riasno a, kaa, "O buru nu i chihala aji, zizne aji ma a bna nu rime ezni ele ka."

32 Ọ kanu be, "Anu zne." Be whuya, zne bna n'agida ezni wam, kpakara agida ezni

wam gbadnarnu nu ngwu-langwu dnabna nu rime osimini, rinwu nu rime mini.

³³ Ele nooznu be gbawhu, bna n'eli-ohna wam tnu si nhne be whnu ru, nu nhne mernu ele wam renwu ojo nwugwu.

³⁴ Kpakara ele eli wam whuya kwnusi Jizosi. Nga be whnu ru a, be riasno Jizosi o whoga n'eli be.

9

Jizosi gworu nye ehni a donwurnu o donwu

(Mak 2:1-12; Luk 5:17-26)

¹ Jizosi bna nu rime ogbo, lahna aka osimini kiyari, va n'eli ke a.

² Be vyanu a otu nyerukna ke ngeri ehni a donwurnu o donwu, dnanyi n'olu okpata, nga Jizosi whnu ru okwnata mkpoma be, o kanu nye wam ngeri ehni a donwurnu o donwu, "Mkpoma si i rikne, si nnwo m, be gbarunam ji kpakara mmehie i."

³ Agwna ele zni iwu ele Ju nesikwa nu mkpoma be, "Nyerukna ka nookwulu Chiokike."

⁴ Jizosi mahiaru mkpoma be, o kanu be, "Kini kpahiaru anu naari oriri ka nu mkpoma anu?"

⁵ Ndaa ke zi ewheke, o kaa, 'Be gbarunam ji kpakara mmehie i,' mabu, o kaa, 'Lizo, zne izne?'

⁶ Mjeegesi anu nu Nnwọ ke Badnu nwernu iknerna n'owa o gbaru mmehie." O kanu nye wam ngeri ehni a

donwurnu o donwu, "Lizo, chiri etere i, la oro i."

⁷ Nyerukna wam lizo, la n'oro a.

⁸ Nga agida ele badnu whnu ru a, be tu ogwu, znari Chiokike, nye nyegarụ badnu iknerna nu kpa.

Jizosi sukwuru Matiyo

(Mak 2:13-17; Luk 5:27-32)

⁹ O du nga Jizosi hiri nu pii neewe, o whnu ru otu nye rewhna a bu Matiyo, hne o dazi n'oro ntụ, o kanu a, "Sno m." O lizo snornu a.

¹⁰ Nga Jizosi dazi neeri wiri n'oro Matiyo, agida ele ona ntụ nu ele mmehie varu snornu Jizosi nu ele sno apna a neeri wiri.

¹¹ Nga ele Farisi whnu ru a, be sikwa ele sno apna a, "Kini mernu Nye-zni-nhne anu sno ele ona ntụ nu ele mmehie neeri wiri?"

¹² Nga Jizosi nu ru a, o kanu be, "Mkpa dibia ziko naakpa ele ehni buru oma, okwolem ele nriria.

¹³ Kovu anu zne muhia nhne ka bu, 'M noopio obirizi, o buo ariohna.' Kwnornu nu m vage m o sukwu ele oma, kovu ele mmehie."

Ajji gbasiri ovu onu

(Mak 2:18-22; Luk 5:33-39)

¹⁴ Ele sno apna Joni vakwnusiri Jizosi sikwa a, "Kini kpayarụ ai nu ele Farisi noovu onu ige obula, kovu ele sno apna i za noovu onu?"

¹⁵ Jizosi saru be, "Ele be ziri va hne be noolu nnwerne ikne, be jaazi noodukwa ruwhnu hne be nu nye noolu nnwerne ikne zi? Kovu obochi

vawa nga be jaanahoru be nye n̄olu nnwerne ikne, ige wam be joovu onu.”

16 “O zá nye jeegweru mkpekele ikpe ikne dn̄usni n'iwo oknani, kwnornu n̄u ke ikne j̄odokahala nhne n'ehni iwo oknani, o j̄odoka ke kakwo agida.

17 O zí masi nye jeegweru manya ikne gbasì n'olori akpukpo oknani, be mee kpam, orori wam jaag-bawama, manya n̄u orori akpukpo whume etekne. K̄ovu be gbasì manya ikne n'olori akpukpo ikne, kam jaabita be lawuru nkari.”

*Nnwọ rinya matì n̄u
nwerinya nt̄u on̄arna
(Mak 5:21-43; Luk 8:40-56)*

18 Nga o naakanu be oka ka, le, otu nye risi varu, kponu a risi eli, kaa, “Nnwọ m rinya nwunam kitna, kovu va tukwasi a aka i, o jaazi budnu.”

19 Jizosi lizo, snornu a zne, ele sno apna a sno a masi.

20 Otu nyerinya ke naarija nt̄u on̄arna nri n̄u awha lawuru, garu a n'aznu, kpatu onu iwo a aka.

21 Kwnornu n̄u nyerinya kannu ehni a, “O buru n̄u me kpatu onu iwo a aka kpoi, o jeeme ehni buru m oma.”

22 Kovu n̄u Jizosi tuhnasarnu, whnu a, kanu a, “Nnwọ m rinya, mkpoma si i rikne, okwnata mkpoma i zn̄ohialam ji.” Be gworu nwerinya wam ngangam.

23 Nga Jizosi varu n'oro nye risi wam, whnu ele ji opi

n̄ogwnu eri oli iznu n̄u agida mkpakpo pii,

24 o kanu be, “Anu whoga hna, kwnornu n̄u nnwọ rinya matì ka nwuna onwu, kovu n̄u o neezni anyarna.” Be mu a rumu.

25 Nga o chihalaru agida ele badnu wam, o bna n̄u rime oro, nwugwu nnwọ rinya matì wam n'aka, nnwọ rinya matì wam lizo.

26 Otnutnu a gazu kpakara eli wam.

Jizosi gworu ele isni

27 Nga Jizosi hiri n̄u pii whuya, ele isni lawuru snornu a, neesi lulo, naakaa, “Ji Nnwọ Devidi, donu ai obirizi.”

28 Nga o bnarnu n'oro, ele isni lawuru wam vakwnusi a, Jizosi sikwa be, “Anu kweru n̄u m nwernu m rikne o gwo anu?”

Be kaa, “Owe, Nyenwe ai.”

29 O kpatu be aka n'anya, kaa, “Lele kpa okwnata mkpoma anu n̄u, o menu anu kpam.”

30 Anya be snama. Jizosi do be aka n̄u nsni, kaa, “Whnu n̄u o zá nye anu kanu.”

31 Kovu nga be whogaru, be wheke rehna Jizosi kpakara eli wam.

Ogwugwo nye mgbu

32 Nga be n̄owhoga, be kwuyan̄u Jizosi nye mgbu ke renwu ojo nwugwu.

33 Nga o chihalaru renwu ojo wam, nye mgbu wam kwuru oka, o du agida ele badnu ehni be, naakaa, “A whnulele nhne n̄u kpa n'Izireli.”

³⁴ Kọvu ele Farisi karu, “O ji rikne nye risi renwu ojo naachihala ele renwu ojo.”

Ele ernali ele nu ele

³⁵ Jizosi neezneghari kpakara eli-ohna ma nu mgbu neezni nhne n'oro ogbako be, n'okpo okwo izi oma eli-eze Chiokike, n'ogwo kpakara nriria nu ehni igbugbu zi odo n'odo.

³⁶ Kọvu nu nga o whuru agida ele badnu wam, o donu be obirizi, kwnornu nu inwe gwuru be, be nwe rikne yinu ehni be aka, be gbasaru lele aturu nwe nye noznu be.

³⁷ O kanu ele sno apna a, “N'ezi, ogwe nhne ekwu zi agida, kovu nu ele ernu zi ele nu ele.

³⁸ Kam kpararu, anu rio Nyenwe ogwe nhne ekwu ma o zizne ele ernu n'ekwu a.”

10

Ele izi nri nu ebo

(Mak 3:13-19; Luk 6:12-16)

¹ Jizosi sukwuru nri nu badnu lawuru wam ele sno apna a. O nyee be rikne be chihala renwu ojo, gwọ masi kpakara nriria nu ehni igbugbu zi odo n'odo.

² Ka bu rewhna ele izi nri nu ebo wam, nye mbom bu Saimoni, nye be nookwu Pita, nu Anduru nwene a, nu Jemisi nwo Zebidi nu Joni nwene a,

³ Filipu nu Batolomi, Tomosi nu Matiyu nye ona ntu, Jemisi nwo Alifayosi nu Tadiyosi,

⁴ Saimoni nye zi n'esilawuru ele noonwu bekwu nu

mkpoma, nu Judasi Isikarioti, nye reru a.

Ernu ele izi nri nu ebo

(Mak 6:7-13; 13:9-13; Luk 9:1-6; 21:12-17)

⁵ Jizosi zihala nri nu badnu lawuru ka, do be aka nu nsni, kaa, “Anu znego n'eli ele buo ele Ju, mọbu nu rime eli-ohna obula ke ele Sameria.

⁶ Kọvu anu zneknusi ele Izireli, ele nu lele rumu aturu whuru owu.

⁷ Nga anu neezne anu kanu be, ‘Eli-eze Chiokike zi ndundu.’

⁸ Anu gwọ ele nriria, mee ele wuru onwu be hi n'enu lizo, anu gwọ ele nchnchna, anu chihala renwu ojo. Anu naharu ewhu ewhu, anu nyee n'ewhu ewhu.

⁹ Anu ji iwai obula nu rekpa anu.

¹⁰ Anu ji rekpa n'izne anu, mọbu iwo lawuru, mọbu okoro-ochi, mọbu mkpara, kwnornu nu nye ernu kwesiri be nyee a wiri nu hne o noru ernu.

¹¹ “Eli-ohna obula, mọbu mgbu obula anu barnu, anu piohia ezi badnu nu rime a, daziri pi tem anu whoga.

¹² Nga anu barnu n'oro wam, anu kaa, ‘Udno zinu anu.’

¹³ O buru nu oro wam buru oma, udno anu jaadazinu a, kovu nu o buru nu oro wam buo oma, udno anu jeehneknusi anu.

¹⁴ Nye obula ke nabnanyana anu, ke nuna ikwu-onu anu, anu jowhoga n'oro wam mọbu n'eli-ohna wam, lisnama ruznurnuznu ochi anu.

15 N'ezi me naakanu anu, be jodonu eli Sodom nu Gomora obirizi n'obochi ikpe karu eli-ohna ki.

16 "Le, m neezihala anu lele atnuru n'esilawuru edu, anu nwe ako lele agwo, kpa enwerne lele nduru.

17 "Kovu anu ze ele badnu, kwnornu nu be jeegweru anu nyee n'aka ele ikpe, be jaapnia anu nhne n'oro ogbako ele be.

18 Be jookwuru anu zne nu ruwhnu ele risi ochichi nu ele eze kwnornu m, ma anu kanu be nhne gbasiri, ma ele buo ele Ju.

19 Kovu nu nga be jeegweru anu nyee ele ikpe, mkpoma lako anu mini kpa anu jogoru onu anu mabu nhne anu jookwu, ige wam be jeenye anu nhne anu jookwu.

20 Kwnornu nu o buo anu nookwu oka, kovu o bu Enine ke Nda anu nookwu oka nu rime anu.

21 "Nwene jeegweru nwene a nyee ma be gbu a, nda jeegweru nnwo a nyee, rumu jeelizo megidne ele muru be, mee be nwuma.

22 Kpakara ele badnu joosno anu irno kwnornu nu rewhna m, Kovu be jooznohia nye obula ke jaaknata mkpoma dazigidne du okwukwo kpakara nhne.

23 Nga be kpagburu anu n'otu eli-ohna, anu gbazne nu ke berere. Me naakanu anu ezi oka, anu jagazu kpakara eli-ohna Izireli du nga Nnwọ ke Badnu jaava.

24 "Nye sno apna nye-zni-nhne jাকা nye zni a nhne. Ohi jাকা nyenwe a.

25 O dulam nga nye sno apna nye-zni-nhne joonu lele nye zni a nhne, nu ohi o nu lele nyenwe a. O buru nu be sukwuru nda nwe oro Belizibolu, o bu nu be jooosukwu ele oro a karukwo?

*Nye anu jootu ogwnu a
(Luk 12:2-7)*

26 "Anu tuko ogwnu be, kwnornu nu o za nhne be kpusnirni okpusni ke be jookpume, mabu nhne zi mgwugwa ke be jamaahia.

27 Nhne me kannu anu n'ochichiri, anu kwu a n'iwnehnie, nhne be tukasiri nu nsni, anu kwusa a n'olu oro.

28 Anu tu ogwnu ele noogbu ano-ehni, ele nwee rikne gbu mkpoma. Kovu anu tu ogwnu nye wam ke nwernu rikne gbu mkpoma nu ano-ehni nu bekwnu eli renwu.

29 Be za neere wonzna lawuru otu mkpuru iwai mati? Kovu otu nu rime be jadna n'eli su Nda anu kwéle.

30 Kovu nu kpakara rukerize ke zi anu nu risi gwnurnu ogwnu.

31 Ogwnu tu anu, anu zi okne onu ahia karu agida wonzna.

*O kwuhia nu o ju Karaishi
(Luk 12:8,9)*

32 "Nye obula ke jookwuhia m nu ruwhnu ele badnu, o bu ya bu nye me jookwuhia nu ruwhnu Nda m ke oligwe.

33 Kọvu nye ọbula ke jọgonahoru m nọ ruwhnu ele badnọ, bọ nye me jọgonahoru nọ ruwhnu Nda m ke zị n'oligwe.

Ọ bụo udno

kọvu ama-ọgwnu

(Luk 12:51-53; 14:26,27)

34 “Anụ chéko nụ m varụ m o gweya udno n'ọwa, m váge m o gweya udno, kọvu ama-ọgwnu.

35 Kwnornu nụ m varụ m o kewa

‘nnwọ rukna nụ nda a,
nnwọ rinya nụ nne a,
nnwerne nnwọ nụ nne nzi a.

36 Nye irno badnọ jọbu ele ezi-nụ-oro a.’

37 “Nye ọbula ke whnurnu nda a mọbu nne a n'anya karụ m, kwésile m, nye whnurnu nnwọ a rukna mọbu nnwọ a rinya n'anya karụ m, kwésile m.

38 Nye ọbula ke vúrúle ọgba a sno m n'aznụ, kwésile m.

39 Nye ọbula ke noopio bụdnu a jootuwu a, nye tuwhuru bụdnu a kwnornu m, joopohia a.

Ọgwo ọrnu

(Mak 9:41)

40 “Nye ọbula ke nabnanyarnụ anụ, nabnanyarnụ m, nye nabnanyarnụ m, nabnanyarnụ nye ziyaru m.

41 Nye ọbula ke nabnanyarnụ nye ọwhnurninya kwnornu nụ ọ bụ nye ọwhnurninya, jaanahia masị ọgwo ọrnu nye ọwhnurninya. Nye nabnanyarnụ nye mee mma kwnornu nụ ọ bụ nye mee mma, jaanahia ọgwo ọrnu nye mee mma.

42 Nye ọbula ke jookwute otu nụ rime ele matị ka otu okiko mini jiri iyi kwnornu nụ ọ bụ nye sno apna m, owe, me naakanụ anụ ezi ọka, ọ jaanahiariri ọgwo ọrnu a.”

11

Jizọsi nụ Jọni
Nye Wụ Mini

(Luk 7:18-35)

1 Nga Jizọsi nyekworu ele sno apna a nri nụ ẹbo wam iwu, o hiri nụ pị whọga, zne zni nhne, kpọ okwo izi ọma kpakara ẹli-ọhna zị be ndundu.

2 Jọni nurnu n'oro ikelu kpakara ọrnu Karaisi nọrnu, o zizne agwna ele sno apna a.

3 Be sịkwa a, “Ọ bụ jịwa bụ nye jaava, sọbu a le anya nye berere?”

4 Jizọsi sarụ be, “Anụ lahna kanụ Jọni kpakara nhne anụ nurnu nụ nhne anụ whnurnu,

5 ele isni nọowhnu ọsno, ele mgworo neezne izne, be neeme ele nchnichna be ziri richna, ele nsni inyo nọonu nhne, ele nwurnu ọnwu lizọru n'ẹnwu, be neezni ele mboni izi ọma.

6 Chiokike jọgozi nye ọbula ke jula m kwnornu nhne me mernu.”

7 Nga ele sno apna Jọni larụ, Jizọsi bete naakanụ agida ele badnụ wam nhne gbasiri Jọni. Ọ sịkwa be, “Kini bụ nhne anụ znernu ọ whnụ n'ẹli-ikpa? Ekere achara ruwhere noovu?”

8 Sọbu kini nhne anụ znernu ọ whnụ? Nyerukna wogwu iwo zị piali piali sa?

Le, ele wogwu iwo zị pịali pịali zị n'oro ele eze.

⁹ Anụ kanụ m, kịni bụ nhne anụ whogaru zne ọ whnụ? Nye ọwhnurninya sa? Owe! Nye kakwo nye ọwhnurninya.

¹⁰ Nye ka bụ nye be gbaru nhne gbasiri a n'okwukwo nsọ, kaa,

'Le, m neezizne nye izi m nụ ruwhnu i,
nye jeemekwata apna i
nụ ruwhnu i.'

¹¹ N'ezi me kanụ anụ, n'esilawuru ele ele rinya murnu, ọ zá nye ke kakwo Jóni Nye Wụ Mini, kovu nye zikakworu matị n'eli-eze Chiokike kakwo Jóni.

¹² Hite n'obochi Jóni Nye Wụ Mini dụ kịtna, be neeme ẹli-eze Chiokike nhne rikne, ele gbasiri rikne naagbalị ọ bna nụ rime a.

¹³ Tem dụ n'ige Jóni, kpakara ele ọwhnurninya nụ iwu kwuru nhne gbasiri ẹli-eze Chiokike wam.

¹⁴ Ọ bụru nụ anụ jeekweru a, Jóni bụ Elaija nye be gbaru nhne gbasiri a nụ ọ jaava.

¹⁵ Nye nwernu nsni, ọ nurnu.

¹⁶ "Ndaa nhne me jeeji sninu ebiri ka? Ebiri ka nụ lele rumu takiri dazigwu n'ahia, noosukwu ibne be ikwu,

¹⁷ be naakaa,
'A kwannu anụ eri,
anụ tnéne eri,
a gwnu eri mkpe,
anụ kwnána ẹkwna.'

¹⁸ Kwnornu nụ Jóni varu ríle wiri, ọ nwóge manya, be kaa, 'O nwernu renwu ojo.'

¹⁹ Nnwọ ke Badnụ varu, neeri wiri, nonwo manya, be kaa,

'Le, nye okne wiri, nụ nye nwọ okne manya, enyi ele ọna ntụ nụ ele mmehie.' Ẹrnu ọma ke neehi nụ akoniche Chiokike whuya neegesi nụ akoniche bụru ọma."

*Ẹli-ọhna kwé ekwe
(Luk 10:13-15)*

²⁰ Jizọsi bete ọ nyanu agida ẹli-ọhna ọnyinya hne ọ rnurnu agida ẹrnu kwnornu nụ be kwéle ọ tūhnasna mkpoma nụ mmehie be.

²¹ "Awhnūwhnu jaazinu i, jị Korazini, awhnūwhnu jaazinu i, jị Bētesaida, ọ bụru nụ be rnurnu kpakara agida ẹrnu ndu-ẹhni ka nụ Taya nụ Saịdoni bụ ke be rnurnu nụ rime anụ, be znernu ọtūhnasna mkpoma agida ige wheru ewhe, daziri n'ikpe mkpe nụ retnu.

²² Kovu me kanu anu, be jodonu Taya nụ Saịdoni obirizi n'obochi ikpe karu anu.

²³ Jị n'iwhuru i masi, Kapanom, be jeegwelizo i olu dụ oligwe? Be jeegwedna i ẹli, dụ bekwnu ẹli renwu. Ọ bụru nụ agida ẹrnu ndu-ẹhni be rnurnu nụ rime i nụ be rnurnu a nụ Sodom, o znernu adazi dụ obochi tna.

²⁴ Kovu me kanu anu, be jodonu ẹli Sodom obirizi n'obochi ikpe karu i."

*Ozukwa inwe
(Luk 10:21-22)*

²⁵ N'ige wam Jizọsi karu, "Meka, Nda, Nyenwe oligwe nụ ọwa, kwnornu nụ i bigwaru nhne ele ka n'anya ele ako nụ ele marnu nhne, kovu i kpumennu be rumu takiri.

26 Owe! Nda, meka, kwnornu nù ọ bụru ọma kpam n'anya i.

27 “Nda m yisiri kpakara nhne n'aka m. Ọ zá nye magwụ Nnwọ wam, okwolem Nda. Ọ zị masị nye magwụ Nda wam, okwolem Nnwọ a kpọi, nù ele Nnwọ wam pioru o kpumenu a.

28 “Anụ vakwnusi m, anụ ele nọdogbu ẹhni anụ n'ẹrnu, ele be vuteru ivu rịnya, m jeeme anụ zukwaru inwe.

29 Anụ ynarnụ yokwu m* n'ili anụ, anụ mụhia nhne n'ọnu m, kwnornu nù m bụ m nye zị wọhnernerne nù nye gwednarnụ mkpọma n'ẹli, anụ joopohia ozukwa inwe nù mkpọma anụ.

30 Kwnornu nù yokwu m gbú igbugbu, ivu m zị ewheke.”

12

Ajiji gbasiri

Ọbochi Ozukwa Inwe

(Mak 2:23-28; Luk 6:1-5)

1 N'ige wam, Jizọsi naa-gawhe n'ekwu ikpa n'Ọbochi Ozukwa Inwe, wiri nọogwnu ele sno apna a, be bete nọogho ikpa naata.

2 Nga ele Farisi whnurnu a, be kanụ a, “Le, ele sno apna i neeme nhne kwésile n'iwu n'Ọbochi Ozukwa Inwe.”

3 Ọ kanụ be, “Anụ gwnụna nhne Devidi mernu nga wiri gwnurnu a, ya nù ele snogwu a?”

4 O bnaznenu n'oro nsọ Chiokike ri brẹdi be bítaru nù

ruwhnu Chiokike, ke kwésile n'iwu nù Devidi nù ele sno a ri, okwolem ele ọkwa ariohna kwesiri o ri a?

5 Mọbu anụ gwnụna n'iwu kpa ele ọkwa ariohna Chiokike ji neemeru Ọbochi Ozukwa Inwe n'Ọro Nsọ Chiokike, kọvu ikpe mána be?

6 Kọvu me kanụ anụ nù nye kakwo Ọro Nsọ Chiokike zị hna.

7 Ọ bụru nù anụ mahjaru nhne ikwu-ọnu ka bụ, ‘M noopio obirizi, ọ bụo ariohna,’ anụ jáama ele ikpe mána ikpe.

8 Kwnornu nù Nnwọ ke Badnụ bụ Nyenwe Ọbochi Ozukwa Inwe.”

Nyerukna aka

dọnwurnu ọdonwu

(Mak 3:1-6; Luk 6:6-11)

9 Jizọsi hi nù pịi whọga, bna n'oro ọgbako ele Ju,

10 otu nwerukna aka dọnwurnu ọdonwu zị pịi. Be noopio nhne be jeeji bno Jizọsi nhne, be sịkwa a, “Ọ bụru ọma n'iwu ọ gwọ nrịria n'Ọbochi Ozukwa Inwe?”

11 Jizọsi kanụ be, “Ndaa nye nù rime anụ ke jeenwe otu atnurnu, ọ bụru nù atnurnu wam dnabna rime olulu n'Ọbochi Ozukwa Inwe, ọ bụ ọ jónwugwu a, dọhia a?”

12 Badnụ gburu ọnu karụ atnurnu. Ka bụ nù ọ bụru ọma o mee nhne ọma n'Ọbochi Ozukwa Inwe.”

13 Ọ kanụ nye nyerukna wam, “Dọsnima aka i.” Ọ dọsnima aka a, aka a bụru ọma lele aka a berere.

* 11:29 Yokwu bụ isisi be knegidnenu n'ili anọ ọro ma be rnụ ẹrnu be karụ be mee.

14 Ngam, ele Farisi whogaru gba iznuznu kpa be joogbu a.

Nnwọ izi Chiokike hohiaru

15 Nga Jizosi mahiaru a, o hi nū pji whoga, agida badnu snornu a, o gwọ kpakara eñni igbugbu be.

16 O dọru be aka nū nsni be meko ele badnu mahia nye o bu.

17 O mernu ka ma nhne be gbaru n'okwukwo nsọ hite n'onu Azaya nye owhnurninya mezu, ke kwuru,

18 “Le, ka bu nye izi m me hohiaru,
nye me whnurnu n'anya,
nye nhne a noso m.

Mjeeyisi Enine m nū rime a.

O jọokpo okwo ikpe zi snam nū kpakara mba.

19 O jọolu ogwnu, o jesi lulo,
o za nye jonu akpiri a n'ederezi.

20 O jaagbaji ekere achara hipiagwu ehipia,
mọbu whusnime tonji nohio runwurnu,
tem o mee ikpe zi snam megbu.

21 Kpakara mba jeenwe olile anya nū rewhna a.”

Jizosi nū Belizibolu

(Mak 3:20-30; Luk 11:14-23)

22 Ige wam be kwuyanū Jizosi otu badnu renwu ojo nwugwu, nye kpuru isni, ke dnarnū mgbu, o gwọ a eñni igbugbu wam, nye mgbu wam kwuru oka, whnū masi osno.

23 O duru agida ele badnu wam eñni, be kaa, “Nyerukna ka, o jọobu Nnwọ Devidi sa?”

24 Kọvu nga ele Farisi nurnu a, be kaa, “Nwerukna ka neeji rikne Belizibolu nye risi ele renwu ojo naachihala renwu ojo.”

25 Nga Jizosi mahiaru oriri be, o kanu be, “Eli-eze obula kewama megidne eñni a, jootubiri etekne, eli-ohna obula mọbu oro obula ke kewaru megidne eñni a joo gwuzoli.

26 O buru nū Setani chihala Setani, o kewaru megidne eñni a, eli-eze a jaaga ola gwuzo?

27 O buru nū m ji m rikne Belizibolu naachihala ele renwu ojo, nū rikne nyele bu hne ele ke anu ji naachihala be? Be jọobu ele ikpe anu.

28 Kọvu o buru nū m ji m Enine ke Chiokike naachihala renwu ojo, le, eli-eze Chiokike dulam anu eñni.

29 Berere kwno, badnu jaaga ola bna n'oro nye dikne, nahoru a kpakara nhne n'aka rikne, o buru nū o bele osno kne dikne wam eriri? Nga wam o jeenwe rikne nahoru a nhne zi n'oro a.

30 “Nye nū me zila, bu nye neemegidne m, nye snone m naachikota nhne, bu nye noobosa obosa.

31 Kwnornu nū ka, m naakanu anu, be jaagbarunu badnu mmehie nū okwulu obula be kwuluru, kọvu nū be jaagbarunu okwulu be kwuluru Enine Nso.

32 Nye obula ke jookwugidne Nnwọ ke Badnu, be jaagbarunu a, kọvu nye obula ke jookwugidne Enine Nso,

be jáagbarunu a, ọ búo n'ige ka, mọbu ige ke jaava.

Isisi nù mkpuru a
(Luk 6:43-45)

33 “Anụ mee isisi ma ọ bụru ọma, mee masị mkpuru a ma ọ bụru ọma, mọbu mee isisi ma ọ bụru isisi ojo, mee masị mkpuru a ma ọ bụru mkpuru ojo. Kwnornu nụ be mahia isisi hite nụ mkpuru a.

34 Anụ ebnurnu agwo, anụ jaaga ọla kwu ọka ọma, hne anụ bụ ele ojo? Kwnornu nụ nhne jipiyaru mkpoma bụ nhne ọnu nookwu.

35 Badnụ ọma hite n'ekwnu ọma ke zị nụ mkpoma a neegwehia nhne ọma, badnụ ojo hite n'ekwnu ojo ke zị nụ mkpoma a neegwehia nhne ojo.

36 Kọvu me kanụ anụ, nụ ọka ọbula ele badnụ nookwu ke bnágwo nụ nhne, be jaasa ajiji a n'ọbochi ikpe.

37 Kwnornu nụ be jeehite n'ikwu-ọnu ị gwnusi ị nụ nye mee mma, hite masị n'ikwu-ọnu ị maa ị ikpe.”

Nhne elekema ke Jona

(Mat 8:11,12; Luk 11:29-32)

38 Ige wam agwna ele zni iwu nụ ele Farisi kanụ a, “Nye-zni-nhne, a noopio ọ whnụ nhne elekema n'aka ị.”

39 Jizọsi sarụ be, “Ebiri ojo ke naagba ewhere noopio nhne elekema, ọ zá nhne elekema be jeenye a, okwolem nhne elekema Jona nye ọwhnurninya.

40 Lele kpa Jona daziri ọbochi ẹto iwnehnie nụ abali

nụ ruwho aznụ, ọ bụ kpa Nnwọ ke Badnụ jaadazị nụ rime ẹli ọbochi ẹto iwnehnie nụ abali.

41 Ele rukna Ninive joosno ebiri ka lizọ n'ikpe, be jaama be ikpe, kwnornu nụ be tūhnasnarnu mkpoma n'okpo okwo Jona. Kọvu le, nhne kakwo Jona zị hna.

42 Eze nyerinya Seba jeelizo ya nụ ele ebiri ka bna n'ikpe, ọ jaama be ikpe, kwnornu nụ o hiri n'osotoma ọwa va nurnu akoniche Solomoni. Kọvu le, nhne kakwo Solomoni zị hna.

Rẹnwu ojo hiehnarnu
(Luk 11:24-26)

43 “Nga rẹnwu ojo hiri nụ rime badnụ whọga, o zneghari n'eli chna chna chna, noopio hne o joozukwa inwe, kọvu ọ píoħjala,

44 ọ kaa, ‘M jaalahna n'oro m hne me hiri whuya.’ Nga ọ vaduru, ọ whnụ nụ ọ zá nye wu nụ rime ọro wam, nụ be zasnarnụ a, bikwata nhne nkari.

45 O jeezne chiri rẹnwu ojo ẹsau ibne a ele nwernu risi rikne karụ a, be bna wuru nụ rime nye wam, ọnodi ipne-aznụ ke nye wam jōhnasi bụjo karụ kpa ọ zị nụ mbom. Ọ bụ kpa ọ jọonu n'ebiri ojo ka.”

Nne Jizọsi nụ rumu nne a
(Mak 3:31-35; Luk 8:19-21)

46 Nga ọ nookwunu agida ele badnụ wam ọka, nne a nụ rumu nne a varụ gwuzoru n'ederezi noopio o kwunu a ọka.

47 Otu badnu kanu a, "Le, nne i nu rumu nne i gwuzogwu n'ederezi noopio i o kwunu i oka."

48 Jizosi saru a, "Nyele bu nne m, ele kele bu rumu nne m?"

49 O dosnima aka nu hne ele sno apna a zi, kaa, "Anu le nne m nu rumu nne m."

50 Kwnornu nu nye obula ke jeeme nhne Nda m ke zi n'oligwe noopio, nye wam bu nwene m rukna nu nwene m rinya, nu nne m."

13

Elulu nye ogha mkpuru (Mak 4:1-9; Luk 8:4-8)

1 N'obochi wam Jizosi whuyaru nu rime oro zne daziri eli nu ngeri osimini.

2 Agida ele badnu gbakoru hne o zi, ke kpayaru o jiri bna nu rime ogbo, daziri eli, agida ele badnu wam gwuzoru nu mkpomkpo eli.

3 O ji elulu zi odo n'odo zni be agida nhne, kaa, "Otu nye ernu ekwu zneru agha mkpuru."

4 Nga o naagha, agwna mkpuru dna nu ngeri apna, rumu onunu varu tuturu be ta.

5 Agwna mkpuru dnarnu n'eli rugwu, hne be nwée agida rizza, ngangam mkpuru wam fuhjaru, kwnornu nu be nwée agida rizza.

6 Nga ehnam wasiri, be chnanwu, kwnornu nu be nwée egwnugwnu.

7 Agwna mkpuru berere dnarnu n'esilawuru igwnu, igwnu wam sohja, kpagbu be.

8 Agwna mkpuru berere dnarnu n'eli oma, be mi mkpuru otu riwhu, berere nri isunu, berere nri eto.

9 Nye nwernu nsni, o nuru."

Nhne o kwno truu elulu (Mak 4:10-12; Luk 8:9,10)

10 Ele sno apna a vakwnusi a, sikwa a, "Kini kpayaru i nookwunu be oka n'elulu?"

11 Jizosi saru be, "Be mernu anu mahia nhne tugwaru otugwa ke eli-eze Chiokike, kovu nu o buo be.

12 Nye obula ke nwernu nhne, be jeenye hnasu a, o jeenwe agida nhne, kovu nye ke nwée, be jaanahoru a o bubedi ke o nwernu.

13 Kam kpayaru, me notnunu be elulu. Be neele anya kovu be za nowhnu, be noobno nsni, be za nonu, be joghohia nhne.

14 Nhne Azaya nye owhnurninya kwuru gbasiri be mezu nu risi be, ke kwuru, 'Anu jonu kpoi, kovu anu jomuhia rja rja, anu jowhnu kovu anu joghohia rja rja.

15 Kwnornu nu mkpoma ele ka gbasinim n'oto, nsni kposinim be masi.

Be kpusinim anya be, ma be gharu o ji anya be whnu osno,

gharu o jiri nsni be nuru nhne, gweru mkpoma be ghohia, ma be tuhnasna, ma m gwom be.'

16 Anu bu ele owa oma, kwnornu nu anya anu

nṣowhnu ọsno, nsni anu nṣonu nhne.

17 N'ezì me kanu anu, o gwnurnu agida ele owhnurninya nu ele oma ogwnu o whnu nhne anu nṣowhnu, kovu nu be whnuna, nu o nurnu nhne anu nṣonu kovu nu be nuna.

*Risi elulu
nye ogha mkpuru*

(Mak 4:13-20; Luk 8:11-15)

18 "Anu bnote nsni ma anu muhia risi elulu nye ogha mkpuru wam.

19 Nye obula ke nurnu ikwu-onu eli-eze Chiokike, kovu o ghohiala a, nye ojo wam va, nahoru a nhne be kpasiru nu mkpoma a. Ka bu mkpuru ke be ghasiri nu ngeri apna.

20 Mkpuru ke be ghasiri nu rugwu bu ele nurnu ikwu-onu wam, ngangam be gweru snarnima nwugwu a.

21 Kovu nu be nwee egwnugwnu nu rime be, be dazi ige mati, nga mmekpehni mibu awnhnuwhnu varu kwnornu nu ikwu-onu wam, ngangam, be dnahnala aznu.

22 Mkpuru ke be ghasiri n'esilawuru igwnu bu ele nurnu ikwu-onu wam, kovu mmekpehni ke owa ka nu aghigho owhnu ekwnu n'anya kpagburu ikwu-onu wam, o buru nhne mina mkpuru.

23 Mkpuru ke be ghasiri n'eli buru oma, bu ele ke nurnu ikwu-onu wam, be ghohia a, be muhia mkpuru k'ezì, otu riwhu, ke berere nri isunu, berere nri eto."

Elulu achara atna

24 Jizosi tnu nu be elulu berere, kaa, "Eli-eze Chiokike nu lele hne badnu kpasiru mkpuru oma n'ekwu a.

25 Nga ele badnu neezni anyarna, nye irno varu kpasì atna n'ekwu wam, la.

26 Nga mkpuru oma wam fuhiaru, o mi mkpuru, atna wam whoru iwhne.

27 Ele izi nye nwe ekwu wam vakwnusi a, kanu a, 'Nda-ai-kwu, i kpasila mkpuru oma n'ekwu i? O zi hnele fuhi atna?'

28 "O kanu be, 'Ka bu aka ernu nye irno.'

"Ele izi a sikwa a, 'I pioru a zne whome be?'

29 "O kanu be, 'Oza! O zi kpa anu zi noowho atna anu whokota ikpa.

30 Anu gharu be lawuru sokota du ige o gwe nhne n'ekwu, nga wam, m jaakanu ele neegwe nhne n'ekwu be beru osno whome atna wam, kpukota be n'okwukwu, kpo be bekwnu. Kovu anu chibna ikpa wam n'obna m.'"

*Mkpuru mositadi nu
nhne whu bre di*

(Mak 4:30-34; Luk 13:18-21)

31 Jizosi tnu nu be elulu berere, kaa, "Eli-eze Chiokike nu lele mkpuru isisi be kwu mositadi, ke badnu kpasiru n'ekwu a.

32 O bu n'ezì nu o zi mati kakwo kpakara mkpuru, o ghò isisi kakwo kpakara nhne be kpasiri n'ekwu, ke onunu oligwe naava nornu alikwu nu nkala a."

33 O tñunu be elulu berere, kaa, “Èli-eze Chiokike nù lele nhne whù brèdi, ke nyerinya gweru gwasì nù rime agìda ìkpa, tem kpakara a whù.”

34 Kpakara ikwu-ònu ka bù ke Jizòsi kwunnu igbudu badnù n'elulu. O kwúgene be ikwu-ònu hne o jìle elulu.

35 “Ka bù ma nhne be kwuru hite n'ònu nye òwhnurninya mezu, ke karù, ‘Mjookpume ònu m tñu elulu, m jaakahia nhne be bigwaru abìgwa ke nga òwa panìzoru.’ ”

Jizòsi kòwamarnu risi elulu achara atna

36 Nga ò ghasarù igbudu badnù wam, ò bna nù rime òro. Ele sno apna a vakwnusiri a, naakaa, “Kòwanu aì risi elulu atna wam zì n'èkwu wam.”

37 O kaa, “Nye naagha mkpùru òma bù Nnwò ke Badnù.

38 Èkwu bù òwa, mkpùru òma wam bù rùmu èli-eze Chiokike, kòvu atna wam bù ele ke nye ojo wam.

39 Nye irno wam ke kpasìru be bù Ekwensu, ogwe nhne n'èkwu bù okwukwo òwa, ele wam neegwe nhne n'èkwu bù ele enine izi.

40 Lele kpa be nookpnokòta atna wam nòokpo be bèkwnu, ò bù kpa ò jaazì n'okwukwo òwa.

41 Nnwò ke Badnù jeezi-hala ele enine izi a, be chikota n'èli-eze a kpakara ele naakpahia arùru-èli nù ele neeme mmehie.

42 Be jòotubna be n'okne bèkwnu wam hne be jaazì

naakwna èkwna, naata rùkwunurnu-ize.

43 Ige wam ele mee mma joonwu lele èhnam n'èli-eze Chiokike Nda be. Nye nwernu nsni, ò nurnu.

Elulu èto

44 “Èli-eze Chiokike nù lele èkwnu be bigwaru n'èkwu, ke otu badnù whnurnu. O gweru nhne kpusnime a, gweru snarnìma la, re kpakara nhne ò nwernu, zùru èli wam.

45 “Èli-eze Chiokike nù lele nye mgbama-ahia noopio palì òma.

46 Nga ò whnurnu otu palì gburu okne ònu, o zne re kpakara nhne o nwernu, zùru a.

47 “Berere kwno èli-eze Chiokike nù lele igbo be wusiri nù rime osimini, ke gburu agìda aznù zì òdo n'òdo.

48 Nga o jiru, be dòhia a nù mkpomkpo èli, dazìri èli hòsi aznù ele ke buru òma nù rime nhne, tuwhume aznù ele ke búo òma.

49 O bù kpa ò jaazì n'okwukwo ke òwa, ele enine izi jòowhuya, kewahia ele ojo n'èhni ele mee mma.

50 Be jòotubna ele ojo n'okne bèkwnu, hne be jaazì naakwna èkwna, naata rùkwunurnu-ize.”

51 Jizòsi sikhwaru be, “Anù ghòhiaru kpakara nhne ka?”

Be kaa, “Owe.”

52 O kanù be, “Nye zni iwu òbula be znirni apna èli-eze Chiokike, nù lele nye nwe òro nye hiri n'èkwnu a neegwehia nhne ikne nù nhne òknani.”

*Be juru Jizōsi nū Nazareti
(Mak 6:1-6; Luk 4:16-30)*

⁵³ Nga Jizōsi tñukworu elulu, o hiri nū pī whōga.

⁵⁴ Nga ọ varu n'ẹli ke aka a, neezni nhne n'oro ọgbako be, ke kpayarū nhne o znirni duru be ẹhni, be kaa, “Ndaa hne nwerukna ka nwehjaru akoniche nū ẹnu ndu-ẹhni ka?”

⁵⁵ Nyerukna ka ọ búo nnwọ omenka ai? Ọ búo nne a bú nye be kwu Meri nū rumu nne a rukna, Jemisi, nū Josefu, nū Saimoni nū Judasi?

⁵⁶ Rumu nne a rinya be zía n'esilawuru ai? Ndaa hne nwerukna ka nwehjaru kpakara nhne ka?”

⁵⁷ Be we ovu ẹhni megidne a.

Kovu Jizōsi kanu be, “Okwolem nū ẹli ke a nū ezi-nu-oro a bú hne nye ọwhnurninya nwée ọso anya.”

⁵⁸ Ọ rnúna agída ẹnu ndu-ẹhni nū pī kwnornu nū be nwée ọkwnata mkpoma.

14

*Enwu Jōni Nye Wụ Mini
(Mak 6:14-29; Luk 9:7-9)*

¹ N'ige wam Eze Erọdu nye neechi Galili nurnu ọtnutnu gbasiri Jizōsi.

² Ọ kanu ele neeznenu a izi, “Nyerukna ka bú Jōni Nye Wụ Mini, o hilem n'ẹnwu lizo, ọ bú nhne mernu o nwernu rikne ka o ji nọornu ẹnu ndu-ẹhni.”

³ N'ige wheru ewhe Erọdu nwugwuru Jōni, kne a eriri, yisi a n'oro ikelu kwnornu nū Erodiasi nnwerne Filipu nwene a rukna.

⁴ Kwnornu nū Jōni kannu a, “Ọ búo ọma n'iwu ọ lū nnwerne nwene i.”

⁵ Erọdu pioru o gbu a, kovu ọ turu ogwnu ele Ju, kwnornu nū be kwegwu Jōni bú nye ọwhnurninya.

⁶ Nga ọbochi ochenwanya ọmumu Erọdu duru, nnwọ rinya Erodiasi neetne eri nū ruwhnu be, ọ sọru Erọdu n'ọnu k'ezi,

⁷ o kwe a mkwna, kwesi a rikne nū o jeenye a nhne ọbula ọ jọorio.

⁸ Nne a zni a ezni ọ kaa, “Nye m risi Jōni Nye Wụ Mini n'agbugba hna.”

⁹ O gburu eze igbugbu nū mkpoma, kovu kwnornu nū mkwna wam o kweru, nū ele ya nū be dazị neeri wiri, ọ karu be nyee a.

¹⁰ O zizne be gbuhia risi Jōni n'oro ikelu.

¹¹ Be vuya risi a n'agbugba, nyee nnwọ rinya wam, o nyee a nne a.

¹² Ele sno apna Jōni va, vuru iznu a, li a, be zne kanu Jizōsi nhne mernu.

*Jizōsi nyernu pokwu
badnu isne wiri*

*(Mak 6:30-44; Luk 9:10-17;
Jōn 6:1-14)*

¹³ Nga Jizōsi nurnu a, o hiri nū piam whōga, ya nū nsnunu a bna n'ogbo zne hne kovu owu. Kovu ele badnu piohjaru hne ọ zi, be hi nū kpakara ẹli-ọhna wam snornu a n'ochi ẹli.

¹⁴ Nga Jizōsi whuyaru n'ogbo whnu agida badnu, ọ donu be obirizi, gwọ ele ke naaria nriria.

15 Nga ọ dọru ogbednachi, ele sno apna a vakwnusiri a, kaa, “Hna kọgwu owu, ọbochi zneminem, zila ele ka ma be zne nọ rime ẹli-ọhna zne zọru nhne oriri.”

16 Jizọsi kanu be, “Ọ zila mkpa nọ be jaala, anu nyee be nhne be jeeri.”

17 Be kanu a, “Nhne a nwernu hna kwolem ike bredi isne nọ aznu lawuru.”

18 Jizọsi kanu be, “Anu chiyanu m be hna.”

19 Ọ kanu kpakara igbudu badnu wam daziri ẹli n'olu achara. O gweru ike bredi isne nọ aznu lawuru wam, le anya n'oligwe, tu mmamma, nyawama be, nyee ele sno apna a, be gweru a nyee igbudu badnu wam.

20 Kpakara be ri, riji ruwho, ele sno apna a tutukota ruvnuruvnu ke gwnarnu agwna, ke jiharu nkita nri nọ nkita lawuru.

21 Ele riri wiri wam bu pokwu ele rukna isne, be gweme ele rinya nọ rumu takiri.

Jizọsi znernu izne n'olu mini

(Mak 6:45-52; Jon 6:15-21)

22 Ngangam Jizọsi kanu ele sno apna a be bna n'ogbo, beru a osno whe aka osimini kiyari, ma o zila igbudu badnu wam.

23 Nga o zilakworu igbudu badnu wam, o pnezne n'olu rugwu nọ nsnu a zne kpe okpukpe. N'ige ogbednachi, ya nọ nsnu a zi piam.

24 Kọvu nọ ogbo wam zi ikere n'olu osimini, abakamini zi noovu a, kwnornu nọ ruwhere neewhegidne a.

25 Kọvu n'onu osisi, Jizọsi neezne izne n'olu mini ma ọ vakwnusi be.

26 Nga ele sno apna a whnurnu a, hne o neezne izne n'olu mini, mkpoma whuru be, be tu ogwnu, si okokoba nọ ọ bu renwu.

27 Ngangam Jizọsi kanu be, “Mkpoma si anu rikne, ọ bu mawa. Anu tuko ogwnu.”

28 Pita sa a, “Nyenwe ai, ọ buru nọ ọ bu jiwa, kanu m me vakwnusi i n'olu mini.”

29 Jizọsi kanu a, “Vaa.”

Pita hi n'ogbo hiedna, zne izne n'olu mini, neeznekwnusi Jizọsi.

30 Kọvu nga ọ whnurnu okne ruwhere, ọ tu ogwnu, bete neemi, o siwama, “Nyenwe ai, znohia m.”

31 Ngangam Jizọsi dosnihala aka a, nwugwuru a, kanu a, “Nye okwnata mkpoma mati, kini kpayaru i jiri nwe mkpoma lawuru?”

32 Nga be bnarnu nọ rime ogbo, ruwhere wam whebiri.

33 Ele zi nọ rime ogbo wam varu kponu a risi ẹli, be naakaa, “N'ezi, i bu Nnwọ Chiokike.”

Jizọsi gworu ele nriria n'eli Genezareti

(Mak 6:53-56)

34 Nga be wheru aznu mini wam, be va du n'eli Genezareti.

35 Ele rukna ẹli wam maharu Jizọsi, be zihala nọ

kpakara ẹli kwuyanụ a ele nriria.

³⁶ Be riasno a ma be kpatu ọnu iwo a aka kpọi. Ọ gwọru kpakara ele kpaturu ọnu iwo a aka.

15

Omen'ẹli ke ele mbom
(Mak 7:1-13)

¹ Nga ele Farisi nù ele zni iwu ele Ju hiri nù Jeruselem vakwnusi Jizọsi, be sịkwa a,

² “Kini kpayarụ ele sno apna ị zá naabịta omen'ẹli ele mbom? Be zá nọokwo aka hne be ri wiri.”

³ Jizọsi sarụ be, “Kini kpayarụ anụ zá naabịta nhne Chiokike nyernu n'iwu kwnornu omen'ẹli anụ?

⁴ Chiokike karụ, ‘Sọbisinu nda ị nù nne i,’ nù ‘Nye ọbula ke jọovu nda a mọbu nne a ọnu, be gbu a.’

⁵ Kọvu anụ karụ nù nye ọbula ke jaakanụ nda a mọbu nne a, ‘Nhne i jeerihia n'aka m bụ nkesi me nyernu Chiokike,’

⁶ Ọ zịma mkpa nù ọ jọsobisinu nda a mọbu nne a rịa rịa. Anụ neeme ikwu-ọnu Chiokike nhne etekne kwnornu omen'ẹli anụ.

⁷ Ele ruwhnu lawuru, Azaya nye ọwhnurninya kwuru ezi ọka gbasiri anụ nga ọ kwuru,

⁸ ‘Ele ka jị mgbele-ọnu etekne nọsobisinu m, kọvu nù mkpọma be zị ikere nù hne me zị.

⁹ Be nọkponu m risi ẹli n'etekne, be neezni nhne badnụ

nyernu n'iwu lele nù ọ bụ iwu Chiokike.’ ”

Nhne neemeru badnụ
(Mak 7:14-23)

¹⁰ Jizọsi sukwuru igbudu badnụ wam, kanụ be, “Anụ bnote nsnị, anụ ghọhia masị.

¹¹ Ọ bụo nhne bnarnụ n'ọnu badnụ bụ nhne neemeru badnụ, ọ bụ nhne hi n'ọnu whuya bụ nhne neemeru badnụ.”

¹² Ele sno apna a vakwnusiri a, kanụ a, “Ị mahjaru nù ele Farisi weru ẹhni nga be nurnu ọka wam?”

¹³ Jizọsi sarụ be, “Be joowhohala isisi ọbula ke Nda m ke oligwe kpásịla.

¹⁴ Anụ gharụ be, be bụ ele kpuru isni noodu ele kpuru isni. Ọ bụru nù nye isni noodu nye isni, be lawuru jaadnabna nù rime olulu.”

¹⁵ Pita kanụ a, “Kọwanu aị risi elulu ka.”

¹⁶ Jizọsi kanụ be, “Anụ nwée ọghohia dụ kịtna?

¹⁷ Ọ bụ anụ máa nù nhne ọbula ke bnarnụ n'ọnu neezne nù ruwho, be nynọhala a n'osoro?

¹⁸ Kọvu nù nhne ke hiri n'ọnu whuya hi nù mkpọma whuya, ka bụ nhne ke neemeru badnụ.

¹⁹ Kwnornu nù hite nù rime mkpọma bụ hne kpakara ọriri ọjo hi nọowhuya, ogbu badnụ, ome ọyi, ọgba ewhere, oznu buznu, akebne aghalaghala nù ọkaja ele berere.

²⁰ Nhne ele ka bụ nhne meru badnụ, kọvu o ri wiri

n'aka kwóge ọkwo méru badnú.”

*Okwnata ovu otu nyerinya
(Mak 7:24-30)*

²¹ Jizọsi hiri nù pịam whọga, zne n'ẹli Taya nù Saịdoni.

²² Otu nyerinya Kena, nye ẹli wam, whuyaru, siwama, “Nyenwe aị, Nnwọ Devidi, dọnu m obirizi, rẹnwu ojo nwụgwusi nnwọ m rinya aka rikne.”

²³ Jizọsi sála a nhne ọbula. Ele sno apna a vakwnusi a, riasno, kaa, “Chihala a, kwnornu nù o neesisno aị lulo.”

²⁴ Jizọsi saru, “Be ziyaru m kwnornu atnurnu whuru owhu ke ele Izireli kpoi.”

²⁵ Nyerinya wam varu kpọnu a risi ẹli, kaa, “Nyenwe aị, yisinu m aka.”

²⁶ Jizọsi saru, “Ọ búo oma o gweru wiri rumu takiri tūhalanu rumu nkita.”

²⁷ Nyerinya wam karu, “Owe, Nyenwe aị, kọvu nù rumu nkita neeri agwna rụvnuruvnu ke hi nù n'olu ikpechi ele nwe be naadna.”

²⁸ Ige wam, Jizọsi saru a, “Nyerinya, okwnata mkpoma i hna ezi, ọ dazinu i lele kpa i pioru.” Ngangam, ẹhni buru nnwọ a rinya oma.

Jizọsi gwọru ele nriria

²⁹ Jizọsi hi nù pịam whuya, va nù ngeri Osimini Galili. O pnezne n'olu rugwu, daziri ẹli.

³⁰ Agida ele badnu vakwnusiri a, kwuru ele mgworo, nu ele isni, ele vu ọru, nu ele mgbu, nu agida

ele naaria nriria zi ọdo n'odo va. Be kwubita be n'eli n'ochi Jizosi, ọ gwọ kpakara be.

³¹ Ka kpayarụ o duru ele badnu wam ẹhni, nga be whnurnu ele mgbu hne be kwuru ọka, ele vu ọru, ẹhni buru be oma, ele mgworo neezne izne, nu ele isni whnurnu ọsno. Be ja Chiokike ke Izireli mma.

*Jizọsi nyernu pokwu
badnu ẹno wiri
(Mak 8:1-10)*

³² Jizọsi sukwu ele sno apna a, kaa, “M nọdonu agida ele badnu ka obirizi, kwnornu nù me nù be dazilam ọbochi ẹto kitna, be nwée nhne be jeeri, m jéezila be n'onu etekne, ọ zi be tubo n'apna.”

³³ Ele sno apna a kanu a, “Ndaa hne a jeenwehia brẹdi n'eli-ikpa ka ke jeeji igbudu badnu ka rụwho?”

³⁴ Jizọsi sika be, “Anu nwernu ike brẹdi ele?”

Be saru, “Esa, nu aznu matị ele nu ele.”

³⁵ Jizọsi kanu igbudu badnu wam be daziri ẹli.

³⁶ O gweru ike brẹdi esa nu aznu wam, tu mmamma, ọ nyawama be, nyee ele sno apna a, ele sno apna gweru nyee igbudu badnu wam.

³⁷ Kpakara be ri, riji rụwho, be tutukota rụvnuruvnu ke gwnarnu agwna, nkita esa jipiyaru.

³⁸ Ele riri a bu pokwu ele rukna ẹno, be gweme ele rinya nu rumu takiri.

³⁹ Nga Jizosi zihalaru ele badnu wam, ọ bna n'ogbo zne n'eli Magada.

16

Orio nhne elekema

(Mak 8:11-13; Luk 12:54-56)

¹ Ele Farisi nū ele Sadusi vakwnusiri Jizōsi naakpa a iru, kanū a, o gesi be nhne elekema hi n'oligwe.

² Ọ sarū be, “N'ogbednachi, anū naakaa, ‘Ruwhnu oligwe bŭru ọma, kwnornu nū oligwe naachna ihie ihie.’

³ N'osisi, anū naakaa, ‘Ruwhnu oligwe búo ọma tna, kwnornu nū oligwe dugwu ruwhnu naachna ihie ihie.’ Anū magwū kpa be le ọwa nū ruwhnu oligwe anya gwnū nhne ọ jọbu. Kọvu ndaa kpa anū máa ige ka?

⁴ Ebiri ọjọ naagba ewhere, noopio nhne elekema, ọ zá nhne elekema be jeenye anū, okwolem nhne elekema Jona nye ọwhnurninya.” Ọ gharū be, whọga.

Nhne whū brēdi ke ele Farisi nū ele Sadusi

(Mak 8:14-21)

⁵ Nga ele sno apna a gawheru nū ngeri kiyari, be chezuru o gweru brēdi.

⁶ Jizōsi kanū be, “Anya dū anū ẹli, anū neeze nhne whū brēdi ke ele Farisi nū ele Sadusi.”

⁷ Be ọnotnurita n'esilawūru be, naakaa, “Ọ bŭ kwnornu nū a jíle brēdi.”

⁸ Nga Jizōsi mahjaru a, ọ kaa, “Ele ọkwnata ovu matị, kịni kpayarū anū ji nookwu n'esilawūru anū nū anū nwée brēdi?

⁹ Anū ghóhia kọriri, anū chénwanyana ike brēdi isne ke

pokwu badnū isne, nū nkịta ele anū pnojiri?

¹⁰ Mọbu nga me keru ike brēdi ẹsau ke pokwu badnū ẹno wam, nkịta ele anū pnojiri?

¹¹ Kịni kpayarū anū ghóhiala nū ọ búo brēdi hne me naakaa? Kọvu anū zeru nhne ọowhu brēdi ke ele Farisi nū ele Sadusi.”

¹² Nga be ghóhiaru nū ọ kála be ze nhne ọowhu brēdi, kọvu be neeze iznizni ele Farisi nū ele Sadusi.

Pita kahjaru nye Jizōsi bŭ

(Mak 8:27-30; Luk 9:18-21)

¹³ Nga Jizōsi varū n'ọdoru ẹli Sizaria Filipaj, ọ sịkwa ele sno apna a, “Ele badnū be naakaa nū Nnwọ ke Badnū bŭ nyele?”

¹⁴ Be kaa, “Agwna be kaa Jóni Nye Wŭ Mini, ele berere kaa Ẹlajja, ele berere kwno kaa Jerimaya mọbu otu nyenum nū rime ele ọwhnurninya.”

¹⁵ Ọ sịkwa be, “Anū n'iwihuru anū, anū kanū nū m bŭ m nyele?”

¹⁶ Saịmoni Pita kanū a, “Ji n'iwihuru i bŭ Karaịsi wam, Nnwọ Chiokike zị bŭdnu.”

¹⁷ Jizōsi kanū a, “Ị bŭ nye ọwa ọma, Saịmoni nnwọ Jona, kwnornu nū anọ-ẹhni nū ọvnarna kpúmennu i ya, okwolem Nda m ke zị n'oligwe.

¹⁸ Me kanū ị, nū jị n'iwihuru i bŭ Pita, ọ bŭ n'olu rugwu ka hne me joowu ọgbako ke m, iknernema ẹnwu jáaka a rikne rịa rịa.

19 M jeenye i snambị ke ẹli-eze Chiokike, nhne ọbula ke i knernu eriri n'owa Chiokike jeekne a eriri n'oligwe, nhne ọbula ke i tomarnu n'owa, Chiokike jootoma a n'oligwe.”

20 Ige wam Jizosi do ele sno apna aka nu nsni, be kanukwadia nye ọbula nu o bu Karaisi.

*Jizosi kwuru oka
gbasiri enwu a*

(Mak 8:31--9:1; Luk 9:22-27)

21 Hite n'ige wam Jizosi bete naakanu ele sno apna a nu o jeezneriri Jeruselem, ta agida awhnuwhnu n'aka ele okno badnu nu ele risi arihna nu ele zni iwu ele Ju, be jooju a, gbu a, n'obochi ke eto, o jeehi n'enwu lizo.

22 Pita kwuhala Jizosi ichne, bete naabnanu a mbna, naakaa, “Chiokike kwé, Nyenwe ai, nhne ka jeeme i.”

23 Kovu Jizosi tuhnasarnu kanu Pita, “Zne n'aznu m, Setani, i naadnasninu m apna. Kwnornu nu i neeche echiche lele badnu, o buo lele Chiokike.”

24 Ige wam Jizosi kanu ele sno apna a, “O buru nu nye ọbula joosno m n'aznu, o jooju ehni a, vuru ogba a, sno m.

25 Nye ọbula ke noopio o dohia budnu a, jootuwu a, kovu nye ọbula ke jootuwu budnu a kwnornu m, o joopi-ohia a.

26 Mbnarna kini bu nhne badnu jeenwe, o buru nu o rihia kpakara owa n'iru, kovu tuwhume budnu a? Kini

bu nhne badnu jeeji gbanwo budnu a?

27 Kwnornu nu Nnwọ ke Badnu jaava n'igwugwu ke Nda a, ya nu ele enine izi a, ige wam o jookwuhnata nye ọbula ogwo enu nhne o rnurnu.

28 N'ezi, me kanu anu, nu agwna ele gwuzo hna joonwu enwu tem be whnu Nnwọ ke Badnu hne o naava chilele eze.”

17

*Onwoghari ke Jizosi
(Mak 9:2-13; Luk 9:28-36)*

1 Nga obochi isunu wemernu, Jizosi kwuru Pita, nu Jemisi, nu Joni nwene a, yisinu ehni a, kwuru be whoga ichne, pne olu rugwu hna n'olu.

2 O nwoghari nu ruwhnu be, ruwhnu a noonwu lele ehnam, iwo a naachna lele iwhne.

3 Be whnurnu Mozizi nu Elaija hne be nu Jizosi nookwurita oka.

4 Pita kanu Jizosi, “Nyenwe ai, o buru oma a daziri hna, o buru nu i jeekwe, a wu oro-eka eto hna, otu buru ke i, otu ke Mozizi, otu ke Elaija.”

5 Nga o kpu oka ka n'onu, erumeru oligwe ke chnaga richna kpusnirni be, otu akpiri hiri n'erumeru oligwe wam dna, kaa, “Ka bu Nnwọ m me whnurnu n'anya, nye nhne a masiri m, anu bnonu a nsni.”

6 Nga ele sno apna a nurnu a, be dna, kpute ruwhnu n'eli, tu ogwnu k'agida.

7 Jizōsi vakwnusiri be, kpatū be aka, kaa, “Anū lizō, anū tū ogwnu.”

8 Nga be lelizōru anya, o zá nye be whnūrnū, okwolem Jizōsi kpōi.

9 Nga be hiri n'olu rugwu wam hiedna, Jizōsi dō be aka nū nsni, kaa, “O zá nye anū kanū nhne anū whnūrnū tem Nnwō ke Badnū hi n'ēnwu lizō.”

10 Ele sno apna a sīkwa a, “Kīni kpayarū ele zni iwu ele Ju jiri kaa nū Ɛlaija jeebe ősno va?”

11 Jizōsi kanū be, “Ɛlaija jeebe ősno va n'ezi, o jaabikwata kpakara nhne.

12 Kōvu me kanū anū nū Ɛlaija valēm, be máhiala a, be mee a kpa o jiri masi be. O bu masi kpa be jeeme Nnwō ke Badnū ta awhnūwhnu n'aka be.”

13 Ige wam ele sno apna a ghōhiaru nū o kannū be oka gbasiri Jōni Nye Wū Mini.

Jizōsi gwōru wikoro rukna
(Mak 9:14-29; Luk 9:37-43a)

14 Nga be vakwnusiri igbudu badnū wam, otu nyerukna vakwnusiri Jizōsi gbunu a mpnerne ochi n'ēli,

15 kaa, “Nyenwe aī, dōnu nnwō m rukna obirizi, o naata awhnūwhnu k'agida kwnornu nū o naariā akwukwu, agida ige, o naadnabna bēkwnu, agida ige masi o dnabna mini.

16 M kwuyanū a ele sno apna i, kōvu nū be nwée rikne gwō a.”

17 Jizōsi sarū be, “Anū ebiri ka nwée okwnata mkpōma, ele mkpōma hiri aghi, me nū anū jaadazī dū ngele? Me jeesinu anū mkpōma dū ngele? Anū kwuyanū m nnwō wam hna.”

18 Jizōsi bigbō rēnwu ojo wam, o hi nū rime a whūya, Jizōsi gwō nnwō wam ngangam.

19 Nga ele sno apna a vakwnusiri a ichne, be sīkwa a, “Kīni kpayarū a nwéne rikne chihala rēnwu ojo wam?”

20 Jizōsi kanū be, “Kwnornu nū okwnata ovu anū zī mati. N'ezi me kanū anū, o būru nū anū nwernu okwnata ovu hna lele mkpūru mōsitadi, anū jaakanū rugwu ka, ‘Hi nū hna zne hne berere,’ o jeezne, o zá nhne jaara ēhni hne anū zī.” [

21 Kōvu nū rēnwu ojo nū kpa jōowhoga, okwolem hite n'okpukpe nū ovu ọnu.]

Jizōsi kwukwnornu
oka gbasiri ẹnwu a
(Mak 9:30-32; Luk 9:43b-45)

22 Nga Jizōsi nū ele sno apna a gbakōru nū Galili, Jizōsi kanū be, “Be jeegweru Nnwō ke Badnū resi n'aka ele badnū.

23 Be joogbu a, kōvu n'ōbochi ke ẹto, o jeehi n'ēnwu lizō.” O gbu ele sno apna a igbugbu k'agida.

Ntū iwai Oro Nsō

24 Nga Jizōsi nū ele sno apna a vaduru Kapanom, ele naana iwai ntū Oro Nsō Chiokike vakwnusiri Pita, sīkwa, “Nye-zni-nhne anū o zia nōotu ntū Oro Nsō?”

²⁵ Pita kaa, “Owe, ọ nọotu.”

Nga be bnarnu n'oro, Jizosi beru osno sika Pita, “Saimoni, kini bu echiche i, ọ bu n'aka ele kele hne ele eze ọwa ka naarnu ntụ ahia mọbu ntụ risi badnu, n'aka rumu be mọbu n'aka ele izne?”

²⁶ Pita kanu a, “N'aka ele izne.”

Jizosi kanu a, “Ọ buru kpa, rumu be zila nu rime a.”

²⁷ Kọvu ma a gharu o mee nhne jeewe be ehni, zne n'osimini, tisi ari aznu, gweru aznu obula beru osno whuya, nga i kpumernu onu a, i jowhnu otu mkpuru iwai, gweru a nyee be, ọ buru ke me nu ji.”

18

Nyele kakwo ibne a?

(Mak 9:33-37; Luk 9:46-48)

¹ N'ige wam ele sno apna Jizosi vakwnusiri a, sika a, “Nyele kakwo n'eli-eze Chiokike?”

² Jizosi sukwu otu watakiri, gwuzote a n'esilawuru be.

³ Ọ kanu be, “Me kanu anu ezi oka, okwolem ma anu tūnasarnu lele rumu takiri, anu jaabna n'eli-eze Chiokike ria ria.”

⁴ Nye obula ke jeegwedna ehni a lele watakiri ka, nye wam kakwo n'eli-eze Chiokike.

⁵ Nye obula ke jaanarnu otu watakiri nu kpa nu rehna m, nanabnanya m.

Nhne jeeme badnu mehie

(Mak 9:42-48; Luk 17:1,2)

⁶ “Kọvu nye obula ke jeeme ma otu nu rime ele mati

ka kwehjaru nu me mehie, ọ jaakanu a mma ọ buru be gweru okne rugwu ogwe-wiri nyasi a n'ili, migbu a nu rime osimini.

⁷ Awhnuwhnu jaazinu ọwa kwnornu nu nhne ornurna ke neeme ele badnu neeme mmehie. Ọ zi mkpa nu ornurna jaava, kovu awhnuwhnu zinu nye wam ornurna jechi n'aka a va.

⁸ Ọ buru nu aka i, mọbu ochi i, jeeme i, i mee mmehie, bihala a, tuwhume a, ọ kanu i mma i bna nu budnu buru nye mgworo mọbu vuru ọru, karu o nwernu aka lawuru mọbu ochi lawuru be tubna i nu bekwnu eli renwu chni echni.

⁹ Ọ buru masi nu anya i jeeme i, i mee mmehie, gweme a, tuwhume a, ọ kanu i mma i bna nu budnu nwernu otu anya, karu o nwernu anya lawuru be tubna i nu bekwnu eli renwu.”

Elulu atnurnu whuru owu
(Luk 15:3-7)

¹⁰ Anu whnu nu anu zia neededna otu nu rime ele mati ka anya, kwnornu nu me kanu anu, n'oligwe ele enine izi be nowhnu ruwhnu Nda m ke zi n'oligwe anya ige obula. [

¹¹ Kwnornu nu Nnwọ ke Badnu varu ọ znohia ele whuru owu.]

¹² Kini bu echiche anu? Ọ buru nu badnu nwernu otu riwhu atnurnu, otu nu rime be kpawhu ori, ọ jaaghasa nri tolu nu tolu kiyari n'olu rugwu, zne noopio ke kpawhuru ori?

13 Me kanu anu ezi oka, nga o pioharu a, o jjonwudna nu risi a karu nu risi nri tolu nu tolu wam whule owhu.

14 Kpam masi, o buo echiche Nda anu ke zi n'oligwe, nu otu nu rime ele mati ka joowhu etekne.

Nga nwene i mernu i nhne ojo

(Luk 17:3)

15 "Berere, o buru nu nwene i mee i nhne ojo, zne kanu a nhne o mernu i n'esilawuru ji nu ya kpoi. O buru nu o nuru nhne i karu, i rihialam nwene i n'iru.

16 Kovu o buru nu o nuna, kwuru otu badnu mibu badnu lawuru yisinu ehni i, oka obula be kwuru jjoburu nhne ele akebne lawuru mibu eto jeemesi rikne.

17 O buru nu o kwéle o bnonu be nsni, kanu ogbako Chiokike. O buru nu o bnóge ogbako Chiokike nsni, gweru a lele nye máa Chiokike mibu nye ona ntụ.

18 "Me kanu anu ezi oka, nhne obula ke anu jeekne eriri n'owa, Chiokike jeekne a eriri n'oligwe, nhne obula ke anu jootoma n'owa, Chiokike jootoma a n'oligwe.

19 "Berere, me kanu anu, o buru nu anu badnu lawuru kwerekota nu nhne obula anu rioru n'owa, Nda m ke zi n'oligwe jeemezunu anu ya.

20 Kwnornu nu hne badnu lawuru mibu eto gbakoru nu rewhna m, m zi m hnam n'esilawuru be."

Elulu ohi ke nwée mkpoma obirizi

21 Pita vakwnusiri Jizosi sikwa a, "Nyenwe ai, mgba ele bu hne nwene m jeemehie megidne m, m gbarunu a? Du mgba esau sa?"

22 Jizosi kanu a, "M kágene m ji du mgba esau, kovu du nri esau mgba esau.

23 Kam kpayarụ, be jeeji eli-eze Chiokike neesninu otu nye eze, nye pioru ma ya nu ele ohi a piakota iwai.

24 Nga o beteru naapia, be kwuyanụ a otu badnu ke ji a nri pokwu talenti.*

25 Kovu nu kpa o nwée rikne nokwu ogwo o ji, nyenwe a karu be re ya nu nnwerne a nu rumu a, nu kpakara nhne o nwernu, ma be kwuhnata ogwo o ji.

26 "Ohi wam dnarnu n'eli kponu a risi eli, kaa, 'Nyenwe m, knatanu m mkpoma, m jookwuhnata i kpakara nhne me ji i.'

27 Nyenwe ohi wam donu a obirizi, o sigbasi a, gbarunu a ogwo o ji a.

28 "Kovu nu ohi wam whogaru, whnu otu nu rime ohi ibne a, ke ji a otu riwhu mkpuru iwai, o nwugwusi a rikne, whatasi a n'akpiri, naakaa, 'Kwuhnata m nhne obula i ji m.'

29 "Ohi ibne a dna n'eli riasno a, kaa, 'Knatanu m mkpoma, m jookwuhnata i.'

30 "O kwéle, tñnuma, o gweru a tubna a n'oro ikelu,

* 18:24 nri pokwu talenti: ka whuyaru nhne nu lele agida pokwu ndasi mkpuru iwai.

dù nga ọ jọokwuhnata a ọgwo o rigwu a.

³¹ Nga ele ọhi ibne a whnurnu nhne mernu, o gbu be igbugbu k'agida, be zne tnusinunyenwe be kpakara nhne mernu.

³² Ige wam nyenwe ọhi wam sukwuru a, kanu a, 'Ji ọhi ojo, m gbarunu m i kpakara ọgwo wam kwnornu nu i riasornu m.

³³ O bu nu i kwésile o donu ọhi ibne i obirizi, lele kpa me jiri donu i obirizi?'

³⁴ Nyenwe be weru ẹhni k'agida, o gweru a zizne n'oro ikelu ma be ta a awhnũwhnu dù nga ọ jọokwuhnata kpakara ọgwo o jigwu a.

³⁵ "O bu kpa Nda m ke oligwe jeeme anu, o buru nu nye obula nu rime anu jaagbarunu nwene a hite nu mkpoma a."

19

Ogba nnam

(Mak 10:1-12)

¹ Nga Jizosi kwukworu oka ka, o hi nu Galili whoga, zne n'ike eli Judiya n'aznu Osimini Jodani kiyari.

² Igbudu ele badnu snornu a, o gwọ be nriria be pji.

³ Agwna ele Farisi vakwnusiri Jizosi, naakpa a iru, kaa, "O buru oma n'iwu nyerukna gba nnwerne a nnam kwnornu nu nhne obula?"

⁴ O saru be, "Anu gwnuna nu nye kpuru be hite n'opanizo

'kpuru be nyerukna nu nyerinya,'

⁵ kaa, 'Ka kpayaru, nyerukna jaagharu nda a nu nne a, takwnusi n'ehni nnwerne a, be lawuru jogho otu ano-ehni?'

⁶ Kam kpayaru, be buma badnu lawuru, kovu otu ano-ehni. Nhne Chiokike knekotaru, badnu tomana a."

⁷ Be sikwa a, "Kini kpayaru Mozizi nyernu iwu, kaa be gba okwukwo nnam nyee nyerinya, chihala a?"

⁸ Jizosi kanu be, "Mozizi kweru ka kwnornu mkpoma ojo anu, kweru anu gba nnwerne anu nnam, kovu hite nu mbom, o buo kpa o zi.

⁹ Me kanu anu, nye obula ke jaagba nnwerne a nnam, hne o buo nu o neeme oyi, luru nnwerne berere, o neeme masi oyi."*

¹⁰ Ele sno apna a kanu a, "O buru kpa n'esilawuru nyerukna nu nyerinya, o ka mma badnu gharu o lu nnwerne mọbu gbọ nzi."

¹¹ Kovu Jizosi saru be, "O buo kpakara badnu jeegweru oka ka, okwolem ele Chiokike nyernu rikne.

¹² Kwnornu nu agwna ele rukna bu okiri-badnu hite nu ruwho nne be, o zi masi ele badnu ibne be meteru okiri-badnu, ele ke berere bu ele meteru ẹhni be okiri-badnu kwnornu eli-eze Chiokike. Nye nwernu rikne o gweru oka ka, gweru a."

* **19:9** Okwukwo berere kamasiri: *Nye jolu nyerinya wam nga nzi a gharu a nnam neeme masi oyi.*

Jizōsi gōziri rŭmu takiri
(Mak 10:13-16; Luk 18:15-17)

13 Be kwuyanŭ Jizōsi rŭmu takiri ma ọ tŭkwasi be aka a lawŭru, kpenu be okpukpe. Kọvu ele sno apna a bigbọru ele kwuyaru be.

14 Kọvu nŭ Jizōsi kannŭ be, “Anŭ gharŭ rŭmu takiri ma be vakwnusi m, anŭ bnósni be, kwnornu nŭ ẹli-eze Chiokike bŭ ke ele nŭ kpa.”

15 Ọ tŭkwasi be aka a lawŭru, hi nŭ pji whoga.

Eze wikoro
(Mak 10:17-31; Luk 18:18-30)

16 Otu nyerukna vakwnusi Jizōsi, sika a, “Nye-zni-nhne, kini bŭ nhne oma me jeeme ma m nwe m bŭdnu kwó okwo?”

17 Jizōsi kanŭ a, “Kini kpayaru i neesikwa m nhne gbasiri nhne oma? Ọ zá nye bŭ nye oma okwolem otu badnŭ, bŭ Chiokike kpọi. Kọvu ọ buru nŭ i pioru ọ bna nŭ bŭdnu, bita nhne Chiokike nyernu n'iwu.”

18 Ọ sika a, “Ndaa iwu kọ?” Jizōsi kanŭ a, “I gbúko badnŭ, i mékọ ọyi, i znúko buznu, i gbáko akebbe aghalaghala,

19 sọbisinu nda i nŭ nne i, i jọowhnu nye agbatibi i n'anya lele ẹhni i.”

20 Wikoro wam kaa, “M bitaru m kpakara iwu ele ka. Kini gwnarnŭ berere me jeeme?”

21 Jizōsi kanŭ a, “Ọ buru nŭ i pioru nŭ i joozu ozu k'ezi, la, re kpakara nhne i

nwernu, kesi ele mboni, i jeenwe ẹkwnu n'oligwe, vaa, sno m.”

22 Nga wikoro wam nurnu ikwu-onu ka, ọ la, naagbaru ruwhnu, kwnornu nŭ ọ nwernu ẹkwnu k'agida.

23 Jizōsi kanŭ ele sno apna a, “Me kanŭ anŭ ezi oka, ọ jaara ẹhni nye nwernu ẹkwnu ọ bna n'ẹli-eze Chiokike.

24 Berere kwno, me kanŭ anŭ, ọ zinu anohia be kwu kameli ewheke ọ gawhe n'anya alanga, karŭ nye nwernu ẹkwnu ọ bna n'ẹli-eze Chiokike.”

25 Nga ele sno apna a nurnu oka ka, o du kpa be hna ẹhni, be sika, “Ndakwanŭ nye be jọoznohia?”

26 Kọvu nŭ Jizōsi legidnernu be anya, kanŭ be, “Nŭ hne badnŭ zi be jẹemeli a, kọvu be meli kpakara nhne hne Chiokike zi.”

27 Pita sika a, “Le, a sigbasiri kpakara nhne a nwernu snornu i, kini bŭ nhne a jeekehia?”

28 Jizōsi kanŭ be, “Me kanŭ anŭ ezi oka, anŭ ele sno m, nga Nnwọ ke Badnŭ jaadazi nŭ ngadna eze ke igwugwu a n'owa ikne wam, anŭ n'iwuhuru anŭ joosno m daziri nŭ ngadna eze nri nŭ ẹbo neekpe ẹbnurnu nri nŭ ẹbo ke Izireli ikpe.

29 Nye obula ke sigbasiri ọro, mọbu rŭmu nne rukna mọbu rŭmu nne rinya, nda mọbu nne, mọbu rŭmu, mọbu ẹkwu, kwnornu nŭ rewhna m, ọ jeekehia otu riwhu nhne ọ sigbasiri, kehia masi bŭdnu kwó okwo.

30 Kòvu nù agìda ele be ọsno jọobu ele ipne-aznù, ele ipne-aznù jọobu ele be ọsno.”

20

Elulu ele ẹrnu ẹkwu vaìni

1 “Èli-eze Chiokike nù lele otu nyerukna nwernu ẹkwu ke whọgaru n'ọnu ọsisi zne o gno ele ẹrnu jọornunu a ẹrnu n'ẹkwu vaìni a.

2 Nga ya nù ele ẹrnu wam kwẹkọtaru nù ọ jọokwu be otu mkpọru iwai n'ọbochi, o zizne be n'ẹkwu vaìni a.

3 “Ọ whọga masì nù nhne nù lele ọtnu-ige tolu n'ọsisi whnù ele berere nwée nhne be nọornu hne be gwuzogwu n'ederezì ahia.

4 Ọ kanù be, ‘Anù zne nù rime ẹkwu vaìni m, nhne dunnu anù bụ nhne me jeenye anù.’

5 Be zne. Ọ whọga kwno nhne nù lele ọtnu-ige ke nri nù ẹbo, nù ọtnu-ige ke ẹto n'esilawuru iwhnehnie, mee masì otu nhne wam.

6 Ọ whọga masì n'ọtnu-ige ke isne n'ogbednachi whnù ele berere hne be gwuzogwu n'ederezì ahia, ọ sịkwa be, ‘Kìni kpayarù anù gwuzogwu hna kpakara ọbochi, ọ zá nhne anù nọornu?’

7 “Be kaa, ‘Kwnornu nù ọ zá nye gnornu aì ẹrnu.’

“Ọ kanù be, ‘Anù zne n'ẹkwu vaìni m.’

8 “N'ogbednachi, nye nwe ẹkwu vaìni wam kanù nye risi ele ẹrnu o sukwu ele ẹrnu wam, kwù be ọgwo ẹrnu be. Ọ panizo nù ele ipne-aznù dù nù ele be ọsno.

9 “Nga ele be gnornu ẹrnu n'ọtnu-ige ke isne varù, be nahiaru otu badnù otu mkpọru iwai.

10 Kòvu nga ele be ọsno varù, be cheru nù be jaanahia ke kakwo, be nahia kwno otu badnù otu mkpọru iwai.

11 Nga be nahiaru a, be takponu nye nwe ẹkwu.

12 Be kaa, ‘Ele ipne-aznù ka rnurnu ẹrnu otu ọtnu-ige, i kwuru aì nù be otu ọnu iwai, aì bụ ele vuru ivu rinya ke ọbochi tna neerne bẹkwu.’

13 “Kòvu ọ sarù nnim nù rime be, kaa, ‘Enyi m, m méhiele m i, me nù jì a kwékọritala nù m jeenye i otu mkpọru iwai?’

14 Gweru ke bụ ke i, laba, ọ masiri m me nyee ipne-aznù lele kpa me nyernu i.

15 O kwésile n'iwu me gweru nhne m mee kpa me pioru sa? I neewe ẹhni kwnornu nù m neemenu ele badnù imerne ọma sa?’

16 “Kpam masì, ele ipne-aznù jeebe ọsno, ele be ọsno jọobu ele ipne-aznù.”

Jizọsi kwuru ọka gbasiri ẹnwu a ke mgba ẹto

(Mak 10:32-34; Luk 18:31-34)

17 Kpa Jizọsi neezne Jeruselem, o kwuru ele sno apna a nri nù ẹbo wam zne ichne nù ngeri apna. Ọ kanù be,

18 “Le, a neezne Jeruselem, be jeegweru Nnwọ ke Badnù nyewhete n'aka ele risi ariohna nù n'aka ele zni iwu ele Ju, be jaama a ikpe ẹnwu,

19 be jeegweru a nyewhete n'aka ele búo ele Ju, be jeeme a nhne mkpari, pńja a nhne, kpogidne a n'ogba, n'obochi ke ęto, o jeehi n'ęnwu lizo."

*Arįrio ke nne rųmu Zebidi
(Mak 10:35-45)*

20 Nne rųmu Zebidi vakwnusiri a, ya nų rųmu a rukna, kpõnu a risi ęli, nõorio nhne n'aka.

21 Jizõsi sįkwa a, "Kįni nhne į noopio?"

Ọ kanų a, "Kweru rųmu m rukna lawųru ka dazįri otu n'akarikwnunga į, otu n'akarita į n'ęli-eze i."

22 Jizõsi kanų be, "Anų máa nhne anų nõorio. Anų jõonwoli okiko ke me nõonwo?"

Be kanų a, "A nwernu rikne."

23 Jizõsi kanų be, "Anų jõonwo n'okiko m, kõvu ọ dazį n'akarikwnunga m nų akarita m, ọ búo ke m n'onnyega, kõvu nų ọ bú ke ele Nda m bįkwatannu a."

24 Nga ele sno apna a nri ke gwnarnų nųrnnu a, o we be ęhni k'agįda kwnornu rųmu nne lawųru ka.

25 Jizõsi sukwukõta be, kanų be, "Anų magwų nų ele risi ele búo ele Ju neeme ele be neęchi kpa ọ masįri be. Ele kwu be ji aka rikne neęchi ele zį nų mkpururu be.

26 Ọ jáazį kpam n'esilawųru anų. Kõvu nye pioru ọ búru nye kwu n'esilawųru anų, ọ jõobu nye neeznenu anų izi,

27 nye ke pioru ọ búru nye mbõm n'esilawųru anų jõobu õhi anų.

28 Lele kpa Nnwõ ke Badnú váge ma be znenu a izi, kõvu ma o neeznenu ele berere izi, gweru masį búdnu a nyee ma ọ búru nhne õgbahia agįda badnú."

*Jizõsi gwõru ele isni
(Mak 10:46-52; Luk 18:35-43)*

29 Kpa Jizõsi nų ele sno apna a nõowhuya nų Jeriko, agįda ele badnú noosno a.

30 Ele rukna lawųru kpuru isni dazįgwu nų ngeri apna, nga be nųrnnu nų Jizõsi neewhe, be si lulo, kaa, "Dõnu aį obirizi, Nyenwe aį, Nnwõ Devidi."

31 Agįda ele badnú wam bigbõru be, kanų be, be kpusni õnu. Kõvu nų be siwama k'agįda, kaa, "Dõnu aį obirizi, Nyenwe aį, Nnwõ Devidi."

32 Jizõsi gwuzoru, sukwu be, kaa, "Kįni bú nhne anų pioru me menu anų?"

33 Be kaa, "Nyenwe aį, a pioru ma i mee ma a whnú õsno."

34 Jizõsi dõnu be obirizi, ọ kpatų be aka n'anya, ngangam be beteru ọ whnú õsno, be snornu a.

21

*Jizõsi bnaznenu Jeruselem
(Mak 11:1-11; Luk 19:28-38; Jõn 12:12-19)*

1 Nga be vaduru Jeruselem ndundu, be dųru Bętifagi, ke zį nų Rugwu Olivu, Jizõsi zizn-ernu badnú lawųru ele sno apna a.

2 Ọ kanų be, "Anų zne nų mgbu matį ke zį nų ruwhnu

anụ, ngangam anụ jọowhnu iyinya be kpọkwonusiri, ya nū nnwọ a, anụ tọma be, tọyanu m be.

³ Nye sịkwaru anụ nhne ọbula, anụ kanụ a, 'Be zị Nyenwe aị mkpa,' ngangam o jeenye anụ be."

⁴ Ka bụ ma nhne be kwuru hite n'ọnu nye ọwhnurninya mezu,

⁵ "Kanụ ele Zayọni,
'Le, eze i naavakwnusi i,
ọ bụ enwerne badnụ,
ọ dazịgwu n'olu iyinya,
n'olu nnwọ iyinya.' "

⁶ Ele sno apna a zne mee kpa Jizọsi nyernu be iwu.

⁷ Be tọya iyinya wam nū nnwọ a, wụkwasi be iwo be, Jizọsi daziri n'olu be.

⁸ Igbudu ele badnụ gbata iwo be n'apna, ele berere gbubiharu nkala isisi, tusa be n'apna.

⁹ Igbudu badnụ ele neezne nū ruwhnu a nū ele snogwu a, neesi lulo, naakaa,

"Ozana* zinu Nnwọ Devidi!
Chiokike gọzi nye naava
nū rẹwhna Nyenwe aị,
Ozana nū hne kakwo
n'olu."

¹⁰ Nga ọ bnanyarnu nū Jeruselem, kpakara ẹli-ọhna mernu imerne, naakaa, "Nyele bụ nyerukna ka?"

¹¹ Igbudu ele badnụ wam naakaa, "Nyerukna bụ Nye Ọwhnurninya wam, Jizọsi ke hi nū Nazarėti ke Galili va."

*Nhne Jizọsi mernu
n'Oro Nso Chiokike
(Mak 11:15-19; Luk 19:45-48; Jọn 2:13-22)*

¹² Jizọsi bna n'Oro Nso Chiokike chihala ele neere, nọozu ahia n'Oro Nso. O kpute ikpechi kpakara ele naagbanwo iwai ruwhnu n'eli, nū ngadna ele neere nduru.

¹³ Ọ kanụ be, "Be gbarụ a n'okwukwo nsọ, kaa, 'Be jookwu ọro m ọro okpukpe,' kọvu nū anụ mernu a ọ bụru ọbna ele buznu."

¹⁴ Ele isini nū ele mgworo vakwnusi a n'Oro Nso, ọ gwo nriria be.

¹⁵ Kọvu nga ele risi ariohna nū ele zni iwu ele Ju whnurnu kpakara ẹrnu ndu-ehni ọ nọornu, nū rụmu takiri neesi okokoba n'Oro Nso, naakaa, "Ozana zinu Nnwọ Devidi," o we be ẹhni k'agida.

¹⁶ Be sịkwa a, "Ị nurnu nhne rụmu takiri ka nookwu?"

Jizọsi kanụ be, "Owe! Anụ gwnuna nhne okwukwo nsọ kwuru,
'Hite n'ọnu rụmu takiri nū
rụmu nọonwo rẹma,
i mernu ọznarni dna ọdna.'

¹⁷ Ọ gharu be, whoga, zne Bẹtani, daziri chi bọ.

*Jizọsi vuru isisi
be kwu figi ọnu
(Mak 11:12-14,20-24)*

¹⁸ N'osisi, nga Jizọsi hiri nū Bẹtani naala Jeruselem, wiri gwnurnu a.

¹⁹ Nga ọ whnurnu isisi figi n'apna, ọ vadu a ẹhni, kọvu ọ whnuna mkpuru ọbula n'olu a, okwolem okwukwo budnu kpọi, ọ kanụ isisi wam, "Mkpuru miko n'olu i tim

* 21:9 N'ikwu-ọnu ele Hiburu, Ozana bụ Znphia!

tom.” Isisi figi wam kpõnwu ngangam.

20 Nga ele sno apna a whnurnu a, o duru be eñni, be kaa, “Ndaa kpa isisi ka jiri kpõnwu ngangam?”

21 Jizõsi saru be, “Me kanu anu ezi oka, o buru nu anu nwernu okwnata mkpõma, nwée mkpõma lawuru, o buo nhne be mernu isisi figi ka bu nhne anu jeemeli dai, kovu o buru nu anu jaakanu rugwu ka, ‘Lizõ, dnabna osimini,’ o jeeme.

22 Kpakara nhne obula anu jorrio n'okpukpe, anu jaanahia, o buru nu anu nwernu okwnata mkpõma.”

Rikne Jizõsi

(Mak 11:27-33; Luk 20:1-8)

23 Nga o bnanyarnu n'Oro Nso Chiokike, ele risi ariohna nu ele okno badnu ele Ju vakwnusiri a. Nga o neezni nhne, be sikwa a, “Rikne kini bu nhne i ji neeme nhne i neeme? Nyele nyernu i rikne i ji neeme kpakara nhne ka?”

24 Jizõsi saru be, “M jaasikwa anu otu aiji, o buru anu sa m, m jaakanu anu rewhna rikne me ji neeme kpakara nhne ka.

25 Owu mini Jõni o hi hnele va? O hi n'oligwe sa, mõbu n'aka badnu?”

Be kwu a n'esilawuru eñni be, kaa, “O buru nu a kaa, ‘O hiri n'oligwe,’ o jaasikwa ai, ‘Kini mernu anu kwéle a?’

26 Kovu o buru a kaa, ‘O hi n'aka badnu,’ a notu ogwnu ele badnu ka, kwnornu nu kpakara badnu kweru nu Jõni bu nye owhnurninya.”

27 Be saru Jizõsi, “A máa.”

Jizõsi kanu be, “M jáaka masinu anu rewhna rikne me ji neeme kpakara nhne ka.”

Elulu rumu rukna lawuru

28 Jizõsi kanu be, “Kini bu nhne anu naari? Otu nyerukna nwernu rumu rukna lawuru, o znekwnusi ke mbom, kanu a, ‘Nwõ m, zne ernu tna n'ekwu vaini m.’

29 “O kaa, ‘M jeezne,’ omekwo, o tuhnasna mkpõma zne.

30 Nda be znekwnusi ke ebo, kwu otu nhne wam, ke ebo kaa, ‘M jeezne, nyenwe m,’ kovu nu o znége.

31 “Nyele nu rime be lawuru mernu nhne nda a pioru?”

Be kaa, “Nye ke mbom.”

Jizõsi kanu be, “Me kanu anu ezi oka, nu ele ona ntõ nu ele naagba ewhere jeebe anu osno bna n'eli-eze Chiokike.

32 Kwnornu nu Jõni varu gesi anu apna ome mma, anu kwéle, kovu ele ona ntõ nu ele naagba ewhere kweruru. Nga anu whnurnu a, anu tuhnasnana mkpõma, kweru a.

Elulu ele ernu ekwu vaini

(Mak 12:1-12; Luk 20:9-19)

33 “Anu nurnu elulu berere, otu nyerukna zi ke nwernu ekwu, o kparu vaini. O gba a mgbugba gburugburu, gwu igbodo hne be jaazi nõzosna manya nu rime a, wu masi oro olu ele nse nu rime a. O gweru ekwu wam yisi n'aka ele jeelekõta a, whõga zne n'eli berere.

34 Nga ige o ghõ mkpuru duru, o ziznenu ele izi be

znkwnusi ele ɛrnu ɛkwu wam, nahja be mkpuru ke dɔnnu a.

35 “Ele ɛrnu ɛkwu wam nwugwu ele izi wam, pɔɔa otu nhne, gbu otu, lo kwno ke berere akaworugwu.

36 O zizne kwno ele izi berere ke kakwo ele ke mbom, be mee kwno be kparam.

37 N'ipne-aznu o zizneru nnwo a, kaa, ‘Be jɔsobisinu nnwo m.’

38 “Kovu nga ele ɛrnu ɛkwu wam whnurnu nnwo wam, be gba iznuznu, kaa, ‘Ka bu nye jeeri mkpe nye nwe ɛkwu ka, anu va ma a gbu a, ri mkpe a.’

39 Be nwugwu a, gwehala a n'aznu ɛkwu vaini wam, gbume a.

40 “Nga nye nwe ɛkwu vaini wam varu, kini bu nhne o jeeme ele ɛrnu ɛkwu wam?”

41 Be kanu a, “O jeeme ele ojo wam nwu ɛnwu ojo, gweru ɛkwu vaini a nyewhete n'aka ele ɛrnu ɛkwu berere ele jeenyehnata a mkpuru a n'ige a.”

42 Jizosi kanu be, “Anu gwnuna nhne be gbaru n'okwukwo nsɔ,

‘Akaworugwu ke ele noowu
oro juru,
kiyam ghɔlam risi nsukala
oro.

Ka bu ɛrnu Nyenwe ai,
o bu nhne ndu-ehni
n'anya ai.’

43 “Me naakanu anu nu be jaanahoru anu eli-eze Chiokike, nyewhete ele berere ke jaami mkpuru a. [

44 Nye obula ke jaadnakwasi akaworugwu ka, jaagbawa ibekala ibekala, kovu nye obula ke akaworugwu ka jaadnakwasi, o jeegweri a lele retnu.”]

45 Nga ele risi arɔhna nu ele Farisi nurnu elulu ele ka, be mahiaru nu o nookwu oka gbasiri be.

46 Be noopio kpa be jeeji nɔowugwu a, kovu nu be turu ogwnu igbudu badnu wam, kwnornu nu be gweruru a nu nye owhnurninya.

22

Elulu olulu nnwerne (Luk 14:15-24)

1 Jizosi tukwnonu be elulu berere, kaa,

2 “Be jeeji eli-eze Chiokike sninu otu nyerukna bu eze, ke mennu nnwo a rukna iriri olu nnwerne.

3 O zihala ele izi a be sukwu ele be ziri va n'iriri olu nnwerne wam. Kovu be kwéle o va.

4 “O zihala ele izi a berere, kaa, ‘Kanu be nu m mekwatalam nhne iriri, be gbulem kpakara okne ehni m nu rumu nnwo ehni m be znurnu oznu, be mekwakwolem kpakara nhne, anu vanu m iriri olu nnwerne.’

5 “Kovu nu be lewhuru a anya, znernu ke be, otu nyenum n'ekwu a, ke berere n'ernu a.

6 Ele gwnarnu nwugwu ele izi a mee be nhne iwhnerne, gbu be.

7 Eze wam weru ehni k'agida, o zizne ele ogwnu a, be zne gbumelele ele ogbu

badnu wam, kpo eli-ohna be bekwnu.

8 “O kanu ele izi a, ‘M bikwatakwolem nhne iriri olu nnwerne, kovu nu ele me sukwuru kwesile.

9 Anu zne nu kpakara ngeri apna, sukwu kpakara badnu anu whuru, be va ri wiri olu nnwerne ke m.’

10 Ele izi wam whoga n'apna, sukwu kpakara badnu be whuru, kpa be hna, ma ele ojo ma ele oma, oro olu nnwerne wam jipiyaru nu badnu.

11 “Kovu nga eze wam bnanyaru o lesi ele izne wam, o whuru otu nyerukna ke woge iwo olu nnwerne.

12 O sikwa, ‘Enyi m, ndaa kpa i jiri bnanya hna ma woge iwo olu nnwerne?’ Onu snirni a.

13 “Ige wam eze kannu ele izi a, ‘Anu kne a eriri ochi nu aka, gwehala n'ederezi, bita a n'ochichiri hne be jaazi naakwna ekwna, naata rukwnurnu-ize.’”

14 N'ochikota kpakara nhne n'otu, Jizosi kaa, “Be sukwuru agida badnu, kovu nu ele be hohiaru zi ele nu ele.”

Otu ntu-eli

(Mak 12:13-17; Luk 20:20-26)

15 Ige wam ele Farisi znernu gba iznuznu kpa be jeeme ma o hite n'ikwu-onu gbu nu mbita be.

16 Be ziznenu a ele sno apna be nu ele dagwunu Erudu, kaa, “Nye-zni-nhne, a magwu nu i bu nye ezi oka, nye neezni apna Chiokike n'ezi oka, nu i

só badnu anya kwnornu nu i lé badnu anya nu ruwhnu.

17 Kanu ai, kini bu echiche i, o buru oma n'iwu a tu ntu nyee Siza, sobu o buo oma?”

18 Kpa Jizosi magwu nhne ojo be vu nu mkpoma, o sikwa be, “Ndaa nhne anu kwno naakpa m iru, ele ruwhnu lawuru ka?”

19 Anu gesi m mkpuru iwai ntu.” Be gweyanu a otu mkpuru iwai.

20 O sikwa be, “Nyele nwe ruwhnu ka nu rewhna be gbakwasiri a?”

21 Be kaa, “Siza nwe.”

O kanu be, “Anu nyee Siza nhne ke Siza, nyee masi Chiokike nhne ke Chiokike.”

22 Nga be uru a, o duru be ehni, be whoga, gharu a lahna.

Ajji gbasiri olizo n'enwu

(Mak 12:18-27; Luk 20:27-40)

23 N'obochi wam masi, ele Sadusi vakwnusiri a, ka bu ele karu nu olizo n'enwu zila. Be sikwa a,

24 “Nye-zni-nhne, Mozizi karu, ‘O buru nu nyerukna nwu, nwée rumu, nwene a rukna jooluru nnwerne a mughianu nwene a rukna rumu.’

25 Kitna, rumu nne rukna esau nu ai wuru hna, ke mbom luru nnwerne, nwuma nwée nnwo, o sigbasinu nwene a rukna nnwerne a.

26 Otu nhne wam mernu nwene a rukna ke ebo, nu ke eto, du nu ke esau.

27 Omekwo kpakara be nwukworu, nwerinya wam masi nwuru.

28 N'olizo n'ẹnwu, nwerinya wam ọ jọbu nnwerne nyele nụ rime ẹsau wam? Kwnornu nụ kpakara be luru a nụ nnwerne."

29 Jizọsi saru be, "Anu gahieru apna, anu máa nhne be gbaru n'okwukwo nsọ, mọbu rikne ke Chiokike.

30 Kwnornu nụ n'olizo n'ẹnwu, be lú nnwerne, be gbọ nzi. Be jọnu lele ele enine izi zị n'oligwe.

31 Kọvu nhne gbasiri olizo n'ẹnwu ke ele nwurru ọnwu, anu gwnuna nhne Chiokike kanu anu? O karu,

32 'Mawa bu Chiokike ke Eberham, nụ Chiokike ke Aziki, nụ Chiokike ke Jekopu? Chiokike buo Chiokike ke ele nwurru ọnwu. O bu Chiokike ke ele zị budnu."

33 Nga igbudu badnu wam nurru a, o du kpa be hna ẹhni n'iznizni a.

Iwu ke kakwo ibne a
(Mak 12:28-34; Luk 10:25-28)

34 Nga ele Farisi nurru nụ Jizọsi mesnirni ele Sadusi ọnu, be gbakoru n'otu.

35 Otu badnu nụ rime be, bu nye ọgwu iwu sika a ajiji naakpa a iru. O kaa,

36 "Nye-zni-nhne, ndaa iwu ke kakwo kpakara Iwu Mozizi nyernu ai?"

37 Jizọsi saru a, "I jeegweru kpakara mkpoma i, gweru kpakara mkpuru ovu i, gweru kpakara ọriri i, whnu Nyenwe ai Chiokike n'anya."

38 Ka bu iwu ke kakwo nụ nhne mọm be nyernu n'iwu.

39 Iwu ke ẹbo nụ lele ya, 'I jọwhnu nye agbatibi i n'anya lele ẹhni i.'

40 Kpakara Iwu nụ kpakara iznizni ele ọwhnurninya Chiokike knogwu aka n'iwu lawuru ka."

Karaisi bu nnwo nyele?

(Mak 12:35-37; Luk 20:41-44)

41 Kpa ele Farisi gbakoru, Jizọsi sika be,

42 "Kini bu echiche anu gbasiri Karaisi? O bu nnwo nyele?"

Be kanu a, "O bu Nnwọ Davidi."

43 Jizọsi kanu be, "Kini mernu Enine Chiokike jiri mee Devidi sukwa a 'Nyenwe m'? Devidi karu,

44 'Nyenwe ai kanu Nyenwe m,

Daziri ẹli n'akarikwnunga m,

tem du nga me jaabita ele irno i

nụ mkpururu ọchi i lawuru.' "

45 "O buru nụ Devidi sukuru a 'Nyenwe m,' ndaa kpa o jeeji buru kwno nnwo a?"

46 Be máa nhne be jaasa a. Hite n'ige wam ọ zima nye nwernu anya rikne ọ sika a ajiji berere.

23

*Ele Farisi nu
ele zni iwu ele ju*

(Mak 12:38-40; Luk 11:37-52; 20:45-47)

1 Nga wam, Jizọsi kanu agida ele badnu wam nụ ele sno apna a,

2 "Ele zni iwu nụ ele Farisi ji rikne Mozizi neezni iwu.

³ Anụ bnote nsni, anụ mee nhne be karụ anụ mee, kọvu anụ kpákwadia agwa lele be. Kwnornu nụ be mée nhne be neezni.

⁴ Be noovute ele badnụ ivu rinya, kọvu be nwée rikne gweru otu mkpaka kpatụ ivu wam.

⁵ “Kpakara nhne be neeme bụ ma ele badnụ lekiri be. Be neeme rẹkpa akpukpo anohia be biga iwu ziri rude, mee ọnu iwo be zị ogologo.

⁶ Ọ naamasị be ọ dazị nụ risi ngadna nụ ige iriri, ma nụ risi ngadna n'oro ọgbako ele Ju.

⁷ Ọ naamasị be ele badnụ neebekwu be ikwu n'ahia, ele badnụ noosukwu be, 'Nye-zni-nhne.'

⁸ “Anụ kwéko be sukwu anụ 'Nye-zni-nhne,' kwnornu nụ otu nyenum bụ Nye-zni-nhne anụ, kpakara anụ bụ rụmu nda.

⁹ Anụ súkwu nye ọbula 'nda' n'owa, kwnornu nụ otu nyenum bụ nda anụ, Nda ke oligwe.

¹⁰ Be súkwu anụ 'Nda-ai-kwu,' kwnornu nụ otu nyenum bụ Nda-ai-kwu, ya bụ Karaisi.

¹¹ Nye kwu n'esilawuru anụ jọbu nye izi anụ.

¹² Nye ọbula ke jeegwelizo ẹhni a olu, be jeegwedna a ẹli, nye ọbula ke jeegwedna ẹhni a ẹli, be jeegwelizo a olu.

¹³ “Awhnụwhnu zinu anụ, ele zni iwu nụ ele Farisi, ele ruwhnu lawuru. Anụ naagbasni mgbo ẹli-eze Chiokike nụ ruwhnu ele badnụ, anụ zá

naabna, anụ kwé ele naabna be bna. [

¹⁴ Awhnụwhnu zinu anụ, ele zni iwu nụ ele Farisi, ele ruwhnu lawuru. Anụ neeridna ọro ele rinya nzi be nwurnu, neekpe ogologo okpukpe ma ele badnụ whnụ anụ, anụ jeenwe ọmuma ikpe kakwo ele berere.]

¹⁵ “Awhnụwhnu zinu anụ, ele zni iwu nụ ele Farisi, ele ruwhnu lawuru, anụ neewhe okne osimini ma nụ ẹli etekne mee otu badnụ ọ buru nye sno anụ kpenu Chiokike, nga anụ mernu a, anụ mee nye wam ọ buru nye kwesiri o zne bẹkwnu ẹli renwu mgba lawuru karụ anụ.

¹⁶ “Awhnụwhnu zinu anụ ele ndu isni, ele karụ, 'Nye ọbula ke jeegweru Ọro Nso Chiokike dū risi, ọ zá nhne ọ bụ, kọvu nye ọbula ke jeeji golu zị n'Ọro Nso dū risi jigwu ọgwo.'

¹⁷ Anụ ele iwhnirniwhno whnú ọsno, ndaa ke kakwo, golu, sọbu Ọro Nso ke bítaru golu nsọ?

¹⁸ “Anụ karụ, 'Nye ọbula ke jeeji ojo ariohna dū risi, ọ zá nhne ọ bụ, kọvu nye ọbula ke jeeji nkesi zị n'olu a dū risi jigwu ọgwo.'

¹⁹ Ele whnú ọsno, ndaa ke kakwo, nkesi sọbu ojo ariohna ke bítaru nkesi wam nsọ?

²⁰ Kam kpararụ, nye ji ojo ariohna dū risi, ji a, nụ kpakara nhne zị n'olu a dū risi.

²¹ Nye ji Ọro Nso Chiokike dū risi, ji a, nụ Nye wu nụ rime a dū risi.

22 Nye jimasị oligwe dị risi, jì ngadna eze Chiokike, nù nye dazì n'olu a dị risi.

23 “Awhnụwhnu zìnu anụ, ele zni iwu nù ele Farisi, ele ruwhnu lawụru, anụ nọkwu otu nga nù nri nga ke mkpọro ọkwukwo nwernu ẹknarna ọma, mịnti nù anisi nù kumi, anụ gharụ nhne zì rịnya n'iwu, bụ ikpe zì snam, nù obirizi, nù ọkwnata mkpọma. Ọ zì mkpa nù anụ znernu eme nhne ka nù ke berere.

24 Anụ ele ndu isni, anụ naazahala ndna, kọvu ro kameli.

25 “Awhnụwhnu zìnu anụ, ele zni iwu nù ele Farisi, ele ruwhnu lawụru, anụ nọosnu aznụ okiko nù ọkwu be zìri rịchna, kọvu nù rime be jipiyaru nù ọwho-anya nù badnụ nwée rikne jikwaru ẹhni a.

26 Jì nye Farisi kpuru isni, beru ọsno mee ma rime okiko nù agbụgba zìri rịchna, ma aznụ a bụru kwno nhne zì rịchna.

27 “Awhnụwhnu zìnu anụ, ele zni iwu nù ele Farisi, ele ruwhnu lawụru, anụ nù lele ilili be teru nznu, ke neegesi ẹhni a lele nhne marnụ mma n'iwhe, kọvu ọkpukpu ele nwurnu ọnwu nù kpakara nhne zìla rịchna jìhìaru nù rime a.

28 Ọ bụ kpa anụ neegesi ẹhni anụ ele badnụ lele ele ọma, kọvu ruwhnu lawụru nù agwa ojo jìhìaru nù rime anụ.

29 “Awhnụwhnu zìnu anụ, ele zni iwu nù ele Farisi, ele ruwhnu lawụru, anụ noowu

ilili ele ọwhnurninya, bìkwata hne be liri ele ọma.

30 Anụ naakaa, ‘Ọ bụru nù a zì n'ọbochi ele nda aì, a bo snóne be wụsi ọvnarna ele ọwhnurninya.’

31 Kam kpayaru, anụ naagbagidne ẹhni anụ akebne, anụ bụ rụmu ele gburu ele ọwhnurninya.

32 Anụ mezute nhne ọtutu mmehie ke ele nda anụ.

33 Anụ agwọ, anụ ẹbnurnu okpu-ẹli, ndaa kpa anụ jaagbanahọru ikpe ke ẹkwunu ẹli rẹnwu?

34 M neeziyanu anụ ele ọwhnurninya nù ele akoniche nù ele zni Iwu Mozizi. Kọvu anụ joogbu agwna be, kpogidne be n'ogba, anụ jaapnịa agwna be nhne n'oro ọgbako anụ, kpagbu be hite nù otu ẹli-ọhna dị ẹli-ọhna berere.

35 Kam kpayaru, ọvnarna kpakara ele ọma be wuwhuru n'ọwa jaadnakwasị anụ, hite n'ọvnarna Ebeli nye ọma dị ọvnarna Zakaraya nnwọ Berekaya, nye anụ gburu n'iketa hne zì nsọ nù ojo arịohna.

36 Me kanụ anụ ezi ọka, kpakara nhne ka jaadnakwasị ebiri ka.

*Jizọsi whnurnu
Jeruselem n'anya
(Luk 13:34,35)*

37 “Chei! Jeruselem, Jeruselem, jì ke noogbu ele ọwhnurninya, ke jì akaworugwu nọolo ele be ziyannu ì. Mgba ele kpa me pioru ọchikota rụmu ì lele kpa enwerne ọchichi nẹchikota

rūmu a nū mkpururu aka nkwu a lawuru, kovu i kwéle.

³⁸ Le, be naaghasanū anū oro anū ma o tobiri etekne.

³⁹ Kwnornu nū ka, me kanū, hite kitna, anū jowhnu m berere du nga anū jaakaa, 'Chiokike gozi nye wam ke naava nū rewhna Nyenwe aị.' "

24

Be joolulu Oro Nso

Chiokike

(Mak 13:1,2; Luk 21:5,6)

¹ Jizosi hi n'Oro Nso Chiokike whoga, ele sno apna a vakwnusi a neegesi a kpa a jiri wu Oro Nso Chiokike.

² Jizosi kanū be, "Anū whnurnu kpakara nhne ka? Me kanū anū ezi oka, otu akaworugwu jógwuzo n'olu ibne a, be jaakwnadna kpakara be n'eli."

Mmekpehni nū

okpakna ehni

(Mak 13:3-13; Luk 21:7-19)

³ Nga Jizosi daziri eli n'olu Rugwu Olivu, ele sno apna a vakwnusi a ichne, be kaa, "Kanū aị nga kpakara nhne ele ka jeeme. Kini jeegesi nū ovuva i zi ndundu, ya nū okwukwo owa?"

⁴ Jizosi saru be, "Anya du anū eli o zi nye obula duhie anū.

⁵ Kwnornu nū agida ele badnu jaava nū rewhna m, naakaa, 'Mawa bu Karaishi,' be jooduwhu agida ele badnu.

⁶ Anū jonu ogwnu nū otnutnu ogwnu, kovu mkpoma la anū mini. Kpakara nhne

ka jeebe osno mee, kovu okwukwo yoduge.

⁷ "Mba jeelizo megidne mba, eli-eze jeelizo megidne eli-eze, okwnunyo nū eli otne enye jaazi nū hne zi ichne ichne.

⁸ Kpakara nhne ka jonu lele opanizo igbugbu omumu nnwo.

⁹ "Ige wam be jeegweru anū nyee ma be kpakna anū ehni, gbu agwna anū, kpakara mba joosno anū irno kwnornu m.

¹⁰ Agida ele badnu jabita okwnata mkpoma be, be jeere ibne be, sno ibne be irno.

¹¹ Agida ele owhnurninya aghalaghala jeelizo masi, duwhu agida ele badnu.

¹² Kwnornu nū nhne ojo jaazi agida, owhnun'anya agida ele badnu jeeji iyi.

¹³ Kovu be joznohia nye obula ke jaaknata mkpoma, dazigidne du okwukwo kpakara nhne.

¹⁴ Be jokpo okwo izi oma ka ke gbasiri eli-eze Chiokike nū kpakara owa ma o buru nhne akebne nyee kpakara mba, ige wam okwukwo kpakara nhne jaava.

*Awhnuwhnu ke
ele Jeruselem jaata*

(Mak 13:14-23; Luk 21:20-24)

¹⁵ "Anū jowhnu nhne ru ru oru ke neegweya gba eso n'eli hne o gwuzo nū hne zi nso, ke Daneli nye owhnurninya kwuru oka gbasiri a. (Bno nsni, nye obula ke nogwnu nhne ka, ghohia a masi.)

16 Ige wam, ele zị nụ Judiya gbazne n'olu rugwu.

17 Nye zị n'olu ọro hiedna ọ kwahala nhne zị n'oro a.

18 Nye zị n'ekwu lánna aznụ, chiri iwo a.

19 Awhnụwhnu jaazinu ele rinya zị rime nụ ele neechi nnwọ rẹma n'ige wam.

20 Anụ kpenu Chiokike ọgba ẹso anụ búko n'ige okirika mọbu n'Ọbochi Ozukwa Inwe.

21 Kwnornu n'ige wam okne mmekpẹhni jaazị ke nụ lele ya zikolele hite n'ọpanizo ọwa dụ kịtna, owe, ọ jáazịma berere.

22 Ọ bụru nụ be méne ọbochi wam ziri ichichi, ọ zá badnụ ọbula be jọoznohiali, kọvu kwnornu nụ ele Chiokike hohiaru, o mernu ọbochi wam ziri ichichi.

23 Ige wam ọ bụru nụ nye ọbula kanụ i, 'Le Karaịsi zị hna,' mọbu, 'Ọ zị pịari,' i kwé.

24 Kwnornu nụ Karaịsi aghalaghala zị ọdo n'odo, nụ ele ọwhnurninya aghalaghala zị ọdo n'odo jọowho iwhne, nọornu agịda ẹrnu ndu-ẹhni nụ ẹrnu elekema zị ọdo n'odo, ma be duwhu ele Chiokike hohiaru ọ bụru nụ o jeekwe omume.

25 Anụ bnote nsni, m bele m ọsno kanụ anụ.

26 "Ọ bụru nụ nye ọbula kanụ anụ, 'Le ọ zị n'ẹli-ikpa,' anụ zné, mọbu 'Ọ zị nụ rime ọro matị,' anụ kwé.

27 Kwnornu nụ lele kpa amụma oligwe neehi n'ọbosi ẹhnam dna nụ ọdidna ẹhnam, bụ kpa ọ jọonu nga Nnwọ ke Badnụ jaava.

28 Henuhne ọbula iznu dnarnụ, idele jaagbakọ pịi.

Nnwọ ke Badnụ vawa
(Mak 13:24-27; Luk 21:25-28)

29 "Wara wara mmekpẹhni ka whemernu n'ọbochi wam, ẹhnam jaagba ọchichiri, ẹnwa jéenye iwhne a, mbọ ke oligwe jaadna, kpakara iknernema ke oligwe jọohnio ohnio.

30 "Ige wam, nhne elekema ke Nnwọ ke Badnụ jọowhuya iwhne n'oligwe, kpakara mba jaagbanụ a mkpe. Be jọowhnu Nnwọ ke Badnụ hne o naava n'erumeru oligwe n'iknernema nụ okne igwugwu.

31 Be jọogbu okne ọkwodu, o jeezihala ele enine izi a, be chikotanụ a ele ke Chiokike hohiaru hite nụ ruwhere ẹno k'owa, hite n'osotoma ọwa dụ n'osotoma berere.

Muhia nhne hite
n'isisi be kwu figi
(Mak 13:28-31; Luk 21:29-33)

32 "Anụ muhia nhne hite n'isisi figi, nga nkala a zịlam pịali pịali nooru ọkwukwo ikne, anụ mahia nụ nduru-mini zị ndundu.

33 Kpam masi, nga anụ jọowhnu kpakara nhne ka, anụ mahia nụ ige wam zị ndundu n'ọnu-mgbo.

34 Me kanụ anụ ezi ọka, ebiri ka jéewhe tem kpakara nhne ka mee.

35 Oligwe nụ ọwa jaagawhe, kọvu ikwu-ọnu m jáagawhe rịa rịa.

*Ọ zá nye magwụ
ọbochi wam*

(Mak 13:32-37; Luk 17:26-30,34-36)

36 “Ọ zá nye magwụ ọbochi mọbu ọtnu-ige wam, ele enine izi ke oligwe mámasị, Nnwọ wam mámasị. Okwolem Nda m kpọi bụ nye magwụ ọbochi wam.

37 Lele kpa ọ nụ n'ọbochi Noa, ọ bụ kpa ọ jọonu ige Nnwọ ke Badnụ jaava.

38 Hne ọ dụ ige mgba-mini ẹli wam, ele badnụ zị neeri, nọonwo, nọolu nnwerne, nọogbo nzi, dụ n'ọbochi Noa bnazneru nụ rime ọgbo.

39 Be máa, tem mgba-mini ẹli wam va vuru kpakara be zne. Ọ bụ kpa ọ jaazị nga Nnwọ ke Badnụ jaava.

40 Badnụ lawwuru jaazị n'ekwu, be gweru otu ghasa ibne a.

41 Ele rinya lawwuru jaazị neegwe wiri nụ hne be gwe wiri, be gweru otu ghasa ibne a.

42 “Kam kpayarụ, anụ neese nse, kwnornu nụ anụ máa ọbochi Nyenwe anụ jaava.

43 Kọvu anụ mahịa nụ ọ bụru nụ nye nwe ọro mahịaru ọtnu-ige nye buznu jaava, o znernu ose ọro a, o béekwele be liwa ọro a.

44 Kpam masị, anụ zịri nụ ojikneru, kwnornu nụ Nnwọ ke Badnụ jaava ige anụ tuge anya a.

*Ọhi ke kwesiri
ọ kwnata ovu*

(Luk 12:41-48)

45 “Nyele bụ ọhi wam ke nwernu akoniche be kwesiri

ọ kwnata mkpọma, nye nda a kwu mernu nye risi ele ọhi berere zị n'ọro a ma o neenye be wiri n'ige kwesiri?

46 Ọwa ọma zinu n'ọhi wam ke nda a kwu hiehnarnu whnụ nụ o neeme kpa nda a kwu karụ.

47 Me kanụ anụ ezi ọka, o jeeme a nye jeelekọta kpakara ẹkwnu a.

48 Kọvu ọ bụru nụ ọhi wam bụ ọhi ọjọ, ọ kanụ ẹhni a, ‘Nda m kwu joogbu ọkwnu,’

49 o bete naaligbu ele ọhi ibne a, snornu ele manya noogbu, neeri nọonwo manya.

50 Nda kwu ọhi wam jaava n'ige ọ tuge anya a, n'ọtnu-ige ọ máa.

51 O joogbubi a ichichi lawwuru, mee ya nụ ele ruwhnu lawwuru bna n'otu ọgbo, hne be jaazị naakwna ẹkwna, naata rụkwnurnu-ize.”

25

*Elulu nri
rụmu oknornokno*

1 “Ige wam be jeeji ẹlize Chiokike sninu nri rụmu oknornokno ele chiri tọnji be zne o kwnusi nye nọolu nnwerne ikne.

2 Isne n'esilawwuru be bụ ele iwhnirniwhno, isne bụ ele nwernu echiche.

3 Ele iwhnirniwhno gweru tọnji kọvu be jíle mọno.

4 Ele nwernu echiche gweru tọnji, gbarụ mọno n'olori gweru zne.

5 Nye nọolu nnwerne ikne váge ngwa, anyarna turu kpakara be, be zni anyarna.

6 “N'esilawuru abali, be siri lulo, 'Le nye n'olu nnwerne ikne, anu whuya, zne kwnusi a.'

7 “Kpakara rumu oknornokno wam lizo, tulizo tonji be.

8 Ele iwhnirniwhno kanu ele nwernu echiche, 'Anu nyebosi ai agwna mono anu, tonji ai neechni echni.'

9 “Rumu oknornokno wam nwernu echiche saru be, 'Oza, mono a nwernu joozunu ai nu anu, anu zne n'aka ele neere mono zuru mono ke anu.'

10 “Kpa be znernu o zu mono, nye n'olu nnwerne ikne varu, rumu oknornokno ele jiknernu snornu a bna n'iriri olu nnwerne. Be gbasni oro.

11 “Omekwo rumu oknornokno iwhnirniwhno wam varu, nooznu aka n'onu-mgbo, naakaa, 'Nyenwe ai, Nyenwe ai, gbamanu ai oro.'

12 “Kovu o saru be, 'Me kanu anu ezi oka, m maam ele anu bu.'

13 “Kam kpayaru, anu ziri nu nse, kwnornu nu anu ma obochi wam m'obu nga otnu-ige wam jobu.

*Elulu talenti**
(Luk 19:11-27)

14 “Berere kwno, be jeeji eli-eze Chiokike sninu otu nyerukna ke neezne izne, o sukwu ele ohi a, gweru ekwnu a nyewhete be n'aka.

15 O nyernu otu badnu talenti isne, nye berere talenti lawuru, nyee masi nye ke

berere otu talenti. O nyernu nye obula lele kpa rikne a hna. O lizo zne hne o znezne.

16 Nye ke o nyernu talenti isne znernu ngangam noozu ahia, o nwehia mbnarna talenti isne berere.

17 Nye ke nahiaru talenti lawuru zne mee masi kpa, o nwehiaru mbnarna talenti lawuru berere.

18 Kovu nye ke nahiaru otu talenti znernu gwu eli, lite iwai nyenwe a.

19 “Nga agida ige wemernu, nyenwe ele ohi wam varu ma ya nu be piakota nhne o nyernu be.

20 Nye wam ke nahiaru talenti isne gweru talenti isne berere va, kaa, 'Nyenwe m, i nyernu m talenti isne, kovu le, m nwehiaru m mbnarna talenti isne berere.'

21 “Nyenwe a kanu a, 'I mekwaru nkari, ohi oma, ke be kwesiri o kwnata m'kpoma, i kwesiri be kwnata i m'kpoma nu nhne ele nu ele, m jeeme i nye risi agida nhne. Vaa, snornu Nyenwe i n'ovu oso n'onu a.'

22 Nye ke nahiaru talenti lawuru varu masi, kaa, 'Nyenwe m, i nyernu m talenti lawuru, le m nwehiaru m mbnarna talenti lawuru berere.'

23 “Nyenwe a kanu a, 'I mekwaru nkari, ohi oma ke be kwesiri o kwnata m'kpoma, i kwesiri be kwnata i m'kpoma nu nhne ele nu ele, m jeeme i nye risi agida nhne. Vaa,

* 25:13 *Talenti*: N'ige mbom, ogwo ernu obochi bu otu mkpuru iwai. Otu talenti hna lele nri pokwu mkpuru iwai.

snornu Nyenwe i n'ovu ošo n'onu a.'

24 "Nye wam ke nahiaru otu talenti varu, kaa, 'Nyenwe m, m maam nye i bu, nu i bu badnu aka-nchni, i neegwe nhne n'ekwu hne i kpala mkpuru, i naachikota nhne hne i ghala mkpuru.

25 Kam kpayarū, ogwnu tūru m, m gweruru m talenti i lite n'eli, le, gwehnarnu ke bu ke i.'

26 "Nyenwe a saru a, 'Ohi ojo, nye ime-mgwu, i magwu nu m neegwe nhne n'ekwu hne me kpala mkpuru, naachikota nhne hne me ghala mkpuru?

27 O buru oma, i znernu eyisi iwai m n'aka ele gbanwo iwai, nga me varu m znernu m anahoru iwai m nu mbnarna.

28 " 'Anu nahia a talenti wam nyega a nye wam ke nwernu nri talenti.

29 Kwnornu nu nye obula ke nwernu nhne, be jeenye, o nwehnasiru, kovu nye ke nwée, be jaanahoru a, o bubedi ke o nwernu.

30 Anu tubna ohi ke bnáge nu nhne wam n'ederezi, o bna n'ochichiri hne be jaazi naakwna ekwna, naata rukwnurnu-ize.'

Rumu owu nu atnurnu

31 "Nga Nnwọ ke Badnu jaava n'igwugwu a, ya nu kpakara ele enine izi a, o jaadazi eli nu ngadna eze ke igwugwu.

32 Be jaachikota kpakara mba nu ruwhnu a, o jeekeme ele badnu n'esilawuru ibne be, lele kpa nye

nọoznu atnurnu neekewahala atnurnu n'esilawuru owu.

33 O jaabita atnurnu n'akarikwnunga a, bita owu n'akarita a.

34 "Eze wam jaakanu ele zi a n'akarikwnunga, 'Anu va, ele Nda m goziri, anu kehia eli-eze be bitannu anu hite nga Chiokike kpuru owa.

35 Kwnornu nu wiri gwnurnu m, anu nyernu m wiri, akpiri kporu m bekwnu, anu nyernu m mini, m bu m nye izne, anu kwubnarnu m oro anu.

36 M gbaru m eto, anu chita m ikpe, m riaru m nriria, anu leri nriria, m zi m n'oro ikelu anu varu lekwa m.'

37 "Ige wam ele oma wam jaakaa, 'Nyenwe ai, ndaa ige a whnurnu wiri n'ogwnu i, a nyega i wiri, mọbu ige akpiri n'okpo i bekwnu, a kwute i mini?

38 Ndaa ige a whnurnu nu i bu nye izne, a kwubnanya i n'oro ai, mọbu nu i gba eto, a chita i ikpe?

39 Ndaa ige a whnurnu nu i naaria nriria mọbu n'oro ikelu, a lekwa i?'

40 "Eze wam jaasa be, 'Me kanu anu ezi oka, kpakara nhne anu mennu nye ka kakwo mati n'esilawuru rumu nda m, anu mennu me.'

41 "Nga wam, o jaakanu ele ke zi a n'akarita, 'Anu whoga hne me zi, ele be vuru onu, bna nu bekwnu noonwu tim tom ke be bitannu Ekwensu nu ele enine izi a.

42 Kwnornu nu wiri gwnurnu m, anu nyége m

wiri, akp̄iri kp̄oru m b̄ekwnu, an̄u kw̄utege m mini.

⁴³ M bu m nye izne, an̄u kw̄ubnanyage m, m gbar̄u m ̄eto, an̄u ch̄itage m ikpe, m r̄iaru m nr̄iria, m z̄i m n'oro ikelu, an̄u lékwala m.'

⁴⁴ "Be jaasa a masi, 'Nyenwe ai, ndaa ige a whn̄urnu n̄u wiri n̄ogwnu i, m̄obu n̄u akp̄iri n̄okpo i b̄ekwnu, m̄obu n̄u i bu nye izne, m̄obu n̄u i gba ̄eto, m̄obu n̄u i naaria nr̄iria, m̄obu n̄u i z̄i n'oro ikelu, a lékwala i?'"

⁴⁵ "O jaasa be, 'Me kan̄u an̄u ezi oka, kwnornu n̄u an̄u ménnu a otu nye ke kakwo mat̄i n'esilawuru ele ka, an̄u ménnu m.'

⁴⁶ "Ige wam be jeezne ta awhn̄uwhnu ke kwó okwo, k̄ovu ele oma jaabna n̄u b̄udnu kwó okwo."

26

Be gbar̄u iznuznu

o gbu Jiz̄osi

(*Mak 14:1,2; Luk 22:1,2; J̄on 11:45-53*)

¹ Nga Jiz̄osi kwukworu kpakara oka ka, o kan̄u ele sno apna a,

² "An̄u magw̄u n̄u obochi lawuru wheme n̄u Iriri Oḡawhe jaazi, be jeegweru Nnw̄o ke Badn̄u nyee ma be kp̄ogidne a n'ogba."

³ Ige wam ele risi ar̄iohna n̄u ele okno badn̄u ke ele Ju gbak̄oru n'obiri nye risi ar̄iohna be nookwu Kayafasi.

⁴ Be gba iznuznu kpa be jeeji agh̄igho nw̄ugwu Jiz̄osi, gbu a.

⁵ K̄ovu be kar̄u, "O j̄obu n'Iriri ka, o z̄i a kpasu oḡna."

Be teru Jiz̄osi m̄ono n̄u B̄etani

(*Mak 14:3-9; J̄on 12:1-8*)

⁶ Nga Jiz̄osi z̄i n̄u B̄etani, n'oro Sāimoni nye r̄iaru nchn̄ichna,

⁷ otu nwerinya bnanyarn̄u nye vu m̄ono otute z̄i gburu okne onu ke nwernu ̄eknarna oma ke z̄i n'ite alabasita, o w̄usi m̄ono otute ka n̄u risi Jiz̄osi kpa o dazi ̄eli neeri wiri.

⁸ Nga ele sno apna a whn̄urnu a, o we be ̄ehni, be kaa, "K̄ini kpayar̄u be wuwuru m̄ono otute ka etekne?"

⁹ Be znernu o re m̄ono otute ka aḡida iwai, nyee ele mboni."

¹⁰ Kpa Jiz̄osi mah̄iaru nhne be nookwu, o kan̄u be, "K̄ini kpayar̄u an̄u neemekpa nwerinya ka ̄ehni? O rn̄urnu ̄ernu oma n'ehni m.

¹¹ An̄u n̄u ele mboni z̄i kpakara ige, k̄ovu n̄u me n̄u an̄u jáazi kpakara ige.

¹² O w̄usiri m̄ono otute ka n'ehni m, o mernu a ma o b̄ikwata m n'olili m.

¹³ Me kan̄u an̄u ezi oka, hne n̄u hne oḡbula be j̄ookpo okwo izi oma ka n̄u kpakara oḡa, be j̄ookwuh̄ia nhne nwerinya ka mernu, ma o b̄uru nhne o chenwanya a."

Judas̄i kweruru

o re Jiz̄osi

(*Mak 14:10,11; Luk 22:3-6*)

¹⁴ Ige wam otu badn̄u n'esilawuru ele sno apna a nri n̄u ̄ebo wam, be kwu Judas̄i

Isikarioti, znekwnusiri ele risi ariohna,

¹⁵ O sika be, “Kini bu nhne anu jeenye m, o buru me gweru a nyee n'aka anu?” Be kwu a nri siliva eto.

¹⁶ Hite n'ige wam, o bete o pio oghere o jeegweru Jizosi nyee be.

Jizosi nu ele sno apna a riri Iriri Ogawhe

(Mak 14:12-21; Luk 22:7-13; Jon 13:21-30)

¹⁷ N'obochi mbom ke Iriri Bredi Whuge Owhu, ele sno apna a vakwnusiri Jizosi, sika a, “Ndaa hne i piuru ma a mekwatanu i ma i ri Iriri Ogawhe?”

¹⁸ O kanu be, “Anu zne elihna ka, znekwnusi nye nu kpa, kanu a, ‘Nye-zni-nhne karu kpa, Ige m zi ndundu, me nu ele sno apna m jeeri Iriri Ogawhe n'oro i.’ ”

¹⁹ Ele sno apna a mee lele kpa Jizosi nyernu be iwu, be mekwata Iriri Ogawhe.

²⁰ N'ogbednachi, Jizosi nu ele sno apna a nri nu ebo wam daziri neeri wiri.

²¹ Kpa be neeri wiri, o kaa, “Me kanu anu ezi oka, otu badnu n'esilawuru anu jeere m.”

²² O gbu be igbugbu k'agida, kpakara be n'otu n'otu panizo naakanu a, “Nyenwe ai, o bu mawa sa?”

²³ Jizosi saru be, “Nye me nu a noosnukota aka n'otu agbugba wiri, nye wam jeere m.”

²⁴ Nnwọ ke Badnu jaala lele kpa be gbaru a n'okwukwo nsọ gbasiri a,

kwu nu awnhnuwhnu jaazinu nyerukna wam be jeehi n'aka a re Nnwọ ke Badnu. O buru oma o buru be muna nyerukna wam.”

²⁵ Ige wam Judasi, nye reru a, kaa, “Nye-zni-nhne, o bu mawa sa?”

Jizosi saru a, “Ji n'iwuhuru i karu kpa.”

Wiri Anyasnu Nyenwe ai
(Mak 14:22-26; Luk 22:14-20; 1 Kor 11:23-25)

²⁶ Kpa be neeri wiri, Jizosi gweru bređi, tunu Chiokike mmamma, nyawama a, nyee ele sno apna a, kaa, “Anu gweru, ri, ka bu anu-ehni m.”

²⁷ O gweru okiko, tu mmamma, nyee be, kaa, “Kpakara anu nwọ nu rime a.”

²⁸ Kwnornu nu ka bu ovnarna m ke ogba-njo-ehni ke be nowusi kwnornu agida badnu ma be gbarunu be mmehie be.

²⁹ Me kanu anu, hite kitna m jounwoma manya hi n'isisi vaini whuya rira rira tem du n'obochi me nu anu jounwo a ke ikne n'eli-eze nda m.”

³⁰ Nga be gwnukparu eri, be whoga zne nu Rugwu Olivu.

Jizosi karu nu Pita
jogonahoru a

(Mak 14:27-31; Luk 22:31-34; Jon 13:36-38)

³¹ Nga wam, Jizosi kanu be, “Kpakara anu jaagbakwo eso n'abalitna, kwnornu nu be gbaru a n'okwukwo nsọ, kaa, ‘M joogbu nye nooznu atnurnu, atnurnu a jaagbake-mekwo.’

32 Kọvu nga me hiri n'ẹnwu lizọ, m jeebe anụ ọsno zne Galili."

33 Pita saru a, "O bụbedi nụ kpakara badnụ gbanahọru i, m jáagba ẹso rịa rịa."

34 Jizọsi kanu a, "Me kanu i ezi oka, n'abalị ka, ige okne ọchichi yáakwnana ẹkwna, i jọgonahoru m mgba ẹto."

35 Pita kanu a, "O bụrubedi nụ ọ zị mkpa me sno i nwuma, m jọgonahoru i rịa rịa." O bu masi kpa kpakara ele sno apna a kwuru.

*Jizọsi kperu okpukpe
nụ Gẹsemani*

(Mak 14:32-42; Luk 22:39-46)

36 Jizọsi nụ be vaduru n'ẹkwu Gẹsemani, ọ kanu ele sno apna a, "Anụ daziri hna, me zne kpe okpukpe nụ piari."

37 O kwuru Pita nụ rumu rukna Zebidi lawuru yisinu ẹhni a, ọ panizo o gbu a igbugbu nụ o wute a nụ mkpoma.

38 O kanu be, "O noogbu m mkpoma m igbugbu k'agida du ẹnwu, anụ dazigidne hna, snornu m se nse."

39 O znetu nụ ruwhnu mati, dna, kpu ruwhnu a n'eli, kpe okpukpe, kaa, "Nda m, ọ bụru nụ o kwe omume, ma okiko awhnụwhnu ka whenahọru m, kọvu ọ bụo nhne me pioru, kọvu nhne i pioru."

40 O vakwnusi ele sno apna a, hne be neezni anyarna, ọ kanu Pita, "Kini, anụ nwée rikne snornu m se nse otu ọtnu-ige?"

41 Anụ se nse, neekpe okpukpe, ọ zị anụ dnabna n'ọrnurna. Enine ke badnụ zị bẹkwnu, kọvu nụ anọ-ẹhni zila rikne."

42 O gharu be zne kwno berere ke mgba lawuru, kpe okpukpe, kaa, "Nda m, ọ bụru nụ okiko awhnụwhnu ka jéewhenahọru m, okwolem ma m nwornu m a, be mee nhne i pioru."

43 Jizọsi hiehna berere, whnụ be neezni anyarna, kwnornu nụ anya be zị rinya.

44 O gharu be, zne kpe okpukpe ke mgba ẹto, nookwu kọriri otu oka wam.

45 Nga o hiehna hne ele sno apna a zị, ọ kanu be, "Anụ zị kọriri neezni anyarna, noozukwa inwe? Le, ọtnu-ige ke m zị ndundu. Be neegweru Nnwọ ke Badnụ resi n'aka ele mmehie.

46 Anụ lizọ, ma a zne. Anụ le, nye neegweru m nyee zị ndundu."

Be nwudnernu Jizọsi
(Mak 14:43-50; Luk 22:47-53; Jọn 18:3-13)

47 Kpa Jizọsi kpọ oka n'ọnu, le, Judasi, otu nụ rime nri nụ badnụ lawuru wam varu, ya nụ agida badnụ ji ama-ogwnu nụ okpiri. Be hi nụ hne ele risi ariohna nụ ele okno badnụ ele Ju va.

48 Judasi, nye wam reru a nyernu be nhne elekema, kaa, "Nye ọbula ke me joos-nutu ọnu, nye wam bu ya, anụ nwugwu a."

49 Ngangam, o zneknwusi Jizọsi, kaa, "Nye-zni-nhne, m bekwulem ji." O snutu a ọnu.

50 Jizōsi kanu a, “Enyi m, mee nhne i varu o mee.”

Be vakwnusi Jizōsi, be tukwasi a aka, nwugwusi a rikne.

51 Otu badnu nu rime ele sno apna Jizōsi dōsnimarnu aka, mniōhia ama-ogwnu a, gbu nye izi nye risi ariōhna, bihala a nsni.

52 Jizōsi kanu a, “Mniōhnasi ama-ogwnu i n’obo a, kwnornu nu kpakara ele gbu ama jaala n’ama.

53 O bu nu i máa nu m nwernu m rikne kanu Nda m, o ziyanu m nhne kakwo lijōni * nri nu ebo ele enine izi a?

54 Kōvu me mee kpm, nhne be gbaru n’okwukwo nsō nu o jeemeriri, ndaa kpa o jeemezu?”

55 Ige wam, Jizōsi kanu agida ele badnu wam varu o nwugwu a, “Anu varu chiru ama-ogwnu nu okpiri o nwudne m lele nu bu m nye neemegidne iwu eli. Kpakara obochi m daziri m n’Oro Nso Chiokike neezni nhne, anu nwudnene m.

56 Kpakara nhne ka mernu ma nhne ele owhnurninya gbaru n’okwukwo nsō mezu.” Ige wam kpakara ele sno apna a ghasaru a, gbawhu.

Jizōsi gwuzo nu ruwhnu ele eze-ikpe

(Mak 14:53-65; Luk 22:54,55,63-71; Jōn 18:13,14,19-24)

57 Ele nwudnernu Jizōsi duru a zne n’oro Kayafasi, nye risi ariōhna, hne ele

zni iwu nu ele okno badnu gbakogwu.

58 Pita snornu a, be zitagwo ndundu. O bna nu rime ederezi nye risi ariōhna, daziri eli n’esilawuru ele nse, ma o whnu risi nhne neeme.

59 Ele risi ariōhna nu kpakara ele eze-ikpe noopio ele akebbe aghalaghala gbagidne Jizōsi ma be gbu a.

60 O bu n’ezi nu agida ele akebbe aghalaghala whuyaru, kovu be nwée rikne piohia nhne.

N’ipne-aznu, badnu lawuru whuyaru,

61 be kaa, “Nyerukna ka karu nu o nwernu rikne kwadna Oro Nso Chiokike ka, wu a n’obochi eto.”

62 Nye risi ariōhna lizo sikwa Jizōsi, “O za nhne i naasa? Kini bu akebbe ka ele badnu ka naagbagidne i?”

63 Kovu nu Jizōsi kpusnirni onu. Nye risi ariōhna kanu a, “M ji m Chiokike ke zi budnu kwusi a rikne, ma i kanu ai, ji n’iwhuru i bu Karaisi, Nnwō Chiokike.”

64 Jizōsi saru a, “Owe! Ji n’iwhuru i karu. Kovu me kanu anu,

Hite kitna, anu jowhnu Nnwō ke Badnu

hne o dazi n’akarikwnunga Chiokike ke bu Dikne, naava masi n’erumeru oligwe.”

65 Nye risi ariōhna dowama iwo a, kaa, “O kwululem Chiokike, ndaa nhne a kwno noopio ele akebbe berere?”

* 26:53 *Lijōni*: bu pokwu ele ogwnu isunu.

Anụ nūrnu kpa o kwuluru Chiokike.

⁶⁶ Kìni bụ echiche anụ?”

Be saru, “O kwesiri o nwu ẹnwu.”

⁶⁷ Ige wam be bete nọogbu a onu mini, naapnia a nhne. Ele berere nọogbo a aka,

⁶⁸ be kaa, “Whnu nụ aị owhnurninya, Karaisi, nyele gbọru i aka?”

Pita Gọnahoru Jizosi

(Mak 14:66-72; Luk 22:56-62; Jón 18:15-18,25-27)

⁶⁹ Pita dazị n'ederezi, otu nnwọ oknornokno ele neezne izi vakwnusi a, kaa, “Ji nụ Jizosi nye Galili sno masi.”

⁷⁰ Kọvu Pita gọru nụ ruwhnu kpakara be, kaa, “M máam nhne i naakaa.”

⁷¹ Nga o whogaru n'onu-mgbo, nnwọ oknornokno berere whnu a, o kanu ele zị pị, “Nyerukna ka nụ Jizosi nye Nazarėti sno.”

⁷² Pita kwusi a rikne, gọ kwno berere, kaa, “M máam nyerukna ka.”

⁷³ Ige matị berere, ele gwuzo ndundu vakwnusiri Pita, kanu a, “N'ezi, jị n'iwuru i bụ otu badnu nụ rime be, kwnornu nụ ikwu-onu i neegwehia i iwne.”

⁷⁴ Ige wam o panizo nọogo ẹhni a ngugo, nọodu risi, kaa, “M máam nyerukna ka.” Ngangam, okne ọchichi kwnarnu ẹkwna.

⁷⁵ Pita chenwanya ikwu-onu Jizosi kwuru, kaa, “Ige okne ọchichi yáakwnana ẹkwna, i jogonahoru m mgba ẹto.” O

whoga ederezi kwna ẹkwna mkpuru ovu k'agida.

27

Be kwuznennu Paileti

Jizosi

(Mak 15:1; Luk 23:1,2; Jón 18:28-32)

¹ N'onu ọsisi, kpakara ele risi ariohna nụ ele okno badnu ele Ju gbaru iznuznu, kpebi o gbu Jizosi.

² Be kne a eriri, duru a zne, gweru a nyewhete n'aka Paileti nye neechi.

Enwu Judasi

(Ernu 1:18,19)

³ Nga Judasi nye reru a whnurnu nụ be kperu Jizosi ikpe ẹnwu, marnuhnini mernu a k'agida, o chihnalanu ele risi ariohna nụ ele okno badnu nri siliva ẹto wam,

⁴ kaa, “M mmehiele m nụ ogweru ọvnarna nye ikpe mana resi anụ.”

Be kanu a, “Ndaa ke gbasiri aị? Kị bụ mkpa i.”

⁵ Judasi tusa iwai wam nụ rime Ọro Nso Chiokike, whoga, kpogbu ẹhni a.

⁶ Ele risi ariohna gweru kpakara iwai wam, kaa, “O megidnernu iwu aị o yisi iwai ka nụ nhne be bita iwai n'Ọro Nso Chiokike, kwnornu nụ o bụ iwai ọvnarna.”

⁷ Be kpebi o gweru iwai wam zụ ẹli ele kpụ ite hne be jeeli ele izne.

⁸ Ka kpayaru be nookwu a Ẹli Ọvnarna dụ tna.

⁹ Nhne ka mernu ma nhne Jerimaya nye owhnurninya kwuru mezu, “Be gweru

nri siliva ẹto
 bu ọnu ahia
 ele Izireli whnurnu ọnu a,
 10 be gweru a zuya ẹli ele ọkpu
 ite,
 lele kpa Nyenwe ai ny-
 ernu m n'iwu."

*Jizosi gwuzo nu
 ruwhnu Paileti*

(Mak 15:2-5; Luk 23:3-5;
 Jon 18:33-38)

11 Kọvu nu Jizosi gwuzo nu
 ruwhnu nye nechi ẹchi, nye
 ọchichi wam sika a, "I bu Eze
 ele Ju?"

Jizosi saru a, "Owe! Ji
 n'iwuhuru i karu kpa."

12 Nga ele risi ariohna nu ele
 okno badnu noobno a nhne,
 o sala be nhne obula.

13 Paileti sika a, "I nuna
 kpakara nhne be noobno i?"

14 Kọvu nu Jizosi sala a oka
 obula, ke mernu o gbagwojiri
 nye ọchichi anya k'agida.

*Be marnu Jizosi
 ikpe enwu*

(Mak 15:6-15; Luk 23:13-
 25; Jon 18:39--19:16)

15 N'Iriri Ogawhe obula, nye
 nechi ẹchi neesigbasinu be otu
 nye ikelu be rioru a.

16 Be nwernu otu nye ojo ke
 ohna marnu zi n'oro ikelu be
 nookwu Barabasi.

17 Nga igbudu badnu wam
 gbakoru, Paileti sika be,
 "Ndaa nye anu pioru me
 sigbasinu anu, Barabasi* sobu
 Jizosi, nye be kwu Karaisi?"

18 Paileti kwuru ka
 kwnornu nu o magwu nu be
 kwuyannu a Jizosi kwnornu
 owho-anya.

19 Kpa Paileti daziri nu
 ngadna ikpe a, nnwerne a
 ziznenu a izi, kaa, "Aka zi nu
 nhne gbasiri nye mee mma
 wam, kwnornu nu m taru m
 agida awhnuwhnu nu mboro
 tna kwnornu a."

20 Kọvu nu ele risi ariohna
 nu ele okno badnu sigid-
 nernu igbudu ele badnu
 wam be rio a Barabasi, gbu
 Jizosi.

21 Paileti sika be, "Ndaa
 nye anu pioru me sigbasinu
 anu n'ehni badnu lawuru ka?"

Be kaa, "Barabasi."

22 O sika be, "Kini bu nhne
 anu pioru me mee Jizosi, nye
 be kwu Karaisi?"

Kpakara be siwama,
 "Kpogidne a n'ogba."

23 Paileti sika, "Kini
 mernu? Kini bu nhne ojo ke
 o mernu?"

Be siwama okokoba ke
 kakwo, kaa, "Kpogidne a
 n'ogba."

24 Nga Paileti whnurnu nu o
 nwee rikne mee nhne obula,
 kọvu agida ogbugbo dnarnu,
 o gweru mini kwọ aka a lawuru
 nu ruwhnu kpakara be, kaa,
 "Aka m zi richna n'ovnarna
 nwerukna ka, anu n'iwuhuru
 anu magwu nhne gbasiri a."

25 Kpakara be karu,
 "Ovnarna a zi nu risi ai, zi masi
 nu risi rumu ai."

26 Paileti sigbasinu be
 Barabasi. Nga o pniarnu Jizosi
 nhne, o gweru a nyewhete be
 ma be kpogidne a n'ogba.

*Ele ogwnu kpariri Jizosi
 (Mak 15:16-20; Jon 19:2,3)*

* 27:17 Barabasi: Agwna okwukwo kwuru Jizosi Barabasi

27 Ele ọgwunu nye ọchichi duru Jizọsi zne n'ọbna ele ọgwunu hne kpakara odobiri ele ọgwunu gbarụ a gburugburu.

28 Be tuma a iwo a, wosi a iwo ihie ihie.

29 Be kpa okpu igwnu, kpusi a nụ risi, nyee a mkpara n'akarikwnunga, gbunu a mpnerne ọchi nụ ruwhnu a, kparị a, be kaa, "A bekwulem ji, Eze ele Ju."

30 Be gbụ a ọnu-mini, gweru mkpara wam nẹli a nụ risi.

31 Nga be kparikworu a, be tuma a iwo wam, wosi a kpakara iwo a, duru a zne ma be kpogidne a n'ogba.

Be kpogidnenu

Jizọsi n'ogba

(Mak 15:21-32; Luk 23:26-43; Jọn 19:17-27)

32 Nga be whuyaru, be whnurnu otu nwerukna Sirini, rewhna a bu Saimoni, be sigidne a ma o vuru ọgba a sno be.

33 Nga be vaduru hne be kwu Gologota, ke bu "Hne Okpokoro Risi,"

34 be nyee Jizọsi manya be gwaru nhne lu nlulu. Kọvu nga Jizọsi raturu a riro, o kwéle ọ nwọ a.

35 Be kpogidne a n'ogba, ele ọgwunu ke iwo a n'esilawuru be nga be vukworu ọgbanchi. †

36 Be daziri eli neese a.

37 Be bitaru n'olu risi a nhne be bnornu a, "Ka bu Jizọsi, Eze ele Ju."

38 Be kpogidnenu ele buznu lawuru nụ Jizọsi n'olu ọgba, otu badnụ n'akarikwnunga a, nye ke berere n'akarita a.

39 Ele naagawhe naakaja a, neewhnuwhne risi,

40 be kaa, "Ji nye naakwnadna Oro Nso Chiokike, wu a n'ọbochi ẹto, znọhia ẹhni i. Ọ buru nụ i bu Nnwọ Chiokike, hi n'olu ọgba hiedna."

41 Ọ bu masi kpa ele risi ariohna nụ ele zni iwu nụ ele okno badnụ naakpari a.

42 Be kaa, "Ọ znọhiaru ele berere, kọvu o nwéee rikne znọhia ẹhni a, ọ bu eze Izireli, o hi n'olu ọgba hiedna kịtna, a jeekweru nụ a.

43 Ọ tųwasiri Chiokike mkpoma, ọ znọhia a kịtna, ọ buru nụ ọ masiri a, kwnornu nụ ọ karu, 'M bu m Nnwọ Chiokike.'"

44 Ọ bu masi kpa ele buznu wam be kpogidnenu be nụ Jizọsi n'olu ọgba zi masi naakpari a.

Enwu Jizọsi

(Mak 15:33-41; Luk 23:44-49; Jọn 19:28-30)

45 Hite n'esilawuru iwhnehnie,‡ ọchichiri gbasnirni kpakara eli wam du n'otnu-ige ke ẹto.§

46 N'otnu-ige ke ẹto, Jizọsi jiri okne nkọli siwama, kaa, "Eloi, Eloi, lama sabatani," ke bu, "Chiokike m, Chiokike m, kini mernu i ghasaru m?"

† 27:35 Agwna ọkwukwo kwuru: *Be mernu ka ma nhne be kwuru hite n'onu nye ọwhnurninya mezu. "Be keru iwo m n'esilawuru be, gweru iwo m vu ọgbanchi."* ‡ 27:45 *n'esilawuru iwhnehnie:* ọkwukwo ke mbom kwuru ige awa isunu § 27:45 *otnu-ige ke ẹto:* ọkwukwo ke mbom kwuru ige awa tolu

47 Agwna ele gwuzo ndundu nurnu a, be kaa, “O noosukwu Elaija.”

48 Ngangam, otu badnu gba eso gweru sponji gbajite a nu manya gbaru oka, tukwasi a n'olu isisi, nyee a ma o nwọ.

49 Ele berere kaa, “Gharu a, a lesi ma Elaija jaava o znohia a.”

50 Nga Jizosi jiri okne nkoli si okokoba berere, o nwe-bime inwe.

51 Ige wam ikpe obnosni ke Oro Nso Chiokike gbawaru ibekala lawuru hite n'olu du n'eli. Eli otne enye dnarnu, agida rugwu gbawaru.

52 Ilili kpumernu, agida ele nso hiri n'enwu lizo,

53 be whuya nu rime ilili. Nga Jizosi hiri n'enwu lizo, be bnazne nu rime eli-ohna nso, gesi agida ele badnu ehni be.

54 Nga nye neechi otu riwhu ele ogwnu nu ele ogwnu a zi neese Jizosi whnurnu eli otne enye nu kpakara nhnemernu, be tu ogwnu k'agida, be kaa, “N'ezi, nyerukna ka buru Nnwọ Chiokike.”

55 Agida ele rinya zi masi hne zi ikere neelekiri, ele hi nu Galili snornu Jizosi va, neeznenu a izi.

56 N'esilawuru be bu Meri Magidalini, nu Meri nne Jemisi nu Josefụ, nu nne rumu Zebidi.

58 znekwnusiri Paileti, rjo a iznu Jizosi. Paileti nyernu iwu be vute a iznu Jizosi.

59 Josefụ vuru iznu wam, whu a n'ikpe abochna marnu mma,

60 zne lite a nu rime ilili ikne ke aka a, ke o gwuwaru nu rime rugwu. O vuru otu rugwu hna ezi kpusni onumgbo ilili wam.

61 Meri Magidalini nu Meri kiyari zi ndundu, kete ruwhnu n'ilili wam.

62 N'ekile a, ke bu obochi ke sno obochi ojknernu, ele risi ariohna, nu ele Farisi gbakoru znekwnusi Paileti,

63 kaa, “Nda-ai-kwu, a chenwanyarnu nu nye nduwhu wam karu nga o zi budnu, ‘Nga obochi eto whemernu, m jeehi n'enwu lizo.’

64 Kam kpayaru, nyee iwu ma be mesni ilili wam rikne du obochi eto, ma ele sno apna a gharu o znurnu a n'abali, kanu ele badnu nu o hiri n'enwu lizo. Aghalaghala ke ipne-aznu jaakakwo ke mbom.”

65 Paileti kanu be, “Anu zne, gweru ele ogwnu, be se, anu mesni ilili wam rikne kpa anu nwernu rikne o mee a.”

66 Be zne, mesni ilili rikne, kasi ilili a akara n'olu akaworugwu, bita masi ele nse.

28

Be liri Jizosi
(Mak 15:42-47; Luk 23:50-56; Jon 19:38-42)

57 Nga ogbednachi, otu nye eze be kwu Josefụ, nye Ari-matiya, nye sno apna Jizosi,

Jizosi lizoru n'enwu
(Mak 16:1-10; Luk 24:1-12; Jon 20:1-10)

1 Nga Obochi Ozukwa Inwe whemernu, nga chi noobo n'obochi mbom n'ikwezu,

Meri Magidalini, nū Meri kiyari varu lekasi ilili.

² Ngangam, eli tneru enye, enine izi Nyenwe aji hiri n'oligwe hiedna, vume akaworugwu wam, daziri eli n'olu a.

³ Ruwhnu a nū lele amuma, iwo a naachna lele mkpuru-mini.

⁴ Ogwnu tūru ele nse wam, be ma ririri dna n'eli lele ele nwurru onwu.

⁵ Enine izi wam kanu ele rinya wam, "Ogwnu tu anu, m maam nu anu noopio Jizosi, nye be kpogidneru n'ogba.

⁶ O zila hna, kwnornu nu o hilem n'enwu lizo, lele kpa o kwuru. Anu va whnu hne be liru a.

⁷ Anu zne wara wara kanu ele sno apna a, nu o hilem n'enwu lizo, o belem anu osno neezne Galili, anu jowhnu a pji. Le, m bele m osno kanu anu."

⁸ Be gweru eso, gweru izne hi n'ilili wam gbawhu, be notu ogwnu, mkpoma noso masi be n'onu k'agida. Be zne kanu ele sno apna a.

⁹ Jizosi kwnusiri be kpa be neezne n'apna, o kanu be, "M bekwulem anu." Be bna a n'ochi lawuru, kponu a risi eli.

¹⁰ Jizosi kanu be, "Ogwnu tuko anu, anu zne kanu rumu nda m, be zne Galili, o hne be jowhnu m."

Otnutnu ele nse

¹¹ Kpa ele rinya wam naala, agwna ele ogwnu wam neese ilili zneru n'eli-ohna kanu ele risi arjohna kpakara nhne mernu.

¹² Ele risi arjohna nu ele okno badnu gba iznuznu, be kwu be agida iwai.

¹³ Be kaa, "Anu kaa, 'Ele sno apna a varu n'abali nga a neezni anyarna znurnu iznu a.'

¹⁴ O buru nu nye neechi echi nu a, a jeeme o kweru nu ikpe mana anu, anu jaaabna nu mmekpehni."

¹⁵ Ele ogwnu wam gweru iwai wam mee nhne ele risi arjohna nu ele okno badnu karu be mee. Be wheke otnutnu ka kpakara n'esilawuru ele Ju du tna.

Jizosi mernu ele sno apna a whnu a anya

(Mak 16:14-18; Luk 24:36-49; Jon 20:19-23; Eru 1:6-8)

¹⁶ Ele sno apna a nri nu otu wam zne nu Galili n'olu rugwu lele kpa Jizosi kanu be.

¹⁷ Nga be whurru a, be kponu a risi eli, kovu agwna be nwernu mkpoma lawuru.

¹⁸ Jizosi vakwnusi be, kaa, "Be nyernu m kpakara rikne ke zi n'oligwe ma n'owa.

¹⁹ Anu zne nu kpakara owa mee ele badnu be buru ele sno apna m, nowu be mini nu rehna ke Nda, nu ke Nnwu nu ke Enine Nso.

²⁰ Anu zni be bita kpakara nhne me nyernu anu n'iwu. N'ezi, me nu anu zi kpakara ige du okwnukokwnu."

**Izi ọma lele kpa
Makı
gbaru a n'okwukwo
Nhne gbasiri
okwukwo ka**

Izi ọma lele kpa Makı gbaru a n'okwukwo jiri mkpuru oka ka panizo, “Opanizo izi ọma Jizosi Karaısi, Nnwọ Chiokike.” Makı gesiri nı Jizosi bu badnu ke noornu ọnu ndu-ehni nı nye nwernu rikne. Iknerinema a whuyaru iwhne nı nhne o znirni, nı rikne megidne renwu ojo, nı rikne o gbarunu ele badnu mmehie. Jizosi kwuru ehni a Nnwọ ke Badnu, nye varu o gweru budnu a nyee ma o dọhia ele badnu hite nı mmehie be.

Makı gbaru nhne Jizosi mernu karu ikwu-ọnu o kwuru nı nhne o znirni. O gbaru nhne matı gbasiri Joni Nye Wı Mini, ọwuwu mini a, nı ọrnurna Jizosi. O znernu nı ruwhnu kwu nhne gbasiri ele sno apna Jizosi nı ele irno a. N'ipne-aznu okwukwo a, o kwuru gbasiri ẹnwu Jizosi nı olizo n'ẹnwu a.

Nhne zi n'okwukwo ka

Opanizo izi ọma (1:1-13)

Enu Jizosi nı rime Galili (1:14--9:50)

Jizosi znirni nhne rnu ẹnwu ndu-ehni nı Judiya (10:1-52)

Hite nı Galili du Jeruselem (11:1--15:47)

Olizo n'ẹnwu Jizosi (16:1-8)

Jizosi gesiri ehni a, mekwu lahna oligwe (16:9-20)

*Nye gbaru okwukwo ka:
Makı*

Risi nhne o kwno gba a: O gesi nı Jizosi bu Nnwọ Chiokike, hite nı ẹnwu ndu-ehni a.

Ikwu-ọnu Joni

Nye Wı Mini

(Mat 3:1-12; Luk 3:1-18; Jon 1:19-28)

1 Opanizo izi ọma Jizosi Karaısi, Nnwọ Chiokike.

2 Lele kpa Azaya nye ọwhnurninya gbaru a n'okwukwo, Chiokike karu, “Bno nsni, le, m neezizne nye izi m nı ruwhnu i, nye jeemekwata apna i.

3 Akpıri otu badnu nookpo okwo n'eli-ikpa, naakaa, ‘Anu mekwata apna Nyenwe ai, anu mee ma apna a snirni asni.’”

4 Joni Nye Wı Mini bu nye wam whuyaru iwhne n'eli-ikpa nookpo okwo naakaa ele badnu tuhna m mkpoma ma be wı be mini, ma Chiokike gbarunu be mmehie.

5 Kpakara ele zi nı mgbu Judiya nı eli Jeruselem whokwnusiri a. O wı be mini n'Osimini Jodani, be nookwuhia mmehie be.

6 Joni wogwu iwo rijni akpukpo anohia be kwu kameli. Ajni o snu n'ikwnu bu akpukpo anohia. Wiri a bu igwurube nı mono ebeka ohia.

7 O nookpo okwo naakaa, “Nye kakwo m rikne wawa n'aznu m, nye me kwesile

o whudnahie ẹli tọma eriri okoro-ọchi a lawuru.

⁸ M ji m mini wu anu mini, kovu nu nye wam jeeji Enine Nso nonowu anu mini.”

Owuwu mini Jizosi nu ornurna a

(Mat 3:13---4:11; Luk 3:21,22; 4:1-13)

⁹ N'ige wam, Jizosi hiri nu Nazareti ke zi n'eli Galili va, Joni wu a mini nu rime Osimini Jodani.

¹⁰ Ngangam Jizosi hiri nu mini nonowhuya, o whnurnu oligwe hne o kpumernu, o whnu Enine Nso hne o neehkwasi a lele nduru.

¹¹ Otu akpiri hiri n'oligwe kaa, “Ji bu Nnwọ m me whnurnu n'anya, nhne i masiri m.”

¹² Ngangam Enine Nso wam duru a bna ẹli-ikpa.

¹³ O zi n'eli-ikpa nri obochi eno. Ekwensu naarna a ornurna, ya nu rumu anohia zi. Kovu nu ele enine izi neeznenu a izi.

Jizosi sukwuru ele noogbu aznu

(Mat 4:12-22; Luk 4:14,15; 5:1-11)

¹⁴ Nga be yisiri Joni n'ikelu, Jizosi znernu Galili neezni izi oma Chiokike gweyaru.

¹⁵ O naakaa, “Ige zulem, ẹlize Chiokike zi ndundu, anu tuhnasna mkpoma kweru izi oma.”

¹⁶ Nga o znernu nu ngeri Osimini Galili, o whnu Sajmoni nu Anduru nwene a rukna hne be zi nonowu igbo nu rime osimini, kwnornu nu be bu ele noogbu aznu.

¹⁷ Jizosi kanu be, “Anu va sno m n'aznu, m jeeme anu buru ele jookwnuhia ele badnu lele kpa anu noogbu aznu.”

¹⁸ Ngangam be sigbasi igbo be, sno a.

¹⁹ O zne nu ruwhnu mati, o whnu Jemisi nnwo Zebidi nu Joni nwene a rukna zi n'ogbo berere, neemekwata igbo be.

²⁰ O sukwu be, ngangam be gharu Zebidi nda be n'ogbo, ya nu ele be gnornu ernu, snornu a.

Jizosi chihalaru renwu ojo

(Luk 4:31-37)

²¹ Be nu Jizosi zne n'eli-ohna Kapanom bna n'oro ogbako ele Ju n'Obochi Ozukwa Inwe neezni nhne.

²² Nhne o neezni duru be ehni, kwnornu nu o znirni nhne lele nye nwernu rikne, o buo lele ele zni iwu ele Ju.

²³ Otu nwerukna renwu ojo nwugwu bnanyarnu nu rime oro ogbako be, siwama,

²⁴ “Kini bu nhne ai nu ji nwekogwu, Jizosi nye Nazareti? I varu ma i gbumekwo ai? M maam nye i bu, i bu nye nso ke Chiokike.”

²⁵ Jizosi bigboru a, kaa, “Kpusnime onu i, hi nu rime a whuya.”

²⁶ Renwu ojo wam dosiri a rikne. O gweru okne nkoli si okokoba, hi nu rime a whuya.

²⁷ O duru kpakara be ehni ke mernu be bete neesikwarita ehni be, “Ka bu kini? O bu o zni nhne ikne sa? O nwernu rikne ke o ji notunu renwu ojo oka, be bnotenu a nsni.”

28 Be tñusi ọtnutnu a nu kpakara ẹli Galili.

*Jizosi gworu ele nriria
(Mat 8:14-17; Luk 4:38-41)*

29 Nga Jizosi hiri n'oro ọgbako ele Ju wam whuya, ya nu Jemisi nu Joni, be bna n'oro Saımoni nu Anduru.

30 Ige wam nne nnwerne Saımoni dnanyi naaria ẹhni orne ẹkwunu, ngangam be kanu Jizosi nhne gbasiri nwerinya wam.

31 O znekwnusi a, jiri a n'aka, dolizo a olu. Ngangam ẹhni orne ẹkwunu wam sigbasi a, o bete neeznenu be izi.

32 N'ogbednachi, nga ẹhnam dnarnu, be kwuyanu Jizosi kpakara ele nriria, nu ele renwu ojo nwugwu.

33 Kpakara ele zi n'ẹli wam gbakoru n'onu-mgbo neelekiri.

34 O gworu agida ele nriria zi odo n'odo, o chimarnu agida renwu ojo. O kwẹle renwu ojo kwu oka, kwnornu nu be magwu nye o bu.

*Jizosi znirni izi oma
nu Galili
(Luk 4:42-44)*

35 N'onu ọsisi, nga chi yobochnage, o lizo zne hne koru owu, neekpe okpukpe.

36 Saımoni nu ele ya nu be zi noopio a.

37 Nga be piohıaru a, be kanu a, "Kpakara ele badnu noopio i."

38 Kọvu Jizosi kanu be, "A jeezne n'ẹli ele ke berere ma m zni m be izi oma, kwnornu ka bu nhne me kwnornu va."

39 O zne nu rime kpakara oro ọgbako ele Ju zi nu kpakara Galili neezni izi oma, chihala masi renwu ojo.

*Jizosi gworu nye nchnichna
(Mat 8:1-4; Luk 5:12-16)*

40 Otu nye naaria nchnichna vakwnusiri a, riasno a, gbunu a mpnerne ọchi, kaa, "O buru nu i pioru, i nwernu rikne mee m ziri richna."

41 Jizosi donu a obirizi, dosnima aka a, kpatu a, kaa, "M pioru m, ziri richna."

42 Ngangam be gworu a nchnichna wam, o ziri richna.

43 Jizosi doru a aka nu nsni k'agida chihala a.

44 O kanu a, "O za nye obula i kanu, kovu la, gweru ẹhni i gesi nye okwa ariohna, gweru masi nhne Mozizi nyernu n'iwu kwa ariohna ma o buru nhne akebbe nyee be nu i zi richna."

45 Kovu o whogaru bete notnunu ele badnu, neewheke oka wam, ke kpahıaru nu Jizosi nwema rikne berere o bna nu rime ẹli-ohna hne ele badnu joowhnu a, kovu o znernu hne koru owu, ele badnu neehi penupe obula naavakwnusi a.

2

*Jizosi gworu nye ẹhni a
donwurnu odonwu
(Mat 9:1-8; Luk 5:17-26)*

1 Nga Jizosi lahnarnu n'ẹli Kapanom, kpa obochi ele nu ele whemernu, agida ele badnu nuru nu o zi n'oro.

2 Agida ele badnu varu jipiya kpa o zima oghere zi, ma n'onu-mgbo. O zi

masi nookwunu be ikwu-ọnu Chiokike.

³ Be vakwnusi a, vuyanu a otu nye ngeri ẹhni a ọ̀nworu ọ̀donwu, badnu ẹno vu a.

⁴ Nga be nwée rikne du a ẹhni kwnornu nu agida ele badnu wam, be koma olu ọro hne o zi. Nga be ọ̀kamarnu a, be vudna ọ̀kpata ke nye ngeri ẹhni a wam ọ̀nworu ọ̀donwu danyi.

⁵ Nga Jizosi whuru ọ̀kwnata ovu be, o kanu nye wam ngeri ẹhni a wuru ọ̀nwu, “Nnwọ m, be gbarunam ji kpakara mmehie i.”

⁶ Kọvu nu agwna ele zni iwu ele Ju dazi ẹli pi, zi nẹsikwa nu mkpoma be,

⁷ “Kini mernu nwerukna ka jiri kwu oka kpa? O kwululem Chiokike. Ndaa nye nwernu rikne o gbarunam mmehie hne o buo Chiokike kpo?”

⁸ Ngangam, Jizosi mahiaru nu rime enine a nu be zi naari oka wam nu rime mkpoma be, o sika be, “Kini kpahiaru anu naari oriri ka nu mkpoma anu?”

⁹ Ndaa ke zi ewheke, o kanu nye ngeri ẹhni a ọ̀nworu ọ̀donwu, ‘Be gbarunam ji kpakara mmehie i,’ mọbu o kaa, ‘Lizo, chiri etere i, zne izne.’

¹⁰ M pioru m anu mahia nu Nnwọ ke Badnu nwernu rikne n’owa o gbarunam mmehie.” Jizosi kanu nye wam ngeri ẹhni a ọ̀nworu ọ̀donwu,

¹¹ “M ka m ji, lizo, chiri etere i, la ọro i.”

¹² Ngangam, o lizo, chiri etere a, whoga nu ruwhnu

kpakara be, o du kpakara be ẹhni, be znarni Chiokike, naakaa, “A whunlele nhne nu kpa.”

Jizosi sukuru Liva
(Mat 9:9-13; Luk 5:27-32)

¹³ Jizosi whoga kwno berere nu ngeri Osimini Galili, agida ele badnu vakwnusiri a. O bete neezni be nhne.

¹⁴ Nga o neewhe, o whnu Liva nwo Alifayosi, hne o dazi n’oro nt. O kanu a, “Sno m.” O lizo snornu a.

¹⁵ O du nga Jizosi dazi neeri wiri n’oro Liva, agida ele ona nt nu ele mmehie snornu Jizosi nu ele sno apna a neeri wiri. Ige wam, ele sno a zi agida.

¹⁶ Nga ele zni iwu ele Ju ele bu ele Farisi whuru nu ele mmehie nu ele ona nt sno a neeri wiri, be sika ele sno apna a, “Kini mernu o noosno ele ona nt nu ele mmehie neeri wiri?”

¹⁷ Nga Jizosi wuru a, o kanu be, “Mkpa diba ziko naakpa ele ẹhni buru oma, okwolem ele nriria. M vage m o sukwu ele oma, okwolem ele mmehie.”

Ajji gbasiri ovu onu
(Mat 9:14-17; Luk 5:33-39)

¹⁸ O du nga ele sno Joni nu ele Farisi noovu onu, agwna ele badnu vakwnusi Jizosi sika a, “Kini mernu ele sno Joni nu ele sno ele Farisi noovu onu, kọvu ele sno apna i za noovu onu.”

¹⁹ Jizosi saru be, “Ele varu hne be nolu nnwerne ikne be joovu onu hne nyerukna wam nolu nnwerne ikne nu

be zı? Kpakara ige ke be nı nye nọolu nnwerne ikne zı, be jóovu ọnu.

20 Kọvu ọbochi vawa nga be jaanahọru be nye nọolu nnwerne ikne. Ọbochi wam be joovu ọnu.

21 “Ọ zá nye jeegweru mkpekele ikpe ikne dnųsni n’iwo ọknani. O mene kpm, iwo ke ikne jọodokahala nhne n’ẹhni ke ọknani. Ọ jọodoka ke kakwo agıda.

22 Ọ zı ması nye jeegweru manya ikne gbası n’olori akpųkpo ọknani. O mene kpm, manya wam jaag-bawama, manya nı olori akpųkpo whume etekne. Kọvu be gbası manya ikne n’olori akpųkpo ikne.”

Ajiji gbasiri

Ọbochi Ozukwa Inwe

(Mat 12:1-8; Luk 6:1-5)

23 Ọ dų n’otu Ọbochi Ozukwa Inwe, Jizọsi nı ele sno apna a naagawhe n’esilawuru ẹkwu ikpa. Ele sno apna a bete ọ ghọ ikpa kpa be znezne.

24 Ele Farisi kanų a, “Le, kını mernu be neeme nhne kwésile o mee n’Ọbochi Ozukwa Inwe?”

25 Jizọsi sarų be, “Anų gwnųna nhne Devidi mernu nga ọ zı nı mmekpẹhni, nga wiri gwnųrnu a, ya nı ele snogwu a?”

26 O bnaznenu n’oro nsọ Chiokike, nga Abıata bı nye risi arıohna, o ri brẹdi be bıtaru nı ruwhnu Chiokike ke kwésile n’iwu o ri, okwolem

ele ọkwa arıohna bı ele kwe-siri n’iwu o ri a, o nyee ması ele nı ya snogwu.”

27 Ọ kanų be, “Chiokike mernu Ọbochi Ozukwa Inwe kwnornu badnų, be méne badnų kwnornu Ọbochi Ozukwa Inwe.

28 Ọ nhne kpahıaru Nnwo ke Badnų jiri bųru ması Nyenwe Ọbochi Ozukwa Inwe.”

3

Nyerukna aka

dọnwurnu ọdonwu

(Mat 12:9-14; Luk 6:6-11)

1 Jizọsi bna kwno berere n’oro ọgbako ele Ju, otu nwerukna aka dọnwurnu ọdonwu zı pıi.

2 Ele Farisi zı neese a, ma ọ jọogwo a n’Ọbochi Ozukwa Inwe, ma be bno a nhne.

3 Ọ kanų nyerukna wam aka a dọnwurnu ọdonwu, “Lizọ, gwuzoru nı ruwhnu kpakara ele badnų.”

4 Ọ sıkwa be, “Ọ bųru ọma n’iwu o mee nhne ọma, mọbu o mee nhne búo ọma n’Ọbochi Ozukwa Inwe? Ọ znọhia bųdnu mọbu o gbu ogbu?”

Kọvu be nyasimernu bidim.

5 Nga o lekparų anya ngaramanga o we ẹhni, o nwe ovu ojo kwnornu nı mkpọma ojo be. Ọ kanų nyerukna wam, “Dọsnima aka i.” Ọ dọsnima aka a, aka a bųru ọma lele kpa ọ zı nı mbọm.

6 Ele Farisi whọga, ngangam be nı ele dagwunu Erọdu zne gbagidne a iznuznu, kpa be joogbu a.

*Agida ele badnu
snornu Jizosi*

⁷ Jizosi nu ele sno apna a whogaru zne ngeri Osimini Galili. Agida ele badnu hi n'eli Galili snornu a, ma ele hi nu Judiya,

⁸ ma ele hi n'eli Jeruselem, nu eli Idumiya, ma n'obosi ehnam ke Osimini Jodani nu gburugburu Taya nu Saïdoni, vakwnusiri Jizosi nga be nurnu kpakara nhne o mernu.

⁹ O kanu ele sno apna a be mee kpa otu ogo matı jaaziri a ndundu kwnornu agida ele badnu wam, o zi be kpagbu a.

¹⁰ Ige wam, Jizosi gworu agida ele nriria, ke kphajaru agida ele nriria ojo zi odo n'odo n'okpu n'ehni a ma be kpatu a aka.

¹¹ Nga obula ele renwu ojo whnuru a, be dna n'eli nu ruwhnu a, siwama, kaa, "Jiwa bu Nnwọ Chiokike."

¹² Jizosi do be aka nu nsni be meko ele badnu mahia nye o bu.

*Jizosi horuru nri nu
badnu lawuru ele izi*

(Mat 10:1-4; Luk 6:12-16)

¹³ Jizosi pnezne n'olu rugwu, sukwu ele o pioru. Be zneknwusi a.

¹⁴ O horu ele rukna nri nu ebo ma ya nu be daziri, kwu be ele izi, ma o zihala be zne kpo okwo izi oma,

¹⁵ o nyernu be rikne o chihala renwu ojo.

¹⁶ Ka bu nri nu badnu lawuru wam o horuru, Saïmoni, nye Jizosi jiri rewhna Pita,

¹⁷ nu Jemisi nnwo Zebidi, nu Joni nwene Jemisi, o ji kwno be rewhna Banajisi, ke bu rumu egbe oligwe,

¹⁸ nu Anduru, nu Filipu, nu Batolomi, nu Matiyu, nu Tomosi, nu Jemisi nnwo Alifayosi, nu Tadiyosi nu Saïmoni nye zi n'esilawuru ele noonwu bekwu nu mkpoma,

¹⁹ nu Judasi Isikarioti, nye reru a.

Jizosi nu Belizibolu

(Mat 12:22-32; Luk 11:14-23; 12:10)

²⁰ Jizosi bna n'otu oro, agida ele badnu jipiya kwno berere, ke kpayaru o nwée oghere ri wiri.

²¹ Nga rumu nne a nurnu a, be whoga ma be nwugwu a, kwnornu nu be karu, "Mkpoma a zule ozu."

²² Agwna ele zni iwu ele Ju hiri nu Jeruselem va, kaa, "O nwernu Belizibolu, o ji rikne nye risi renwu ojo naachihala renwu ojo."

²³ Jizosi sukwukota be, tnunu be elulu zi odo n'odo, "Setani o jaachihalali Setani?"

²⁴ O buru nu eli-eze kewama megidne ehni a, eli-eze wam joo gwuzoli.

²⁵ O buru masi nu ezi-nu-oro kewama megidne ehni a, ezi-nu-oro wam joo gwuzoli.

²⁶ O buru masi nu Setani lizoru megidne ehni a, kewama, o joo gwuzoli, enwu a valen.

²⁷ "O za nye jaabnali n'oro nye dikne, naahoru a kpakara nhne a, o buru nu o bele osno kne dikne wam eriri. Ige

wam o jeenwe rikne naahoru a nhne zi n'oro a.

²⁸ “Owe! M naakanu anu ezi oka, Chiokike jaagbaru ru mu badnu kpakara aruru-eli be ruru nu oka ojo be nookwu,

²⁹ Kovu nye obula ke kwuru kwugidne Enine Nso jeenwe ogbaru tim tom. Kwnornu nu nye wam rulam aruru-eli nwée ogbaru okwnukokwnu.”

³⁰ Jizosi kwuru ka kwnornu nu be naakaa nu o nwernu renwu ojo.

Nne Jizosi nu ru mu nne a
(Mat 12:46-50; Luk 8:19-21)

³¹ Nne Jizosi nu ru mu nne a varu, be gwuzoru n'ederezi, ziznenu a izi, noosukwu a.

³² Agida ele badnu wam zi a gburugburu kanu a, “Le, nne i nu ru mu nne i zi n'ederezi noopio i.”

³³ Jizosi sikwaru be, “Nyele bu nne m nu ru mu nne m?”

³⁴ O lehnata anya ele dazi a gburugburu, kanu be, “Anu le nne m nu ru mu nne m.

³⁵ Nye obula ke neeme nhne Chiokike noopio, nye wam bu nwene m rukna nu nwene m rinya nu nne m.”

4

Elulu nye ogha mkpuru
(Mat 13:1-9; Luk 8:4-6)

¹ Jizosi panizo neezni kwno nhne nu ngeri osimini. Agida ele badnu jiharu hne o zi, ke kpayaru o bnazne n'ogbo, daziri eli. Kpakara igbudu badnu wam gwuzoru nu mkpomkpo eli.

² O ji elulu neezni be agida nhne zi odo n'odo. Nu nhne o neezni, o kaa,

³ “Anu bnote nsni, otu nye ernu ekwu znernu agha mkpuru.

⁴ O du nga o naagha mkpuru, agwna mkpuru dnarnu nu ngeri apna. Ru mu onunu tuturu be ta.

⁵ Agwna mkpuru dnarnu n'eli rugwu hne be nwée agida rizona, ngangam mkpuru wam fuharu, kwnornu nu be nwée agida rizona.

⁶ Kovu nga ehnam wasiri, be chnanwu, kwnornu nu be nwée egwnugwnu.

⁷ Agwna mkpuru berere dnarnu n'esilawuru igwnu, igwnu wam sohia, kpagbu a, o minyage mkpuru.

⁸ Agwna mkpuru berere dnarnu n'eli buru oma, fuhia, nooso, naaba, mihia nri mkpuru eto, berere nri isunu, berere otu riwhu.”

⁹ O kanu be, “Nye nwernu nsni o ji o nu nhne, o nuru.”

Nhne o kwno tnu elulu
(Mat 13:10-17; Luk 8:9,10)

¹⁰ Nga Jizosi nu ele sno apna a nri nu badnu lawuru wam zi, nu agwna ele berere, be sikwaru a nhne gbasiri agida elulu.

¹¹ O kanu be, “Be mernu anu mahia nhne tugwaru otugwa ke eli-eze Chiokike, kovu ele zi n'ederezi, be naakanu be kpakara nhne n'elulu,

¹² ma
‘Be neele anya kpoi, gharu o whnu,

nõonu nù nsni, gharu ọ
ghõhia,
ọ zị be tũnasna mkpõma hne
Chiokike zị,
nwehĩa ọgbaru.' ”

*Risi elulu nye
ọgha mkpuru wam*

(*Mat 13:18-23; Luk 8:11-15*)

13 Jizõsi sịkwa be, “Anụ ghõhiage elulu ka? Ndaa kpa anụ jeeji ghõhia kpakara elulu?”

14 Nye ẹrnu ẹkwu naagha mkpuru ghasiri ikwu-õnu Chiokike.

15 Mkpuru ele ke dnarnu nu ngeri apna nu lele ele ke nuru ikwu-õnu wam, kovu nga be nuru a, ngangam Ẹkwensu varu gweme oka wam nu mkpoma.

16 Mkpuru ke be ghasiri nu hne rugwu zị nu lele ele ke nuru ikwu-õnu wam, ngangam be gweru snarnima gweru a.

17 Kovu nu be nwée ẹgnugwnu, be dazi ige mati, omekwo, nga mmekpehni mọbu awhnuwhnu varu kwnornu nu ikwu-õnu wam, ngangam be dnahnala aznu.

18 Mkpuru ke be ghasiri n'esilawuru igwnu nu lele ele ke nuru ikwu-õnu wam,

19 kovu mmekpehni ke ọwa ka, nu aghigho ọ whnu ẹkwu n'anya, nu nkoli ke nhne berere, bnanyarnu, kpagbu ikwu-õnu wam. Ọ ghõ nhne mina mkpuru.

20 Mkpuru ke be ghasiri n'eli buru oma nu lele ele ke nuru ikwu-õnu wam, be narnu a, ọ

mipiya nri mkpuru ẹto, berere nri isunu, berere otu riwhu.”

*Elulu tonji n'olu ikpechi
(Luk 8:16-18)*

21 Jizõsi kanu be, “Anụ neegweya tonji bita a nu mkpururu nkita, mọbu nu mkpururu okpata? Ọ buo n'olu nhne be bita tonji?”

22 Kwnornu nu ọ za nhne be bigwaru abigwa, ke be jeeme ọ whuya iwhne, be jookpume kpakara nhne be kpusnirni okpusni.

23 Ọ buru nu nye nwernu nsni o ji ọ nu nhne, ọ nuru.”

24 Ọ kanu be, “Anụ bnote nsni nkari nkari nhne anụ nõonu. Nhne anụ jiri tunu nye berere bu nhne be jeeji tunu anụ, be jeenye anụ karukwo.

25 Nye nwernu nhne bu nye be jeenye, nye nwée, be jaanahoru a, ọ bubedi ke o nwernu.”

Elulu mkpuru nooso oso

26 Jizõsi kaa, “Eli-eze Chiokike nu lele nga badnu kpasiri mkpuru n'eli.

27 O zni anyarna n'abali tnenya n'iwhnehnie, mkpuru wam fuhia, nooso, nye wam maa kpa o ji neeme kpa.

28 Eli nu nsunu a neeme isisi nooso, naamihia mkpuru, ke mbom, o fuhia, omekwo igwugwere, omekwo ikpa karu aka ke hi n'igwugwere.

29 Kovu nga ikpa wam karu, ngangam, o gweru ama bete o gbu ikpa kwnornu n'ige o gwe nhne n'ekwu dulam.”

Mkpuru mositadi

(*Mat 13:31,32,34; Luk 13:18,19*)

³⁰ Jizọsi kaa, “A jeeji kını gbu esni ẹli-eze Chiokike? Mọbu ndaa kpa a jeeji ọọtnu elulu a?”

³¹ Ọ nọ lele mkpuru isisi be kwu mọsitadi, ke, nga be kpasiri a n'ẹli, ọ bu mkpuru isisi zị matị kakwo kpakara mkpuru n'ọwa.

³² Kọvu nga be kpasiri a, o sohia buru nhne kakwo kpakara nhne be kpasiri n'ẹli, wahia agida nkala hna ezi, ke mernu ọnunu ọọrnun alikwu nọ mkpururu idno a.”

³³ Jizọsi jiri agida elulu nọ kpa nookwunu be ikwu-ọnu Chiokike, lele kpa be jọonuli.

³⁴ Ọ kwúgene be ikwu-ọnu hne o jíle elulu. Kọvu nga ya nọ ele sno apna a kpọi daziri, ọ kọwanu be risi kpakara elulu ka.

*Jizọsi bigbọru
ruwhere osimini
(Mat 8:23-27; Luk 8:22-25)*

³⁵ Ọ duru n'ogbednachi, ọ kanu ele sno apna a, “Ngwa ma a whe aka osimini kiyari.”

³⁶ Nga be whọgaru n'igbudu badnu wam, be bnakwnusi Jizọsi n'ogbo ke ọ zị, be nọ ya snornu. Ọgbo ele ke berere sno be.

³⁷ Okne abaka-mini lizo, mini ọowubna nọ rime ọgbo wam, ke kpahiaru mini jihia n'ogbo wam.

³⁸ Kọvu nọ Jizọsi zị n'aznu ọgbo neezni anyarna n'olu nhne oche-risi. Be kpatnenya a, kanu a, “Nye-zni-nhne, ọ gbásila i nọ a noowhu sa?”

³⁹ O tnenya, bigbọ ruwhere, kanu okne osimini,

“Udno! Daziri bii.” Ruwhere whebiri, ọhna dna bii.

⁴⁰ Jizọsi kanu be, “Kini mernu anu ọọtnu ogwnu? Ọ bu nọ anu nwée ọkwnata mkpọma sa?”

⁴¹ Be turu ogwnu k'agida, be nẹsikwarita ẹhni be, “Nye ka bu nyele? Ke ruwhere nọ okne osimini noobnotenu nsni?”

5

*Jizọsi gwọru nye
renwu ọjo nwugwu
(Mat 8:28-34; Luk 8:26-39)*

¹ Jizọsi nọ ele sno apna a vadu ngeri Osimini Galili kiyari, n'ẹli ele Gerasa.

² Nga o hiri n'ogbo whuya, otu nyerukna renwu ọjo nwugwu hiri nọ hne be li iznu kwnusi a.

³ O wu nọ hne be li iznu, ọ zima nye nwernu rikne tu a ijigba,

⁴ kwnornu nọ be tusalam a ijigba nọ nhne ikelu agida ige, o gbajikwo ijigba, lijikwo nhne ikelu be tugwu a. Ọ zima nye nwernu rikne mee anya dno a.

⁵ Ige ọbula, abali nọ iwh-nehnie ọ zị nọ hne be li iznu ma n'olu rugwu, neesi okokoba, gweru akaworugwu buko ọodowa ẹhni a ẹhni.

⁶ Kọvu nga ọ whnurnu Jizọsi nọ hne zị ikere, ọ gba eso, kpọnu a risi ẹli.

⁷ O gweru okne nkọli si okokoba, naakaa, “Kini bu nhne me nọ ji nwekọgwu, Jizọsi Nnwọ ke Chiokike Kakwo Nhne Dum Olu?”

⁸ Ka bu kwnornu nu Jizosi kannu a, “Hi nu rime a whuya, ji renwu ojo.”

⁹ Jizosi sikwa a, “Kini bu rewhna i?”

O kaa, “Rewhna m bu Lijoni, kwnornu nu a zi agida.”

¹⁰ O riasnosi Jizosi rikne o chihala be n'eli wam.

¹¹ Kovu agida ezni zi piam naata wiri nu ngeri rugwu zi ndundu.

¹² Kpakara renwu ojo wam riasno Jizosi, kaa, “Zizne ai nu rime ezni ma a bna nu rime be.”

¹³ Jizosi kweru be, kpakara renwu ojo wam whuyaru zne bna nu rime ezni wam, kpakara rumu anohia wam, ke duru pokwu lawuru, gbadnarnu nu ngwulangwu ngeri mini, rinwu nu rime mini.

¹⁴ Ele nooznu be gbawhuru, tnusi a n'eli-ohna ma nu rime ekwu. Be va whnu nhne mernu.

¹⁵ Be vakwnusi Jizosi, whnu nye wam agida renwu ojo nwugwu nu mbom, hne o dazi eli, woru iwo, mkpoma a zumasiri ozu, be tu ogwnu.

¹⁶ Ele whnurnu a tnurnu nhne mernu nye wam renwu ojo nwugwu nu odokwnu ezni wam.

¹⁷ Be bete ariasno Jizosi o whoga nu ngeri eli be.

¹⁸ Nga o naabna nu rime ogbo, nye wam renwu ojo nwugwu nu mbom riasno a ma o snornu a la.

¹⁹ Jizosi kwéle. Kovu o kanu a “La n'oro i, lakwnusi ele ke i, tnusinu be kpakara nhne

Nyenwe ai mennu, nu kpa o donnu i obirizi.”

²⁰ Nwerukna wam la, panizo notnu nu rime Dekapolisi nhne Jizosi mennu a, o duru kpakara ele badnu ehni.

*Nnwọ rinya matị nu
nwerinya ntụ ọvnarna*

(Mat 9:18-26; Luk 8:40-56)

²¹ Nga Jizosi lahnarnu aznu bna n'ogbo du nu aznu osimini kiyari, agida ele badnu jihiaru nu hne o zi. O daziri nu ngeri osimini.

²² Otu nu rime ele risi oro ogbako ele Ju, nye rewhna a bu Jariosi, varu, nga o whnurnu Jizosi, o dna n'eli n'ochi a,

²³ riasno a, kaa, “Nnwọ m rinya matị zi n'onu enwu, va soso tukwasi a aka i lawuru ma i dokia a, o ziri budnu.”

²⁴ Jizosi snornu a zne. Agida badnu snornu a naakpagbu a.

²⁵ Otu nyerinya ke naaria ntụ ọvnarna nri nu awha lawuru sno nu igbudu ele badnu wam,

²⁶ ke whnurnu agida awhnuwhnu n'aka agida ele dibia, tuwhukwo kpakara nhne o nwernu, kovu o bnana mbnarna obula, o joru bujo ke agida.

²⁷ Nga o nurnu nhne gbasiri Jizosi, o va n'aznu a n'igbudu badnu wam, kpatu iwo a aka,

²⁸ kwnornu nu o karu, “O buru me kpatu iwo a aka kpoi, o jeeme ehni buru m oma.”

²⁹ Ngangam ọvnarna a gbabiri, o metu a n'ehni nu be gwolam a nriria ojo wam.

30 Ngangam Jizosi mahıaru nı rikne hilem n'ehni a whoga. O tuhnasna n'igbudu badnu wam sika, "Nyele kpaturu iwo m aka?"

31 Ele sno apna a kanu a, "I whnuru igbudu badnu naadnagidne i, i naakaa, 'Nyele kpaturu m aka?'"

32 O le anya gburugburu ma o jowhnu nye ke mernu nhne ka.

33 Nwerinya wam, kpa o mahıaru nhne mernu a, o yahna n'ogwnu naama a ririri, dna n'eli n'ochi a, kowanu a kpakara ezi oka zi a.

34 Jizosi kanu a, "Nnwọ m rinya, okwnata mkpoma i znohialam ji, la nu udno, nriria i la."

35 Nga Jizosi kpu oka n'onu, ele hi n'oro nye risi oro ogbako ele Ju wam va, naakaa, "Nnwọ i rinya nwunam. Ndaa ke i naakpaknata Nye-zni-nhne ehni?"

36 Jizosi bnoge nsni nu nhne be nookwu, o kanu nye risi oro ogbako ele Ju wam, "I tuko ogwnu, kweru kpoi."

37 O kwéle nye obula snornu a zne, okwolem Pita, nu Jemisi nu Joni nwene Jemisi.

38 Nga be vaduru n'oro nye risi oro ogbako ele Ju wam, o whnuru mkpakpo, nu agida ele naakwna ekwna, neesi okokoba.

39 Nga o bnazneru, o sika be "Ndaa nhne anu naakpakponu, naakwna? Nnwọ rinya ka nwuna onwu, kovu o zi n'anyarna."

40 Be mu a rumu. Nga o chıhalaru kpakara be, o kwuru nda watakiri wam nu nne a nu ele nu ya sno bna nu hne watakiri wam dnanyi.

41 O nwugwuru watakiri wam n'aka, kanu a, "Talita kumi," ke bu, "Nnwọ rinya mati, m ka m ji, lizo."

42 Ngangam, nnwọ rinya mati wam lizo, neezne izne (o gbaru nri nu awha lawuru). O duru be ehni k'agida.

43 Jizosi do be aka nu nsni o ziko nye mahia nhne mernu. O kaa masi be nyee a nhne o ri.

6

Be juru Jizosi nu Nazareti
(Mat 13:53-58; Luk 4:15-30)

1 Jizosi hi hnam whoga, va n'eli a, ele sno apna a snornu a.

2 O du n'Obochi Ozukwa Inwe, o panizo o zni nhne n'oro ogbako ele Ju. Nga be nuru nhne o neezni, o duru be ehni, be nesikwa, "Ndaa hne nwerukna ka nwehıaru kpakara nhne ka? Kini bu akoniche ke be nyernu a. Ndaa kpa o ji noronu kpakara ernu ndu-ehni ka?"

3 Ka o buo nye okwa-nka wam, nnwọ Meri, nu nwene Jemisi nu Josefu, nu Judasi, nu Saimoni? O buo rumu nne a rinya zi n'esilawuru ai hna?" Be we ovu ehni megidne a.

4 Jizosi kanu be, "Okwolem nu eli ke a nu ezi-nu-oro a, ma nu esilawuru ele ke a, bu hne nye owhnurninya nwée osobisinu."

⁵ O rnúlige ɛnu ndu-ɛhni n'ɛli kɪ, okwolem nɔ o bik-wasiri ele nrɪria ele nɔ ele aka, me ɛhni siri be rikne.

⁶ Ókwe ekwe be duru a ɛhni.

Jizosi zihalaru ele izi a nri nɔ ɛbo

(Mat 10:5-15; Luk 9:1-5)

Jizosi zne nɔ rime ɛli-ɔhna zɪ ichne ichne zɪ be ndɔndu, neezni nhne.

⁷ O sukwu ele izi nri nɔ ɛbo wam, panizo neezihala be ɛbo ɛbo, nyee masi be rikne nɔ hne rɛnwu ojo zɪ.

⁸ O nyee be iwu be jíko nhne ɔbula n'izne be, okwolem mkpara, be jíko nhne oriri, mɔbu rɛkpa, mɔbu iwai nɔ rɛkpa iwo be.

⁹ O karu be woru okoro-ochi, be wóko iwo lawuru.

¹⁰ O kanu be, "Anu dazigidne n'oro ɔbula anu jaabna, tem anu whoga n'ɛli wam.

¹¹ Hne ɔbula be nábnanyana anu mɔbu bnóne nsni n'ikwu-ɔnu anu, anu jowhoga pi, lisnama rizna ke zɪ n'ochi anu, ma o buru nhne akebbe megidne be."

¹² Be whoga nookwunu ele badnu ikwu-ɔnu Chiokike, be tuhnasna mkpoma.

¹³ Be chihalaru agida rɛnwu ojo, tesi masi agida ele naaria aria mɔno, me ɛhni siri be rikne.

Enwu Joni Nye Wu Mini
(Mat 14:1-12; Luk 9:7-9)

¹⁴ Eze Erɔdu nuru a, kwnornu nɔ rɛwhna Jizosi wholam iwhne. Agwna badnu naakaa nɔ Joni Nye Wu Mini hilem n'ɛnwu lizo,

o bu nhne mernu kpakara rikne ka ji nɔornu ɛnu ndu-ɛhni nɔ rime a.

¹⁵ Ele berere karu, "O bu Elaija."

Ele berere kaa, "O bu nye ɔwhnurninya, lele otu nɔ rime ele ɔwhnurninya gbaka."

¹⁶ Kovu Erɔdu nuru a, o kaa, "O bu Joni Nye Wu Mini, nye me biri risi, o lizolam."

¹⁷ Erɔdu karu nɔ mbom be nwudne Joni, kne a eriri n'oro ikelu kwnornu nɔ Erodiasi nnwerne Filipu nwene a, nye o luru.

¹⁸ Joni kanu Erɔdu, "O buo oma n'iwu ɔlu nnwerne nwene i."

¹⁹ Erodiasi beteru o vunu Joni irno nɔ mkpoma, o pioru o gbu a, kovu nɔ o nwée rikne,

²⁰ kwnornu nɔ Erɔdu turu ogwnu Joni. O mahjaru nɔ o bu nye mee mma nɔ nye zɪ nsɔ, o bikwata a nkari. Ige ɔbula o nuru ikwu-ɔnu a, oriri jihia mkpoma, kovu nɔ o ji snarnima nuru ikwu-ɔnu a.

²¹ N'ipne-aznu, oghere whuyanu Erodiasi. Erɔdu siri wiri o chenwanya omumu a. O sukwu ele nɔ ya sno neechi, nɔ ele risi ogwnu nɔ ele risi ɛli Galili.

²² Nga nnwo rinya Erodiasi bnanyarnu tne eri soru Erɔdu nɔ ele nɔ ya zɪ n'onu k'agida, eze kanu woknornokno wam, "Ri o m nhne ɔbula masiri i, m jeenye i."

²³ O kweru a mkwna kwesi a rikne, kaa, "Nhne ɔbula i rioru m, m jeenye i, o bubedi o keme ɛli-eze m ɛbo."

²⁴ O whoga sikwa nne a, "Kini bu nhne me jorio?"

O kanu a, “Risi Joni Nye Wu Mini.”

²⁵ Nnwọ rinya wam gba ẹso kwnusi eze, kanu a, “M chọru m i nyee m risi Joni Nye Wu Mini n'agbugba kitna.”

²⁶ Ẹhni nwurru eze, kovu kwnornu mkwna wam o kweru nu ele ya nu be dazi neeri wiri, o masila a o la aznu nu mkwna o kweru a.

²⁷ Ngangam, o zihala nye gbu badnu, nyee a iwu o bihia risi Joni. O zne bihia risi Joni n'oro ikelu.

²⁸ O vuya risi a n'agbugba, nyee a nnwọ rinya wam, nnwọ rinya wam nyee a nne a.

²⁹ Nga ele sno apna Joni nurru a, be va vuru iznu a lite.

Jizosi nyernu pokwu badnu isne wiri

(Mat 14:13-21; Luk 9:10-17; Jon 6:1-14)

³⁰ Ele izi Jizosi hiebnan-yarnu hne Jizosi zi, be tnu sinu a kpakara nhne be mernu nu kpakara nhne be znirni ele badnu.

³¹ Kwnornu nu agida ele badnu naava, naala, oghere o ri wiri zila, Jizosi kanu be, “Anu va ichne nu hne koru owu, zukwaru inwe.”

³² Be nu nsnunu be bna n'ogbo zne hne koru owu.

³³ Agida badnu whuru nga be neezne. Be mahiaru be, be hi nu kpakara eli-ohna gweru ochi gbako nu pi, beru be osno du.

³⁴ Nga Jizosi whuyaru n'ogbo, o whnu igbudu ele badnu, o donu be obirizi, kwnornu nu be nu lele

aturu nwée nye noznu be. O panizo neezni agida nhne.

³⁵ Nga obochi znemirnu, ele sno apna a vakwnusi a, kaa, “Hna kogwu owu, obochi zne-minem.

³⁶ Zihala ele ka ma be zne nu rime ekwu ma nu rime eli-ohna zne zuru nhne oriri.”

³⁷ Kovu Jizosi kanu be, “Anu nyee be nhne be jeeri.”

Be sikwa a, “A jeezne zuya brẹdi riwhu mkpuru iwai lawuru, nyega be, ma be ri?”

³⁸ O sikwa be, “Anu nwernu ike brẹdi ele? Zne lekasi.”

Nga be mahiaru, be kaa, “Ike brẹdi isne, nu aznu lawuru.”

³⁹ Jizosi kanu be mee kpakara be daziri eli nu mkpuru nu mkpuru n'olu achara budnu.

⁴⁰ Be daziri eli nu mkpuru nu mkpuru, ele otu riwhu nu ele nri isne.

⁴¹ Jizosi gweru ike brẹdi isne wam nu aznu lawuru wam, le anya n'oligwe, tu mmamma, nyawama ike brẹdi isne wam, nyee ele sno apna a ma be nyee ele wam. O keme aznu lawuru wam n'esilawuru kpakara be.

⁴² Kpakara be ri, riji ruwho.

⁴³ Ele sno apna a tutukota ruvnuruvnu brẹdi nu aznu ke gwnarnu ke jiharuru nri nu nkita lawuru.

⁴⁴ Ele riri brẹdi wam bu pokwu ele rukna isne.

Jizosi znernu izne n'olu mini

(Mat 14:22-33; Jon 6:15-21)

⁴⁵ Ngangam o mee ele sno apna a bna n'ogbo, beru a

osno kwowhe aznu osimini du eli Betesaida, nga o neezila igbudu badnu wam.

46 Nga o zilakworu be, o zne n'olu rugwu zne kpe okpukpe.

47 N'ogbednachi, ogbo wam zi n'esilawuru okne osimini, ya nu nsunu a zi n'olu eli.

48 O whnu be hne be zi nodoli nokwo ogbo kwnornu nu ruwhere neewhegidne be. O vakwnusi be nu onu osisi neezne izne n'olu mini. O pio o whe be,

49 kovu nga be whnuru a hne o neezne izne n'olu osimini, o nu be lele renwu. Be si okokoba k'agida.

50 Kpa kpakara be whnuru a, mkpoma la be mini.

O kanu be, "Mkpoma si anu rikne, o bu mawa. Anu tuko ogwnu."

51 O pnekwnusi be nu rime ogbo, ruwhere wam whebiri. O duru kpakara be ehni k'agida.

52 Be ghoyage ernu ndu-ehni gbasiri ike bredi isne wam, mkpoma be ghoyagele a.

*Jizosi gworu ele nriria
n'eli Genezareti
(Mat 14:34-36)*

53 Nga be wheru, be vadu n'eli Genezareti kpokwnusi ogbo be.

54 Kpa be whuyaru n'ogbo, ngangam agida ele badnu mahiaru Jizosi.

55 Be gbazu kpakara eli wam, panizo noovuya n'okpata ele nriria penupe obula be nuru o zi.

56 Hne nu hne obula o bnazernu, n'eli mati, mobu

eli hna ezi, mobu n'ekwu, be dnanyita ele nriria n'ahia, be naariasno a ma be kpatu ke bu onu iwo aka. O gworu kpakara ele kpaturu onu iwo a aka.

7

*Omen'eli ke ele mbom
(Mat 15:1-9)*

1 Nga ele Farisi nu agwna ele zni iwu ele Ju hiri nu Jeruselem vakwnusi Jizosi,

2 be whnuru nu ele sno apna a ji aka kpuru rune neeri wiri, ke bu aka be kwola okwo.

3 Ele Farisi nu kpakara ele Ju ri wiri hne be kwola aka nkari. Be naabita omen'eli ke ele mbom znirni be.

4 Be hi ahia yahna, be ri nhne obula hne be hniage ehni. O zi masi omen'eli berere ke be nahiaru, noosno, lele kpa be snu okiko, nu ite, nu okwu.

5 Ele Farisi nu ele zni iwu ele Ju sikwa Jizosi, "Kini kpararu ele sno apna i za naabita omen'eli ele mbom? Be gweru aka be kwokwala nkari neeri wiri."

6 Jizosi saru be, "Azaya whnuru owhnurninya gbasiri anu k'ezi, naakaa, anu bu ele ruwhnu lawuru, lele kpa be gbaru a n'okwukwo nsq, naakaa,

'Ele ka ji mgbele-onu etekne nosobisinu m,
kovu mkpoma be zi ikere nu hne me zi.

7 Be nokponu m risi eli n'etekne,

neezni nhne badnu ny-
ernu n'iwu lele nu o bu
iwu ke Chiokike.'

8 Anu naagharu iwu ke
Chiokike, nwukwaru omen'eli
ke badnu."

9 Jizosi kanu be, "Anu
marnu ama gharu nhne
Chiokike nyernu n'iwu ma
anu bita omen'eli anu.

10 Kwnornu nu Mozizi
karu, 'Sobisinu nda i nu nne
i,' nu 'Nye obula ke jovu nda
a mambu nne a onu, be gbu a.'

11 Kovu anu karu nye obula
ke jaakanu nda a mambu nne
a, 'Nhne i jeerihia n'aka m bu
Kobani' (ke bu nkesi o nyernu
Chiokike)

12 Ige wam anu jeekwe o
menu nda a mambu nne a nhne
berere.

13 Anu neeme nhne ka
neegweru ikwu-onu Chiokike
neeme nhne etekne hite
n'omen'eli ke anu, neenye-
whete a n'aka ele berere.
Nu agida nhne nu kpa anu
neeme."

*Nhne neemeru badnu
(Mat 15:10-20)*

14 Jizosi sukwuru igbudu
badnu wam berere kanu be,
"Anu bnote nsni n'ikwu-onu
m, anu ghohia a masi.

15 O za nhne ke hi n'ederezi
bna nu rime badnu ke
nwernu rikne meru a. Kovu
nhne ke hiri nu rime badnu
whuya bu nhne neemeru
badnu." [

16 Nye nwernu nsni o ji o nu
nhne o nurnu.]

17 Nga o gharuru agida ele
badnu wam bna nu rime oro,
ele sno apna a sikwaru a ajiji
gbasiri elulu wam.

18 O saru be, "Ke bu nu anu
nwée oghohia? Anu maa nu
nhne ke hiri n'ederezi bna nu
rime badnu nwée rikne meru
a?"

19 Kwnornu nu o bnana
nu rime mkpoma a, hne
o bnarnu bu ruwho a, be
nynohala a n'osoro." (Ka bu
ke Jizosi jiri kaa nu kpakara
wiri zi richna.)

20 Jizosi zi koriri nookwu,
"Nhne ke hiri nu rime badnu
whuya bu nhne neemeru
badnu.

21 Kwnornu nu o bu nu
rime mkpoma badnu bu hne
kpakara oriri ojo hi noowhuya,
ome oyi, oznu buznu, ogbu
badnu,

22 ome oyi ele nwernu
nnwerne nu ele nwernu nzi,
anyakwu, aruru-eli, aghigho,
ogba ewhere, owho-anya, okaja,
oknomokno, iwhnirniwhno,

23 Kpakara nhne ojo ka hi
nu rime badnu whuya, be
meru badnu."

*Okwnata ovu otu
nwerinya Sirofinisa
(Mat 15:21-28)*

24 Jizosi hi nu rime pij
whoga, zne n'eli zi Taya
ndundu. O bna n'otu oro, o
piole ele badnu mahia, kovu
nu be nwée rikne bigwa a.

25 Ngangam, otu nyerinya
ke nnwo a rinya mati nwernu
renwu ojo nurnu nhne gbasiri
Jizosi, o varu dna n'eli n'ochi a.

26 Nwerinya wam buo nye
Ju, be muru a nu Sirofinisa.
O riasno a ma o chihala renwu
ojo wam n'ehni nnwo a rinya.

27 Jizosi kanu a, "Beru
osno nyejite rumu takiri wiri

rụwho, kwnornu nụ ọ bụo ọma o gweru wiri rụmu takiri tūhalanu nkita.”

28 Kọvu ọ saru, “Nyenwe aị, ọ bụbedi rụmu nkita ke zị nụ mkpururu ikpechi neeri rụvnuruvnu wiri rụmu takiri.”

29 Jizọsi kanu a, “Kwnornu nụ nhne ka i kwuru, la, renwu ojo wam whogalam n'ehni nnwo rinya.”

30 O la n'oro a, whnu nụ nnwo a dnanyi n'olu okpata, nụ renwu ojo wam whogalam masi.

Jizọsi gworu nye mgbu nụ nsni inyo

31 Jizọsi whogaru nụ ngeri Taya gawhe n'esilawuru Saịdoni, hi n'esilawuru eli Dekapolisi du Osimini Galili.

32 Be kwuyanụ a otu nyenum ke dnarnu mgbu ke nu nsni, be riasno a ma o bikwasị a aka a.

33 Jizọsi kwuhala a n'esilawuru agida badnu whoga ichne, ọ yisi mkpaka a nụ nsni a lawuru, gbụ onu-mini, kpatu riro a aka.

34 O lelizọ anya n'oligwe, snu idne, kaa, “Efata,” ke risi a bu, “Kpume.”

35 Ngangam nsni a lawuru kpumernu, nhne knesnirni a riro tomarnu, o kwukwata oka.

36 Jizọsi kasinu be rikne be kanukwadia nye obula, kovu kpa ọ naakanusinu be rikne bu kpa be neewheke a.

37 O duru kpa be hna ehni k'agida, be naakaa, “O neeme kpakara nhne buru oma. O

mernu ele nsni inyo nụ nsni, ele mgbu kwu oka.”

8

Jizọsi nyernu pokwu badnu eno wiri (Mat 15:32-39)

1 N'ige wam nga agida ele badnu gbakoru berere, be nwée masi nhne be jeeri. Jizọsi sukwu ele sno apna a, kanu be,

2 “M nọdonu agida ele badnu ka obirizi, kwnornu nụ me nụ be dazilam obochi eto, be nwée nhne be jeeri.

3 O buru nụ me zihala be n'onu etekne, anya-ajụ joovu be n'apna, agwna be hi hne zị ikere va.”

4 Ele sno apna a sika a, “Ndaa kpa badnu jeeji nyeji ele badnu ka wiri rụwho n'elika kpa hna?”

5 O sika be, “Anu nwernu ike bredi ele?”

Be kaa, “Esau.”

6 O kanu agida ele badnu wam daziri eli. O gweru ike bredi esau wam, tunu Chiokike mmamma, ọ nyawama be, nyee ele sno apna a be bete neenye ele badnu, ele sno apna a kesiri ele badnu wam wiri.

7 Be nwemasiri aznu mati ele nu ele, ọ tu kwno mmamma, kaa be nyee ele wam.

8 Be ri, rụwho ji be, be tutukota rụvnuruvnu bredi ke gwnarnu, ekperi nkita esau jihiaru.

9 Be duru pokwu eno, Jizọsi zihala be.

10 Jizōsi bna nū rime oḡbo, ya nū ele sno apna a, be va nū ẹli Dalamanutu.

*Ele Farisi piuru
nhne elekema
(Mat 16:1-4)*

11 Ele Farisi varu panizo neṣikwa a ajiji, noopio nhne elekema hi n'oligwe, naakpa a iru.

12 O snu idne k'agida nū rime oḡbo a, kaa, "Kini kpahiaru ebiri ka noopio nhne elekema? N'ezi me kanu anu, o za nhne elekema be jeenye ebiri ka."

13 O gharu be bna kwno nū rime oḡbo whe aznu osimini kiyari.

*Nhne whu bredi
ele Farisi nu Erodu
(Mat 16:5-12)*

14 Ele sno apna a chezuru o gweru bredi, be ji otu ike bredi kpoi nu rime oḡbo.

15 Jizōsi kasinu be rikne, "Anyu du anu eli, anu neeze nhne whu bredi ke ele Farisi nu Erodu."

16 Be notnurita n'esilawuru be, naakaa, "O bu kwnornu nu a jile bredi."

17 Nga Jizōsi mahiaru a, o kanu be, "Kini kpahiaru anu naakaa nu anu jile bredi? Anu yoghoyage? Nduu otula anu sa?"

18 Anu nwernu anya, anu whnu osno? Anu nwernu nsni, anu nu nhne? Anu gbadiyala?

19 Nga me keru ike bredi isne n'esilawuru pokwu badnu isne, nkita ele jihiaru nu ruvnuruvnu anu vulizoru?"

Be kaa, "Nri nu ebo."

20 "Nga me keru esau nye pokwu badnu eno, ruvnuruvnu nkita ele bu nhne anu vulizoru?"

Be kaa, "Esau."

21 O kanu be, "O bu nu anu yoghohiala kori?"

*Jizosi gworu nye isni
nu Betesaida*

22 Jizōsi nu ele sno apna a va n'eli Betesaida. Be kwuyanū a otu nye isni, riasno a ma o kpatu a aka.

23 O nwugwuru nye isni wam n'aka, duru a zne n'aznu eli-ohna wam. O gbusi a onu mini n'anya, tukwasi a aka a lawuru, o sikwa, "O zi nhne inowhnu?"

24 O le anya n'olu, kaa, "M nowhnu badnu, kovu be nu lele isisi neezne izne."

25 Jizōsi tukwasi kwno a aka a lawuru n'anya a berere, o legidne anya, anya a buru oma, o whnusunama kpakara nhne nkari.

26 O zihala a n'oro a, kanu a, "I lahnakwadia nu rime eli-ohna berere."

*Pita kahiaru nye Jizosi bu
(Mat 16:13-20; Luk 9:18-21)*

27 Jizōsi whoga, ya nu ele sno apna a bna nu kpakara eli-ohna mati zi ndundu Sizaria Filipai. Nga be zi n'apna, o sikwa ele sno apna a, "Ele badnu be naakaa nu me bu nyele?"

28 Be saru a, "Agwna be naakaa Joni Nye Wu Mini, ele ke berere naakaa Elaija, ele ke berere kaa otu nu rime ele owhnurninya."

29 O sika, “Anu n’iwhuru anu, anu kanu nu m bu m nyele?”

Pita saru a, “Ji n’iwhuru i bu Karaşi wam.”

30 O do be aka nu nsni, kaa, “O za nye anu kanu nhne gbasiri m.”

Jizosi kwuru oka gbasiri enwu a

(Mat 16:21-28; Luk 9:22-27)

31 Jizosi panizo neezni be nhne, naakaa, “Nnwọ ke Badnu jaatariri agida awnhnuwhnu, ele okno badnu nu ele risi ariohna nu ele zni iwu ele Ju jọju a, be gbu a, nga obochi eto whemernu, o jeehi n’enu lizo.”

32 O kwuru ka kpa nye obula jọghohia. Pita kwuhala a, naabnanu a.

33 Nga o tuhnasarnu whnu ele sno apna a, o bigbo Pita, kanu a, “Zne n’aznu m, Setani, kwnornu nu i neeche echiche lele badnu, o buo lele Chiokike.”

34 O sukwu igbudu badnu wam nu ele sno apna a, o kanu be, “O buru nu nye obula joo sno m n’aznu, o jọju ehni a, vuru oga a sno m.

35 Nye obula ke noopio o dohia budnu a jootuwhu a, kovu nye obula ke jootuwhu budnu a kwnornu m nu izi oma, o jọoznohia a.

36 Mbnarna kini bu nhne badnu jeenwe o buru nu o rihia kpakara owa n’iru tuwhume budnu a?

37 Kini bu nhne badnu jeeji gbanwo budnu a?

38 Nye obula ke iwhnerne m nu ikwu-onu m jootu n’ebiri ewhere nu aruru-eli ka, iwhnerne nye wam jootu Nnwọ ke Badnu nga o jaava n’igwugwu ke Nda a, ya nu ele enine izi a zi nsọ.”

9

1 Jizosi kanu be, “Me kanu anu ezi oka, agwna ele gwuzo hna joonwu enwu tem be whnu eli-eze Chiokike hne o ji iknernema va.”

Onwoghari Jizosi

(Mat 17:1-13; Luk 9:28-36)

2 Nga obochi isunu whemernu, Jizosi kwuru Pita, nu Jemisi, nu Joni duru be pnezne n’olu rugwu zi olu whoga ichne. O nwoghari nu ruwhnu be.

3 Iwo a noonwu va-a-a ke o za nye zi n’owa ka joo snuli iwo ki.

4 Be whnurnu Elaija nu Mozizi, be nu Jizosi nookwurita oka.

5 Pita kanu Jizosi, “Nda-ai-kwu, o buru oma a daziri hna, ngwa ma a wu oro-eka eto, otu buru ke i, otu ke Mozizi, otu ke Elaija.”

6 Ogwnu turu be ke kpararu o ma nhne o nookwu.

7 Erumeru oligwe varu kpusni be, akpiri hiri nu erumeru oligwe wam whuya, kaa, “Ka bu Nnwọ m me whnurnu n’anya, anu bnotenu a nsni.”

8 Kpurugadnam, nga be leru anya gburugburu, o za nye be whnurnu, okwolem Jizosi kpọi.

9 Nga be hiri n'olu rugwu wam hiehna, o kasınu be rikne, be kánu nye obula nhne be whnúrnun, tem Nnwọ ke Badnú hi n'ẹnwu lizọ.

10 Be bíta nhne ka nù mkpọma be. Be nẹsikwa n'esilawuru ẹnhi be, “Kini bú risi olizọ n'ẹnwu?”

11 Be sịkwa a, “Kini kpayaru ele zni iwu ele Ju jiri kaa nù Ẹlajia jeebe osno va?”

12 Jizọsi saru be, “O bú n'ezi nù Ẹlajia jeebe osno va, bıkwata kpakara nhne lele kpa o zı nù mbọm. Kini mernu be gbaru a n'okwukwo nsọ gbasiri Nnwọ ke Badnú, nù o jaata agıda awhnúwhnu, be ju ması a?”

13 Kọvu me kanu anu nu Ẹlajia valẹm, be mee a kpa o jiri ması be, lele kpa be gbaru a n'okwukwo nsọ gbasiri a,”

Jizọsi gwọru nnwọ rukna
(Mat 17:14-21; Luk 9:37-43a)

14 Nga Jizọsi nù badnú ẹto ele sno apna a vakwnusiri ele sno apna a ele berere, be whnúrnun igbudu badnú gbaru be gburugburu, whnú ması ele zni iwu ele Ju hne be nọdogbuta.

15 Ngangam o du kpa be hna ẹnhi k'agıda nga be whnúrnun a, be gbazne, bekwu a.

16 Jizọsi sịkwa ele sno apna a, “Kini bú nhne anu nu be nọdogbuta?”

17 Otu nyenum nù rime igbudu badnú wam saru a, “Nye-zni-nhne, m kwuyannu m jı nnwọ m rukna ke nwernu renwu dnarnu mgbu.

18 Penupe obula o nwugwuru a, o vudna a n'ẹli, o nọogbo okoto n'ọnu, naata rukwnurnun-ize, rọknete ẹnhi. M kanu ele sno apna i ma be chihala a, kọvu nu be nwée rikne.”

19 Jizọsi saru be, “Anu ebiri ke nwée okwnata mkpọma, me nu anu jaadazi du ngele? Me jeesinu anu ovu du ngele? Anu kwuyanun m nnwọ wam hna.”

20 Be kwuyanun a nnwọ rukna wam. Nga renwu ojo wam whnúrnun Jizọsi, ngangam, o dosi nnwọ rukna wam rikne. O dna n'ẹli nọotnurni a, o nọogbo okoto n'ọnu.

21 Jizọsi sịkwa nda a, “Ndaa nga nhne ka beteru eme a?”

O kaa, “Hite nga o bu nnwọ mati.

22 Agıda ige, o dobnarnu a nu rime bekwnu ma nu rime mini ma o gbu a. O buru nu o nwernu nhne i jeemeli, donu ai obirizi, yisinu ai aka.”

23 Jizọsi kanu a, “I naakaa, o buru nu o nwernu nhne me jeemeli? Kpakara nhne jeemelinu nye nwernu okwnata ovu.”

24 Ngangam, nda nnwọ watakiri wam siwama, “M kweru m, yisinu okwe ekwe m aka.”

25 Nga Jizọsi whnúrnun nu agıda badnú naagbaya, o bigbo renwu ojo wam kaa, “Ji renwu ke dnarnu mgbu nu nsni inyo, m neenye i iwu, hi nu rime a whuya, i bnama nu rime a berere.”

26 Renwu ojo wam si okokoba, dosi a rikne, hi nu

rime a whuya. Nnwọ wam dna lele nye nwurnu ọnwu, ke kpayarụ agịda badnụ jiri kaa, “Ọ nwunam we.”

²⁷ Kọvu Jizọsi nwugwuru a n'aka dọlizo a, o lizo.

²⁸ Nga Jizọsi bnanyarnụ n'oro, ele sno apna a sịkwa a ichne, “Kini kpayarụ a nwéne rikne chihala renwu ojo wam.”

²⁹ Ọ kanụ be, “Renwu nụ lele ka jọowhoga nụ nhne ọbula, okwolem n'okpukpe.”*

Jizọsi kwukwnornu ọka gbasiri ẹnwu a
(Mat 17:22,23; Luk 9:43b-45)

³⁰ Be hi nụ pị whuya gawhe n'esilawuru Galili. O kwéle nye ọbula mahia hne be zi,

³¹ kwnornu nụ o neezni ele sno apna a nhne, naakaa, “Be jeegweru Nnwọ ke Badnụ resi n'aka ele badnụ, be joogbu a, nga ọbochi ẹto whemernu, o jeeji n'ẹnwu lizo.”

³² Kọvu nụ be ghohiala ọka wam, ogwnu kwéle be sịkwa a nhne gbasiri a.

Nyele kakwo ibne a?

(Mat 18:1-5; Luk 9:46-48)

³³ Be vadu Kapanom, nga Jizọsi bnarnụ n'oro, ọ sịkwa be, “Kini bụ nhne anụ nookwu n'apna?”

³⁴ Kọvu be mesnirni ọnu be, kwnornu nụ be nọdogbuta n'apna nye kakwo ibne a n'esilawuru be.

³⁵ Jizọsi daziri ẹli sukwu ele sno apna a nri nụ ẹbo wam. Ọ kanụ be, “Ọ bụru nụ nye ọbula noopio ọ bụ nye risi, ọ

jọobu nye ipne-aznụ, nụ nye neeznenu kpakara ele badnụ izi.”

³⁶ O kwuru otu watakiri gwuzote a n'esilawuru be, o jiri a n'aka a, kanụ be,

³⁷ “Nye ọbula ke jaanarnụ otu nụ rime watakiri ka nụ rewhna m, nanarnụ m, nye ọbula ke jaanarnụ m k'ezi, ọ bụo me bụ nye ọ nanarnụ k'ezi, ọ bụ nye ziyaru m.”

Nye zá neemegidne ai dagwunu ai
(Luk 9:49,50)

³⁸ Jọni kanụ a, “Nye-zni nhne, a whnurnu otu badnụ hne ọ naachihala renwu ojo nụ rewhna i, a bnosni a, kwnornu nụ ọ zá noosno ai.”

³⁹ Jizọsi kaa, “Anụ bnósní a, kwnornu nụ ọ zá nye jọornu ẹnu ndu-ẹhni nụ rewhna m, ke jaakaa m ọka ojo ngwa ngwa.

⁴⁰ Nye zá neemegidne ai dagwunu ai.

⁴¹ M naakanụ anụ ezi ọka, nye ọbula ke jookwute anụ otu okiko mini anụ nwọ kwnornu nụ anụ bụ ele Karaisi jaanahariri ogwo ẹnu a.”

Nhne jeeme badnụ mehie

(Mat 18:6-9; Luk 17:1,2)

⁴² “Nye ọbula ke jeeme otu nụ rime ele matị ka mehie, bụ ele kweru nụ me, ọ jaakanụ a mma nụ be gweru okne rugwu ogwe-wiri nyasi a n'ili, migbu a n'okne osimini.”

⁴³ Ọ bụru nụ aka i jeeme i, i mee mmehie, gbubime a, ọ jaakanụ i mma ọ bna

* 9:29 Agwna ọkwukwo kwuru: hite n'okpukpe nụ ovu ọnu.

nụ bụdnu kwó okwo vuru ọru karụ o nwernu aka ị lawuru bna nụ bẹkwnu ẹli rẹnwu chnị echni. [

44 Kị bụ hne rukpurukpuru be nwụ ọnwu, bẹkwnu be chnị echni.]

45 Ọ bụru masị nụ ọchi i jeeme i, i mee mmehie, gbu-bime a, ọ jaakanụ ị mma ọ bna nụ bụdnu kwó okwo nụ mgworo karụ o nwernu ọchi lawuru ị, be túbna i nụ bẹkwnu ẹli rẹnwu. [

46 Kị bụ hne rukpurukpuru be nwụ ọnwu, bẹkwnu be chnị echni.]

47 Ọ bụru masị nụ anya ị jeeme i, i mee mmehie, gwupu a, ọ jaakanụ ị mma ọ bna n'ẹli-eze Chiokike nwernu otu anya karụ o nwernu anya lawuru be túbna ị nụ bẹkwnu ẹli rẹnwu.

48 Kị bụ hne rukpurukpuru be nwụ ọnwu, bẹkwnu be chnị echni.

49 “Lele kpa a ji arụa mee wiri sọ n'ọnu, ọ bụ kpa Chiokike neeji bẹkwnu awnụwhnu mee ele ke a bụru ele agwa ọma.

50 “Arụa bụru ọma, kọvu arụa tuwhu ọso n'ọnu a, be jeeji kịni mee a ọ sọ n'ọnu? Anụ nwernu arụa nụ rime anụ ma anụ nụ ibne anụ ziri n'udno.”

10

Ogba nnam

(Mat 19:1-12; Luk 16:18)

1 Jizọsi whọga zne n'ike ẹli Judiya n'aznụ Osimini Jodani kiyari, agịda ele badnụ jipiya kwno hne ọ zị. Lele kpa o mesị, o neezni be nhne.

2 Agwna ele Farisi vakwnusi a, sịkwa a, “Ọ bụru ọma n'iwu nyerukna gba nnwerne a nnam?” Be naakpa a iru.

3 Ọ sịkwa be, “Kini bụ nhne Mozizi nyernu anụ n'iwu?”

4 Be kaa, “Mozizi kweruru nyerukna gba ọkwukwo nnam nyee nnwerne a, chihala a.”

5 Jizọsi kanụ be, “Kwnornu nụ mkpoma ojo anụ kpararụ Mozizi gbarụ iwu ka n'ọkwukwo.

6 Kọvu hite n'ọpanizo okike ọwa, Chiokike kpuru be nyerukna nụ nyerinya.

7 Kwnornu nụ ka, nyerukna jaagharụ nda a nụ nne a, takwnusi n'ẹhni nnwerne a,

8 be lawuru jọogho otu anọ-ẹhni. Be buma badnụ lawuru, kọvu otu anọ-ẹhni.

9 Nhne Chiokike knekọtaru, badnụ tómana a.”

10 Nga be bnarnụ nụ rime ọro, ele sno apna a sịkwa a ajiji gbasiri ọka ka berere.

11 Ọ kanụ be, “Nye ọbula ke jaagba nnwerne a nnam lụ nnwerne berere, neemegidne a ọyi.

12 Ọ bụru masị nụ nnwerne gba nzi a nnam, gbọru nzi berere, o neeme masị ọyi.”

Jizọsi gọziri rụmu takiri
(Mat 19:13-15; Luk 18:15-17)

13 Ele badnụ nookwuyanu Jizọsi rụmu takiri ma ọ kpatu be aka, kọvu ele sno apna a bigbọru ele kwuyaru be.

14 Nga Jizọsi whnurnu a, o we ẹhni k'agịda, ọ kanụ be, “Anụ gharụ rụmu takiri ma be

vakwnusi m, anụ bnósni be, kwnornu nụ ẹli-eze Chiokike bụ ke ele nụ kpa.

¹⁵ Me kanụ anụ ezi ọka, nye ọbula ke jéegweru ẹli-eze Chiokike lele nnwọ matị, ọ jáabna nụ rime a rịa rịa.”

¹⁶ O kwuru be n'aka a lawuru, tükwasi be aka a, gozi be.

Otu nye ọchichi

(*Mat 19:16-30; Luk 18:18-30*)

¹⁷ Nga Jizọsi whọgaru n'apna, otu nyenum gbakwnusi a, gbunu a mpnerne ọchi, sịkwa a, “Ọmamarna Nye-zni-nhne, kịni bụ nhne me jeeme ma m kehia m bụdnu kwó okwo?”

¹⁸ Jizọsi saru a, “Kini kpayarụ i noosukwu m nye ọma? Ọ zá nye bụ nye ọma, okwolem otu badnu, bụ Chiokike kpọi.

¹⁹ I maam kpakara nhne be nyernu n'iwu, i gbúko badnu, i méko ọyi, i znúko buznu, i gbáko akebe aghalaghala, i mégbukọ badnu, sọbisinu nda i nụ nne i.”

²⁰ Ọ kanu a, “Nye-zni-nhne, kpakara nhne ka bụ nhne me bítaru hite n'ikoro m.”

²¹ Jizọsi leri a anya ọma, kanu a, “Otu nhne gwnarnu i jeeme, la, re kpakara nhne i nwernu, kesi ele mboni, i jeenwe ẹkwu n'oligwe, vaa, sno m.”

²² Ruwhnu gbaruru a n'ọka wam, ọ la, naagbaru ruwhnu, kwnornu nụ o nwernu ẹkwu k'agida.

²³ Jizọsi leri anya gburugburu, kanu ele sno apna a,

“Le kpa o jiri ra ẹhni ele nwernu ẹkwu ọ bna n'ẹli-eze Chiokike!”

²⁴ Ọka wam du ele sno apna a ẹhni, kovu nụ Jizọsi ka masinu be, “Rumu m, le kpa o jiri ra ẹhni ọ bna n'ẹli-eze Chiokike.

²⁵ Ọ zinu anọhia kameli ewheke ọ gawhe n'anya alanga karu ele nwernu ẹkwu ọ bna n'ẹli-eze Chiokike!”

²⁶ O du kpakara ele sno apna a ẹhni k'agida, be sịkwarita ẹhni be, “Ndakwanu nye be jọoznohia?”

²⁷ Jizọsi leri be anya kaa, “Hne badnu zi be jéemeli a, kovu ọ búo hne Chiokike zi. Be meli kpakara nhne hne Chiokike zi.”

²⁸ Pita panizo naakanu a, “Le, a sịgbasiri kpakara nhne a nwernu, snornu i.”

²⁹ Jizọsi kanu, “Me kanu anụ ezi ọka, ọ zá nye ọbula ke sịgbasiri ọro, mọbu rumu nwene rukna, mọbu rumu nwene rinya, mọbu nne, mọbu nda, mọbu rumu, mọbu ẹkwu kwnornu m nụ izi ọma,

³⁰ ke jáanahia karu riwhu nga riwhu n'ige ka, ọro nụ rumu nwene rukna, nụ rumu nwene rinya, nụ nne, nụ rumu, nụ ẹkwu, be nụ mmekpehni masi, nụ bụdnu kwó okwo n'ige vagwu nụ ruwhnu.

³¹ Kovu agida ele be ọsno jọobu ele ipne-aznu, ele ipne-aznu jọobu ele be ọsno.”

Jizọsi kwuru ọka gbasiru ẹnwu a ke mgba eto

(*Mat 20:17-19; Luk 18:31-34*)

32 Nga be zı n'apna neezne Jeruselem, Jizosi neezne nı ruwhnu be, o du ele sno apna a ɛhni, ele snogwu a n'aznu nɔotu ogwnu. O kwuru kwno nri nı badnu lawuru wam ichne, panizo naakanu be nhne jeeme a.

33 O kanu be, "A neezne Jeruselem, be jeegweru Nnwɔ ke Badnu nyewhete n'aka ele risi ariohna nı n'aka ele zni iwu ele Ju, be jaama a ikpe ɛnwu, gweru a nyee n'aka ele buo ele Ju.

34 Be jeeme a nhne rumu, gbı a onu mini, pniã nhne, gbı a, nga obochi ɛto whemernu o jeehi n'ɛnwu lizo."

Aririo rumu Zebidi
(Mat 20:20-28)

35 Jemisi nı Jɔni rumu Zebidi, vakwnusi Jizosi, riɔ a, "Nye-zni-nhne, a nɔorio ma i menu aı nhne obula a jɔorio i."

36 O sika be, "Kini bu nhne anu noopio me menu anu?"

37 Be kanu a, "Mee kpa a jaadaziri otu n'akarikwnunga i, otu n'akarita i, n'igwugwu i."

38 Jizosi kanu be, "Anu maã nhne anu nɔorio. Anu jɔonwoli okiko ke me nɔonwo? Mɔbu be wuli anu mini ke be nɔowu m?"

39 Be kanu a, "A nwernu rikne."

Jizosi kanu be, "Okiko me nɔonwo bu ke anu jɔonwo, mini be wuru m bu ke be jɔowu anu.

40 Kɔvu o dazi n'akarikwnunga m nı akarita m buo ke m n'onnyega. O bu ke ele Chiokike bikwatannu a."

41 Nga ele sno apna a nri ke gwnarnu nurnu a, be wesanu Jemisi nı Jɔni ɛhni k'agida.

42 Jizosi sukwukota be, kanu be, "Anu magwu nı ele be gwnurnu n'ele risi ke ele buo ele Ju neeme ele be nechi kpa o masiri be, ele kwu be ji aka rikne nechi ele zı nı mkpururu be.

43 Kɔvu o buo kɔam n'esilawuru anu. Nye piuru o buru nye kwu n'esilawuru anu jɔobu nye neeznenu anu izi.

44 Nye piuru o buru nye mbom n'esilawuru anu, jɔobu ohi kpakara anu.

45 Kwnornu nı Nnwɔ ke Badnu vage ma be znenu a izi, kɔvu ma o neeznenu ele berere izi, ma o gweru masi budnu a nyee, ma o buru nhne obbahia agida badnu."

Jizosi gwɔru Batimosi
nye isni

(Mat 20:29-34; Luk 18:35-43)

46 Be vadu Jeriko, nga Jizosi nɔowhoga nı Jeriko, ya nı ele sno apna a nı agida ele badnu, Batimosi nnwɔ rukna Timosi nye kpuru isni dazi nı ngeri apna nɔorio nhne.

47 Nga o nurnu nı o bu Jizosi nye Nazareti neewhe, o panizo neesi okokoba, naakwnakwu a, "Jizosi, Nnwɔ Davidi, donu m obirizi."

48 Agida ele badnu bigboru a ma o kpusnime onu a, kɔvu siwama k'agida, "Ji Nnwɔ Davidi, donu m obirizi."

49 Jizosi gwuzoru, kaa, "Anu sukwu a."

Be sukwu nye isni wam, kanu a, “Mkpoma si i rikne, lizo, o noosukwu i.”

⁵⁰ O chiwhume iwo a, wulizo, kwnusi Jizosi.

⁵¹ Jizosi sikwa a, “Kini bu nhne i pioru me menu i?”

Nye isni wam kaa, “Nyenwe ai, mee ma m whnuru m osno.”

⁵² Jizosi kanu a, “La, okwnata mkpoma i znohialam ji.”

Ngangam o bete o whnu osno, snornu Jizosi n'apna.

11

Jizosi bnazneru

Jeruselem

(*Mat 21:1-11; Luk 19:28-40; Jon 12:12-19*)

¹ Nga Jizosi nu ele sno apna a naavadu Jeruselem ndundu, n'eli Betifagi nu Betani, be vadu nu Rugwu Olivu, o zizne badnu lawuru nu rime ele sno apna a.

² O kanu be, “Anu zne nu mgbu mati ke zi nu ruwhnu anu, ngangam anu naabna nu rime a, anu jowhnu nnwo iyinya be kpogwu eriri, ke o ziko nye daziri n'olu a, anu toma a, toya hna.”

³ O zi nye sikwaru anu, “Kini mernu anu neeme nhne ka?” Anu kaa, “O zi Nyenwe ai mkpa, o jeegwehnahe a kitna.”

⁴ Be znernu whnu nnwo iyinya be kpogwu n'onu-mgbo oro zi n'apna, be topiya a.

⁵ Ele gwuzogwu pii sikwa be, “Kini bu nhne anu neeme, nototo nnwo iyinya wam?”

⁶ Be kanu be nhne Jizosi karu, be gharu be.

⁷ Be toyanu Jizosi nnwo iyinya wam, wukwasi a iwo be n'olu a, o daziri n'olu a.

⁸ Agida ele badnu gbata iwo be n'apna, ele berere nkala isisi ke be gbuharu n'ohia.

⁹ Ele neezne nu ruwhnu nu ele noosno, neesi okokoba, naakaa,

“Ozana!

Chiokike gozi nye ke naava nu rewhna Nyenwe ai.

¹⁰ Nhne be goziri ogozi bu elize nda i Devidi!

Ozana nu hne kakwo n'olu!”

¹¹ Jizosi bna nu rime Jeruselem, bnazne Oro Nso, nga o lekworu kpakara nhne anya, kpa o bu ogbednachi, o whoga zne Betani, ya nu nri nu badnu lawuru wam, ele sno apna a.

*Jizosi vuru isisi
be kwu figi onu
(Mat 21:18,19)*

¹² N'ekile a, nga be hiri nu Betani naava, wiri gwnuru Jizosi.

¹³ Nga o whnuru isisi figi nu hne zi ikere ke nwernu okwukwo budnu, o zne ma o zi nhne o jowhnu n'olu a. Nga o vaduru a ehni, o whnuna nhne obula okwolem okwukwo budnu, kwnornu nu o buo ige mkpuru figi.

¹⁴ O kanu isisi figi wam, “O za badnu obula jeeri mkpuru hi n'olu i berere.” Ele sno apna a nurnu a.

*Nhne Jizōsi mernu
n'Oro Nsō Chiokike*

(Mat 21:12-17; Luk 19:45-48; Jōn 2:13-22)

¹⁵ Be vadu Jeruselem, Jizōsi bna Oro Nsō Chiokike panizo o chihala ele neere, nu ele nōozu ahia n'Oro Nsō Chiokike. O kpute ikpechi kpakara ele naagbanwo iwai ruwhnu n'eli nu ngadna ele neere nduru.

¹⁶ O kwéle badnu obula vuru nhne gawhe Oro Nsō Chiokike.

¹⁷ O neezni nhne, naakaa, "Be gbarū a n'okwukwo nsō, kaa,

'Be jookwu oro m oro okpukpe ke kpakara mba.'

Kovu anu mernu a o buru obna ele buznu."

¹⁸ Ele risi ariohna nu ele zni iwu ele Ju nurnu a, pio kpa be joogbu a. Kovu nu be turu ogwnu o mee a nhne obula, kwnornu nu nhne o znirni duru agida ele badnu ehni.

¹⁹ N'ige ogbednachi, Jizōsi whoga n'eli-ohna Jeruselem, ya nu ele sno apna a.

*Isisi figi wam kponwurnu
(Mat 21:20-22)*

²⁰ Nga be neezne n'osisi, be whnu isisi figi wam nu o kponwunam du egwnugwnu a.

²¹ Pita chenwanya, kanu a, "Nda-ai-kwu, le isisi figi wam i vuru onu kponwunam."

²² Jizōsi saru be, "Anu nwe okwnata ovu nu Chiokike.

²³ N'ezi me kanu, nye obula ke jaakanu rugwu ka, 'Lizo, dnabna osimini,' ke nwée mkpoma lawuru, kovu nu o

kweruru nu nhne o kwuru jeeme, o jeemenu a kpm.

²⁴ Kam kpayaru, me naakanu anu, nhne obula anu jorio n'okpukpe, kweru nu anu nwehialam a, o jobu masi ke anu.

²⁵ Berere, nga anu gwuzoru neekpe okpukpe, anu gbarunu nye obula nhne ojo o mernu anu, ma Nda anu ke zi n'oligwe gbarunu anu kpakara nhne ojo anu. [

²⁶ Kovu o buru nu anu jaagbarunu badnu, Nda anu ke zi n'oligwe jaagbarunu anu nhne ojo anu.]"

Rikne Jizōsi

(Mat 21:23-27; Luk 20:1-8)

²⁷ Be va kwno berere nu Jeruselem. Nga Jizōsi neezneghari nu rime Oro Nsō Chiokike, ele risi ariohna nu ele zni iwu ele Ju nu ele okno badnu vakwnusiri a.

²⁸ Be sikwa a, "Rikne kini bu nhne i ji neeme kpakara nhne ka? O bu nyele nyernu i rikne neeme i ji neeme be?"

²⁹ Jizōsi saru be, "M jaasikwa anu otu ajji, anu sa m, omekwo, m jaakanu anu rewhna rikne me ji neeme kpakara nhne ka.

³⁰ Owu mini Jōni, o hiri n'oligwe mobu n'aka badnu? Anu sa m."

³¹ Be kwu a n'esilawuru be, kaa, "O buru nu a kaa, 'O hiri n'oligwe,' o jaasikwa ai, 'Kini mernu anu kwéle a?"

³² Kovu o buru nu a kaa, 'O hi n'aka badnu..' " (Be notu ogwnu ele badnu kwnornu nu kpakara badnu kweru

nụ Jóni bụ nye ọwhnurninya n'ezi.)

³³ Be sarụ Jizọsi, “A máa.”

Jizọsi kanụ be, “M jáaka masịnu anụ rẹwhna rikne me ji neeme kpakara nhne ka.”

12

Elulu ele ernalu ọkwu vaịni

(*Mat 21:33-46; Luk 20:9-19*)

¹ Jizọsi panizo nookwunu be ọka n'elulu, “Otu nyerukna kparụ vaịni, ọ gba a mgbugba gburugburu. O gwu igbodo hne be zosna mkpuru isisi. O wuru ọro olu ele nse, o gweru ọkwu wam yisi n'aka ele jeelekota a, whoga zne n'eli berere.

² Nga ige ọ gho mkpuru duru, o ziznenu ele ernalu ọkwu wam otu ọhi, ma ọ nahia be agwna mkpuru hi n'ekwu wam.

³ Be nwugwu a, pnia nhne, zihala a n'aka etekne.

⁴ O zizne kwno ọhi berere, be liwa nye ki risi, mee kwno a nhne iwhnerne.

⁵ O zizne kwno nye berere, be gbu nye ki, nụ agida ele berere, be pnia agwna nhne, gbu agwna be.

⁶ “Nyerukna wam nwernu otu badnu ke gwnarnu, bu nnwo ọ whnurnu n'anya, o zizne a n'ipne-aznu, kaa, ‘Be jiosobisinu nnwo m.’

⁷ “Kovu nụ ele ernalu ọkwu wam kwuritaru n'esilawuru be, ‘Ka bụ nye jeeri mkpe nye nwe ọkwu ka, anụ va ma a gbu a, nhne mkpe a jọbu ke ai.’

⁸ Be nwugwu a gbu a, tuwhume a n'aznu ọkwu wam.

⁹ “Kini bụ nhne nye nwe ọkwu wam jeeme? Ọ jaava, gbumekwo ele ọkwu wam, gweru ọkwu wam nyewhete n'aka ele berere.

¹⁰ Anụ gwnuna nhne be gbarụ n'okwukwo nso, ‘Akaworugwu ke ele noowu ọro juru, kiyam gholam risi nsukala ọro.

¹¹ Ka bụ ernalu Nyenwe ai, ọ bụ nhne ndu-ehni n'anya ai?”

¹² Be pio kpa be jionwugwu a, kwnornu nụ be mahiaru nụ be bụ ele o kwno tnu elulu ka. Kovu nụ be turu ogwnu agida ele badnu wam, be gharu a lahna.

Otu ntu-eli

(*Mat 22:15-22; Luk 20:20-26*)

¹³ Be ziznenu a agwna ele Farisi nụ ele dagwunu Erọdu ma be nwugwu a n'ikwu-onu a.

¹⁴ Be vaa, kanu a, “Nye-zni-nhne, a magwu nụ i kwu ezi ọka, i so badnu anya, kwnornu nụ i le badnu anya nụ ruwhnu, kovu i neezni apna Chiokike n'ezizni ọka, ọ buru oma n'iwu a tu ntu nyee Siza, sobu nụ ọ buo oma? A tu sobu a tu?”

¹⁵ Jizọsi mahiaru ruwhnu lawuru be. Ọ kanu be, “Anu kwno kini naakpa m iru? Gweyanu m otu mkpuru iwai me ledu a anya.”

¹⁶ Be gweyanu a, ọ sikwa be, “Nyele nwe ruwhnu nụ rẹwhna ka?”

Be kaa, “Siza nwe.”

17 Jizosi kanu be, “Anu nyee Siza nhne ke Siza, nyee masi Chiokike nhne ke Chiokike.”

O du kpakara be eñni nu hne o zi.

Ajji gbasiri olizo n'enwu

(Mat 22:23-33; Luk 20:27-40)

18 Ele Sadusi, ka bu ele karu nu olizo n'enwu za, vakwnusi Jizosi, sika a,

19 “Nye-zni-nhne, Mozizi gbaru n'okwukwo nyee ai, kaa, ‘O buru nu nwene rukna nyerukna nwu, ghasa nnwerne a, kovu nu o nwée rumu, nwene a rukna jooluru nnwerne a muhianu nwene a rukna rumu.’

20 Rumu nne esau zi, ke mbom luru nnwerne nwuma, nwée nnwo,

21 ke ebo kwuru a, o nwu masi, o nwée nnwo, ke eto masi otu aka wam.

22 Ele rukna esau wam nwée nnwo, n'ipne-aznu kpakara be nu nwerinya wam nwukparu.

23 N'olizo n'enwu, nyerinya wam o jobu nnwerne nyele n'esilawuru be, kwnornu nu be esau luru a nu nnwerne?”

24 Jizosi saru be, “Anu gahieru apna, anu maá nhne be gbaru n'okwukwo nsó, mambu rikne ke Chiokike.

25 Kwnornu nu nga be jeehi n'enwu lizo, be lu nnwerne, be gbó nzi, kovu nu be nu lele ele enine izi n'oligwe.

26 Nu nhne gbasiri olizo n'enwu ke ele nwurru onwu, anu gwnuna n'okwukwo Mozizi nu hne be gbaru nhne gbasiri isisi mati wam neerne

bekwunu, kpa Chiokike jiri kanu a, ‘Mawa bu Chiokike ke Eberham, nu Chiokike ke Aziki, nu Chiokike ke Jekopu?’

27 O buo Chiokike ke ele nwurru onwu, kovu Chiokike ke ele zi budnu. Anu naagahie apna k'agida.”

Iwu ke kakwo ibne a

(Mat 22:34-40; Luk 10:25-28)

28 Otu nu rime ele zni iwu ele Ju varu, nu hne be nesikwarita eñni be ajji, o mahiaru nu Jizosi sakwaru be nkari, o sika a, kaa, “Ndaa ke bu ke mbom nu kpakara nhne be nyernu n'iwu?”

29 Jizosi saru a, kaa, “Ke mbom bu ka, ‘Anu bnote nsni Izireli, Nyenwe ai Chiokike ai, Nyenwe ai bu otu.

30 I jowhnu Nyenwe ai bu Chiokike i n'anya, hite nu kpakara mkpoma i, hite nu kpakara enine i, hite nu kpakara oriri i, hite nu kpakara iknernema i.’

31 Ke ebo bu ka, ‘I jowhnu nye agbatibi i n'anya lele eñni i.’ O za nhne berere be nyernu n'iwu ke kakwo ka.”

32 Nye zni iwu ele Ju wam kaa, “Owe! Nye-zni-nhne, i kalam n'ezi nu o bu otu Chiokike, nu o za nye berere, okwolem ya,

33 nu o whnu a n'anya hite nu kpakara mkpoma i, hite nu kpakara oghohia i, hite nu kpakara iknernema i, nu o whnu nye agbatibi i n'anya lele eñni i, kakwo kpakara arihna okporne bekwunu nu arihna berere.”

³⁴ Nga Jizōsi whnurnu nū ọ sakwayarū a lele nye nwernu akoniche k'ezi, ọ kanū a, “I zila ikere nū hne ẹli-eze Chiokike zi.”

Nga ka wheru, ọ zima nye berere nwernu rikne sika a ajiji berere.

Karaisi bu nnwo nyele?

(*Mat 22:41-46; Luk 20:41-44*)

³⁵ Nga Jizōsi neezni nhne n'Oro Nso Chiokike, ọ sika waru, “Ndaa kpa ele zni iwu ele Ju jiri naakaa nū Karaisi bu Nnwo Devidi?”

³⁶ Enine Nso hiri n'onu Dev-idi kwu oka, kaa,

‘Nyenwe aji kannu Nyenwe m,
Daziri ẹli n'akarikwnungam,
tem du nga me jaabita ele irno i
nu mkpururu ochi i lawuru.’

³⁷ Devidi n'iwuhuru a noosukwu a Nyenwe a, ndaa kpa o jeeji buru nnwo Devidi?”

Anu zeru ele zni iwu ele Ju

(*Mat 23:1-36; Luk 20:45-47*)

Agida ele badnu wam jiri snarnima nurnu ikwu-onu a.

³⁸ Kpa Jizōsi neezni nhne, ọ kaa, “Anu zeru ele zni iwu ele Ju, ele ọ naamasị be o wo iwo awura ogologo naagaghari, ọ naamasị be ele badnu neebekwu be ikwu n'ahia,

³⁹ nu ọ dazi nu risi ngadna n'oro ọgbako ele Ju, ma nu ngadna kakwo mma n'ọgbako iriri anu.

⁴⁰ Be bu ele neeridna oro ele rinya nzi be nwurnu, neekpe ogologo okpukpe ma ele badnu whnu be. Be jaata awhnwhnu ke kakwo.”

Nkesi ke nwerinya nzi a nwurnu
(*Luk 21:1-4*)

⁴¹ Jizōsi daziri n'Oro Nso Chiokike kete ruwhnu nu hne be bitaru nhne ntu, ọ whnurnu agida ele badnu hne be notusi iwai nu nhne be notubna iwai. Agida ele kwu notusi k'agida.

⁴² Otu nyerinya, bu womboni ke nzi a nwurnu varu, tubna mkpuru iwai matị lawuru, ke whuyaru iwai matị.

⁴³ O sukwu ele sno apna a, kanu be, “Me kanu anu ezi oka, nwerinya ka bu womboni ke nzi a nwurnu, tusiri iwai kakwo ke kpakara ele berere tubnarnu hne be bi iwai.

⁴⁴ Kpakara be masiri aka n'agida ekwnu be nwernu gweboru tisi, kovu nu ya, womboni wam, tusikworu kpakara nhne o nwernu o jiri wuru.”

13

Be joolulu Oro Nso Chiokike

(*Mat 24:1,2; Luk 21:5,6*)

¹ Nga Jizōsi whuyaru n'Oro Nso Chiokike, otu nu rime ele sno apna a karu, “Nye-zni-nhne, le kpa oro ele ka nu akaworugwu be jiri wu be nu mma.”

² Jizōsi saru a, “I whnuna kpakara oro kwu ele ka? Otu akaworugwu jogwuzo n'olu

ibne a hna, be jaakwnadna kpakara be n'eli."

Mmekpèhni nu

òkpakna èhni

(Mat 24:3-14; Luk 21:7-19)

3 Nga o daziri eli n'olu Rugwu Olivu ke kegwu ruwhnu n'Oro Nso Chiokike, Pita nu Jemisi, nu Joni, nu Anduru, sika a ichne, kaa,

4 "Kanụ aị nga kpakara nhne ele ka jeeme. Kini jeegesi ige nhne ka jeemezu?"

5 Jizosi kanụ be, "Anyị dū anụ eli, o zị nye obula duhie anụ."

6 Kwnornu nu agida ele badnu jaava nu rewhna m, naakaa, 'Mawa bu Karaisi,' be jooduwu agida ele badnu.

7 Nga anụ jonu ogwnu nu otutnu ogwnu, anụ tuko ogwnu. Kpakara nhne ka jeebe osno mee, kovu okwukwo nhne yooduge.

8 Mba jeelizo megidne mba berere, eli-eze jeelizo megidne eli-eze berere, eli otne enye jaazi nu hne zị odo n'odo, okwnunyo jaazi. Kpakara nhne ka jonu lele opanizo igbugbu omumu nnwo.

9 "Kovu anyị dū anụ eli hne anụ zị. Be jeegweru anụ nyee n'aka ele ikpe zị odo n'odo, be jaapni anụ nhne n'oro ogbako ele Ju zị odo n'odo, anụ joogwuzo nu ruwhnu ele risi nu ele eze kwnornu nu me, ma o buru nhne akebe.

10 Be jeeberu osno kpo okwo izi oma nu kpakara mba.

11 Nga be nwugwuru anụ gweya anụ n'oro ikpe, anụ

béekwadia osno rigbu ehni anụ n'oriri nhne anụ jaakaa. Anụ kwu nhne obula Chiokike karu anụ kwu ige wam, kwnornu nu Enine Nso jookwunu anụ onu anụ.

12 Nwene jeegweru nwene a nyee n'aka enwu, nda jeegweru nnwo a nyemako. Rumu jeelizo megidne ele muru be, mee ma be nwu enwu.

13 Kpakara ele badnu joosno anụ irno kwnornu nu me. Kovu be jooznohia nye obula ke jaaknata mkpoma, dazigidne dū okwukwo kpakara nhne.

*Awhnuwhnu ke
ele Jeruselem jaata*

(Mat 24:15-28; Luk 21:20-24)

14 "Nga anụ jowhnu nhne ruru oru ke zị nu hne o kwésile o zị, nye noogwnu nhne ka, ghohia, ele zị nu eli Judiya n'ige wam gbazne n'olu rugwu.

15 Nye ke zị n'olu oro, o hiednako, mabu bna nu rime oro zne kwahala nhne zị nu rime oro a.

16 Nye zị masi n'ekwu, o lánna aznu zne chiri iwo a.

17 Awhnuwhnu jaazinu ele rinya zị rime nu ele neechi nnwo rema n'ige wam.

18 Anụ kpe okpukpe o buko n'ige okirika.

19 Kwnornu nu ige wam agida mmekpèhni jaazi ke zikolele ke nga owa ke Chiokike kpuru panizoru dū kitna, owe, o jaazi kwno berere.

20 O buru nu Nyenwe aı méne obochi wam zı ichichi, o zá badnu obula be jooznohiali. Kovu kwnornu nu ele o hohiaru, o mernu obochi wam zıri ichichi.

21 “N’ige wam, o buru nu badnu obula jaakanu anu, ‘Le, Karaisi zı hna,’ mōbu ‘O zı piari,’ anu kwéko.

22 Karaisi aghalaghala zı odo n’odo, nu ele owhnurninya aghalaghala zı odo n’odo jowo iwhe, neegesi nhne elekema nu nhne ndu-ehni zı odo n’odo, ma be duwhu ele Chiokike hohiaru, o buru nu o jeekwe omume.

23 Kovu anya du anu eli, m bele m osno kakwnonu anu kpakara nhne nga be yémene eme.

Nnwọ ke Badnu vawa

(Mat 24:29-31; Luk 21:25-28)

24 “N’ige wam, nga mmekpehni wam whe-mernu,

‘Ehnam jaagba ochichiri, enwa jéenye iwhe a,
25 mbọ ke oligwe jaadna, kpakara iknernema ke zı oligwe jooonio ohnio.’

26 “N’ige wam be jowhnu Nnwọ ke Badnu hne o naava n’okne iknernema nu igwugwu.

27 O jeezihala ele enine izi a be hite nu ruwhere eno k’owa chikota ele ke a Chiokike hohiaru, hite n’otu osotoma owa du n’osotoma berere.

Muhia nhne hite n’isisi be kwu figi

(Mat 24:32-35; Luk 21:29-33)

28 “Anu muhia nhne hite n’isisi figi. Nga nkala a zılam pialı pialı, nooruhia ması okwukwo ikne, anu mahia nu nduru-mini zı ndundu.

29 Kpam ması, nga anu jowhnu kpakara nhne ka hne be beteru neeme, anu mahia nu n’ige wam zı ndundu, n’onu-mgbo.

30 Me kanu anu ezi oka, ebiri ka jéewhe rıa rıa tem kpakara nhne ka mezu.

31 Oligwe nu owa jaagawhe, kovu kpakara ikwu-onu m jaagawhe rıa rıa.

O zá nye magwu obochi wam

(Mat 24:36-44)

32 “Kovu o zá nye magwu obochi wam mōbu otu-ige wam, ele enine izi zı n’oligwe máa ması, Nnwọ wam máa ması. Okwolem Nda m kpọi bu nye magwu.

33 Anya du anu eli, anu se nse, kpe okpukpe, kwnornu nu anu máa nga ige jaava.

34 O nu lele hne badnu neezne nhne, nga o n’owhoga n’oro a, o nyewhete oro a n’aka ele ohi a, ma be legidne a anya. O nyee kwno nye obula nhne o j’ornu, nyee ması nye ke zı n’onu-mgbo iwu o se nse.

35 Kam kpayaru, anu neese nse, kwnornu nu anu máa nga nyenwe oro jaava, mōbu n’anyasnu, mōbu n’esilawuru abalı, mōbu ige ochichi kw-narnu ekwina, mōbu n’osisi.

36 Anu se nse, o zı o va kpu-rugadnam, whnu hne anu neezni anyarna.

37 Nhne me naakanu anu bu nhne me naakanu kpakara badnu, anu se nse.”

14

Be gbaru iznuznu

o gbu Jizosi

(Mat 25:1-5; Luk 22:1,2; Jon 11:45-53)

1 O gwnarnu obochi lawuru o du Iriri Ogawhe nu Iriri Bredi Whuge Owhu. Ele risi ariohna nu ele zni iwu ele Ju noopio apna be jonwugwu Jizosi n'aghigo, ma be gbu a.

2 Be karu, “Kovu o jobu n'Iriri ka, o zi a kpasu ohna.”

Be teru Jizosi mono

nu Betani

(Mat 26:6-13; Jon 12:1-8)

3 Nga Jizosi zi nu Betani n'oro Saimoni nye riaru nchnichna, o dazi neeri wiri. Otu nyerinya bnaryarnu, nye vu mono otute zi n'ite alabasita gburu onu be ji eknarna nadi zi snam mee. O liwama ite wam, wusi mono otute wam nu risi Jizosi.

4 Agwna ele zi pi weru ehni k'agida naakaa, “Kini kpayaru be wuwuru mono otute ka etekne?”

5 Be znernu ere ya riwhu mkpuru iwai eto nyee ele mboni.” Be naatamunu nwerinya wam.

6 Jizosi kanu be, “Anu gharu a! Ndaa nhne anu kwno neemekpa a ehni? O rnurnu ernu oma n'ehni m.

7 Ele mboni nu anu zi ige obula, ige obula anu pioru, anu nwernu rikne menu be nhne oma, kovu nu anu jeenwehia m ige obula.

8 O mernu nhne o nwernu rikne o mee. O beru osno te ehni m mono, bikwata m n'olili m.

9 Me kanu anu ezi oka, hne nu hne obula be kporu okwo izi oma ka nu kpakara owa, be jookwuhia nhne nwerinya ka mernu, ma o buru nhne be jeeji neechenwanya a.”

Judası kweruru o re Jizosi

(Mat 26:14-16; Luk 22:3-6)

10 Judası Isikarioti, otu nu rime nri nu badnu lawuru ele sno apna a, znekwnusiri ele risi ariohna, ma o gweru Jizosi nyee n'aka be.

11 Nga be nurnu a, be nwudnarnu, be kwe o nyee a iwai. O bete o pio oghere o jeegweru Jizosi nyee be.

Jizosi nu ele sno apna a riri Iriri Ogawhe

(Mat 26:17-25; Luk 22:7-14,21-23; Jon 13:21-30)

12 N'obochi mbom ke Iriri Bredi Whuge Owhu, nga be naakwa ariohna atnurnu Ogawhe, ele sno apna a sikwa Jizosi, “Ndaa hne i pioru ma a mekwatanu i ma i ri Iriri Ogawhe?”

13 O zihala badnu lawuru nu rime ele sno apna a, o kanu be, “Anu zne nu rime Jeruselem, otu nyerukna vugwu idudu mini jaavakwnusi anu, anu sno a.

14 Anu snornu a zne n'oro obula o bnaznenu, anu kanu nyenwe oro wam, 'Nye-zni-nhne karu, Ndaa hne oro ele izne m zi, hne me nu ele sno apna m jeeri Iriri Ogawhe?”

15 O jeegesi anu otu onu-oro zi rude n'oro olu be mekwataru, bikwata masi. Anu mekwatanu ai pii."

16 Ele sno apna a whoga, bna nu Jeruselem whnukpa kpakara nhne lele kpa Jizosi karu. Be mekwata Iriri Ogawhe.

17 N'ogbednachi, Jizosi nu nri nu badnu lawuru ele sno apna a snornu va.

18 Nga be daziri eli neeri wiri, Jizosi kaa, "N'ezime kanu anu, otu badnu n'esilawuru anu, bu nye me nu a neeriko wiri, jeere m."

19 O panizo noogbu be igbugbu n'ovu, be neesikwa a n'otu n'otu, "O bu mawa sa?"

20 O kanu be, "O bu otu nyenum nu rime anu nri nu badnu lawuru, nye me nu a noosnukota wiri n'otu agbugba wiri.

21 Nnwọ ke Badnu jaala lele kpa be gbaru a n'okwukwo nsọ gbasiri a, kovu nu awnhuwhnu jaazinu nyerukna wam be jeehi n'aka a re Nnwọ ke Badnu. O buru oma o buru be muna nyerukna wam."

Wiri Anyasnu Nyenwe ai

(Mat 26:26-30; Luk 22:14-20; 1 Kor 11:23-25)

22 Nga be zi neeri wiri, Jizosi gweru bredi, tunu Chiokike mmamma, nyawama a, nyee ele sno apna a, kaa, "Anu gweru, ka bu ano-ehni m."

23 O gweru okiko, tu mmamma o nyee be, kpakara nwornu nu rime a.

24 O kanu be, "Ka bu ovnarna m ke ogba-njo-ehni be nowusi kwnornu agida badnu.

25 N'ezime kanu anu, m joonwoma m manya hi n'isisi vaini whuya ria ria tem du n'obochi me joonwo a ke ikne n'eli-eze Nda m."

26 Nga be gwnukparu eri, be whoga zne nu Rugwu Olivu.

Jizosi karu nu Pita jooonahoru a

(Mat 26:31-35; Luk 22:31-34; Jon 13:36-38)

27 Jizosi kanu be, "Kpakara anu jaagbakwo eso, kwnornu nu be gbaru a n'okwukwo nsọ, kaa,

'M joogbu nye nooznu atnurnu, atnurnu a jaagbakeme.'

28 Kovu nga me hiri n'enwu lizo, m jeebe anu osno zne Galili."

29 Pita kanu a, "O burubedi nu kpakara badnu gbakwo eso, kovu m jaagba eso."

30 Jizosi kanu a, "N'ezime naakanu i, n'abalı ka, nga okne ochichi naakwnana ekwna mgba lawuru, i jooonahoru m mgba eto."

31 Kovu o kwusiri rikne k'agida kaa, "O buru nu o zi mkpa nu m joosno i nwu, m jooonahoru i ria ria." Kpakara be kakwnornu k pam.

Jizosi kperu okpukpe nu Gesevani

(Mat 26:36-46; Luk 22:39-46)

32 Be vadu nu hne be kwu Gesevani, Jizosi kanu ele sno

apna a, “Anụ daziri hna, me kpe okpukpe.”

33 O kwuru Pita nụ Jemisi nụ Jōni, ọ panizo o gbu a igbugbu nụ o wute a nụ mkpoma.

34 O kanụ be, “O noogbu m mkpoma m igbugbu k'agida dụ ẹnwu, anụ dazigidne hna, se nse.”

35 O znetu nụ ruwhnu, dna kpu ruwhnu n'eli kpe okpukpe, ma ige awghnuwhnu ka gawheru a, ọ bụru nụ o jeekwe omume.

36 O kaa, “Papa, Nda m, i meli nhne dum, gwemenu m okiko awghnuwhnu ka, kọvu ọ bụo nhne me pioru, kọvu nhne i pioru.”

37 O va whnụ hne be neezni anyarna, ọ kanụ Pita, “Sajmoni, i neezni anyarna? I nwée rikne se nse otu ọtnu-ige?

38 Anụ se nse, kpe okpukpe, ọ zị anụ dnabna nụ rime ọrnurna. Enine ke badnụ zị bẹkwnu, kọvu nụ anọ-ẹhni zila rikne.”

39 O zne kwno berere kpe okpukpe, nookwu otu ọka wam.

40 O yahna berere whnụ ele sno apna a hne be neezni anyarna kwnornu nụ anya be zị rinya, be máa nhne be jaasa a.

41 O va ke mgba ẹto, ọ kanụ be, “Anụ zị koriri neezni anyarna, noozukwa inwe? O kwna kpam, ọ dulam, be neegweru Nnwọ ke Badnụ resi n'aka ele mmehie.

42 Anụ lizo, ma a zne. Le nye neegweru m nyee zị ndundu.”

Be nwudnernu Jizosi

(Mat 26:47-56; Luk 22:47-53; Jōn 18:3-12)

43 Ngangam Jizosi kpugwu ọka wam n'ọnu, Judasi, otu nụ rime nri nụ badnụ lawuru wam ele sno apna a varu, ya nụ agida badnụ ele ji ama-ogwnu nụ okpiri hite nụ hne ele risi ariohna nụ ele zni iwu ele Ju nụ ele okno badnụ zị va.

44 Nye reru a nyenem be nhne elekema, kaa, “Nye ọbula ke me joosnutu ọnu nye wam bụ ya, anụ nwugwu a, duru a zne.”

45 Ngangam Judasi varu, o znekwusi Jizosi, sukwu a, “Nye-zni-nhne.” O snutu a ọnu.

46 Be tukwasi Jizosi aka, nwugwusi a rikne.

47 Otu n'ele gwuzogwu ndundu mniohiaru ama-ogwnu a, gbu nye izi nye risi ariohna, bihala a nsni.

48 Jizosi kanụ be, “Anụ kpagwu ama-ogwnu nụ okpiri whuya ọ nwugwu m lele m bụ m nye neemegidne iwu ẹli?

49 Kpakara ọbochi me nụ anụ zị n'Oro Nso Chiokike hne me neezni anụ nhne, anụ nwúge m, kọvu kpakara nhne ka mernu ma nhne be gbaru n'okwukwo nsọ mezu.”

50 Kpakara ele sno apna Jizosi ghasaru a gbawhu.

51 Otu wikoro snogwu Jizosi, nye ji iwo abochna kpusni ẹhni a. Be nwugwu a,

52 ọ sigbasi iwo abochna a, gbaru ẹto gbawhu.

*Jizosi gwuzo nı ruwhnu
ele eze-ikpe*

(*Mat 26:26,57-68; Luk 22:54,55,63-71; Jon 18:13,14,19-24*)

⁵³ Be duru Jizosi znekwnusi nye risi ariohna, kpakara ele risi ariohna nı ele okno badnı nı ele zni iwu ele Ju gbakoru.

⁵⁴ Pita snornu a nı hne zı ikere, bna nı rime ederezi nye risi ariohna, o daziri n'esilawuru ele nse, naanya bekwnu.

⁵⁵ Ele risi ariohna nı kpakara ele eze-ikpe pioru nhne be ji gbagidne Jizosi akebne ma be gbu a, be piohjala.

⁵⁶ Agida ele badnı gbarı akebne aghalaghala gbagidne a, kovu nı akebne be buo otu.

⁵⁷ Agwna be lizo, gba akebne aghalaghala gbagidne a, naakaa,

⁵⁸ "A nurnu hne o karı, 'M jaakwnadna Oro Nso Chiokike ka be jiri aka wu, n'obochi eto m joowu Oro Nso berere ke be jile aka wu.'"

⁵⁹ Kovu nı akebne be dnakotala.

⁶⁰ Nye risi ariohna lizoru n'esilawuru be sikwa Jizosi, kaa, "O za nhne i naasa? Kini bu akebne ka ele badnı ka naagbagidne i?"

⁶¹ Kovu Jizosi kpusnirnu onu, o za nhne o sarı. Nye risi ariohna sikwa kwno a, "O bu jiwa bu Karaısi, Nnwı Chiokike be goziri ogozi?"

⁶² Jizosi kaa, "O bu mawa, anı jowhnu ması

Nnwı ke Badnı hne o dazı n'akarikwnunga Chiokike ke bu Dikne, naava ması n'erumeru oligwe."

⁶³ Nye risi ariohna dowama iwo a, kaa, "Ndaa nhne a kwno noopio ele akebne berere?"

⁶⁴ Anı nurnu okwulu wam o kwuru kwugidne Chiokike, kini bu echiche anı?"

Kpakara be marnı a ikpe enwu, kaa, "O kwesiri o nwı enwu."

⁶⁵ Agwna be panizo o gbısi a onu-mini, nı o knesni a ruwhnu, noogbo a aka, naakanı a, "Whnunu ai owhnurninya." Ele nse donawhuru be Jizosi, noogbo aka.

Pita gonahoru Jizosi

(*Mat 26:69-75; Luk 22:56-62; Luk 18:15-18,25-27*)

⁶⁶ Nga Pita zı nı ederezi, otu nnwı oknornokno ele neeznenu nye risi ariohna izi varı.

⁶⁷ Nga o whnurnu Pita naanya bekwnu, o le a anya, kaa, "Ji n'iwihuru i nı Jizosi nye Nazarıti zı."

⁶⁸ Kovu o gorı kaa, "M maam, m ghohjala m nhne i naakaa." O whoga zne n'onumgbo, okne ochichi kwna ekwna.

⁶⁹ Woknornokno wam whnı a, o naakanı kwno ele gwuzo ndundu, "Nwerukna ka bu otu nı rime be."

⁷⁰ Pita go kwno berere.

Nga ige matı whemernu ele gwuzo ndundu kanı Pita berere, "N'ezi, i bu otu nı rime be, kwnornu nı i bu nye Galili."

⁷¹ O panizo nogo nguḡo, nḡodu risi, naakaa, “M máam nyerukna ka anu nookwu oka a.”

⁷² Ngangam, okne ochichi kwnarnu ekwna ke mgba lawuru. Pita chenwanya ikwu-onu wam Jizosi kwunnu a, “Nga okne ochichi yaakwnana ekwna mgba lawuru, i jḡogonahoru m mgba eto.” Nga o chenwanyarnu a, o kwna ekwna.

15

Jizosi gwuzo nu ruwhnu Paileti

(*Mat 27:1,2,11-14; Luk 23:1-5; Jon 18:28-38*)

¹ N'onu osisi, ele risi arjohna nu ele okno badnu nu ele zni iwu ele Ju nu kpakara ele eze-ikpe gbaru iznuznu, be kne Jizosi eriri, duru a zne, gweru a nyewhete n'aka Paileti.

² Paileti sikwa a, “I bu eze ele Ju?”

Jizosi saru a, “Owe! Ji niwhuru i karu kpm.”

³ Ele risi arjohna noobno a agida nhne.

⁴ Paileti sikwa kwno a berere, “O za nhne i naasa? Le agida nhne be noobno i.”

⁵ Kovu Jizosi sala nhne obula. Ka duru Paileti ehni.

Be marnu Jizosi ikpe enwu
(*Mat 27:15-26; Luk 23:13-25; Jon 18:39--19:16*)

⁶ N'Iriri Ogawhe obula Paileti nesigbasinu be otu nye ikelu, nye be rioru a.

⁷ Otu nye zi n'ikelu be nookwu Barabasi nye zi n'ikelu ya nu ele lizoru lusi

ele risi ochichi ogwnu. O gburu badnu n'ogwnu wam.

⁸ Agida ele badnu wam panizo norio Paileti ma o menu be lele kpa o ji neemenu be.

⁹ Paileti sikwaru be, “Anu pi-oru me sigbasinu anu eze ele Ju?”

¹⁰ O mahari nu ele risi arjohna kwuyannu a Jizosi kwnornu owho-anya.

¹¹ Kovu ele risi arjohna sigidnenu igbudu ele badnu wam be kaa o sigbasinu be Barabasi, o buo Jizosi.

¹² Paileti sikwaru berere, “O bu kini nhne anu pi-oru me mee nye wam anu nookwu eze ele Ju?”

¹³ Be siwama okokoba berere, “Kpogidne a n'ogba.”

¹⁴ Paileti sikwa be, “Kini mernu? Kini bu nhne ojo ke o mernu?”

Be siwama okokoba ke kakwo, “Kpogidne a n'ogba.”

¹⁵ Kpa Paileti pi-oru o mee nhne jaamasi agida ele badnu wam, o sigbasinu be Barabasi. Nga o pniakworu Jizosi nhne, o gweru a nyewhete be ma be kpogidne a n'ogba.

Ele ogwnu kpariri Jizosi
(*Mat 27:27-31; Jon 19:2,3*)

¹⁶ Ele ogwnu duru Jizosi bna n'obna nye ochichi. Be suk-wukota kpakara odobiri ele ogwnu.

¹⁷ Be wosi a iwo naachna odno odno, be kpa okpu igwnu, kpusi a nu risi.

¹⁸ Be panizo neebekwu a, naakaa, “A bekwulem ji, Eze ele Ju.”

19 Be gweru isisi neeli a nu risi, n'ogbu a onu-mini, gbu mpnerne ochi n'eli, kponu a risi eli.

20 Nga be mekworu a nhne rumu, be tuma a iwo odno odno wam, wosi a kpakara iwo a. Be duru a zne ma be kpoğidne a n'ogba.

Be kpoğidneru Jizosi n'ogba

(*Mat 27:32-44; Luk 23:26-43; Jon 19:17-27*)

21 Be sigidne otu nye neewhe ewhe, kanu a, o vuru ogba a. Nye ka bu Saimoni nye Sirini, nda Alekizanda nu Rufosi, hne o hi n'aznu mba naabnanya Jeruselem.

22 Be duru Jizosi zne nu hne be kwu Golugota, ke bu "Hne Okpokoro Risi."

23 Be nyega a manya be gwaru maa, kovu nu o nwona a.

24 Be kpoğidne a n'ogba, ele ogwnu ke iwo a n'esilawuru be nga be vukworu ogbanuchi ke gesiri ke nye obula jeegwe.

25 O bu nu otnu-ige tolu* n'osisi nga be kpoğidneru a n'ogba.

26 Be gbaharu nhne be bnornu a, "Eze ele Ju."

27 Be kpoğidneru ya nu ele rukna lawuru nooznu buznu n'olu ogba, otu badnu n'akarikwnunga a, nye ke berere n'akarita a. [

28 Nhne be gbaru n'okwukwo nsò mezuru ke karu, "Be gwnukotaru ya n'ele aruru-eli."]

29 Ele naagawhe naakaja a, neewhnuwhne risi be, naakaa, "Ngwanu! Ji nye jaakwnadna Oro Nso Chiokike, wu kwno a n'obochi eto.

30 Znòhia ehni i, hi n'olu ogba hiedna."

31 O bu masi kpa ele risi arìohna nu ele zni iwu ele Ju naakpari a n'esilawuru be, naakaa, "O znòhiaru ele berere, o nwée rikne znòhia ehni a.

32 Karaisi eze Izireli, hi n'olu ogba hiedna kitna, ma a whnu, kweru masi."

Ele be kpoğidneru be nu Jizosi n'olu ogba zi masi naakpari a.

Enwu Jizosi

(*Mat 27:45-56; Luk 23:44-49; Jon 19:28-30*)

33 Hite n'esilawuru iwhnehníe,† ochichiri gbasnirni kpakara eli wam du n'otnu-ige ke eto.‡

34 N'otnu-ige ke eto, Jizosi jiri okne nkoli siwama, "Eloi, Eloi lama sabatani," ke bu, "Chiokike m, Chiokike m, kini mernu i ghasaru m?"

35 Agwna ele gwuzogwu ndundu, nga be nuru a, be naakaa, "Bno nsni, o noosukwu Elaija."

36 Otu nyenum gbaru eso, gweru manya gbaru oka rusi sponji ke zi n'isisi nu rime a, nyee Jizosi ma o nwo, kaa, "Gharu a, a lesi ma Elaija jaava o gwedna a n'ogba."

* 15:25 otnu-ige tolu: okwukwo ke mbom kwuru ige awa ke eto † 15:33 n'esilawuru iwhnehníe: okwukwo ke mbom kwuru ige awa isunu ‡ 15:33 otnu-ige ke eto: okwukwo ke mbom kwuru ige awa tolu

³⁷ Jizosi gweru okne nkoli si okokoba, nwebime inwe.

³⁸ Ikpe obnosni ke Oro Nso Chiokike gbawaru ebo hite n'olu du eli.

³⁹ Nga nye risi ogwnu nęechi otu riwhu ele ogwnu gwuzo ndundu kela ruwhnu hne o zi, whnurnu kpa o jiri kna inwe, o kaa, "N'ezi, nyerukna ka buri Nnwọ Chiokike."

⁴⁰ Ele rinya zi ikere neelekiri nhne neeme, agwna be bu Meri Magidalini, nu Meri nne Jemisi ke mati nu Josis, nu Salomi.

⁴¹ Ele ka snornu Jizosi nga o zi nu Galili, ele neeznenu a izi. Nu agida ele rinya berere ele snornu a va Jeruselem.

Be liri Jizosi

(*Mat 27:57-61; Luk 23:50-56; Jon 19:38-42*)

⁴² Nga o duru ogbednachi, hne o bu obochi ojiknernu, ke bu obochi begwu Obochi Ozukwa Inwe osno,

⁴³ Josefu nye Arimatiya varu, nye bu otu nu ele ikpe, bu masi nye be nosobisinu, nye neese eli-eze Chiokike, nwerukna ka ji anya rikne zneknwusi Paleti rio a iznu Jizosi.

⁴⁴ O gbagwojiri Paleti anya nu Jizosi nwunam. O sukwu nye risi ogwnu wam sikwa a ma o nwuna.

⁴⁵ Nga o mahiaru n'onu nye risi ogwnu wam nu Jizosi nwunam, o kweru be vute Josefu iznu a.

⁴⁶ Josefu zuya ikpe marnu mma, nga o vudnarnu iznu a, o whu a n'ikpe marnu mma wam, vubna a nu rime ilili ke

be gwuhiaru nu rime rugwu. O gweru otu rugwu kpusni onu ilili wam.

⁴⁷ Meri Magidalini, nu Meri nne Josis whnurnu hne o liri a.

16

Jizosi lizoru n'enwu

(*Mat 28:1-8; Luk 24:1-12; Jon 20:1-10*)

¹ Nga Obochi Ozukwa Inwe wheru, Meri Magidalini nu Meri nne Jemisi, nu Salomi, zuyaru mono neesni eknarna oma zi odo n'odo ma be zne te iznu Jizosi mono.

² N'onu osisi n'obochi mbom n'ikwezu, be znernu n'ilili a nga ehnam waru.

³ Be nookwurita n'ehni be, "Nyele jookpumenu a rugwu wam n'onu ilili?"

⁴ Nga be lelizoru anya be whnurnu nu be vumenem rugwu wam. O zi rinya k'agida.

⁵ Be bna rime ilili whnu wikoro dazigwu n'akarikwnunga, o wogwu awura abochna, ogwnu turu be.

⁶ O kanu be, "Ogwnu tuko anu. Anu noopio Jizosi nye Nazareti, nye be kpoqidnernu n'ogba. O lizolam, o zila hna. Le hne be bitaru a.

⁷ Kovu anu la, kanu ele sno apna a nu Pita, 'O belem anu osno neezne Galili, anu jowhnu a pii, lele kpa o kannu anu.' "

⁸ Be whoga, hi n'ilili wam gbahala, ehni naama be ririri nu ogbagwoji anya jigwu be, o za nye be kannu nhne obula, kwnornu nu ogwnu notu be.

*Jizosi mernu Meri
Magidalini
whnu a anya
(Mat 28:9,10; Jon 20:11-18)*

[
9 Nga Jizosi hiri n'enu lizo n'onu osisi n'obochi mbom n'ikwezu, o beru osno gesi ehni a Meri Magidalini, nye o chihalaru renwu ojo esau nu rime a.

10 O zne kanu ele nu Jizosi daziguwu nu mbom hne be zi naagba mkpe, naakwna ekwna.

11 Nga be nuru nu Jizosi zi budnu, nu ya n'iwuru a whuru a, be kwéle.

12 Nga ka wheru, Jizosi mernu badnu lawuru whnu a n'ozizi berere nga be neezne aznu mba.

13 Be lahna zne kanu ele gwnarnu, be kwéle nhne be kwuru masi.

14 Omekwo, Jizosi whuya iwhe hne nri nu otu badnu wam ele sno apna a zi neeri wiri. O bnanu be mbna kwnornu n'okwe ekwe be nu mkpoma osi rikne be, ke mernu be kwéle ikwu-onu ele whuru a nga o hiri n'enu lizo.

15 O kanu be, "Anu zne nu kpakara owa kponu kpakara badnu okwo izi oma.

16 Nye kweruru, be wu a mini, bu nye be joznohia a, nye ke kwéle, be jaama a ikpe.

17 Nhne elekema ele ka joosno ele kweru, be jaachihala renwu ojo nu rehna m, be jookwu oka nu riro ikne zi odo n'odo.

18 Be jaachi agwo n'aka, o buru nu be nwó nhne obula

ke jaakpaya enwu, o zá nhne o jeeme be, be jootukwasi ele nriria aka, mee ehni buru be oma."

*Jizosi laru n'oligwe
(Luk 24:50-53; Ernu 1:9-11)*

19 Nga Nyenwe ai Jizosi kwukwonnu be oka, be gwelizo a la n'oligwe, o daziri eli n'akarikwnunga Chiokike.

20 Ele sno apna a whogaru nokpo okwo izi oma hne obula, Nyenwe ai noosno be, noornu enu, neegesi nu ikwu-onu Chiokike bu ezi oka, hite n'enu ndu-ehni zi odo n'odo ke be noornu.]

**Izi ọma lele kpa
Lukwu
gbaru a n'okwukwo
Nhne gbasiri
okwukwo ka**

Izi ọma lele kpa Lukwu gbaru a n'okwukwo neegesi Jizosi lele Nye Oznohia Izireli nu Nye Oznohia ke kpakara ele badnu zi n'owa. Lukwu gbaru nu Enine Nyenwe ai sukwuru Jizosi ma o zni "ele mboni izi ọma." Lukwu nye dibia snornu ele sno apna Jizosi n'izi ọma be znirni, ma Polu nye izi Jizosi. O sikhahiaru nhne n'onu ele whnurnu Jizosi nga o zi n'owa. Ka mernu o nwernu onu rikne o gbanu Tiofilosi okwukwo. Lukwu kwuru nhne gbasiri budnu Jizosi, hite n'omumu a, ige o bu wikoro, ernalu a, enwu a, olizo n'enwu tem du nga Jizosi laru oligwe.

Nhne zi n'okwukwo ka

Omumu Jizosi nu wikoro a (1:1--2:52)

Owuwu mini Jizosi nu ornurna a (3:1--4:13)

Enu Jizosi nu rime Galili (4:14--9:50)

Enu Jizosi nu apna nga o neezne Jeruselem (9:51--19:27)

Enu Jizosi nu rime Jeruselem (19:28--20:47)

Oka Jizosi kwuru gbasiri nhne ke jeeme nu ruwhnu (21:1-38)

Enwu Jizosi nu olizo n'enwu a (22:1--24:53)

Nye gbaru okwukwo ka:
Lukwu nye dibia

Risi nhne o kwno gba a:
O gesi otnutnu zuru ozu gbasiri budnu nu ernu Jizosi Karaishi, obirizi a n'ehni ele be neemegbu, nu oznohia ke ele buo ele Ju.

¹ Tiofilosi, agida ele badnu yisiri aka be n'ogba okwukwo gbasiri nhne be mernu n'esilawuru ai,

² lele kpa be nyernu ai n'aka a bita. Ele nyernu ai bu ele hiri n'opanizo gweru anya be whnu be, buru ele izi ikwu-onu Chiokike.

³ O buru ọma hne me snornu kpakara nhne nkari hite nu mbom, me gbanu i okwukwo nu ekere nu ekere, Tiofilosi zi igwugwu,

⁴ mee ma i mahia nu kpakara nhne be jiri ikwu-onu onu zni i bu nhne kwesiri okwnata mkpoma.

Omumu Joni Nye Wu Mini

⁵ N'ige Erudu bu eze Judiya, otu nye okwa ariohna zi, be kwu Zakaraya, ke hi n'oro Abija, nnwerne a bu Elizabeti nye hi n'ebnurnu Eroni.

⁶ Be lawuru bu ele ọma nu ruwhnu Chiokike, be naabita kpakara nhne Nyenwe ai nyernu n'iwu, be nwée oru.

⁷ Kovu nu be nwée nnwo, kwnornu nu Elizabeti bu nyerinya rekpa nnwo a mesnirni emesni. Be lawuru menem okno badnu.

⁸ Otu obochi, ige ele otu Zakaraya noronu ernu, Zakaraya

zị nọornu ẹnu nye ariohna nù ruwhnu Chiokike,

⁹ lele kpa ẹnu ariohna jiri zi, ọ dnabnarnu nù ọ bu ya jọokporne isensi n'Oro Nso Nyenwe ai.

¹⁰ Kpakara ele Ju neekpe okpukpe n'ederezi ige ọ nọokporne isensi.

¹¹ Enine izi Nyenwe ai mernu Zakaraya whnu a anya hne o gwuzo n'akarikwnunga ojo ariohna hne be nọokporne isensi.

¹² Nga Zakaraya whnurnu a, mkpoma laru a mini, ogwnu tumako a.

¹³ Enine izi wam kanu a, "Ogwnu tuko i, Zakaraya, Chiokike nuna m okpukpe i. Elizabethi nnwerne i joomunu i nnwo rukna, ijookwu rewhna a Joni.

¹⁴ I joonwudna, mkpoma joso masi i n'onu, agida ele badnu jeenwe snarnima kwnornu omumu a.

¹⁵ O jọobu nye kwu n'anya Nyenwe ai. O jọonwo manya mọbu nhne ọbula ke bna n'anya rja rja. Enine Nso Chiokike jeejihia nu rime a, hite nu rime ruwho nne a.

¹⁶ O jeeme agida ele Izireli hiehnakwnusi Nyenwe ai Chiokike be.

¹⁷ O jeezne nu ruwhnu Nyenwe ai n'enine nu rikne Elaija. O jeeme ele nda tuhnasna mkpoma hne rumu be zi, ma ele za noobno nsnj bna n'apna akoniche ele oma, o jiknernu Nyenwe ai ele kwesiri a."

¹⁸ Zakaraya sikwa enine izi wam, "Ndaa nhne me jeeji mahia ka? Le, me nu nnwerne m menem okno badnu k'agida."

¹⁹ Enine izi wam saru a, "Mawa bu Gebureli, nye noogwuzo nu ruwhnu Chiokike. Chiokike ziyaru m me kanu i oka ka nu o zni i izi oma ka.

²⁰ Le, i jaadna mgbu, i jeenwe rikne kwu oka tem du ọbochi kpakara nhne ka jeeme, kwnornu nu i kwéle ikwu-onu m ke jeemezu n'ige a."

²¹ Ele badnu wam zi neese Zakaraya n'ederezi, be naari nhne kpayaru o gburu okwnu n'Oro Nso Chiokike.

²² Nga ọ whuyaru, o nwée rikne o kwunu be oka. Be mahia nu ọ whnurnu ọwhnurninya n'Oro Nso Chiokike, o neewhenu be aka, kovu o nwée rikne kwunu be oka.

²³ Nga ige ẹnu a zuru n'Oro Nso Chiokike, Zakaraya lahna ọro a.

²⁴ Nga nhne ka mekworu, Elizabethi nnwerne a turu rime, o tugwa ẹhni a ẹnwa isne nu rime ọro.

²⁵ O kaa, "Ka bu nhne Nyenwe ai mennu m, o gesilem ruwhnu oma a, ma o kwnosnama iwhnerne m n'esilawuru ele badnu."

Be kwuru oka gbasiri omumu Jizosi

²⁶ N'ẹnwa isunu a,* Chiokike ziznernu enine izi

* 1:26 Ka bu kpa Elizabethi turu rime.

Gebureli zne n'eli Nazarėti ke zị nụ Galili,

²⁷ znekwnusi otu nnwọ oknornokno máa nyerukna be kwu Meri, nye Josefu ke hi n'ebnurnu Devidi kweru o lụ.

²⁸ Enine izi wam zne hne o zi, kaa, “M bekwulem o, jị nye Nyenwe aị dagwụnu, i bụ nye ọwa ọma.”

²⁹ Mkpọma larụ Meri mini nga o nurnu ikwu-ọnu a, o naagbadi nụ mkpọma a ọkpa ibekwu ke nụ kpa.

³⁰ Kọvu enine izi wam kanụ a, “Meri, ogwnu túko i, Chiokike menu i oru k'agịda.

³¹ I jọotu rime, mụhia nnwọ rukna, i jookwu a Jizọsi.

³² O jọobu nye kwu, be jookwu a Nnwọ Nye Kakwo Nhne Dum Olu. Nyenwe aị Chiokike jeenye a ngadna eze nda a, Devidi.

³³ O jaachi ọro Jekọpu tim tọm, ẹli-eze a jóokwo okwo.”

³⁴ Meri sarụ enine izi wam, “Ndaa kpa be jeeme nhne ka, hne me máa nyerukna?”

³⁵ Enine izi wam sarụ a, “Enine Nsọ jaadnakwasị i, iknernema ke Nye Kakwo Nhne Dum Olu jookpusni i. Be jookwu nnwọ wam zị nsọ ke i jọomu Nnwọ Chiokike.

³⁶ Le, Elizabeti nwene i rinya zị rime ọmumu n'okno badnụ a, o bụ nye be nookwu nnwerne nwée nnwọ, ka bụ ẹnwa isunu a.

³⁷ O zá nhne nyịrni Chiokike.”

³⁸ Meri sarụ, “Le, m bụ m nnwọ izi ke Nyenwe aị, o menu m lele kpa i kwuru.” Enine izi wam gharụ a la.

Meri znernu o lekasi Elizabeti

³⁹ Ige wam, Meri jiknernu wara wara zne n'otu ẹli rugwu ke zị nụ Judiya.

⁴⁰ O bna n'oro Zakaraya bekwusi Elizabeti.

⁴¹ Nga Elizabeti nurnu ibekwu Meri, nnwọ zị a nụ ruwho wulizoru olu. Enine Nsọ jipiyaru Elizabeti.

⁴² O gweru okne nkọli kwu ọka kaa, “I bụ nye ọwa ọma n'esilawuru ele rinya, nnwọ ke i jọomu bụ masị nye ọwa ọma.

⁴³ M bụ m nye ruwhnu ọma nụ nne ke Nyenwe m jaava lekasi m.

⁴⁴ Kwnornu nụ kpa me nurnu ibekwu i, nnwọ zị m nụ ruwho wulizoru olu nụ snarnịma.

⁴⁵ I bụ nye ọwa ọma kwnornu nụ i kweru nhne Nyenwe aị kwuru nụ o jeemezu a.”

Meri gwnurnu eri ojija

⁴⁶ Meri kaa, “Mkpọma m ja Nyenwe aị,

⁴⁷ ovu m nọonwudna ọnwudna kwnornu nụ Chiokike Nye Ọznohia m,

⁴⁸ kwnornu nụ o chenwan-yarnụ

nnwọ izi a ovu hieru ẹli. Hite nụ kịtna kpakara ele ebiri jookwu m nye ọwa ọma,

⁴⁹ kwnornu nụ Chiokike Nye bụ Dikne mennu m nhne hna ezi, rewhna a zị nsọ.

⁵⁰ Chiokike nọdonu ele nọotu ogwnu a obirizi,

hite n'otu ebiri dū ebiri berere.

51 O ji aka dikne a mee nhne hna ezi,

o chisaru kpakara ele oknomokno nū kpakara mmuma be.

52 O gwednarnū ele eze nū ngadna eze be,

o gwelizorū ele ovu hieru ẹli.

53 O nyejilem ele wiri n'ogwnu ruwho,

kovu o gbatarū ele eze aka.

54 O yinu nye izi a Izireli aka, o chenwanyarnū o donu a obirizi,

55 ke o kweru Ebereham nū ẹbnurnu a mkwna tim tom,

lele kpa o kanū ele nda ai."

56 Meri daziri n'oro Elizabeti ẹnwa ẹto, lahna oro a.

Omumu Jōni Nye Wū Mini

57 Ige omumu nnwọ Elizabeti dūru, o mūhia nnwọ rukna.

58 Ele agbatibi† a nū rumu nwene a nurnu nū Nyenwe ai donnu a obirizi k'agida, be snornu a nwudna.

59 O dū n'ọbochi ẹsato, be varū o kpa nnwọ wam nka. Be noopio o jita a rewhna Zakaraya ma o buru ogbo nda a,

60 kovu nne a karū, "Ọza, rewhna a bu Jōni."

61 Be kanū a, "O zá nye naaza rewhna ka n'esilawuru ele ke i."

62 Be whenu nda a aka, jikwa a rewhna be jookwu nnwọ wam.

63 O kaa be nyee a nhne ogba okwukwo, o gbagwo-juru be anya nga o gbasiri, "Rewhna a bu Jōni."

64 Ngangam, onu a kpumernu, riro a toma, o bete nookwu oka, naaznarni Chiokike.

65 Ogwnu turu kpakara ele agbatibi be, be wheke onutnu ka kpakara eli rugwu Judiya.

66 Nye obula ke nurnu a zi nechenwu, be nesikwa, "Okpa badnu kini bu nhne nnwọ ka jobu?" Kwnornu nū be whnurnu nū aka Nyenwe ai zi n'ehni a.

Zakaraya gwnurnu eri ojija

67 Enine Nso jipiyaru Zakaraya nda Jōni, o whnu owhnurninya, kaa,

68 "Ojija zinu Nyenwe ai, Chiokike ke Izireli, kwnornu nū o lekasiri ma o gbahia ele ke a.

69 O gweyarū nye dikne jooznohia ai

hite n'oro nnwọ izi a Dev-idi,

70 lele kpa o kwuru hite n'onu ele owhnurninya a zi nso agida ige wheru ewhe.

71 O jooznohia ai hite n'aka kpakara ele sno ai irno.

72 O donnu ele nda ai obirizi, o chenwanyarnū ogbanjọ-ehni nso a.

73 O kwesiri Ebereham nda ai mkwna rikne,

74 o dohia ai n'aka ele irno ai, ma a kpenu ai n'enwe ogwnu,

† 1:58 *agbatibi*: ele ya nū a wuta ndundu

75 ma a ziri nsọ nụ ele mee
mma nụ ruwhnu a
kpakara bụdnu aị.

76 Ji, nnwọ m matị, be jookwu
i nye ọwhnurninya ke
Nye Kakwo Nhne Dum
Olu,
kwnornu nụ i jeezne
nụ ruwhnu Nyenwe
aị neemekwatanu a
apna.

77 I jeeme ele ke a mahia
ọznohia,
hite n'ogbarunu be mme-
hie be.

78 Hite n'obirizi nụ ovu ọma ke
Chiokike aị,
o jeeme ẹnnam nọomukwasi
aị hite n'oligwe,

79 iwhne joomukwasi ele zị
n'ochichiri
nụ ele zị n'oyinyo ke
ẹnwu,
noodumako ọchi aị
n'apna udno.”

80 Nnwọ wam nooso oso,
gbasi rikne nụ enine, o wu
n'eli-ikpa tem dụ nga be gesiri
a ele Izireli.

2

Omumu Jizosi (Mat 1:18-25)

1 N'ige wam, eze Siza
Ogositosi yiri iwu be gbasị
rẹwhna kpakara ele wu n'eli
ele Rom nẹchi n'okwukwo.

2 (Ka bụ ọgba rẹwhna
n'okwukwo ke mbom nga
Kwirinọsi bụ nye nẹchi
Siriya.)

3 Nye ọbula la n'eli a zne gba
rẹwhna n'okwukwo.

4 Josefu hiri n'eli Nazareti
ke zị nụ Galili zne Bẹtilehem

nụ Judiya, ẹli be mұrnu
Devidi, kwnornu nụ o hi
n'ebnurnu ọro Devidi.

5 O znernu ma be gbasị
rẹwhna ya nụ Meri n'okwukwo,
bụ nwerinya o kweru nụ ọ
jọolu, nye zị rime ọmumu.

6 Nga be zị nụ Bẹtilehem, ige
Meri joomu nnwọ duru.

7 Ọ mụhia ọziri nnwọ rukna
a, ọ whụ a n'ikpe nute a nụ
rime nhne be biganu anọhia
wiri, kwnornu nụ ọ zá ọro
zịnu be n'oro ele izne.

Ele nọoznu atnurnu nụ ele enine izi

8 Ele nọoznu atnurnu zị
n'eli wam nụ rime ọhia neese
atnurnu be n'abalị.

9 Enine izi Nyenwe aị
mernu be whnụ a anya, ig-
wugwu Nyenwe aị mụkwasi
be, ogwnu turu be k'agida.

10 Kọvu enine izi wam kanu
be, “Ogwnu tuko anu. Anu
bno nsni, m gweyanu m anu
izi ọma ke snarnima ke jaazinu
kpakara ele badnu.

11 Tnawa, n'eli Devidi be
mұnnu anu Nye Ọznohia,
Karaịsi Nyenwe aị.*

12 Ka bụ nhne anu jeeji
mahia a, anu jowhnu nnwọ
ikne be whuru n'ikpe nute nụ
rime nhne be biganu anọhia
wiri.”

13 Ngangam, agida ele enine
izi whuyaru snornu enine izi
wam naaznarni Chiokike,
naakaa,

14 “Ọson'anya dum buru
ke Chiokike nụ hne
kakwo n'olu,

* 2:11 **Karaịsi:** Karaịsi bụ Nye Ọznohia wam Chiokike kweru mkwna o ziya.

udno ziri n'owa n'esilawuru ele nhne be naamasị a.”

15 Nga ele enine izi wam lahnarnu oligwe, ele n'oznu atnuru wam kanu ehi be, “Anu va ma a zne Betlehem whnu nhne mernu ke Nyenwe ai kannu ai.”

16 Be gweru eso gweru izne zne whnu Meri nu Josef, nu nnwo ikne wam be nuteru nu rime nhne be biganu anohia wiri.

17 Nga be whnuru a, be tusa nhne enine izi kwuru gbasiri nnwo ikne ka.

18 O duru kpakara ele nuru nhne ele n'oznu atnuru wam kwuru ehi.

19 Kovu Meri bitaru kpakara nhne ka nu mkpoma a, nechinwu a.

20 Ele n'oznu atnuru wam lahnaru, n'ogwu eri, naaja Chiokike kwnonu nu nhne be nuru, whnu masi lele kpa enine izi wam kanu be.

Be jiri Jizosi rewhna

21 N'obochi esato, be va o kpa nnwo wam nka, be jita rewhna a Jizosi, bu rewhna enine izi wam kwuru a su be turu rime a.

Be kwubnarnu Jizosi Oro Nso Chiokike

22 Ige duru ma Josef nu Meri mee ma be ziri richna lele kpa Iwu Mozizi kwuru, be kwuru nnwo wam zne Jeruselem, chete a nu ruwhnu Nyenwe ai.

23 Lele kpa be gbaru a n'iwu Nyenwe ai, “Be jaabitani Nyenwe ai nnwo rukna obula be beru oso mu nsu.”

24 Be kwa ariohna lele kpa iwu Nyenwe ai kwuru, “Nduru lawuru mabu rumu weresi lawuru.”

25 Otu nwerukna zi nu Jeruselem, nye rewhna a bu Simioni, nye mee mma, nye notu ogwu Chiokike. O bu nye neese oznohia ke Izireli, Enine Nso zi n'ehi a.

26 Enine Nso kannu a nu o jonu enwu tem o whnu Karaisi Nyenwe ai.

27 Enine Nso duru a zne n'Oro Nso Chiokike nga ele muru Jizosi varu o menu a lele kpa Iwu Mozizi kwuru.

28 Simioni kwuru nnwo wam n'aka a, znarni Chiokike, kaa,

29 “Nyenwe m, kweru ma nnwo izi i la n'udno, lele kpa i kweru m mkwna,

30 kwnonu nu anya m whnunam oznohia i,

31 ke i bikwataru n'anya kpakara ele badnu,

32 iwhne ke jookpume nhne gbasiri i nyee ele buo ele Ju,

nu igwugwu ke ele ke i Izireli.”

33 Nhne be kwuru gbasiri nnwo ikne ka duru nda a nu nne a ehi.

34 Simioni gozi be, kanu Meri, nne a, “Nnwo ka joburu nhne jaakpahia odidna nu olizo agida badnu n'Izireli, buru masi nhne elekema be jookwu oka megidne.

35 O jookpume echiche agida ele badnu. Kovu nhne

igbugbu j̄oduwa mkp̄oma i lele ama-ogw̄nu.”

36 Otu nwerinya owhnurninya zi, nye r̄whna a bu Ana, adna Fan̄eli, ke hi n'ebnurnu Asa wh̄ya. Nwerinya ka n̄u nzi a wuru awha esau kp̄oi,

37 k̄ovu o menem okno badn̄u ke gbar̄u nri awha esato n̄u eno, o bu nnwerne nzi a nw̄urnu onwu. O za n̄owhoga n'Oro Nso Chiokike iwhnehn̄e n̄u abali, o zi neekpe okpukpe, noovu onu.

38 O bnanyarn̄u n'ige wam, o t̄unu Chiokike mmamma, kwu oka gbas̄iri nnw̄o ikne wam, kan̄u kpakara ele neese ogbahia ke Jeruselem.

Be kwuru Jiz̄osi lahna Nazareti

39 Nga Josefu n̄u Meri mekworu kpakara nhne iwu Nyenwe āi kwuru, be lahna Galili zne eli ke be, Nazareti.

40 Watak̄iri wam nooso, gbas̄i rikne, ak̄oniche jih̄iaru n̄u rime a, oru Chiokike zi mas̄i a n'ehni.

Wikoro Jiz̄osi zi n'Oro Nso Chiokike

41 Ele m̄urnu a neezne Jeruselem kpakara awha n'Iriri Ogawhe.†

42 Nga Jiz̄osi gbar̄u nri n̄u awha law̄uru, be zne Iriri Ogawhe lele kpa be mesi.

43 Nga be mekworu Iriri wam, be bete o lahna oro be, k̄ovu wikoro Jiz̄osi daz̄iri n̄u Jeruselem, k̄ovu ele m̄urnu a m̄aa.

44 Be neeche n̄u o zi n'igbudu badn̄u, be zne izne otu obochi, be noopio a n'esilawuru ele enyi be n̄u rumu nwene be.

45 Nga be whn̄una a, be hiehna n̄u Jeruselem noopio a.

46 N'obochi ke eto, be whn̄u a n'Oro Nso Chiokike, hne o daz̄i n'esilawuru ele zni iwu ele Ju, noobno nsn̄i nhne be nookwu, n̄esikwa be aiji.

47 Kpakara ele n̄urnu ikwu-onu a n̄u ak̄o zi n̄u nhne o saru be, o duru be ehni.

48 Nga ele m̄urnu a whn̄urnu a, o du be ehni, nne a kan̄u a, “Nnw̄o m, k̄ini kpayaru i jiri mee me n̄u nda i kpa? Me n̄u nda i ji anya-mini noopio i.”

49 O sikwa be, “K̄ini kpayaru an̄u noopio m? An̄u m̄aa n̄u m j̄ornu ernu Nda m?”

50 K̄ovu be gh̄oyage nhne o kann̄u be.

51 Jiz̄osi snornu be la Nazareti, noobnonu be nsn̄i. K̄ovu nne a b̄itaru kpakara nhne ka n̄u mkp̄oma a.

52 Jiz̄osi nooso n'ak̄oniche n̄u dimkpa, neenwe oru n̄u ruwhnu badn̄u n̄u Chiokike.

3

Ikwu-onu J̄oni Nye Wu Mini

(Mat 3:1-12; Mak 1:1-8; J̄on 1:19-28)

1 N'awha ke nri n̄u isne ke ochichi Taber̄osi Siza, nga P̄ontiosi Pālet̄i n̄echi Judiya, nga Er̄odu n̄echi Galili, nwene a rukna Filipu

† 2:41 *Iriri Ogawhe*: Iriri Ogawhe bu ige ele Ju neechenwanya nga Chiokike d̄ohiaru be n'ohi n'aka ele Ijipiti. Okwnehala 12:1-27; Ditaronomi 16:1-8.

nēechi Ituria nū Tirakonitisi,
Lisanasị nēechi Abilini,

² Anasị nū Kayafasị bụ ele
risi arịohna, ige wam ikwu-
ọnu Chiokike dūru Jōni, nnwọ
Zakaraya nsnị n'ēli-ikpa.

³ O zne nū kpakara ēli ke zị
Osimini Jōdani gburugburu,
nọokpo okwo naakaa ele
badnū tūhnasna mkpōma ma
be wū be mini, ma Chiokike
gbarūnu be mmehie.

⁴ Lele kpa be gbarū a
n'okwukwo nsọ hite n'ọnu
Azaya nye ọwhnurninya, kaa,
“Akpịri otu badnū nọokpo
okwo n'ēli-ikpa,
anū mekwata apna Nyenwe
aị,

anū mee apna a snị asnị.

⁵ Be jeemesni kpakara ngwu-
langwu,

be jaakwnadna kpakara
rugwu nū rugwu matị.

Kpakara apna zị mg-
bahirigodo jaasnị asnị,
kpakara apna zị ndag-
wurugwu jaazị snam.

⁶ Kpakara ele badnū jọowhnu
ọznohia Chiokike.”

⁷ Jōni kanū igbudu badnū
nọowhokwnusi a ma ọ wū be
mini, “Anū ẹbnurnu agwọ,
nyeie kannū anū gbanahọru
ovu owe ẹhni Chiokike ke
naava?

⁸ Anū mīnya mkpūru ke
neegesi nū anū tūhnasnarnu
mkpōma. Anū káa nū
Eberham bụ nda anū.
Kwnornu me kanū anū ezi
ọka, Chiokike nwernu rikne
mee kpakara akaworugwu
ka ghọ rụmu Eberham.

⁹ Be bitalam ehni gwe
n'ikwnu kpakara isisi, isisi

ọbula ke mīnyala mkpūru
ọma, be joogbudna a, tūbna
nū rime bẹkwnu.”

¹⁰ Ele badnū wam sịkwa a,
“Kini bụ nhne a jeeme?”

¹¹ Jōni sarū be, “Nye
nwernu iwo lawūru, o kesi
nye nwée otu, nye nwernu
wiri, mee masị kpm.”

¹² Ele ọna ntū varū ma
Jōni wū be mini, be sịkwa a,
“Nye-zni-nhne, kini bụ nhne
a jeeme?”

¹³ Jōni sarū be, “Anū náhĩa
ele badnū iwai kakwo kpa be
nyernu anū iwu.”

¹⁴ Ele ọgwnu sịkwa a, “Kini
bụ nhne a jeeme?”

Ọ kanū be, “Anū mée ele
badnū nhne rikne, mọbu bno
ele badnū nhne aghalaghala,
ọgwọ ẹrnu anū ji anū rụwho.”

¹⁵ Ele badnū neele anya nū
Jōni bụ Karaisi.

¹⁶ Jōni kanū be, “M ji m mini
wū anū mini, kọvu nū nye
kakwo m rikne vawa, nye me
kwésile o whudnahie tọma
eriri okoro-ọchi a lawūru.
Nye wam jeeji Enine Nsọ nū
bẹkwnu wū anū mini.

¹⁷ Nye nhne ọwhusna ikpa
zị n'aka a, ọ jọowhusna ikpa
a nkari, chibna ikpa a n'ọbna,
kọvu o jeeji bẹkwnu chnị echni
kpọrne ruznurnuznu ikpa.”

¹⁸ Jōni ji agịda ikwu-
ọnu zị ichne ichne zni izi
ọma, naarijasno be tūhnasna
mkpōma.

¹⁹ Kọvu nū Jōni bigbọru
Eze Erọdu kwnornu Erodiasi
nnwerne nwene a, nū agịda
nhne ọjọ berere ke Erọdu
mernu.

20 Erọdu tųkwasiri n'olu
nhne ojo ka, nga o yisiri Jọni
ikelu.

Ọwuwu mini Jizọsi
(*Mat 3:13-17; Mak 1:9-11*)

21 Nga Jọni wųkparu ele
badnu mini, ọ wųru Jizọsi
mini masi.* Nga Jizọsi
neekpe okpukpe, oligwe
kpumernu.

22 Enine Nsọ whekwasiri
a lele nduru, otu akpiri
hiri n'oligwe dna kaa, “Ji
bu Nnwọ m, me whnųrnu
n'anya, nhne i masiri m.”

Osnusno ọmumu Jizọsi
(*Mat 1:1-17*)

23 Nga Jizọsi gbaru nri
awha ẹto, ọ panizo ẹrnu izi
ọma a, ele badnu naari nu ọ
bu nnwọ Josefu,
nnwọ Hili,

24 nnwọ Matati,
nnwọ Livaị, nnwọ Me-
liki,

nnwọ Janai, nnwọ Josefu,
25 nnwọ Matatayasi,
nnwọ Emọsi,

nnwọ Nahum, nnwọ Ẹsili,
nnwọ Nagai,
26 nnwọ Mati,

nnwọ Matatayasi, nnwọ
Sẹmeni,
nnwọ Joseki, nnwọ Joda,

27 nnwọ Jonani, nnwọ Resa,
nnwọ Zerubabeli, nnwọ
Seateli,

nnwọ Neri,
28 nnwọ Meliki,
nnwọ Adi, nnwọ Kosam,

nnwọ Ẹlimadam, nnwọ Ẹr,
29 nnwọ Josua, nnwọ
Eleza,

nnwọ Jorim, nnwọ Matati,

nnwọ Livaị,
30 nnwọ Simiọni,
nnwọ Juda, nnwọ Josefu,
nnwọ Jonam, nnwọ
Ẹliakim,

31 nnwọ Mela, nnwọ Mena,
nnwọ Matata, nnwọ
Natani,

nnwọ Devidi,
32 nnwọ Jesi,
nnwọ Obedi, nnwọ
Boazi,

nnwọ Salimoni, nnwọ Nasọni,
33 nnwọ Aminadabu,
nnwọ Ram,

nnwọ Hezirọni, nnwọ Pẹrezi,
nnwọ Juda,

34 nnwọ Jekọpu,
nnwọ Aziki, nnwọ Ebere-
ham,

nnwọ Tera, nnwọ Nahọ,
35 nnwọ Sẹrugị, nnwọ Ru,
nnwọ Pẹlegi, nnwọ Ẹbe,

nnwọ Sẹla,
36 nnwọ Kaịnani,
nnwọ Afazadi, nnwọ
Sẹm,

nnwọ Noa, nnwọ Lamẹki,
37 nnwọ Metusela, nnwọ
Inoku,

nnwọ Jarẹdi, nnwọ Maha-
lalẹli,
nnwọ Kaịnani,

38 nnwọ Enọsi,
nnwọ Sẹti, nnwọ Adam,
nnwọ Chiokike.

4

Ọrnuna Jizọsi
(*Mat 4:1-11; Mak 1:12,13*)

1 Enine Nsọ jihiaru nu rime
Jizọsi nga o hiri nu Osimini
Jodani hiehna, Enine Nsọ
duru a zne n'ẹli-ikpa.

2 Ọ zi n'ẹli-ikpa nri ọbochi
ẹno, Ekwensu naarna a

* 3:21 Nhne ka mernu tųtu Erọdu yisiri Jọni n'ikelu.

ornurna, o zá nhne o riri kpakara obochi wam, omekwo, wiri gwnurnu a.

³ Ekwensu kanu a, “O buru nu i bu Nnwọ Chiokike, kanu akaworugwu ka o ghọ bredi.”

⁴ Jizosi saru a, “Be gbaru a n’okwukwo nsọ, kaa, ‘O buo bredi bu nhne badnu kpọi jeeri ziri budnu.’ ”

⁵ Ekwensu duru a pnezne n’olu rugwu gerisi a kpakara eli-eze k’owa n’ige mati.

⁶ O kanu a, “M jeenye i kpakara rikne ka nu igwugwu be, kwnornu nu be nyernu m be, m jeenye a nye obula masiri m.

⁷ O buru nu i jọkponu m risi eli, kpakara a jọbu ke i.”

⁸ Jizosi saru a, “Be gbaru a n’okwukwo nsọ, kaa, ‘I jọkponu Nyenwe i, Chiokike i risi eli, o bu ya kpọi bu nye i jeekpenu.’ ”

⁹ Ekwensu duru a zne nu Jeruselem, mee o gwuzoru n’olu towa Oro Nsọ Chiokike, kanu a, “O buru nu i bu Nnwọ Chiokike, gbudna ehni i n’eli hna.

¹⁰ Be gbaru a n’okwukwo nsọ, kaa,

‘O jeenye ele enine izi a iwu gbasiri i ma be chekwata i nkari.

¹¹ Be jeegheru i n’aka be, ma i gharu o kpọi i ochi nu rugwu.’ ”

¹² Jizosi saru a, “Be gbakwnornu a n’okwukwo nsọ, kaa, ‘I rna Nyenwe i, Chiokike i ornurna.’ ”

¹³ Nga Ekwensu rnakworu a ornurna, o gharu a ige mati.

Jizosi panizoru ernu a
(Mat 4:12,17; Mak 1:14,15)

¹⁴ Jizosi lahna Galili nu rikne Enine Nsọ, be tnsi otnutnu a kpakara ohna.

¹⁵ O zni nhne kpakara n’oro ogbako ele Ju, kpakara ele badnu naaznarni a.

Be juru Jizosi nu Nazareti
(Mat 13:53-58; Mak 6:1-6)

¹⁶ Jizosi zne nu Nazareti hne o soru, o bna n’oro ogbako ele Ju n’Obochi Ozukwa Inwe ele Ju lele kpa o mesi, o lizo ma o gwnu okwukwo nsọ.

¹⁷ Be nyee a okwukwo Azaya nye owhnurninya, o kpume a whnu hne be gbaru,

¹⁸ “Enine Nsọ Nyenwe ai zi n’ehni m,

kwnornu nu Chiokike ai teru m mono, o zni ele mboni izi oma.

O ziyaru m o kpọ okwo ogbahia ele zi n’oro ikelu,

mee ele isni whnurnu osno, nu o dokia ele be neemegbu,

¹⁹ nu o kpọ okwo awha Nyenwe ai joznohia ele ke a.”

²⁰ O kpusni okwukwo wam nyehnata nye neezne izi, daziri eli. Kpakara ele zi n’oro ogbako ele Ju legidne a anya.

²¹ O panizo naakanu be, “Be mezuru nhne okwukwo nsọ kwuru n’anya anu tna.”

²² Kpakara ele badnu kwuru a oka oma, ikwu-onu oma a duru agida be ehni, be nesikwa, “Ka o buo nnwo Josefu?”

²³ Jizosi kanu be, “N’ezi anu jootnunu m elulu ka, ‘Wodibia

digba ẹhni i, kpakara nhne a nurnu i mernu nu n'eli Kapanom, mee be hna n'eli i.' ”

24 “Me kanu anu ezi oka, nye owhnurninya nwée oso anya n'eli a.

25 Kovu me kanu anu, agida ele nnwerne nzi be nwurnu zi n'eli Izireli n'ige Elaija, nga Chiokike mesnirni oligwe, mini zoge awha eto nu enwa isunu, ke kpaharu okne okwnunyo dnarnu nu kpakara eli.

26 Be ziznege Elaija znekwusi nye obula nu rime be, okwolem otu nnwerne nzi a nwurnu ke zi nu Zerefati* ke zi ndundu Saïdoni.

27 Agida ele nchnichna zi masi n'eli Izireli n'ige Elisia nye owhnurninya, o za nye be mernu o ziri richna, okwolem Nemani nye Siriya.”

28 Onuma jiharu kpakara ele zi n'oro ogbako ele Ju mkpom a nga be nurnu nhne ka.

29 Be lizo, chihala a n'eli be, duru a zne n'onu rugwu hne be wukwasiri eli be ma be kw-nadna a n'eli.

30 Kovu o hiri n'esilawuru be whoga.

Jizosi chihalaru renwu ojo
(Mak 1:21-28)

31 Jizosi zne Kapanom n'eli Galili, n'Obochi Ozukwa Inwe neezni ele badnu nhne.

32 Ehni duru be nu nhne o neezni, kwnornu nu o neezni nhne lele nye nwernu rikne n'aka Chiokike.

33 Otu nwerukna ke renwu ojo nwugwu zi n'oro ogbako ele

Ju wam, o gweru okne nkoli si lulo,

34 “Kini bu nhne ai nu ji nwekogwu, Jizosi nye Nazareti? I varu ma i gbumekwo ai? M maam nye i bu, i bu nye nsọ ke Chiokike.”

35 Jizosi bigboru a, kanu a, “Kpusni onu i, hi nu rime a whuya.” Renwu ojo wam vudna a n'eli nu ruwhnu ele badnu wam, hi nu rime a whuya, o mekasila a nhne.

36 O duru kpakara ele badnu ehni, be nesikwarita ibne be, “Ka bu iznizni kini? Nwerukna ka nwernu rikne o ji notunu renwu ojo oka, be whuya masi.”

37 Otnutnu gbasiri a gbasaru kpakara eli zi be gburugburu.

Jizosi gworu ele badnu
(Mat 8:14-17; Mak 1:29-34)

38 Jizosi hi n'oro ogbako ele Ju wam whuya, bna n'oro Saïmoni. Nne nnwerne Saïmoni naarija ehni orne bekwnu, be riasno Jizosi o yinu a aka.

39 O zne gwuzoru nu ngeri okpata a, bigbo ehni orne bekwnu wam, o sigbasi a. O lizo ngangam neeznenu be izi.

40 Nga ehnam dnarnu, be kwuyanu Jizosi kpakara ele naarija ehni igbugbu zi odo n'odo, o tukwasi be aka a otu otu, gwọ kpakara be.

41 Renwu ojo hi nu rime agida ele badnu whuya, neesi lulo. “Ji bu Nnwọ Chiokike.”

Kovu Jizosi bigboru be, o kwéle be kwu oka, kwnornu

* 4:26 Zerefati: Ka buo eli Izireli.

nụ be magwụ nụ ya bu
Karaịsi wam.

*Jizọsi znirni izi ọma
n'oro ọgbako ele Ju
(Mak 1:35-39)*

⁴² Nga chị bọru, o zne nụ
hne kọru owu. Ele badnụ
noopio a, nga be piohịaru a,
be kwéle ọ gharụ be whọga.

⁴³ Kọvu Jizọsi kanụ be, “M
jeezne n'ẹli ele ke berere zni
be izi ọma ẹli-eze Chiokike,
kwnornu nụ ka bu nhne
Chiokike kwno ziya m.”

⁴⁴ O neezni izi ọma nụ
kpakara ọro ọgbako ele Ju zị
nụ rime Judiya.

5

*Ele mbọm sno apna Jizọsi
(Mat 4:18-22; Mak 1:16-20)*

¹ Otu ọbochi Jizọsi gwuzo
nụ ngeri Osimini Genezareti,
agịda ele badnụ naadnagidne
a, nọonu ikwu-ọnu Chiokike.

² Ọ whnụ ọgbo lawuru zị nụ
ngeri mini, ele noogbu aznụ
whọgaru nụ rime be nọosnu
igbo be.

³ Jizọsi bna n'otu ọgbo ke bu
keru Saịmoni, kanụ a o nubna
matị nụ rime mini, ọ daziri ẹli
nụ rime ọgbo wam neezni ele
badnụ nhne.

⁴ Nga o znikworu nhne, ọ
kanụ Saịmoni, “Nubna ọgbo
nụ rime mini wụsi igbo i, gbu
aznụ.”

⁵ Saịmoni saru a, “Nda-ai-
kwu, a doligburu ẹhni a n'ernu
kpakara abali ka, ọ zia nhne
ọbula a gburu, kọvu kwnornu
nụ ikwu-ọnu i, m jọowusi igbo.”

⁶ Nga be wụsiri igbo, be gbu
agịda aznụ, ke mernu igbo
bete nọodoka.

⁷ Be whenu ele ibne be aka
ele zị n'ọgbo berere, be va
yinu be aka. Be va gbuji ọgbo
lawuru wam n'aznụ, be bete
neemi.

⁸ Nga Saịmoni Pita whnurnu
nhne mernu, ọ dna n'ẹli
n'ọchi Jizọsi kaa, “Nyenwe
ai, hi nụ hne me zị whọga
kwnornu nụ m bu m nye ojo.”

⁹ Aznụ be gburu duru be
ẹhni k'agịda.

¹⁰ Ọ bu masị kpa o duru
Jemisi nụ Jọni rumu Zebidi
ẹhni, ele be nụ Saịmoni sno
noogbu aznụ. Jizọsi kanụ
Pita, “Ogwnu túko i, hite nụ
kita i jọobu nye jọokwnuhia
badnụ.”

¹¹ Be kwọhia ọgbo be n'ọnu
mini, sịgbasi kpakara nhne
snornu Jizọsi.

*Jizọsi gwọru
nye nchnichna*

(Mat 8:1-4; Mak 1:40-45)

¹² Nga Jizọsi zị rime ẹli-
ọhna, otu nwerukna naaria
nchnichna vakwnusiri a. Nga
ọ whnurnu Jizọsi, ọ dna n'ẹli
nụ ruwhnu a, riasno, kaa,
“Nyenwe ai, ọ buru nụ i pioru,
i nwernu rikne mee m ziri
richna.”

¹³ Jizọsi dọsnima aka a,
kpatu a, kaa, “M pioru m, ziri
richna.” Ngangam, nchnichna
wam whọgaru n'ẹhni a.

¹⁴ Jizọsi dọru a aka nụ nsni
kanu a, “Ọ zá nye ọbula i
kanu, kọvu la, gweru ẹhni
gesi i nye ọkwa ariọhna, gweru
nhne Mozizi nyernu n'iwu

kwa ariohna ma o buru nhne akebbe nyee be nu i zi richna.”

15 Kovu otnutnu a gbasaru k'agida, ke kpayaru agida ele badnu naava nonu ikwu-onu a, ma o gwọ nriria be.

16 Agida ige Jizosi whoga, zne hne koru owu, neekpe okpukpe.

Jizosi gworu nye ehni a donwurnu odonwu

(Mat 9:1-8; Mak 2:1-12)

17 O du n'otu obochi, nga Jizosi neezni nhne, ele Farisi nu ele zni iwu ele Ju ele hi nu kpakara mgbu ke zi n'eli Galili nu Judiya nu Jeruselem va, be dazi, rikne Nyenwe ai zi n'ehni a, o nogo wo ele nriria.

18 Ele rukna vuyanu a otu nye ngeri ehni a donwurnu odonwu, nye dnanyi n'olu okpata, be pio kpa be joovubna nu ruwhnu Jizosi.

19 Nga be nwée rikne du a ehni kwnornu nu agida ele badnu wam, be pne n'olu oro, hi nu hne be dokahalaru nhne vudna a n'olu okpata o dnanyi n'esilawuru igbudu badnu wam nu ruwhnu Jizosi.

20 Nga Jizosi whnurnu okwnata mkpoma be, o kaa, “Nwerukna, be gbarunam ji kpakara mmehie i.”

21 Ele Farisi nu ele zni iwu ele Ju nesikwa nu mkpoma be, “Nwerukna ka bu nyele ke nookwulu Chiokike? Ndaa nye nwernu rikne o gbaru mmehie, hne o buo Chiokike kpqi?”

22 Jizosi mahjaru nhne be naari nu mkpoma be, o sika

be, “Kini kpahjaru anu naari oriri ka nu mkpoma anu?”

23 Ndaa ke zi ewheke nu o kaa, ‘Be gbarunam ji kpakara mmehie,’ sobu o kaa, ‘Lizo zne izne?’

24 M pioru m anu mahja nu Nwọ ke Badnu nwernu rikne n'owa o gbaru mmehie.” O kanu nwerukna wam ngeri ehni a donwurnu odonwu, “M ka m ji, lizo, vuru okpata i, la oro i.”

25 Ngangam, o lizo nu ruwhnu be, chiri etere o dnanyi n'olu a, la n'oro a, naaznarni Chiokike.

26 Ehni du kpakara be, be tu ogwnu znarni Chiokike, naakaa, “A whnunam nhne ikne tna.”

Jizosi sukwuru Liva

(Mat 9:9-13; Mak 2:13-17)

27 Nga nhne ka mekworu, Jizosi whogaru whnu otu nye ona ntụ be kwu Liva, hne o dazi n'oro ntụ, Jizosi kanu a, “Sno m.”

28 Liva lizo, sigbasi kpakara nhne snornu a.

29 Liva sinu Jizosi okne iriri n'oro a, agida ele ona ntụ nu ele berere snornu be neeri wiri.

30 Ele Farisi nu ele zni iwu ele Ju sika ele sno apna a, “Kini mernu anu noosno ele ona ntụ nu ele mmehie neeri wiri?”

31 Jizosi saru be, “Mkpa dibia ziko naakpa ele ehni buru oma, okwolem ele nriria.

32 M vage m o sukwu ele oma, kovu ele mmehie ma be tuhnaasna mkpoma.”

Ajiji gbasiri ovu onu

(Mat 9:14-17; Mak 2:18-22)

33 Be kanu a, “Ele sno apna Joni noovu onu neekpe okpukpe ige obula, ma ele sno ele Farisi neeme masi kpm, kovu ele sno apna i neeri, nonwo.”

34 Jizosi saru be, “Ele varu hne be nolu nnwerne ikne be joovu onu hne be nu nye nolu nnwerne ikne zi?”

35 Kovu obochi wawa, nga be jaanahoru be nye nolu nnwerne ikne, o bu nga be joovu onu n'obochi wam.”

36 Jizosi tnuu be elulu ka, “O za nye jodokaru mkpekele ikpe ikne dnusi n'iwu oknani, o mene kpm, o jodoka ke ikne, ikpe ikne nu ke oknani jadnabna.

37 O zi masi nye jeegweru manya ikne gbas n'olori akpukpo oknani, o mene kpm, manya ikne wam jaagbawama olori akpukpo oknani, manya nu olori akpukpo whume etekne.

38 Kovu be gbas manya ikne n'olori akpukpo ikne.

39 O za nye ke nworu manya oknani noopio ke ikne, kwnornu nu o karu ke oknani ka mma.”

6

Ajiji gbasiri

Obochi Ozukwa Inwe

(*Mat 12:1-8; Mak 2:23-28*)

1 O du otu Obochi Ozukwa Inwe, Jizosi nu ele sno apna a naagawhe n'esilawuru ekwu ikpa, ele sno apna a bete noogho ikpa, naata, naariria a n'aka be.

2 Agwna ele Farisi sikwa, “Kini mernu anu neeme

nhne kwesile n'iwu n'Obochi Ozukwa Inwe?”

3 Jizosi saru be, “Anu gwnuna nhne Devidi mernu nga wiri gwnurnu a, ya nu ele sno a?”

4 O bnaznenu n'oro nsu Chiokike, gweru bredi be bitaru nu ruwhnu Chiokike ke ele ariona bu ele kwesiri o ri, ri a, nyee masi ele nu ya sno.”

5 Jizosi kanu be, “Nnwu ke Badnu bu Nyenwe Obochi Ozukwa Inwe.”

Nwerukna aka

donwurnu donwu

(*Mat 12:9-14; Mak 3:1-6*)

6 O du n'Obochi Ozukwa Inwe berere, Jizosi bna n'oro ogbako ele Ju neezni nhne, otu nwerukna aka donwurnu donwu zi pi.

7 Ele Farisi nu ele zni iwu ele Ju noopio nhne be jeeji bno Jizosi nhne, be needne a ma be jowhnu ma o jogwo nriria n'Obochi Ozukwa Inwe.

8 Kovu nu Jizosi mahiaru nhne be naari nu mkpoma be. O kanu nwerukna wam aka donwurnu donwu, “Lizo, gwuzoru nu ruwhnu kpakara ele badnu.” O lizo, gwuzoru.

9 Jizosi kanu be, “Me sika anu, o buru oma n'iwu o mee nhne oma n'Obochi Ozukwa Inwe sobu o mee nhne buo oma, o znohia budnu sobu o gbu ogbu?”

10 O lezute be anya, kanu nwerukna wam, “Donsima aka i.” O donsima aka a, aka a buru oma lele kpa o zi nu mbom.

11 Kọvu ovu weru be ẹhni k'agida, be bete nẹesikwarita ẹhni be nhne be jeeme Jizọsi.

*Jizọsi họhiaru nri nọ
badnọ lawuru ele izi
(Mat 10:1-4; Mak 3:13-19)*

12 N'ige wam Jizọsi whọgaru zne nọ rugwu zne kpe okpukpe, o neekpenu Chiokike tem chi bọ.

13 Nga chi bọru, o suk-wukọta ele sno apna a, họru nri nọ badnọ lawuru nọ rime be, sukwu be ele izi.

14 Ka bọ rẹwhna be, Saịmoni, nye o sukwuru Pita, nọ Anduru nwene a, Jemisi, Jọni, Filipu, Batolomi,

15 nọ Matiyu, Tọmosi, Jemisi nnwọ Alifayosi, Saịmoni nye zị n'esilawuru ele noonwu bẹkwnu nọ mkpọma,

16 nọ Judasi nnwọ Jemisi, nọ Judasi Isikarioti, nye reru a.

*Jizọsi znirni nhne
gwọ nrịria
(Mat 4:23-25)*

17 Nga ya nọ be hiri nọ olu rugwu hiedna, be gwuzoru n'ẹli etekne, agida ele sno apna a nọ agida ele badnọ ele hiri nọ kpakara Judiya, nọ Jeruselem ma ele wu nọ ngeri mini ẹli Taya nọ Saịdoni varu gbakọ nọ hne be zị.

18 Kpakara ele ka varu ma be nurnu ikwu-ọnu a, ma Jizọsi gwọ be nrịria be. O gwọru ele renwu ojo nwugwu.

19 Kpakara ele badnọ wam noopio ma be kpatu a aka, kwnornu nọ rikne hiri n'ẹhni a nọogwo kpakara be nrịria be.

*Ovu ọso n'ọnu nọ
nhne igbugbu ke mkpọma
(Mat 5:1-12)*

20 Jizọsi gwelizo anya a olu le ele sno apna a, kaa,

“Ọwa ọma zinu anọ ele mboni, kwnornu nọ anọ jeenwe ẹli-eze Chiokike.

21 Ọwa ọma zinu anọ ele wiri nọogwnu kịtna, kwnornu nọ ruwho jeeji anọ.

Ọwa ọma zinu anọ ele naakwna ẹkwna kịtna, kwnornu nọ be jọomu rumu.

22 Ọwa ọma zinu anọ nga ele badnọ snornu anọ irno, nga be jaachihala anọ n'ogbako be, kpari anọ, kaa nọ anọ bọ ele ojo kwnornu Nnwọ ke Badnọ.

23 “Anọ nwudna ọnwudna, anọ tne eri snarnima, ọgwo ẹrnu anọ zị agida n'oligwe. Kwnornu nọ o bọ kpa ele nda be mernu ele ọwhnurninya.

24 Kọvu nọ awhnụwhnu jaazinu anọ ele eze, kwnornu nọ anọ rilem iru ke anọ.

25 Awhnụwhnu jaazinu anọ ele neeriji ruwho kịtna, kwnornu nọ wiri jọogwnu anọ.

Awhnụwhnu jaazinu anọ ele nọomu rumu kịtna, kwnornu nọ anọ jaakwna ẹkwna, gba masi mkpe.

26 Awhnụwhnu jaazinu anọ nga kpakara ele badnọ naakaa anọ ọka ọma,

o bu kpa ele nda be mernu ele owhnurninya aghalaghala.

Whnu ele irno anu n'anya (Mat 5:38-48; 7:12a)

²⁷ “Kovu me naakanu anu, anu ele nonu ikwu-onu m, anu whnu ele irno anu n'anya, anu menu ele snornu anu irno nhne oma.

²⁸ Anu gozi ele nonu anu onu, kpenu ele neamegbu anu okpukpe.

²⁹ O buru nu nye obula gboru i aka nu nti, chetenu a berere masi. O buru nu nye obula chinahoru i iwu olu i, chita masi a iwo rime i.

³⁰ Nyega nye obula nono i nhne, o buru nu nye obula nahoru i nhne i, i kaa o nyehnata i.

³¹ Lele kpa anu pioru ma ele badnu menu anu, anu menu be kpa.

³² “O buru nu anu whnurnu ele wam n'anya bu ele nonwhnu anu n'anya, kini bu mbnarna anu nwernu? O bubedi ele mmehie nonwhnu ele whnurnu be n'anya n'anya.

³³ O buru masi nu anu neemenu ele neemenu anu nhne oma nhne oma kpoi, kini bu mbnarna anu nwernu? Ele mmehie neeme kpa.

³⁴ O buru nu anu gbaznisiri ele anu jaanahia nhne n'aka be nhne kpoi, mbnarna kini anu nwernu? Ele mmehie naagbaznisi ele mmehie be jaanahoru nhne n'aka be nhne.

³⁵ Kovu anu nonwhnu ele irno anu n'anya, anu menu

be nhne oma, anu gbaznisi be nhne, le anya nu anu jaanahia nhne obula n'aka be. Ige wam ogwo ernu anu jaazi agida, anu jobu rumu Nye Kakwo Nhne Dum Olu, kwnornu nu Chiokike neemenu ele nwée mkpoma mmamma nu ele ojo imerne oma.

³⁶ Anu nwe mkpoma obirizi lele kpa Nda anu nwernu mkpoma obirizi.

O kpe ele berere ikpe (Mat 7:1-5)

³⁷ “Anu kpe ikpe, ma Chiokike gharu o kpe anu ikpe. Anu ma nye obula ikpe, ma Chiokike gharu ama anu ikpe. Anu gbarunu ele mernu anu nhne ojo, ma Chiokike gbarunu anu masi.

³⁸ Anu nyega, be jeenyega masi anu. Nhne otutu buru oma, be bniarnu aka, yuyo ke jiwheru ejiwhe, bu nhne Chiokike jeenye i ke ji nu nsunu i jeenwe rikne vuli. Kwnornu nu nhne anu jiri tunu nye berere bu nhne be jeeji tunu anu.”

³⁹ Jizosi tunu be elulu ka, “Nye isni o nwernu rikne noodu nye isni? Be lawuru be jadnabna nu rime olulu?”

⁴⁰ Nye sno apna nye-zni-nhne jakakwo nye zni a nhne. Kovu nye obula muhiaru nhne nkarị nonu lele nye znirni a nhne.

⁴¹ “Kini kpaharu i neele nhne mati ke zi n'anya nwene i, kovu i za naari oriri gbasiri igwe-isisi ke zi n'anya i?”

42 Ndaa kpa i jeeji kanu nwene i, 'Nwene, sete me gweme nhne matị ke zị n'anya i, nga i whnuna igwe-isisi ke zị i n'anya?' Jị nye ruwhnu lawuru, beru osno gweme igwe-isisi ke zị n'anya ke i, ige wam i jowhnusna osno o gweme nhne matị ke zị n'anya nwene i.

Isisi nu mkpuru a

(Mat 7:16-20; 12:33-35)

43 "O za isisi oma obula ke jaami mkpuru ojo, isisi ojo nwée rikne mị mkpuru oma.

44 Be mahia isisi hite nu mkpuru a. Ele badnu za noogho mkpuru figi hite n'isisi akukara, mọbu mkpuru vaini nigwnu-ogna.

45 Badnu oma neegwehia nhne buru oma hite n'ekwnu oma ke zị nu mkpoma a. Badnu ojo hite n'ekwnu ojo ke mkpoma a neegwehia nhne ojo. Kwnornu nu onu nookwu hite nu nhne ke zị nu mkpoma a.

Ntu-eli lawuru

(Mat 7:24-27)

46 "Kini kpayaru anu noosukwu m, 'Nyenwe ai, Nyenwe ai,' kovu anu za neeme nhne me kwuru?"

47 Nye obula ke vakwnusiri m, nuru ikwu-onu m, neeme masi be, m jeegesi anu nye o yiri.

48 O yiri otu nwerukna noowu oro, o gwubna eli nkari, tu ntụ-eli a n'olu rugwu. Nga mgba-mini eli gbaru, kwna oro wam, o nwée rikne kwnadna oro wam, kwnornu nu be wusiri a rikne.

49 Kovu nye obula ke nuru ikwu-onu m o za neeme be, yiri otu nwerukna wuru oro a n'olu rizna, ke gwumigwo eli nkari, mini-eli gba, kwna oro wam, o dna girigidim, tu ogwnu."

7

Jizosi gworu nnwo izi nye risi ogwnu

(Mat 8:5-13)

1 Nga Jizosi kwukworu kpakara oka ka nu nsni ele badnu wam, o bna Kapanom.

2 Otu nye ogwnu neechi otu riwhu ele ogwnu nwernu otu nnwo izi zị a mkpa k'agida, ke zị n'onu enwu.

3 Nga o nuru nhne gbasiri Jizosi, o ziznenu a ele okno badnu ele Ju, riasno a ma o va gwọ nnwo izi a.

4 Nga be vakwnusiri Jizosi, be riasnosi a rikne, "Nwerukna ka kwesiri nye i jeemenu nhne nu kpa.

5 Nwerukna ka whnurru eli ai n'anya, o wunnu ai oro ogbako."

6 Jizosi snornu be zne.

Nga o zị ndundu n'oro a, nye ogwnu wam ziznenu a ele enyi a, kanu a, "Nyenwe ai, i dogbu ehni o va, m kwesile m nye i va oro a.

7 Ka mernu me gwnusige ehni m nu nye kwesiri o vakwnusi i. Kovu kwu oka kpoi, be jogwo nnwo izi m.

8 Kwnornu nu m bu nye zị n'ochichi, m nwernu m ele ka m, nu ele me ka. Me kanu nye ka 'Zne,' o zne, kanu nye berere 'Vaa,' o va. Me kanu nnwo izi m 'Mee ka,' o mee a."

9 Nga Jizōsi nūrnū ọka ka, o duru a ẹhni, ọ tūhnasna, kanū igbudu badnū wam sno a, “Me kanū anū ezi ọka, m whnūlele m ọkwnata ovu hna kpa n'Izireli.”

10 Ele wam o ziyaru lahna n'oro a, be whnū nū be gwọlam nnwọ izi wam.

*Jizōsi gwọru nnwọ rukna
nwerinya nzi a nwurnu*

11 Kpa ige matị whemernu, Jizōsi zne otu ọhna be kwu Neni, ele sno apna a nū igbudu badnū snornu a zne.

12 Kpa be naabna n'ọnuhna ẹli-ọhna wam, ele badnū vu iznu, otu nnwọ nwerinya nzi a nwurnu nwernu, agịda ele ẹli wam sno a.

13 Nga Nyenwe aị whnurnu a, ọ dọnu a obirizi, kanū a, “I kwnáma ẹkwna.”

14 O znekwnusi ele vu ọkpata-iznu wam, kpatū a aka, be gwuzoru. Jizōsi kaa, “Wikoro rukna, m ka m jị, lizọ.”

15 Nye wam nwurnu ọnwu lizọ, daziri ẹli nookwu ọka, Jizōsi kwuru a nyehnata nne a.

16 Kpakara ele badnū tū ogwnu naaja Chiokike. Be kaa, “Otu nye ọwhnurninya hna ezi whūyalam n'esilawuru aị, Chiokike valẹm o yinu ele ke a aka.”

17 Ọsusu gbasiri Jizōsi gazu kpakara Judiya nū kpakara ẹli zị a gburugburu.

*Jizōsi nū Jōni
Nye Wụ Mini
(Mat 11:2-19)*

18 Ele sno apna Jōni kanū a kpakara nhne ka. O sukwu badnū lawuru nū rime be,

19 be zne sịkwa Nyenwe aị, “Ọ bụ jịwa bụ nye ke jaava, sọbu a le anya nye berere?”

20 Nga be vakwnusiri Jizōsi, be kaa, “Jōni Nye Wụ Mini ziyaru a sịkwa i, ‘Ọ bụ jịwa bụ nye ke jaava, sọbu a le anya nye berere?’ ”

21 Ige wam Jizōsi gwọru agịda ele nriria zị ọdo n'odo, renwu ojo hiri nū rime ele badnū whūya, ele isni whnurnu ọsno.

22 Ọ sarụ ele izi wam, “Anū lahna kanū Jōni kpakara nhne anū whnurnu nū ke anū nurnu. Ele isni whnurnu ọsno, ele mgworo znernu izne, be neeme ele nchnichna ziri rịchna, ele nsni inyo nọonu nhne, ele nwurnu ọnwu lizọru n'ẹnwu, be neezni ele mboni izi ọma.

23 Chiokike jọgozi nye ọbula ke jula m kwnornu nhne me mernu.”

24 Nga ele izi Jōni larū, Jizōsi bete naakanū igbudu badnū wam nhne gbasiri Jōni. “Kini bụ nhne anū znernu ọ whnū n'ẹli-ikpa? Ekere achara ruwhere noovu?”

25 Ọ bụ kini nhne anū znernu ọ whnū? Nwerukna wogwu iwo marnū mma sa? Le, ele noowo iwo marnū mma, ele wu budnu oriri nū ọnwunwo zị n'oro ele eze.

26 M ka m, risi kini bụ nhne anū znernu ọ whnū? Nye ọwhnurninya sa? Owe! Me kanū anū, ọ bụ nye kakwo nye ọwhnurninya.

27 Ka bu nye wam be gbaru
nhne n'okwukwo nsogbasiri a,
'M jeezizne nye izi m nu
ruwhnu i,
nye jeemekwata apna nu
ruwhnu i.'

28 Me kanu anu, n'esilawuru
ele ele rinya muru, o za nye
kakwo Joni, kovu nye zikaru
mati n'eli-eze Chiokike kakwo
Joni."

29 (Nga kpakara ele badnu,
ma ele ona ntu nurnu nhne
Jizosi kwuru, be kweru nu
apna Chiokike zi snam,
kwnornu nu Joni wuru be
mini.

30 Kovu ele Farisi nu ele
zni iwu ele Ju juru mmuma
Chiokike, kwnornu nu Joni
wuge be mini.)

31 Jizosi sikwa be, "Ndaa
nhne me jeeji sninu ebiri ka?
Be nu lele kini?"

32 Be nu lele rumu takiri
dazigwu n'ahia noosukwu
ibne be ikwu, kaa,
'A kwannu anu eri,
anu tnege eri,
A gwnu eri mkpe
anu kwnage ekwna.'

33 Joni Nye Wu Mini varu, o
rile wiri, nwoge manya, anu
kaa, 'O nwernu renwu ojo.'

34 Nnwog ke Badnu varu, neeri
wiri, nonwo manya, anu kaa,
'Nye ka bu nye okne wiri nu
nye nwog okne manya, enyi
ele ona ntu nu ele mmehie.'

35 Kovu nhne ele magwu
Chiokike neeme neegesi nu
akoniche Chiokike ziri ezi."

Be teru Jizosi mono

36 Otu nye Farisi sukwuru
Jizosi wiri n'oro a, o zne

n'oro nye Farisi wam daziri
n'ikpechi neeri wiri.

37 Otu nwerinya ke wu
budnu mmehie n'eli wam
mahiaru nu Jizosi neeri wiri
n'oro nye Farisi, o zne zuya
mono otute zi n'ite alabasita.

38 O gwuzoru n'aznu Jizosi
naakwna ekwna n'ochi a,
anya-mini a nonwu n'ochi
Jizosi. O gweru rukeri-ize a
kwnosnama be, snutu ochi a
onu, gweru mono otute wam
te ochi a lawuru.

39 Nga nye Farisi wam
sukwuru Jizosi wiri whnurnu
a, o kaa nu mkpoma a, "O
buru nu nwerukna ka bu
nye owhnurninya, o znernu a
mahia nu nwerinya ka naak-
patu aka bu nye mmehie."

40 Jizosi saru a, "Saimoni, o
nwernu nhne me jaakanu i."

O kaa, "Kanu m, Nye-zni-
nhne."

41 Jizosi kanu a, "Otu
nwerukna ke naagbznisi ele
badnu iwai nwernu ele rukna
lawuru ji a ogwo. Otu nyenum
ji a riwhu mkpuru iwai isne,
nye berere ji nri isne.

42 Be lawuru nwée nhne be
jeeji nokwu ogwo, o gbarunu
be ogwo wam be ji a. Nyele
n'esilawuru be jowhnu a
n'anya karukwo?"

43 Saimoni saru, "M che m
nu o bu nye wam o gbarunu
ogwo zi agida."

Jizosi kanu a, "I kperu ikpe
oma."

44 Jizosi tuhmasna hne
nwerinya wam zi kanu
Saimoni, "I whnurnu
nwerinya ka? M varu m oro i,
i nyege m mini me snu ochi m,

kọvu o ji anya-mini a snụ ọchi m lawuru, gweru rukeri-ize a kwnosnama be.

⁴⁵ I snúge m ọnu, kọvu nwerinya ka, hite n'ige me varu, zi noosnutu ọchi m lawuru ọnu.

⁴⁶ I tége risi m mọno, kọvu o wusiri mọno ẹknarna ọma n'ọchi m lawuru.

⁴⁷ Kam kpayaru, me kanu i, lele kpa be gbarunu a agida mmehie, ọwhnun'anya a zi agida. Nye be gbarunu nhne matị nwernu ọwhnun'anya zi matị."

⁴⁸ Jizọsi kanu nwerinya wam, "Be gbarunam ji mmehie i."

⁴⁹ Ele nu Jizọsi dazi neeri wiri nookwurita n'ehni be, "Nye ka bu nyele ke naagbaru mmehie?"

⁵⁰ Jizọsi kanu nwerinya wam. "Okwnata mkpoma i znohialam ji, la n'udno."

8

*Agwna ele rinya ke
snornu Jizọsi*

¹ Nga ka mekworu, Jizọsi znernu hite n'otu ẹli matị du n'ẹli agida berere ọokpo okwo izi ọma ẹli-eze Chiokike. Nri nu badnu lawuru wam ele izi a sno a,

² ma agwna ele rinya be gworu renwu ojo nu nriria zi ọdo n'odo, Meri, nye be kwu Magidalini, nye Jizọsi chihalaru renwu ojo ẹsau nu rime a,

³ Joana nnwerne Kuza, nye neelegidne ọro Erọdu, ele rinya berere sno a bu Suzana nu agida ele berere. Ele rinya ka neeyinu be aka nu mkpa

be hite nu nhne hi n'aka be whuya.

*Elulu nye ọgha mkpuru
(Mat 13:1-9; Mak 4:1-9)*

⁴ Kpa igbudu badnu naagbakọ hne Jizọsi zi, hite n'agida ẹli-ọhna, ọ tnuu be elulu ka.

⁵ "Otu nye ẹrnu ẹkwu znernu agha mkpuru. Kpa ọ naagha mkpuru, agwna mkpuru dna nu ngeri apna, ele badnu zo be ọchi, rumu ọnunu tuturu be ta.

⁶ Agwna be dnarnu n'olu rugwu, nga be furu, be chnanwu kwnornu nu be nwée mini.

⁷ Agwna mkpuru berere dnarnu n'esilawuru igwnu, igwnu wam sohia kpagbu be.

⁸ Agwna mkpuru berere dnarnu n'ẹli buru ọma, be so, minya mkpuru, otu riwhu kakwo kpa be kparu be."

Nga o kwukworu ọka ka, ọ kaa, "Nye nwernu nsni o ji ọ nu nhne, ọ nurnu."

*Nhne o kwono tnu elulu
(Mat 13:10-17; Mak 4:10-12)*

⁹ Ele sno apna a sika a risi elulu ka.

¹⁰ Jizọsi kanu be, "Be mernu ma anu mahia nhne tugwaru otugwa ke ẹli-eze Chiokike, kọvu be jookwunu ele berere ọka n'elulu, ma, 'Be neele anya, kọvu be jọwhnu ọsno, be noobno nsni, kọvu be jọoghohia.'

*Risi elulu nye
ọgha mkpuru wam
(Mat 13:18-23; Mak 4:13-20)*

11 “Ka bụ risi elulu wam. Mkpuru wam bụ ikwu-ọnu Chiokike.

12 Mkpuru ke zị nụ ngeri apna nụ lele ele nurnu ikwu-ọnu Chiokike, Ekwensu va gweme ikwu-ọnu wam nū mkpoma be, ma be gharu o kweru, be znohia be.

13 Ele ke zị nū rugwu nū lele ke nurnu ikwu-ọnu wam gweru snarnima nwugwu a, kovu nū be nwée egwnugwu, be kweru ige matị, kovu nga nhne okpa iru varu, be dnah-nala aznu.

14 Mkpuru ke dnarnu n'esilawuru igwnu nū lele ele nurnu ikwu-ọnu wam, kovu kpa be nooso, oriri nū ekwnu nū nhne oso n'onu k'owa ka, kpagbu be, o ghō nhne mina mkpuru.

15 Kovu ele ke dnarnu nū hne eli buru oma bụ ele ke ji mkpoma oma be nū ezi oka, bita ikwu-ọnu ka nga be nurnu a, be hite n'osnuta mkpoma minya mkpuru.

Tonji zị olu nhne tonji
(Mak 4:21-25)

16 “O zá nye nōomusi tonji bita a nū mkpururu okpata, mōbu kpusni a nhne, tnunuma, o bita a n'olu nhne be bita tonji, ma ele naab-nanya o ro whnurnu iwhne a.

17 Nhne obula be tugwaru otugwa jowhuya iwhne, be jookpume kpakara nhne be kpusnirni okpusni ma ele badnu whnurnu be.

18 Kam kpayaru, anya du anu eli nhne anu nonu. Be jeenye nye obula ke nwernu, kovu nye nwée, be jaanahoru

a o bubedi, ke o riri nu o nwernu.”

Nne Jizosi nu rumu nne a
(Mat 12:46-50; Mak 3:31-35)

19 Nne Jizosi nu rumu nne a varu ma be whnu a anya, kovu nū be nwée rikne zne ndundu kwnornu igbudu badnu wam.

20 Be kanu Jizosi, “Nne i nu rumu nne i gwuzogwu n'ederezi noopio o whnu i.”

21 Jizosi saru be, “Nne m nu rumu nne m bu ele nurnu ikwu-ọnu Chiokike, neeme be.”

Jizosi bigboru
ruwhere osimini
(Mat 8:23-27; Mak 4:35-41)

22 Otu obochi Jizosi kanu ele sno apna a, “Anu ngwa ma a whe aka osimini kiari.” Be bna nu rime otu ogbo zneba.

23 Kpa be neezne, Jizosi znirni anyarna. Okne ruwhere neewhe, mini noowubna nu rime ogbo, ogbo noopio o mii.

24 Ele sno apna a vakwnusi a, kpatnenya a, kaa, “Nda-ai-kwu, mini neeri ai.”

O lizo, bigbo ruwhere wam nu abaka-mini wam, be whebi, ohna dna bii.

25 Jizosi sikwa ele sno apna a, “Ndaa hne okwnata mkpoma anu zị?”

Be tu ogwnu, o ji be anya, be neesikwarita ibne be, “Nye ka bu nyele? O nootunu ruwhere nu abaka-mini oka, be bnonu a nsni.”

Jizosi gworu nye
renwu ojo nwugwu
(Mat 8:28-34; Mak 5:1-20)

26 Jizọsi nụ ele sno apna a kwọru ọgbo be zne n'ẹli ele Gerasa ke zị n'aznụ Osimini Galili.

27 Nga Jizọsi hiri n'ọgbo whụya, otu nye rẹnwu ojo nwụgwu hi n'ẹli wam kwnusi a. Nwerukna ka gbulem ọkwnu o wó iwo, o wú n'oro, ọro a bụ n'ilili.

28 Nga ọ whnụrnu Jizọsi, o si lulo dna n'ẹli n'ọchi a, siwama n'okne nkọli, "Kini bụ me nụ jị nwekọgwu, Jizọsi Nnwọ ke Chiokike Kakwo Nhne Dum Olu? Bikno, ị tá m awhnụwhnu."

29 O kwuru kpa kwnornu nụ Jizọsi nyernu rẹnwu ojo wam iwu o hi nụ rime a whụya. Agida ige be kpagidnernu nwerukna wam, be tị a ijigba ọchi nụ aka, be neese a nse, ọ gbajikwo ijigba, rẹnwu ojo chibna nụ hne kọru owu.

30 Jizọsi sịkwa a, "Kini bụ rẹwhna ị?"

Ọ kaa, "Lijoni,"* kwnornu nụ agida rẹnwu ojo bnarnu nụ rime a.

31 Be riasno Jizọsi ọ chibna be n'olulu awhnụwhnu.

32 Odokwnu ezni zị nụ ndundu naata wiri n'olu rugwu, rẹnwu ojo riasno Jizọsi o kweru be zne bna nụ rime ezni wam, ọ karu be zne.

33 Rẹnwu ojo wam hiri nụ rime nwerukna wam whụya, bna nụ rime ezni wam, odokwnu ezni wam gbadna ngwulangwu wam, dnabna nụ rime mini, rinwu nụ rime mini.

34 Nga ele nọozu ezni wam whnụrnu nhne mernu, be gbawhu, zne tñsinu ele zị nụ rime ẹli-ọhna ma nụ ẹkwu.

35 Ele badnụ whọga zne whnụ nhne mernu, be vakwnusi Jizọsi, whnụ nwerukna wam rẹnwu ojo whọgaru nụ rime a hne ọ dazi ẹli n'ọchi Jizọsi, woru iwo, echiche a zuru ozu, ogwnu tị be.

36 Ele whnụrnu nhne mernu kanu ele badnụ kpa be gwọru nwerukna wam rẹnwu ojo nwụgwu.

37 Kpakara ele wu n'ẹli Gerasa gburugburu kanu Jizọsi ọ whọga n'ẹli be, kwnornu nụ ogwnu nọotu be. Ọ bna nụ rime ọgbo lahna.

38 Nwerukna wam rẹnwu ojo whọgaru nụ rime a riasno a ma o snornu a la, kọvu Jizọsi chihala a, kanu a,

39 "La n'oro ị, kanu ele badnụ nhne Chiokike mennu ị."

Nwerukna wam la, nọotnusa kpakara n'ẹli-ọhna nhne Jizọsi mennu a.

Nnwọ rinya matị nụ nwerinya ntị ọvnarna

(Mat 9:18-26; Mak 5:21-43)

40 Nga Jizọsi lahnarnu, igbudu badnụ nabnanyarnu a, kwnornu nụ be neele anya a.

41 Otu nwerukna rẹwhna a bụ Jariosi, nye risi ọro ọgbako ele Ju, vakwnusiri a, dna n'ẹli n'ọchi Jizọsi, riasno a ọ va ọro a.

42 Ọ riasno a kwnornu nụ o nwernu otu nnwọ rinya kpọi, ke gbaru nri nụ awha lawuru, nye zị n'ọnu ẹnwu.

* 8:30 *Lijoni* ke bụ agida ele ogwnu.

Kpa Jizōsi neezne n'apna, igbudu badnụ snornu a naadnagidne a.

43 Otu nwerinya ke naariya ntụ ọvna nri nụ awha lawuru, zị n'esilawuru igbudu badnụ wam, tuwhukwo kpakara nhne o nwernu n'aka ele dibia, kovu ọ zá nye nwernu rikne gwọ a.

44 Ọ varụ n'aznụ Jizōsi kpatụ ọnu iwo a aka, ngangam, ọvna nri a gbabiri.

45 Jizōsi sịkwa, “Nyele kpaturu m aka?”

Kpakara be goru. Pita kaa, “Nda-ai-kwu, igbudu badnụ ka naadnagidne i.”

46 Kovu Jizōsi karụ, “Otu badnụ kpaturu m aka, m maam nụ rikne hiri n'ehni m whoga.”

47 Nga nwerinya wam whnuru nụ o nwée rikne tugwa, ehni naama a ririri, ọ dna n'eli n'ochi Jizōsi, kahia nụ ruwhnu igbudu badnụ wam nhne mernu ọ jiri kpatụ iwo a aka, nụ kpa be gwọru a ngangam.

48 Jizōsi kanụ a, “Nnwọ m rinya, ọkwnata mkpoma i znohialam ji, la n'udno.”

49 Kpa Jizōsi kpụ ọka n'onu, otu badnụ hiri n'oro Jariosi va, kanụ Jariosi nye nnwọ a naariya ariya, “Nnwọ i rinya nwunam. I kpaknama Nye-zinihne ehni berere.”

50 Nga Jizōsi nuru a, ọ kanụ Jariosi, “I tuko ogwnu, kweru kpọi, be jogwo a.”

51 Nga ọ vaduru n'oro, o kwéle nye ọbula snornu a bna nụ rime ọro, okwolem Pita,

Joni nụ Jemisi, nụ nda nụ nne nnwọ rinya wam.

52 Kpakara ele badnụ zị naakwna ekwna, naagbanu nnwọ rinya wam mkpe. Jizōsi kanụ be, “Anụ kwnama ekwna, nnwọ rinya ka nwuna ọnwu, o neezni anyarna.”

53 Be mụ a rumu, kwnornu nụ be magwụ nụ nnwọ rinya wam nwuru ọnwu.

54 Kovu nụ Jizōsi nwugwuru a n'aka, kaa, “Nnwọ, lizọ.”

55 Enine a hiehnarnu, o lizọ ngangam. Jizōsi kanụ be, be nyee a nhne, ma o ri.

56 O duru ele muru a ehni, kovu Jizōsi kanụ be, be kahianu nye ọbula nhne mernu.

9

Jizōsi zihalaru nri nụ badnụ lawuru

(Mat 10:5-15; Mak 6:7-13)

1 Jizōsi sukwukota ele izi nri nụ ẹbo wam n'otu, nyee be rikne nụ rikne ọchichi ọ chihala renwu ojo nụ ọ gwọ nriria.

2 O zihala be zne kpọ okwo eli-eze Chiokike, gwọ ele nriria.

3 Ọ kanụ be, “Anụ jí nhne ọbula kpa anụ neezne. Anụ jí mkpara mọbu rekpa, mọbu bredi, mọbu iwai, anụ chí iwo lawuru.

4 Oro ọbula anụ bnarnu, anụ daziri pi tem anụ whoga n'eli-ohna wam.

5 O buru nụ ele badnụ nábnyanya anụ, anụ whoga n'eli-ohna wam, lisnama rizza ke zị n'ochi anụ, ma ọ buru nhne akebbe megidne be.”

⁶ Be whōga, zne hite n'otu ẹli zne ẹli berere, n̄okpo okwo izi ọma, n̄ogwo ele nr̄iria kpakara ọhna.

*O gbagwojiri Eroḍu anya
(Mat 14:1-12; Mak 6:14-29)*

⁷ Nga Eroḍu nye n̄echi Galili n̄urnu kpakara nhne neeme, ọ gbagwojiri a anya, kwnornu n̄u agwna ele badn̄u naakaa n̄u J̄oni hilem n'ẹnwu liz̄o,

⁸ ele berere naakaa n̄u Ẹlaija wh̄yaru iw̄hne, ele berere naakaa n̄u otu n̄u rime ele ọwhnurninya gbaka hiri n'ẹnwu liz̄o.

⁹ Eroḍu kaa, “M biri m J̄oni risi, nyele b̄u nye ka me n̄onu nhne gbas̄iri a?” O pio ọ whn̄u Jiz̄osi.

*Jiz̄osi nyernu
pokwu badn̄u isne wiri*

(Mat 14:13-21; Mak 6:30-44; J̄on 6:1-14)

¹⁰ Nga ele izi wam hiehnarnu, be kan̄u Jiz̄osi nhne be mernu. O kwuru be whōga ichne, zne ẹli B̄etesaida.

¹¹ Nga igbudu badn̄u wam mah̄jaru, be snornu a. O kwubnanya be, kwunu be ọka gbas̄iri ẹli-eze Chiokike, gw̄o mas̄i ele nr̄iria.

¹² N'ogbednachi nga chi neeji, nri n̄u badn̄u law̄uru wam vakwnusi Jiz̄osi, kan̄u a, “Zihala ele ka ma be zne n̄u rime ẹli-ọhna ma n̄u rime ẹkwu, z̄uru nhne oriri, dnanyi n'abal̄i a, kwnornu n̄u a z̄i n̄u hne k̄oru owu.”

¹³ Jiz̄osi sar̄u be, “An̄u nyee be nhne be jeeri.”

Be sar̄u a, “Nhne a nwernu hna kwolem ike br̄edi isne n̄u

azn̄u law̄uru, okwolem ma a jeezne z̄uya wiri a jeenye igbudu badn̄u ka.”

¹⁴ Pokwu ele rukna isne z̄i pii.

K̄ovu Jiz̄osi kan̄u ele sno apna a, “An̄u mee ma be daz̄iri ẹli n̄u mkp̄uru nri badn̄u isne, mkp̄uru nri badn̄u isne.”

¹⁵ Ele sno apna a mee kpam, nye ọbula daz̄iri ẹli.

¹⁶ Jiz̄osi gweru ike br̄edi isne wam n̄u azn̄u law̄uru wam, le anya n'oligwe, t̄u mmamma, nyawama be. O nyee be ele sno apna a, be nyee igbudu badn̄u wam.

¹⁷ Kpakara be ri, riji r̄uwho, ele sno apna a t̄utukota r̄uvnurunu ke gwarn̄u, nri n̄u nk̄ita law̄uru jih̄jaru.

*Pita kah̄jaru nye Jiz̄osi bu
(Mat 16:13-19; Mak 8:27-29)*

¹⁸ Otu ọbochi, nga Jiz̄osi neekpe okpukpe ichne, ele sno apna a n̄u ya z̄i, ọ s̄ikwa be, “Ele badn̄u be naakaa n̄u me b̄u nyele?”

¹⁹ Be sar̄u a, “Agwna be naakaa, J̄oni Nye W̄u Mini, ele berere naakaa, Ẹlaija, ele berere mas̄i naakaa, otu n̄u rime ele ọwhnurninya gbaka hiri n'ẹnwu liz̄o.”

²⁰ K̄ovu Jiz̄osi s̄ikwa be, “An̄u n'iw̄huru an̄u, an̄u kan̄u n̄u m b̄u m nyele?”

Pita sar̄u a, “I b̄u Karais̄i ke Chiokike.”

*Jiz̄osi kwuru ọka
gbas̄iri ẹnwu a*

(Mat 16:20-28; Mak 8:30--9:1)

21 Jizọsi dọ be aka nụ nsni be kánu nye ọbula.

22 Ọ kanụ be, “Nnwọ ke Badnụ jaatariri agida awnụwhnu, ele okno badnụ nụ ele risi ariọhna nụ ele neezni iwu ele Ju jọọju a, be gbu a, nga ọbochi ẹto whemernu, o jeehi n'ẹnwu lizọ berere.”

23 Ọ kanụ kpakara be, “Ọ bụru nụ nye ọbula joosno m n'aznụ, o jọọju ẹhni a, vuru ọgba a kpakara ọbochi sno m.

24 Kwnornu nụ nye ọbula ke noopio ọ znọhia bụdnu a, jootuwihu a, kọvu nye ọbula ke jootuwihu bụdnu a kwnornu m, jọoznohia a.

25 Mbnarna kịni bụ nhne badnụ jeenwe ọ bụru nụ ọ rihia kpakara ọwa n'iru, kọvu tuwhume bụdnu a?

26 Nye ọbula ke iwħnerne m nụ ikwu-ọnu m jọotu, Nnwọ ke Badnụ jọotu iwħnerne nye wam nga ọ jaava n'igwugwu a nụ n'igwugwu ke Nda a nụ ke ele enine izi nsọ.

27 N'ezi me kanụ anụ, agwna ele gwuzo hna jọonwu ẹnwu tem be whnụ ẹli-eze Chiokike.”

*Onwoghari ke Jizọsi
(Mat 17:1-8; Mak 9:2-8)*

28 Nga ọbochi ẹsato whemernu kpa Jizọsi kwuru ikwu-ọnu ka, o kwuru Pita, Jọni nụ Jemisi yisinu ẹhni a zne n'olu rugwu kpe okpukpe.

29 Kpa o zị neekpe okpukpe, ruwhnu a gbanwornu, iwo naacha va-a-a, neeke eke lele amụma.

30 Ngangam, be whnụ ele rukna lawuru nụ ya nookwurita ọka, be bụ Mozizi nụ Ẹlaija.

31 Be whuyaru n'igwugwu, be nụ Jizọsi kwu ọka gbasiri ẹnwu a ke jeemezu nụ Jeruselem.

32 Anyarna tūru Pita nụ ele nụ ya zị, kọvu nga anya dnornu be, be whnurnu igwugwu Jizọsi nụ ele rukna lawuru be nụ a gwuzo.

33 Kpa be nọowhoga hne Jizọsi zị, Pita kanụ a, “Nda-ai-kwu, ọ bụru ọma a daziri hna. Ngwa ma a wu ọro-eka ẹto hna, otu ke i, otu ke Mozizi, otu Ẹlaija.” (Ọ máa nhne o jookwu.)

34 Kpa ọ kpu ọka ka n'ọnu, erumeru oligwe whuyaru kpusni be, ogwnu tūru be kpa be zị n'erumeru oligwe wam.

35 Otu akpịri hiri n'erumeru oligwe wam, kaa, “Ka bụ Nnwọ m, nye me họhiaru, anụ bnotenu a nsni.”

36 Nga akpịri wam kwukworu, be whnurnu Jizọsi nsnunu a. Ele sno apna a bítaru nhne be whnurnu nụ mkpọma be, ọ zá nye be kannụ nhne be whnurnu ige wam.

*Jizọsi gwọru
wikoro rukna
(Mat 17:14-18; Mak 9:14-27)*

37 N'ekile a, nga be hiri nụ rugwu wam hiedna, igbudu badnụ vakwnusiri Jizọsi.

38 Otu nwerukna hiri n'igbudu badnụ wam siwama lulo, “Nye-zni-nhne, bikno le nnwọ m rukna anya,

kwnornu nù ọ bụ otu nnwọ me nweru.

³⁹ Rẹnwu ojo nwụgwu a, o si lulo, o vudna n'ẹli nọodo a, ọ nọogbo okoto n'ọnu, o gbu ọkwnu sù ọ sịgbasi a, ma o gbu a.

⁴⁰ M riasno ele sno apna i ma be chihala a, kọvu be nwée rikne."

⁴¹ Jizọsi saru be, "Anụ ebiri ka nwée ọkwnata mkpọma, ele mkpọma hiri aghi, me nụ anụ jaadazi du ngele? Me jeesinu anụ mkpọma du ngele?" Ọ kanụ nwerukna wam, "Kwuya nnwọ i rukna hna."

⁴² Nga nnwọ rukna wam naava, rẹnwu ojo wam vudna a n'ẹli, dọsi a rikne. Kọvu Jizọsi bigbọru rẹnwu ojo wam, gwọ a, kwuhnata a nda a.

⁴³ Rikne ẹrnu Chiokike duru kpakara be ẹhni.

Jizọsi kwukwnornu ọka gbasiri ẹnwu a

(Mat 17:22,23; Mak 9:30-32)

Kpakara nhne o neeme noodu ele badnu ẹhni, Jizọsi kanụ ele sno apna a,

⁴⁴ "Anụ bno nsni nhne me naakanụ anụ. Be jeegweru Nnwọ ke Badnu resi n'aka ele badnu."

⁴⁵ Kọvu be ghóyage nhne o nookwu. O bụ nhne tugwaru otugwa n'anya be, be máa nhne ọ bụ. Ogwnu kwéle be sịkwa a nhne gbasiri a.

Nyele kakwo ibne a?

(Mat 18:1-5; Mak 9:33-37)

⁴⁶ Ele sno apna a bete neesigha ọka n'esilawuru be nye kakwo ibne a.

⁴⁷ Nga Jizọsi mahiaru nhne zi be nù mkpọma, o kwuru otu watakiri gwuzote a nù ngeri a.

⁴⁸ Ọ kanụ be, "Nye ọbula ke jaanarnu watakiri ka nù rẹwhna m, nanarnu m, nye ọbula ke nanarnu m, nanarnu nye ziyaru m. Kwnornu nù nye kakwo matị n'esilawuru anụ, nye wam bụ nye kakwo."

Nye zá neemegidne anụ, dagwunu anụ

(Mak 9:38-40)

⁴⁹ Jóni kanụ a, "Nda-ai-kwu, a whnurnu otu badnu ke naachihala rẹnwu ojo nù rẹwhna i, a bnosni a, kwnornu nù ọ zá noosno ai."

⁵⁰ Jizọsi kaa, "Anụ bnósnia, kwnornu nù nye zá neemegidne anụ, dagwunu anụ."

Otu mgbu kwéle ọ nabnanya Jizọsi

⁵¹ Kpa ige nọodu ọ jaala oligwe, Jizọsi kpebitem o zne Jeruselem.

⁵² O zihala ele izi nù ruwhnu a, be zne otu ẹli Sameria ma be mekwatanu a nhne.

⁵³ Kọvu ele ẹli wam kwéle ọ nabnanya a, kwnornu nù ọ nù lele nù o neezne Jeruselem.

⁵⁴ Nga ele sno apna a Jemisi nù Jóni whnurnu ka, be sịkwa a, "Nyenwe ai, i pioru ma a sukwudna bẹkwunu n'oligwe rnegbukwo kpakara be?"

⁵⁵ Kọvu nù Jizọsi tūhnasarnu, bigbọ be.

56 [O kaa, “Anụ máa enine anụ nwernu. Nnwọ ke Badnụ váge ma o gbu badnụ, kọvu ọ znọhia bụdnu badnụ.”] Be whe zne ẹli berere.

*Nhne o joowhu ele
sno apna Jizọsi
(Mat 8:19-22)*

57 Kpa be neezne nụ apna, otu nwerukna kanụ a, “M joosno i hne ọbula i neezne.”

58 Jizọsi kanụ a, “Edu nwernu mkpewu hne be dnanyi, ọnunu oligwe nwernu alikwu hne be zukwa inwe, kọvu Nnwọ ke Badnụ nwée hne ọ jaabita risi a.”

59 O kanụ nye berere, “Sno m.”

Kọvu nwerukna wam kaa, “Nyenwe aị, kweru me beru ọsno lite nda m.”

60 Jizọsi kanụ a, “Gharu ele nwurnu ọnwu ma be lite ele nwurnu ọnwu ibne be, kọvu zne kpọ okwo izi ọma ẹli-eze Chiokike.”

61 Nye berere kwno kaa, “Nyenwe aị, m joosno i, kọvu kweru m me beru ọsno zne bekwu ele ọro m ikwu ipneaznụ.”

62 Jizọsi kanụ a, “O zá nye ọbula ke yisiri aka nụ mfama ẹkwu ke anọ ọro nọopnughari, daziri neele anya n'aznụ, kwesiri ẹli-eze Chiokike.”

10

*Jizọsi zihalaru nri
badnụ ẹsau nụ ẹbo*

1 Nga ka mekworu, Jizọsi hohiaru nri badnụ ẹsau nụ ẹbo, ma o zihala be ẹbo ẹbo nụ rime ẹli-ọhna nụ mgbu ọbula ọ jaabna.

2 O kanụ be, “Ogwe nhne ẹkwu zi agida, kọvu nụ ele ẹrnu zi ele nụ ele. Kam kpa-yaru, anụ rịo Nyenwe ogwe nhne ẹkwu ma o zizne ele ẹrnu n'ẹkwu a.

3 Anụ zne, m neezizne anụ lele rụmu atnurnu n'esilawuru edu.

4 Anụ jí rẹkpa iwai, mọbu rẹkpa, mọbu okoro-ọchi, anụ békwu nye ọbula n'apna.

5 “Nga anụ bnarnu ọro ọbula, anụ beru ọsno kaa, ‘Udno zinu ọro ka.’

6 O bụru nụ nye udno zi n'ọro wam, udno anụ jaazinu a, ọ bụru nụ nye udno zila, udno anụ jaahiehnakwnusi anụ.

7 Anụ dazigidne n'ọro wam, neeri, nọonwo nhne be jeenye anụ. Ka bụ kwnornu nụ nye ẹrnu kwesiri ọgwo ẹrnu a. Anụ znékọ n'ọro n'ọro.

8 “Nga anụ bnarnu ẹli-ọhna ọbula ke be nabnanyarnu anụ, anụ ri nhne ọbula be jeenye anụ.

9 Anụ gwọ ele nriria zi pị, anụ kanụ be, ‘Eli-eze Chiokike zi anụ ndundu.’

10 Kọvu nụ ẹli ọbula anụ bnarnu ke be nábnyanya anụ, anụ zne n'apna a, kaa,

11 ‘O bụbedi rịzna ẹli anụ ke takwnusiri n'ọchi aị, a lịsnarnu a megidne anụ. Kọvu anụ mahia nụ ẹli-eze Chiokike zi ndundu.’

12 Me kanụ anụ, Chiokike jọdonu ẹli Sodom obirizi karu ẹli wam n'ọbochi ikpe.

*Ẹli-ọhna kwé ekwe
(Mat 11:20-24)*

13 “Awhnụwhnu jaazinu i, ji Korazini. Awhnụwhnu jaazinu i, ji Betesaida. Kwnornu nu ernalu ndu-ehni ke be rnu nu rime anu, o buru nu be rnu be nu eli Taya nu eli Saidoni, be zernu otuhnasna mkpoma agida ige wheru ewhe, daziri n'ikpe mkpe nu retnu.

14 Kovu be jodonu Taya nu Saidoni obirizi n'ikpe karu anu.

15 Jiwa masi, Kapanom, be jeegwelizo i olu du oligwe? Be jeegwedna i eli, du bekwnu eli renwu.

16 “Nye noobnonu anu nsni noobnonu m nsni, nye juru anu noju m. Nye obula ke juru m noju nye ziyaru m.”

Nri badnu esau nu ebo wam hieharu

17 Nri badnu esau nu ebo wam jiri snarnima hiehna, kaa, “Nyenwe ai, ele renwu ojo bnonnu ai nsni nu rewhna i.”

18 Jizosi kanu be, “M whuru m Ekwensu hne o hi n'oligwe dna lele amuma.

19 M nyernu m anu rikne o zokwasi agwo nu akpi ochi nu o megbu kpakara rikne ke nye irno, o za ke nwernu rikne mekasi anu nhne rira.

20 Kovu mkpoma so anu n'onu kwnornu nu renwu ojo noobnonu anu risi, kovu anu nwudna nu be gbaru rewhna anu n'okwukwo n'oligwe.”

*Jizosi nwudnarnu
(Mat 11:25-27; 13:16,17)*

21 Ige wam Jizosi nwudnarnu k'agida nu rime Enine Nso, kaa, “Meka, Nda, Nyenwe oligwe nu owa, kwnornu nu i bigwaru nhne ka n'anya ele ako nu ele maru nhne, kovu i kpumennu be rumu takiri. Owe! Nda, meka, kwnornu nu o buru oma kpam n'anya i.

22 “Nda m yisiri kpakara nhne n'aka m. O za nye magwu nye Nnwọ wam bu, okwolem Nda. O za nye magwu masi nye Nda bu, okwolem Nnwọ wam, nu ele Nnwọ wam piuru o kpumenu a.”

23 Ige wam o tuhnasna hne ele sno apna a zi, kanu be ichne, “Owa oma zinu anya ke whuru nhne anu whuru.

24 Me kanu anu, agida ele owhurninya nu ele eze piuru o whu nhne anu nowhnu kovu be whuna, nu o uru nhne anu nonu, kovu nu be nuna.”

Elulu nye Sameria oma

25 Otu mgba, nye ogwnu iwu lizoru naakpa Jizosi iru, sika a, “Nye-zni-nhne, kini bu nhne me jeeme ma m kehia m budnu kwó okwo?”

26 Jizosi saru a, “Kini bu nhne be gbaru n'iwu? Ndaa kpa i ogwnu a?”

27 O saru, “I jeegweru kpakara mkpoma i nu kpakara mkpuru ovu i, nu kpakara iknema i nu kpakara echiche i whu Nyenwe ai Chiokike i n'anya. Whu masi nye agbatibi i n'anya lele ehni i.”

28 Jizōsi kanu a, “I sak-wahiaru a, mee kpam, i jaazi buḍnu.”

29 Kōvu o pioru o mee ɛhni a nye ɔma, ɔ sɔkwa Jizōsi, “Nyele bu nye agbatibi m?”

30 Jizōsi saru a, “Otu nwerukna hiri nu Jeruselem neezne Jeriko, ɔ dnabna n'aka ele buznu. Be woru iwo a, li a nhne, gbawhu, sigbasi a n'onu ɛnwu.

31 O dnabna nu otu nye arɔhna neewhe n'apna wam, nga ɔ whnuru a, ɔ garu ngeri berere znernu hne o znezne.

32 Kpam masi, otu nye Li-vai, nga ɔ vaduru hne ɔ zi, whnu a, ɔ garu ngeri berere znernu hne o znezne.

33 Kōvu otu nye Sameria neewhe n'apna wam, vaduru hne ɔ zi, nga ɔ whnuru a, ɔ ɔnu a obirizi.

34 O znekwnusi a, wusi a mōno nu manya, knesi ɛnya a. O vukwasɔ nwerukna wam n'olu anɔ ɔro a, kwuzne a n'oro ele izne, legidne anya nkari.

35 N'ekile a, o nyee nyenwe ɔro ele izne wam iwai, kanu a, ‘Legidne a anya nkari, me hiehna, m jɔokwu i nhne ɔbula i mewhuru nu risi.’

36 “N'esilawuru badnu ɛto ka, ndaa nye i cheru gesiri nu nye wam dnabnarnu n'aka ele buznu bu nye agbatibi a?”

37 Nye ɔgwu iwu wam kaa, “Nye wam ke ɔnu a obirizi.”

Jizōsi kanu a, “Zne, mee kpam.”

*Jizōsi znernu ɔro
Mata nu Meri*

38 Nga be neezne n'apna, Jizōsi nu ele sno apna a va otu ɛli-ɔhna, zne n'oro Mata nye gbamanu a ɔro a.

39 Mata nwernu otu nwene rinya rewhna a bu Meri, Meri znernu daziri ɛli n'ochi Nyenwe ai, nōonu ikwu-ɔnu a.

40 Kōvu echiche Mata jihiaru n'ernu ɔ nōornu, ɔ vakwnusi Jizōsi kaa, “Nyenwe ai, ɔ gbasiila i nu nwene m rinya sigbasiri me nunsnu m nōornu ɛnu? Kanu a ma o yisinu m aka.”

41 Jizōsi saru a, “Mata, Mata, i naari ɔriri, neemekpa ɛhni i ɛhni kwnornu agida nhne.

42 Kōvu otu nhne zi mkpa. Meri hɔrulam nhne ke ka mma, ɔ za nye jeenwe rikne nahuru a ya.”

11

*Jizōsi znirni nhne
gbasiri okpukpe*

(Mat 6:9-13; 7:7-11)

1 O du otu ɔbochi Jizōsi zi neekpe okpukpe n'otu hnanum, nga o kpekworu, otu nu ele sno apna kanu a, “Nyenwe ai, zni ai kpa be kpe okpukpe lele kpa Jōni znirni ele sno apna a.”

2 O kanu be, “Nga anu neekpe, anu kaa,

‘Nda ai,
rewhna i buru nhne zi
nsɔ.

ɛli-eze i va.*

* 11:2 Agwna nhne be gbaru kwuru be mee nhne i noopio n'owa lele kpa be mee a n'oligwe

3 Nyee aị wiri tna, ke joozunu aị obochi tna.

4 Gbaraṅu aị mmehie aị, lele kpa a jaagbaraṅu ele mehieru aị.

I yísi aị nụ rime nhne ọrnurna.[†]

5 O kanụ be, “O bụru nụ otu nụ rime anụ nwernu enyi, o znekwnusi a n'esilawuru abali, kaa, 'Enyi m, gbaznisi m ike brẹdi ẹto.

6 Otu enyi m berere vakwnusiri m, m nwée m nhne me jeenye a.’

7 “Enyi a hi nụ rime ọro sa a, 'Ikpákna m ẹhni. M tũsnilem ọro, me nụ rụmu m dnanyi n'okpata. M jéenwe rikne lizo nye i nhne ọbula.’

8 Me kanụ anụ, ọ bụ n'ezi nụ o jéelizo nye a kwnornu nụ ọ bụ enyi a, kọvu kwnornu nụ iwhnerne zá nọtụ nye ọrio, o jeelizo nye a.

9 “Kpam masi, me kanụ anụ, anụ rịo, be jeenye anụ, anụ pio, anụ joopiohia, anụ znu aka n'ọnu-mgbo, be jaagbamanụ.

10 Kwnornu nụ nye ọbula ke nọorio, nọoriohia, nye noopio, noopiohia, nye nooznu aka nụ mgbo be jaagbamanụ a.

11 “Ndaa nye bụ nda n'esilawuru anụ, nye nnwọ a jọorio aznụ, o nyee a agwọ?[‡]

12 Mọbu ọ rịo a ẹkwna ọchichi, o nyee a akpi?

13 O bụru anụ ele jọgburu ẹhni anụ nụ bujo mahiaru o nyee rụmu anụ nkesi bụru ọma, ọ kọ bụru Nda anụ ke

oligwe, ọ bụ nụ o jéenye ele nọorio a Enine Nso?”

Jizọsi nụ Belizibolu
(Mat 12:22-30; Mak 3:20-27)

14 Jizọsi naachihala renwu ojo ke dnarnu mgbu. Nga renwu ojo wam whogaru, nwerukna wam ke dnarnu mgbu kwuru oka, o du kpakara ele badnu ẹhni.

15 Kọvu agwna be kaa, “O ji rikne Belizibolu nye risi ele renwu ojo naachihala renwu ojo.”

16 Ele berere naakpa a iru, kaa, o gesi be nhne elekema hi n'oligwe.

17 Jizọsi mahiaru mkpoma be, ọ kanụ be, “Eli-eze ọbula kewama megidne ẹhni a, ọ jootubiri etekne, ọro ọbula kewama megidne ẹhni a, ọ jaadna.

18 O bụru nụ Setani kewama megidne ẹhni a, eli-eze a jógwuzoli. M nookwu ka kwnornu nụ anụ karu nụ m ji m rikne Belizibolu naachihala renwu ojo.

19 Kịtna, ọ bụru nụ m ji m rikne Belizibolu naachihala renwu ojo, ele sno anụ ji rikne nyele naachihala be? Be jọobu ele ikpe anụ.

20 Kọvu ọ bụru nụ m ji m aka Chiokike naachihala renwu ojo, eli-eze Chiokike dulam anụ ẹhni.

21 “Nga nye dikne woru mgwna ọgwnu a, neese ọro a, ẹkwnu a zi n'udno.

22 Kọvu nga nye kakwo a rikne varu, megbu a,

[†] 11:4 Agwna nhne be gbaraṅu kwuru dọhia n'aka nhne ọrnurna [‡] 11:11 Agwna nhne be gbaraṅu kwuru brẹdi

o nahoru a kpakara mgwna ogwnu a ke o tukwasiri mkpoma, kesa ekwnu a.

23 “Nye dagwunu m, neemegidne m, nye snone m chikota nhne, noobosa obosa.

Renwu ojo hiehnarnu
(Mat 12:43-45)

24 “Nga renwu ojo hiri nu rime badnu whoga, o zneghari n'eli chna chna chna, noopio hne o joozukwa inwe. O buru nu o whnuna, o kaa, ‘Mjaalahna n'oro me hiri whuya.’

25 Nga o vaduru, o whnu nu be zasnarnu oro wam bikwata nhne nkari.

26 O jeezne chiri renwu ojo esau ibne a ele nwernu risi rikne karu a, be wuru nu rime nye wam. Onodi ipneaznu nye wam johnasi bujo karu kpa o zi nu mbom.”

Nye owa oma n'ezi

27 Kpa Jizosi zi nookwu oka ka, otu nwerinya siwama n'igbudu badnu wam, “Ruwuho ke wuru i nu rema ke i nwornu bu nhne be goziri ogozi.”

28 Jizosi saru, “Ele owa oma karukwo bu ele nonu ikwunu Chiokike, neeme be.”

Nhne elekema ke Jona
(Mat 12:38-42)

29 Kpa igbudu badnu wam gbakoru hne Jizosi zi, o kanu be, “Ebiri ojo ka noopio nhne elekema, o za nhne elekema be jeenye be, okwolem nhne elekema Jona.

30 Lele kpa Jona bu nhne elekema ke ele Ninive, o bu

kpa Nnwọ ke Badnu jobunu ebiri ka.

31 Eze nyerinya Seba jeelizo ya nu ele ebiri ka bna n'ikpe, o jaama be ikpe, kwnornu nu o hiri n'osotoma k'owa va nuru akoniche Solomoni. Kovu le, nhne kakwo Solomoni zi hna.

32 Ele Ninive jeelizo, be nu ebiri ka bna n'ikpe, be jaama be ikpe, kwnornu nu be tuhnasnarnu mkpoma n'okpo okwo Jona. Kovu le, nhne kakwo Jona zi hna.

Iwhne ke ehni
(Mat 5:15; 6:22,23)

33 “O za nye joomusi tonji bita a nu hne tugwaru otugwa, mabu bita nu mkpururu nkita. Tnunuma, be bita a n'olu nhne be bita tonji, ma ele naabnanya oro whnurnu iwhne a.

34 Anya bu iwhne ke ehni. O buru nu anya i buru oma, kpakara ehni i jobu iwhne iwhne. Kovu o buru nu anya i buo oma, kpakara ehni i jaagba ochichiri.

35 Anu ledukom anya o zi iwhne ke zi anu n'ehni bo gho ochichiri.

36 Ka kpayaru, o buru nu kpakara ehni i bu iwhne iwhne, o za ngeri ke gbaru ochichiri, kpakara ehni i jobu iwhne lele nga tonji noomukwasi i iwhne a.”

Ele Farisi nu
ele zni iwu ele ju

(Mat 23:1-36; Mak 12:38-40)

37 Nga Jizosi kwukworu oka ka, otu nye Farisi sukwa a, o

va snornu a ri wiri, o snornu a zne, o daziri n'ikpechi.

³⁸ Nye Farisi wam whnurnu nu Jizosi kwoge aka bete ri wiri, o du a ehni.

³⁹ Nyenwe ai kanu a, "Kina anu ele Farisi beru osno snu aznu okiko nu agbugba wiri, kovu nu owho-anya nu agwa ojo jiharuru nu rime anu.

⁴⁰ Anu ele iwhnirniwhno! O buo otu badnu wam mernu rime okiko nu aznu a?

⁴¹ Anu gweru nhne zi nu rime agbugba wiri donu ele mboni obirizi, kpakara nhne jaazinu anu richna.

⁴² "Awhnuwhnu zinu anu ele Farisi, kwnornu nu anu nookwu otu nga nu nri ke kpakara mkporo okwukwo nwernu eknarna oma ke ekwu, kovu anu juru ikpe zi snam nu owhnun'anya Chiokike. O zi mkpa nu anu zernu eme nhne ka nu ke berere.

⁴³ "Awhnuwhnu zinu anu, ele Farisi, kwnornu nu anu whnurnu risi ngadna n'oro ogbako anu n'anya, o naamasị anu ele badnu neebekwu anu ikwu n'ahia.

⁴⁴ "Awhnuwhnu zinu anu, ele Farisi, kwnornu nu anu nu lele ilili ke ele badnu ma noozo ochi n'olu a."

⁴⁵ Otu nye ogwnu iwu saru Jizosi, "Nye-zni-nhne, oka ka i nookwu naakpasị ai iwhnerne."

⁴⁶ Jizosi saru nye ogwnu iwu wam, "Awhnuwhnu jaazinu anu ele ogwnu iwu, kwnornu nu anu noovute ele badnu ivu rinya be vuru, kovu anu

n'iwhuru anu jeeageru otu mkpaka anu yinu be aka.

⁴⁷ Awhnuwhnu zinu anu, kwnornu nu anu noowu ilili ele owhnurninya, ele nda anu oknani gburu.

⁴⁸ Anu bu ele akebbe nu ele kwnagidnerneru nhne ele nda anu oknani mernu, be gburu ele owhnurninya, anu wu ilili be.

⁴⁹ Chiokike nu nhne omuma a karu, 'M jeeziznenu be ele owhnurninya nu ele izi, be joogbu agwna be, be jaakpakna ele berere ehni.'

⁵⁰ Kam kpayaru, ebiri ka jaata awnwhnu kpakara onnarna ele owhnurninya be gburu hite n'opanizo owa,

⁵¹ hite n'onnarna Ebeli du n'onnarna Zakaraya, nye be gburu n'iketa ojo ariohna nu hne zi nsọ. Owe! Me kanu anu, ebiri ka jookwu kpakara ogwo onnarna ka.

⁵² "Awhnuwhnu zinu anu ele ogwnu iwu, kwnornu nu anu gwemernu snambi ke naagbama onuhna akoniche, anu bnage, anu kwéle ele pi-oru o bna be bna."

⁵³ Nga Jizosi hiri nu pi whoga, ele Farisi nu ele zni iwu ele Ju nookwunu a onu rikne, nesikwa ajiji agida nhne.

⁵⁴ Be needne, noopio ma be jonu nhne be jeeji bno a nhne.

12

*O do aka nu nsni
gbasiri ruwhnu lawuru
(Mat 10:26,27)*

1 Nga igbudu ele badnu gbakoru hne Jizosi zi ke mernu be nọozo ibne be ọchi, Jizosi beru ọsno naakanu ele sno apna a, “Anu neeze nhne whu bredi ke ele Farisi, ke bu ruwhnu lawuru.

2 Kwnornu nu be jookpume kpakara nhne be kpusnirni okpusni, kpakara nhne be tugwaru otugwa jowhuya iwhe.

3 Nhne anu kwuru n'ochichiri, be jookwuhia n'iwhehnie, ke anu tukasiri nu nsni nu rime oro mati, be jookwuhia n'olu oro.

*Nye anu kwesiri
o tu ogwnu*

(Mat 10:28-31)

4 “Ele enyi m, me kanu anu, anu tu ogwnu ele noogbu ano-ehni, ele nwee rikne o mee nhne berere.

5 Kovu me kanu anu nye anu jootu ogwnu a, anu tu ogwnu nye wam ke nwernu rikne gbu ano-ehni, tubna enine nu rime bekwnu. Owe! Me kanu anu, anu tu ogwnu a.

6 Be za neere wonzna isne mkpuru iwai mati lawuru? Kovu Chiokike za nechezu otu nu ruwhnu a.

7 N'ezi, be gwnurnu kpakara rukeri-ize ke risi anu onu. Ogwnu tu anu, anu zi okne onu ahia karu agida wonzna.

O kwuhia nu o ju Karaisi

*(Mat 10:32,33; 12:32;
10:19,20)*

8 “Me kanu anu, nye obula ke jookwuhia m nu ruwhnu ele badnu, Nnwọ ke Badnu jookwuhia nye

wam nu ruwhnu ele enine izi Chiokike.

9 Kovu nye obula ke jogonahoru m nu o ma nye me bu nu ruwhnu ele badnu, m jogonahoru a nu ruwhnu ele enine izi Chiokike.

10 Nye obula ke kwuru oka ojo megidne Nnwọ ke Badnu, be jaagbaru a, kovu nye obula ke kwuru kwugidne Enine Nso, be jaagbaru a.

11 “Nga be jookwuru anu zne n'oro ogbako ele Ju, nu ruwhnu ele ochichi nu ele risi, kpe anu ikpe, mkpoma lako anu mini kpa anu jogoru onu anu mobu nhne anu jookwu.

12 Enine Nso jeezni anu n'ige wam nhne anu jookwu.”

*Elulu nye eze
iwhnirniwhno*

13 Otu badnu n'esilawuru igbudu badnu wam, kanu Jizosi, “Nye-zni-nhne, kanu nwene m rukna ma o keme mkpe ai.”

14 Jizosi saru a, “Enyi m, nyele mernu m nye ikpe mobu nye ke mkpe n'esilawuru anu?”

15 O kanu be, “Anya du anu eli gbasiri kpakara owho-anya, kwnornu nu budnu badnu hige n'agida ekwnu o nwernu whuya.”

16 Jizosi tnu be elulu ka, “Ekwu otu nye eze mirmi agida mkpuru.

17 Nye eze wam naari nu mkpoma a, ‘Ndaa nhne me jeeme? M nwee m obna hne me jaabita mkpuru m.’

18 “O kaa, ‘Ka bu nhne me jeeme, m jaakwnadna

kpakara ọbna m, wu ọbna ikne ke zị rude, m jaabita kpakara mkpuru m nụ ẹkwu m nụ rime be.

19 M jaakanu ẹhni m, I nwernu agida ẹkwu i kpabitaru agida awaha, zukuwaru inwe, ri, nwo, mkpoma so i n'onu.

20 "Kovu Chiokike kannu a, 'Ji nye iwhnirniwhno, be noopio budnu i n'aka i n'abalika. Nyele jeenwe kpakara nhne i kpabitannu ẹhni?' "

21 "Ka bu kpa o jaazinu kpakara ele kpabitannu ẹhni be ẹkwu, kovu be nwée ẹkwu nu ruwhnu Chiokike."

*Anu kwnata Chiokike
mkpoma*

(Mat 6:25-34)

22 Jizosi kanu ele sno apna a, "Ka bu nhne me kwno naakanu anu, anu rigbuko ẹhni anu n'oriri gbasiri budnu anu, nhne anu jeeri, mọbu gbasiri ẹhni anu, iwo anu joowo.

23 Budnu kakwo wiri, ẹhni kakwo iwo.

24 Anu le rumu onunu, be gha mkpuru, be za neegwe nhne n'ekwu, be nwée ọbna hne be bita mkpuru, kovu Chiokike nooznu be. Anu zị okne onu ahia karukwo rumu onunu.

25 Ndaa badnu n'esilawuru anu ke nwernu rikne tukwasi nhne nu budnu a hite n'origbu ẹhni a?

26 Hne o bu nu anu nwée rikne mee nhne mati nu kpa, kini mernu anu naarigbu ẹhni anu gbasiri nhne ke berere?

27 "Anu lekọm atna kpa be nooso. Be za noodogbu ẹhni be n'ernu, be kwné ikpe. Kovu me kanu anu, o bubi Solomoni n'iwuru a nu kpakara igwugwu a, yige eyi lele otu nu rime be.

28 O buru nu Chiokike noowosi achara ke zị n'ekwu iwo, bu ke zị tna, ekile be kporne be nu bekwnu, o kovu anu, o joowosi anu iwo, anu ele okwnata ovu mati.

29 Anu tukwasi mkpoma anu nu nhne anu jeeri mọbu nhne anu jooonwo, anu rigbu ẹhni anu gbasiri a.

30 Kwnornu nu kpakara nhne ka bu nhne ele máa Chiokike noopio, Nda anu magwu nu kpakara nhne ka zị anu mkpa.

31 Kovu anu pio eli-eze Chiokike, o jootukwasinu anu kpakara nhne ka masi.

*Ekwu ke zị n'oligwe
(Mat 6:19-21)*

32 "Anu tu ogwnu, ogbori atnurnu mati, kwnornu nu o masiri Nda anu o nyee anu eli-eze a.

33 Anu re nhne anu nwernu kesi ele mboni. Anu mehianu ẹhni anu rekpa iwai ke ka aka, anu kpabita ẹkwu n'oligwe ke kwó okwo, hne nye buznu nwée rikne zne, akika za naata ẹkwu zị pi.

34 Kwnornu nu hne ẹkwu anu zị bu hne mkpoma anu jaazi masi.

Ele izi anya duru eli

35 "Anu jiknenu noornu ẹrnu, ele tonji be noonwu onwu.

36 Lele ele neese nyenwe be znernu iriri ọlulu nnwerne ikne ma o hiehna, nga o hieru, znu aka n'ọnu-mgbo, be gbamanu a ọro wara wara.

37 Ọwa ọma zinu ele izi wam nyenwe be jọowhnu hne be neese nse nga o hiehnarnu. Me kanu anu ezi ọka, ọ jọosuru ajni n'ikwnu, kanu be, be daziri ẹli ri wiri, ọ buru nye izi be.

38 Ọwa ọma zinu ele izi wam, ọ buru nu nyenwe be varu n'esilawuru abali mọbu n'ọnu ọsisi, ọ jọowhnu nu be zi neese nse.

39 Kọvu anu mahia nu ọ buru nu nye nwe ọro mahjaru ọtnu-ige nye buznu jaava, o béekwele be liwa ọro a.

40 Kam kpayaru, anu neese masi nse, kwnornu nu Nnwọ ke Badnu jaava ige anu tuge anya a.”

*Ọhi ke kwesiri
ọ kwnata mkpoma
(Mat 24:45-51)*

41 Pita sikwa a, “Nyenwe ai, i ọnotnunu ai elulu ka, sọbu kpakara badnu.”

42 Nyenwe ai saru a, “Nyele bu ọhi wam ke be kwesiri ọ kwnata mkpoma, nye nyenwe a mernu nye risi ọro a, ma o neenye ele ọhi wiri n'ige kwesiri?”

43 Nye risi ọro wam jọobu nye ọwa ọma ọ buru nu nyenwe a jaava whnu nu o mernu nhne kwesiri.

44 Me kanu anu ezi ọka, nyenwe a jeeme a nye jeelekota kpakara ẹkwnu a.

45 Kọvu ọ buru nu ọhi wam jaakaa nu mkpoma a, ‘Nda m

kwu gbulem ọkwnu,’ o bete naaligbu ele ọhi rukna nu rinya, neeri, ọnonwo manya, manya noogbu masi a.

46 Nda kwu ọhi wam jaava n'ọbochi ọ tuge anya a nu n'ige ọ máa. O joogbubi a ichichi lawuru, mee ya nu ele kwé ekwe takọ awhnwhnu.

47 “Nye izi ke marnu nhne nda a kwu pioru, o jiknernune o mee a, be jaapnia agida mbinibini.

48 Kọvu nye ke máa, ke mernu nhne kwesiri be ta a awhnwhnu, be jaapnia a mbinibini mati. Kwnornu nu nye be nyernu agida nhne, bu nye be joo pio agida nhne n'aka a. Nye be nyernu agida nhne o legidne anya, be joo pio nhne zi agida karukwo n'aka a.

*Jizosi, nhne neegweya
okewa*

(Mat 10:34-36)

49 “M varu m o gweya bekwnu n'owa, nhne me noopio ọ bu nu o noonwu kitna.

50 M nwernu m mini be jowu m, m joozukwa inwe tem be mezu a.

51 Anu cheru nu m gweyaru m udno n'owa? Ọza! Me kanu anu, m gweyaru m okewa.

52 Hite nu kitna zne nu ruwhnu, badnu isne zi n'otu ọro jeekewa, badnu ẹto megidne badnu lawuru, badnu lawuru megidne badnu ẹto.

53 Be jeekewa
Nda megidne nnwọ a rukna, m

nnwọ rukna megidne
nda a,
nne megidne nnwọ a rinya,
nnwọ rinya megidne nne
a,
nne nzi megidne nnwerne
nnwọ a,
nnwerne nnwọ megidne
nne nzi a.”

*Anụ ghọhia ige ka
(Mat 16:2,3)*

⁵⁴ Jizọsi kanụ igbudu badnụ
wam, “Nga anụ whnụrnụ
rụnwurnu oligwe hi n'ọdidna
ẹhnam, ngangam anụ kaa,
'Mini joozo,' mini zo masị.

⁵⁵ Nga anụ whnụrnụ
ruwhere ndịdna hne o nee-
whe, anụ jaakaa, 'O jeerne
bẹkwnu,' ọ ziri kpm.

⁵⁶ Anụ ele ruwhnu lawuru!
Anụ magwụ kpa be le ọwa nụ
ruwhnu oligwe anya gwnụ
nhne ọ jọbu. Kọvu ndaa kpa
anụ máa ige ka?”

*Ji nụ nye irno i mee udno
(Mat 5:25,26)*

⁵⁷ “Kini mernu anụ máa
nhne bụru ọma nụ omume?”

⁵⁸ Nga jị nụ nye kwu i
neeze ikpe zị n'apna, gbalị
ma jị nụ a mee udno n'apna, ọ
búla kpm, ọ jọpnrnụ i nyee
nye risi ikpe, nye risi ikpe
nyewhete i nye neelekọta ele
ikelu, ọ túbna a n'oro ikelu.

⁵⁹ Me kanụ i, i jọowhuya pị
tem i kwuhnata kpakara iwai
ipne-aznụ i jigwu.”

13

*Tuhnasna mkpọma hite nụ
mmehie mọbu nwụ ẹnwu*

¹ Agwna ele zị nụ pị kanụ
Jizọsi nhne gbasiri ele Galili

ele Paileti jiri ọvnarna be
gwasị n'ariọhna be.

² Jizọsi saru be, “Anụ
che nụ ele Galili ka bụ ele
mmehie kakwo ele Galili
berere kwnornu nụ be taru
awhnụwhnu kpa?”

³ Me kanụ anụ, ọza. Kọvu
okwolem ma anụ tūhnasarnu
mkpọma, anụ jọonwu lele be.

⁴ Mọbu anụ che nụ nri nụ
badnụ ẹsato ele ọro olu ke zị
nụ Saịlom dnagburu, nụ be
bụ ele ikpe marnu karu ele
berere ele zị nụ Jeruselem?”

⁵ Me kanụ anụ, ọza. Kọvu
ọ bụru nụ anụ tūhnasana
mkpọma, anụ jọonwu lele be.”

Elulu isisi figi

⁶ Jizọsi tñnu be elulu
ka, “Otu nwerukna kpasiri
figi n'ekwu a, o zne noopio
mkpuru n'olu a, kọvu ọ
whnuna mkpuru ọbula.

⁷ Ọ kanụ nye neelekwa
ekwu figi wam, 'Ka bụ awha
eto me naava hna noopio
mkpuru n'olu isisi figi ka,
kọvu m zá nọowhnu mkpuru
ọbula. Gbudna a! Ndaa ke o
noolulu ẹli n'etekne?’

⁸ “Ọ saru a, Nda-ai-kwu,
'Gharu a otu awha berere, m
joogwu ẹli gburugburu wusi a
nsni anọ.

⁹ Ọ bụru nụ ọ minya
mkpuru, ọ bụru ọma, kọvu ọ
bụru nụ ọ minyinage mkpuru, i
gbudna a.’ ”

*Jizọsi gwọru nrịria
n'Ọbochi Ozukwa Inwe*

¹⁰ N'otu Ọbochi Ozukwa
Inwe, Jizọsi zị neezni nhne
n'oro ọgbako ele Ju,

11 otu nwerinya zị nụ nrịria nri awha nụ ẹsato, ke kpa-yarụ nụ o gbewhu egbewhu, o nwée rikne gwuzoru kwem rịa rịa.

12 Nga Jizọsi whnụrnu a, o sukwu a, kanụ a, “Nwerinya, nrịria ị lalam.”

13 O tụtkwasi a aka a lawuru, ngangam, nwerinya wam gwuzoru kwem, znarni Chiokike.

14 Kọvu ovu weru nye risi ọro ọgbako ele Ju ẹhni k'agịda kwnornu nụ Jizọsi gwọru nrịria n'Ọbochi Ozukwa Inwe. O kanụ ele badnụ wam, “A nwernu ọbochi isunu a ji nọornu ẹrnu, anụ va ma be gwọ anụ nrịria n'Ọbochi ele ka, kọvu ọ bụo n'Ọbochi Ozukwa Inwe.”

15 Nyenwe aị sarụ a, “Anụ ele ruwhnu lawuru, anụ zá nọotoma ehni anụ mọbu ịyinya anụ n'Ọbochi Ozukwa Inwe zne nyee a mini?”

16 Nwerinya ka ke bụ nnwọ rinya Ebereham nye Ekwensu knernụ eriri nri awha nụ ẹsato ka, ọ bụo ọma be tọma a eriri ka ma o nwernu ẹhni a n'Ọbochi Ozukwa Inwe?”

17 Nga o kwuru ka, iwh-nerne tị kpakara ele noog-wuzogidne a. Kọvu igbudu badnụ wam nwụdnarnu kwnornu agịda ẹrnu ndu-ẹhni ọ nọornu.

Mkpuru mọsitadi nụ nhne whụ brẹdi (Mat 13:31-33; Mak 4:30-32)

18 Jizọsi sịkwa be, “Eli-eze Chiokike, o yiri lele kịni? Kịni bụ nhne me jeeji gbu esi a?”

19 O nụ lele mkpuru isisi be kwu mọsitadi ke badnụ kpasiri n'ekwu a. O so, ghọ isisi ke rụmu ọnnu oligwe nọornu alikwu nụ nkala a.”

20 Berere kwno, ọ kaa, “Ndaa nhne me jeeji sninu ẹli-eze Chiokike?”

21 O nụ lele nhne whụ brẹdi ke nyerinya gweru gwasị n'agịda ịkpa tem kpakara a whụ.”

Ọnu-mgbo ke zị nwọronwo (Mat 7:13,14,21-23)

22 Jizọsi neezne hi nụ otu ẹli-ọhna dū ẹli-ọhna berere neezni nhne kpa o neezne Jeruselem.

23 Otu badnụ sịkwa a, “Nyenwe aị, okwole badnụ ele nụ ele bụ ele be jọoznohia?”

Jizọsi sarụ be,

24 “Anụ yisi ẹhni garụ n'ọnu-mgbo ke zị nwọronwo, me kanụ anụ ezi ọka, agịda ele badnụ joopio ọ bna, kọvu be jéenwe rikne bna.

25 Nga nda kwu nwe ọro lizọru gbasni ọro, anụ joog-wuzo n'ederezi nooznu aka, naariasno, 'Nda-aị-kwu, bikno, gbamanụ aị ọro.'

“O jaasa anụ, 'M máam ele anụ bụ mọbu hne anụ hi va.'

26 “Ige wam anụ jaakaa, 'A sno i ri wiri, nwọ nhne ọnwunwo, i znirni nhne n'ẹli aị.'

27 “Kọvu ọ jaasa anụ, 'M máam ele anụ bụ mọbu hne anụ hi va. Anụ hi hne me zị whọga, anụ ele aruru-ẹli.'

28 “Ọkwana ẹkwana nụ ọta rụkwnurnu-ize jaazị nụ pịi nga anụ jọowhnu Ebereham,

Aziki nū Jekōpu nū kpakara ele ọwhnurninya n'ẹli-eze Chiokike, kọvu anụ buru ele be chihalaru n'ederezi.

²⁹ Ele badnụ jeehi n'ọbosi ẹhnam nū ọdidna ẹhnam, hi nū rugwu nū ọdidna va, daziri ẹli n'iriri ke ẹli-eze Chiokike.

³⁰ N'ezi ọka, agwna ele ipne-aznụ jọbu ele be ọsno, agwna ele be ọsno jọbu ele ipne-aznụ."

*Jizōsi whnurnu
Jeruselem n'anya
(Mat 23:37-39)*

³¹ Ige wam agwna ele Farisi vakwnusiri Jizōsi kanụ a, "Hi nū hna whọga, zne hne berere. Erọdu pioga o gbu i."

³² Jizōsi sarụ be, "Anụ zne kanụ edu wam, m jaachihala rẹnwu ojo, gwọ masi ele nriria tna nū ekile, n'ọbochi ke ẹto, m jọrnuzu ẹrnu m.

³³ Kpa ọ zi, m jeezneriri tna nū ekile nū ọbochi ke sno a, kwnornu nū o kwésile be gbu nye ọwhnurninya nū hne búo Jeruselem.

³⁴ "Chei! Jeruselem, Jeruselem, ji ke noogbu ele ọwhnurninya, ke ji akaworugwu nọolo ele be ziyannụ i. Mgba ele kpa me pioru ọ chikota rumu i lele kpa enwerne ọchichi nẹchikota rumu a nū mkpururu aka nkwu a lawuru, kọvu i kwéle.

³⁵ Le, be nẹsigbasinu anụ ọro anụ ma ọ tọbiri etekne. Me kanụ anụ, anụ jọwhnu m berere tem dụ nga anụ jaakaa, 'Chiokike gọzi nye wam ke naava nū rẹwhna Nyenwe a!'"

14

Jizōsi zi n'oro nye Farisi

¹ Ọ dụ otu Ọbochi Ozukwa Inwe, nga Jizōsi zi n'oro otu nye Farisi be marnụ rẹwhna a neeri wiri, ele badnụ zi needne a.

² Otu nwerukna ọchi a lawuru nū aka a zarụ aza zi nū ruwhnu a.

³ Jizōsi sịkwa ele Farisi wam nū ele zni iwu, "Ọ buru ọma n'iwu ọ gwọ nriria n'Ọbochi Ozukwa Inwe, sọbu ọ búo ọma?"

⁴ Kọvu be kpusnirni ọnu be. Jizōsi nwugwu nwerukna wam n'aka gwọ a nriria wam, zihala a.

⁵ Jizōsi sịkwa be, "Ọ buru nū i nwernu nnwọ rukna mọbu ehni ke dnabnarnụ ọmi n'Ọbochi Ozukwa Inwe, anụ jéegwehija a n'Ọbochi Ozukwa Inwe?"

⁶ Ọ zá nhne be sarụ a.

Badnụ o gwedna ẹhni a ẹli nū ovu ọma

⁷ Nga Jizōsi whnurnu kpa ele be sukwuru nọhoru risi ngadna be jaadazi, ọ tnnu be elulu ka,

⁸ "Nga badnụ ọbula sukwuru i ikwu iriri ọlulu nnwerne, i dazi nū risi ngadna, kwnornu nū nye nwernu igwugwu kakwo i nwernu rikne va.

⁹ Ọ buru kpam, nye sukwuru anụ lawuru jaavakwnusi i, kanụ i, 'Nye nwerukna ka ngadna i.' Ige wam i jeeji iwhnerne daziri nū ngadna ke zi ẹli ẹli.

¹⁰ Kọvu nga be sukwuru i, daziri ẹli nū ngadna ke zi

ẹli ẹli. Nye wam ke suk-wuru i jaavakwnusi i, kanụ i, 'Enyi m, zne nụ ngadna ke ka mma.' Ige wam i jeenwe ig-wugwu nụ ruwhnu ele varụ pii.

11 Kwnornu nụ be jeeg-wedna nye ọbula ke gwelizọru ẹhni a olu, nye ọbula ke gwednarnụ ẹhni a ẹli, be jeegwelizọ a."

12 Jizọsi kanụ nye wam suk-wuru a, "Nga i siri wiri ọsisi mọbu ke anyasnu, i síkwu ele enyi i kpọi, nụ rụmu nwene i mọbu ele ibne i ele eze, i mee kpam, be jeesi wiri sukwu kwno i, ige wam be kwulam jị ọgwo.

13 Kọvu nga i mernu iriri, sukwu ele mboni, nụ ele ọru, nụ ele mgworo nụ ele isni,

14 be jọgozi i. Ọ bụ n'ezi nụ be nwée rikne kwụ i ọgwo, kọvu Chiokike jọkwuhnata i nga ele ọma jeehi n'ẹnwu lizọ."

*Elulu okne iriri
(Mat 22:1-10)*

15 Nga otu nye dazị neeri wiri nurnu a, ọ kanụ Jizọsi, "Ọwa ọma zinu nye jeeri wiri n'ẹli-eze Chiokike."

16 Jizọsi sarụ a, "Otu nwerukna siri okne iriri sukwu agịda ele badnụ.

17 N'ige iriri wam, o zihala nye izi a, ọ kanụ ele be suk-wuru, 'Vaa, be mekwolem kpakara nhne.'

18 "Kọvu kpakara be n'otu bete nọorio be gharụ be. Nye ke mbom kaa, 'M zuru m ẹli ẹkwu, m jeezne lekwa a, bikno gwnụsi m n'ele i gharuru.'

19 "Nye berere kaa, 'M zuru m nri ehni be knekọtaru ẹbo

ẹbo, m neezne ọ tūle be, bikno gwnụsi m n'ele i gharuru.'

20 "Nye berere kaa, 'M luru m nnwerne ikne, m jéenwe rikne va.'

21 "Nye izi wam hiehna kanụ nda a kwu kpakara nhne ka. Ige wam ovu weru nda nwe ọro wam ẹhni, ọ kanụ nye izi a, 'Wara wara, zne nụ ngeri apna nụ kpakara apna ke ẹli-ọhna kwubnanya ele mboni, nụ ele ọru nụ ele isni nụ ele mgworo.'

22 "Nye izi wam zne, hiehna, kaa, 'Nda-aị-kwu, m mene m nhne i karụ me mee, kọvu oghere zị kọriri.'

23 "Nda a kwu kanụ a, 'Zne n'apna ma nụ ẹkwu, kwnagidne ele badnụ ma be bnanya, ma ele badnụ jihia n'oro m.'

24 Me kanụ i, kpakara ele wam me sukwuru ikwu nụ mbom, ọ zá otu badnụ nụ rime be ke jeeri iriri m."

*Nhne nye sno apna Jizọsi
jọowhnu*

(Mat 10:37,38)

25 Agịda ele badnụ sno Jizọsi neezne, ọ tūhnasna kanụ be,

26 "Ọ bụru nye ọbula vakwnusiri m, kọvu o snóne nda a nụ nne a, nụ nnwerne a, nụ rụmu a, nụ rụmu nne a rukna nụ rụmu nne a rinya irno, ma bụdnu ke a masi, ọ jọobuli nye sno apna m.

27 Nye ọbula ke vúrule ọgba a sno m, jọobuli nye sno apna m.

28 "Ndaa otu badnụ n'esilawuru anụ ke noopio o wu ọro olu, o jéebe ọsno daziri ẹli gwnụ nhne o jeegwe a, ma

o nwernu iwai o jeeji wukwo a?

²⁹ Kwnornu nū ọ bụru nū ọ wa ẹli, kọvu o nwée rikne wukwo a, nye ọbula ke whnurnu a joomu a rumu,

³⁰ kaa, 'Nwerukna ka panizoru o wu ọro, kọvu o nwée rikne wukwo a.'

³¹ "Mọbu ndaa eze ke neezne ogwnu megidne eze berere, ke jéebe ọsno daziri ẹli tule ma o nwernu rikne gweru nri pokwu ele ogwnu gwuzogidne nye chi nri pokwu lawuru megidne a?"

³² Ọ bụru nū o nwée rikne, nga nye wam zi ikere, o jeezizne ele izi rịo nhne udno.

³³ Kpam masi, ọ zá nye ọbula nū rime anū ke jọobu nye sno apna m, ọ bụru nū ọ gharula kpakara nhne o nwernu.

*Arụa bnána iru
(Mat 5:13; Mak 9:50)*

³⁴ "Arụa bụru ọma, kọvu ọ bụru arụa tuwhu ọso n'ọnu a, be jeeji kini mee a ọ sọ n'ọnu?"

³⁵ Ọ búma ọma n'ẹli mọbu nū mkpomkpo. Be jootuwhu a n'ederezi.

"Nye nwernu nsni o ji ọ nū nhne, ọ nurnu."

15

*Elulu atnurnu whuru owhu
(Mat 18:12-14)*

¹ Ele ọna ntụ nū ele mmehie gbakọru nọonu ikwu-ọnu Jizọsi.

² Kọvu ele Farisi nū ele zni iwu ele Ju naatamu, be kaa, "Nwerukna ka nanabnanya ele mmehie, ya nū be sno neeri wiri."

³ Jizọsi tnunu be otu elulu,

⁴ "Ọ bụru nū otu badnū n'esilawuru anū nwernu otu riwhu atnurnu, otu kpawhu ọri. Ọ jáaghasa nri tolu nū tolu ke gwnarnū n'ohia zne pio otu ke kpawhuru akpawhu tem o piohia a?"

⁵ Nga o piohiaru a, ọ tükwasi a n'obe-aka a, nnonwudna.

⁶ Ọ la ọro sukwu ele enyi a nū ele agbatibi a, kaa, 'Anū snornu m nwudna, nū m piohiaru m atnurnu m ke kpawhuru ọri.'

⁷ Me kanū anū, ọ bụ kpa snarnima jaazi n'oligwe nū risi otu nye mmehie ke tūhnasnarnu mkpọma, kakwo nri tolu badnū nū tolu ele ọma ke ọtūhnasna mkpọma zá mkpa.

*Elulu mkpuru iwai
whuru owhu*

⁸ "Ọ bụru nū nyerinya nwernu nri mkpuru iwai, otu whunahọru a. Ọ joomusi tọnji, za ọro a, piosi a rikne tem o piohia a.

⁹ Nga o piohiaru a, o sukwu ele enyi a nū ele agbatibi a, kaa, 'Anū snornu m nwudna, m piohiaru m iwai m me tuwhuru.'

¹⁰ Me kanū anū, ọ bụ kpa snarnima jaazi nū ruwhnu ele enine izi Chiokike nū risi otu nye mmehie ke tūhnasnarnu mkpọma."

Elulu nnwọ whuru owhu

¹¹ Jizọsi tnū kwno elulu berere, kaa, "Otu nwerukna nwernu rumu rukna lawuru.

¹² Ke matị kanū nda a, 'Nda m, kesi m mkpe ke m.' Nda a keme ẹkwnu a n'esilawuru be lawuru.

13 “Nga ọbochi ele nụ ele whemernu, nnwọ ke matị chikota kpakara ẹkwu a, lizọ, zne mba zị ikere, daziri pị lulukwo kpakara ẹkwu a nụ bụdnu ojo.

14 Nga o mewhukworu kpakara nhne o nwernu, okne ọknunyo dnarnu n'ẹli wam, ọ bna nụ mkpa.

15 O zne yisi ẹhni n'ernu n'aka otu nye ẹli wam, nye wam zizne a ọ znu ezni n'ohia.

16 Ọ masiri a o ri ọri ezni, kọvu ọ zá nye nyernu a.

17 “Nga anya dornu a nụ risi, ọ kaa, ‘Kpakara ele nda m gornu ẹrnu nwernu wiri be ri, nootuwhu agwna a, kọvu m zị m hna nọonwu n'ogwnu wiri.

18 M jeelizo, lahnakwnusi nda m, m jaakanu a, Nda m, m mehielem megidne oligwe ma jị.

19 M kwésile m be kwu m nnwọ ị berere, kọvu me bụru otu nụ rime ele i gornu ẹrnu.’

20 Ngam, o lizo, znekwunusi nda a.

“Kọvu nga ọ zị hne zị ikere, nda a whnurnu a, donu a obirizi k'agida, gba ẹso kwnusi a, bnagidne a, snutu a ọnu.

21 “Nnwọ wam kanu nda a, ‘Nda m, m mehiele m megidne oligwe ma jị. M kwésile m be kwu m nnwọ ị berere.’

22 “Kọvu nda a kanu ele izi a, ‘Wara wara, anu chiya iwo ke kakwo mma, anu wosi a, gbasị a arị mkpaka n'aka a, anu wosi a okoro-ochi n'ochi a.

23 Anu toya nnwọ ehni be znurnu ọznu gbu a, mee iriri ma a nwudna.

24 Kwnornu nụ nnwọ m ka nwurnu ọnwu, kọvu ọ zị bụdnu, o whuru owhu, be piohia a.’ Be bete nọonwudna.

25 “Kpa nhne ka neeme, ọpnarna a zị n'ekwu. Nga ọ vaduru ọro ndundu nụ eri nụ eri be neetne,

26 o sukwu otu nye izi sịkwa nhne be neeme.

27 Ọ saru a, ‘Nwene ị rukna hiehnarnu, nda ị gbulem nnwọ ehni be znurnu ọznu, kwnornu nụ ọ whnurnu a n'ehni siri rikne.’

28 “Ovu weru nwene a rukna ke soru a ẹhni k'agida, o kwéle ọ bna n'oro. Nda a vakwnusi a, riasno a.

29 Ọ saru nda a, ‘Le, agida awha me zị nọornunu ị ẹrnu lele ohi, ọ zá ige me mernu risi rikne nụ nhne ị nyernu n'iwu. Kọvu i nyélele m otu nnwọ owu me nụ ele enyi m ri.

30 Kọvu nga nnwọ ị ka ke mewhukworu kpakara ẹkwu ị, ya nụ ele rinya ewhere varu, ị gbunnu a nnwọ ehni be znurnu ọznu.’

31 “Nda a kanu a, ‘Nnwọ m, me nụ jị zị ige dum, kpakara nhne me nwernu bu ke i.

32 A kwesiri ọ nwudna, kwnornu nụ nwene ị rukna ka nwurnu ọnwu, kọvu ọ zị bụdnu, o whuru owhu, kọvu be piohiaru a.’ ”

16

Elulu nye neelekota ẹkwu

1 Jizosi kanu ele sno apna a, “Otu nye eze nwernu nye neelekota ẹkwu a, be kanu nye eze wam nụ nye

neelekọta ẹkwnu a noolulu kpakara ẹkwnu a.

² O sukwu a, sịkwa a, 'Kini bu ọtnutnu ka me nọonu gbasịri i? Vaa ma a piakota kpakara nhne i nọonu, kwnornu nu i jeelekọtama ẹkwnu m berere.'

³ "Nye neelekọta wam kanu ẹhni a, 'Kini bu nhne me jeeme? Nda m kwu neegweme m n'ernu. M nwée m iknernema me jeeji rnu ernu rikne, iwhnerne o bu nye orio nọtụ m.

⁴ M maam nhne me jeeme, nga me whogaru n'ernu, ele badnu jeekweru me bnanya oro be.'

⁵ "O sukwu ele jigwu nda a kwu ogwo n'otu n'otu. O sịkwa nye mbom, 'I ji nda m kwu kini?'

⁶ "O kaa, 'Otu riwhu obele mono.'

"Nye neelekọta ẹkwnu wam kanu a, 'Gweru okwukwo, daziri eli, gbasị nri isne wara wara.'

⁷ "O sịkwa nye ke ẹbo, 'I ji nda m kwu iwai ele?'

"O kaa, 'Otu pokwu otutu ikpa wheti.'

"O kanu a, 'Gweru okwukwo gbasị riwhu esato.'

⁸ "Nda kwu nye neelekọta wam ke kparu agwa ojo znarni a, kwnornu nu o mernu lele nye nwernu echiche. Kwnornu nu rumu ke owa ka nwernu echiche o mee nhne gbasịri be kakwo rumu ke iwhne.

⁹ Me kanu anu, anu gweru ẹkwnu k'owa ka mee ele badnu enyi, nga ẹkwnu anu

jookwome, be kweru anu bnanya n'oro kwó okwo."

¹⁰ "Nye be kwesiri o kwnata mkpoma nu nhne matị, kwesiri be kwnata a mkpoma nu nhne hna ezi. Nye bu masi badnu ojo nu nhne matị bu badnu ojo nu nhne hna ezi.

¹¹ O buru nu anu buo ele be kwnata mkpoma n'ekwnu k'owa, nyele jeenye anu ezi ẹkwnu?

¹² O buru nu anu buo ele be kwnata mkpoma n'ekwnu nye berere, nyele jeenye anu ẹkwnu ke aka anu?

¹³ "O za ohi ke nwernu rikne buru ohi nda kwu lawuru. O buru kpam, o joosno otu irno, whnu ke berere n'anya. Mọbu o jọsobisinu otu k'agida, ledna ibne a anya. Anu jobuli ohi Chiokike nu ohi ẹkwnu."

Agwna ikwu-onu Jizosi
(*Mat 11:12,13; 5:31,32;*
Mak 10:11,12)

¹⁴ Nga ele Farisi ele whnurnu iwai n'anya nurnu ikwu-onu ka, be mu Jizosi rumu.

¹⁵ Jizosi kanu be, "Anu bu ele nọogwnu ẹhni anu nu anu bu ele oma nu ruwhnu ele badnu, kovu Chiokike magwu mkpoma anu. Nhne zi okne onu n'anya ele badnu bu nhne ruru oru n'anya Chiokike.

¹⁶ "Nhne be nyernu n'iwu nu ele owhnurninya zi tem Joni, hite n'ige wam, be nọokpo okwo izi oma eli-eze Chiokike, nye obula neeyisi ẹhni ma o bna nu rime a.

17 O zị ewheke nụ oligwe nụ ọwa jaagawhe kakwo otu nhne ke zikakworu matị n'iwu jaadna.

18 “Nye ọbula ke jaagba nnwerne a nnam, lụ nyerinya berere neeme ọyi, nyerukna ọbula ke luru nnwerne be gbarụ nnam neeme ọyi.

Nye eze nụ Lazarọsi

19 “Otu nye eze zị, ke noowo iwo odno odno nụ abọchna marnụ mma, wu bụdnu iriri kpakara ọbochi.

20 Otu nye mboni be dnanyitaru n'ogodo ọnu-mgbo a, nye rẹwhna a bụ Lazarọsi, nye ọnya kpuru kpakara ẹhni.

21 O nọogwnu a ma be nyee a rụvnuruvnu wiri ke hi n'ikpechi nye eze wam dna. Rụmu nkịta varụ naarasna ọnya a.

22 “Ige duru nụ nye ọrio wam nwurnu, ele enine izi vuru a zne hne Ebereham zị. Nye eze wam nwụ masiri, be lite a.

23 Nụ rime bẹkwnu ẹli rẹnwu hne ọ zị nọowhnuji anya, o le anya n'olu whnụ Ebereham nụ hne zị ikere nụ Lazarọsi zị n'akwankọ a.

24 Nye eze wam sukwu a, ‘Nda aị Ebereham, dọnu m obirizi, zizne Lazarọsi o rusi ọnu mkpaka a nụ mini mejị riro m, kwnornu nụ m nọowhnuji anya nụ rime bẹkwnu ka.’

25 “Kọvu Ebereham sarụ a, ‘Nnwọ m, chenwanya nụ nga i zị bụdnu i riru nhne ọma, kọvu Lazarọsi naahiaru nhne bụo ọma. Kịtna be naakasi

a mkpọma, kọvu i nọowhnuji anya.

26 Be gweme kpakara nhne ka, be gwuru otu olulu hna ezi n'iketa aị nụ anụ, ke kpararụ ele noopio o hi nụ hna vakwnusi anụ jéenwe rikne, ọ zị masị nye nwernu rikne hi hne anụ zị vakwnusi aị.’

27 “Nye eze wam sarụ, ‘Bikno, nda, zizne Lazarọsi ọro nda m,

28 kwnornu nụ m nwernu rụmu nne rukna isne, ọ dọ be aka nụ nsni, ma be gharụ ọ va hne ọwhnuji anya ka.’

29 “Ebereham sarụ a, ‘Be nwernu Mozizi nụ ele ọwhnurninya, be bnonu be nsni.’

30 “Nye eze wam karụ, ‘Ọza, nda Ebereham, ọ bụru nụ badnụ hi n'ẹnwu lizọ znekwnusi be, be jọtuhnasna mkpọma.’

31 “Ebereham kanụ a, ‘O bụru nụ be jóobnonu Mozizi nụ ele ọwhnurninya nsni, be jọtuhnasna mkpọma ọ bụbedi nụ badnụ hiri n'ẹnwu lizọ.’ ”

17

Mmehie, ọkwnata mkpọma nụ ọnu

(*Mat 18:6,7,21,22; Mak 9:42*)

1 Jizọsi kanụ ele sno apna a, “Nhne neeme ma badnụ mee mmehie jaavariri, kọvu awhnụwhnu jaazinu nye o jeehi n'aka a va.

2 O jaakanụ nye wam mma ọ bụru nụ be gweru okne rugwu ogwe-wiri nyasi a n'ili tụtba n'osimini karụ o mee

ma otu nū rime ele ka zī matī mehie.

³ Anū ledu anya nū nhne anū neeme.

“Ọ bụru nū nwene i rukna mmehie i, bigbo a, ọ bụru nū ọ tūhnasna mkpoma a, gbarūnu a.”

⁴ Ọ bụru nū o mehieru i mgba ẹsau n'ọbochi, tūhnasna masi mgba ẹsau, kaa 'M tūhnasnarnu m,' gbarūnu a.”

⁵ Ele sno apna a kanū Nyenwe ai, “Mejitenu ai ọkwnata mkpoma.”

⁶ Jizosi saru be, “Ọ bụru nū anū nwernu ọkwnata mkpoma lele mkpuru mositadi, anū jaakanu okne isisi ka, 'Be whome i kpasị i n'esilawuru osimini,' o jooononu anū nsni.”

⁷ “Ọ bụru nū otu badnu nū rime anū nwernu otu nye izi ke nọornu ẹkwu a mọbu nọoznu atnuru a, nga o hiri ẹkwu hiehna, ọ jaakanu a, 'Vaa daziri ẹli, ri wiri'?”

⁸ Ọza! Kọvu ọ jaakanu a, 'Mesinu m wiri, woru iwo i, sete m me rikwo wiri, omekwo, i ri ke i.'

⁹ Be za naakanu nye izi meka nū o mernu nhne be karu o mee.

¹⁰ Ọ bu kpa ọ zinu anu, nga anu mernu kpakara nhne be karu anu mee, anu kaa, 'A bu ele izi etekne, a nruru ẹru ai.' ”

Jizosi gworu nri ele nchnichna

¹¹ Nga Jizosi zi nu apna neezne Jeruselem, ọ naa-gawhe n'esilawuru Sameria nu Galili,

¹² kpa ọ naabna nū rime otu ẹli-ohna, nri ele rukna nchnichna kwnusiri a. Be gwuzoru nū hne zi ikere,

¹³ be gweru okne nkoli siwama, “Nda-ai-kwu, Jizosi, donu ai obirizi.”

¹⁴ Nga Jizosi whuru be, ọ kaa, “Anu zne gesi ele ariohna ẹhni anu.” Kpa be neezne, be gworu be nchnichna wam.

¹⁵ Nga otu nyenum nū rime be whuru nū be gwolam a, ọ lahna, gweru okne nkoli naaja Chiokike.

¹⁶ Ọ dna n'eli n'ochi Jizosi tunu a mmamma. Nwerukna ka bu nye Sameria.

¹⁷ Jizosi sikwa a, “Be gwola nri badnu? Ndaa badnu tolu ele berere?”

¹⁸ Ọ za nye varu ọ tunu Chiokike mmamma, okwolem nye izne ka?”

¹⁹ Jizosi kanu a, “Lizo, la, ọkwnata mkpoma i dọhialam i.”

Ige ẹli-eze Chiokike (Mat 24:23-28,37-41)

²⁰ Agwna ele Farisi sikwa Jizosi nga ige ẹli-eze Chiokike jaava. Jizosi saru be, “Eli-eze Chiokike java lele kpa ele badnu neele anya a.

²¹ Ọ za nye jaakaa, 'Le ọ zi hna,' mọbu 'Pjari,' kwnornu nū ẹli-eze Chiokike zi nū rime anu.”

²² Ige wam Jizosi kanu ele sno apna a, “Ige wawa nga ọ jogwunu anu ọ whnu otu rime ọbochi ke Nnwọ ke Badnu, kọvu anu jowhnu a.

²³ Ele badnu jaakanu anu, 'Le, Nnwọ ke Badnu zi pii,' mọbu 'Ọ zi hna.' Anu sno be zne.

24 Lele kpa amuma oligwe neehi n'otu osotoma oligwe mukesi n'osotoma berere, bu kpa obochi ke Nnwọ ke Badnu jaazi.

25 Kọvu o jeeberu osno ta agida awnwhnu, ebiri ka jọju a.

26 “Lele kpa o nu n'obochi Noa, o bu kpa o jọnu n'obochi Nnwọ ke Badnu.

27 Ele badnu zi neeri, nonwo, nolu nnwerne, nọgbo nzi, du n'obochi Noa bnazernu nu rime ogbo, mgba-mini eli gbukwo kpakara be.

28 “O bu masi kpam n'obochi Lotu, kpakara be zi neeri, nonwo, neere, nọzu ahia, naakpa mkpuru, noowu oro.

29 Kọvu n'obochi Lotu whogaru nu eli Sodom, Chiokike wudnarnu bekwnu nu rugwu bekwnu lele mini ozuzo, gbukwo kpakara be.

30 “O bu kpa o jaazi n'obochi be jookpume Nnwọ ke Badnu.

31 N'obochi wam, nye obula ke zi n'olu oro a, o bna nu rime oro a zne kwahala nhne a, kpam masi, nye ke zi n'ekwu lagna aznu kwnornu nhne obula.

32 Anu chenwanya nnwerne Lotu.

33 Nye obula ke noopio o znohia budnu a, jootuwu a, nye nootuwu budnu a, joznohia a.

34 Me kanu anu, n'abali wam, badnu lawuru jaadnanyi n'okpata, be gweru otu gharu ibne a.

35 Ele rinya lawuru jaazi neegwe wiri, be gweru otu, gharu ibne a. [

36 Ele rukna lawuru jaazi n'ekwu, be gweru otu ghasa ibne a.”]

37 Ele sno apna a sikwa a, “Ndaa po, Nyenwe ai?”

Jizosi saru be, “Idele jaaziri hne obula iznu nwurnu onwu zi.”

18

Nwerinya nzi a nwurnu nu nye ikpe

1 Jizosi tnuu be otu elulu neezni be kpa be kpe okpukpe kpakara ige neegweme aka.

2 O kaa, “Otu nye ikpe zi n'otu eli, nye za notu ogwnu Chiokike mọbu so badnu anya.

3 Otu nyerinya nzi a nwurnu zi masi n'eli wam, o nezne oro nye ikpe ka, naariasno a, 'Bikno, kpenu m ikpe oma megidne nye neemegbu m.’

4 “O kwéle o yinu a aka gbu okwnu. Omekwo, o kanu ehni a, 'O bu n'ezi nu m za m notu ogwnu Chiokike, mọbu so badnu anya.

5 Kọvu kwnornu nu nwerinya ka nzi a nwurnu naakpakna m ehni, m jeekpenu a ikpe oma, o zi rikne gwu m kwnornu nu o naava ige obula.’ ”

6 Nyenwe ai kaa, “Anu bno nsni nhne nye ikpe ojo wam kwuru.

7 Chiokike, o joznohia ele ke a, ele o hohiaru, bu ele naakwnakwu a iwhnehnie

nụ abali? O jóogbu okwunu o d'ohia be.

⁸ Me kanụ anụ, o j'oznohia be wara wara. K'ovu nga Nnwọ ke Badnụ jaava, o j'owhnu ele kwesiri okwnata mkpoma n'owa?"

Elulu nye Farisi nụ nye ọna ntụ

⁹ Jizọsi tñunu ele kwnataru mkpoma n'imerne oma be, k'ovu ledna ele berere anya elulu ka.

¹⁰ "Ele rukna lawuru zneru Oro Nsọ Chiokike zne kpe okpukpe, otu nye Farisi nụ otu nye ọna ntụ.

¹¹ Nye Farisi gwuzoru ichne kpenu ẹhni a okpukpe, kaa, 'Chiokike, meka nụ m b'uo m nye o'who-anya, m'obu nye ojo, m'obu nye neeme oyi lele ele berere. Meka nụ m b'uo m nye ojo lele nye ọna ntụ ka.

¹² M noovu onu mgba lawuru n'ikwezu, m n'okwu otu nụ nri nga kpakara nhne me nwernu.'

¹³ "K'ovu nye ọna ntụ wam gwuzoru nụ hne zị ikere, o nwée rikne gwelizo a anya le oligwe, k'ovu o kwa aka nụ mkpoma, o wute a, kaa, 'Chiokike, donu m me nye mmehie obirizi.' "

¹⁴ Jizọsi kaa, "Me kanụ anụ, nye ọna ntụ ka nụ Chiokike mernu udno sụ o larụ oro a, o b'uo nye Farisi, kwnornu nụ be jeegwedna nye obula ke gwelizoru ẹhni a olu, nye obula ke gwednarnụ ẹhni a ẹli, be jeegwelizo a."

Jizọsi g'oziri rụmu takiri
(*Mat 19:13-15; Mak 10:13-16*)

¹⁵ Agwna ele badnụ nookwuyanu Jizọsi rụmu takiri be ma o kpatụ be aka. Nga ele sno apna a whnurnu be, be bnanụ be mbna.

¹⁶ K'ovu Jizọsi sukwuru rụmu takiri vakwnusi a, kaa, "Anụ gharu rụmu takiri ma be vakwnusi m, anụ bn'osni be, kwnornu nụ ẹli-eze Chiokike bu ke ele nụ kpa.

¹⁷ Me kanụ anụ ezi oka, nye obula ke j'egweru ẹli-eze Chiokike lele nnwọ matị, o j'abna nụ rime a rịa rịa."

Otu nye ọchichi
(*Mat 19:16-30; Mak 10:17-31*)

¹⁸ Otu nye n'echi ele Ju s'ikwaru Jizọsi, "Nye zni-nhne oma, k'ini bu nhne me jeeme ma m kehia m budnu kwó okwo?"

¹⁹ Jizọsi saru a, "K'ini kpayarụ i noosukwu m nye oma? O zá nye bu nye oma, okwolem otu badnụ, bu Chiokike kp'oi.

²⁰ I maa m nhne be nyernu n'iwu, 'I mékọ oyi, i gbúko badnụ, i znúko buznu, i gbáko akebne aghalaghala, s'obisinu nda i nụ nne i.' "

²¹ Nye ọchichi wam kaa, "M b'itaru m kpakara nhne hite n'ige me bu wikoro."

²² Nga Jizọsi nurnu nhne ka, o kaa, "I jeeme otu nhne kp'oi. La, re kpakara nhne i nwernu, kesi ele mboni, i jeenwe ẹkwnu n'oligwe, vaa, sno m."

23 Nga nye ọchichi wam nurnu ka, o wuteru a k'agida, kwnornu nu o nwernu ẹkwnu k'agida.

24 Jizosi le a anya, kaa, "Ọ bu nhne rarụ ẹhni k'agida nu ele nwernu ẹkwnu ọ bna n'ẹli-eze Chiokike.

25 N'ezi, ọ zinu anọhia be kwu kameli ewheke ọ gawhe n'anya alanga karu ele nwernu ẹkwnu ọ bna n'ẹli-eze Chiokike."

26 Ele nurnu ọka ka, sika, "Ndakwanu nye be jooznohia?"

27 Jizosi saru, "Nhne rarụ ẹhni hne badnu zi, be meli kpakara nhne hne Chiokike zi."

28 Pita kanu a, "Le, a sigbasiri kpakara nhne snornu i."

29 Jizosi kanu be, "Me kanu anu ezi ọka, ọ za nye ọbula ke sigbasiri ọro, mọbu nnwerne, mọbu nwene, mọbu ele murnu a, mọbu rumu, kwnornu ẹli-eze Chiokike,

30 ke jaanahia karukwo n'ige ka, n'ige ke jaava, budnu kwoko."

Jizosi kwuru ọka gbasiri ẹnwu a ke mgba ẹto

(Mat 20:17-19; Mak 10:32-34)

31 Jizosi kwuru nri nu badnu lawuru wam, kanu be, "A neezne Jeruselem, kpakara nhne ele ọwhnurninya gbaru n'okwukwo gbasiri Nnwọ ke Badnu jeemezu.

32 Be jeegweru a nyewhete n'aka ele buo ele Ju. Be jeeme a nhne rumu, nyee a mkpari, gbụ a onu mini,

33 pni a nhne, gbu a. N'obochi k'eto, o jeehi n'ẹnwu lizo."

34 Ele sno apna a ghoyage kpakara nhne ka. Be kpusnirni oka ka n'anya be. Be ma risi nhne o nookwu.

Jizosi gworu nye ọro isni (Mat 20:29-34; Mak 10:46-52)

35 Nga Jizosi naavadu Jeriko, otu nye isni dazi nu ngeri apna nọorio nhne.

36 Nga ọ nurnu agida badnu neewhe, ọ sika be nhne neeme.

37 Be kanu a, "Jizosi nye Nazareti neewhe hna."

38 O siwama lulo, "Jizosi, Nnwọ Devidi, donu m obirizi."

39 Ele be Jizosi osno bigboru a, o kpusni onu a, kovu, o siwama k'agida, "Ji Nnwọ Devidi, donu m obirizi."

40 Jizosi gwuzoru, kaa, be kwuyan a ya. Nga ọ varu, Jizosi sika a.

41 "Kini bu nhne i piuru me menu i?"

Nye isni wam kaa, "Nyenwe ai, mee ma m whnurnu m osno."

42 Jizosi kanu a, "Whnurnu osno, okwnata mkpoma i gwolam ji."

43 Ngangam, o bete ọ whnu osno, snornu Jizosi n'apna, naaznarni Chiokike. Kpakara ele whnurnu a znarni Chiokike.

19

Jizosi nu Zakiyosi

1 Jizōsi bnazne nū rime Jeriko, neewhe n'esiławuru a.

2 Otu nye risi ele ọna ntū rẹwhna a bụ Zakijosi zị pị, ọ bụ nye barụ aba.

3 O noopio kpa ọ jọowhnu Jizōsi, kọvu o nwée rikne kwnornu nū ọ bụ nye zị ichichi n'esiławuru igbudu badnū.

4 Ọ gba ẹso zne nū ruwhnu, pne n'olu isisi sịkamo ma ọ whnū Jizōsi nga o jeewhe nū apna wam.

5 Nga Jizōsi dūru nū piyam, o le anya n'olu, kanū a, "Zakijosi, hiedna wara wara, kwnornu nū m jaadazị n'oro ì tna."

6 Zakijosi mee wara wara hiedna, nabnanya a nū mkpoma ọso n'ọnu.

7 Kpakara ele badnū whnurnu a, be bete naatamu, kaa, "Nwerukna ka znernu ọ bụru nye izne n'oro nye mmehie."

8 Zakijosi lizọ kanū Nyenwe aị, "Nyenwe aị, m jeekewa kpakara nhne me nwernu ẹli lawuru, kesi ele mboni, nye ọbula ke me ghogburu, m jọokwuhnata a ẹli ẹno."

9 Jizōsi kanū a, "Ọznohia varū n'oro ka tna, kwnornu nū nwerukna ka bụ masi nnwọ Ebereham.

10 Kwnornu nū Nnwọ ke Badnū varū o pio nū ọ znohia ele whuru owhu."

Elulu nri mkpuru iwai

*be kwu mīnasi**

(Mat 25:14-30)

11 Kpa be zị noobno nsnj, Jizōsi zne nū ruwhnu tnūnu be otu elulu, kwnornu nū ọ zị Jeruselem ndundu, ele badnū wam naari nū ẹli-eze Chiokike jọowhuya iwhe kịtna.

12 Ọ kaa, "Otu nwerukna be marnū rẹwhna a znernu mba zị ikere ma be chni a eze sū o hiehna ẹli a.

13 Hne o zne, o sukwu nri ele ọhi a, nyee be nri mkpuru iwai, kanū be, 'Anū zū ahia tem m hiehna.'

14 "Kọvu ele ẹli wam snornu a irno, be zizne izi kaa, 'A chọla nwerukna ka bụru eze aị.' "

15 "Be chni a eze, o hiehna. O sukwu ele ọhi a ele o nyernu iwai ma ọ mahia mbnarna be nwehjaru nū iwai o nyernu be.

16 "Nye ke mbom varū, kaa, 'Nyenwe aị, mkpuru iwai i nyernu m nwehjaru nri mkpuru iwai mbnarna berere.' "

17 "Nyenwe a kanū a, 'I mekwarū nkari, ọhi ọma. Kwnornu nū ì kwesiri be kwnata ì mkpoma nū nhne matị, neechi nri mba.' "

18 "Nye ke ẹbo varū, kaa, 'Nyenwe aị, mkpuru iwai ì nwehjaru mkpuru iwai isne berere.' "

19 "Nyenwe a sarū a, 'Būru nye neelekota ẹli-ọhna isne.'

20 "Nye ke ẹto varū kaa, 'Nyenwe aị, le iwai ì, m

* 19:10 mīnasi: Jizōsi tnurnu elulu mkpuru iwai be kwu mīnasi. N'ige mbom, ọgwo ẹrnu ọbochi bụ otu mkpuru iwai etekne. Otu mīnasi hna lele otu riwhu mkpuru iwai.

knernu m iwai i n'ikpe tugwatanu i ya.

21 Ogwnu i turu m, kwnornu nu i bu nye anya rikne. I neegweru nhne buo ke i, neegwe nhne n'ekwu hne i kpala mkpuru.'

22 "Nyenwe a saru, 'M jeeji nhne hi n'onu i kpe i ikpe, ji ohi ojo. I magwu nu m bu m nye anya rikne, neegweru nhne buo ke m, m neegwe nhne n'ekwu me kpala mkpuru.

23 Kini mernu i yisige iwai m n'aka ele oro iwai? Kpa me hiehnarnu, m znernu m anahoru iwai m nu mbnarna a.'

24 "O kanu ele gwuzo ndundu, 'Anu nahia a iwai ki nyega nye wam ke nwernu nri.'

25 "Be kanu a, 'Nda-ai-kwu, o nwernu nri.'

26 "O saru be, 'Me kanu anu, nye obula ke nwernu be jeenye a, o nwehnasiru, kovu nye ke nwée, be jaanahoru a o bubedi ke o nwernu.

27 Kitna, ele irno m ele kwége me buru eze be, anu kwuya be hna gbumekwo kpakara be nu ruwhnu m.'

Jizosi bnaznenu

Jerusalem

(Mat 21:1-11; Mak 11:1-11; Jon 12:12-19)

28 Nga Jizosi kwukworu oka ka, o beru be osno neezne Jerusalem.

29 Nga o vaduru Betifagi nu Betani nu Rugwu Olivu o zizne ele sno apna a lawuru, kanu be,

30 "Anu zne nu mgbu mati ke zi nu ruwhnu anu, kpa anu naabna, anu jowhnu otu nnwo iyinya be kpogwu pii, ke o za nye daziri n'olu a, anu toma a, toya hna.

31 O buru nu badnu obula sikwa anu, 'Kini mernu anu notoma a,' anu kanu a, 'O zi Nyenwe ai mkpa.'

32 Ele o dusiri zne whnu lele kpa Jizosi kanu be.

33 Kpa be notoma nnwo iyinya wam, ele nwe a sikwa be, "Kini mernu anu notoma nnwo iyinya wam?"

34 Be saru be, "O zi Nyenwe ai mkpa."

35 Be toyanu a Jizosi, wukwasi iwo be n'olu a, dazita Jizosi n'olu a.

36 Kpa Jizosi neezne, ele badnu naagbasa iwo be n'apna.

37 Nga o vaduru hne apna laru Rugwu Olivu, igbudu badnu ele sno apna a bete nonwudna, notunu Chiokike mmamma n'okne nkoli kwnornu agida ernu ndu-ehni be whnuru.

38 Be naakaa, "Chiokike gozi eze

ke naava nu rewhna Nyenwe ai,

Udno n'oligwe,

oznarni zinu Chiokike nu hne kakwo n'olu."

39 Agwna ele Farisi ele sno igbudu badnu wam kanu Jizosi, "Nye-zni-nhne, bigbo ele sno apna i ma be kpusni onu."

40 Jizosi saru be, "Me kanu anu, o buru nu ele ka kpusni

onu be, akaworugwu ele ka jeesi lulo.”

20

Jizosi kwnanu Jeruselem ekwna

41 Jizosi vadu Jeruselem ndundu, whnu a, kwnanu a ekwna.

42 O kaa, “O buru nu i mahiaru obochi tna nhne jeegweyanu anu udno, kovu anyanuru kpuru isni.

43 Obochi wawa nga ele irno anu jaadazigidne anu, gbagidne anu n'apna obula.

44 Be joozopia anu nu rumu takiri anu, be joolulu eli ka nu ele wu nu rime a, be jeesigbasi otu akaworugwu n'olu ibne a hna, kwnornu nu anu ma a ige Chiokike varu o znohia anu.”

Nhne Jizosi mernu n'Oro Nso Chiokike

(Mat 21:12-17; Mak 11:15-19; Jon 2:13-22)

45 Jizosi bnazne Oro Nso Chiokike, chihala ele neere ahia pii.

46 O kanu be, “Be gbaru a n'okwukwo nso, kaa, 'Oro m joo bu oro okpukpe,' kovu anu mernu a o buru obna ele buznu.”

47 Jizosi zi neezni nhne kpakara obochi n'Oro Nso Chiokike. Ele risi ariohna nu ele zni iwu ele Ju nu ele okno badnu Izireli needne kpa be joogbu a.

48 Kovu be ma a nhne be jeeme, kwnornu nu kpakara ele berere zi koriri noobno nsni nu nhne o nookwu.

Rikne Jizosi

(Mat 21:23-27; Mak 11:27-33)

1 O du otu obochi nga Jizosi zi n'Oro Nso Chiokike neezni izi oma, ele risi ariohna nu ele zni iwu ele Ju, be nu ele okno badnu Izireli varu.

2 Be kanu a, “Kanu ai rewhna rikne i ji neeme kpakara nhne ka. Nyele nyernu i rikne ka?”

3 Jizosi saru be, “M jaasikwa anu otu ajiji masi, anu kanu m,

4 owu mini Joni, o hiri n'oligwe mibu n'aka badnu va?”

5 Be kwu a n'esilawuru be, kaa, “O buru nu a kaa, 'O hiri n'oligwe,' o jaasikwa ai, 'Kini mernu anu kwele a?' ”

6 “Kovu a kaa nu o hi n'aka badnu, kpakara ele badnu ka jootugbu ai akaworugwu, kwnornu nu be kweru nu Joni bu nye owhnurninya.”

7 Be saru a, “A ma hne o hi va.”

8 Jizosi kanu be, “M jaaka masinu anu rewhna rikne me ji neeme kpakara nhne ka.”

Elulu ele ernu ekwu vai ni

(Mat 21:33-46; Mak 12:1-12)

9 Jizosi tnu nu ele badnu elulu ka, “Otu nyerukna kparu vai ni, gweru ekwu wam yisi n'aka ele jeelekota a, whoga gbu okwnu.”

10 Nga ige o gho mkpuru duru, o zizne otu nye izi o zneknusi ele ernu ekwu wam ma be nyee a agwna mkpuru vai ni. Kovu ele ernu

ekwu wam pñia a nhne, zila a n'aka etekne.

¹¹ O zizne kwno nye izi berere, ele ernalu ekwu wam li a nhne, kpasị a iwhnerne, zila a n'aka etekne.

¹² O zizne kwno nye izi ke uto, be mekasi a nhne, tuwhu a n'ederezi.

¹³ "Ige wam nye nwe ekwu vaiñi wam karu, 'Ndaa nhne me jeeme? M jeezizne nnwo m me whnuru n'anya, eleghi anya be joso a anya.'

¹⁴ "Kovu nga ele ernalu ekwu wam whnuru a, be kanu eñni be, 'Ka bu nye jeeri mkpe nye nwe ekwu ka, anu va ma a gbu a, a jeekeri mkpe a.'

¹⁵ Be tuwhu a n'aznu ekwu wam gbu a.

"Kini bu nhne nye nwe ekwu wam jeeme ele ojo wam?"

¹⁶ O jaava gbumekwo ele ernalu ekwu ojo wam, gweru ekwu wam nyewhete n'aka ele berere."

Nga ele badnu wam nuru oka ka, be kaa, "Chiokike kwé."

¹⁷ Jizosi le be anya, sika be, "Kini bu risi nhne be gbaru n'okwukwo nsọ?"

'Akaworugwu ke ele noowu o ro juru

kiyam ghulam risi nsukala o ro.'

¹⁸ Nye obula ke jaadnakwasị akaworugwu ka, jaagbawa ibekala ibekala, kovu nye obula ke akaworugwu ka jaadnakwasị, o jeegweri a lele retnu."

¹⁹ Ele zni iwu ele Ju nu ele risi ariohna pio kpa be joonwugwu Jizosi ngangam,

kwnornu nu be magwu nu o tñnnu be elulu ka. Kovu be notu ogwnu ele badnu.

Otu ntu-eli

(*Mat 22:15-22; Mak 12:3-17*)

²⁰ Be zizne ele naadna ndidna ele mernu lele nu be bu ele ezi oka. Be noopio kpa be jeeji nwugwu Jizosi hite n'ikwu-onu a ma be gweru a nyewhete n'aka nye ochichi.

²¹ Be sika Jizosi, "Nye-zni-nhne, a magwu nu i kwu ezi oka neezni nhne kwesiri, i za neele badnu anya nu ruwhnu, kovu i neezni apna Chiokike n'ezi oka.

²² O buru oma a tu ntu nyee Siza sobu o buo oma?"

²³ Jizosi whuru aghigho ke mkpoma be, o kanu be,

²⁴ "Anu gesi m otu mkpuru iwai. Nyele nwe ruwhnu ka nu nhne be gbakwasiri n'olu a?"

²⁵ Be saru a, "Siza nwe."

Jizosi kanu be, "Anu nyee Siza nhne ke Siza, nyee masi Chiokike nhne ke Chiokike."

²⁶ Be nwée nhne be jeeji nwugwu a hite n'ikwu-onu o kwuru nu ruwhnu ohna. Osis a o saru be jiri be anya, be daziri bii.

Ajiji gbasiri olizo n'enwu

(*Mat 22:23-33; Mak 12:18-27*)

²⁷ Agwna ele Sadusi, ka bu ele karu nu olizo n'enwu zila, vakwnusiri Jizosi, sika a ajiji,

²⁸ "Nye-zni-nhne, Mozizi gbaru n'okwukwo iwu nyee ai, 'O buru nu nyerukna wuru sigbasi nnwerne a, hne be nwée rumu, nwene a rukna

jooluru nnwerne nwene a wam mụhianu nwene a rukna rụmu.'

²⁹ Rụmu nne ẹsau nụ aị zị, ke mbom luru nnwerne, nwụma hne o nwée nnwọ.

³⁰ Nye ke ẹbo luru a,

³¹ nye ke ẹto lụ a, otu aka wam kpa rụmu nne ẹsau wam luru nwerinya wam, kpakara be nwée nnwọ, be nwụkwo.

³² N'ipne-aznụ nwerinya wam nwụ masị.

³³ Kịtna, n'ọbochi olizo n'ẹnwu, nwerinya wam jọobu nnwerne nyele n'esilawuru be, kwnornu nụ be ẹsau luru a?"

³⁴ Jizọsi saru be, "Ele badnu k'owa ka nọolu nnwerne, neekesi nzi.

³⁵ Kọvu ele kwesiri o kehia igwe n'olizo n'ẹnwu ma be zị budnu n'ige ke jaava, be lú nnwerne, be gbó nzi.

³⁶ Be jónwu ẹnwu berere, kwnornu nụ be nụ lele ele enine izi. Be bu rụmu Chiokike kwnornu nụ be hiri n'ẹnwu lizo.

³⁷ Kọvu Mozizi neegesi nụ ele nwurnu ọnwu jeehi n'ẹnwu lizo, hite nụ nhne ọ gbaru n'okwukwo gbasiri isisi matị wam neerne bekwnu. O suk-wuru Nyenwe aị 'Chiokike ke Eberham, Chiokike ke Aziki, nụ Chiokike ke Jekọpu.'

³⁸ Chiokike bu Chiokike ke ele zị bu budnu, ọ buo ke ele nwurnu ọnwu, kpakara ele badnu zị budnu n'anya Chiokike."

³⁹ Agwna ele zni iwu ele Ju karu, "Nye-zni-nhne, ị sakwaru nkari."

⁴⁰ Ọ zima nye nwernu rikne sịkwa a ajiji berere.

Karaisi bu nnwọ nyele?

(*Mat 22:41-46; Mak 12:35-37*)

⁴¹ Jizọsi kanu be, "Ndaa kpa be naakaa nụ Karaisi bu Nnwọ Devidi?"

⁴² Kwnornu nụ Devidi n'iwuru a kwuru n'okwukwo Eri Ọma,

'Nyenwe aị kannu Nyenwe m,

Daziri ẹli n'akarikwnungam

⁴³ tem du nga me jaabita ele irno i

lele nhne ị jootukwasi ọchi ịlawuru.'

⁴⁴ Devidi sukuru a 'Nyenwe m,' ndaa kpa o jeeji buru kwno nnwọ a?"

Anu zeru ele zni iwu ele Ju

(*Mat 23:1-36; Mak 12:38-40; Luk 11:37-54*)

⁴⁵ Kpa kpakara ele badnu wam zị noobno nsni, Jizọsi kanu ele sno apna a,

⁴⁶ "Anu neeze ele zni iwu ele Ju. Ọ naamasị be o wo awura ogologo naagahari, ọ naamasị be ele badnu neebekwu be ikwu n'ahia, be nọohoru risi ngadna n'oro ọgbako ele Ju, ma ngadna kakwo mma n'ọgbako iriri anu.

⁴⁷ Be bu ele neeridna ọro ele rinya nzi be nwurnu, neekpe ogologo okpukpe ma ele badnu whurnu be. Be jaata awhnwhnu ke kakwo."

21

*Nkesi nwerinya
nzi a nwurru
(Mak 12:41-44)*

¹ Jizosi leru anya whnu ele eze nọtusi nhne nkesi be nu hne be nọtusi iwai n'Oro Nso Chiokike.

² O whnu otu womboni nzi a nwurru hne o nọtusi mkpuru iwai matị lawuru.

³ Jizosi kaa, "Me kanu anu ezi oka, nwerinya ka bu womboni nzi a nwurru tusiri karukwo kpakara ele nọtusi iwai.

⁴ Kpakara ele badnu ka masiri aka n'agida ekwnu be nwernu gweboru tisi, kovu nwerinya mboni ka tukparu kpakara nhne o nwernu."

*Be joolulu Oro Nso
Chiokike*

(Mat 24:1,2; Mak 13:1-2)

⁵ Agwna ele sno apna a nookwu, naajakiri Oro Nso Chiokike nu akaworugwu be jiri a wu mma, ya nu nkesi be jiri cho Oro Nso Chiokike mma. Kovu Jizosi kaa,

⁶ "Kpakara nhne anu nọowhnu, ige vawa nga otu akaworugwu jogwuzo n'olu ibne a, be jaakwnadna kpakara be n'eli."

*Mmekpẹhni nu
okpakna ehni*

(Mat 24:3-14; Mak 13:3-13)

⁷ Be sikwa a, "Nye-zni-nhne, ndaa nga nhne ka jọbu? Kini jọbu nhne jeegesi nga nhne ka jeeme?"

⁸ Jizosi saru be, "Anya du anu eli, anu kwé be duhie anu. Agida ele badnu jaava

nu rewhna m, naakaa, 'O bu mawa, ige valẹm,' kovu anu snó be.

⁹ Nga anu jonu otnutnu ogwnu nu omegidne, ogwnu tuko anu. Kpakara nhne ka jeebe osno mee, kovu okwukwo nhne yoduge."

¹⁰ O kanu be, "Mba jeelizo megidne mba, eli-eze jeelizo megidne eli-eze."

¹¹ Okne eli otne enye jaazi nu hne zi ichne ichne, okwnunyo nu nriria ojo jaazi nu hne zi ichne ichne. Nhne zi ogwnu nu okne nhne elekema jeehi n'oligwe va.

¹² "Kovu su kpakara nhne ka mee, be jjonwugwu anu, kpakna anu ehni, gweru anu nyee n'aka ele ikpe be kpe anu ikpe n'oro ogbako ele Ju, be yisi anu n'oro ikelu. Anu joogwuzo nu ruwhnu ele eze nu ele ochichi kwnornu nu rewhna m.

¹³ Ka jọbu oghere anu jeeji gba akebe izi oma.

¹⁴ Kovu anu beru osno rigbu ehni anu kpa anu jeeji goru onu anu.

¹⁵ Kwnornu nu m jeeyisi oka nu akoniche ke ele irno anu jeenwe rikne gwuzogidne mọbu megbu anu.

¹⁶ Ele murru anu jeegweru anu nyewhete, rumu nne anu nu rumu nwene nu ele enyi, be joogbu agwna anu.

¹⁷ Kpakara ele badnu joosno anu irno kwnornu nu me.

¹⁸ Kovu otu rukeri-ize ke risi anu jaadna n'eli mọbu whu etekne.

¹⁹ Anu gwuzosi rikne ma anu znohia budnu anu.

Be joolulu Jeruselem

(*Mat 24:15-21; Mak 13:14-19*)

20 “Nga anu jowhnu ele ogwnu ele irno gbaru Jeruselem ngaramanga, anu mahia n'olulu a zi ndundu.

21 Ige wam ele zi nu Judiya gbazne n'olu rugwu, ele zi n'eli-ohna whoga, ele zi n'ekwu be lagna nu rime eli-ohna.

22 Kwnornu nu ka bu ige o ta awnhwuhnu ma kpakara nhne be gbaru n'okwukwo nsọ mezu.

23 Awnhwuhnu jaazinu ele rinya zi rime nu ele neechi nnwo rema n'ige wam. Okne awnhwuhnu jaadnakwasị eli ka, Chiokike jonwudna ovu owe ehni a megidne ele badnu ka.

24 Be jeegweru ama-ogwnu gbu agwna badnu, be jodoru ele berere lele ele ikelu zne kpakara mba. Ele buo ele Ju joozodna Jeruselem tem ige be zu.

Nnwọ ke Badnu vawa

(*Mat 24:29-31; Mak 13:24-27*)

25 “Nhne elekema jaazi n'ehnam nu enwa nu mbọ. N'owa mkpoma oia mini jaazi n'esilawuru kpakara mba, be jootu ogwnu abaka-mini nu ruwhere osimini.

26 Ele badnu jootubo kwnornu ogwnu nu nhne be nowhnu jeeme n'owa, kwnornu nu kpakara ikn-ernema ke oligwe johnio ohnio.

27 Ige wam be jowhnu Nnwọ ke Badnu hne o naava n'erumeru k'oligwe,

n'ikn-ernema nu okne igwugwu.

28 Nga kpakara nhne ka beteru neeme, anu lizo, gwelizo risi anu olu kwnornu nu ige oznohia anu zi ndundu.”

Muhia nhne hite n'isisi be kwu figi

(*Mat 24:32-35; Mak 13:28-31*)

29 Jizosi tnu nu be elulu ka, “Anu le isisi figi nu kpakara isisi berere.

30 Nga anu nowhnu nu be nooruhia okwukwo budnu, anu mahia nu nduru-mini zi ndundu.

31 Kpam masi, nga anu jowhnu kpakara nhne ka neeme, anu mahia nu eli-eze Chiokike zi ndundu.

32 “Me kanu anu ezi oka, ebiri ka jeeuwe su kpakara nhne ka mee.

33 Oligwe nu owa jaagawhe, kovu ikwu-onu m jaagawhe ria ria.

Odo aka nu nsni

34 “Anya du anu eli, anu kwé okne nhne oriri nu nhne onwunwo nu oriri ke budnu ka, jihia mkpoma anu, ke jeeme obochi wam vakwnusi anu nu nga anu tuge anya a.

35 Kwnornu nu o jaavakwnusi kpakara ele zi n'owa lele mbita be sninnu anohia.

36 Anu neese nse ige obula, anu kpe okpukpe ma anu nwe rikne gbanahoru kpakara nhne ka jeeme, nu o gwuzo nu ruwhnu Nnwọ ke Badnu.”

37 Jizosi zi neezni nhne kpakara obochi n'Oro Nso Chiokike, n'ige ogbednachi

o whoga zne Rugwu Olivu zukwaru inwe nu o dnanyi tem chi bo.

³⁸ Kpakara ele badnu neezne Oro Nso Chiokike n'onu osisi ma be nurnu nhne o neezni.

22

Be gbaru iznuznu

o gbu Jizosi

(Mat 26:1-5; Mak 14:1,2; Jon 11:45-53)

¹ Ige Iriri Bredi Whuge Owhu ke be kwu Ogawhe zi ndundu.

² Ele risi ariohna nu ele zni iwu ele Ju noopio oghere be jeeji gbu Jizosi, kpa be notu ogwnu ele badnu.

Judasị kweruru

o re Jizosi

(Mat 26:14-16; Mak 14:10,11)

³ Ekwensu bna nu rime Judasi nye be kwu Isikarioti, nye bu otu nu rime ele sno apna a nri nu ebo wam.

⁴ Judasi znekwnusi ele risi ariohna nu ele risi ele neese Oro Nso Chiokike, gba iznuznu kpa o jeenye be Jizosi.

⁵ Ovu sору be n'onu, be kwe o nyee a iwai.

⁶ Judasi kweru, o noopio kpa o jeenwe oghere o gweru Jizosi nyee be nga ele badnu ma.

Be jiknernu o ri

Iriri Ogawhe

(Mat 26:17-25; Mak 14:12-21; Jon 13:21-30)

⁷ O du n'obochi ke Iriri Bredi Whuge Owhu, nga be naakwa ariohna aturnu Ogawhe.

⁸ Jizosi zizne Pita nu Joni, "Anu zne bikwatanu ai Iriri Ogawhe."

⁹ Be sikwa a, "Ndaa hne i pioru a bikwata a?"

¹⁰ Jizosi kanu be, "Kpa anu naabna n'eli ka, anu jowhnu otu nwerukna vugwu idudu mini, anu snornu a bna n'oro ke o jaabna.

¹¹ Anu kanu nyenwe oro wam, 'Nye-zni-nhne kaa a sikwa i, Ndaa oro ele izne hne me nu ele sno apna m jeeri Iriri Ogawhe?"

¹² O jeegesi anu otu onu-oro zi rude n'oro olu, be mekwataru, anu mekwata kpakara nhne."

¹³ Be zne whnu kpakara nhne lele kpa Jizosi kannu be. Be mekwata Iriri Ogawhe.

Wiri Anyasnu Nyenwe ai

(Mat 26:26-30; Mak 14:22-26; 1 Kor 11:23-25)

¹⁴ Nga ige duru, Jizosi nu ele izi a daziri neeri wiri.

¹⁵ O kanu be, "N'ezi o gwnusiri m rikne me nu anu rikọ Iriri Ogawhe ka si me ta awnhnuwhnu.

¹⁶ Kwnornu me kanu anu, m jeeri kwno a berere tem o mezu n'ige eli-eze Chiokike."

¹⁷ Jizosi gweru okiko, tunu Chiokike mmamma, kaa, "Anu gweru ka, keme n'esilawuru anu.

¹⁸ Kwnornu me kanu anu, m jownwoma manya hi n'isisi vaihi whuya ria ria tem eli-eze Chiokike va."

¹⁹ O gweru bredi, tunu Chiokike mmamma, nyawama a, nyee be, kaa, "Ka bu ano-ehni m me nyernu kwnornu

anụ, anụ neeme ka neechenwanya m.”

20 Kpam masị, nga wiri anyasnu wheru, o gweru okiko, kaa, “Okiko ka bụ ọgba-njọ-ẹhni ikne ke ọvnarna m, ke me wụsiri kwnornu anụ.

21 Kọvu anụ le, nye neere m nụ me dazigwu n'ikpechi neeri wiri.

22 Nnwọ ke Badnụ jaala lele kpa Chiokike kpebiri a, kọvu awhnụwhnu jaazinu nyerukna wam be jeehi n'aka a re Nnwọ ke Badnụ.”

23 Be n̄esikwarita ẹhni be nye jeeme nhne ka.

Nye kakwo ibne a

24 Ele sno apna a bete n̄odogbuta nye kakwo n'esilawuru be.

25 Jizọsi kanụ be, “Ele eze ele bụo ele Ju n̄echi ele ke be n'aka rikne, ele nwernu rikne hne be zị kaa nụ be bụ enyi ele badnụ.

26 Kọvu o kwésile ọ zị kpam n'esilawuru anụ. Nye kakwo ibne a n'esilawuru anụ j̄onu lele watakiri, nye noodu anụ lele nye izi.

27 Kwnornu nyele kakwo, nye neeri wiri n'ikpechi s̄obu nye neezne izi? Ọ bụ nye dazị ẹli neeri wiri. Kọvu m zị m n'esilawuru anụ lele nye izi.

28 “Anụ dazịgidnernu m n'ornurna m.

29 M jeenye anụ rikne ọ chị ẹli-eze lele kpa Nda m nyernu m,

30 ma anụ snornu m ri wiri, nwọ masị nụ ẹli-eze m, dazịri nụ ngadna eze neekpe ẹbnurnu nri nụ ẹbo ke Izirẹli ikpe.

Jizọsi karụ nụ Pita

j̄ogonahoru a

(*Mat 26:31-35; Mak 14:27-31; J̄on 13:36-38*)

31 “Saiṣmoni, Saiṣmoni, le, Ek-wensu r̄ioru ọ yọ i lele kpa be yọ ikpa.

32 Kọvu m kpennu m j̄i okpukpe, Saiṣmoni, ma ọkwnata mkp̄oma i ziri kwem. Nga i t̄uhnasnarnu, kwnagidne r̄umu nda i.”

33 Kọvu Pita sarụ, “Nyenwe aị, m j̄iknernu m o sno i zne ikelu m̄obu nw̄uma.”

34 Jizọsi sarụ a, “Pita, me kanụ i, s̄u okne ọchichi kwna ẹkwna tna, i j̄ogonahoru m m̄gba ẹto.”

Rẹkpa matị, rẹkpa nụ

ama-ogwnu

35 Jizọsi s̄ikwa be, “Nga me zihalaru anụ, anụ j̄ile rẹkpa īwai, m̄obu rẹkpa, m̄obu okoro-ọchi, o nwernu nhne k̄oru anụ?”

Be sarụ a, “Ọ zá nhne k̄oru aị.”

36 Ọ kanụ be, “Kọvu k̄itna, nye nwernu rẹkpa īwai gweru a, nye nwernu rẹkpa berere, gweru a, ọ b̄uru nụ i nwée ama-ogwnu, re iwo olu i, z̄uru otu.

37 Kwnornu nụ be gbarụ a n'okwukwo ns̄o, ‘Be gwn̄ukotaru ya nụ ele mme-hie,’ be jeemezu nhne ka. Owe! Nhne be gbarụ gbasiri m jeemezu.”

38 Ele sno apna a kaa, “Nyenwe aị, le ama-ogwnu lawuru.”

Jizọsi kanụ be, “O joozu.”

*Jizọsi kperu okpukpe
nụ Rugwu Olivu*

(*Mat 26:36-46; Mak 14:32-42*)

³⁹ Jizọsi whọga zne nụ Rugwu Olivu lele kpa o mesi, ele sno apna a snornu a.

⁴⁰ Nga ọ vaduru pji, ọ kanụ be, “Anụ kpe okpukpe ọ zị anụ dnabna nụ rime ọrnurna.”

⁴¹ Ọ whọga zne nụ ruwhnu matị, gbu mpnerne ọchi n'ẹli kpe okpukpe, kaa,

⁴² “Nda m, ọ bụru nụ ọ masiri i, gwemenu m okiko awhnụwhnu ka, kọvu ọ bụo nhne me pioru, kọvu nhne i pioru.”

⁴³ Enine izi hi n'oligwe varụ gba inwe.

⁴⁴ Hite n'igbugbu, o kpe okpukpe k'ezi, rùhara barụ a nụ lele okne ọkpurukpu ọvnarna naadnasa n'ẹli.

⁴⁵ Nga o kpe kworu okpukpe, ọ lahnakwnusi ele sno apna a, whnụ nụ be neezni anyarna hite nụ nhne igbugbu nụ rikne gwuru be.

⁴⁶ Ọ sịkwa be, “Kini mernu anụ neezni anyarna? Anụ lizọ kpe okpukpe ọ zị anụ dnabna nụ rime ọrnurna.”

Be nwudnernu Jizọsi

(*Mat 26:47-56; Mak 14:43-50; Jọn 18:3-11*)

⁴⁷ Kpa Jizọsi kpu ọka n'ọnu, Judasi, otu nụ rime ele sno apna a nri nụ ẹbo wam, duru igbudu ele badnụ va, o znekwnusi Jizọsi, snutu a ọnu.

⁴⁸ Kọvu Jizọsi sịkwaru a. “Judasi, i ji osnutu ọnu neere Nnwọ ke Badnụ?”

⁴⁹ Nga ele sno Jizọsi whnurnu nhne neeme, be

kaa, “Nyenwe ai, a gweru ama-ogwnu ai lu ogwnu sa?”

⁵⁰ Otu nyenum n'esilawuru be, ji ama-ogwnu gbu, bihala nnwọ izi nye risi ariohna nsnị akarikwnunga a.

⁵¹ Kọvu Jizọsi sarụ be, “Ozulem!” Ọ kpatụ nsnị nwerukna wam aka, gwọ a.

⁵² Jizọsi kanụ ele risi ariohna nụ ele risi ele neese Oro Nsọ Chiokike nụ ele okno badnụ, ele varụ ọ nwugwu a, “Anụ ji ama-ogwnu nụ okpiri va lele nụ m bụ m nye neemegidne iwu ẹli.

⁵³ Me nụ anụ zị kpakara ọbochi n'Oro Nsọ Chiokike, anụ nwée rikne nwugwu m. Kọvu ka ige ke anụ, ige rikne ọchichiri nẹechi.”

Pita gọnahoru Jizọsi

(*Mat 26:57,58,69-75; Mak 14:53,54,66-72; Jọn 18:12-18,25-27*)

⁵⁴ Kpa be nwugwu Jizọsi, be duru Jizọsi zne n'oro nye risi ariohna, Pita snornu nụ be nụ hne zị ikere.

⁵⁵ Nga be kpawhusiri bẹkwu n'esilawuru ederezi, Pita snornu be daziri ẹli nụ ngeri bẹkwu.

⁵⁶ Otu nnwọ oknornokno ele neezne izi whnurnu Pita hne ọ zị nụ ngeri bẹkwu. O legidne a anya, kaa, “Nwerukna ka nụ Jizọsi sno.”

⁵⁷ Pita gọ, kaa, “Nwerinya, m máam nye ọ bụ.”

⁵⁸ Ige matị wheme, otu nwerukna whnurnu a, kaa, “I bụ otu nụ rime be.”

Pita sarụ a, “Nwerukna, m bula m.”

59 Nga otu awa whemernu, nye berere kwusi a rikne kaa, “N’ezi ọka, nwerukna ka nū ya sno, kwnornu nū ọ bụ nye Galili.”

60 Pita saru, “Nwerukna, m máam nhne i nookwu.” Kpa ọ kpụ ọka n’onu, okne ọchichi kwnarnu ẹkwana.

61 Nyenwe aị tūhnasna legidne Pita anya. Pita chenwanya ikwu-onu Nyenwe aị kwunnu a, “Sụ okne ọchichi kwna ẹkwana tna, i jọogonahoru m mgbá ẹto.”

62 Pita whọga ederezi kwana ẹkwana mkpuru ovu k’agida.

*Jizọsi zị nū ruwhnu
ele eze-ikpe*

(Mat 26:67,68; Mak 14:65)

63 Ele neese nse bete naapnịa Jizọsi nhne nọomu a rụmu.

64 Be gweru ikpe knesi a anya, kaa, “Whnunu aị ọwhnurninya, nyele gbọru i aka?”

65 Be kwu nhne berere zị ichne ichne, kpasị a iwhnerne.

*Jizọsi gwuzo nū
ruwhnu ele eze-ikpe*

(Mat 26:59-66; Mak 14:55-64; Jọn 18:19-24)

66 Nga chi bọru, ele okno badnụ ele Ju, nū ele risi ariohna nū ele zni iwu ele Ju, gbakọru n’otu, be kwuyanụ be Jizọsi n’ikpe be.

67 Be kaa, “Ọ bụru nū i bụ Karaịsi, kanụ aị.”

Jizọsi saru be, “Ọ bụru nū me kanụ anụ, anụ jéekweru m.

68 Ọ bụru me sịkwa anụ ajiji, anụ jáasa.

69 Kọvu hite nū kịtna zne nū ruwhnu, Nnwọ ke Badnụ jaadazị n’akarikwnunga ke Chiokike ke bụ Dikne.”

70 Be sịkwa a, “Ọ bụ jịwa bụ Nnwọ Chiokike?”

Ọ saru be, “Anụ karu nū m bụ m.”

71 Be kaa, “A píole akebne berere, a nurnu nhne hi n’onu a whụya.”

23

*Jizọsi gwuzo nū
ruwhnu Paịleti*

(Mat 27:1-2,11-14; Mak 15:1-5; Jọn 18:28-38)

1 Ele iznuznu ikpe ele Ju lizọ duru Jizọsi zne nū ruwhnu Paịleti,

2 be bete noobno a nhne, be kaa, “A whnurnu nwerukna ka hne o nooduwhu ele ke aị, o nookwu be tūkwadia ntụ nye Siza, naakaa masị nū ọ bụ Karaịsi, eze aị.”

3 Paịleti sịkwa a, “I bụ eze ele Ju?”

Jizọsi saru a, “Owe! Jị n’iwhuru i karu kpam.”

4 Paịleti kanụ ele risi ariohna nū igbudu badnụ wam, “Ọ zá nhne ojo me whnurnu nū rime nwerukna ka.”

5 Kọvu be kwusiri a rikne, “O neegweya onu gharu onu n’esilawuru ele Ju zị nū Judiya hite nū nhne o neezni. Ọ panizoru a nū Galili tem ọ vadu hna.”

*Jizọsi gwuzo nū
ruwhnu Erodu*

6 Nga Paịleti nurnu a, ọ sịkwa be ma nwerukna ka ọ bụ nye Galili.

7 Nga ọ mahiari nū Jizōsi hi n'eli ke Erọdu nēchi, o ziznenu a Erọdu nye zị nū Jeruselem n'ige wam.

8 Mkpoma sọru Erọdu n'ọnu k'agida nga ọ whnuru nū Jizōsi, kwnornu nū o noopio ọ whnū a agida ige wheru ewhe. Hite nū nhne ọ nuru gbasiri a, o neele anya nū Jizōsi jọrnuru ọnu ndu-ehni nū ruwhnu a.

9 Kam kpayarū, Erọdu sika Jizōsi agida ajiji, kovu nū Jizōsi sála a oka ọbula.

10 Ele risi ariohna nū ele zni iwu ele Ju gwuzoru pi noobno Jizōsi agida nhne.

11 Erọdu nū ele ogwuu a mee Jizōsi nhne rumu, kpasị a iwhnerne. Be wosị a iwo marnu mma, zihnaznenu a Paileti.

12 Paileti nū Erọdu buru enyi hite n'ọbochi wam, kwnornu nū be bu ele irno nū mbom.

Be marnu Jizōsi ikpe enwu

(Mat 27:15-26; Mak 15:6-15; Jon 18:39--19:6)

13 Paileti sukwukota ele risi ariohna nū ele nēchi echi nū kpakara ele badnu,

14 ọ kanu be, "Anu kwuyannu m nwerukna ka nu ọ bu nye nooduhie ele badnu, m lebnana m anya nu kpakara nhne anu bnornu nwerukna ka nu ruwhnu anu, ọ za nhne me whnuru bu risi nhne anu noobno a.

15 Erọdu masi whnuge nhne ojo ọbula nū rime a, kwnornu nū o zihnayarnu ai ya, ọ za nhne kwesiri enwu ke o mernu.

16 M jaapnia nhne, gharu a, ọ la." [

17 N'ige Iriri Ogawhe ọbula, Paileti nēsigbasinu be otu nye ikelu.]

18 Kpakara igbudu badnu gweru otu nkoli siwama, "Gbu nwerukna ka, sigbasinu ai Barabasi."

19 (Be yisiri Barabasi n'oro ikelu kwnornu nū o yiri aka n'ele megidnenu nye nēchi echi, o gburu badnu.)

20 Paileti pioru ma ọ sigbasi Jizōsi, ọ riasno igbudu badnu wam.

21 Kovu be siwama koriri, "Kpogidne n'ogba, kpogidne a n'ogba."

22 Paileti sika be ke mgba eto, "Kini mernu? Kini bu nhne ojo ke o mernu? M whnuge m nhne ojo ke o mernu ke kwesiri enwu. M jaapnia nhne, sigbasi a, ọ la."

23 Kovu be zị koriri neesi lulo n'okne nkoli be kpogidne a n'ogba, be nwehiaru nhne be neesi.

24 Paileti marnu Jizōsi ikpe, o nyee be nhne be pioru.

25 O sigbasinu be nye wam zị n'oro ikelu nye megidnenu ele nēchi echi, gbu masi badnu, nye be rioru a. O gweru Jizōsi nyewhete be.

Be kpogidnenu Jizōsi n'ogba

(Mat 27:32-44; Mak 15:21-32; Jon 19:17-27)

26 Be duru Jizōsi zne, n'apna be sigidne Saimoni nye Sirini, nye hi n'aznu mba naabnanya, be vukwasị a ogba, ma o vuru a snornu Jizōsi n'aznu.

27 Agịda ele badnụ snornu a, ma ele rinya ele naakwanụ Jizọsi ẹkwana.

28 Jizọsi tughnasarnu, kanụ be, “Ele rinya Jeruselem, anụ kwnánụ m ẹkwana, kọvu anụ kwanụ ehni anụ nụ rụmu anụ ẹkwana.

29 Kwnornu nụ ige vawa nga be jaakaa, ‘Ele rinya nwée nnwọ bụ ele ọwa ọma, nụ ele múge nnwọ nụ ele chíge rụmu rẹma.’

30 Ige wam,
Ele badnụ jaakanụ rugwu,
‘Dnagidne aị,’
nụ rugwu matị ‘Kpusni aị.’

31 Ọ bụru nụ ele badnụ mee kpá nga isisi zị bụdnu, ndaa kpá ọ jọonu nga ọ kpọru bẹkwnu?”

32 Be kwuru ele ojo lawuru berere ma be gbu be nụ Jizọsi.

33 Nga be vaduru nụ hne be kwu Okpokoro Risi, be kpọgbu a, ya nụ ele ojo wam, otu badnụ n'akarikwnunga a, nye ke berere n'akarita a.

34 Jizọsi kaa, “Nda m, gbarunu be kwnornu nụ be máa nhne be neeme.”

Be keru iwo a n'esilawuru be, nga be vukworu ọgbanuchi.

35 Ele badnụ gwuzoru neelekiri, ele risi ele Ju nọomu a rụmu. Be kaa, “Ọ znọhiaru ele berere, ọ znọhia ẹhni a, ọ bụru nụ ọ bụ Karaisi wam, nye Chiokike họhiaru.”

36 Ele ọgwunu nọomu a rụmu. Be nyee a manya gbarụ ọka,

37 be kaa, “Ọ bụru nụ ị bụ eze ele Ju, znọhia ẹhni ị.”

38 Be gbarụ nhne gbasiri a n'olu ọgba a, “Ka bụ Eze ele Ju.”

39 Otu nyenum nụ rime ele be kpogidnenu ya nụ be, nọogo a ngugo, “Kwa ị bụ Karaisi, znọhia ẹhni ị, znọhia masị aị.”

40 Nye ke berere bigbo a, kaa, “Ị tú ogwnu Chiokike, ị zị n'otu ikpe wam.

41 A naata awhnụwhnu kwesiri aị, kwnornu nụ a nanahia ọgwo ẹrnu aị. Kọvu nwerukna ka méne nhne ojo ọbula.”

42 Ọ kanụ Jizọsi, “Jizọsi, chenwanya m nga ị jaava chí lele eze.”

43 Jizọsi saru a, “Me kanụ ị ezi ọka, me nụ ị jaazi tna nụ Paradasi.”

Enwu Jizọsi

(*Mat 27:45-56; Mak 15:33-41; Jon 19:28-30*)

44 Hite n'esilawuru iwhehnie,* ọchichiri gbasnirni kpakara ẹli wam dụ n'ọtnu-ige ke ẹto,†

45 kwnornu nụ ẹhnam gbarụ ọchichiri. Ikpe ke bnosnirni hne zị nsọ n'Ọro Nsọ Chiokike gbawaru nga lawuru.

46 Jizọsi gweru okne nkọli siwama lulo, “Nda m, m neeyisi enine m n'aka ị.” Nga o kwuru ka, ọ kna inwe.

47 Nga nye nẹchi otu riwhu ele ọgwunu whnurnu nhne mernu, ọ znarni Chiokike,

* **23:44** *n'esilawuru iwhehnie*: ọkwukwo ke mbọm kwuru ige awa isunu † **23:44** *ọtnu-ige ke ẹto*: ọkwukwo ke mbọm kwuru ige awa tolu

kaa, “N’ezi, nwerukna ka bu nye mee oma.”

⁴⁸ Nga ele gwuzo neelekiri whnurnu nhne mernu, be kwa aka nu mkpoma, whoga.

⁴⁹ Kovu kpakara ele magwu Jizosi nu ele rinya ele snornu a hite nu Galili gwuzo nu hne zi ikere, n’owhnu nhne neeme.

Be liri Jizosi

(*Mat 27:57-61; Mak 15:42-47; Jon 19:38-42*)

⁵⁰ Otu nwerukna rewhna a bu Josefu, nye bu otu nu ele ikpe, nye be n’oso anya, nye oma.

⁵¹ O bu nye ikpe, kovu o snoge be kwekorita nu nhne be kpebiri nu nhne be mernu, nye hi nu Arimatiya ke zi nu Judiya, nye neese nga ige eli-eze Chiokike jaava.

⁵² O znekwnusi Paleti, rio a iznu Jizosi.

⁵³ O vudna iznu Jizosi n’olu ogba, gweru ikpe marnu mma whu a, lite a nu rime ilili ke zi nu rime rugwu ke o za nye be liru nu rime a nu mbom.

⁵⁴ O bu obochi ojiknernu, Obochi Ozukwa Inwe ele Ju gwnarnu mati o panizo.

⁵⁵ Ele rinya wam hi nu Galili va snornu Josefu whnu kpa ilili a nu, nu kpa o dnan’itaru a Jizosi.

⁵⁶ Be lahna oro, gwakota mono otute nwernu eknarna oma be jeete iznu a.

Be zukwa inwe n’Obochi Ozukwa Inwe lele kpa nhne be nyernu n’iwu kwuru.

24

Jizosi lizoru n’enwu
(*Mat 28:1-10; Mak 16:1-8; Jon 20:1-10*)

¹ N’onu osisi n’obochi mbom n’ikwezu, ele rinya wam gweru mono otute wam be gwakotaru ke nwernu eknarna oma, zne ilili Jizosi.

² Be whnurnu nu be vumernu akaworugwu be jiri kpusni onu ilili wam.

³ Be bnazne nu rime ilili, be whnuge iznu Nyenwe ai Jizosi.

⁴ Be gwuzoru naari nhne ka bu, ngangam, ele rukna lawuru wogwu iwo abochna noogbu amuma gwuzoru nu ngeri be.

⁵ Ogwnu turu ele rinya wam, be dna kpu ruwhnu n’eli, kovu ele rukna wam kanu be, “Kini kpayaru anu noopio nye zi budnu n’esilawuru ele nwurnu onwu?”

⁶ O zila hna, o hilem n’enwu lizo. Anu chenwanya nhne o kannu anu nga o zi nu Galili,

⁷ nu be jeegweru Nnwọ ke Badnu nyega ele mmehie, be kpo gidne a n’ogba, n’obochi ke eto, o jeehi n’enwu lizo.”

⁸ Ele rinya wam chenwanya ikwu-onu a.

⁹ Be hi n’ilili wam lahna, kanu nri nu otu badnu ele sno apna a nu ele berere nhne be whnurnu.

¹⁰ Ele rinya wam bu Meri Magidalini, nu Joana, nu Meri nne Jemisi, be nu ele rinya berere kanu ele izi wam oka ka.

11 Kọvu be kwége nhne ele rinya kwuru, be naari nù ọ bụ ọka etekne.

12 Pita lizo, gba ẹso zne n'ilili, o whudna, whnụ ikpe iznu, ọ zá nhne berere ọ whnurnu. Ọ lahna ọro naari nhne mernu.

*N'apna zne Emaosi
(Mak 16:12,13)*

13 N'ọbochi wam, ele sno apna a lawuru neezne ẹli Emaosi, nhne nù lele maịli ẹsau.

14 Be nookwurita kpakara nhne mernu.

15 Kpa be neezne nookwu nhne ka, Jizosi n'iwhuru a kpayabeturu ndundu, snornu be neezne.

16 Be whnụ a, kọvu be máa nù ọ bụ Jizosi.

17 Jizosi sịkwa be, “Kini bụ nhne anụ ọọturni kpa anụ neezne?”

Be gwuzoru bii, gbaru ruwhnu.

18 Otu nù rime be rewhna a bụ Kilopasi, sịkwa a, “Okwole jįwa bụ nye izne ke zị nù Jeruselem nye máa nhne mernu ọbochi ele nù ele ka wheru ewhe?”

19 Jizosi sịkwa a, “Kini bụ nhne kọ?”

Be kaa, “Nhne gbasiri Jizosi nye Nazareti, nwerukna ka bụ nye ọwhnurninya Chiokike, ọ bụ dikne n'ikwu-ọnu ma nù ẹnu nù ruwhnu Chiokike ma nù ruwhnu ele badnụ.

20 Ele risi ariohna nù ele risi aị gweru a nyee ma be kpe ikpe ẹnwu, be kpogidne a n'ogba.

21 Kọvu a leru anya nù ọ bụ nye jaagbahia Izireli. Ke

kakwo, tna bụ ọbochi ẹto a kpa nhne ka mernu.

22 Agwna ele rinya aị nù be zị kpasiri aị ogwnu tna. Be znernu n'ilili a n'ọnu ọsisi,

23 kọvu be whnúge iznu a. Be va kanụ aị nù be whnurnu ọwhnurninya ele enine izi, ke kannu be nù ọ zị budnu.

24 Agwna ele aị nù be zị znernu ilili a, whnụ masi lele kpa ele rinya wam kwuru, kọvu be whnúge iznu a.”

25 Jizosi kanu be, “Anu bụ ele iwhnirniwhno, anu zila gnarnagnarna nù okweru nhne kpakara ele ọwhnurninya kwuru.

26 Ọ zị mkpa nù Karaisi jaata kpakara awhnwhnu, bna n'igwugwu a.”

27 Jizosi kọwamanu be nhne be gbaru n'okwukwo nsọ gbasiri ẹhni a, hite n'okwukwo Mozizi nù ele ọwhnurninya.

28 Kpa be vaduru ẹli wam be neezne, Jizosi mee lele o neewhe ruwhnu,

29 be sigidne a, kaa, “Snornu aị daziri, ọbochi zneminem.” O snornu be daziri.

30 O snornu be daziri ẹli n'ikpechi wiri, o gweru bredi, tu mmamma, nyawama a, bete neenye be.

31 Anya be kpume, be mahia a, kọvu o whume n'anya be.

32 Be kwukwarita n'ehni be, “Ọ nù lele nù bekwnu neerne nù mkpoma aị nga o nookwunu aị ọka n'apna, nọkowanu aị okwukwo nsọ.”

33 Be lizo ngangam lahna Jeruselem. Be whnụ ele sno

apna a nri nū otu wam, hne be gbakogwu nū otu nū ele berere.

³⁴ Be naakaa, “O bụ n'ezi, Nyenwe aị hilem n'ẹnwu lizọ, o mernu Saịmoni whnū a anya.”

³⁵ Badnū lawūru wam kōwanu be nhne mernu n'apna, nū kpa be jiri mahia Nyenwe aị nga ọ nyawarū bredi.

Jizọsi mernu ele sno apna a whnū a anya

(*Mat 28:16-20; Mak 16:14-18; Jon 20:19-23; Ērnu 1:6-8*)

³⁶ Kpa be zị nookwu ọka ka, Jizọsi gwuzoru n'esilawūru be, kanū be, “Udno zīnu anū.”

³⁷ Ogwnu tūru be k'agida, be che nū be whnūru renwu.

³⁸ Jizọsi kanū be, “Kini mernu ogwnu nọtū anū? Kini mernu anū neenwe mkpoma lawūru nū mkpoma anū?”

³⁹ Anū le aka m lawūru nū ọchi m lawūru. O bụ mawa. Anū kpatū m aka whnūru, renwu nwée anọ-ẹhni nū ọkpukpu, lele kpa anū whnūru me nwernu.”

⁴⁰ Nga o kwuru ka, o gesi be aka a lawūru nū ọchi a lawūru.

⁴¹ Be nwée rikne kweru kwnornu ovu ọso n'onu nū ọtun'anya, ọ sika be, “Anū nwernu wiri o riri hna?”

⁴² Be nyee a otu aznū be siri esi,

⁴³ o gweru a ri nū ruwhnu be.

⁴⁴ O kanū be, “Ka bụ nhne me kannū anū nga me nū anū zị. Kpakara nhne be gbarū n'okwukwo nsọ gbasiri

m n'iwu Mozizi jeeme, ma ke ele ọwhnurninya nū Eri Oma.”

⁴⁵ O kpume echiche be ma be ghohia nhne be gbarū n'okwukwo nsọ.

⁴⁶ O kanū be, “Ka bụ nhne be gbarū n'okwukwo nsọ, nū Karaisi jaatariri awhnūwhnu, nū o jeehi n'ẹnwu lizọ n'ọbochi ke ẹto,

⁴⁷ nū be jeeji rewhna a kpọ okwo ọtuhnasna mkpoma nū rime kpakara mba, ma Chiokike gbarū mmehie be. Be jeehite nū rime Jeruselem panizo nọokpo okwo.

⁴⁸ Anū bụ ele akebne kpakara nhne ka.

⁴⁹ M jeeziyanu anū nhne Nda m kweru nū mkwna, kovu anū daziri nū Jeruselem tem rikne ke hi n'oligwe dnakwasị anū.”

Jizọsi larū n'oligwe

(*Mak 16:19,20; Ērnu 1:9-11*)

⁵⁰ Jizọsi duru be whoga zne n'eli Betani, ọ chilizo aka lawūru olu, gozi be.

⁵¹ Kpa ọ zị nọogozị be, be gwelizo a la n'oligwe.

⁵² Be kpōnu a risi ẹli, lahna Jeruselem, snarnima jihia mkpoma be.

⁵³ Be dazigidne n'Oro Nsọ Chiokike nọtunu Chiokike mmamma.

**Izi ọma lele kpa
Joni
gbarụ a n'okwukwo
Nhne gbasiri
okwukwo ka**

Izi ọma lele kpa Joni gbarụ a n'okwukwo gwehiaru Jizọsi iwhe lele Ikwu-Ọnu Chiokike, nye “ghọru badnụ, va wuru n'esilawuru aị” (1:14). Lele kpa okwukwo wam kwuru, be gbarụ izi ọma ka ma ele badnụ kweru nụ Jizọsi bụ Nye Ọznohia wam, Nnwọ Chiokike, hite n'okwnata mkpoma nụ rẹwhna a, be nwehia bụdnu (20:31).

Joni mernu a mahia nụ Jizọsi bụ Ikwu-Ọnu Chiokike. Ẹnu ndu-ehni Jizọsi gesiri nụ ọ bụ Nye Ọznohia wam Chiokike kweru mkwna. Okwukwo ka gesiri nụ agwna ele badnụ kweru nụ Jizọsi ghọ ele sno apna a, kọvu ele berere kwéle nụ a, be bụru ele neemegidne Jizọsi dū n'ẹnwu a.

Joni kwusiri nhne gbasiri nkesi bụdnu kwó okwo rikne hite nụ Karaịsi, nookwu nụ Jizọsi bụ apna, ezi ọka nụ bụdnu. Nụ okwukwo Joni, a whnurnu nụ nhne a nọowhnu anya kpakara ọbochi lele mini, brẹdi, iwhe, nye znụ atnurnu nụ atnurnu a, isisi nụ mkpuru a, neegesi nhne ke Enine.

Nhne zị n'okwukwo ka

Ọpanizo (1:1-18)

Joni Nye Wụ Mini nụ ele sno apna Jizọsi mbom (1:19-51)

Ẹnu Jizọsi nụ ọhna (2:1--12:50)

Ọbochi ipne-aznụ nụ rime Jeruselem (13:1--19:42)

Olizọ n'ẹnwu nụ ọwhuya iwhe Nyenwe aị (20:1-31)

Ọ whuyaru iwhe nụ Galili (21:1-25)

Nye gbarụ okwukwo ka: Joni Risi nhne o kwno gba a: Ma ele badnụ kweru nụ Jizọsi bụ Karaịsi wam, ma hite n'okwnata mkpoma nụ rẹwhna a, be nwehia bụdnu.

Ikwu-ọnu ke ghọru badnụ

1 Nụ mbom hne Ikwu-ọnu wam zị, Ikwu-ọnu wam nụ Chiokike zị nụ mbom, Ikwu-ọnu wam bụ Chiokike.

2 Ya nụ Chiokike zị nụ mbom.

3 Be keru kpakara nhne hite n'aka a, ọ zá nhne ke be keru hne ọ zila.

4 Ikwu-ọnu wam bụ risi bụdnu, bụdnu wam bụ masi iwhe ke badnụ.

5 Iwhe wam nọomu nụ rime ọchichiri, ọchichiri nwé rikne nwegidne a.*

6 Chiokike ziyaru otu nyerukna rẹwhna a bụ Joni.

7 Joni varụ lele nye akebne ke iwhe wam, ma kpakara ele nurnu izi a kweru n'iwhe wam.

8 Joni bụo iwhe wam, kọvu ọ bụ nye akebne iwhe wam.

* 1:5 nwé rikne nwegidne a: mọbu nwé rikne ghọhia a.

9 Ka bú iwihne wam n'ezi bú ke varu n'owa, ke neenye kpakara ele badnu iwihne.

10 Ikwu-onu wam zi n'owa, o bú n'ezi nu Chiokike keru owa hite nu rime a, kovu owa máa nye o bú.

11 O vakwnusiri ele ke a, kovu ele ke a nábnanyana a.

12 Kovu kpakara ele nabnanyanu a, kwerumako nu rewhna a, o nyernu be rikne be buru rumu Chiokike.

13 Be múge ele ka lele kpa be murnu ele badnu. Be múge be hite n'echiche ke badnu, mọbu hite nu nda k'owa, kovu Chiokike bú Nda be.

14 Ikwu-onu wam ghoru badnu, va wuru n'esilawuru ai. A whnurnu igwugwu a, bú igwugwu ke Nnwọ Nda a murnu kpoi, oru nu ezi oka jihiaru nu rime a.

15 Jóni gbaru akebne gbasiri a, siwama, kaa, "Ka bú nye me nookwu oka a nu o snogwu m n'aznu, kovu o kakwo m, kwnornu nu o zi su be murnu m."

16 Hite n'oru a zi agida, a nwernu ngozi tukwasi nu ngozi.

17 Chiokike hiri n'aka Mozizi nyee iwu, Chiokike nyee masiri oru nu ezi oka hite n'aka Jizosi Karaisi.

18 O za nye whnuleru Chiokike anya. Nnwọ Nda a murnu kpoi, nye bú Chiokike, nye zi n'akwankọ ke Nda a, mernu ele badnu mahia Nda a.

Jóni karu nu o buo

Karaisi

(*Mat 3:1-12; Mak 1:1-8; Luk 3:1-18*)

19 Ka bú akebne Jóni gbaru nga ele risi ele Ju zi nu Jeruselem ziznenu ele ariohna nu ele Livai be sikwa a, "I bú nyele?"

20 Jóni saru be, o gola ego, kovu o kwusiri a rikne, kaa, "M búla m Karaisi."

21 Be sikwa a, "I bú kọ nyele? I bú Elaija sa?"

Jóni kaa, "Óza."

Be sikwa a, "I bú Nye Owhnurninya wam?"†

O saru be, "Óza."

22 Be kaa, "Kanú ai nye i bú, ma a mahia nhne a jaakanu ele dusiri ai. Kini bú nhne i kwuru gbasiri ehni i?"

23 Jóni saru be, "M bú m akpiri nye nookpo okwo n'eli-ikpa, 'Anu mekwata apna Nyenwe ai ma o snirni asni,'

lele kpa Azaya nye owhnurninya kwuru."

24 Ele izi ele Farisi ziyaru,

25 sikwaru Jóni, "I búo Karaisi, mọbu Elaija, mọbu Nye Owhnurninya wam, kini mernu i noowu ele badnu mini?"

26 Jóni saru be, "M ji m mini noowu ele badnu mini, kovu otu nyenum gwuzo n'esilawuru anu, nye anu máa.

27 O snogwu m n'aznu, kovu m kwésile m o toma eriri okoro-ochi a."

† 1:21 Nye Owhnurninya wam: Gwnu Ditaronomi 18:15; Ernu Ele Izi 3:22

28 Kpakara nhne ka mernu nū Bētani n'òbosi ẹnam ke aznū Osimini Jòdani kiyari, hne Jōni nọowu ele badnū mini.

*Jizọsi, Nnwo
Atnurnu Chiokike*

29 N'ekile a, Jōni whnurnu Jizọsi hne o naavakwnusi a, ọ kaa, “Anū le, ka bụ Nnwo Atnurnu ke Chiokike, nye noovume mmehie k'owa.

30 Ka bụ nye wam me nookwu ọka nga me karū, ‘Otu nyenum sno m n'aznū, kọvu ọ kakwo m, kwnornu nū ọ zị sū be murnu m.’

31 M máam nye ọ bụ, kọvu m nọowu ele badnū mini ma ele Izireli mahia nye ọ bụ.”

32 Ka bụ akebe Jōni gbarū, “M whnurnu m Enine Nsọ hi n'oligwe lele nduru dnakwasị a, daziri n'olu a.

33 Kọvu nū m máam nye ọ bụ. Chiokike nye ziyaru m me wū ele badnū mini kannū m, ‘I jọowhnu Enine Nsọ hi n'oligwe dnakwasị otu badnū dazigidne nū ya, nye wam bụ nye jeeji Enine Nsọ nọowu ele badnū mini.’

34 Me nū iwhuru m whnurnu a, gba akebe nū nye ka bụ Nnwo Chiokike.”

*Ele mbom sno
apna Jizọsi*

35 N'ekile a, Jōni nū ele sno apna a lawuru gwuzo.

36 Nga ọ whnurnu Jizọsi hne o neewhe, ọ kaa, “Anū le Nnwo Atnurnu ke Chiokike.”

37 Ele sno apna a lawuru wam nurnu a, be snornu Jizọsi.

38 Jizọsi tūhnasnarnu whnū nū be noosno a n'aznū, ọ sika be, “Kini bụ nhne anū noopio?”

Be kaa, “Rabai” (ke bụ, Nye-zni-nhne), “Ndaa hne i wu?”

39 Jizọsi sarū be, “Anū va whnurnu.” Ọ bụ nhne nū lele ọtnu-ige ke ẹno n'iwhnehnie,‡ be snornu a zne whnurnu hne o wu, be nū a daziri kpakara ọbochi wam.

40 Otu nū rime ele nurnu nhne Jōni kwuru ke snornu Jizọsi bụ Anduru nwene rukna Saịmoni Pita.

41 Ngangam, o piohiaru nwene a rukna, Saịmoni, ọ kanū a, “A whnuna m Mezaya” (ke bụ Karaisi).

42 O kwuznenu Jizọsi Saịmoni.

Jizọsi legidne Pita anya kaa, “I bụ Saịmoni nnwo Jōni, be jookwu i Kifasi,” be tūhnasna a, Pita, ke bụ rugwu.

*Jizọsi sukwuru Filipu
nū Nataneli*

43 N'ekile a, Jizọsi kpebi o zne Galili, o piohia Filipu, ọ kanū a, “Snornu m zne.”

44 Filipu, Anduru nū Pita hi nū eli Bētesaida.

45 Filipu pohia Nataneli, ọ kanū a, “A whnurnu nye wam Mozizi nū ele ọwhnurninya gbarū nhne gbasiri a n'okwukwo nsọ, Jizọsi nye Nazareti, nnwo Josefu.”

46 Nataneli sika a, “Eli Nazareti, o nwernu nhne ọma

‡ 1:39 Ọtnu-ige ke ẹno n'iwhnehnie: okwukwo ke mbom kwuru ige nri awa

òbula ke jeehi n'èli Nazareti whuya?"

Filipu saru a, "Vaa, whuru." "

47 Nga Jizosi whuru Nataneli naavakwnusi a, o kwu nhne gbasiri a, "Ka bu nye Izireli n'ezi, nye aghigho zila nu rime a."

48 Nataneli sikwa a, "Nda kpa i jiri mahia m?"

Jizosi saru a, "M whuru m ji nu mkpururu isisi figi su Filipu sukuru i."

49 Nataneli saru a, "Nye-zni-nhne, i bu Nnwò Chiokike. I bu eze Izireli."

50 Jizosi sikwa a, "I kwerru kpoi kwnonu nu m karu m nu m whuru m ji nga i zi mkpururu isisi be kwu figi? I jowhnu nhne ke kakwo ka."

51 O kanu be, "Me kanu anu ezi oka, anu jowhnu hne oligwe kpumenu, nu ele enine izi Chiokike neep-nezne, nehidna n'olu Nnwò ke Badnu."

2

Jizosi mernu mini ghò manya

1 N'òbochi ke èto, olulu nnwerne zi n'èli Kana n'èli Galili, nne Jizosi zi masi pi.

2 Be sukuru Jizosi nu ele sno apna a n'olulu nnwerne wam.

3 Nga manya be nonwo kworu, nne Jizosi kanu a, "Be nwema manya."

4 Jizosi saru a, "O gbasiila m, si nwerinya. Ige m yóoduge."

5 Nne a kanu ele nezne izi, "Anu mee nhne obula o karu anu mee."

6 Idudu mini isunu gwuzo ndundu be jiri rugwu kpu, ke ele Ju ji nosnu nhne lele kpa omen'eli be jiri ziri, ke otu jeeri nri lawuru mabu nri èto galoni mini.

7 Jizosi kanu ele nezne izi, "Anu gbajite be nu mini." Be gbaji be mini du nonu be.

8 O kanu be, "Anu kwuhia agwna mini wam gwezenu nye risi ngadna iriri."

Be gwezenu a.

9 O detu mini wam ke ghòru manya riro. O ma hne manya wam hi, kovu ele nezne izi ele gbaru mini wam magwu. O sukuru nye nololu nnwerne,

10 o kanu a, "Nye obula neekesi manya kakpa mma n'oziri, nga ele izne nwokparu manya, o ke manya ojo. Kovu i bitaru manya kakpa mma du kina."

11 Ka bu ernu ndu-ehni mbom Jizosi ruru. O ruru a nu Kana n'èli Galili, o gesi igwugwu a, ele sno apna a kwnata a mkpoma.

12 Nga ka whemenu, Jizosi nu nne a, nu rumu nne a, nu ele sno apna a zne Kapanom, be daziri pi obochi ele nu ele.

Nhne Jizosi mernu n'Oro Nso Chiokike

(Mat 21:12,13; Mak 11:15-17; Luk 19:45,46)

13 Iriri Ogawhe ele Ju zi ndundu, Jizosi zne Jeruselem.

14 O whuru ele neere aturu nu ehni nu nduru nu ele naagbanwo iwai dazigwu n'ikpechi n'Oro Nso Chiokike.

15 O gweru eriri mee mbini, chihala kpakara

be, ma ehni ma atnurnu. O kpute ikpechi kpakara ele naagbanwo iwai ruwhnu n'eli, chisakwo iwai be.

16 O kanu ele neere nduru, "Anu whoga hna, anu mema oro Nda m oro ahia."

17 Ele sno apna a chenwanya nhne be gbaru n'okwukwo nsọ, "Nhne gbasiri Oro Nso Chiokike neerne lele bekwnu nu rime m."

18 Ele Ju sikwa a, "Ndaa ernu ndu-ehni ke i jorunu ke neegesi nu i nwernu rikne mee nhne i neeme?"

19 Jizosi saru be, "Anu kwnadna Oro Nso ka, m joowulizo a n'obochi eto dai."

20 Ele Ju saru a, "Be jiri nri awha eno nu isunu wu Oro Nso ka, i joowu a n'obochi eto?"

21 Kovu Jizosi kwuru oka gbasiri ehni a lele Oro Nso Chiokike.

22 Nga Jizosi hiri n'enwu lizo, ele sno apna a chenwanya nu o kwuru oka ka, be kweru nhne okwukwo nsọ kwuru nu nhne Jizosi kwuru.

23 Kpa Jizosi zi nu Jeruselem nu Iriri Ogawhe, agida ele badnu kweru nu ya kpa be whnurnu agida ernu ndu-ehni o nornu.

24 Kovu Jizosi kwela o nyee be ehni a, kwnornu nu o magwu kpakara badnu nkari nkari.

25 O zila mkpa nu be kanu a nhne gbasiri nye obula, kwnornu nu o magwu nhne zi nu mkpoma be.

3

Jizosi nu Nikodimosi

1 Otu nwerukna be kwu Nikodimosi, otu nu rime ele Farisi, nye risi ele Ju,

2 vakwnusiri Jizosi n'abali. O kaa, "Rabai, a magwu nu i bu Nye-zni-nhne ke Chiokike ziyaru, kwnornu nu o za nye jorunuli ernu ndu-ehni i nornu okwolem ma Chiokike dagwunu a."

3 Jizosi saru, "Me kanu i ezi oka, o za nye jowhnu n'eli-eze Chiokike anya, o buru nu be mugele a berere."*

4 Nikodimosi sikwa a, "Ndaa kpa be jomu badnu berere nga o mernu okno badnu? O jaabna nu ruwho nne a berere, be mu a?"

5 Jizosi saru a, "Me kanu i ezi oka, o za nye jaabna n'eli-eze Chiokike o buru nu be mugele a hite nu mini nu Enine.

6 Nye ke badnu etekne murnu bu an-ehni, nye Enine murnu bu enine.

7 O gbagwoji i anya nu m karu m nu be jomuriri anu berere.

8 Ruwhere neewhe hne o masigwu a, i nonu imerne a, kovu i ma hne o hi mobu hne o neezne. Nye obula ke be murnu hite n'Enine nu kpa."

9 Nikodimosi sikwa a, "Ndaa kpa be jeeme nhne nu kpa?"

10 Jizosi saru a, "I bu nye-zni-nhne n'eli Izireli, kovu i ma nhne ka.

11 Me kanu i ezi oka, a nookwu nhne a magwu, a

* 3:3 be mugele a berere: mobu be mugele a hite n'oligwe.

naagba akebne nhne ke a whnurnu, kovu anu kwé o nahoru akebne aì.

12 Anu kwé nhne me kwuru gbasiri nhne k'owa. Ndaa kpa anu jeekweru o buru me kanu anu nhne k'oligwe?

13 O zá badnu obula ke zneru oligwe nu mbom, okwolem Nnwó ke Badnu nye hiri n'oligwe hiedna.

14 Lele kpa Mozizi gwelizoru agwo n'olu isisi n'eli chna chna chna, o bu kpa be jeegwelizo Nnwó ke Badnu olu,

15 ma nye obula ke kweru nu ya jeenwe budnu kwó okwo.

16 Kwnornu nu Chiokike whnurnu owa n'anya kpa, o gweru Nnwó o muru nu nsunu a kpó nyega, ma nye obula ke kweru nu ya jonwu enwu, kovu o jeenwe budnu kwó okwo.

17 Kwnornu nu Chiokike ziyage Nnwó a n'owa o buru nye kpe k'owa, kovu ma o buru nye Oznohia k'owa.

18 Be jeekpe nye obula ke kweru nu Nnwó wam ikpe, kovu nye obula ke kwége bu nye be kperu ikpe, kwnornu nu o kwége nu Nnwó Chiokike muru nu nsunu a.

19 Ka bu ikpe wam be kperu owa, iwhne varu n'owa, ele badnu whnurnu ochichiri n'anya karu iwhne, kwnornu nu be nonu ernu ojo.

20 Nye obula ke nonu ernu ojo bu nye irno ke iwhne, o jáava nu rime iwhne o zi iwhne kpume ernu ojo a.

21 Kovu nye obula ke nonu ernu oma jaava nu rime iwhne ma iwhne gesi nu ernu a bu nhne o rnurnu hite nu Chiokike."

Jizosi nu Joni Nye Wu Mini

22 Nga ka mekworu, Jizosi nu ele sno apna a zneru n'eli Judiya, ya nu be daziri ige mati, o wu ele badnu mini.

23 Joni masi zi nonu mini n'Enoni ke zi Salim ndundu, kwnornu nu agida mini zi pi. Ele badnu neeznekwnusi a, o nonu be mini.

24 (Be yeeyisige Joni n'oro ikelu n'ige ka.)

25 Agwna ele sno apna Joni nu otu nye Ju nonodogbuta nhne gbasiri osnusnu nhne lele kpa omen'eli ele Ju jiri ziri.

26 Be vakwnusi Joni kanu a, "Nye-zni-nhne, nwerukna wam ji nu a zi n'aznu Osimini Jodani kiyari, nye i gbaru akebne gbasiri a, o nonu ele badnu mini, agida ele badnu neeznekwnusi a."

27 Joni saru be, "O zá nye obula ke jeenwe nhne ke Chiokike késile a.

28 Anu bu ele akebne m nu m karu m, 'M buo m Karaisi, kovu be beru osno ziya m nu ruwhnu a.'

29 Nye nonu nnwerne ikne bu nye nwe nnwerne ikne, kovu enyi nye noolu nnwerne ikne, nye noogwuzo noobno nsni, mkpoma nono a nonu nu o nurnu nkoli nye wam nonu nnwerne ikne. O bu kpa snarnima m jiri zu ozu kitna.

30 O jaazi naaba aba, kpa me jaazi naaya eli eli.”

Nye ke hiri n'oligwe va

31 Nye wam ke hiri n'oligwe va kakwo kpakara badnu, nye hi n'owa bu nye ke owa, o nookwu nhne ke owa. Nye hiri n'oligwe kakwo kpakara badnu.

32 O nookwu nhne o whnurnu nu nhne o nurnu, kovu o za nye neekweru izi a.

33 Nye obula ke jeegweru izi a naakahia nu Chiokike bu nye ezi oka.

34 Nye Chiokike ziyaru nookwu ikwu-onu Chiokike, kwnornu nu Chiokike nyene a Enine a n'apna zi mati.

35 Nda whnurnu Nnwọ a n'anya, gweru kpakara nhne yisi n'aka a.

36 Nye obula ke kweru nu Nnwọ wam nwernu budnu kwó okwo, nye obula ke za noobnonu Nnwọ wam nsni, jéenwe budnu, kovu ovu owe ehni Chiokike jaazi nu risi a okwnukokwnu.

4

Jizosi nu nwerinya

Sameria

1 Ele Farisi nurnu nu Jizosi neewehia ele sno apna a, noowu be mini karu Jóni,

2 o bu n'ezi nu Jizosi wuge ele badnu mini, kwolem ele sno apna a.

3 Nga Jizosi nurnu a, o whuya nu Judiya naalahna Galili.

4 O zi mkpa nu o jaagawhe n'esilawuru eli Sameria.

5 O vadu n'otu eli-ohna Sameria be kwu Saika, ke zi ndundu otu eli Jekopu nyernu nnwo a rukna Josefú.

6 Omi Jekopu zi pii. Inwe gwuru Jizosi kwnornu nu izne wam, o daziri eli nu ngeri omi wam n'iwhnehnie.*

7 Otu nwerinya Sameria varu o turu mini n'omi, Jizosi kanu a, “Kesi m mini.”

8 (Ele sno apna a znernu nu rime eli-ohna o zu wiri.)

9 Nwerinya Sameria wam kanu a, “I bu nye Ju, m bu m nye Sameria, ndaa kpa i noorio m mini?” (Ele Ju nu ele Sameria mekota nhne.)

10 Jizosi saru a, “O buru nu i magwu nkesi Chiokike, nu nye ke noorio i mini, i joorio a ma o kesi i mini ke budnu.”

11 Nwerinya wam kaa, “Nda-ai-kwu, i nwée nhne i jeeji nootu mini, omi ka miri emi k'agida, ndaa hne i jeegwehia mini budnu ka.

12 I kakwo nda ai Jekopu nye nyernu ai omi ka, o nwornu mini hi nu rime a, ma rumu a, ma rumu anohia a?”

13 Jizosi saru a, “Nye obula ke jonwo mini ke hi n'omi ka, akpiri jookpo a bekwnu berere,

14 kovu nye obula ke jonwo mini ke me jeenye a, akpiri jookpo a bekwnu berere. Mini ke me jeenye a jogho risi mini ke jaagba du budnu kwó okwo.”

15 Nwerinya wam kaa, “Nda-ai-kwu, kesi m mini ka ma akpiri gharu o kpo m

* 4:6 n'iwhnehnie: okwukwo ke mbom kwuru otnu-ige ke isunu

bekwunu, ma m gharu m o va o tu mini n'omi ka."

16 Jizosi kanu a, "Zne, sukwu nzi i, va hna."

17 Nwerinya wam kaa, "Mnwée m nzi."

Jizosi kanu a, "I kwukwaru nkaru nu i nwée nzi,

18 kwnornu nu i gbolam nzi isne, nye ke ji nu a wu kitna buo nzi i. I kwuru ezi oka nu i nwée nzi."

19 Nwerinya wam kaa, "Nda ai-kwu, m whnurnu nu i bu nye owhnurninya.

20 Ele nda ai kporu risi eli n'olu rugwu ka, kovu anu ele Ju karu nu hne be kwesiri o kpo risi eli bu nu Jeruselem."

21 Jizosi kanu a, "Nwerinya, kweru nhne me naakanu i, ige vawa nga ele badnu jookponu Nda risi eli n'olu rugwu ka mobu nu Jeruselem.

22 Anu ele Sameria ma nye anu nokponu risi eli, ai ele Ju magwu nye a nokponu risi eli, kwnornu nu oznohia hi n'aka ele Ju va.

23 Kovu ige vawa, owe, ige wam valam masi, nga ele nokponu Nda risi n'eli n'ezi jookponu a risi eli n'enine nu n'ezi oka. Ka bu ele Nda pioru kponu a risi eli.

24 Chiokike bu enine, ele nokponu a risi eli jookporirinu a risi eli n'enine nu n'ezi oka."

25 Nwerinya wam kanu a, "M maam nu Mezaya, nye be kwu Karaisi, jaava. Nga o varu, o jaakanu ai kpakara nhne."

26 Jizosi kanu a, "Me nye nookwunu i oka, bu ya."

27 Ige wam ele sno apna Jizosi hiehna, o jiri be anya nu ya nu nyerinya nookwurita oka. Kovu o za nye sikwaru, "Kini bu nhne i noopio?" mobu, "Kini mernu i nookwunu nwerinya ka oka?"

28 Nwerinya wam sigbasi idudu mini a, lahna nu rime eli-ohna, kanu ele badnu,

29 "Anu va whnurnu nwerukna ke kannu m kpakara nhne me mernu. Nye ka o joburu Karaisi sa?"

30 Be gbahala nu rime eli-ohna znekwnusi Jizosi.

31 Kovu ele sno apna a zi naariasno Jizosi, kaa, "Nye-zni-nhne, ri wiri."

32 Jizosi kanu be, "Mnwernu m wiri ke anu ma."

33 Ele sno apna a nesikwarita ehni be, "Onwernu nye gweyannu a wiri sa?"

34 Jizosi kanu be, "Wiri m bu o bita echiche nye ziyaru m nu o rnu kpa ernu o nyernu m.

35 Anu naakaa, 'O gwnarnu enwa eno, anu gwe nhne n'ekwu.' Kovu me kanu anu, anu le anya n'ekwu, mkpuru chnanam ma be ghoru nhne n'ekwu.

36 Nye neegwe nhne n'ekwu nwernu ogwo ernu, o chibna ele badnu lele mkpuru ma be nwehia budnu kwó okwo. Kpam, nye ke kparu mkpuru nu nye ke gweru nhne n'ekwu jeenwekota snarnima.

37 Nhne be kwuru bu ezi oka, 'Otu badnu kpasiri mkpuru, nye berere ghoru mkpuru.'

38 M ziznerneru m anụ ghọru mkpuru n'ekwu ke anụ rnúge ẹrnu nụ rime a. Ele berere rnurnu ẹrnu, anụ nwehia mb-narna n'ẹrnu be.”

39 Agịda ele Sameria ele wu nụ rime ẹli-ọhna wam kweru nụ Jizọsi kwnornu nụ nhne nwerinya wam kwuru, “Ọ kanụ m kpakara nhne me mernu.”

40 Nga ele Sameria vakwnusiri a, be riasno a ma ya nụ be daziri, Jizọsi daziri pii ọbochi lawuru.

41 Agịda ele berere kweru kwnornu nụ izi ọma o znirni be.

42 Be kanụ nwerinya wam, “A kweru kịtna, ọ búo nụ nhne i kannụ aị, kọvu kwnornu nụ a nurnu nhne o kwuru, a magwu nụ nye ka bú Nye Ọznohia ke ọwa n'ezi.”

Jizọsi gwọru nnwọ rukna nye risi

43 Nga ọbochi lawuru wam whemernu, ọ whọga pii zne Galili.

44 Jizọsi n'iwuhuru a karu, “Nye ọwhnurninya nwée igwugwu n'ẹli a.”

45 Nga ọ vaduru ẹli Galili, ele zị nụ Galili naakweru a kwnornu nụ be znernu Iriri Ọgawhe nụ Jeruselem, be whnurnu kpakara nhne o mernu n'Iriri Ọgawhe wam.

46 Jizọsi lahna nụ Kana ke Galili hne o mernu mini ghọ manya. Otu nye risi ọchichi ke nnwọ a rukna zị n'ẹhni igbugbu nụ Kapanom.

47 Nga ọ nurnu nụ Jizọsi hiri nụ Judiya va Galili, o znekwnusi a, kanụ a, ọ va gwọ nnwọ a rukna ẹhni igbugbu, nye zị n'ọnu ẹnwu.

48 Jizọsi kanụ a, “Anụ jéekweru kwekọlam ma anụ whnurnu ẹrnu ndu-ẹhni nụ ẹrnu rikne.”

49 Nwerukna wam kaa, “Nda-aị-kwu, snornu m zne, ọ zị nnwọ m nwu.”

50 Jizọsi kanụ a, “La, nnwọ ị rukna zị budnu.”

Nwerukna wam kweru nhne Jizọsi kanụ a, la.

51 Nga ọ zị n'apna, ele izi a kwnusi a, kanụ a, “Nnwọ ị rukna zị budnu.”

52 Ọ sịkwa be ige ẹhni búru nnwọ a rukna ọma, be kanụ a, “N'otnu-ige ke mbom n'iwhehnie† n'ekile wheru ewhe, ẹhni orne bẹkwnu wam sigbasiri a.”

53 Nda nnwọ wam chenwanya nụ ọ bú ige wam Jizọsi kannụ a, “Nnwọ ị rukna zị budnu.” Kam kpayaru, ya nụ kpakara ele ọro a kweru.

54 Ka bú ẹrnu ndu-ẹhni ke ẹbo Jizọsi rnurnu nga o hiri nụ Judiya va Galili.

5

Ọgwugwo n'Olulu Mini Betisaida

1 Nga ka whemernu, Jizọsi znernu iriri ele Ju nụ Jeruselem.

2 Otu olulu mini zị ngeri Ọnu-Mgbo Atnurnu nụ Jeruselem ke nwernu mgbemgbe ọro isne, ke ele Hiburu nookwu Betizata.

† 4:52 Otnu-ige ke mbom n'iwhehnie: ọkwukwo ke mbom kwuru ige awa ke ẹsau

³ Agída ele nríria naadnanyi nù ngeri a, ele isni, nù ele mgworo, nù ele ngeri eñni be dõnwurnu õdonwu. [Be zì neese ma be gbarù mini wam.]

⁴ Kwnornu nù enine izi Nyenwe aì neehiedna hite n'ige dù n'ige gbarù mini wam. Nye nríria õbula ke beru õsno dnabna nù rime mini wam nga enine izi gbarùkparu a, eñni a jõoburu õma hite nù nríria õbula õ naariã.]

⁵ Otu nwerukna ke naariã nríria nri awha eto nù esato zì pìi.

⁶ Nga Jizõsi whnurnu a hne õ dnanyi, õ mahiaru nù õ zì nù nríria gbu õkwnu, õ sikkwa a, "Ì pioru be gwõ ì nríria ì?"

⁷ Nye nríria wam sarù a, "Nda-aì-kwu, m nwée m nye jeeyisi m nù rime olulu mini nga be gbarùru mini, kpa me neezne, nye berere beru m õsno dnabna."

⁸ Jizõsi kanù a, "Lizõ, chiri etere i, zne izne."

⁹ Ngangam, be gwõru nwerukna wam. O chiri etere a, zne izne.

Nhne ka mernu n'Õbochi Ozukwa Inwe.

¹⁰ Ka mernu ele Ju kanù nwerukna wam Jizõsi gwõru nríria, "Tna bù Õbochi Ozukwa Inwe, o megidnurnu n'iwu nù ì nēechiri etere ì."

¹¹ Nwerukna wam sarù be, "Nwerukna ke gwõru m nríria kannù m, 'Chiri etere i, zne izne.'"

¹² Be sikkwa a, "Nyele bù nye ke karù jì chiri etere i zne izne?"

¹³ Kõvu nù nwerukna wam be gwõru máa nye Jizõsi bù, kwnornu nù Jizõsi bnanam n'esilawuru igbudu badnù wam whõga.

¹⁴ Omekwo, Jizõsi piohiaru a n'Oro Nsõ Chiokike, õ kanù a, "Le, be gwõru ì nríria ì, ì méma mmehie, õ zì nhne ojo ke kakwo ka dnakwasì ì."

¹⁵ Nwerukna wam whõga kanù ele risi ele Ju nù õ bù Jizõsi gwõru a nríria a.

Budnu hi nù Nnwõ Chiokike

¹⁶ Ele Ju bete o mekpa Jizõsi eñni kwnornu nù õ gwõru nríria n'Õbochi Ozukwa Inwe.

¹⁷ Jizõsi kanù be, "Nda m nõornu ernu kpakara ige, õ bù masì kpa me nõornu."

¹⁸ Ikwu-õnu ka mernu ele risi ele Ju ovu owe eñni k'agída, be noopiosi rikne o gbu Jizõsi, õ búo nù o luluru Õbochi Ozukwa Inwe be kpõ, kõvu nù õ karù nù Chiokike bù Nda a, naakaa nù ya nù Chiokike hna n'otu.

¹⁹ Jizõsi kanù be, "Me kanù ezi õka, õ zá nhne ke Nnwõ nwernu rikne o mee n'eñni a, kõvu o neeme nhne o whnurnu Nda a neeme. Kwnornu nù Nnwõ nõornu nhne Nda a nõornu.

²⁰ Nda whnurnu Nnwõ a n'anya, neegesi a kpakara nhne o neeme. O jeegesi a nhne ke kakwo ka ke jaag-bagwoji anù anya.

²¹ Lele kpa Nda neeme ele nwurnu õnwu hi n'ẽnwu lizõ, nyee be budnu, õ bù masì kpa Nnwõ neenye ele masìri a budnu.

22 Nda zá neekpe nye obula ikpe, kovu o yisiri kpakara ikpe n'aka Nnwọ a,

23 ma kpakara ele badnu sobisinu Nnwọ a lele kpa be nọsobisinu Nda. Nye obula ke zá nọsobisinu Nnwọ, zá nọsobisinu Nda nye ziyaru a.

24 “Me kanu anu ezi oka, nye obula ke nonu ikwu-onu m kweru nu nye wam ke ziyaru m, nwernu budnu kwó okwo. Be jáama a ikpe, kovu o hilem n'enu whe nu budnu.

25 Me kanu anu ezi oka, ige vawa, ige wam vałem masi, nga ele nwurnu onwu jonu nkoli ke Nnwọ Chiokike, ele nurnu a jaazi budnu.

26 Kwnornu lele kpa Nda nwernu budnu nu rime a, o bu masi kpa o mernu Nnwọ nwernu budnu nu rime a.

27 O nyernu Nnwọ rikne o kpe ikpe, kwnornu nu o bu Nnwọ ke Badnu.

28 “O gbágoji anu anya nu ige vawa, nga ele zi n'ilili jonu nkoli a,

29 be jeehi n'ilili lizo, ele mernu mma jeelizọ n'enuwuziri budnu, ele mmehie jeelizọ n'enuwuziri ele be jaama ikpe.

30 “M nwée m rikne mee nhne obula nu rikne ke aka m. M neekpe ikpe kpa Nda m kannu m me kpe. Ka neegesi nu ikpe m zi snam, kwnornu nu m zá neeme nhne me pi-oru, kovu kwekolam nhne nye ziyaru m pioru.

31 “O buru nu me naagbanu ehni m akebne, akebne m buo ezi.

32 Kovu o zi nye naagbanu m akebne, m magwu m nu akebne a zi kwem.

33 Anu ziznenu ele izi znekwnusi Joni, o kwuru nhne gbasiri ezi oka.

34 Ka zá neegesi nu m neegweru akebne ke badnu, m nookwu nhne ka ma anu nwehia oznohia.

35 Joni nu lele tonji ke noonwu, nomuke, anu kpebiri o nwudna ige mati n'iwhe a.

36 “M nwernu m nhne akebne ke kakwo akebne Joni gbaru. M nonu enu ke Nda m nyernu m, enu wam naagbanu m akebne, neegesi nu Nda m ziyaru m.

37 Nda m nye ziyaru m naagbanu m akebne. Anu nulele nkoli a mabu whnu ruwhnu a.

38 Anu zá naabita ikwu-onu a nu mkpoma anu, kwnornu nu anu kwéle nu nye wam o ziyaru.

39 Anu tusa ehni nyosna nhne be gbaru n'okwukwo nsọ anu, anu neeche nu anu jeenwe budnu kwó okwo hite nu nhne be gbaru nu rime a, be naagbanu m akebne.

40 Kovu anu kwé o vakwnusi m, ma anu nwehia budnu kwó okwo.

41 “M zá m nanarnu oznarni hite n'aka badnu.

42 M magwu m anu, anu nwée owhnun'anya Chiokike nu mkpoma anu.

43 M ji m rewhna Nda m va, anu kwéle m, kovu o buru nu

nye berere jiri rēwhna a va, anụ jeegweru a.

⁴⁴ Ndaa kpa anụ jeekwe, hne anụ noopio ọznarni ke badnụ, kọvu anụ nwée rikne pio ọznarni ke hi n'aka nye ke bụ Chiokike kpọi va.

⁴⁵ “Anụ chéko nụ m jooobno anụ nhne nụ ruwhnu Nda m. Kọvu ọ bụ Mozizi nye anụ kw-nataru mkpoma, jooobno anụ nhne.

⁴⁶ Ọ bụru nụ anụ kweruru Mozizi n'ezi, anụ jeekweru m, kwnornu nụ ọ gbarụ nhne gbasiri m.

⁴⁷ Kọvu hne anụ kwége nhne Mozizi gbarụ n'okwukwo nsọ, ndaa kpa anụ jeekweru nhne me nookwu?”

6

Jizọsi nyernu pokwu badnụ isne wiri

(Mat 14:13-21; Mak 6:30-44; Luk 9:10-17)

¹ Nga ka mekworu, Jizọsi whe aznụ Osimini Galili (ka bụ Osimini Taberasi).

² Agida ele badnụ snornu a, kwnornu nụ be whnurnu ọrnụ ndu-ẹhni ọ rnurnu, nga ọ gwọru ele nrịria.

³ Jizọsi pnezne n'olu rugwu daziri ẹli, ya nụ ele sno apna a.

⁴ Ige Iriri Ọgawhe ele Ju zi ndundu.

⁵ Nga Jizọsi lehnataru anya whnụ agida ele badnụ naavakwnusi a, ọ kanụ Filipu, “Ndaa hne a jọozuya wiri a jeenye igbudu ele ka?”

⁶ Ka bụ ma ọ kpa Filipu iru, kwnornu nụ ọ magwụ nhne o jeeme.

⁷ Filipu saru a, “Ọ bụru nụ a zụ brẹdi riwhu mkpuru iwai lawuru, o jézu ma nye ọbula ri matị matị.”

⁸ Otu nụ rime ele sno apna a, Anduru, nwene rukna Saịmoni Pita, kaa,

⁹ “Otu wikoro matị zi hna nye ji ike brẹdi balị* isne nụ aznụ matị matị lawuru. Ọ zá nhne kam bụ n'esilawuru igbudu ele badnụ ka.”

¹⁰ Jizọsi kanụ be, “Anụ kanụ be daziri ẹli.” Agida achara zi pịi. Kpakara ele badnụ wam daziri ẹli, be hna lele pokwu ele rukna isne.

¹¹ Jizọsi gweru brẹdi wam, tị mmamma, nyee kpakara ele wam dazigwu ẹli. O gweru aznụ wam mee kwno kpam. Be ri, riji ruwho be.

¹² Nga be rikworu, Jizọsi kanụ ele sno apna a, “Anụ tụtukota kpakara ruvnrurvnu ke gwnarnu, ọ zá ke whu.”

¹³ Be tụtukota kpakara ruvnrurvnu a, ke jiri nri nụ nkita lawuru hite n'ike brẹdi balị isne wam ke ele badnụ riri.

¹⁴ Ele zi nga Jizọsi rnurnu ọrnụ ndu-ẹhni ka karu, “N'ezi ọka, ka bụ nye ọwhnurninya wam ke jaava n'owa.”

¹⁵ Nga Jizọsi whnuru nụ be noopio o chni a eze nụ rikne, o hi n'esilawuru be whoga, ya nụ nsnunu a zne n'olu rugwu.

* 6:9 balị Ka bụ ikpa be ji neeme brẹdi.

Jizọsi znernu izne n'olu mini
(*Mat 14:22,33; Mak 6:45-52*)

16 N'ogbednachi, ele sno apna a zne osimini.

17 Be bna n'ogbo neewhe aznụ osimini kiyari neezne Kapanom. Jizọsi yáavage hne be zị tem dụ n'abalị.

18 Okne ruwhere nụ abakamini neewhe n'olu mini.

19 Ele sno apna a kwọ ogbo nhne nụ lele maịli ẹto mọbu ẹno nga be whnurnu Jizọsi naavakwnusi be, neezne izne n'olu mini. Be tų ogwnu k'agida.

20 Kọvu Jizọsi kanụ be, "Anụ tųko ogwnu, ọ bụ mawa."

21 Be kweru a, ọ bnakwnusi be nụ rime ogbo, ngangam ogbo be dụ n'ẹli wam be neezne.

Ele badnụ noopio Jizọsi

22 N'ekile a, agida ele badnụ ele zị n'aznụ osimini kiyari mahiaru nụ otu ogbo maị zị pị whogalam vuru ele sno apna Jizọsi kpọi. Jizọsi snóge be.

23 Ogbo ele ke berere hiri nụ Taberasị va nụ ngeri hne ele badnụ wam riri brẹdi, nga Nyenwe aị tųkparu mmamma.

24 Nga ele badnụ wam whnurnu nụ Jizọsi zila pị, ma ele sno apna a, be bna n'ogbo wam zne Kapanom noopio Jizọsi.

Jizọsi bụ Wiri ke Budnu

25 Nga ele badnụ wam whnurnu a n'aznụ osimini kiyari, be sịkwa a, "Nye-zni-nhne, ndaa nga ị varụ hna?"

26 Jizọsi sarụ be, "Me kanụ anụ ezi ọka, anụ noopio m kwnornu nụ anụ rijiri ruwho nụ brẹdi me nyernu anụ, ọ bụo kwnornu nụ anụ whnurnu ẹrnu ndu-ẹhni.

27 Anụ dọgbu ẹhni anụ n'ẹrnu kwnornu nụ wiri ke nooro oro, tnunuma, anụ dọgbu ẹhni anụ n'ẹrnu kwnornu nụ wiri ke jaazị tem dụ budnu kwó okwo, ke Nnwọ ke Badnụ neenye anụ. Ya bụ nye Chiokike nyernu rikne o mee kpam."

28 Be sịkwa Jizọsi, "Kini bụ nhne a jeeme ma a rnụ ẹrnu Chiokike?"

29 Jizọsi sarụ be, "Ka bụ ẹrnu Chiokike, anụ kweru nụ nye wam o ziyaru."

30 Be sịkwa a, "Kini bụ ẹrnu ndu-ẹhni i jeeji gesi ma a whnurnu, kweru? Kini bụ nhne i jeeme?"

31 Ele nda aị ọknani riri mana n'ẹli chna chna chna, lele kpa ọkwukwo nsọ kwuru, 'O nyernu be brẹdi ke hi n'oligwe va, be ri.' "

32 Jizọsi kanụ be, "Me kanụ anụ ezi ọka, ọ bụo Mozizi nyernu anụ brẹdi ke hi n'oligwe va, kọvu Nda m neenye anụ ezi brẹdi ke hi n'oligwe va.

33 Kwnornu nụ brẹdi ke Chiokike neenye bụ nye wam ke hi n'oligwe va, bụ nye neenye ele ọwa budnu."

34 Be kaa, "Nda-aị-kwu, neenye aị brẹdi ka kpakara ige."

35 Jizọsi kanụ be, "Mawa bụ brẹdi ke neenye budnu, nye vakwnusiri m, wiri jọgwnu

a rja rja, nye kweru nu me, akp̄iri j̄okpo a b̄ekwnu rja rja.

36 M karu m, anu whnuru m, kovu anu kwége.

37 Nye obula ke Nda m nyernu m jaavakwnusi m, m jáachihala a rja rja.

38 Kwnornu nu m hiri m n'oligwe hiedna mee echiche nye ziyaru m, o búo o mee echiche m.

39 Ka bu echiche nye ziyaru m, me túwhu nye obula ke o nyernu m, kovu me mee ma be hi n'enuw lizo n'obochi ipne-aznu.

40 Kwnornu nu ka bu nhne Nda m noopio, nye obula ke j̄owhnu Nnw̄o wam, kweru nu a, jeenwe budnu kwó okwo, m jeeme nye wam hi n'enuw lizo n'obochi ipne-aznu."

41 Ele Ju bete o takpo megidne a, kwnornu nu o karu, "Mawa bu Br̄edi ke hiednarnu n'oligwe."

42 Be kaa, "Nye ka o búo Jiz̄osi nnw̄o Josefu? A magwu nda a nu nne a, ndaa kpa o naakaa nu o hi n'oligwe hiedna?"

43 Jiz̄osi kanu be, "Anu takpoma n'esilawuru ehni anu.

44 O zá nye jaavakwnusi m okwolem ma Nda m nye ziyaru m j̄odoru a vakwnusi m, m jeeme o lizo n'enuw n'obochi ipne-aznu.

45 Ele owhnurninya gbaru a n'okwukwo ns̄o, 'Chiokike jeezni kpakara ele badnu nhne.' Nye obula ke bnoteru Nda ns̄ni m̄hia nhne n'aka a, jaavakwnusi m.

46 O zá nye obula ke whnuleru Nda anya nu mbom, kwekolam nye wam ke hi hne Chiokike zi whnuru Nda anya.

47 Me kanu anu ezi oka, nye obula ke kweru nwernu budnu kwó okwo.

48 Mawa bu wiri ke budnu.

49 Ele nda anu oknani riri mana n'eli chna chna chna, be nwu.

50 Kovu wiri ke hi n'oligwe hiedna, nye obula ke riri a, j̄onwu enwu.

51 Mawa bu wiri ke zi budnu ke hi n'oligwe hiedna. O buru nu badnu obula ri wiri ka, o jaazi budnu tim tom. An̄o-ehni m bu wiri ke me jeenye owa ma be ziri budnu."

52 Ka kpayar̄u odogbuta whuyaru n'esilawuru ele Ju. Be kaa, "Nwerukna ka, o jeenye ai an̄o-ehni a ma a ri?"

53 Jiz̄osi kanu be, "Me kanu anu ezi oka, okwolem ma anu riri an̄o-ehni ke Nnw̄o ke Badnu, nw̄o ovnarna a, anu jeenwe budnu nu rime anu.

54 Nye obula ke jeeri an̄o-ehni m, nw̄o masi ovnarna m nwernu budnu kwó okwo.

55 Kwnornu nu an̄o-ehni m bu wiri n'ezi, ovnarna m bu masi nhne be nw̄o onwo n'ezi.

56 Nye obula ke jeeri an̄o-ehni m, nw̄o ovnarna m, wu nu rime m, m wu masi m nu rime a.

57 Lele kpa Nda ke zi budnu ziyaru m, m zi m budnu kwnornu nu Nda m, kpa masi, nye obula ke jeeri an̄o-ehni m jaazi budnu kwnornu me.

58 Ka bú wiri wam ke hi n'oligwe hiedna, ọ búo kpa nda anụ ọknani riri mana be nwụ. Nye ọbula ke jeeri wiri ka jaazị bụdnu tim tọm."

59 Ka bú nhne Jizọsi kwuru nga o neezni nhne nụ ọro ọgbako ele Ju zị nụ Kapanọm.

Ikwu-ọnu ke bụdnu kwó okwo

60 Nga agịda ele sno apna a nūrnu ọka a, be kaa, "Ikwu-ọnu ka siri rikne, nyele jeemeli a?"

61 Nga Jizọsi mahjaru nụ ele sno apna a naatakpo gbasiri ọka ka, ọ kanụ be, "Ka o mernu ovu we anụ ẹhni sa?"

62 Ndaa kpa ọ jọonu nga anụ jọowhnu Nnwọ ke Badnu lahna hne ọ zị nụ mbọm?

63 Enine neenye bụdnu, badnu etekne nwée rikne mee nhne ọbula. Ọka me nookwunu anụ bú enine bú masi bụdnu.

64 Kọvu agwna anụ kwége." Jizọsi magwu hite n'ọziri ele kwé ekwe nụ nye jeere a.

65 Ọ kanụ be, "Ka kpayaru me jiri kanụ anụ nụ ọ zá nye jaavakwnusi m, okwolem ma Nda m nyernu a rikne o mee kparam."

66 Hite nụ nhne Jizọsi kwuru, agịda ele sno apna a lahna aznu kwnornu nụ ikwu-ọnu ka, be snóge a berere.

67 Jizọsi sịkwa nri nụ badnu lawuru wam ele sno apna a, "Anụ jaalahna masi?"

68 Saimoni Pita, kaa, "Nyenwe aị, a jaalakwnusi nyele? I nwernu ikwu-ọnu ke neenye bụdnu kwó okwo.

69 Kịtna, a kweru, mahja masi nụ ị bú nye nsọ ke Chiokike."

70 Jizọsi kanụ be, "Me hohiaru anụ nri nụ ẹbo, kọvu otu nyenum nụ rime anụ bú ekwensu."

71 O nookwu gbasiri Judasi, nnwọ Saimoni Isikarioti, kwnornu nụ Judasi jeere a, ọ bú n'ezi nụ ọ bú otu nụ rime nri nụ badnu lawuru wam ele sno apna Jizọsi.

7

Jizọsi nụ rụmu nne a

1 Nga ka mekworu, Jizọsi neezneghari nụ rime Galili. Ọ chọla o zne Judiya kwnornu nụ ele Ju noopio o gbu a.

2 Ige Iriri Ọro Igwugwu ele Ju zị ndundu.

3 Rụmu nne Jizọsi kanụ a, "Whọga hna zne Judiya ma ele sno apna ị whnūrnu ẹnu ị nọornu.

4 Nye pioru ma ele badnu mahja nye ọ bú rnụ ẹnu tugwaru otugwa. Mee ma ọwa whnūrnu ẹnu ị nọornu."

5 Rụmu nne a kwuru ka kwnornu nụ be kwéle nụ ya.

6 Jizọsi kanụ be, "Ige m yóoduge, kọvu ige anụ zị n'aka anụ.

7 Ele ọwa jéenwe rikne sno anụ iro, kọvu be snornu m irno, kwnornu nụ m naakaa nụ ẹnu be búo ọma.

8 Anụ zne n'Iriri ka, m jáava n'Iriri ka kịtna, kwnornu nụ ige m yóoduge."

9 Nga Jizọsi kwukworu kpa, ọ dazigidne nụ Galili.

*Jizõsi znernu Iriri
Oro Igwugwu*

10 Nga rumu nne a znernu Iriri wam, Jizõsi snornu be zne Iriri wam nu mgwugwa, o buo nu ruwhnu ohna.

11 Ele Ju zi noopio a n'Iriri wam, be nesikwa, "Ndaa hne o zi?"

12 Agida ele badnu notnurita n'esilawuru be, be naakaa, "O bu nye oma." Ele berere naakaa, "Oza, o nooduwhu ele badnu."

13 Kovu o za nye nookwuhia nhne gbasiri a nu ruwhnu ohna, kwnornu nu be notu ogwnu ele risi ele Ju.

14 N'esilawuru Iriri wam, Jizõsi znernu n'Oro Nso Chiokike bete neezni nhne.

15 Nhne o neezni jiri ele risi ele Ju anya, be kaa, "Nwerukna ka mulele nhne, ndaa kpa o jiri mahia nhne?"

16 Jizõsi saru be, "Nhne me neezni buo ikwu-onu ke m, kovu ke nye ziyaru m.

17 Nye obula ke jeeme echiche nye ziyaru m, nye wam jaamahia ma nhne me neezni ma o hi n'aka Chiokike mobu o hi n'aka ke m.

18 Nye nookwu nhne aka ke a, noopio igwugwu ke ehni a, kovu nye noopio igwugwu nye ziyaru a bu nye ezi oka, aghigho zila nu rime a.

19 Obuo Mozizi nyernu anu iwu? Kovu o za otu nu rime anu ke naabita iwu. Kini mernu anu noopio o gbu m?"

20 Ele badnu wam kaa, "I bu nye renwu ojo nwugwu. Nyele noopio o gbu i?"

21 Jizõsi kanu be, "M rnurnu m otu ernu ndu-ehni, o ji anu anya.

22 Mozizi nyernu anu iwu o kpa rumu anu nka (o bu n'ezi nu okpa nka hige n'aka Mozizi, kovu o hi n'aka ele gbaka), anu naakpa rumu anu nka n'Obochi Ozukwa Inwe.

23 O buru nu anu naakpa rumu anu nka n'Obochi Ozukwa Inwe, ma anu bita Iwu Mozizi, ndaa kpa ovu ji neewe anu ehni kwnornu nu m gworu m nye nriria n'Obochi Ozukwa Inwe?

24 Anu kpe ikpe hite nu nhne anya nowhnu, kovu anu kpe ikpe buru oma."

Jizõsi, o bu ya bu Mezaya?

25 Agwna ele zi nu Jeruselem kaa, "Ka o buo nye be noopio o gbu?"

26 Le, o nookwu oka n'ohna, o za nye nookwu nhne obula megidne a. Ele risi ai be magwu nu nye ka bu Karaishi n'ezi?"

27 Kovu nga Karaishi jaava, o za nye jaamahia hne o jeehi va. Kovu kpakara ai magwu hne nwerukna ka hi va.

28 Kpa Jizõsi neezni nhne n'Oro Nso Chiokike, o gweru okne nkoli siwama lulo, kaa, "Anu magwu nye me bu, anu magwu masi hne me hi va, kovu m vage m nu rikne aka m, nye ziyaru m bu ezi oka. Anu ma nye o bu.

29 Kovu m maam nye o bu, kwnornu m hi m hne o zi va, ya ziyaru m."

30 Be pio kpa be jonwugwu a, kovu o za nye tukwasiri

a aka, kwnornu nù ige a yóoduge.

³¹ Kòvu agìda ele badnú n'esilawùru igbudu badnú wam kweru nù ya, be kaa, "Nga Karaìsi jaava, ọ jòornu ẹrnu ndu-ẹhni kakwo ke nwerukna ka nòornu?"

*Be ziznernu ele nse
be nwudne Jizọsi*

³² Ele Farisi nurnu nhne igbudu ele badnú wam nookwu gbasìri a, be nù ele risi ariọhna zizne ele neese Ọro Nsọ Chiokike ma be nwùgwu Jizọsi.

³³ Jizọsi kaa, "Me nù anù jaazì ige matì, omekwo, m lakwnusi nye ziyaru m.

³⁴ Anù joopio m, anù jòowhnu m, kwnornu nù anù jéenwe rikne va nhne me naala."

³⁵ Ele risi ele Ju sịkwa ẹhni be kaa, "Ndaa hne o jeezne hne a jóopiohịali a? O jeezne hne ele Ju wu n'esilawùru ele Giriki, zni ele Giriki nhne?"

³⁶ Kìni bù risi nhne o nookwu? Ọ karù, 'Anù joopio m, kòvu anù jòowhnu m, hne me neezne anù jéenwe rikne va.' "

Osimini ke neenye budnu

³⁷ N'okne ọbochi ipne-aznú ke Iriri wam, Jizọsi gwuzoru, gweru okne nkọli siwama, kaa, "Nye ọbula ke akpìri nọokpo bẹkwnu, ọ vakwnusi m, nwòrnù mini.

³⁸ Lele kpa ọkwukwo nsọ kwuru, 'Nye ọbula ke kweru nù me, osimini ke mini budnu jeehi nù rime rùwho a naag-bahia.' "

³⁹ Jizọsi kwuru ka kwnornu nù Enine Nsọ ke ele kweru nù ya jaanahia. N'ige wam be ényene Enine Nsọ, kwnornu nù be ényene Jizọsi igwugwu.

*Okewa n'esilawùru
ele badnú*

⁴⁰ Agwna ele zì n'igbudu ele badnú wam, nga be nurnu ikwu-ọnu ka, be kaa, "N'ezi, nwerukna ka bù nye ọwhnurninya wam."

⁴¹ Ele berere kaa, "Ọ bù Karaìsi."

Kòvu ele berere kaa, "Karaìsi o jeehi nù Galili va?"

⁴² Ọkwukwo nsọ kwuru nù Karaìsi jeehi nù avnurnu Devidi va, nù be jọomu a nù Bẹtilehem, ẹli-ọhna hne Devidi wuru."

⁴³ Ka kpayarù okewa n'esilawùru igbudu ele badnú wam kwnornu nù Jizọsi.

⁴⁴ Agwna be pioru ọ nwudne a, kòvu ọ zá nye tükwasiri a aka.

*Ókwe ekwe ke ele risi
ele Ju*

⁴⁵ Omekwo, ele neese Ọro Nsọ Chiokike lahnakwnusi ele risi ariọhna nù ele Farisi, be sịkwa be, "Kìni mernu anù nwúyagele a?"

⁴⁶ Ele nse wam sarù be, "Ọ zá nye kwuleru ọka lele kpa nwerukna ka kwuru."

⁴⁷ Ele Farisi sịkwa be, "O duhie masịla anù sa?"

⁴⁸ O nwernu otu nye Farisi mọbu ele risi ele Ju ke kweru nù ya sa?

⁴⁹ Ele ka máa nhne ọbula gbasìri iwu, ọvu ọnu Chiokike zì nù risi be."

50 Otu nye Farisi rēwhna a bụ Nikodimōsi, nye znekwnusiri Jizōsi n'abali, kanụ be,

51 “Iwu aị zá naama badnụ ikpe sị ọ nuna nhne hi n'onu a, nụ nhne o mernu.”

52 Be saru a, “Ị bụ masi nye Galili sa? Lekasi nụ nhne be gbaru n'okwukwo nsọ, ọ zá nye owhnurninya ke hi nụ Galili whuya.”

[
53 Be gbasa, nye obula la n'oro a.

8

Nwerinya be nwugwuru n'oyi

1 Jizōsi znernu nụ Rugwu Olivu.

2 N'onu osisi, ọ lahana n'Oro Nso Chiokike, kpakara ele badnụ gba a gburugburu, ọ daziri ẹli bete neezni be nhne.

3 Ele zni iwu ele Ju nụ ele Farisi kwuyanụ a otu nwerinya be nwugwuru n'oyi, be gwuzote a n'esilawuru be.

4 Be kaa, “Nye-zni-nhne, a nwugwuru nwerinya ka hne ya nụ nyerukna dnanyi.

5 N'iwu aị, Mozizi karu be gweru akaworugwu tugbu a. Kini bu nhne i kwuru?”

6 Be kwuru ka naakpa a iru ma be bno Jizōsi nhne.

Kovu Jizōsi whudnahie ẹli gweru mkpaka a gba nhne nū riza.

7 Be zi koriri neesikwa a, o lizo, kanu be, “Nye obula n'esilawuru anu ke mekolele mmehie beru osno tu a akaworugwu.”

8 O whudnahie ẹli berere naagba nhne nū riza.

9 Nga be nurnu a, be hite nū nye okno badnū dū nū nye mati, otu otu be whoga kwo. O gwnata Jizōsi nū nwerinya wam.

10 Jizōsi lizo, sika a, “Nwerinya, ndaa ele noobno i nhne? O zá nye gwnarnu ke jaama i ikpe?”

11 Nwerinya wam kaa, “O zá, su Nda-ai-kwu.”

Jizōsi kanu a, “M máge m masi m ji ikpe, kovu la, i méma mmehie berere.”]

Jizōsi, iwhne ke owa

12 Jizōsi kakwnonu be, “Mawa bu iwhne ke owa. Nye obula ke joosno m jeenwe iwhne ke budnu, o jeezne izne n'ochichiri.”

13 Ele Farisi kaa, “Ị naagbanu ẹni i akebne kitna, nhne i nookwu buo ezi oka.”

14 Jizōsi saru be, “O bubedi nū m naagbanu ẹni m akebne, nhne me nookwu bu ezi oka, kwnornu nū m magwu m hne me hi nū hne me neezne.

15 Anu neekpe ikpe lele badnū. M zá m neekpe nye obula ikpe.

16 O buru nū me kpe ikpe, ikpe m ziri ezi kwnornu nū me nū nsunu m zá n'ikpe, me nū Nda m nye ziyaru m zi.

17 Be gbaru a n'iwu anu, nū akebne badnū lawuru gbaru bu ezi oka.

18 M gbanu m ẹni m akebne, Nda m nye ziyaru m gbakwnonu m akebne.”

19 Be sika a, “Ndaa hne Nda i zi?”

Jizósi saru be, “Anu máa m, anu máa masi Nda m. O buru nu anu magwu nye me bu, anu zneru amahia Nda m.”

²⁰ Jizósi kwuru kpakara nhne ka nga o neezni nhne n'Oro Nso Chiokike, nu rime hne be naabita igbe iwai. O za nye tukwasiri a aka megidne a kwnornu nu ige a yavave.

Anu jeezneli hne me neezne

²¹ Jizósi kanu be berere, “M jaala, anu joopio m, anu joonwu nu rime mmehie anu. Anu jeeuwe rikne va hne me jaala.”

²² Ele risi ele Ju kaa, “O kaa nu a jaavali hne o naala. O joogbu ehni a sa?”

²³ Jizósi kanu be, “Anu hi hna, kovu m hi m n'olu va. Anu bu ele owa ka, kovu m buo m nye owa ka.

²⁴ O bu nhne me jiri kanu anu nu anu joonwu nu rime mmehie anu. O buru nu anu kwége nu m bu m nye me bu, anu joonwu nu rime mmehie anu.”

²⁵ Be sikwa a, “I bu nyele?”

Jizósi kanu be, “M bu m nye me karu nu m bu m n'oziri.

²⁶ M nwernu m agida nhne me jookwu n'ikpe megidne anu. Kovu nye ziyaru m bu ezi oka, m jaakanu owa nhne me nuru hite n'onu a.”

²⁷ Be ghoyage nhne o nookwu gbasiri Nda.

²⁸ Ka kpayaru, Jizósi kannu be, “Nga anu jeegwelizo Nnwó ke Badnu olu, ige wam anu jaamahia nu m bu m nye me bu. O za nhne ke me neeme nu rikne aka ke m,

kovu m neezni kpakara nhne Nda m znirni m.

²⁹ Nye wam ziyaru m dagwunu m, o gharula me nu nsnunu m rja rja, kwnornu nu m neeme nhne naamasia a kpakara ige.”

³⁰ Agida ele nuru nhne Jizósi kwuru kweru nu ya.

Badnu nwernu ehni a n'ezi

³¹ Jizósi kanu ele Ju ele ke kweru nu ya, “O buru nu anu dazigidne n'ikwu-onu m, anu joooburu ele sno apna m n'ezi.

³² Anu jaamahia ezi oka, ezi oka wam jeeme anu nwernu ehni anu.”

³³ Be saru Jizósi, “A bu rumu Ebereham, a bukolele ohi n'aka badnu obula. Ndaa kpa i naakaa nu a jeenwernu ehni ai?”

³⁴ Jizósi saru be, “Me kanu anu ezi oka, nye obula ke neeme mmehie bu ohi ke mmehie.

³⁵ Ohi za naadazigidne n'oro tim tom, kovu nnwo nwe oro okwnukokwnu.

³⁶ O buru nu Nnwó jeeme anu nwernu ehni anu, anu jeenwernu ehni anu n'ezi.

³⁷ M magwu m nu anu bu rumu Ebereham, kovu anu noopio o gbu m, kwnornu nu anu kwége ikwu-onu m.

³⁸ M naakanu anu nhne Nda m gesiri m, kovu anu neeme nhne nda anu kannu anu.”

³⁹ Be saru a, “Ebereham bu nda ai.”

Jizósi kanu be, “O buru nu Ebereham bu nda anu n'ezi, anu joonu ernu Ebereham nrurnu.

40 Nhne me mernu bú ọ kanụ anụ ezi ọka me nurnu n'ọnu Chiokike, anụ noopio o gbu m. Eberham méne kpam.

41 Anụ neeme nhne anụ nda anụ mernu.”

Be kaa, “Chiokike bú Nda a nwernu kpọi. A búo rụmu ọyi.”

Rụmu ke Ekwensu

42 Jizọsi kanụ be, “Ọ búru nụ Chiokike bú Nda anụ n'ezi, anụ znernu ọwhnu m n'anya, kwnornu nụ m hi m hne Chiokike zị whụya, va hna. M váge m nụ rikne aka ke m, kọvu ya ziyaru m.

43 Nhne mernu anụ ghóyage nhne me nookwu, ọ bú nụ anụ bnóge nsni n'ikwu-ọnu m.

44 Anụ bú rụmu nda anụ Ekwensu, anụ jọornu ẹrnu nda anụ noopio. Ọ bú nye noogbu badnụ hite n'ọpanizo. Ọ zịla n'ezi ọka, kwnornu nụ ezi ọka zá nụ rime a. Omen'ẹli a bú ọ gha aghalaghala, kwnornu nụ o bú nye aghalaghala nụ nda kpakara aghalaghala.

45 Me nookwunu anụ ezi ọka, kọvu anụ zá neekweru m.

46 Nyele n'esilawuru anụ jaama m ikpe mmehie? Ọ búru nụ me kanụ anụ ezi ọka, kịni mernu anụ kwége m?

47 Nye ọbula bú ke Chiokike joojno nsni ikwu-ọnu Chiokike. Kọvu anụ joojno nsni kwnornu nụ anụ búo ele ke Chiokike.”

Jizọsi nụ Eberham

48 Ele Ju sarụ Jizọsi, “A kwukwaru nkari nga a

kwuru nụ i bú nye Sameria ke renwu ojo nwugwu.”

49 Jizọsi kanụ be, “Ọ zá renwu ojo nwugwu m, kọvu m neenye Nda m igwugwu, kọvu anụ zá neenye m igwugwu.

50 M zá m noopio igwugwu ke m. O nwernu nye ke noopio igwugwu m, nye wam bú nye ikpe.

51 Me kanụ anụ ezi ọka, ọ búru nụ nye ọbula bíta ikwu-ọnu m, ọ jọowhnu ẹnwu anya rịa rịa.”

52 Ele Ju kanụ a, “Kịtna hne a mahjaru nụ renwu ojo nwugwu i. Eberham nụ kpakara ele ọwhnurninya nwurnu ẹnwu. I zị hna naakaa nụ nye ọbula ke jaabita ikwu-ọnu i joonwu ọnwu rịa rịa.

53 Nda aị Eberham nwurnu ẹnwu. I kákwole Eberham nụ ele ọwhnurninya ele nwurnu ẹnwu. I che nụ i bú di nyele?”

54 Jizọsi sarụ, “Ọ búru nụ me nyee ẹhni m igwugwu, ọ zá nhne ọ bú. Nda m nye anụ naakaa nụ ọ bú Chiokike anụ neenye m igwugwu.

55 Ọ bú n'ezi nụ anụ máa nye ọ bú rịa rịa. Kọvu m maam nye ọ bú. Ọ búru me kaa nụ m máam nye ọ bú, m jọoburu nye aghalaghala lele anụ, kọvu m magwụ m nye ọ bú, m naabita ikwu-ọnu a.

56 Nda anụ Eberham nwernu ovu ọso n'ọnu nụ ọ jọowhnu ọbochi m, ọ whnụ masi a, ọ nwudnarnu.”

57 Ele Ju kanụ a, “I yóoduge nri awha isne, i whnurnu Eberham n'ezi?”

58 Jizòsi kanu be, “Me kanu anu ezi oka, m zi m su be muru Ebereham.”

59 Be chiri akaworugwu be jootugbu a, kovu Jizòsi tugwa ehni a, hi n'Oro Nso Chiokike whoga.

9

Jizòsi gworu nye be muru n'isni

1 Kpa Jizòsi neewhe, o whnu otu nyerukna be muru n'isni.

2 Ele sno apna a sika a, “Nye-zni-nhne, o bu mmehie nyele mernu be muru nwerukna ka n'isni? Mmehie ke a sobu ke ele muru a?”

3 Jizòsi kaa, “Isni kpuru a buo kwnornu nu mmehie ke a mobu ke ele muru a. Kovu o kpuru isni ma ernu Chiokike whuya iwhe n'ehni a.

4 A jaazi noornu ernu nye wam ziyaru m kpa obochi gwnarnu, kwnornu nu abali vawa, nga o za nye jeenwe rikne rnu ernu.

5 Kpa me ziko n'owa, mawa bu iwhe ke owa.”

6 Nga o kwukworu ka, o gbusa onu-mini n'eli, gweru onu-mini wam me orura, o te orura wam n'anya nwerukna wam.

7 O kanu a, “Zne snu ruwhnu i n'Olulu Mini Saalom” (ke bu nye be zizneru). Nwerukna wam zne, snu ruwhnu a, hiehna noowhnu osno.

8 Ele agbatibi a nu ele whnurnu hne o noorio nhne nu mbom sika, “Ka o buo nwerukna wam dazi eli noorio nhne?”

9 Agwna be kaa, “O bu ya.”

Ele berere kaa, “Oza, o yiri ya.”

Kovu nwerukna wam karu, “O bu mawa.”

10 Be sika a, “Ndaa kpa anya i jiri kpume?”

11 O saru, “Otu nwerukna be kwu Jizòsi mernu orura tesi n'anya m, kanu m, ‘Zne n'Olulu Mini Saalom snu ruwhnu,’ kpa me snurnu, m whnurnu m osno.”

12 Be sika a, “Nda hne o zi?”

O kaa, “M maam.”

Ele Farisi nootule ogwugwo wam

13 Be kwuznenu ele Farisi nwerukna wam kpuru isni nu mbom.

14 Jizòsi mernu orura kpume anya nwerukna wam n'Obochi Ozukwa Inwe.

15 Ele Farisi sika nwerukna wam berere kpa o jiri noowhnu osno. O kanu be, “O yisiri orura n'anya, m snu ruwhnu m, kina, m noowhnu osno.”

16 Agwna ele Farisi kaa, “Nwerukna ka hige nu hne Chiokike zi va, kwnornu nu o za naabita iwu ke Obochi Ozukwa Inwe.”

Ele berere kaa, “Ndaa kpa nye mmehie jeenwe rikne rnu ernu ndu-ehni ele ka?” Ka vuyaru okewa n'esilawuru be.

17 Ele Farisi sika kwno nwerukna wam berere, “Ndaa nhne i kwuru gbasiri nye wam kpumernu anya i?”

O saru be, “O bu nye owhnurninya.”

18 Kòvu ele risi ele Ju kwége nù o kpuru isni nù mbòm kòvu nòowhnu ọsno kịtna tem be sukwu ele mụrnụ nwerukna wam.

19 Be sịkwa be, “Ka ọ bụ nnwọ anụ, nye anụ karụ nù o kpuru isni nga anụ mụrnụ a? Ndaa kpa o jiri nòowhnu ọsno kịtna?”

20 Ele mụrnụ a sarụ be, “Ọ bụ n'ezi nù ọ bụ nnwọ aị, nye a mụrnụ n'isni.

21 Kòvu a máa kpa o jiri nòowhnu ọsno kịtna mọbu nye kpumernu anya a. Anụ sịkwahia a, ọ bụ okno badnụ, o jookwulinu ẹhni a.”

22 Ele mụrnụ a kwuru ka kwnornu nù be nọtụ ogwnu ele risi ele Ju. Kwnornu nù ele risi ele Ju kwekọtaru nù nye ọbula ke jookwuhia nù Jizọsi bụ Karaisi, be jaachihala a n'oro ọgbako ele Ju.

23 Ka kpahiaru ele mụrnụ a karụ, “Ọ bụ okno badnụ, anụ sịkwa a.”

24 Be sukwu kwno nwerukna wam be mụrnụ n'isni, be kanụ a, “Nye Chiokike ọznarni, a magwụ nù nwerukna ka bụ nye mmehie.”

25 Nwerukna wam kaa, “M máam ma ọ bụ nye mmehie, ma ọ búo nye mmehie. Kòvu otu nhne bụ ke me mahiaru, m kpuru m isni nù mbòm, kịtna m nòowhnu ọsno.”

26 Be sịkwa kwno a, “Kini bụ nhne o mernu i? Ndaa kpa o jiri kpume anya i?”

27 Ọ sarụ be, “M kannụ m anụ nù mbòm, anụ kwéle o bno nsni. Anụ pioru ọ nù a

berere? Anụ noopio ọ bụru ele sno apna a sa?”

28 Be kpasị a iwhnerne, kaa, “I bụ nye sno apna nye ka, a bụ ele sno apna Mozizi.

29 A magwụ nù Chiokike kwunnu Mozizi ọka, kòvu nye ka, a máa hne o hi va.”

30 Nwerukna wam sarụ be, “Ka bụ nhne tị n'anya, anụ máa hne o hi va, kòvu o kpumernu anya m.

31 A magwụ nù Chiokike zá noobnonu ele mmehie nsni, kòvu o noobnonu ele nọsobisinu a nsni bụ ele neeme nhne naamasị a.

32 Ke ọwa panizoru, ọ zá nye nuleru nù o nwernu nye kpumernu anya nye be mụrnụ n'isni.

33 Ọ bụru nù nwerukna ka híge n'aka Chiokike, o jéenwe rikne mee nhne ọbula.”

34 Be sarụ a, “Be mụrnụ i, znulizo i nù rime mmehie. I jọobu nye jeezni aị nhne sa?” Be chihala a nù rime ọro ọgbako ele Ju.

Isni ke Enine

35 Nga Jizọsi nurnu nù be chihalaru a, o pohia a, kaa, “I kweru nù Nnwọ ke Badnụ?”

36 Nwerukna wam sịkwa Jizọsi, “Nda-aị-kwu, kanụ m nye ọ bụ ma m kweru m nù ya.”

37 Jizọsi kanụ a, “I whnụnam a, ọ bụ nye nookwunu i ọka kịtna.”

38 Nwerukna wam kaa, “Nyenwe aị, m kweru m.” Ọ kpọnu a risi n'eli.

39 Jizọsi kaa, “M varụ m n'owa o kpe ikpe, ma ele

kpuru isni whnúrnu ọsno, ma ele nọowhnu ọsno kpuru isni.”

⁴⁰ Agwna ele Farisi zị hne ọ zị núnru nhne o kwuru, be sịkwa a, “A bụ ele isni masị?”

⁴¹ Jizọsi kaa, “Ọ bụrụ nụ anụ kpuru isni, ikpe mmehie ba mána anụ, kọvu anụ karụ nụ anụ nọowhnu ọsno, anụ bụ ele ikpe mmehie marnụ.”

10

Jizọsi ọmama naye znú atnúrnu

¹ Jizọsi kaa, “Me kanụ anụ ezi ọka, nye ọbula ke gála nụ ọnu-mgbo bna n'oro atnúrnu, kọvu garụ apna berere bna, bụ nye buznu n'ezi.

² Nye ke garụ n'ọnu-mgbo bna n'oro atnúrnu bụ nye nọoznu atnúrnu.

³ Nye neese ọnu-mgbo jaagbanụ a ọro, rụmu atnúrnu a núnru nkọli a, o sukwu rụmu atnúrnu a nụ rẹwhna be, duru be whọga.

⁴ Nga ọ chíhiaru be, o beru be ọsno, rụmu atnúrnu a snornu a n'aznụ, kwnornu nụ be magwụ nkọli a.

⁵ Be jọsno nye berere, kọvu be jaagbawhu, kwnornu nụ be máa nkọli nye izne.”

⁶ Ka bụ elulu Jizọsi tñunnu be, kọvu be ghóyage nhne ọ naakanụ be.

⁷ Jizọsi kanụ be berere, “Me kanụ anụ ezi ọka, mawa bụ ọnu-mgbo ke atnúrnu.

⁸ Kpakara ele beru m ọsno va bụ ele buznu n'ezi. Atnúrnu wam bnóne be nsị.

⁹ Mawa bụ ọnu-mgbo. Be jọoznohia nye ọbula ke jeehi nụ rime m bna, ọ jaabna nụ

rime, whọga kwno n'ederezi, whnú ọri ọ jaata.

¹⁰ Nye buznu varụ ma o znu buznu, gbu ogbu, lulu nhne, kọvu m varụ m ma be nwehia bụdnu, bụ bụdnu ke zuru ozu.

¹¹ “Mawa bụ ọmama naye znú atnúrnu. Ọmama naye znú atnúrnu jiknenu ọ nwunu atnúrnu a ẹnwu.

¹² Nye be gnornu ẹnu, nye atnúrnu wam bụo ke a, jẹsigbasi atnúrnu gbawhu nga ọ whnúrnu edu naava. Edu tagbu atnúrnu, chikeme kwo be.

¹³ Ọ gbarụ ẹso kwnornu nụ atnúrnu bụo ke a, ọ bụ nye be gnornu ẹnu, bụdnu rụmu atnúrnu wam zịla a mkpa.

¹⁴ “Mawa bụ ọmama naye znú atnúrnu. M maam atnúrnu m, atnúrnu m magwụ m masị.

¹⁵ Lele kpa Nda m magwụ m, bụ kpa me magwụ Nda m. M nọotusanu rụmu atnúrnu m bụdnu m.

¹⁶ M nwernu m rụmu atnúrnu berere ke zá n'ogbori atnúrnu ka, m jeegweya be. Be masị jọonu nkọli m, kpakara be jọoburu otu ogbori atnúrnu. Be jeenwe otu nye znú atnúrnu.

¹⁷ Ka bụ nhne kpayarụ Nda m jiri whnú m n'anya kwnornu nụ m kweru m ọ túbita bụdnu m, ma m gwelizo a berere.

¹⁸ Ọ zá nye nanahia m bụdnu m. Mawa bítaru a hite nụ mkpọma m. M nwernu rikne ọ bítá a, m nwe masịri m rikne ọ gwelizo a. Ka bụ nhne Nda m nyernu m n'iwu.”

19 Ka kpayarụ okewa kwno n'esilawuru ele Ju.

20 Agịda be naakaa, “Rẹnwu ojo nwụgwu a, ọ bụ nye ẹra. Kini mernu anụ noobno a nsni?”

21 Kọvu ele berere kaa, “Nye rẹnwu ojo nwụgwu, o jookwu ọka kpa? Ndaa kpa rẹnwu ojo jookpumeli anya nye isini?”

Ókwe ekwe ke ele Ju

22 N'ige Iriri Onyewhete Oro Nso Chiokike duru nụ Jeruselem, n'ige okirika,

23 Jizọsi zị n'Oro Nso Chiokike neezne izne nụ mgbemgbe ọro Solomonị.

24 Ele Ju gba a gburugburu, znekwnusi a, kaa, “Ị bítaru a n'ochichiri ogologo ige, kawamanụ aị ọ bụru nụ jịwa bụ Karaisi.”

25 Jizọsi sarụ be, “M kannụ m anụ, kọvu anụ kwége. Ẹnu ndu-ẹhni me nọornu nụ rẹwhna Nda m naagbanụ m akebne.

26 Kọvu anụ kwége kwnornu nụ anụ bụo atnurnu ke m.

27 Atnurnu ke m nọonu nkọli m, m maam be, be noosno m n'aznụ.

28 M neenye be bụdnu kwó okwo, be jónwu rịa rịa. Ọ zá nye nwernu rikne dọhala be n'aka m.

29 Nda m nye nyernu m be kakwo kpakara nhne berere. Ọ zá nye nwernu rikne dọhala be n'aka Nda m.

30 Me nụ Nda m bụ otu.”

31 Ele risi ele Ju tụturu kwno akaworugwu be jọotu a.

32 Jizọsi kanụ be, “M rnurnu m agịda ẹnu ndu-ẹhni nụ

ruwhnu anụ ke Nda m nyernu m, ndaa ẹnu ke anụ kwnornu nụ a nọotu m akaworugwu?”

33 Ele Ju sarụ a, “A jọotu ị akaworugwu kwnornu nụ ẹnu ọma, kọvu kwnornu nụ ị kwuluru Chiokike hne ị bụ badnụ etekne, ị neeme ẹhni ị Chiokike.”

34 Jizọsi sarụ be, “Okwukwo nsọ anụ kwuru nụ Chiokike sukwuru be chi.

35 O sukwuru be chi bụ ele nurnu ikwu-ọnu Chiokike, aghalaghala zịla nụ nhne be gbarụ n'okwukwo nsọ.

36 Nda m hōhiaru m, bítá m nsọ, ziya m n'ọwa. Ndaa kpa me nookwulu Chiokike kwnornu nụ m karụ m nụ m bụ m Nnwọ Chiokike?

37 Anụ kwé, ọ bụru nụ m zá m nọornu ẹnu Nda m.

38 Kọvu ọ bụru nụ m nọornu ẹnu Nda m, ọ bụbedi nụ anụ kwéle nụ me, anụ kweru n'ẹnu m, ma anụ mahia nụ Nda m zị nụ rime m, me nụ rime Nda m.”

39 Be pio ọ nwudne a berere, kọvu o hi n'aka be whọgaru.

40 Jizọsi lahna n'aznụ Osimini Jodani kiyari, hne Joni wuru mini nụ mbom. Ọ daziri pịi.

41 Agịda ele badnụ vakwnusi a, kaa, “Jonị rnúge ẹnu ndu-ẹhni, kọvu kpakara nhne Joni kwuru gbasiri nwerukna ka bụ ezi ọka.”

42 Agịda be kweru nụ ya pịi.

11

1 Otu nwerukna rēwhna bu Lazarōsi, nye wu nū Bētani, dnarnū ẹhni igbugbu. Bētani bu hne Meri nū nwene a rinya Mata wu.

2 Ka bu Meri wam ke wūsiri Jizōsi mōno otute, gweru rukeri-ize a kwnosnama ọchi a, bu nye nwene a rukna Lazarōsi dnarnū ẹhni igbugbu.

3 Rūmu nne a rinya ziznenu Jizōsi izi kaa, “Nyenwe aị, enyi i ke ị whnūru n'anya naari ari a.”

4 Nga Jizōsi nūru a, ọ kaa, “Ehni igbugbu ka jọbu ẹnwu Lazarōsi, kọvu o jeenye Chiokike igwugwu ma be hite nū a nyee Nnwọ Chiokike igwugwu.”

5 Jizōsi whnūru Mata nū nwene a rinya nū Lazarōsi n'anya.

6 Kọvu nga ọ nūru nū Lazarōsi naari a ẹhni igbugbu, ọ daziri nū hne ọ zị ọbochi lawuru berere.

7 Omekwo, ọ kanu ele sno apna a, “Anu va ma a lahna Judiya.”

8 Ele sno apna a kanu a, “Nye-zni-nhne, o gbule ọkwnu ele Ju pioru ọ tu akaworugwu, ị naalahna koriri pị?”

9 Jizōsi saru be, “Otu ọbochi nwernu nri nū awa lawuru, nye ọbula ke znernu izne n'iwnehnie jọkpobi ọchi, kwnornu nū ọ nọwhnu iwhe k'owa.

10 Kọvu ọ buru nū o zne izne n'abalị, ọ jọkpobi ọchi, kwnornu nū ọ zị iwhe zị nū rime a.”

11 Nga Jizōsi kwukworu kpa, ọ kaa, “Lazarōsi enyi aị neezni anyarna, kọvu m jeezne ma m kpatne a.”

12 Ele sno apna a kaa, “Nyenwe aị, ọ buru nū o neezni anyarna, ẹhni jọburu a ọma.”

13 Kọvu nhne Jizōsi nookwu bu nū Lazarōsi nwunam. Kọvu be neeche nū ọ bu ozni anyarna etekne.

14 Jizōsi kawhnomenu be, “Lazarōsi nwunam.

15 Mkpoma nọso m n'onu kwnornu anu, nū m zila m hne ọ nwunru, ma anu kweru. Anu lizo ma a znekwnusi a.”

16 Tọmosi, nye be kwu Didimōsi (ke bu ejima) kanu ele sno apna a ibne a, “Anu lizo ma a snornu a zne, ma a snornu a nwu ẹnwu.”

Jizōsi, olizo n'ẹnwu nū budnu

17 Nga Jizōsi vaduru, ọ whnūru nū be lilem Lazarōsi ọbochi ẹno wheru ewhe.

18 Bētani dula maii lawuru hite nū Jeruselem.

19 Agida ele Ju varu ọ kasi Mata nū Meri mkpoma kwnornu ẹnwu nwene be rukna.

20 Nga Mata nūru nū Jizōsi wawa, ọ whoga znekwnusi a, kọvu Meri daziri n'oro.

21 Mata kanu Jizōsi, “Nyenwe aị, ọ buru nū ị zị hna, nwene m rukna bọ ọ nwuna.

22 Kọvu m maam nū nhne ọbula ị rioru n'aka Chiokike, o jeenye i ya.”

23 Jizòsi kanu a, “Nwene i rukna jeelizo berere.”

24 Mata sa a, “M maam nu o jeelizo berere n'obochi ipne-aznu.”

25 Jizòsi kanu a, “Mawa bu olizo n'enwu nu budnu. Nye obula ke kweru nu me, o burubedi nu o nwurru onwu, o jaazi budnu.

26 Berere kwno, nye obula ke zi budnu kweru nu me joonwu enwu tim tom. Mata, i kweru nhne me nookwu?”

27 Mata saru, “Owe! Nyenwe ai, m kweru m nu ji bu Karaisi, Nnwò Chiokike ke varu n'owa.”

Jizòsi kwnarnu ekwna

28 Nga Mata kwukworu ka, o lahna, sukwu Meri nwene a rinya ichne kanu a, “Nye-zni-nhne zi hna, o noosukwu i.”

29 Nga Meri nuru ka, o lizo wara wara ma o kwnusi Jizòsi.

30 Jizòsi yaavaduge nu rime eli-ohna, o zi koriri nu hne Mata kwnusiri a.

31 Ele Ju be nu Meri zi n'oro naakasi a mkpoma, snornu a nga be whuru nu o lizoru wara wara whoga. Be neeche nu o neezne akwna ekwna n'ilili.

32 Nga Meri duru hne Jizòsi zi, whuru a, o dna n'eli n'ochi a, kaa, “Nyenwe ai, o buru nu i zi hna, nwene m rukna bo o nwuna.”

33 O meturu Jizòsi nu mkpoma nga o whuru Meri nu ele Ju sno a naakwna ekwna, o gbu a igbugbu nu mkpoma.

34 O sikwa be, “Ndaa hne anu vubiri a?”

Be kaa, “Nyenwe ai, va whuru.”

35 Jizòsi kwnarnu ekwna.

36 Ele Ju kaa, “Le, o whuru a n'anya k'agida.”

37 Kovu agwna be kaa, “O kpumernu anya nwerukna kpuru isni, o bu nu o jeenwe rikne mee Lazarosi gharu o nwu enwu?”

Jizòsi mernu Lazarosi hi n'enwu lizo

38 O gbu kwno Jizòsi igbugbu nu mkpoma, o zne n'ilili be gwuru nu rime rugwu, be jiri rugwu kpusni onu a.

39 Jizòsi kaa, “Anu gweme rugwu ka.”

Mata, nwene rinya nwerukna wam wuru onwu kaa, “Nyenwe ai, o jeenwe eknarna ojo, kwnornu nu tna bu obochi eno be liri a.”

40 Jizòsi kaa, “Me kannu i nu i jowhnu igwugwu Chiokike o buru nu i jeekweru kpoi?”

41 Be vume rugwu wam. Jizòsi lelizo anya n'olu, kaa, “Nda m, meka, kwnornu nu i bnonem me nsni.

42 M magwu m nu i noobnonu m nsni ige obula, kovu kwnornu nu ele ka zi hna m nookwu a ma be kweru nu ji ziyaru m.”

43 Nga o kwukworu ka, o gweru okne nkoli siwama, “Lazarosi, whuya.”

44 Nwerukna wam wuru onwu whuya, nye be ji ikpe iznu whu a aka lawuru nu ochi lawuru, nu ikpe be jiri

whụ ruwhnu a. Jizọsi kanụ be, “Anụ tọma a, ma ọ la.”

Be gbarụ iznuznu

o gbu Jizọsi

(Mat 25:1-5; Mak 14:1,2; Luk 22:1,2)

⁴⁵ Agịda ele Ju ele varụ elekwa Meri whnụnu nhne Jizọsi mernu, kweru nụ ya.

⁴⁶ Kọvu agwna be lahna kanụ ele Farisi nhne Jizọsi mernu.

⁴⁷ Ele Farisi nụ ele risi ariohna kwu ikwu kaa, “Ndaa nhne a neeme? Nwerukna ka noornu agịda ọnu ndu-ehni.

⁴⁸ Ọ bụru nụ a gharụ a, o neezne nụ ruwhnu, kpakara ele badnụ jeekweru nụ ya. Ele Rom jaava lulu ẹli aị ma Oro Nso aị.”

⁴⁹ Otu nyenum n'esilawuru be, rẹwhna a bụ Kayafasi, nye bụ nye risi ariohna n'awha wam, kaa, “Anụ máa nhne rịa rịa.

⁵⁰ Ọ bụru ọma nụ otu badnụ nwuhianu kpakara badnụ ẹnwu, ma kpakara mba gharụ o whu etekne.”

⁵¹ N'ezi ọka, o kwúge nhne ka hite nụ mkpọma a, kọvu lele nye risi ariohna n'awha wam, ọ whnụnu ọwhnurninya nụ Jizọsi jọonwuhianu ele Ju ẹnwu.

⁵² Ọ búo ele Ju kpoi, kọvu kwnornu kpakara rụmu Chiokike be chisaru nụ kpakara ọwa, chikota be ma be bụru otu.

⁵³ Hite n'ọbochi wam ele risi ele Ju bete ọ gba iznuznu kpa be joogbu Jizọsi.

⁵⁴ Kam kpayarụ, Jizọsi zịma neezne izne nụ ruwhnu ọhna n'esilawuru ele Ju, kọvu ọ

whọga zne hne zị ndundu n'eli-ikpa, bna n'otu ẹli be kwu Ifirem, ya nụ ele sno apna a daziri pịi.

⁵⁵ Ige Iriri Ọgawhe ele Ju zị ndundu, agịda ele Ju zne Jeruselem, zne ọ bita ẹhni be nsọ sụ ọ dụ Iriri Ọgawhe be.

⁵⁶ Be noopio Jizọsi, be gbakọ n'Oro Nso Chiokike, be neesikwa ibne be, “Ndaa nhne bụ echiche anụ? Ọ bụ nụ ọ jáava Iriri ka sa?”

⁵⁷ Ele risi ariohna nụ ele Farisi nyernu iwu, kaa, nye ọbula ke magwụ hne Jizọsi zị kanụ be ma be nwudne a.

12

Be teru Jizọsi mọno

nụ Bẹtani

(Mat 26:6-13; Mak 14:3-9)

¹ Ọ gwnarnụ ọbochi isunu Iriri Ọgawhe ele Ju dụ. Jizọsi znernu Bẹtani hne Lazarọsi nwerukna wam o mernu o hi n'ẹnwu lizọ.

² Be sinu Jizọsi wiri anyasnu, Mata neezne izi, Lazarọsi bụ otu nụ ele Jizọsi dazị neeri wiri.

³ Meri gweru otu olori mọno otute zị gburu ọnu be jiri nadi zị snam mee, ke nwernu ẹknarna ọma wụsi n'ọchi Jizọsi, gweru rukerize a kwnosnama a. Ẹknarna mọno wam jihia rime ọro.

⁴ Otu nụ rime ele sno apna Jizọsi be kwu Judasi Isikarioti, nye jeere Jizọsi, kaa,

⁵ “Kini mernu be réle mọno otute ka riwhu mkpuru iwai ẹto, kesi ele mboni?”

⁶ Ọ búo nụ nhne gbasiri ele mboni neemetụ a nụ

mkpoma mernu o jiri kwu kpa. Kòvu kwnornu nù ọ̀ bụ nye buznu, ya neeji rẹkpa iwai be, neeri nhne zị a nù rime.

⁷ Jizọsi saru a, “Gharu nwerinya ka, ọ̀ bítaru ka kwnornu ọ̀bochi be jeeli m.

⁸ Jì nù ele mboni zì kpakara ige, me nù jì jáazì kpakara ige.”

*Be gbaru iznuznu
o gbu Lazarosi*

⁹ Agida ele Ju nurnu nù Jizọsi zì nù Bẹtani, be va, ọ̀ búo kwnornu Jizọsi kpọi, kovu ma be whnurnu Lazarosi nye Jizọsi mernu o hi n'ẹnwu lizọ.

¹⁰ Ele risi ariohna ma mmuma kpa be joogbu Lazarosi masi.

¹¹ Agida ele Ju gharuru ele risi ele Ju kweru nù Jizọsi kwnornu Lazarosi.

*Jizosi bnaznenu
Jeruselem*

(Mat 21:1-11; Mak 11:1-11; Luk 19:28-40)

¹² N'ọ̀bochi ke sno a, agida ele badnu ele varu Iriri Ọgawhe nurnu nù Jizọsi vawa Jeruselem.

¹³ Be gburu igwugwu bukwa whoga zne kwnusi a, neesi lulo,

“Ozana! * Chiokike gozi nye naava nù rẹwhna Nyenwe aị,

Chiokike gozi eze Izireli.”

¹⁴ Jizọsi pohia otu nnwo iyinya daziri n'olu a, lele kpa ọkwukwo nsọ kwuru,

¹⁵ “Ị túko ogwnu, jì adna Zayoni,

Le, eze i gba nnwo iyinya naava.”

¹⁶ Ele sno apna a ghoyage n'ige wam, kovu nga Jizọsi hiri n'ẹnwu lizọ n'igwugwu, be chenwanya nhne ọkwukwo nsọ kwuru gbasiri a nù be mernu a nhne ka.

¹⁷ Agida ele badnu wam whnurnu nga Jizọsi suk-wuharu Lazarosi n'ilili, mee ma o hi n'ẹnwu lizọ. Be kaharu nhne mernu.

¹⁸ Ka kpayarụ agida ele badnu znekwnusi a, kwnornu nù be nurnu nù ọ̀ rnurnu ẹnụ ndu-ehni ka.

¹⁹ Ele Farisi kanu ibne be, “Le, ọ̀ zá nhne a neemeli, kpakara ọwa sno a n'aznu.”

*Agwna ele Giriki noopio
Jizosi*

²⁰ Agwna ele Giriki znenu Jeruselem n'ige Iriri wam zne kponu Chiokike risi eli.

²¹ Be vakwnusi Filipu nye Bẹtesaida nù eli Galili, kaa, “Nda-ai-kwu, a noopio ọ̀ whnu Jizosi.”

²² Filipu zne kanu Anduru, be lawuru zne kanu Jizosi.

²³ Jizọsi saru be, “Ige wam valem ma be nyee Nnwọ ke Badnu igwugwu.

²⁴ M kanu anu ezi oka, otu mkpuru ikpa zì etekne nga be kpasila a nù rime n'eli. Nga be kpasiri a, ọ̀ nwuma, fuhia, mi agida ike ikpa berere.

²⁵ Nye obula ke nọowhnu budnu a n'anya jootuwu a, kovu nye sno budnu a irno n'owa ka jaabita a du budnu kwó okwo.

* 12:13 Ozana n'ikwu-ọnu ele Hiburu, ke bu “Znohial”

26 Nye ọbula ke nọornunu m ẹrnu joosno m n'aznụ. Hne me zị nnwọ izi m jaazị pịi. Nda m jọsobisinu nnwọ izi m.

*Jizọsi kwuru ọka
gbasịri ẹnwu a*

27 “Kịtna mkpọma m naala mini. Ndaa nhne me jaakaa? M jaakaa, ‘Nda m, i kwéko ige ka va?’ Kọvu ka bụ risi nhne me kwnornu va.

28 Nda m, nyee rẹwhna ị igwugwu.”

Otu nkọli hiri n'oligwe dna, kaa, “M nyene m a igwugwu, m jeenye kwno a igwugwu berere.”

29 Igbudu ele badnụ wam gwuzo pịi kaa, “Egbe oligwe gbarụ.” Ele berere kaa, “Enine izi kwunnu a ọka.”

30 Kọvu Jizọsi karụ, “Ọ búo kwnornu me nhne nkọli ka kwuru ọka, ọ bụ kwnornu anụ.

31 Kịtna bụ ige be jeekpe ọwa ka ikpe, kịtna be jẹechihala nye risi ke ọwa ka.

32 Kọvu me, ọ bụru nụ be gwelizo m olu n'ọwa, m jọodoru kpakara badnụ nyee ẹhni m.”

33 O kwuru ka ma o gesi ọkpa ẹnwu ọ jọonwu.

34 Igbudu ele badnụ wam kaa, “A nurnu hite n'iwu aị nụ Karaịsi jaazị tim tọm. Ndaa kpa ị naakaa nụ be gwelizo Nnwọ ke Badnụ olu? Nyele bụ Nnwọ ke badnụ?”

35 Jizọsi kanụ be, “Anụ jeenwe iwhe ige matị, anụ zne izne nụ rime a, ọ zị ọchichiri vakwnusi anụ. Kwnornu nụ nye neezne

izne n'ọchichiri máa nhne o neezne.

36 Anụ tükwasi ovu n'iwhe kịtna anụ nwernu a, ma anụ bụru rụmu ke iwhe.” Nga Jizọsi kwukworu ọka ka, ọ whọga, tugwa ẹhni a.

Ókwe ekwe ke ele Ju

37 Ọ bụ n'ezị nụ Jizọsi rnurnu kpakara ẹrnu ndu-ẹhni ka n'anya be, be kwéruge nụ ya.

38 Ka bụ ma nhne Azaya nye ọwhnurninya kwuru mezu,

“Nyenwe aị, nyele kweru izi a ziri,

ndaa nye Nyenwe aị kpumennu aka dikne a?”

39 Kwnornu nụ be kwéle, Azaya kwuru nụ hne berere,

40 “Chiokike mernu be kpu isni,

mee mkpọma be bụru nhne nwurnu ọnwu,

ma be gharụ o ji anya be whnụ ọsno,

gweru mkpọma be ghọhia, ma be tūhnasna,

ma m gwọ m be.”

41 Ka bụ nhne Azaya kwuru kwnornu nụ ọ whnurnu igwugwu Jizọsi, o kwu ọka gbasịri a.

42 N'ige wam agịda ele risi ele Ju kweru nụ Jizọsi, kọvu kwnornu nụ ele Farisi, be nwéé rikne kwuhia nhne gbasịri a, ọ zị be chihala be n'oro ọgbako ele Ju.

43 Be mernu kpa, kwnornu nụ be whnurnu ọznarni ke badnụ n'anya kakwo ọznarni ke Chiokike.

*Ikwu-ónu Jizòsi
jeekpe ikpe*

44 Jizòsi gweru okne nkòli siwama, kaa, “Nye òbula ke kweru nù me, o kwéruge nù me kpòì, kòvù ma nù nye zì-yaru m.

45 Nye òbula ke neele m anya jòowhnu nye ziyaru m.

46 M varù m n'òwa lele iwhne, ma nye òbula ke jeekweru nù me jáadazìgidne n'òchichiri.

47 “Nye òbula ke jòonu ikwu-ónu m, kòvù zá naabìta be, m jéekpe a ikpe, kwnornu nù m váge m o kpe òwa ikpe, kòvù ò znòhia òwa.

48 Nye ke zùsaru m, zá naabìta ikwu-ónu m nwernu nye jeekpe a ikpe. Ikwu-ónu me kwuru jeekpe a ikpe n'òbochi ipne-aznù.

49 Kwnornu nù m kwúge m òka ke m, kòvù Nda m nye ziyaru m nyernu m iwu nhne me jaakaa, nù nhne me jookwu.

50 M magwù m nhne o nyernu n'iwu bù bùdnu kwó okwo. Nhne me kwuru bù nhne Nda m karù me kwu.”

13

*Jizòsi snùrnù òchi
ele sno apna a*

1 N'òbochi ke bòru òbochi Iriri Ògawhe, Jizòsi magwù nù ige ò jaaghasa òwa ka lakwnusi Nda a dùlam. Ò whnùrnù ele ka ele zì n'òwa n'anya. Ò whnùrnù be n'anya dù ipne-aznù.

2 Kpa be neeri wiri anyasnu, Ekwensu yisiri a

nù mkpòma Judasì Isikariòti nnwò Saìmoni o re Jizòsi.

3 Jizòsi magwù nù Nda a yisilem kpakara nhne n'aka a, nù o hi hne Chiokike zì va, ò naalhnakwnusi Chiokike.

4 O lizò n'olu wiri, wopu iwo olu a, gweru akata kne n'ikwnu a.

5 Ò wùsi mini nù rime agbùgba, bete nòosnu òchi ele sno apna a, gweru akata o kne n'ikwnu nookwnosna be.

6 O va hne Saìmoni Pita zì, Pita sùkwa a, “Nyenwe aì, ì jòosnu òchi m?”

7 Jizòsi sarù a, “Ì máa nhne me neeme kítna, kòvù omekwo, ì jaamahìa.”

8 Pita kaa, “Ì jòosnu òchi m rìa rìa.”

Jizòsi sarù a, “Ò bùru nù m snúge m òchi ì, me nù jì nwéko nhne òbula.”

9 Pita sarù a, “Ò bùru kpam, ì snú òchi m kpòì, kòvù snù ma aka m lawùru ma risi m.”

10 Jizòsi sarù a, “Nye hniarnu èhni zì rìchna kpam kpam, o kwésile ò snù èhni a berere, okwolem ò snù òchi a. Kpakara anù zì rìchna, kòvù ò bùo kpakara anù.”

11 Kwnornu nù Jizòsi magwù nye jeere a, bù nhne o kwnò kaa nù kpakara be zì rìchna, okwolem otu badnù kpòì nye zìla rìchna.

12 Nga ò snùkparu be òchi, o woru iwo olu a berere dazìri èli nù hne ò zì nù mbòm. Ò sùkwa be, “Anù ghòhiaru nhne me mennu anù?”

13 Anù noosukwu m Nye-zni-nhne, nù Nyenwe anù, ò

bù ezi òka, kwnornu nù ò nhne me bù.

14 Kìtna, me bù Nyenwe anù nù Nye-zni-nhne snùrnù òchi anù, anù kwesiri ò snùrita òchi ibne anù.

15 M gesiri m anù nhne atu ma anù mee kpa me mernu.

16 Me kanù anù ezi òka, ò zá òhi ke kakwo nyenwe a, ò zá nnwọ izi ke kakwo nye dusiri a izi.

17 Mkpọma jọoso anù n'ọnu, ò bọru nù anù mahiariu nhne ka, neeme be.

18 “M zá m nookwu kwnornu kpakara anù. M magwù m ele me hòhiaru, kọvu nhne òkwukwo nsọ kwuru jeemezuri, ‘Nye riri wiri m lizọru megidne m.’

19 M naakanù anù ezi òka kịtna sị o mee, ma nga o jeeme anù kweru nù m bù m ya.

20 Me kanù anù ezi òka, nye òbula ke jaanabnanya nye me ziznenu, nabnanyarnù m, nye nabnanyarnù m, nabnanyarnù nye ziyaru m.”

*Jizọsi kwuru òka
gbasiri o rure a*

(Mat 26:20-25; Mak 14:17-21; Luk 22:21-23)

21 Nga Jizọsi kwuru ka, o gbu a igbugbu nù mkpọma k'agida, ò kaa, “Me kanù anù ezi òka, otu badnù n'esilawuru anù jeere m.”

22 Ele sno apna a lehnata ẹhni be anya. Be máa nye ò naakaa.

23 Otu nye sno apna a Jizọsi whnùrnù n'anya ke dazị Jizọsi ndundu n'ẹhni.

24 Saịmoni Pita kanù a, “Sikwahia a nye ò bù.”

25 Nye sno apna wam dnabnenu nù mkpọma Jizọsi sịkwa a, “Nyenwe aì, ò bù nyele?”

26 Jizọsi sarù a, “Ò bù nye me jeerusi brẹdi ka nù rime wiri nyee.” O gweru otu ibekala brẹdi, rusi a nù wiri nyee Judasi, nnwọ Saịmoni Isikarioti.

27 Ngangam Judasi gweruru brẹdi wam, Ekwensu bna nù rime a. Jizọsi kanù a, “Ò zì nhne i neeme, mee a wara wara.”

28 Ò zá nye zì pìi neeri wiri mahiariu nhne Jizọsi nookwu.

29 Hne ò bù Judasi vugwu rẹkpa iwai, agwna ele sno apna Jizọsi neeche nù Jizọsi kannù a o zne zuya nhne be jeeri n'Iriri wam, mọbu o kesi ele mboni iwai.

30 Judasi narnù brẹdi wam, ò whọga ngangam. Ka neeme n'abali.

Iwu ikne

31 Nga Judasi whọgaru, Jizọsi kaa, “Kìtna, be jeenye Nnwọ ke Badnù igwugwu, be jeenye masị Chiokike igwugwu nù rime a.

32 Ò bọru nù be nyee Chiokike igwugwu nù rime a, Chiokike jeenye Nnwọ a igwugwu n'iwhuru a. O jeeme a kịtna.

33 “Rumu m, me nù anù jáazì gbu òkwnu. Anù joo-pio m, kọvu me kanù anù nhne me kannù ele risi ele Ju, anù jéenwe rikne va hne me neezne.

34 “M neenye anù iwu ikne, anù whnù ibne anù n'anya. Lele kpa me whnùrnù anù

n'anya, anụ ji ọgwo ọ whnụ ibne anụ n'anya.

³⁵ Kpakara ele badnụ jaamahia nụ anụ bụ ele sno apna m, ọ bụru nụ anụ whnụ ibne anụ n'anya."

Jizọsi kwuru nụ Pita

jọogonahoru a

(*Mat 26:31-35; Mak 14:27-31; Luk 22:31-34*)

³⁶ Sajmoni Pita sịkwa a, "Nyenwe aị, i zne hnele?"

Jizọsi sarụ a, "Anụ jéenwe rikne sno m hne me neezne kịtna, kọvu omekwo, anụ jọosno m."

³⁷ Pita sịkwa a, "Kini mernu me jéenwe rikne sno i kịtna? M jọonwunu i ẹnwu."

³⁸ Jizọsi sarụ a, "I jọonwu kwnornu m n'ezi? Me kanụ i ezi ọka, sụ okne ọchichi kwna ẹkwna, i jọogonahoru m mgba ẹto."

14

Jizọsi bụ apna

¹ "Mkpọma ląkwadia anụ mini. Anụ kweru nụ Chiokike, anụ kweru masi nụ me.

² Agida ọro jiri n'oro Nda m, m naala zne mekwatanụ anụ ọnodi. Ọ bụru ọ bụo kpam, m znernu m ọkanu anụ.

³ Me zne mekwatanụ anụ ọnodi, m jeehiehna, kwuru anụ yisi n'ehni m, ma me nụ anụ daziri n'otu hnanum.

⁴ Anụ magwụ apna hne me neezne."

⁵ Tọmosi kanụ a, "Nyenwe aị, a máa hne i neezne, ndaa kpa a jaamahia apna a?"

⁶ Jizọsi sarụ a, "Mawa bụ apna nụ ezi ọka nụ bụdnu. Ọ

zá nye jeezne hne Nda m zị okwokọlam ma o hiri nụ me.

⁷ Ọ bụru nụ i magwụ m n'ezi, i jaamahia Nda m masi. Hite kịtna anụ magwụ Nda m, anụ whnuna a anya."

⁸ Filipu kaa, "Nyenwe aị, gesi aị Nda i, o joozunu aị."

⁹ Jizọsi sarụ a, "Filipu, me nụ anụ zị ogologo ige ka, i máa nye me bụ? Nye ọbula ke whnurnu m, whnunam Nda m. Ndaa kpa i naakaa, 'Gesi aị Nda.'

¹⁰ Ọ bụru nụ i kwége sa nụ m zị m nụ rime Nda m, Nda m zị nụ rime m? Ikwu-ọnu me nookwu bụo ke m. Nda m ke zị nụ rime m nọornu ẹnu a.

¹¹ Anụ kweru nga me karu nụ m zị m nụ rime Nda m, Nda m zị nụ rime m. Ọ bụru nụ ọ zá nhne berere, anụ kweru kwnornu nụ ẹnu ele ka.

¹² Me kanụ anụ ezi ọka, nye ọbula ke kweru nụ me jọornu ẹnu me nọornu. Owe! Ọ jọornu ẹnu ke kakwo ka kwnornu nụ m naalakwnusi Nda m.

¹³ Kpakara nhne anụ jọorio nụ rẹwhna m, m jeeme a, ma be nyee Nda igwugwu hite nụ Nnwọ a.

¹⁴ Nhne ọbula anụ rịoru nụ rẹwhna m, m jeeme a.

Jizọsi kweru mkwna Enine Nso

¹⁵ "Ọ bụru nụ anụ whnurnu m n'anya, anụ jaabita nhne me nyernu n'iwu.

¹⁶ M jaariasno Nda m, o jeenye anụ Nye Ọkasi Mkpọma berere, nye jaadazinu anụ tim tọm.

17 Ó þú Enine ezi óka, ke ówa jáanahjali, kwnornu nú ele zì n'ówa nwée rikne whnú a móbú mahja a. Kóvu anú magwú a, kwnornu nú o wu nú rime anú, ó jaadazigidnenu anú.

18 M jáagharú anú etekne, m jeehiehnakwnusi anú.

19 Ige matì ówa jóowhnu m, kóvu anú jóowhnu m. M zì m búdnu, kam kpayarú anú jaazì masì búdnu.

20 N'óbochi wam, anú jaamahja nú m zì m nú rime Nda m, anú nú rime m, lele kpa me zì nú rime anú.

21 “Nye óbula ke jaabita nhne me nyernu n'iwu, þú nye whnúrnú m n'anya. Nye whnúrnú m n'anya þú nye Nda m jóowhnu n'anya, m jóowhnu masì a n'anya, gweru ehni m gesi a.”

22 Judasì (ó búo Isikarioti) kaa, “Nyenwe aì, ndaa kpa i jeegesì aì ehni ì, ó búo ele ówa?”

23 Jizósi sarú a, “Nye óbula ke whnúrnú m n'anya, jaabita ikwu-ónu m. Nda m jóowhnu a n'anya, me nú Nda m jaavakwnusi a, aì nú ya jóowu.

24 Nye óbula ke whnúge m n'anya, jáabita ikwu-ónu m. Ikwu-ónu ke anú núrnú búo ke m. Be hi n'aka Nda m, nye ziyaru m.

25 “M naakanú anú ka kpa me nú anú zì.

26 Kóvu Nye Ókasi Mkpóma wam, Enine Nso, nye Nda m jeeziyanu anú nú rēwhna m, jeezni anú kpakara nhne. Ó jeeme anú chenwanya kpakara nhne me znirni anú.

27 M nēsigbasinu anú udno, m neenye anú udno m, ó búo lele kpa ówa neenye þú kpa me neenye anú. Mkpóma lákwdia anú mini. Anú túko ogwnu.

28 “Anú núrnú kpa me karú nú m jaala, kóvu m jeehiehnakwnusi anú. Ó þuru nú anú whnúrnú m n'anya, anú znernu ónwudna, kwnornu nú m naalakwnusi Nda m, kwnornu nú Nda m kakwo m.

29 M kannú m anú kítna hne o yéemege, ma nga o jeeme anú kweru.

30 M jáakanú anú agida óka berere, kwnornu nú nye nēchi ówa ka vawa. Kóvu o nwée rikne hne me zì.

31 Kóvu ówa jaamahja nú m whnúrnú Nda m n'anya, þú nhne kpayarú me neeme kpakara nhne lele kpa o nyernu m iwu. Anú va ma a whóga hna.

15

Isisi vaìni nú nkala a

1 “Mawa þú isisi vaìni n'ezi, Nda m þú nye ernu ekwu.

2 Nkala óbula ke míge mkpúru nú rime m, o gbukwama a. Ó kwnasna nkala óbula ke naamì mkpúru ma ó mìnja agida mkpúru, ma ó zìri rìchna.

3 Anú zì rìchna hite n'ikwu-ónu me kwuru.

4 Anú dazìgidne nú rime m, me nú rime anú. Ó zá nkala ke nwernu rikne m̀ìi mkpúru n'ehni a, okwolem ma ó zì n'isìsi, otu aka wam, anú

nwée rikne mji mkpuru, okwolem ma anu dazigidnenu nu rime m.

5 “Mawa bu isisi vaini, anuwa bu nkala a. Nye obula ke jaadazigidne nu rime m, me nu rime a, jaami agida mkpuru, kwnornu nu anu nwée rikne meli nhne obula hne me zila.

6 Nye obula ke dazigidnenu nu rime m, be jootuwu a lele nkala ke mige mkpuru. O kponwu, ele badnu chikota kporne a nu bekwnu.

7 O buru nu anu dazigidne nu rime m, ikwu-onu m dazigidne nu rime anu, anu jorio nhne obula zi anu mkpa, o joburu ke anu.

8 Ka bu nhne neenye Nda m igwugwu, anu minya agida mkpuru, ke jeegesi nu anu bu ele sno apna m.

9 “Lele kpa Nda m whuru m n'anya, bu kpa me whuru anu n'anya. Anu dazigidne n'owhun'anya m.

10 O buru anu bita nhne me nyernu n'iwu, anu jaadazigidne n'owhun'anya m, lele kpa me bitaru nhne Nda m nyernu n'iwu, m dazigidne n'owhun'anya a.

11 M naakanu anu nhne ka ma ovu oso n'onu m ziri nu rime anu, ma ovu oso n'onu anu zu ozu.

12 Ka bu nhne me nyernu n'iwu, anu whurita ibne anu n'anya lele kpa me whuru anu n'anya.

13 O za owhun'anya ke kakwo ka, nu badnu tuwhuru budnu a kwnornu ele enyi a.

14 Anu bu ele enyi m, o buru nu anu mee nhne me nyernu n'iwu.

15 M za m noosukwu anu ele izi berere, kwnornu nu nnwo izi ma nhne nyenwe a neeme. Kovu m sukwuru m anu ele enyi m, kwnornu nu kpakara nhne me uru n'onu Nda m bu nhne me kannu anu.

16 O buo anu hohiaru m, kovu me hohiaru anu, bita anu ichne, ma anu zne minya mkpuru, ma mkpuru anu dazigidne. Ka jeeme, nhne obula anu jorio Nda m nu rehna m, o jeenye anu.

17 Ka bu nhne me nyernu n'iwu, anu whurita ibne anu n'anya.

Owa snornu ele sno apna Jizosi irno

18 “O buru n'owa sno anu irno, anu chenwanya nu o beru osno sno m irno.

19 O buru nu anu bu ke owa, owa jowhnu anu n'anya lele nhne ke a. Kovu m hohiaru m anu hite n'owa, anu buo ke owa, ka kparu owa snornu anu irno.

20 Anu chenwanya nhne me kannu anu, O za phi ke kakwo nyenwe a. O buru nu be kpakarnu m ehni, be jaakpakna anu ehni masi. O buru nu be bitaru ikwu-onu m, be jabita ke anu.

21 Be jeeme anu kpakara nhne ka kwnornu nu anu kweru nu rehna m, be ma nye ziyaru m.

22 O buru nu m vage m kwunu be oka, ikpe mmehie baamana be. Kitna be jeeji kini

göhoru eñni be hite nù mmehie?

²³ Nye obula ke snornu m irno, snornu Nda m irno.

²⁴ O buru nù m rnúge m ernu n'esilawuru be ke o zá nye berere rnurnu, ikpe mmehie báamana be. Kítina be whnurnu nhne me rnurnu, be sno me nù Nda m irno.

²⁵ Ka bú ma nhne be gbaru n'okwukwo nsò mezu, 'Be snornu m irno hne o zá nhne me mernu be.'

²⁶ "Nga Nye Okasi Mkpoma wam varu, Enine ke ezi oka, Nye me jeeziya hite nù hne Nda m zi, nye hi hne Nda m zi va, o jaagbanu m akebne.

²⁷ Anu jobu masi ele akebne m kwnornu nù me nù anu zi hite n'opanizo.

16

¹ "M kannu m anu kpakara nhne ka o zi anu dnahnala hite n'okwnata ovu anu.

² Be jaachihala anu n'oro ogbako ele Ju, ige vawa nga nye obula ke gburu anu jeeche nù o nornu ernu Chiokike.

³ Be jeeme anu nhne nù kpa kwnornu nù be máa Nda m mobu me.

⁴ M kannu m anu nhne ele ka, ma nga be jeeme anu chenwanya nù m kannu m anu nhne gbasiri be. M káge m be nù mbom kwnornu nù me nù anu zi.

Ernu ke Enine Nso

⁵ "Kítina, m naalalna hne nye ziyaru m zi. Kovu o zá nye n'esilawuru anu nesikwa m, 'Ndaa hne i neezne?'

⁶ Kítina me kannu anu, o noogbu anu igbugbu nù mkpoma.

⁷ Kovu me kanu anu ezi oka, o kanu anu mma me lahna, kwnornu nù o buru m láge m, Nye Okasi Mkpoma wam jáavakwnusi anu. Kovu me la, m jeeziyanu anu ya.

⁸ Nga o varu, o jaabanu owa mbna kwnornu mmehie, nù ome mma nù ikpe.

⁹ O jaabanu owa mbna gbasiri mmehie, kwnornu nù be kwége nù me,

¹⁰ gbasiri ome mma, kwnornu nù m naalakwnusi Nda m, anu jowhnuma m anya berere,

¹¹ gbasiri ikpe, kwnornu nù ikpe hieru nye risi neechi owa ka.

¹² "Agida nhne zi ke me jaakanu anu, kovu anu jéenwe rikne vuru be kítina.

¹³ Kovu nga Enine ezi oka wam varu, o jooduru anu bna nù kpakara ezi oka. O jookwu nhne aka ke a, kovu kpakara nhne o jonu bú nhne o jaakanu anu. O jaakanu anu nhne ke jaava nù ruwhnu.

¹⁴ O jeenye m igwugwu kwnornu o jeegweru nhne me kwuru kanu anu.

¹⁵ Kpakara nhne Nda m nwernu bú ke m. O bú nhne me jiri kaa nù Enine Nso jeegweru nhne ke m kanu anu.

Nhne igbugbu nù snarnima

¹⁶ "Ige mati anu jowhnu m berere, omekwo, ige mati anu jowhnu m."

¹⁷ Agwna ele sno apna a nesikwarita ibne be, "Kini bú risi nhne ka? O karu, 'Ige

matí anu jóowhnu m, ige
matí anu jóowhnu m, berere,
'M naalakwnusi Nda m.'

18 Be neesikwarita ibne be,
"Kini bu ige matí? A máa nhne
o nookwu oka a."

19 Jizosi whnurnu nu be
noopio o sika a, o kanu
be, "M karu m ige matí anu
jóowhnu m, omekwo, ige
matí anu jóowhnu m. O
bu nhne anu neesikwarita
n'esilawuru anu?"

20 Me kanu anu ezi oka, anu
jaakwna ekwna, gba mkpe,
kovu owa joonwudna. Anu
jeenwe nhne igbugbu, kovu
nhne igbugbu anu joocho ovu
oso n'onu.

21 Nga nyerinya nomu
nnwo, o zi nu nhne igbugbu
kwnornu nu rime neeme a,
kovu nga o mudnarnu nnwo, o
chezu kpakara nhne igbugbu
a, kwnornu snarnima nu o
murnu nnwo ikne n'owa.

22 Kpam masi, anu nwernu
nhne igbugbu kitna, kovu m
jóowhnu anu anya berere,
anu jeenwe snarnima, o za
nye jeenwe rikne nahoru anu
ovu oso n'onu anu.

23 N'obochi wam, anu joorio
m nhne obula, me kanu anu
ezi oka, Nda m jeenye anu
nhne obula anu joorio a nu
rehna m.

24 Tem du kitna, o za nhne
obula anu rioru nu rehna m.
Anu rio, anu jenwehia, ma
ovu oso n'onu anu zu ozu.

Mmeri megidne owa

25 "M ji m elulu kwunu
anu oka, ige vawa nga me
jookwunu anu oka n'elulu

berere. M jookwunu anu oka
zi snam nhne gbasiri Nda m.

26 N'obochi wam, anu joorio
nhne nu rehna m, m jaakaa
nu m joorio Nda m nu risi anu.

27 Kwnornu nu Nda m
n'iwuru a whnurnu anu
n'anya, kwnornu nu anu
whnurnu m n'anya, anu
kweru nu m hi m hne
Chiokike zi va.

28 M hi m hne Nda m zi va
bna n'owa, kitna, m neesigbasi
owa naalahna hne Nda m zi."

29 Ele sno apna a kaa,
"Kitna, i nookwunu ai oka
dnornu ai anya, i za nookwu
n'elulu.

30 Kitna a magwu nu i
magwu kpakara nhne. O za
mkpa nu nye obula sika i ajiji.
Ka mernu a kweru nu i hi hne
Chiokike zi va."

31 Jizosi saru be, "Anu
kweru kitna?"

32 Ige vawa, ige wam valem,
nga be jeechisa kpakara anu,
nye obula n'oro ke a. Anu
jeesigbasi me nu nsunu m,
kovu m za m nu nsunu m,
kwnornu nu me nu Nda m zi.

33 "M kannu m anu nhne
ka ma anu nwe udno nu
rime m. N'owa anu jeenwe
mmekpehni, kovu mkpoma si
anu rikne, m megbulem owa."

17

*Jizosi kpennu ele sno apna
a
okpukpe*

1 Nga Jizosi kwukworu oka
ele ka, o lelizo anya n'oligwe,
kaa,

“Nda m, ige wam valëm, nyee Nnwọ ì igwugwu, ma Nnwọ ì nyee ì igwugwu.

² I nyernu a iknernema nù hne kpakara ele badnù zì, ma o kesi kpakara ele ke i nyernu a bñdnu kwó okwo.

³ Ka bù bñdnu kwó okwo, ma ele badnù mahia ì, ì bù otu Chiokike ke bù ezi, nù Jizọsi Karaìsi nye i ziyaru.

⁴ M nyernu m ì igwugwu n'owa hite n'ornukpa ẹrnu ì nyernu m me rnù.

⁵ Kìtna Nda m, nyee m igwugwu nù ruwhnu ì, bù igwugwu ke me nwernu sù ì kpuru ọwa.

⁶ “M mernu ele badnù mahia rẹwhna ì bù ele ì nyernu m hite n'owa. Be bù ele ke i. Jì nyernu m be. Be bítaru ikwu-ọnu ì.

⁷ Kìtna, be magwù nù kpakara nhne i nyernu m hi n'aka ì va.

⁸ M nyernu m be ikwu-ọnu ke i nyernu m. Be gweru a, be magwù n'ezi nù m hi m hne ì zì whùya, be kweru nù jì ziyaru m.

⁹ M neekpenu be okpukpe. M zá m neekpenu ọwa okpukpe, kọvu ele wam i nyernu m, kwnornu nù be bù ke i.

¹⁰ Kpakara nhne me nwernu bù ke i, kpakara nhne i nwernu bù ke m masì, be bù igwugwu m.

¹¹ M zìma m n'owa berere, kọvu be zì n'owa, m naavakwnusi ì, Nda zì nsọ, bìkwata be hite nù rikne ke rẹwhna ì, rẹwhna ke i nyernu m, ma be zìri n'otu lele kpa a zì n'otu.

¹² Nga me nù be zì, m bítaru m be nù rẹwhna ì, bù rẹwhna ke i nyernu m, m segidnernu m be. Ọ zá nye whuru owhu nù rime be, okwokọlam nye wam whuzne owhuzne, ma nhne be gbarù n'okwukwo nsọ mezu.

¹³ “M naavakwnusi ì kìtna, m nookwu nhne ka n'owa ma be nwernu ovu ọso n'ọnu m, ma ovu ọso n'ọnu be zu ozu.

¹⁴ M nyernu m be ikwu-ọnu ì, ọwa snornu be irno kwnornu nù be bùo ke ọwa, lele kpa me bùo ke ọwa.

¹⁵ M zá m naakaa jì gweme be n'owa. Kọvu m nọorio ì ma ì bítà be zọma n'aka nye ojo wam.

¹⁶ Be bùo ke ọwa, lele kpa me bùo ke ọwa.

¹⁷ Bítà be nsọ hite n'ezi ọka ì, ikwu-ọnu ì bù ezi ọka.

¹⁸ Lele kpa i ziyaru m n'owa, bù kpa me neezizne be n'owa.

¹⁹ M kwnornu be bítà ẹhni m nsọ, ma be bítà be nsọ n'ezi ọka.

²⁰ “M zá m neekpenu be okpukpe kpọì, kọvu m neekpekọtanu ele jeekweru nù me hite n'ikwu-ọnu be.

²¹ M neekpe ma kpakara be zìri n'otu, Nda m, lele kpa ì zì nù rime m, me nù rime i. Kpakara be zìri n'otu ma ọwa kweru nù jì ziyaru m.

²² M nyernu m be igwugwu ke i nyernu m, ma be zìri n'otu lele kpa a zì n'otu.

²³ Me zìri nù rime be, jì nù rime m, ma be zu ozu n'ọzi n'otu, ma ọwa mahia nù jì ziyaru m, nù ì whnurnu be n'anya lele kpa ì whnurnu m n'anya.

24 “Nda m, jì nyernu m be, m noopio be dazìri hne me zì, ma be whnú igwugwu m, ka bù igwugwu ke i nyernu m kwnornu nù ì whnúrnú m n'anya sị ì kpúru ọwa.

25 “Nda ke mee mma, ọwa máa nye ì bù, kọvu m magwù m nye ì bù, ele ka magwù masị nù jì ziyaru m.

26 M mernu m be mahịa ì, m jaazì neeme kpam ma ọwhnún'anya ke ì whnúrnú m zìri nù rime be, ma me nù be búru otu.”

18

Be nwudnernu Jizọsi

(*Mat 26:47-56; Mak 14:43-50; Luk 22:47-53*)

1 Nga Jizọsi kpekworu okpukpe ka, ya nù ele sno apna a whọga whe mini Kidirọni. Be bna n'otu ẹkwu ke zì pị.

2 Judasị nye reru a magwù pị, kwnornu nù Jizọsi nù ele sno apna a neezne pị ige ọbula.

3 Judasị chíri ele ọgwnu nù ele neese Ọro Nsọ Chiokike, ele ele risi ariọhna nù ele Farisi ziznernu, be vu tọnji nù ọwa, nù mgwna ọgwnu.

4 Kpa Jizọsi magwù kpakara nhne jaadnakwasị a, o zneknwusi be, sịkwa be, “Anù noopio nyele?”

5 Be kaa, “Jizọsi, nye Nazareti.”

Jizọsi kaa, “Ọbù mawa.” Judasị nye reru a nù be gwuzo.

6 Nga Jizọsi karù, “Ọbù mawa,” Be lahna aznù, dna n'ẹli.

7 Jizọsi sịkwa kwno be, “Ndaa nye anù noopio?”

Be kaa, “Jizọsi, nye Nazareti.”

8 Jizọsi kanù be, “M kannù m anù nù me bù ya. Ọbù nù anù noopio m, anù gharù ele ka ma be la.”

9 Ka bù ma nhne o kwuru mezu, “Kpakara ele i nyernu m, ọ zá otu ke me tuwhuru.”

10 Saịmoni Pita jì ama-ọgwnu, ọ mniọhia a, gbu nye izi nye risi ariọhna, bihala a nsnì akarikwnunga. Rẹwhna nye izi wam bù Makọsi.

11 Jizọsi kanù Pita, “Mniọhnasi ama-ọgwnu ì n'ọbo a. Ọbù nù m jọonwo okiko awhnúwhnu Nda m nyernu m me nwọ?”

Jizọsi gwuzo nù ruwhnu Anasị

(*Mat 26:57,58; Mak 14:53,54; Luk 22:54*)

12 Ele ọgwnu nù nye risi be, nù ele neese Ọro Nsọ Chiokike nwudne Jizọsi, be kne a eriri.

13 Be beru ọsno gwezne a nù ruwhnu Anasị, nda nnwerne Kayafasị, nye risi ariọhna n'awha wam.

14 Ọbù Kayafasị nye kannù ele Ju nù ọbùru ọma otu badnù nwùhianu kpakara be ẹnwu.

Pita gọnahoru Jizọsi

(*Mat 26:69,70; Mak 14:66-68; Luk 22:55-57*)

15 Saịmoni Pita nù nye sno apna Jizọsi ke berere snornu Jizọsi. Nye risi ariọhna magwù nye sno apna a ka, o snornu Jizọsi bna n'ederezi nye risi ariọhna.

16 Kòvu Pita daziri nù ngeri mgbo n'ederezi, nye sno apna wam ke nye risi ariohna magwụ zne kanụ nnwọ rinya zị n'ònu-mgbo, o kwubnanya Pita.

17 Nnwọ rinya zị n'ònu-mgbo kanụ Pita, "Ị bụ otu nù rime ele sno apna nwerukna ka."

Pita sarụ, "M búla m."

18 Iyi nọtụ, ele izi nù ele neese nhne kpawhụsi bẹkwunu, be gwuzoru gburugburu bẹkwunu wam naakwana iyi. Pita gwuzo masị n'esilawuru be, naakwana iyi.

*Nye risi ariohna
neesikwa Jizọsi ajiji*

(Mat 26:59-66; Mak 14:55-64; Luk 22:66-71)

19 Nye risi ariohna sịkwa Jizọsi ajiji gbasiri ele sno apna a, nù nhne o neezni.

20 Jizọsi sarụ a, "M kwuru m ọka nù ogbo ọhna, kpakara nhne me zniirni bụ n'ọro ọgbako ele Ju nù n'Ọro Nsọ Chiokike hne kpakara ele Ju naagbakọ. Ọ zá nhne me kwuru nù mgwụgwa.

21 Ị sịkwa m ajiji, sịkwa ele nurnu nhne me kwuru. Be magwụ masị nhne me kwuru."

22 Nga Jizọsi kwuru ka, otu nye neese nhne gbọ a aka, kaa, "Kini mernu i nookwunu nye risi ariohna ọka kpa?"

23 Jizọsi sarụ a, "Ọ bụru nù m kwuru m nhne búo ọma, gba akebne nhne ojo me kwuru. Kòvu ọ bụru nù m kwuru m ezi ọka, kini mernu i gbọru m aka?"

24 Anasị zizne a ke Kayafasị nye risi ariohna, hne o kne kọriri eriri.

*Pita gọnahoru Jizọsi
berere*

(Mat 26:71-75; Mak 14:69-72; Luk 22:58-62)

25 Kpa Saịmoni Pita gwuzo naakwana iyi, be sịkwa a, "Ị búo otu nù rime ele sno apna a sa?"

Pita gọ, kaa, "M búla m."

26 Otu nù rime ele izi nye risi ariohna nwene nwerukna wam Pita bihalaru nsị a, gwelizọ ọnu, sịkwa a, "Ọ búo jị nye me whnurnu n'ekwu wam?"

27 Berere kwno, Pita gọ, ngangam, okne ọchichi kwna ẹkwna.

*Jizọsi gwuzo nù
ruwhnu Paịleti*

(Mat 27:1,2,11-14; Mak 15:1-5; Luk 23:1-5)

28 Be hi n'ọro Kayafasị kwuru Jizọsi zne n'ọbna nye ọchichi, n'ònu ọsisi. Ele Ju bnána nù rime n'ọbna kwnornu nù be noopio ọ bíta ẹhni be rična ma be nwe rikne ri Iriri Ọgawhe.

29 Paịleti whọkwunusi be n'ederezi sịkwa be, "Ndaa nhne anụ noobno nwerukna ka?"

30 Be sarụ a, "Ọ bụru nù ọ búo nye aghorome, a znéne okwuyanụ i ya."

31 Paịleti kaa, "Anụ kwuru a kpe a ikpe lele kpa iwu anụ kwuru."

Be kaa, "A nwée rikne gbu nye ọbula."

32 Ka bú ma nhne Jizòsi kwuru mezu ke gbasìri òkpa ẹnwu ọ jòonwu.

33 Paìleti lahna n'òbna, sịkwa Jizòsi, "Ì bú eze ele Ju?"

34 Jizòsi sịkwa a, "Kì ọ bú echiche i, sọbu ele berere kannù nhne gbasìri m?"

35 Paìleti sa a, "M bú nye Ju? Ọ bú ele ke i nù ele risi ariohna be kwuyannù m jì. I mernu kìnì?"

36 Jizòsi kaa, "Èli-eze m búo ke ọwa ka. Ọ búru nù ọ bú ke ọwa ka, ele izi m zneru ọlu ọgwnu ma ele risi ele Ju gharù o gweru m nyee n'aka be. Ọ zá, èli-eze m búo ke ọwa ka."

37 Paìleti sịkwa a, "Ke bú nù ì bú eze?"

Jizòsi sarù a, "Jìwa karù nù m bú m eze. Ka bú risi nhne be kwnornu mụ m nù nhne me kwnornu va nù rime ọwa, ma m gbanù m ezi ọka akebne. Nye ọbula ke zì n'ezi ọka noobnonu m nsni."

38 Paìleti sịkwa a, "Kìnì bú ezi ọka?"

Be marnù Jizòsi ikpe ẹnwu (Mat 27:15-31; Mak 15:6-20; Luk 23:13-25)

Paìleti whòkwnusi kwno ele risi ele Ju n'ederezi kanù be, "Ọ zá nhne ojo me whnùrnu nù rime nwerukna ka rìà rìà.

39 Ọ bú omen'èli anù me sigbasinu anù otu nye ikelu n'ìge Iriri Ọgawhe. Anù pioru me sigbasinu anù eze ele Ju?"

40 Kpakara be siwama, "Óza, ọ búo nwerukna ka, sigbasinu aì Barabasi." (Barabasi bú nye buznu.)

19

1 Paìleti kwuru Jizòsi pnià nhne.

2 Ele ọgwnu kpa okpu igwnu kpusi a nù risi, be wosi a iwo odno odno.

3 Be znekwnusi a, kaa, "A bekwulem jì, Eze ele Ju." Be gbọ aka nù ruwhnu.

4 Paìleti lahna kwno hne ele risi ele Ju zì, ọ kanù be, "Anù le, m jookwuyanù anù ya, ma anù marnù nù ọ zá nhne ojo me whnùrnu nù rime a."

5 Jizòsi woru iwo odno odno nù okpu igwnu whùya ederezi, Paìleti kanù be, "Anù le nwerukna wam."

6 Nga ele risi ariohna nù ele neese Ọro Nsọ Chiokike whnùrnu a, be siwama, "Kpogidne a n'ogba, kpogidne n'ogba."

Paìleti kanù be, "Anù kwuru a kpogidne a n'ogba n'aka anù. Kọvu me kanù anù, ọ zá nhne ojo me whnùrnu nù rime a."

7 Ele risi ele Ju kwusi rikne, "A nwernu iwu, iwu aì kwuru nù o kwesiri ẹnwu kwnornu nù ọ kanù nù ọ bú Nnwo Chiokike."

8 Nga Paìleti nùrnu ka, ọ tụ ogwnu k'agìda.

9 Ọ lahna kwno n'òbna, ọ sịkwa Jizòsi, "Ndaa hne i hi va?" Kọvu Jizòsi sála a ọka ọbula.

10 Paìleti kanù a, "Ì zá naasa m ọka, ọ bú nù ì máa nù m nwernu m rikne ọ sigbasi ì mọbu ọ kpogidne i n'ogba?"

11 Jizòsi kaa, "Ì béenwene rikne megidne m ọ búru nù be nyéne i rikne hite n'oligwe,

nye kwuru m nyee n'aka i nwe mmehie ke kakwo.”

¹² Nga Païleti nurnu ka, ọ gbalị ọ sịgbasi Jizọsi. Kọvu ele risi ele Ju si ọlo, “Ọ buru nù ì sịgbasi a, ì búo enyi Siza. Nye ọbula ke neeme ẹhni a eze neemegidne Siza.”

¹³ Nga Païleti nurnu nhne ka, o kwuhala Jizọsi ederezi, daziri ẹli nù ngadna nù hne be jiri akaworugwu mee, be kwu n'ọnu Hiburu Gabata.

¹⁴ Nhne ka mernu n'iwnehnie, n'ọtnu-ige ke nri nù ẹbo* n'ọbochi ojiknenu Ọgawhe.

Païleti kanu be “Anu le eze anu.”

¹⁵ Be siwama, “Gwepu a, gwepu a, kpogidne a n'ogba.”

Païleti sika be, “Me kpogidne eze anu n'ogba?”

Ele risi ariohna saru a, “A nwée eze berere kwolem Siza.”

¹⁶ Païleti nyewhete be Jizọsi, ma be kpogidne a n'ogba.

Be kpogidnenu Jizọsi n'ogba (Mat 27:32-44; Mak 15:21-32; Luk 23:26-43)

Ele ogwnu kwuru Jizọsi.

¹⁷ Jizọsi vuru ogba a, ọ whoga zne hne be kwu Hne Okpokoro Risi (ke bu n'ọnu Hiburu Gologota.)

¹⁸ Be kpogidne a n'ogba pji, ya nù ele rukna lawuru berere, otu badnu n'akarikwnunga a, nye ke berere n'akarita a. Jizọsi ziri n'esilawuru be.

¹⁹ Païleti gbasiri nhne be jogwnu tukwasi a n'olu ogba a,

“Jizọsi, nye Nazareti, Eze ele Ju.”

²⁰ Agida ele Ju gwnurnu a, kwnornu nu hne be kpogidnenu Jizọsi n'ogba zila ikere nu rime eli-ohna. Be gbaru nhne ogwnugwnu wam n'ọnu Hiburu, Latini nu Giriki.

²¹ Ele risi ariohna ele Ju kanu Païleti, “I gbasị ‘Eze ele Ju,’ kọvu gbasị, ‘Nwerukna ka karu nu ọ bu eze ele Ju.’ ”

²² Païleti saru be, “Nhne me gbaru dazim kpa me gbaru a.”

²³ Nga ele ogwnu kpogidnenu Jizọsi n'ogba, be gweru kpakara iwo a kerri n'esilawuru be, keme be nga eno, be gweru a otu otu. Be chiru iwo olu a ke be dowala odowa be duru hi n'olu du n'eli.

²⁴ Be kaa, “A jodowa iwo ka, kọvu a joovu ogbanuchi ma a mahia nye jeenwe a.” Ka bu ma nhne be gbaru n'okwukwo nsọ mezu, ke kwuru,

“Be keriri kpakara iwo m n'esilawuru be,

be ji iwo m vu ogbanuchi.”

Ka bu nhne ele ogwnu wam mernu.

²⁵ Ele gwuzo ndundu nu hne ogba wam zi bu nne Jizọsi nu nwene rinya nne a, nu Meri nnwerne Kilopasi, nu Meri Magidalini.

²⁶ Nga Jizọsi whurnu nne a nu nye sno apna a wam ọ whurnu n'anya, ọ kanu nne a, “Nwerinya, le nnwo i.”

²⁷ Ọ kanu nye sno apna a wam, “Le nne i.” Hite n'ige

* 19:14 Otnu-ige ke nri nu ẹbo: okwukwo ke mbom kwuru ige awa ke isunu

wam, nye sno apna a wam kwuru a la n'oro a.

Enwu Jizosi

(*Mat 27:45-56; Mak 15:33-41; Luk 23:44-49*)

²⁸ Kpa Jizosi magwu nu be mezulem kpakara nhne, o mee ma nhne be gbaru n'okwukwo nsọ mezu, o kaa, "Akpiri nọokpo m bekwnu."

²⁹ Otu idudu manya gbaru oka zi pi, be rusi sponji nu rime a, knesi a nu nkala hisopu, gwelizọ nu mgbele-onu Jizosi.

³⁰ Kpa Jizosi nwornu manya wam, o kaa, "Okwolem." O piaya risi a nwuma.

Be duru Jizosi ara nu ikpurutu

³¹ Nhne ka mernu n'obochi ojiknernu, ke bu obochi ke sno Obochi Ozukwa Inwe. O masila ele risi ele Ju o sigbasi iznu be n'olu ogba n'Obochi Ozukwa Inwe kwnornu nu o bu okne obochi. Be rjasno Paleti ma be gbaji kpakara be ochi ma be vudna iznu be n'olu ogba.

³² Ele ogwnu wam zne gbaji ochi nye ke mbom nu nye ke berere ele be kpodgnernu be nu Jizosi n'ogba.

³³ Kovu nga be vaduru hne Jizosi zi, be whnurnu nu o nwunam, be gbajile ochi a.

³⁴ Otu nye ogwnu gweru ara du Jizosi nu ikpurutu, ngangam, onarna nu mini gbahia.

³⁵ Nye wam ke whnurnu nhne ka gbaru akebne, akebne a bu ezi oka. O

magwu nu o nookwu ezi oka ma anu kweru.

³⁶ Kpakara nhne ka mernu ma nhne be gbaru n'okwukwo nsọ mezu, "Be jaggbaji otu okpukpu a."

³⁷ Nhne be gbaru n'okwukwo nsọ ke berere kwuru, "Ele badnu jeele anya nye wam be duru ara."

Be liri Jizosi

(*Mat 27:57-61; Mak 15:42-47; Luk 23:50-56*)

³⁸ Omekwo, Josefu nye Arimatiya, zne rio Paleti ma o vuru iznu Jizosi. Josefu bu nye sno apna Jizosi nu mgwugwa, kwnornu nu o notu ogwnu ele Ju. Paleti kweru, o va vuru iznu a whoga.

³⁹ Nikodimosi nye znekwnusiri Jizosi n'abalj, snornu Josefu, o gweya mono nwernu eknarna oma be gwaru nhne be kwu maa nu alosi, zi agida.

⁴⁰ Ele rukna lawuru ka vuru iznu Jizosi, whu a n'ikpe marnu mma nu mono wam, kwnornu nu kpam bu kpa ele Ju neeme iznu si be li.

⁴¹ Otu ekwu zi ndundu hne be kpodgburu Jizosi, otu ilili be gwuru ikne zi nu rime ekwu wam, o za nye be liru nu rime a nu mbom.

⁴² Kwnornu nu o bu obochi ojiknernu Obochi Ozukwa Inwe ele Ju, ilili wam zi masi ndundu, be lite Jizosi nu rime a.

20

Ilili ke o za nye zi a

(*Mat 28:1-8; Mak 16:1-8;*

Luk 24:1-12)

1 N'ónu ọsisi n'ọbochi mbòm n'ikwezu, ọ gba kọriri ọchichiri, Meri Magidalini znernu ilili wam whnụ nụ be vumenem rugwu be jiri kpusni ọnu ilili wam.

2 Ọ gba ẹso znekwunusi Saịmoni Pita nụ nye sno apna a wam Jizọsi whnụrnun n'anya. Ọ kanụ be, “Be vumenem iznu Nyenwe aị n'ilili, a máa hne be bitaru a.”

3 Pita nụ nye sno apna a wam whọga, neezne n'ilili.

4 Be lawuru bete agba ẹso, kọvu nye sno apna a kiyari gbawhe Pita, beru Pita ọsno gbadu ilili.

5 O whudnahie ẹli whnụ ikpe marnụ mma wam, kọvu ọ bnáge nụ rime.

6 Saịmoni Pita va, bna nụ rime ilili. Ọ whnurnu ikpe marnụ mma wam dazị etekne,

7 n'ikpe be jiri whụ risi Jizọsi, ya nụ ikpe be piakotaru be n'otu ichne.

8 Nye sno apna a wam ke beru ọsno va, bna nụ rime ilili, ọ whnurnu, kweru masị.

9 (Be ghóyage nhne be gbarụ n'ọkwukwo nsọ, nụ o jeehi n'ẹnwu lizọ.)

10 Ele sno apna a wam lahna.

Jizọsi gesiri Meri Magidalini ẹhni a

(Mat 28:9,10; Mak 16:9-11)

11 Kọvu Meri gwuzoru n'ederezi ilili wam naakwna ẹkwna. Kpa ọ naakwa ẹkwna, o whudnahie le anya nụ rime ilili wam.

12 Ọ whnụ ele enine izi lawuru wogwu iwo abọchna dazị eli nụ hne iznu Jizọsi zị nụ mbòm, otu nụ risi a, otu n'ọchi a.

13 Be sịkwa a, “Nwerinya, kịni neeme i ẹkwna?”

Ọ kaa, “Be vumenem Nyenwe m, m máam hne be vubiri a.”

14 Nga o kwuru ka, ọ tughasna whnụ Jizọsi, kọvu ọ máa nụ ọ bụ Jizọsi.

15 Jizọsi sịkwa a, “Nwerinya, kịni neeme i ẹkwna? Ndaa nye i noopio?”

Meri che nụ ọ bụ nye ẹrnu ẹkwnu, ọ kaa, “Nda-aị-kwu, ọ bụru nụ ọ bụ jị vumernu a, kanụ hne i vubiri a, m jeezne vuru a.”

16 Jizọsi sukwu a, “Meri.”

Meri tughasna, kete a ruwhnu, siwama n'ónu Hiburu, “Raboni!” (ke bụ Nye-zni-nhne).

17 Jizọsi kanụ a, “Ị kpákwadia m aka, kwnornu nụ m yáalakwnuznege m Nda m. Kọvu znekwunusi rụmu nda m, kanụ be m naalakwnusi Nda m nụ Nda anụ, nụ Chiokike m nụ Chiokike anụ.”

18 Meri Magidalini zne kanụ ele sno apna a nụ ọ whnurnu Nyenwe aị, nụ ka bụ nhne ọ kanụ a.

Jizọsi gesiri ele sno apna a ẹhni a

(Mat 28:16-20; Mak 16:14-18; Luk 24:36-49)

19 N'ogbednachi, n'ọbochi mbòm wam n'ikwezu, ele sno apna a gbakọru n'otu ọro tughidne ẹhni be ọnuhna, kwnornu be nọtụ ogwunu

ele risi ele Ju. Jizòsi varu gwuzoru n'esilawuru be, kaa, "Udno zinu anu."

²⁰ Nga o kwuru ka, o gesi be aka a lawuru nu ikpurutu a. Mkpoma so ele sno apna a n'onu kpa be whuru Nyenwe a.

²¹ Jizòsi kaa kwno berere, "Udno zinu anu, lele kpa Nda m ziyaru m, o bu kpa me neezni anu."

²² Nga o kwuru ka, o nwesi be inwe, kaa, "Anu nahuru Enine Nso."

²³ O buru nu anu gbarunu ele badnu mmehie be, be jaagbarunu be mmehie be, kovu o buru nu anu jagbarunu be, be jagbarunu be."

Jizòsi nu Tomosi

²⁴ Otu nu nri nu badnu lawuru wam sno apna Jizòsi, nye rewhna a bu Tomosi, nye be kwu Didimosi nu be zila nga Jizòsi varu.

²⁵ Ele sno apna a ele berere kanu a, "A whuru Nyenwe a."

Tomosi kanu be, "Okwolem ma m whuru m anu ituru nu aka a lawuru, m yisi mkpaka aka m nu rime be, yisi aka m n'ikpurutu a, m jekweru."

²⁶ N'ikwezu a, ele sno apna Jizòsi gbakogwu kwno n'otu oro, tugidne ehni onuhna, Tomosi nu be zi masi. Be tusnirni oro, kovu Jizòsi varu gwuzoru n'esilawuru be, kaa, "Udno zinu anu."

²⁷ O kanu Tomosi, "Yisi aka i hna, le aka m lawuru, dnosnima aka i yisi

n'ikpurutu m, i nwema mkpoma lawuru, kweru."

²⁸ Tomosi saru a, "Nyenwe m nu Chiokike m."

²⁹ Jizòsi kanu a, "I kweruru kwnornu nu i whuru m, ngozi zinu ele whuge, kovu be kweru."

Risi okwukwo ka

³⁰ Jizòsi ruru agida eru ndu-ehni berere nu ruwhnu ele sno apna a ke be gbage n'okwukwo ka.

³¹ Kovu be gbaru ka ma anu kweru nu Jizòsi bu Karaisi wam, Nnwò Chiokike, ma hite n'okwnata mkpoma nu rewhna a, anu jeenwe budnu.

21

Jizòsi gesiri ele sno apna a esau ehni a

¹ Omekwo, Jizòsi gesiri ele sno apna a ehni a n'apna berere, nu ngeri Osimini Taberasi.

² Saimoni Pita, Tomosi nye be kwu Didimosi, nu Nataneli nye Kana ke Galili, nu rumu rukna Zebidi, nu ele sno apna a lawuru berere zi.

³ Saimoni Pita kaa, "M neezne o gbu aznu."

Be kanu a, "A joosno i zne." Kpakara be zne bna n'otu ogbo, kovu o za nhne be gburu kpakara abali wam.

⁴ N'onu osisi, Jizòsi gwuzoru n'onu mini, kovu ele sno apna a ma nu o bu Jizòsi.

⁵ O sikwa be, "Rumu takiri, o zi aznu anu gbuharu?"

Be sa a, "Oza."

⁶ Jizòsi kanu be, "Anu wusi igbo anu n'akarikwnunga

ogbo, anụ jọowhnu aznụ.” Be wụsi igbo be, be nwée rikne dọli igbo wam kwnornu nụ be gburu agida aznụ.

⁷ Nye sno apna wam Jizọsi whnurnu n'anya kanụ Pita, “Ọ bụ Nyenwe aị.” Kpa Saịmoni Pita nurnu nụ ọ bụ Nyenwe aị, ọ jeru ikpe a (kwnornu nụ ọ gba ẹto) dnabna mini.

⁸ Ele sno apna a ele berere kwọru ogbo, dọru igbo wam aznụ jiri va mkpomkpo ẹli. Be zá ikere nụ mkpomkpo ẹli, nhne hne lele riwhu rula ẹto.

⁹ Nga be duru mkpomkpo ẹli, be whnurnu esekere bekwnu nụ aznụ nụ zị n'olu a nụ brẹdi zị pịi.

¹⁰ Jizọsi kanụ be, “Anụ gweya agwna aznụ anụ gburu.”

¹¹ Saịmoni Pita zne dọru igbo wam nụ mkpomkpo ẹli, aznụ okpotokpo jiri a, otu riwhu nụ nri isne nụ ẹto, Igbo wam dọkala, ọ bụ n'ezị nụ aznụ zị agida.

¹² Jizọsi kanụ be, “Anụ va ri wiri.” Ọ zá nye sno apna a ke nwernu rikne ọ nyipohia sịkwa a, “Ị bụ nyele?” Be magwụ nụ ọ bụ Nyenwe aị.

¹³ Jizọsi gweru brẹdi wam nyee be, ya nụ aznụ.

¹⁴ Ka mernu mgba ẹto Jizọsi gesiri ele sno apna a ẹhni a kpa o hi n'ẹnwu lizo.

Jizọsi nụ Pita

¹⁵ Nga be rikworu wiri, Jizọsi kanụ Saịmoni Pita, “Saịmoni nnwọ Jọni, ị whnurnu m n'anya kakwo nhne ele ka?”

Ọ sa a, “Owe, Nyenwe aị, ị magwụ nụ m whnurnu m ị n'anya.”

Jizọsi kanụ a, “Nyee atnurnu m wiri.”

¹⁶ Jizọsi kanụ a ke mgba lawuru, “Saịmoni, nnwọ Jọni, ị whnurnu m n'anya n'ezị ọka?”

Ọ sa a, “Owe, Nyenwe aị, ị magwụ nụ m whnurnu m ị n'anya.”

Jizọsi kanụ a, “Nọoznu atnurnu m.”

¹⁷ Jizọsi kanụ a ke mgba ẹto, “Saịmoni, nnwọ Jọni, ị whnurnu m n'anya?”

Ọ gbu Pita igbugbu nụ Jizọsi kannụ ke mgba ẹto, “Ị whnurnu m n'anya?” Ọ kaa, Nyenwe aị, ị magwụ kpakara nhne, ị magwụ nụ m whnurnu m ị n'anya.

Jizọsi kanụ a, “Nyee atnurnu m wiri.

¹⁸ Me kanụ ị ezi ọka, nga ị bụ wikoro, ị nọosnu ajnị n'ikwnu i zne hne ọbula ọ masiri ị. Kọvu, nga i jeeme okno badnụ, i jodosni aka ị, nye berere snụsi ị ajnị, kwuru i zne hne másịla ị.”

¹⁹ Jizọsi kwuru ka ma o gesi kpa Pita jọonwu ẹnwu, ma o nyee Chiokike igwugwu. Jizọsi kanụ a, “Sno m.”

Jizọsi nụ nye sno apna a ke berere

²⁰ Pita tuhnasa whnụ nye sno apna a wam, nye Jizọsi whnurnu n'anya, nye dnabnenu Jizọsi nga be neeri wiri anyasnu wam, sịkwa a, “Nyenwe aị, nyele jeere i?”

²¹ Nga Pita whnurnu a, ọ kanụ Jizọsi, “Nyenwe aị,

ndaa nhne i kwuru gbasiri nwerukna ka?”

²² Jizosi saru a, “O buru nu m pioru m o ziri budnu tem m va, o gbasiila i, sno m.”

²³ Be tnusa a n'esilawuru ele sno apna Jizosi nu nye sno apna a ka jonwu enwu. Kovu Jizosi kala nu o jonwu enwu, kovu o karu, “O buru nu m pioru m o ziri budnu tem m va, o gbasiila i.”

²⁴ Ya bu nye sno apna a ke kwuru kpakara nhne ka, nye gba masiri a n'okwukwo, a magwu nu nhne o gbaru bu ezi oka.

Okwukwo

²⁵ Agida nhne ele berere ke Jizosi mernu, o buru nu be gba kpakara be n'okwukwo, m che m nu kpakara owa n'iwuru a jéenwe rikne vuli kpakara okwukwo be jaagba.

Ernu Ele Izi Nhne gbasiri okwukwo ka

Ernu Ele Izi sno izi oma lele kpa Lukwu gbarụ n'okwukwo n'aznụ. Risi oka a bu o gesi kpa ele sno apna Jizosi panizoru ernalu izi oma be. Enine Nso duru be gbasia Izi Oma gbasiri Jizosi hite nu Jeruselem, nu kpakara Judiya nu Sameria, tem du n'osotoma owa (1:8). Nye gbarụ okwukwo ka mernu ma ele n'ogwunu a mahia nu ele Chiokike (Kirisiteni) buo otu ele n'odo ochichi ke neemegidne ochichi ele Rom.

Be kewarụ okwukwo ka nga eto, ke neegesi kpa be kpuru okwo Izi Oma gbasiri Jizosi nu opanizo ogbako Chiokike. (1) Opanizo otu ele Chiokike nu Jeruselem nga Jizosi lah-narnu oligwe. (2) Ogbasa izi oma nu kpakara eli Palositini. (3) Ogbasa izi oma du kpakara owa, du Rom.

Otu nhne zi okne mkpa nu Ernu Ele Izi bu ernalu Enine Nso, nye nyernu be rikne n'obochi Pentikosi, nye zi koriri naagba ogbako Chiokike inwe nu ele risi a. Okwukwo Ernu Ele Izi neegesi iknernema ikwu-onu Chiokike nu budnu ele kweru nu omekorita ele ogbako Chiokike.

Nhne zi n'okwukwo ka

Ojiknernu o gba akebbe (1:1-26)

Nhne Jizosi nyernu n'iwu ipne-aznu nu mkwna

(1:1-14)

Nye gweruru onodi Judasi (1:15-26)

Akebbe be gbaru nu Jeruselem (2:1--8:3)

Akebbe nu rime Judiya nu Sameria (8:4--12:25)

Ernu Polu (13:1--28:31)

Ogaghari neezni izi oma ke mbom (13:1--14:28)

Ogbo ke zi nu Jeruselem (15:1-35)

Ogaghari neezni izi oma ke ebo (15:36--18:22)

Ogaghari neezni izi oma ke eto (18:23--21:16)

Polu nye ikelu nu Jeruselem, Sizeria nu Rom (21:17--28:31)

Jizosi kweru mkwna

Enine Nso

¹ Tiofilosi, n'okwukwo mbom ke me gbaru, m gbaru m kpakara nhne Jizosi mernu nu nhne o znirni hite n'ige o panizoru ernalu a,

² tem du n'obochi be gweruru a la n'oligwe. Si o laru oligwe, o nyernu ele rukna wam o hohiaru iwu hite nu rikne ke Enine Nso.

³ Nga o takworu awnwhnu, o gesiri ele izi wam o hohiaru ehni a, nyee be agida nhne mesiri a rikne nu o zi budnu. Be whnurnu a, ya nu be kwu oka gbasiri eli-eze Chiokike nri obochi eno.

⁴ Nga be gbakoru n'otu, o nyernu be iwu ka, "Anu hiko nu Jeruselem whoga, kovu anu seru nkesi ke Nda m kweru mkwna, ke anu nurnu nhne me kwuru gbasiri a.

⁵ Joni jiri mini wu ele badnu mini, kovu be jeeji Enine Nso

nḡowu anḡ mini nga ọbochi ele nḡ ele whemernu.”

Jizōsi larḡ oligwe

(Mak 16:19-20; Luk 24:50-53)

6 Nga ele izi wam gbakḡru n'otu, be sḡkwa Jizōsi, “Nyenwe aḡ, i jeegweru ọchichi ka nyehnata ele Izirḡli kḡtna?”

7 Jizōsi kanḡ be, “Nda m ji iknernema a bḡta ige nḡ ọbochi, o kwḡsige anḡ mahḡa a.

8 Kḡvu nḡ anḡ jaanahḡa rikne nga Enine Nsḡ wam dnakwasḡri anḡ, anḡ jḡobu ele akebne m nḡ rime Jeruseḡem, ma nḡ kpakara Judiya, nḡ Sameria nḡ hne ọwa sḡtoru.”

9 Nga o kwukworu ọka ka, kpa be neele a anya, be gwelizḡ a la n'oligwe, erumeru gweme a n'anya be.

10 Kpa be zḡ neelegidne anya n'oligwe kpa ọ naala, ele rukna lawḡru wogwu iwo abḡchna gwuzoru n'esilawḡru be.

11 Be kaa, “Ele rukna Galili, ndaa kpa anḡ gwuzo neele anya n'oligwe? Jizōsi ka, nye be gweruru la oligwe, jaava berere lele kpa anḡ whnḡrnu a la oligwe.”

Matayasḡ gweruru

ḡnodi Judasḡ

12 Ele izi wam lahna Jeruseḡem hite nḡ Rugwu Olivu, nhne nḡ lele izne otu Ọbochi Ozukwa Inwe.

13 Be zne Jeruseḡem, bna nḡ rime ọro olu hne be wu. Pita, Jḡni, Jemisi, nḡ Anduru, Filipu nḡ Tḡmosi, Batolomi nḡ Matiyu, Jemisi

nnwḡ Alḡfayosi, Saḡmoni nye zḡ n'esilawḡru ele noonwu bḡkwnu nḡ mkpḡma nḡ Judasḡ nnwḡ Jemisi.

14 Kpakara be zḡ n'otu neekpe okpukpe ige ọbula, be nḡ ele rinya wam nḡ Meri nne Jizōsi nḡ rḡmu nne a.

15 N'ọbochi wam, Pita gwuzoru n'esilawḡru ele sno apna Jizōsi, be bḡ otu riwhu nḡ nri lawḡru.

16 Ọ kaa, “Rḡmu nda m, nhne be gbarḡ n'ḡkwukwo nsḡ ke Enine Nsḡ kwuru hite n'ḡnu Devidi gbasḡri Judasḡ nye duru ele nwḡgwuru Jizōsi, jeemezu.

17 Judasḡ bḡ otu badnḡ nḡ rime aḡ, be hḡhiaru a ma o kehḡa igwe n'ḡrnu aḡ.”

18 (Judasḡ bḡ nye ji ḡwai be kwḡru a n'ḡrnu arḡru-ḡli a zḡ otu ḡli, ọ dna, kpu ruwhnu n'ḡli, kpakara nhne zḡ a nḡ ruwhḡ wuhia.

19 Kpakara ele wu nḡ Jeruseḡem nḡrnu a, be kwu ḡli wam n'ikwu-ḡnu be, Akḡlidama, ke bḡ Eḡli Ọvnarna.)

20 “Kwnornu nḡ be gbarḡ n'ḡkwukwo Eri Ọma, ‘Ọro a dazḡri etekne,

ḡ zḡ nye wu nḡ rime a.’

Be gba kwno a nḡ nhne berere,

‘Nye berere gweru ḡnodi ḡrnu a.’

21 Kḡtna, ọ zḡ mkpa a hḡru otu nyerukna n'esilawḡru ele sno aḡ n'ige Nyenwe aḡ Jizōsi snornu aḡ whḡga, bnanya masḡ n'esilawḡru aḡ,

22 hite n'ḡwu mini Jḡni dḡ nga Jizōsi larḡ n'oligwe. Nye wam jḡoburu nye joosno aḡ gba

akebne nū Jizōsi hiri n'ēnwu lizō.”

²³ Be hōhia ele rukna lawūru, Josefū nye be kwu Basabasī nye rēwhna a berere bu Jōsitosi nū Matayasi.

²⁴ Be kpe okpukpe kaa, “Nyenwe aī, jī nye magwū mkpōma kpakara ele badnū, bikno, Nyenwe aī, gesi aī nye ī hōhiaru n'esilawūru ele rukna lawūru ka,

²⁵ nye jeegweru ọnodi ernalu nye izi ke Judasi ghasarū zne hne o kwesiri.”

²⁶ Be vu ọgbanuchi, ọgbanuchi wam dnakwasī Matayasi, be gwnūsi a n'esilawūru ele izi nri nū otu wam.

2

*Enine Nso varu
n'ọbochi Pēntikosi*

¹ Nga ọbochi Pēntikosi zuru, kpakara be gbakōru n'otu ọro.

² Ngangam, imerne ke nū lele okne ruwhere hiri n'oligwe va, jipiya kpakara ọro wam be zī.

³ Be whnūru nhne nū lele riro bēkwnu ke daziri n'olu risi be otu otu.

⁴ Enine Nso mejihāru be, be bete nookwu ọka nū riro ele berere lele kpa Enine Nso wam nyernu be iknernema o kwu ọka.

⁵ Agwna ele Ju ele ọotu ogwnu Chiokike wu nū Jeruselem, ele hi nū kpakara mba ke zī nū mkpururu oligwe va.

⁶ Nga be nūru mkpakpo ka, be gbakō, ọ tūru be n'anya

kwnornu nū be nūru kpa ele sno apna Jizōsi nookwu ọka nye ọbula nū ikwu-ọnu ke a.

⁷ Ehnī nwūru be, be kaa, “Kpakara ele ka nookwu ọka, be būo ele Galili sa?

⁸ Ndaa kpa a ọonu be nookwu ọka n'ikwu-ọnu be jiri mū aī?

⁹ Ele Patia, nū Midia, ele Elam, ele hi nū Mesopotemia, Judiya nū Kapadosia, nū ele hi nū Pōntosi nū Asia,

¹⁰ ele hi nū Firigia nū Pamfilia, ele hi nū Ijipiti nū ele hi agwna ẹli Libiya ke zī Sirini ndūdu, nū agwna ele hi nū Rom,

¹¹ ma ele Ju ma ele bnarnū okpukpe ele Ju, ele Kiriti nū ele Arabu, a nūru kpa be nookwu ọka n'ikwu-ọnu aī gbasiri ernalu ndu-ehni Chiokike.”

¹² Ọ gbagwojiri be anya, kpakara be nēsikwa, “Ka bu kīni?”

¹³ Kōvu ele berere mernu be nhne mkpari, be kaa, “Manya noogbu ele ka.”

*Pita kwunnu igbudu badnū
ọka*

¹⁴ Pita gwuzoru ya nū nri badnū nū otu wam bete nookwunū ele badnū wam ọka n'okne nkōli, kaa,

“Ele Ju ibne m nū kpakara anū ele wu nū Jeruselem, anū bnote nsnī nū nhne me nookwu gbasiri nhne anū whnūru.

¹⁵ Ọ zá manya noogbu ele rukna ka lele kpa anū cheru, ọ bū ọtnu-ige tolu ke ọsisi.*

* 2:15 ọtnu-ige tolu ke ọsisi: ọkwukwo ke mbom kwuru ige awa ke eto

16 Kọvu ka bụ nhne nye
 ọwhnurninya Juweli kwuru
 ọka gbasiri a,

17 Chiokike karu kpa,
 'Ka bụ nhne me jeeme
 n'ọbochi ipne-aznu,
 m jọowukwasi Enine m
 n'ehni kpakara ele
 badnu,

rumu anu ele rukna nu ele
 rinya jọokpo okwo
 ikwu-onu Chiokike,
 rumu ikoro anu jọowhnu
 ọwhnurninya,
 ele okno badnu anu jọoro
 mboro.

18 M jọowukwasi ele izi m
 rukna nu rinya Enine
 m n'ọbochi wam,
 be jọowhnu ọwhnurninya.

19 M jeegesi ernalu ndu-ehni
 n'oligwe
 nu nhne elekema n'owa
 nu mkpururu oligwe,
 ọvnarna nu bekwnu nu
 okne runwurnu bekwnu.

20 Ehnam jaagba ọchichiri,
 ernalu jaachna ihie ihie
 lele ọvnarna,
 ka jeeme si okne ọbochi
 ke zi igwugwu ke
 Nyenwe ai va.

21 Be jọoznohia nye ọbula
 ke noosukwu rewhna
 Nyenwe ai.'

22 "Ele Izireli, anu bnote
 nsni n'oka ka, Chiokike jiri
 kpakara ernalu ndu-ehni nu
 nhne tu n'anya nu elekema
 ka n'esilawuru anu gesi nu
 ya ziyaru Jizosi nye Nazareti.
 Kpakara anu magwu kpam.

23 Chiokike marnu ama
 kweru be gweru a nyega anu,
 anu gweru a nyee n'aka ele

máa Chiokike, be kpojidne a
 n'ogba, gbu a.

24 Kọvu nu Chiokike mernu
 o hi n'ernalu lizo, gweme nhne
 igbugbu ke ernalu kwnornu nu
 ernalu nwée rikne nwugwu a.

25 Ka bụ nhne Devidi
 kwuru gbasiri a,
 'M whnurnu m Nyenwe ai
 nu ruwhnu m kpakara
 ige.

Ọ zi n'akarikwnunga m,
 ovu jáala m mini.

26 Ka kpararu ovu soro
 m n'ernalu, riro m
 nwudnarnu k'agida,
 anọ-ehni m jaazi budnu
 n'olile anya.

27 Kwnornu nu i jeesigbasi
 mkpuru ovu m n'ilili,
 i jeeke nye nsọ ke i ro
 oro.

28 I gesiri m apna ke budnu,
 ruwhnu i mernu
 snarnima jihia mkpoma
 m.'

29 "Rumu nda m, m nook-
 wunu anu oka n'anya rikne
 nhne gbasiri nda ai oknani bu
 Devidi, ọ whnurnu ernalu, be li a,
 ilili a zi hna du tna.

30 Ọ bu nye ọwhnurninya, ọ
 magwu nu Chiokike kwesiri a
 mkwna rikne nu ọ jeeme otu
 nye hi nu avnurnu a daziri nu
 ngadna eze a.

31 Ọ whnurnu nu hne zi nu
 ruwhnu, o kwu oka gbasiri
 olizo n'ernalu Karaisi, Chiokike
 jeesigbasi a n'ilili, anọ-ehni a
 joro oro.

32 Chiokike mernu Jizosi ka
 hi n'ernalu lizo. A bu ele
 akebne ezi oka ka.

33 Be gwelizoru a olu
 n'akarikwnunga Chiokike,

o nahjaru n'aka Nda a mkwna ke Enine Nso bu ke o wukwasiri aj, ke anu whnurnu, nurnu masi.

³⁴ Devidi lage olu nu rime oligwe, kovu o kwuru,

'Nyenwe aj kannu Nyenwe m,

Daziri eli n'akarikwnungam,

³⁵ tem du nga me jaabita ele irno i

lele nhne ijootukwasi ochi i lawuru.'

³⁶ "Kam kpayaru, kpakara ele Izireli, anu mahia n'ezi oka nu o bu Jizosi ka, nye anu kpoigidnenu n'ogba bu nye Chiokike mernu Nyenwe aj nu Karaisi."

³⁷ Nga be nurnu ka, o gburu be igbugbu k'agida nu mkpoma, be kanu Pita nu ele izi berere, "Rumu nda aj, kini bu nhne a jeeme?"

³⁸ Pita kanu be, "Nye obula hi nu mmehie a tuhmasna, ma be wu anu mini nu rewhna Jizosi Karaisi, ma Chiokike gbarunu anu mmehie anu. Ige wam anu jeenwehia nkesi Chiokike ke bu Enine Nso.

³⁹ Kwnornu nu mkwna Chiokike ka zinu anu, nu rumu anu, nu kpakara ele zi ikere, ele Nyenwe aj Chiokike joosukwu."

⁴⁰ Pita ji agida ikwu-onu berere do be aka nu nsni, kaa, "Anu gweme ehni anu awhnuwhnu ke ebiri ojo ka."

⁴¹ Be wuru ele kweru izi oma ka mini. Be tukwasinu be pokwu badnu eto n'otu obochi.

*Mmekota ke
ele kweru ekwe*

⁴² Be dazigidne nu iznizni ele izi, snornu be mekota nhne, ri wiri nu neekpe okpukpe.

⁴³ Ele izi wam nurnu agida ernu ndu-ehni nu elekema ke mernu ogwnu tu ele badnu.

⁴⁴ Kpakara ele kweru ekwe dazikota n'otu, neekeri nhne n'otu.

⁴⁵ Be re ekwu be nu ekwnu be nwernu, keme iwai n'esilawuru be lele kpa mkpa kparu nye obula.

⁴⁶ Be dazigidne n'otu n'Oro Nso Chiokike kpakara obochi. Be neezne n'oro nu oro, gweru mkpoma zi richna neeri wiri n'otu nu ovu oso n'onu.

⁴⁷ Be naazarni Chiokike, neenwe ruwhnu oma nu hne ele badnu zi. Nyenwe aj nootukwasinu be ele badnu n'obochi n'obochi ele be joznohia.

3

Pita gworu nye mgworo

¹ Otu obochi, Pita nu Joni znernu Oro Nso Chiokike n'otnu-ige ke eto n'iwhnehnne,* ke bu ige okpukpe.

² Otu nyerukna ke dnarnu mgworo hite nga be murnu a, ele badnu nookwuru a zne n'Ogodo Onuhna Marnu Mma ke Oro Nso Chiokike kpakara obochi, ma o rio nhne n'aka ele naabna Oro Nso Chiokike.

³ Nga o whnurnu Pita nu Joni hne be naabna Oro Nso Chiokike, o rio be nhne.

* **3:1** otnu-ige ke eto n'iwhnehnne: okwukwo ke mbom kwuru ige awa ke tolu

4 Pita nū Jōni legidne a anya, Pita kaa, “Le aī anya.”

5 Nyerukna wam legidne be anya ma o jaanahia nhne n'aka be.

6 Pita kaa, “M nwée m siliva mōbu golu, kōvu m jeenye i nhne me nwernu, nū rēwhna Jizōsi Karaīsi nye Nazareti, lizo, zne izne.”

7 O nwūgwuru a n'akarikwununga¹⁶ a, dōlizo a olu, ngangam, ochi nyerukna wam nū ekenkele- ochi a lawūru nwehīa rikne.

8 O wūlizo olu, gwuzoru, bete neezne izne. O snornu be bna n'Oro Nsō Chiokike, neezne izne, nōowulizo olu, naaznarnī Chiokike.

9 Kpakara igbudu ele badnū wam whnūrnū a hne o neezne izne, naaznarnī Chiokike.

10 Be mahīa nū o bū nye orio wam naadazī n'Ogodo Onuhna Marnū Mma. O duru be ēhni, tū be n'anya k'agīda nū nhne mernu.

*Pita znirni izi oma
n'Oro Nsō Chiokike*

11 Kpa nye mgwōro wam nwūgwuru Pita nū Jōni n'aka, ogwnu tūru kpakara ele badnū wam, be gbakō nū mgbemgbe oro Solomōni.

12 Nga Pita whnūrnū be, o kanū be, “Ele Izireli, ndaa kpa nhne ka noodu anū ēhni, anū neele aī anya lele nū a ji rikne aka aī mōbu ozi nsō aī mee nyerukna ka zne izne.

13 Chiokike ke Ebereham, nū ke Aziki, nū ke Jekōpu, Chiokike ke ele nda aī oknani, nyernu Nnwō a Jizōsi igwugwu. Ya bū nye anū reru,

anū gōnahoru a nū ruwhnu Paīleti, o bū n'ezi nū Paīleti kweru o sigbasi a.

14 Anū gōnahoru nye nsō nū nye mee mma, gweru nye noogbu badnū.

15 Anū gburu nye nwe budnu. Kōvu Chiokike mernu o hi n'ēnwu lizo, a bū ele akebne a.

16 Anū le nwerukna ka anū magwū, o bū okwunata ovu nū rēwhna Jizōsi nyernu a rikne. O bū rēwhna Jizōsi nū okwunata ovu nū rēwhna a nyernu nwerukna ka oḡwugwo zuru ozu, kpa anū whnūrnū.

17 “Kītna, rūmu nda m, m maam nū nhne anū nū ele risi anū mernu Jizōsi bū nū anū maa ama.

18 Kōvu nū Chiokike hiri n'ōnu kpakara ele owhnurninya agīda ige wheru ewhe kwu nū Karaīsi jaata awhnūwhnu, o mezuru nhne o kwuru.

19 Anū tūhnasna, kete ruwhnu hne Chiokike zī, ma o kwnosnama kpakara mmehie anū,

20 ma anū nwehīa rikne ikne hite nū ruwhnu Chiokike, ma o ziyanu anū Jizōsi bū Karaīsi nye o hōhiannu anū.

21 O jaadazī n'oligwe tem ige Chiokike jeeme kpakara nhne zīri ikne, lele kpa o kweru mkwna agīda ige wheru ewhe hite n'ōnu ele owhnurninya a zī nsō.

22 Kwnornu nū Mozizi karū, 'Nyenwe aī Chiokike anū jeeziyanu anū nye owhnurninya lele me, hite nū ele ke anū, anū joobno nsnī

nụ kpakara nhne ọ jaakanụ anụ.

²³ Nye ọbula ke jọobno nsni nụ nhne nye ọwhnurninya wam kwuru, be jeekewahala a n'esilawuru ele ke Chiokike.'

²⁴ "N'ezi ọka, kpakara ele ọwhnurninya hite nụ Sameli nụ ele sno a n'aznụ kwuru nhne gbasiri ọbochi ele ka.

²⁵ Kpakara mkwna Chiokike hite n'ọnu ele ọwhnurninya a zinu anụ, anụ nwernu igwe nụ ọgba-njọ-ẹhni Chiokike gbarụ ya nụ ele nda anụ, lele kpa ọ kannụ Ebereham, 'M jọgozi kpakara ele zị n'owa hite avnurnu i.'

²⁶ Nga Chiokike gwelizọru Nnwọ a Jizọsi, o beru ọsno zianu anụ ya, ma ọ gọzi anụ, ma anụ hi nụ rime apna ojo anụ yahna."

4

Pita nụ Jọni zị nụ ruwhnu ele eze-ikpe

¹ Kpa Pita nụ Jọni zị nookwunu ele badnụ ọka n'Oro Nsọ Chiokike, ele ariohna nụ nye risi ele neese Oro Nsọ Chiokike nụ ele Sadusi vakwnusiri be.

² Ovu weru be ẹhni nụ ele izi lawuru wam neezni ele badnụ nụ Jizọsi hiri n'ẹnwu lizọ, ke neegesi nụ ele nwurnu ọnwu jeehi n'ẹnwu lizọ berere.

³ Be nwudne be, yisi be ikelu tem chi bọ, kwnornu nụ ọbochi zneminem.

⁴ Kọvu agida ele nurnu izi ọma be kwerruru, ọnu

ogwnugwnu be bụ pokwu badnụ isne.

⁵ N'ekile a, ele risi ele Ju nụ ele okno badnụ nụ ele zni iwu ele Ju gbakọru nụ Jeruselem,

⁶ be nụ nye risi ariohna Anasi, nụ Kayafasi, nụ Jọni nụ Alekizanda, nụ ele ọro nye risi ariohna.

⁷ Be kwuya Pita nụ Jọni gwuzote be nụ ruwhnu be, be sika be, "Ndaa rikne mọbu rẹwhna nyele hne anụ jiri neeme nhne ka?"

⁸ Enine Nsọ jipiharu nụ rime Pita, ọ kaa, "Ele risi nụ ele okno badnụ Izireli,

⁹ anụ nẹsikwa aị ajji tna kwnornu nụ nhne ọma ke be mennu nye mgworo ka nụ kpa be jiri gwọ a.

¹⁰ Kpakara anụ ma kpakara ele Izireli mahia, nụ nyerukna ka gwuzo hna nụ ruwhnu anụ n'ẹhni zuru ozu, bụ nye be gworo hite nụ rikne ke zị nụ rẹwhna Jizọsi Karaisi nye Nazareti. Anụ kpogidnernu a n'ogba, kovu Chiokike mernu o hi n'ẹnwu lizọ.

¹¹ Ya bụ 'akaworugwu ke anụ ele noowu ọro juru, kiyam gholam risi nsukala ọro.'

¹² "Ọznohia zị nụ rẹwhna a kpọi. Kwnornu nụ ọ zá rẹwhna berere nụ mkpururu oligwe be nyernu ke badnụ jeenwe ọznohia."

¹³ Ọnu rikne Pita nụ Jọni duru ele risi ikpe ẹhni. Be mahiaru nụ be bụ ele ọ zá nhne be bụ, ele múge

okwukwo. Be mahjaru kwno nū be nū Jizōsi zīri.

14 O zá nhne be nwernu rikne kwu kwnornu nū be whnurnu nyerukna wam be gwōru gwuzo nū ngeri Pita nū Jōni.

15 Be kanū be whōga n'oro ikpe, be gba iznuznu n'esilawuru be.

16 Be kaa, “Ndaa nhne a jeeme ele rukna ka. Kpakara ele wu nū Jeruselem magwu nū be rnurnu okne ernalu ndu-ehni ka, a nwée rikne gōnahoru a.

17 Kōvu a jéekwe be gbasa otnutnu ka n'esilawuru ele badnū, a dō be aka nū nsni be kwú oka berere nū rēwhna Jizōsi.”

18 Be sukwu ele rukna wam, kanū be, be kwúma oka rīa rīa mōbu zni nhne nū rēwhna Jizōsi.

19 Kōvu Pita nū Jōni sarū be, “Anū tule a ma o būru oma nū anya Chiokike, a bnonu anū nsni sōbu a bnonu Chiokike nsni.”

20 Kwnornu nū a nwée rikne gharū o kwu nhne a whnurnu nū nhne a nurnu.”

21 Ele ikpe wam dōsi be aka nū nsni rikne, sigbasi be la. Be nwée nhne be jeeji ta be awnūwhnu kwnornu nū ele badnū naaznarni Chiokike nū nhne mernu.

22 Nyerukna be gwōru ernalu ndu-ehni ka wheru nri awha eno.

Ele Karaṣi kperu okpukpe

23 Nga be sigbasiri be, Pita nū Jōni lakwnusi ele ke be,

kanū be nhne ele risi ariohna nū ele okno badnū kwuru.

24 Nga be nurnu a, be yisi onu n'otu kwnakwu Chiokike n'okpukpe, kaa, “Nyenwe ai Chiokike, nye keru oligwe nū owa, nū okne osimini, nū kpakara nhne zi nū rime be.

25 I jiri Enine Nso kwu oka hite n'onu ohi i Devidi, nda ai oknani, kaa,

‘Kini vuteru ele buo ele Ju onuma
kini mernu ele badnū
naagba iznuznu
etekne?’

26 Ele eze k'owa ka gwuzoru be nū ele nechi echi, gba iznuznu

megidne Nyenwe ai
megidne nye ke a o teru mōno.*

27 N'ezi oka, Erodu nū Pontios Paṣleti gbakoru n'otu n'eli ka, be nū ele buo ele Ju nū ele Izireli, megidne Nnwō nsō i Jizōsi, nye i teru mōno.

28 Be gbakoru ma be mee nhne i jiri rikne i nū echiche i kaa nū o bū nhne be jeeme.

29 Nyenwe ai, bikno, le be naakpasī ai ogwnu, nyega ai ele izi i, onu rikne a jeeji zni izi oma i.

30 Dōsnihala aka i nū ogwo ehni igbugbu nū onu elekema nū ernalu ndu-ehni hite nū rēwhna ohi i zi nsō Jizōsi.”

31 Nga be kperu okpukpe, hne be zi neekpe okpukpe znurnu biri biri. Enine Nso dnakwasī kpakara be, be bete nookwu ikwu-onu Chiokike n'onu rikne.

* 4:26 nye ke a o teru mōno: Ke bū Mezaya, Karaṣi.

*Ele kweru neekeri
kpakara nhne n'otu*

³² Kpakara ele kweru ekwe bu otu nu echiche be ma nu mkpoma be. O za nye kanu nhne o nwernu bu ke a, kovu be neekeri kpakara nhne be nwernu.

³³ Ele izi wam ji onu rikne naagba akebe olizo n'enwu Nyenwe a Jizosi. Chiokike tukwasinu be agida oru.

³⁴ O za nye obula n'esilawuru be nhne kogwu. Ele nwernu eli mabu oro re be, gweya iwai be reru a,

³⁵ be nyee a ele izi, ele izi keme iwai wam lele kpa mkpa kparu nye obula.

³⁶ Josefu, nye Livai be muru nu Saiporosi, nye ele izi jiri Banabasi, ke bu "Nnwosnuta mkpoma,"

³⁷ o re eli o nwernu, gweya iwai a bita a n'ochi ele izi.

5

Ananayasi nu Safira

¹ Kovu otu nyerukna rewhna a bu Ananayasi, ya nu nnwerne a Safira, reru ekwu be.

² Ya nu nnwerne a kwekotaru o bita agwna iwai, o gweya ke gwnarnu bita n'ochi ele izi.

³ Pita kanu a, "Ananayasi, ndaa kpa Ekwensu jiharu mkpoma i, mee i i ghanu Enine Nso aghalaghala, i bitaru agwna iwai i reru ekwu.

⁴ Jiwa nwe ekwu su i reru a. Nga i reru a, iwai wam zi n'aka i o mee kpa o jiri masi i. Ndaa kpa i jiri ri oriri o mee nhne nu kpa? I ghanu

Chiokike aghalaghala, o buo badnu."

⁵ Nga Ananayasi nurnu oka ka, o dna n'eli, nwuma. Ogwnu turu kpakara ele nurnu nhne mernu.

⁶ Rumu ikoro ele rukna va whu a n'ikpe, vuru iznu a zne, lite a.

⁷ Nga nhne nu lele awa eto wheru, nnwerne a varu, kovu o ma nhne mernu.

⁸ Pita sikwa a, "Kanu m, ka o bu onu iwai anu reru eli wam?"

O kaa, "Owe, o bu onu ahia a."

⁹ Pita kanu a, "Kini mernu ji nu nzi i kwekotaru o rna Enine Chiokike onurna? Ele rukna ele liri nzi i gwuzo n'onu-mgbo kitna, be joovuru i zne."

¹⁰ Ngangam, o dna n'eli n'ochi a, nwuma. Be vuru a whoga, lite a nu ngeri nzi a.

¹¹ Kpakara ogbako Chiokike nu ele berere ke nurnu a turu ogwnu k'agida.

*Ele izi wam gworu
ele nriria*

¹² Ele izi nurnu agida ernu ndu-ehni nu ernu elekema n'esilawuru ele badnu. Kpakara ele kweru naagbako nu mgbemgbe oro Solomoni.

¹³ O za nye berere nwernu rikne sno be, o bu n'ezi nu ele badnu naakaa be oka oma.

¹⁴ Kovu agida ele badnu snornu ele kweru ekwe, ele rukna nu ele rinya.

¹⁵ Ka mernu be kwuya ele naaria ehni igbugbu, dnanyita be nu ngeri apna n'olu okpata be nu etere be, ma kpa Pita

naagawhe enine a metụ agwanna be.

¹⁶ Igbudu ele badnụ hi n'eli gbarụ Jeruselem gburugburu va kwuya ele ke be naari ẹhni igbugbu, ma ele renwu ojo nwugwu, be gworu kpakara be.

Be kpaknarnụ ele izi ẹhni

¹⁷ Ige wam okwno-awụwa jihiaru nye risi ariohna nụ ele nụ ya sno, bu ele otu Sadusi, mkpoma.

¹⁸ Be nwudne ele izi, yisi be ikelu nụ ruwhnu ohna.

¹⁹ Kovu enine izi Nyenwe ai varu n'abali, gbamanu be onuhna ikelu, kwuhia be.

²⁰ O kanu be, "Anu zne gwuzoru n'Oro Nso Chiokike, kanu ele badnu kpakara izi ke budnu ikne ka."

²¹ Ele izi wam zne n'Oro Nso Chiokike ke chi boru neezni ele badnu nhne.

Nga nye risi ariohna nụ ele nụ ya sno varu, be sukwukota ele eze-ikpe nụ kpakara ele risi Izireli, zizne izi ma be kwuhianu be ele izi wam.

²² Ele be zizneru oro ikelu, whnuge be n'oro ikelu. Be lahna kanu ele dusiri be,

²³ "Nga a duru oro ikelu, oro turu otu, kpakara ele nse neese onuhna, kovu nga a gbamarnu oro, o za nye zi nu rime oro."

²⁴ Nga nye risi ele neese Oro Nso Chiokike nụ ele risi ariohna nuru a, o gbagwojiri be anya.

²⁵ Ige wam otu badnu va, kanu be. "Anu le, ele rukna wam anu yisiri n'ikelu zi

n'Oro Nso Chiokike neezni ele badnu nhne."

²⁶ Nye risi ele neese Oro Nso Chiokike nụ ele ya nụ be neese Oro Nso zne kwuya ele izi wam, be mene be nhne rikne kwnornu nụ be notu ogwnu ele badnu jotu be akaworugwu.

²⁷ Be kwuya ele izi wam gwuzote be nụ ruwhnu ele eze-ikpe. Nye risi ariohna sikwa be,

²⁸ kaa, "A doru anu aka nu nsni anu zni nhne nu rewhna Jizosi. Anu mernu kpakara eli Jeruselem jihia n'izizni anu, anu noovukwasi ai enwu ovnarna Nyerukna ka."

²⁹ Pita nụ ele izi saru be, "A kwesiri o bnonu Chiokike nsni karu badnu.

³⁰ Chiokike ke ele nda ai mernu Jizosi hi n'enwu lizo, bu nye anu gburu, kpogidne a n'olu ogba.

³¹ Chiokike gwelizoru a olu n'akarikwnunga a ma o buru Nye Risi nụ Nye Oznohia, ma ele Izireli tuhna, ma Chiokike gbarunu be mmehie be.

³² A bu ele akebne nhne ele ka, ma Enine Nso, ke bu nkesi Chiokike nyernu ele noobnonu a nsni."

³³ Nga be nuru oka ka, ovu weru be ehni k'agida, be kpebi o gbu ele izi wam.

³⁴ Kovu otu nye Farisi rewhna a bu Gamalieli, nye zni iwu ele Ju, nye ele badnu noso anya, gwuzoru n'esilawuru ele ikpe, kaa ele izi wam whoga n'ederezi.

35 O kanụ ele ikpe wam, “Ele İzireli, anya dū anụ ẹlì nhne anụ noopio o mee ele rukna ka.

36 N'ige wheru ewhe, Tadiyosi whuyaru neeme ẹhni a nū ọ bụ nye zì rikne, riwhu badnụ ẹno snornu a. Be gburu a, kpakara ele snornu a gbasarụ, otu a nwurnu.

37 Omekwo, Judasi nye Galili whuyaru n'ige be gwnurnu ele badnụ, ọ dọru agida ele badnụ, be gburu a masi, kpakara ele snornu a gbasarụ.

38 Kĩtna me kanụ anụ, anụ mée nhne ọbula megidne ele rukna ka. Anụ sigbasi be. O buri nū nhne ka bụ ẹnu aka ke badnụ, ọ joowhu.

39 Kọvu ọ buri nū o hi n'aka Chiokike, anụ nwée rikne megbu be. Anụ jowhnu nū anụ nọolusi Chiokike ọgwnu.”

Be kweru nhne o kwuru bụ ezi ọka.

40 Be sukwu ele izi wam, pnia be nhne, kanụ be kwuma ọka berere nū rewhna Jizosi, be sigbasi be, be la.

41 Ele izi wam whoga nū ruwhnu ele ikpe, ovu nọoso be n'ọnu kwnornu nū Chiokike gwnusiri be ele kwesiri ọ ta awhnwhnu kwnornu nū rewhna Jizosi.

42 Kpakara ọbochi be zì n'Oro Nso Chiokike, neezne n'oro n'oro ele badnụ nọkpo okwo izi oma nū Jizosi bụ Karaisi.

1 N'ige wam, nga ọnu ọgwngwnu ele kweru ekwe zì naaba aba, ọdogbuta whuyaru n'esilawuru ele Ju nookwu Giriki nū ele Ju nookwu Hiburu. Ele Ju Giriki kanụ be lewhuru ele rinya be nzi be nwurnu anya nū wiri be neeke n'ọbochi n'ọbochi.

2 Ele izi nri nū ẹbo wam sukwu kpakara ele sno apna Jizosi n'otu, kaa, “O buo oma a gharu nhne gbasiri ikwu-ọnu Chiokike neeke wiri.

3 Kĩtna, rumu nda aị, anụ hohia ele rukna ẹsau n'esilawuru anụ ele nwernu agwa oma, ele Enine Chiokike nū akoniche jiharu, ma a yisi be nū nhne gbasiri nhne ka.

4 Kọvu aila jeegweru ẹhni aị yisi n'okpukpe nū okpo okwo ikwu-ọnu Chiokike.”

5 Kpakara be kweru nhne ele izi wam kwuru. Be hohia Sitivini, nyerukna ke okwnata ovu nū Enine Nso jiharu, nū Filipu nū Porokorosi, Nikanọ, Timoni, Pamenası nū Nikolasi, nye Antjoku nye bnarnu okpukpe ele Ju.

6 Be gwuzote be nū ruwhnu ele izi, be kpe okpukpe tukwasi be aka.

7 Ikwu-ọnu Chiokike neezne nū ruwhnu. Ọnu ọgwngwnu ele sno apna Jizosi nū rime Jeruselem zì koriri naaba aba. Agida ele okwa arjohna kwnata Chiokike mkpoma.

Be nwudnernu Sitivini

8 Sitivini bụ nwerukna Chiokike gọziri ke nwernu rikne ọ rnu ẹnu ndu-ẹhni nū

6

nhne elekema n'esilawuru ele badnu.

⁹ Kovu nu agwna ele zi n'oro ogbako ele Ju, ele be kwu Ele Nwernu Ehni be, nu ele Ju hiri nu Sirini nu Alekizandaria, lizoru megidne a. Be nu ele Ju hi nu Silisia nu Esia nu Sitivini bete neesigha oka.

¹⁰ Kovu nu be nwée rikne megidne Enine nu akoniche ke Sitivini ji nookwu oka.

¹¹ Be gno ele badnu be kaa, "A nurnu hne o nookwulu Mozizi nu Chiokike."

¹² Ele ka kpakne ele badnu, be lizo, be nu ele okno badnu nu ele zni iwu, vakwnusi Sitivini, nwudne a, kwuzne a nu ruwhnu ele eze-ikpe.

¹³ Be kwuya agwna ele jaagba akebne aghalaghalala megidne a. Be kaa, "Nwerukna ka ziko nookwu oka megidne Oro Nso nu Iwu Mozizi.

¹⁴ A nurnu hne o naakaa nu Jizosi nye Nazareti ka jaakwnadna Oro Nso Chiokike ka, gbanwo kpakara omen'eli ai ke Mozizi nyernu ai."

¹⁵ Kpakara ele eze-ikpe legidne Sitivini anya, be whnu nu ruwhnu a nu lele ruwhnu enine izi.

7

Ikwu-onu Sitivini

¹ Nye risi ariohna sikwa Sitivini, "Nhne ka be nookwu megidne i, o bu n'ezi?"

² Sitivini saru be, "Rumu nda m, nu ele nda, anu bnote nsni. Chiokike ke zi igwugwu mernu Ebereham, nda ai oknani, whnu a anya nga o

zi n'eli Mesopotemia, su o znernu wuru nu Harani.

³ O kanu a, 'Sigbasi ezi-nu-oro i nu eli i, zne n'eli ke me jeegesi i.'

⁴ "O sigbasi eli Kalidia zne wuru nu Harani. Nga nda Ebereham nwurnu, Chiokike mernu o bnanya n'eli ka, hne anu wu kitna.

⁵ N'ige wam Chiokike nyéne Ebereham agwna eli ka ma o buru ke a, o bubedi otu renu ochi, kovu Chiokike kweru a mkwna nu o jeenye a eli ka, ma o buru ke a nu ebnurnu ele joosno a n'aznu. Nga Chiokike kweru mkwna ka, Ebereham nwée rumu.

⁶ Ka bu nhne Chiokike kannu a, 'Rumu i joowu n'eli berere, hne be joburu ele ohi, be jeeme be nhne ojo riwhu awha eno.'

⁷ Kovu Chiokike karu, 'M jeekpe ele wam be jobunu ohi ikpe, omekwo, be jeehi n'eli wam whuya, be jookponu m risi eli nu hna.'

⁸ Chiokike mernu ogba-njo-ehni okpa nka ziri n'esilawuru ya nu Ebereham. Ebereham kparu Aziki nnwo a nka nga o gbaru obochi esato kpa be murnu a, Aziki kpa Jekopu nka, Jekopu kpa nri nu rumu a lawuru ele nda ai oknani nka.

⁹ "Ele nda ai oknani kwnosiri nwene be Josefu awuwa, be rezne a Ijipiti lele ohi, kovu Chiokike dagwunu a,

¹⁰ dohia a nu kpakara mkpa a. Nga Josefu gwuzo nu ruwhnu Fero, eze Ijipiti, Chiokike nyernu a ruwhnu

oma nū akōnīche. Fero mernu a nye risi ọchichi kpakara Ijipiti nū kpakara ọro eze.

11 “N’ige wam ọknunyo dnarnū nū kpakara ẹli Ijipiti nū Kenanị, ke vuyarū agida awhnūwhnu. Ele nda aị ọknani nwée wiri.

12 Nga Jekọpu nurnu nū wiri zị nū Ijipiti, o zizne ele nda aị ọknani pịi nū mbom.

13 Nga be znernu ke mgba lawuru, Josefu mernu rumu nne a mahia a, Fero mahia masị ezi-nū-oro Josefu.

14 Nga ka mekworu, Josefu ziznenu Jekọpu nda a izi, kanū a, o kwuru kpakara ezi-nū-oro a va Ijipiti, be bụ nri badnū ẹsau nū isne.

15 Jekọpu zne Ijipiti hne ya nū ele nda aị ọknani zị nwū.

16 Be vuru iznu be zne Ọkem hne be liri be n’ilili ke Eberham zunahoru avnurnu Hamọ n’iwai.

17 “Nga ige Chiokike jeemezu mkwna o kweru Eberham duru, ọnu ọgwngwnu ele ke aị zị nū Ijipiti zilam agida.

18 N’ipne-aznū, eze berere ke máa Josefu bete nẹchi Ijipiti.

19 Ọ mernu ele nda aị ọknani nhne rikne, ghọ be aghigho, mee be tuwhu rumu be, ma be nwuma.

20 “Ọ bụ n’ige ke nū kpa bụ nga be murnu Mozizi, nnwọ marnū mma nū ole anya, be legidne anya n’oro nda a ẹnwa ẹto.

21 Nga be ghasarū a n’ederezi, adna Fero kwuru a, znulizo a lele nnwọ a rukna.

22 Be znirni a kpakara nhne ọmumu nū akọ ele Ijipiti, Mozizi bụru dikne n’ikwu-ọnu nū dimkpa nū rikne.

23 “Nga Mozizi gbarū nri awha ẹno, o kpebi o zne lekasi rumu nda a, ele Izireli.

24 O whnū hne otu nye Ijipiti neemegbu nye Izireli, o zne megwnahianu nye Izireli, gbu nye Ijipiti.

25 O che nū ele ke a jọghohia nū Chiokike jeehi n’aka a dọhia be, kọvu be ghóhiage.

26 Ke chi a bọru, ọ whnurnu rumu Izireli lawuru nọlu ọgwnu, o zne bno be, ọ kaa, ‘Le, anū bụ rumu nwene, kịni mernu anū nọlu ọgwnu?’

27 “Kọvu nye ke mejoru nwene a kwnahala Mozizi, sịkwa a, ‘Nyele mernu i nye risi nū nye ikpe aị?’

28 I noopio o gbu m lele kpa i gburu nye Ijipiti n’ekile sa?’

29 Nga Mozizi nurnu ka, ọ gbawhu, zne wuru nū Midia lele nye izne, hne ọ murnu rumu rukna lawuru.

30 “Nga nri awha ẹno whemernu, enine izi Chiokike mernu ọ whnū a anya nū riro bẹkwnu isisi matị n’ẹli-ikpa zị Rugwu Saina ndundu.

31 Nhne Mozizi whnurnu a jiri anya, o znedu isisi matị wam ndundu, ọ nurnu nkọli Nyenwe aị,

32 ‘Mawa bụ Chiokike ele nda i ọknani, Chiokike ke Eberham, nū Aziki nū Jekọpu.’ Mozizi tūru ogwnu k’agida, o nwée rikne legidne anya.

33 Nyenwe aị kanụ a, 'Tuma okoro-ọchi ị, kwnornu nụ hne i gwuzo bụ ẹli nso.

34 M leru m anya, whnụ awnụwhnu ele ke m n'Ijipiti. M nurnu m ọsnu-idne be, m hiednana m ma m znohia m be. Kịtna, va, m jeezizne i Ijipiti.'

35 "Ka bụ Mozizi wam be juru kaa, 'Nyele mernu i nye risi nụ nye ikpe aị?' Ya bụ nye Chiokike ziznenu lele nye risi nụ nye ọznohia, hite nụ oyi aka enine izi wam ke mernu ọ whnụ a anya n'isisi matị wam neerne bẹkwnu.

36 O duhia be hite nụ Ijipiti hne ọ nrurnu ernalu ndu-ehni nụ nhne elekema, ma n'Okne Osimini Ihie, ma nụ ẹli-ikpa nri awha ẹno.

37 "Ọ bụ Mozizi kannụ ele Izireli, 'Chiokike jeeziyanu anụ nye ọwhnurninya lele me, hite nụ ele ke anụ.'

38 Ọ bụ Mozizi ka bụ nye zị n'esilawuru agida ele wam n'ẹli-ikpa, ya nụ ele nda aị ọknani, ma enine izi wam nye kwunnu a ọka nụ Rugwu Saina. Ọ nahiaru ikwu-ọnu ke zị bụdnu ke Chiokike, ma o nyewhete aị ya n'aka.

39 "Kọvu ele nda aị ọknani bnógele a nsni, be kwnahala a n'otu nkọ, nụ be jaalahna Ijipiti.

40 Be kanụ Erọni, 'Menu aị rụmu chi berere ke joodu aị. A máa nhne mernu Mozizi wam nye kwuhiaru aị n'Ijipiti.'

41 Nga wam be mee chi lele nnwọ ehni, kwanụ a ariohna,

kwu ikwu iriri, kwnornu nụ nhne be jiri aka be kpụ.

42 Kọvu Chiokike dasinnu be aznụ, nyewhete be ma be kpenu mbọ ke oligwe, lele kpa be gbarụ a n'ọkwukwo ele ọwhnurninya,

'Ele Izireli, anụ kwannụ m ariohna nụ nhne nkesi nri awha ẹno n'ẹli-ikpa?'

43 Anụ vulizọru ọro Mọloku anụ vulizọ mbọ Refani, ke bụ chi anụ kpuru, kpọnu be risi ẹli.

M jeezihala anụ whe Babiloni.'

44 "Ele nda aị ọknani vu Ọro-Ẹka ruwhnu Chiokike n'ẹli-ikpa. Be wuru a lele kpa Chiokike kannụ Mozizi wu a, lele ọdi ke be gesiri Mozizi.

45 Omekwo, ele nda aị ọknani ele nahọru Ọro-Ẹka wam n'aka ele nda be, wuru a zne be nụ Josua, nahọru ele mba wam ẹli be, bụ ele Chiokike chihalaru nụ ruwhnu be. Ọro-Ẹka wam zị tem du ige Devidi.

46 Devidi nahiaru ruwhnu ọma n'aka Chiokike, ọ riọ Chiokike ọ gharụ a ma o wutenu Chiokike Jekọpu ọro.

47 Kọvu Solomonị bụ nye wunnu a ọro wam.

48 "Kọvu Nye Kakwo Nhne Dum Olu zá noowu n'oro badnụ wuru, lele kpa nye ọwhnurninya kwuru,

49 'Ka bụ nhne Nyenwe aị kwuru,

Oligwe bụ ngadna eze m, ọwa bụ nhne ọtukwasi ọchi m lawuru,

Ndaa ọkpa ọro ke anụ joowunu m?

Ndaa hne me jeezukwa
inwe?

50 O búo me keru kpakara
nhne ka?"

51 "Anụ ele risi rikne nụ ele
ke be kpáge nka nụ mkpọma,
anụ mesirni nsni anụ. Anụ
noogwuzigidne Enine Nso,
lele kpa ele nda anụ ọknani
mernu.

52 Ndaa nyenum n'esilawuru
ele ọwhnurninya ke ele nda
anụ kpáknana ẹhni? Be gburu
ele izi Chiokike ele kwuru
n'ige wheru ewhe nụ nye
mee mma jaava, kọvu anụ
reru a, gbu a.

53 Anụ nahọru iwu
Chiokike hite n'aka ele enine
izi, kọvu anụ bitagele a."

Be turu Sitivini akaworugwu

54 Kpa ele eze-ikpe bnornu
nsni nhne Sitivini nookwu,
ọnuma jihiaru be mkpọma, be
ta rụkwnurnu-ize megidne a
n'ovu owe ẹhni.

55 Enine Nso jipiyaru
Sitivini, o lelizọ anya
n'oligwe whnụ igwugwu
Chiokike, nụ Jizọsi hne
o gwuzo n'akarikwnunga
Chiokike.

56 O kaa, "Anụ le, m
whnurnu m hne oligwe
kpumernu, nụ Nnwọ
ke Badnụ hne o gwuzo
n'akarikwnunga Chiokike."

57 Be siwama lulo, gweru
aka kpusnime nsni be,
kpakara be gbagidne a.

58 Be tọhala a n'aznụ ẹli-
ọhna, gweru akaworugwu
logbu a. Ele akebne chibita
iwo be n'ọchi otu nnwọ ikoro
rẹwhna bụ Sọlu.

59 Be logbu Sitivini, ọ
kwnakwu Nyenwe aị, kaa,
"Nyenwe aị Jizọsi, narnụ
enine m."

60 O gwute mpnerne ọchi,
gweru okne nkọli siwama
lulo, "Nyenwe aị, bikno, ị
gwnụ mmehie ka nụ risi be."
Nga o kwuru kpa, ọ nwụma.

8

1 Sọlu bniasiri aka n'ẹnwu
Sitivini.

Sọlu kpaknarnụ ogbako Chiokike ẹhni

N'ọbochi wam, be bete
naakpakna ogbako Chiokike
ke zị nụ Jeruselem ẹhni,
kpakara ele kweru ekwe
gbasa nụ rime kpakara ẹli
Judiya nụ Sameria, okwolem
ele izi bụ ele gwnarnụ nụ
Jeruselem.

2 Agwna ele nọtụ ogwnu
Chiokike zne vuru iznu
Sitivini lite, be kwnanụ a
ẹkwna k'agida.

3 Kọvu Sọlu gbalị o lulu
ogbako Chiokike, o neezne
hite n'oro dū n'oro, pnuhia
ele rukna nụ ele rinya bụ ele
kweru ekwe túbna be n'oro
ikelu.

Filipu znirni izi ọma nụ Sameria.

4 Kpa kpakara ele kweru nụ
Nyenwe aị gbasarụ, be zne
neezni izi ọma kpa be neezne.

5 Filipu zne n'eli Sameria
kpọ okwo izi ọma Karaịsi pị.

6 Nga ele badnụ nurnu
nhne Filipu nookwu ya nụ
eruu ndu-ẹhni ọ nọrnu, be
bnotenu a nsni.

7 Rẹnwu ojo hiri nụ rime
agida ele badnụ neesi

okokoba, be gwọru agịda ele ngeri ẹhni be dọnwurnu ọdonwu nụ ele mgwọro.

8 Okne snarnịma dnarnụ nụ rime Sameria.

9 Otu nwerukna rẹwhna a bu Saịmoni wu nụ ẹli wam, nye mernu anya jì ele Same-ria hite n'ẹrnu aghịgho. Ọ karụ nụ ọ bu nye siri rikne.

10 Kpakara ele wu n'ẹli wam nọsobisinu a, hite nụ nye matị dū nụ nye zị n'olu. Be naakaa, "Nwerukna ka bu okne iknernema Chiokike."

11 Ẹrnu aghịgho a bu nhne o jiri mee anya jì be gbu ọkwnu.

12 Kọvu nga be kweru izi ọma Filipu znirni gbasiri ẹli-eze Chiokike nụ rẹwhna Jizọsi Karaịsi, be wụ be mini, ma ele rukna ma ele rinya.

13 Saịmoni masị kweruru, nga be wuru a mini, ọ dazịtasi Filipu ndundu, ẹrnu elekema nụ ẹrnu ndu-ẹhni ọ whnurnu jiri a anya.

14 Ele izi ele zì nụ Jeruselem nurnu nụ ele Sameria kweruru ikwu-ọnu Chiokike, be zizne Pita nụ Jọni pị.

15 Nga be vaduru, be kpenu be okpukpe ma be nahọru Enine Nso.

16 Kwnornu nụ Enine Nso yáadnakwasịla nye ọbula n'esilawuru be. Be wuru be mini nụ rẹwhna Nyenwe aị Jizọsi kpọi.

17 Pita nụ Jọni tükwasi be aka nụ risi, be nahia Enine Nso.

18 Nga Saịmoni whnurnu nụ be nyernu be Enine Nso hite n'otukwasi be aka, o nyee Pita nụ Jọni iwai,

19 kaa, "Anụ nyee m rikne ka masị ma nye ọbula ke me tükwasiri aka m lawuru, ọ nahia Enine Nso."

20 Pita kanụ a, "Jì nụ iwai i whu n'ohia, kwnornu nụ i cheru nụ i jọozuhiali nkesi Chiokike n'iwai.

21 I nwée igwe nụ ẹrnu aị, kwnornu nụ mkpọma i zila snam n'anya Chiokike.

22 Tuhnasna hite nụ mmuma ojo i, kpe okpukpe, ma Nyenwe aị gbarunu i.

23 Kwnornu nụ m whnurnu m nụ agịda okwno-awuwa jiri nụ rime mkpọma i, i bu nye ikelu ke mmehie."

24 Saịmoni kanụ Pita nụ Jọni, "Anụ kpenu m okpukpe nụ ruwhnu Nyenwe aị ma nhne anụ kwuru gharu a dnakwasị m."

25 Nga be gbaru ama, kpọ okwo izi ọma Nyenwe aị, Pita nụ Jọni lahna Jeruselem. Nụ apna kpa be naala be zni izi ọma nụ ẹli-ohna zì nụ Same-ria.

Filipu nụ nye chi-ıwai

26 Enine izi Nyenwe aị kanụ Filipu, "Lizọ, zne apna ke zì nụ ẹli ẹli ke laru Jeruselem zne Gaza apna ẹli chna chna chna."

27 Filipu lizọ, zne. Otu nwerukna Itiopia bu okiri badnu lazne ẹli a. Nwerukna ka bu nye zì mkpa n'ẹli Itiopia, ọ bu ọchi-ıwai eze nyerinya Itiopia nye rẹwhna bu Kandasi. O znernu o kpenu Chiokike nụ Jeruselem.

28 Ọ dazì nụ rime ọgbo-ẹli a, nọogwnu ọkwukwo Azaya nye ọwhnurninya.

29 Enine Nso kanu Filipu, “Zne ndundu daziri n’ehni ogbo-eli wam.”

30 Filipu gba eso zne, nu kpa o n’ogwnu hite n’okwukwo Azaya nye owhnurninya, o sika a, “I n’oghozia nhne i n’ogwnu?”

31 O kaa, “Ndaa kpa me jeeji n’oghozia, okwolem ma o nwernu nye j’okowanu m?” O sukwu Filipu, o pneknwusi a, daziri eli nu rime ogbo-eli a.

32 Nhne be gbaru n’okwukwo nso o n’ogwnu bu ka,

“O nu lele aturu be duru zne o gbu ogbu

lele nnwo aturu ke dnarnu mgbu nu ruwhnu ele noko a rijni,

o kwule oka.

33 Be gwednarnu a n’eli, be gonahoru a n’ikpe zi snam,

O za nye jookwuli nhne gbasiri rumu a,

kwnornu nu be gwemernu budnu a n’owa.”

34 Nwerukna wam sika Filipu, “Bikno, kanu m, ndaa nye nye owhnurninya ka nookwu nhne gbasiri a? O bu ehni a sobu nye berere?”

35 Filipu bete nookwu oka, hite nu nhne be gbaru n’okwukwo nso ka, zni izi oma gbasiri Jizosi.

36 Kpa be neezne, be vadu hne mini zi, okiri badnu wam kaa, “Le mini, kini jeeme be gharu o wu m mini?”

[

37 Filipu kaa, “Be nwernu rikne wu i mini, o buru

nu i jiri kpakara mkpoma i kweru.” O kaa, “M kweru m nu Jizosi Karaisi bu Nnwo Chiokike.”]

38 Nwerukna wam kanu ogbo-eli a kwnusi, Filipu nu okiri badnu wam bna nu rime mini, o wu a mini.

39 Nga be hiri nu mini whuya, Enine Nyenwe ai vuhala Filipu. Okiri badnu wam whuna a berere, kovu, o la n’eli a nu ovu oso n’onu.

40 Filipu whnu ehni a nu Azotosi. O zne nu kpakara eli n’okpo okwo izi oma tem o vadu Sizaria.

9

Otuhasna mkpoma Solu (Ernu 22:6-16; 26:12-18)

1 Solu zi koriri neemegidne ele noosno apna Nyenwe ai, naakpasi be ogwnu o gbu be. O zneknwusi nye risi ariohna,

2 nahoru a okwukwo o jeenye kpakara oro ogbako ele Ju zi nu Damasikosi, o buru nu o j’owhnu nye obula ke noosno apna Nyenwe ai pii, ma o nwudne be, rukna nu rinya, ma o purnu be va Jeruselem.

3 Kpa o neezne, o gw-narnu mati o du Damasikosi, ngangam, okne iwhne hiri n’oligwe mukwasi a gburug-buru.

4 O dna n’eli, o nurnu otu akpisi naakanu a, “Solu, Solu, kini mernu i naakpakna m ehni.”

5 O sika, “I bu nyele, Nyenwe ai?”

Akpisi wam kaa, “Mawa bu Jizosi, nye i naakpakna ehni.

6 Kòvù lizò, bna nù rime ẹ̀li-òhna, hne be jaakanù nhne i jeemerìri.”

7 Ele rukna be nù Sòlu sno nwée rikne kwu òka, be nùrnù akpìri wam, kòvù ò zá nye be whnùrnù.

8 Sòlu lizò n'ẹ̀li, kpume anya a, kòvù o nwée rikne whnù nhne ọ̀bula. Be duru a n'aka bna nù rime Damasìkosi.

9 Ọ whnúna ọ̀sno ọ̀bochi ẹ̀to, o ríle wiri, ọ̀ nwóna mini.

10 Otu nye sno apna Nyenwe aì zì nù Damasìkosi, nye rẹ̀whna a bụ Ananayasì, ọ̀ whnùrnù ọ̀whnurninya, hne Nyenwe aì sukwuru a, “Ananayasì.”

Ọ naakwe, “Le m, Nyenwe aì.”

11 Nyenwe aì kanù a, “Jìknernu, zne n'apna be kwu Zìrikwem, nù ọ̀ro Judasì, sìkwa otu nye be kwu Sòlu, nye Tasòsi. O neekpe okpukpe.

12 Ọ whnùrnù ọ̀whnurninya otu nwerukna rẹ̀whna a bụ Ananayasì, varù tũkwasi a aka a lawùru nù risi ma ọ̀ whnùrnù ọ̀sno berere.”

13 Ananayasì kaa, “Nyenwe aì, agìda ele badnù kannù m nhne gbasìri nwerukna ka, nù kpakara nhne ojo o mernu ele ke i nù Jeruselem.

14 O jiri rikne ele risi arìohna va Damasìkosi ma ọ̀ nwudne kpakara ele naakwnakwu rẹ̀whna ì.”

15 Nyenwe aì kanù a, “Zne, kwnornu nù m hòhiaru m a ma o znenu m izi, o jeeme ele búo ele Ju nù ele eze mahìa rẹ̀whna m ma ele Izireli.

16 M jeegesi a kpakara awhnùwhnu ọ̀ jaata kwnornu rẹ̀whna m.”

17 Ananayasì zne, bna n'ọ̀ro wam, tũkwasi aka a lawùru nù risi Sòlu, kaa, “Nwene rukna Sòlu, Nyenwe aì Jizòsi, nye mernu ma ì whnù a anya n'apna nga ì naava, ziyaru m ma ì whnùrnù ọ̀sno berere, ma Enine Nsò jihìa nù rime i.”

18 Ngangam, nhne nù lele rùkporo aznù dnahnala n'anya a, o bete ọ̀ whnù ọ̀sno, o lizò, be wù a mini.

19 Nga o riri wiri, rikne bna a n'ẹ̀hni.

Sòlu znirni izi ọ̀ma nù Damasìkosi

Ọ dazìri ọ̀bochi ele nù ele ya nù ele sno apna Jizòsi nù rime Damasìkosi.

20 Ọ bna kpakara ọ̀ro ọ̀gbako ele Ju bete neezni izi ọ̀ma gbasìri Jizòsi, nù ọ̀ bụ Nnwò Chiokike.

21 O jiri kpakara ele nùrnù a anya, be nẹ̀sikwa, “Ka ọ̀ búo nwerukna wam noogbu kpakara ele naakwnakwu rẹ̀whna ka nù Jeruselem? Ọ búo ma ọ̀ pnùrnù be zne nyee ele risi arìohna bụ nhne o kwnornu va hna?”

22 Kòvù Sòlu gwuzosiri rikne neezni izi ọ̀ma, neegesi nù Jizòsi bụ Karaìsi n'ezi òka, ke gbagwojiri ele Ju zì nù Damasìkosi anya.

23 Nga agìda ọ̀bochi whe-mernu, ele Ju gba iznuznu o gbu a.

24 Kòvù Sòlu mahìaru mmùma be. Ele Ju zì neese ọ̀nu-mgbo iwhnehnie nù abalì ma be gbu a.

25 Kòvu ele noosno a jiri abali znuhala a nù rime nkita n'iketa mkpò.

Sòlu nù rime Jeruselem

26 Sòlu zne Jeruselem, ò gbalì ma ò snornu ele sno apna Jizòsi, kòvu ogwnu tũru be, kwnornu nù be kwéhiàla nù ò bù nye sno apna Jizòsi.

27 Banabasì varù kwuru a kwuznenu ele sno apna Jizòsi, ò kòwanu be kpa Sòlu whnũrnu Nyenwe aì n'apna, nù Nyenwe aì kwunnu a òka. Ò kanù be kpa Sòlu znirni izi òma n'anya rikne nù Damasìkosi.

28 Be nù Sòlu dazìri, ò zne nù rime kpakara Jeruselem, gweru anya rikne nòokpo okwo izi òma nù rẹwhna Nyenwe aì.

29 Ya nù ele Ju nookwu Giriki nòdogbuta, be pio ò gbu a.

30 Nga rùmu nda nũrnu nhne gbasìri a, be kwuru Sòlu zne Sizaria, zizne a Tasòsi.

31 Kpakara ògbako Chiokike ke zì nù Judiya nù Galili nù Sameria zukwaru inwe n'udno. Enine Nsò mernu be gwuzosi rikne, ba aba, kpa be noowu bũdnu nòotu ogwnu Nyenwe aì.

Pita nù rime Lida nù Jòpa

32 Kpa Pita neezneghari kpakara òhna neelekasi rùmu Chiokike, ò zne lekasi ele zì nù Lida.

33 Ò whnù otu nwerukna rẹwhna a bù Eniàsi, nye ngeri èhni a dònwurnu òdonwu, nye zì n'olu òkpata awha èsato.

34 Pita kanù a, “Eniàsi, Jizòsi Karaìsi mernu i èhni si rikne, lizò, gbakwata òkpata i.” Ngangam, ò lizò.

35 Kpakara ele wu nù Lida nù Saròni whnũrnu a, tũhnasna hne Nyenwe aì zì.

36 Otu nwerinya rẹwhna a bù Tabita (ke bù Dòkasi), nye sno apna Jizòsi, zì nù Jòpa. Ò bù nye neeme nhne òma ige òbula, neeyinu ele mboni aka.

37 N'ige wam ò rià èhni igbugbu, nwũma. Be hnià èhni a dòbita n'òro olu.

38 Nga ele sno apna Jizòsi nũrnu nù Pita zì nù Lida, Jòpa zìla ikere nù Lida, be zizne ele rukna lawũru, riàsno a, kaa, “Bikno, va wara wara.”

39 Pita jiknernu, snornu be zne. Nga ò vaduru be kwuzne a n'òro olu. Kpakara ele rinya nzi be nwũrnu zì naakwna èkwana, neegesi a kpakara iwo Dòkasi dũnnu be nga ya nù be zì.

40 Pita chihala kpakara be ederezi, gwu mkpnerne-òchi n'èli, kpe okpukpe, ò tũhnasna hne iznu wam zì, kaa, “Tabita, lizò.” Ò sama anya a, nga ò whnũrnu Pita, ò dazìri èli.

41 Pita yisinu a aka, ò gwuzorù. Ò sukwu ele kweru ekwe nù ele rinya nzi be nwũrnu, gesi be ya nù bũdnu.

42 Ònutnu gbasìri nhne ka gbasa nù kpakara Jòpa, agìda ele badnù kweru nù Nyenwe aì.

43 Pita dazìri agìda òbochi nù rime Jòpa n'òro otu nye nòornu èrnu akpukpo anò be kwu Saìmoni.

10

Pita nū Kōneliosi

1 Otu nwerukna rēwhna a bu Kōneliosi zī nū Sizaria, nye risi ele oḡwnu Rom be kwu Otu ele Itali.

2 O bu nye nōotu oḡwnu Chiokike, ya nū kpakara ele oḡo a neekpenu Chiokike. O neeyinu ele mboni Ju aka, neekpe okpukpe nyee Chiokike kpakara ige.

3 Otu obochi, n'otnu-ige ke ẹto n'iwhnehnīe* o whnurnu enine izi Chiokike n'owhnurninya hne o vakwnusiri a, kaa, "Kōneliosi."

4 Nga o leru anya, oḡwnu tūru a, o kaa, "O kīni, Nyenwe ai?"

Enine izi kaa, "Chiokike nurnu okpukpe i, o chenwan-yarnu ẹrnu oyinu ele mboni aka i.

5 Kītna, zizne ele badnu be zne Jōpa, be sukwu otu nwerukna rēwhna a bu Saīmoni Pita.

6 O zī n'oro otu nwerukna rēwhna a bu Saīmoni nye ẹrnu akpukpo anō, nye oḡo a zī nū ngeri osimini."

7 Nga enine izi wam ya nū a nookwu oka lahnarnu, Kōneliosi sukwu ele izi a lawuru, nū otu nye oḡwnu ke bu otu nū rime ele izi a, nye nōotu oḡwnu Chiokike.

8 O kanu be nhne mernu, zizne be Jōpa.

9 N'ekile a, kpa be naavadu Jōpa ndundu, Pita zne n'olu

oro n'iwhnehnīe† zne kpe okpukpe.

10 Nga wiri ḡwnurnu a, o pio nhne o jeeri, be zī neesi wiri, o whnurnu owhnurninya.

11 O whnurnu hne oligwe kpumernu, nū nhne nū lele etere be doḡnarnu nū nkala ẹno a du ẹli.

12 Kpakara anohia obula ma agwo, ma onunu oligwe zī nū rime a.

13 Otu akpīri kanu a, "Pita, lizo, gbu, ri."

14 Kovu Pita saru, "Oza, Nyenwe ai, kwnornu nū m rīlele m nhne obula ruru oḡo, moḡu ke zīla rična."

15 Akpīri wam kwu ke mgba lawuru, "Nhne obula Chiokike karu nū o zī rična, i kwula nhne zīla rična."

16 Nhne ka mernu mgba ẹto, kpakara be lahna nū rime oligwe.

17 Kpa Pita zī naagbadi risi owhnurninya ka, ele rukna wam Kōneliosi ziyaru mahjaru oḡo Saīmoni, be ḡwuzoru n'ogodo onuhna.

18 Be jikwa, "O bu hna hne Saīmoni Pita zī?"

19 Nga Pita zī kōriri naagbadi risi owhnurninya ka, Enine Nso kanu a, "Le, ele rukna ẹto noopio i.

20 Jiknernu ẹhni i, snornu be zne, i siḡha oka o sno be zne, kwnornu mawa ziyaru be."

21 Pita hiedna n'olu oḡo, kanu be, "Me bu nye anu noopio. Ndaa nhne anu kwnornu va?"

* 10:3 *otnu-ige ke ẹto n'iwhnehnīe*: oḡwukwo ke mbom kwuru ige awa ke tolu † 10:9 *iwhnehnīe*: oḡwukwo ke mbom kwuru ige awa isunu

22 Be kaa, “K̄oneliōsi nye risi n̄echi ele ọgw̄nu ziyaru aī, ọ b̄u nye mee mma n̄u nye n̄ot̄u ogw̄nu Chiokike. Kpakara ele Ju n̄os̄o a anya k’aḡida. Otu enine izi Chiokike kann̄u a o sukwu i n’oro a, ma o n̄urnu nhne i jookwu.”

23 Pita kwubnanya be ọro, be dnanyi chi b̄o. N’os̄isi a, Pita n̄u agw̄na r̄umu nda ele z̄i n̄u J̄opa snornu be zne.

Pita z̄i n’oro K̄oneliōsi

24 N’ekile a, ọ vadu Sizaria, hne K̄oneliōsi n̄u r̄umu nwene a n̄u ele enyi a o sukwuru z̄i neese a.

25 Kpa Pita naabna n’oro, K̄oneliōsi kwnusi a, dna n’eli n’ochi a, kp̄onu a risi eli.

26 K̄ovu Pita t̄olizo a, kan̄u a, “Liz̄o, kwnornu n̄u m b̄u m badn̄u etekne.”

27 Pita nookwunu K̄oneliōsi ọka, be bna n̄u rime ọro, ọ ọwhnu aḡida ele badn̄u gbak̄oru.

28 Ọ kan̄u be, “Hite n’iwu aī, an̄u magw̄u n̄u nye Ju nw̄ee rikne mek̄o nhne ya n̄u nye b̄u ọ nye Ju m̄obu zne ọro be. K̄ovu n̄u Chiokike kar̄u me kw̄u badn̄u nhne z̄ila r̄ichna m̄obu nhne r̄uru ọru.

29 Nga an̄u sukwuru m, m nw̄ee m rikne s̄ikwa ajji. K̄itna, ndaa nhne mernu an̄u jiri sukwu m.”

30 K̄oneliōsi kaa, “Ọbochi ẹn̄o wheru ewhe, m z̄i m neekpe okpukpe n’ot̄nu-ige ke ẹt̄o n’iwhnehnie.† Ngangam, otu nwerukna wogwu iwo

naacha va-a-a, gwuzoru n̄u ruwhnu m.

31 Ọ kaa, ‘K̄oneliōsi, Chiokike n̄urnu okpukpe i, o chenwanyarn̄u ẹn̄nu oyinu ele mboni aka ī.

32 Zizne ele badn̄u J̄opa be sukwu otu nyerukna r̄ewhna a b̄u Sāimoni Pita, ọ b̄u nye izne n’oro Sāimoni nye ẹn̄nu akp̄ukpo an̄o, nye wu n̄u ngeri osimini.’

33 M ziyannu j̄i izi wara wara, i mekwar̄u nkari va. K̄itna, kpakara aī z̄i n̄u ruwhnu Chiokike, neese ọ n̄urnu kpakara nhne Nyenwe aī nyernu n’iwu j̄i kan̄u aī.”

Ikwu-ọnu Pita n’oro K̄oneliōsi

34 Pita bete o kwu ọka, kaa, “M mah̄iaru m k̄itna n’ezi ọka n̄u Chiokike z̄a neele badn̄u anya n̄u ruwhnu.

35 K̄ovu Chiokike nookwubnanya nye ọbula ke n̄ot̄u ogw̄nu a, nye neeme mma hite n̄u mba ọbula.

36 An̄u magw̄u izi Chiokike ziznenu ele Izireli, n̄okpo okwo izi ọma udno hite n̄u Jiz̄osi Karāisi, nye b̄u Nyenwe kpakara badn̄u.

37 An̄u magw̄u nhne mernu n̄u kpakara Judiya hite n̄u Galili, kpa J̄oni znikworu izi ọma ọwu mini.

38 An̄u magw̄u mas̄i nhne gbas̄iri Jiz̄osi nye Nazareti, kpa Chiokike nyernu a Enine Ns̄o n̄u rikne. O zneghar̄iri n̄u rime kpakara eli neeme nhne ọma, n̄ogwo kpakara ele

† 10:30 ot̄nu-ige ke ẹt̄o n’iwhnehnie: ọkwukwo ke mb̄om kwuru ige awa ke tolu

rẹnwu ojo nwụgwu, kwnornu nụ Chiokike dagwunu a.

39 “A bu ele akebne kpakara nhne o mernu n’eli ele Ju ma nụ rime Jeruselem. Be kpogidne a n’ogba, gbu a.

40 Kọvu Chiokike mernu ma o hi n’ẹnwu lizọ n’ọbochi ke ẹto, mee ma ọ whụya iwhe.

41 Ọ bụo kpakara ele badnụ whnurnu a, kọvu ọ bụ aịwa ele akebne Chiokike hōhiaru. Aị nụ a snornu ri wiri, nwọ mini nga o hiri n’ẹnwu lizọ.

42 O nyee aị iwu a zne zni izi oma ka nyee ele badnụ, a gba akebne nụ ọ bụ ya nye Chiokike hōhiaru ọ bụru nye ikpe kpakara ele zị bụdnụ nụ ele nwurnu ọnwu.

43 Kpakara ele ọwhnurninya gbarụ nhne gbasiri a, nụ kpakara ele jeekweru nụ ya, be jaagbarunu be mmehie be hite nụ rikne ke zị nụ rẹwhna a.”

Ele bụo ele Ju nahiaru Enine Nso

44 Kpa Pita zị nookwu ọka, Enine Nso dnakwasiri kpakara ele noobno nsni nụ izi oma.

45 Ọ gbagwojiri ele Ju kweru ekwe ele snornu Pita hi nụ Jọpa va anya, nụ Chiokike wụkwasiri ele bụo ele Ju Enine Nso.

46 Be nurnu kpa be naaznarni Chiokike n’ikwu-ọnu zị ọdo n’odo.

Pita kaa,

47 “Ele ka nahiaru Enine Nso lele aị, ọ zị nye jobnosni ọ wụ be mini?”

48 O nyee iwu be wụ be mini nụ rẹwhna Jizọsi Karaịsi. Be

rjasno Pita ma ya nụ be daziri ọbochi ele nụ ele.

11

Pita kọwaru nhne o mernu

1 Ele izi nụ rumu nda zị nụ kpakara Judiya nurnu nụ ele bụo ele Ju nahiaru ikwu-ọnu Chiokike.

2 Nga Pita znernu Jeruselem, ele be kparụ nka lizọ kwugidne Pita,

3 kaa, “I znernu n’oro ele be kpáge nka, ji nụ be rikọ wiri.”

4 Pita kanụ be nhne mernu hite n’oziri dū okwukwo,

5 “Kpa me zị neekpe okpukpe nụ ẹli Jọpa, m whnurnu m ọwhnurninya, m whnurnu nhne nụ lele etere be dọdnarnu nụ ngeri ẹno a hite n’oligwe, ọ kwusi hne me zị.

6 M lebna anya n’olu a, m whnụ nụ rime a anohia, nụ okne anohia ojo, nụ agwọ nụ ọnwu oligwe.

7 M nurnu m otu akpiri naakanu m, ‘Lizọ, Pita, gbu, ri.’

8 “Kọvu m karu m, ‘Ọza, Nyenwe aị, ọ zá nhne ọbula ruru ọru mọbu ke zila richna bnaleru m ọnu.’

9 “Akpiri wam kwu ke mgba lawuru, kaa, ‘Nhne ọbula Chiokike karu nụ ọ zị richna, i kwula nhne zila richna.’

10 Nhne ka mernu mgba ẹto, omekwo, kpakara be laharnu oligwe.

11 “N’ige wam, ele rukna ẹto ele be ziyannu m hite nụ Sizaria vaduru nụ ọro wam me zị.

12 Enine Nso kanu m me sgha oka, kovu me snornu be zne. Rumu nda m isunu ka hiri nu Jopa snornu m zne Sizaria, kpakara ai bna n'oro Koneliosi.

13 O kanu ai kpa o whnurnu enine izi gwuzo n'oro a, ke kannu a, 'Zizne ele badnu zne Jopa, be sukwu otu nwerukna rewhna a bu Saimoni Pita.

14 O jaakanu i oka ke be jooznohia ji nu ezi-nu-oro i.'

15 Kpa me panizornu nookwunu be oka, Enine Nso dnakwasiri be lele kpa o dnakwasiri ai n'oziri.

16 M chenwanya ikwu-onu Nyenwe ai kwuru, 'Joni jiri mini wu ele badnu mini, kovu be jeeji Enine Nso n'owu anu mini.'

17 Chiokike nyernu be nkesi wam o nyernu ai kpa a kweru nu Nyenwe ai Jizosi Karaisi. M bu nyele ke me joobnosnili Chiokike?"

18 Nga be nurnu nhne ka, be kpusni onu be, be znarni Chiokike, kaa, "Chiokike nyernu ele buo ele Ju obirizi otuhnasna mkpoma ma be ziri budnu."

Ogbako ke zi n'Antioku

19 Kitna, okne okpakna ehni wam ke whuyaru kwnornu enwu Sitivini mernu ele kweru ekwe gbasu du Fonisia nu Saiporosi nu Antioku. Be neezni ele Ju kpoi izi oma.

20 Kovu agwna ele kweru ekwe, ele rukna hiri nu Saiporosi nu Sirini znernu Antioku, be nu ele buo ele Ju nookwu oka, n'okpo okwo izi oma gbasiri Nyenwe ai Jizosi.

21 Iknernema Nyenwe ai sno be, agida ele badnu kweru, tuhnasna hne Nyenwe ai zi.

22 Otnutnu ka duru ogbako ke zi nu Jeruselem nsni, be zizne Banabasi Antioku.

23 Nga o varu, whnu ernu Chiokike n'esilawuru ele ke a, mkpoma sori a n'onu, o kanu be yisi ehni gweru kpakara mkpoma be tukwasi nu Nyenwe ai.

24 Banabasi bu omamarna badnu ke nwernu Enine Nso nu otukwasi ovu. Agida ele badnu kweruru nu Nyenwe ai.

25 Banabasi zne o pio Solu nu Tasosi.

26 Nga o piohuru a, o kwuya a Antioku. Be lawuru zi neezni agida ele badnu nhne nu Antioku otu awha. Be sukwuru ele sno apna Jizosi "Kirisiteni" oziri n'Antioku.

27 N'ige wam, agwna ele owhnurninya hiri nu Jeruselem zne Antioku.

28 Otu nyenum nu rime be nye rewhna a bu Agabosi, gwuzoru nu rikne Enine Nso whnu owhnurninya nu okne oknuno jaazi nu kpakara owa. (Oknuno ka dnarnu nga Kalaudiosi neechi.)

29 Ele sno apna Jizosi kpebi nu nye obula jeezizne nhne kpa o nwernu rikne yisinu rumu nda ele zi nu Judiya aka.

30 Ka bu nhne be mernu, be bita iwai gweznenu ele risi ogbako hite n'aka Banabasi nu Solu.

12

*Erọdu gburu Jemisi,
tụ Pita ikelu*

1 N'ige ka Eze Erọdu panizoru ọ kpakna agwna ele zị n'ogbako Chiokike ẹhni.

2 O gweru ama-ogwnu gbu Jemisi nwene rukna Jọni.

3 Nga ọ whnurnu nụ ọ sọru ele Ju ovu n'ọnu, o zne nụ ruwhnu nwudne Pita. (Ka mernu n'ige Iriri Brẹdi Whúge Ọwhu.)

4 Nga ọ nwudnernu Pita, o yisi a n'oro ikelu, o gweru a nyewhete n'aka otu ele ogwnu ẹno ẹno. Erọdu neese o gwehịa a n'ikpe ọhna nga Iriri Ọgawhe whemernu.

5 Pita zị n'oro ikelu, kọvu ọgbako Chiokike neekpesi okpukpe rikne gbasiri a nụ ruwhnu Chiokike.

Pita whụyaru n'oro ikelu

6 N'abalị ke jọbobo ọbochi Erọdu jeegweya nụ ruwhnu ele ọhna, Pita zị neezni anyarna n'esilawuru ele ogwnu lawuru ele neese a. Be turu a ijigba lawuru, ele neese nhne gwuzo n'ọnu-mgbo.

7 Ngangam, enine izi Nyenwe aị varu gwuzoru, iwhe mụkwasi nụ rime ọro ikelu. Enine izi wam kpatu Pita aka nụ ngeri ẹhni, ọ kanu a, "Lizọ wara wara." Ijigba dnahnala n'aka Pita.

8 Enine izi wam kaa, "Suru ajni i, woru okoro-ochi i." Pita mee kpatu, enine izi wam kanu a, "Woru iwo i, snornu m."

9 Pita snornu a whoga n'oro ikelu. O máa nụ hne enine izi wam neeme bu nhne zị

ire. O che nụ ọ nọowhnu ọwhnurninya.

10 Be whe ele nse ke mbom, nụ ke ẹbo, be va nụ ke ipne-aznu ke bu ọnu-mgbo rugwe bnarnu nụ rime ẹli-ọhna. Ọnu-mgbo wam gbama n'aka a. Be whoga, be neezne n'otu apna, ngangam, enine izi wam ghasa Pita.

11 Pita mahia ẹhni a, ọ kaa, "Kịtna, m maam nụ ọ bu n'ezi nụ Nyenwe aị ziyaru enine izi a, dọhia m n'aka Erọdu, dọhia m nụ kpakara nhne ele Ju neele anya a."

12 Nga ọ mahiaru nhne ka, o zne nụ ọro Meri nne Jọni Makị. Agida ele badnu gbakoru pi neekpe okpukpe.

13 Pita znu aka nụ ọnu-mgbo, otu nnwọ rinya rewhna a bu Roda zne ọ nakwe a.

14 Nga ọ mahiaru nkọli a, ovu ọso n'ọnu mernu o nwée rikne gbama ọro, ọ gba ẹso zne kanu be nụ Pita gwuzogwu nụ ọnuhna.

15 Be kanu a, "Any a bụo i oma." Kọvu o kwusi a rikne, be kanu a, "Ọ bu enine a."

16 Kọvu Pita zị koriri nooznu aka n'ọnu-mgbo. Nga be gbamarnu ọro, whnu a, ọ gbagwojiri be anya.

17 O whenu be aka be kpunime ọnu be. Ọ kanu be kpa Nyenwe aị gwehjaru a n'oro ikelu. Ọ kanu be, "Anu kanu Jemisi nụ rumu nda m ele berere." Ọ whoga zne hne berere.

18 N'osisi, o mernu ele neese nhne anya aghari k'agida nhne mernu Pita.

19 Erọdu kaa be pio a, kọvu be nwée rikne piohia a, ọ kaa be sịkwa ele neese nhne ajiji, o nyee iwu be gbu kpakara be. Omekwo, Erọdu hiri nụ Judiya zne nụ Sizaria daziri ige matị.

Enwu Erọdu

20 Ele Taya nụ Sajdoni mernu Erọdu ovu owe ẹhni, be ziri n'otu zne ọ whnụ a, be mee ma Bilatọsi nye neelekwa ọro eze gbagwasinu be. Be zne riasno Erọdu ma udno ziri, kwnornu nụ ẹli be neenwehia nhne oriri hite n'ẹli a.

21 N'ọbochi be họhiaru, Erọdu woru iwo eze a daziri nụ ngadna eze a, kwunu ele badnụ wam ọka.

22 Be siwama lulo, kaa, "Ọ bụo badnụ nookwu ọka ka, kọvu ọ bụ otu chi."

23 Ngangam, enine izi Nyenwe aị lịdna Erọdu kwnornu nụ o nyéne Chiokike igwugwu. Rukpu-rukpuru ri a, ọ nwụma.

24 Ikwu-ọnu Chiokike neezne nụ ruwhnu, naag-basa, nooso oso.

25 Nga Banabasi nụ Sọlu rnukworu ẹrnu be, be hi nụ Jeruselem hiehna kwuru Jọni Makị.*

13

Be zihalaru Banabasi nụ Sọlu

1 N'ogbako Chiokike ke zị nụ Antioku, ele neezni nhne nụ ele ọwhnurninya zị, Banabasi, Simioni nye be kwu Naija,

Lusọsi nye Sirini nụ Mane, nye ya nụ Eze Erọdu soru, nụ Sọlu.

2 Kpa be zị neekpenu Nyenwe aị, noovu ọnu, Enine Nsọ kaa, "Anụ kewamanụ m Banabasi nụ Sọlu, ma be zne rnu ẹrnu me kwnornu sukwu be."

3 Nga be vukworu ọnu, kpe okpukpe, be tukwasi be aka nụ risi, zihala be.

Nụ rime Saipurọsi

4 Kpa Enine Nsọ zihalaru Banabasi nụ Sọlu, be zne Selusia, hite nụ pịi zne Saiporosi.

5 Nga be duru Salamisi, be kpọ okwo ikwu-ọnu Chiokike nụ rime ọro ogbako ele Ju, be nụ Jọni Makị nye izi be.

6 Be zne n'ẹli ọhia esilawuru tem be dụ ẹli-ọhna Pafọsi, be whnụ otu nye ẹrnu aghigho rẹwhna a bụ Ba-jizọsi, nye Ju kwuru ẹhni a nye ọwhnurninya.

7 Ọ bụ enyi nye nẹchi ẹli ọhia esilawuru wam nye rẹwhna a bụ Sajọsi Pọlosi, nye nwernu akoniche. Nye ọchichi wam sukwuru Banabasi nụ Sọlu nụ ruwhnu a ma ọ nurnu ikwu-ọnu Chiokike.

8 Kọvu nye ẹrnu aghigho ka, Elimasi (ke bụ rẹwhna a nụ ikwu-ọnu Giriki), pioru ọ kw-nama nye nẹchi ẹli wam ma ọ gharu o kweru nụ Jizọsi.

9 Sọlu, nye rẹwhna bụ Pọlu, nye Enine Nsọ jihiaru a nụ rime, lekwasiri a anya,

10 kaa, "Ji nnwọ Ekwensu, nye irno kpakara nhne buru

* 12:25 be hi nụ Jeruselem hiehna kwuru Jọni Makị Okwukwo berere kwuru, be lahna Jeruselem, be nụ Jọni Makị.

oma. Jì nye kpakara ernalu aghigho nulu aruru-eli jiri nulu rime. I jeesigbasi o gbanwo apna ziri ezi ke Nyenwe ai?

11 Kina, le, aka Chiokike zi n'olu risi megidne i, i jookpu isni, i jowhnu iwhe ke obochi ige mati."

Ngangam, Elimasi whnurnu nhne nulu lele rijiriji nulu ochichiri n'anya a, o whoga noopio nye joodu a n'aka.

12 Nye nechi eli wam kweru nga o whnurnu nhne mernu, iznizni ikwu-onu Chiokike jiri a anya.

Nulu rime Antioku ke Pesidia

13 Polu nulu ele nulu ya sno kworu ogbo hiri nulu Pafosi zne Pega nulu rime Pamfilia, kovu Joni Maki gharuru be, lahna Jeruselem.

14 Be hi nulu Pega va nulu Antioku ke Pesidia nulu Obochi Ozukwa Inwe, be bna nulu rime oro ogbako ele Ju daziri eli.

15 Nga be gwnurnu hite n'Iwu Mozizi nulu nhne ele owhnurninya gbaru, ele risi oro ogbako zi be izi, "Rumu nda ai, o jaamasai ai o buru nulu anu ji izi okwnata ovu anu jeezni ele ka."

16 Polu gwuzoru, whenu be aka, bete nookwu oka, "Ele Izireli ibne m, nulu kpakara ele eli berere neekpenu Chiokike, anu bnote m nsni.

17 Chiokike ke ele Izireli hohiaru ele nda ai oknani, mee be okne mba nulu ige be zi n'eli Ijipiti, Chiokike hiri n'eli Ijipiti kwuhia be n'aka rikne.

18 O nagidnenu be nri awha eno n'eli-ikpa.

19 O luluru mba esau ke eli Kenani, gweru eli be nyee ele ke a ma o buru ke be.

20 Kpakara nhne ka mernu nhne nulu lele riwhu awha eno nulu nri isne.

"Omekwo, o nyee be ele ikpe, tem o du ige Sameli nye owhnurninya.

21 Nga be pioru eze, Chiokike nyernu be Solu nnwo Kisi, ke hi n'avnurnu Benjamini, buru eze nri awha eno.

22 Nga o gwemernu a, Chiokike mernu Devidi eze be, ka bu nhne Chiokike kwuru gbasiri a, 'M whnurnu m Devidi nnwo Jesi, nye nulu lele mkpoma m, nye jeeme kpakara nhne me pioru o mee.'

23 "Hite n'avnurnu nwerukna ka, Chiokike gwelizoru Nye Oznohia Jizosi, nyee Izireli lele kpa o kweru mkwna.

24 Si Jizosi panizoru ernu a, Joni beru osno kpwo okwo ma kpakara ele Izireli tuhna ma mkpoma ma be wu be mini.

25 Kpa Joni noronukpa ernu a, o kaa, 'Anu neche nulu m bu m nyele? M buo m nye wam anu neele anya a. Kovu o naava n'aznu m, m kwesige m owhudnahie toma eriri okoro-ochi a lawuru.'

26 "Rumu nda m, ele avnurnu Eberham nulu kpakara ele eli berere ele neekpenu Chiokike, izi oznohia ka bu nhne be neezni ai.

27 Ele wu nụ Jeruselem nụ ele risi be máa nụ ya bụ Nye Ọznohia, be ghóhiage ikwu-ọnu ele ọwhnurninya be nọogwnu kpakara Ọbochi Ozukwa Inwe. Kọvu be mernu nhne ele ọwhnurninya kwuru mezu nga be kperu a ikpe ẹnwu.

28 Ọ bụ ezi nụ be nwée nhne be ji ma a ikpe ẹnwu, be kaa Paịleti gbu a.

29 Nga be mezuru kpakara nhne be kwuru n'okwukwo nsọ gbasiri a, be vudna n'olu ọgba, lite a.

30 Kọvu Chiokike mernu o hi n'ẹnwu lizọ.

31 O mernu ele snornu a hi nụ Galili va Jeruselem whnụ a anya. Be bụ ele akebne nyee ele Izireli.

32 “A neezni anụ izi ọma Chiokike kweru ele nda aị ọknani mkwna.

33 Chiokike mezunnu aị rụmu be mkwna wam, hite nụ ome Jizọsi hi n'ẹnwu lizọ. Lele kpa be gbarụ Eri Ọma ke ẹbo,

‘Jiwa bụ Nnwọ m,
m mụrnu m jị tna.’

34 “Nhne Chiokike kwuru gbasiri ome ma o hi n'ẹnwu lizọ, o jóoro oro, bụ ka,

‘M jeenye i ngozi zị nsọ ke kwesiri ọkwnata ovu me kweru Devidi mkwna.’

35 O kwuru nụ hne berere,

‘I jéekwe ma nye nsọ ke i ro oro.’

36 “Devidi mernu nhne Chiokike piuru o mee n'ige ke a, ọ nwụ, be lite a nụ ngeri ilili ele ke a, o ro.

37 Kọvu nye wam Chiokike mernu o hi n'ẹnwu lizọ róge oro.

38 “Rụmu nda m, anụ mahia nụ ọ bụ hite nụ Jizọsi hne a nọokpo okwo ọgbaru mmehie.

39 Hite nụ ya, kpakara ele kweru jeenwernu ẹhni be hite nụ kpakara mmehie. Ka bụ nhne Iwu Mozizi nwée rikne mee.

40 Anya dụ anụ ẹli, ọ zị nhne ele ọwhnurninya kwuru be mezu n'ẹhni anụ,

41 ‘Le, anụ ele ọnu ọjo,
o ji anụ anya, anụ nwụ ẹnwu,

kwnornu nụ nhne me jọornu n'ọbochi anụ,

bụ nhne anụ jéekweru,

ọ bụbedi nụ nye berere kanụ anụ.’ ”

42 Kpa Pọlu nụ Banabasi nọowhoga n'oro ọgbako, be kanụ be va n'Ọbochi Ozukwa Inwe berere kwunu be ọka.

43 Nga ọgbako gbasarụ, agida ele Ju nụ ele bnarnụ okpukpe ele Ju snornu Pọlu nụ Banabasi. Be nookwunu be ọka ma be dazigidne n'oru ke Chiokike.

44 N'Ọbochi Ozukwa Inwe berere, kpakara ele zị n'ẹli wam znernu ọ nurnu ikwu-ọnu Nyenwe aị.

45 Nga ele Ju whnurnu igbudu badnụ wam, ọwho-anya jihia n'ovu be, be kwu ọka megidne nhne Pọlu kwuru, kpasị a iwhnerne.

46 Kọvu Pọlu nụ Banabasi jiri anya rikne nwụ ọka, kaa, “Ọ zị mkpa nụ a znernu ebe ọsno kwunu anụ ikwu-ọnu Chiokike, kọvu hne anụ juru a, gwnụ ẹhni anụ ele kwésile

budnu kwó okwo, a jaagharu anu, znekwnusi ele buo ele Ju.

⁴⁷ Kwnornu nu ka bu nhne Nyenwe ai nyernu n'iwu,

'M ziznenu m anu ma anu buru iwhne ke ele buo ele Ju,

ma anu buru apna oznohia mmehie ke kpakara owa.' "

⁴⁸ Nga ele buo ele Ju nuru nhne ka, mkpoma sori be n'onu k'agida, be znarni izi oma Nyenwe ai, ele be hohiaru kwnornu budnu kwó okwo kweru.

⁴⁹ Ikwu-onu Nyenwe ai gbasaru nu kpakara eli.

⁵⁰ Kovu ele Ju kpasu ele risi nu rime eli nu ele rinya kwu ele eli berere ele neekpenu Chiokike, be bete o kpakna Polu nu Banabasi ehni, be chihala be n'eli be.

⁵¹ Ele izi wam lisnama rizna ochi be megidne be, zne Aikoniom.

⁵² Ele sno apna Jizosi zi nu Antioku nwudna k'agida, Enine Nso jihia be.

14

Nu rime Aikoniom

¹ Nu rime Aikoniom, Polu nu Banabasi znenu nu rime oro ogbako ele Ju lele kpa be mesi, be kwu ikwu-onu Chiokike nu rikne ke mernu agida ele Ju nu ele buo ele Ju gho ele kweru ekwe.

² Kovu ele Ju ele kwé ekwe kpasuru ovu owe ehni ele buo ele Ju megidne rumu nda ai.

³ Polu nu Banabasi daziri pi gbu okwnu, be kwusi nhne

gbasiri oru Nyenwe ai rikne. Nyenwe ai mesiri ernu izi oma be rikne hite n'ernu ndu-ehni nu ernu elekema ke be n'ornu.

⁴ Kovu ele eli wam kewaru, agwna be danu ele Ju, ele berere dagwunu ele izi wam.

⁵ Ele Ju nu ele buo ele Ju gba iznuznu, be nu ele risi be mee be nhne rikne, o tu be akaworugwu nu o gbu ele izi wam.

⁶ Kpa ele izi wam nuru a, be gbazne Lisitira nu Debi, eli ele Laikonia, nu eli ke gbaru a gburugburu,

⁷ hne be zi neezni izi oma.

Nu rime Lisitira nu Debi

⁸ Otu nwerukna zi nu Lisitira nye dnarnu mgworo n'ochi lawuru, o bu nye mgworo kpa be muru a, o znekolele izne.

⁹ O dazi noobno nsni nhne Polu nookwu, Polu le a anya whnu nu o nwernu otukwasi ovu be ji o gwó a.

¹⁰ Polu gweru okne nkoli si okokoba kaa, "Lizo n'ochi i lawuru." Nwerukna wam gbu ewuru, bete neezne izne.

¹¹ Nga agida ele badnu wam whnuru nhne Polu mernu, be bete esi okokoba n'ikwu-onu ele Laikonia, kaa, "Chi ai gholam badnu va lekasi ai."

¹² Be jita Banabasi Zusi, be jita Polu Hemisi kwnornu nu o bu onu nookwu oka.

¹³ Nye naakwa ariohna Zusi ke oro a zi nu ruwhnu eli-ohna gweya ehni nu igwugwere n'onuhna. Ya nu agida ele badnu wam noopio o kwanu ele izi wam ariohna.

14 Nga Pọlu nọ Banabasị nọnnu nhne be noopio o mee, be dọwa iwo be, gba ẹso bna n'esiawuru agida ele badnu wam, neesi okokoba,

15 “Ele nwe m, ndaa nhne anu kwno neeme nhne ka? A bu badnu etekne lele anu. A varu o kpọ okwo izi oma ma anu hi nu kpakara nhne ka bna iru whuya, tuhna nakwnusi ke Chiokike zi budnu, nye mernu oligwe nu owa nu okne osimini nu kpakara nhne zi nu rime be.

16 N'ige wheru ewhe, Chiokike gharu kpakara ele badnu ma be zne n'apna ke be,

17 Kọvu, Chiokike mernu ehni a whuya iwhne hite nu nhne oma o neeme, o neenye anu mini ozuzo hite n'oligwe, nu mkpuru n'ige o kwesiri, o neenye anu wiri, mee snarnima jihia mkpoma anu.”

18 O bu n'ezi nu ele izi wam kwuru oka kpa, o bu nhne raru ehni o mee be gharu o kwanu be ariohna.

19 Agwna ele Ju hiri nu Antioku ke Pisidia nu Aikoniom va, be doru igbudu ele badnu wam yisi n'ehni be, be tu Pọlu akaworugwu, dọhala a nu rime eli be, be neeche nu o nwunam.

20 Kọvu kpa rumu nda gbaru a gburugburu, o lizo lahna nu rime eli-ohna, ke chi boru ya nu Banabasị zne Dẹbi.

*Be lahna Antioku
nu rime Siriya*

21 Pọlu nọ Banabasị zne zni izi oma nu Dẹbi, be nwehia agida ele sno apna Jizosi. Be lahna Lisitira, hite pi zne Aikoniom, zne Antioku nu rime Pisidia.

22 Be mee ele kweru ekwe gwuzosi rikne, kasi be mkpoma ma be dazigidne n'okwnata ovu, be kaa, “A jeehi nu rime agida awnwhnu bna n'eli-eze Chiokike.”

23 Nu rime ogbako Chiokike obula, Pọlu nu Banabasị hohia ele okno badnu, hite nu okpukpe nu ovu onu chete be nu ruwhnu Nyenwe ai, nye be kwnataru mkpoma.

24 Nga be znezuru eli Pisidia, be va nu Pamfilia.

25 Be kpọ okwo izi oma nu rime Pega, hite pi zne Atalija.

26 Be hite n'Atalija kworu ogbo lahna Antioku, hne be gweru be nyewhete n'oru ke Chiokike nu ernu be rnukworu* kitna.

27 Nga be vaduru nu rime Antioku, be sukwukota ele ogbako Chiokike kanu be kpakara nhne Chiokike jiri be rnu, nu kpa o gbamanu ele buo ele Ju onuhna ma be kweru.

28 Be nu ele kweru ekwe daziri pi gbu okwnu.

15

Ogbako ke zi nu Jeruselem

1 Agwna ele rukna hiri nu Judiya va Antioku bete neezni rumu nda, kaa, “Be nwée rikne znohia anu okwolem

* 14:26 Gwnu Ernu Ele Izi 13:1,2.

ma be kparu anu nka, lele kpa Iwu Mozizi kwuru.”

² Polu nu Banabasi nu be n'odogbuta gbasiri nhne ka, be kwekota nu Polu nu Banabasi nu agwna ele zi nu Antioku jeezne Jeruselem whnu ele izi Karaisi nu ele okno badnu gbasiri nhne ka.

³ Ele ogbako Chiokike zizne be, be zne nu rime Fonisia nu Sameria, be kwuhia kpa ele buo ele Ju tuhnsnakwnusiri Chiokike. Otnutnu ka mernu kpakara rumu nda nwudna k'agida.

⁴ Nga be vaduru Jeruselem, ogbako Chiokike, nu ele izi nu ele okno badnu nabnanyarnu be, be kanu be kpakara nhne Chiokike jiri be mee.

⁵ Kovu agwna ele kweru ekwe ele otu ele Farisi gwuzoru, kaa, “Be jaakpariri be nka, kanu be bita Iwu Mozizi.”

⁶ Ele izi nu ele okno badnu zne iznuznu ma be lebna anya nhne gbasiri oka ka.

⁷ Nga be kwuru agida oka gbu okwnu, Pita gwuzoru, kaa, “Rumu nda m, anu magwu kpa n'ige wheru ewhe kpa Chiokike hohiaru m n'esilawuru anu, zne zni ele buo ele Ju izi oma ma be nurnu, kweru masi.”

⁸ Chiokike nye marnu mkpoma kpakara badnu, gbaru akebne gbasiri be. O nyernu be Enine Nso lele kpa o nyernu ai.

⁹ O kpáge ike n'esilawuru ai nu be, o snusnarnu ovu be kwnornu nu be kweruru.

¹⁰ Kini kpararu anu jaakpa Chiokike iru kitna hite n'otukwasi ele kweru ekwe ivu ke ai nu ele nda ai oknani nwée rikne vuli.

¹¹ Oza, a kweruru, be znohia ai hite n'oru Nyenwe ai Jizosi lele be masi.”

¹² Kpakara be daziri bii kpa be noobno nsni nhne Banabasi nu Polu nookwu gbasiri kpakara ernu ndu-ehni Chiokike hiri n'aka be rnu n'esilawuru ele buo ele Ju.

¹³ Nga be kwukworu, Jemisi gwelizo onu kaa, “Rumu nda m, anu bnote m nsni n'onu.

¹⁴ Saimoni karu kpa Chiokike hiri nu mbom gesi ele buo ele Ju ruwhnu oma a, o mernu agwna be buru ele ke a.

¹⁵ Ikwu-onu ele owhnurninya nu nhne ka dnakotaru n'otu, lele kpa okwukwo nsokwuru,

¹⁶ “Nyenwe ai karu, Omekwo,

m jaalahna,

m jeegwulizo oro Devidi dnarnu adna,

m jeegweme mkpomkpo oro a, wulizo a,

m jeeme a o gwuzosi rikne berere.

¹⁷ M jeeme ka ma kpakara ele badnu pio Nyenwe ai,

kpakara ele buo ele Ju ele me sukwuru ma be buru ke m.

Ka bu nhne Nyenwe ai nye mernu kpakara nhne kwuru.

¹⁸ O bu nye mernu ele badnu mahia kpakara nhne hite nu mbom.”

¹⁹ Jemisi nookwuzne, “Echiche m bu ka, a kpakna

ele búo ele Ju ẹhni, bú ele tũhnasnakwnusiri Chiokike.

²⁰ Kọvu a gbanu be ọkwukwo, kanu be, be ri wiri ọbula zila richna be kwaru ariohna nyee renwu, be meko ọyi, be riko anọ ọbula be higburu ehigbu, be riko ọvnarna.

²¹ Kwnornu nu be noogwnu Iwu Mozizi agida ige wheru ewhe n'oro ọgbako be nu kpakara Ọbochi Ozukwa Inwe, be nookpo okwo ikwu-onu Mozizi nu kpakara eli."

*Ele izi gbanu ele búo
ele Ju ele ọkwukwo*

²² Ele izi nu ele okno badnu, be nu kpakara ọgbako Chiokike, kpebi o hohia agwna ele badnu n'esilawuru be zizne be Antioku, be nu Polu nu Banabasi. Be hohia Judasi, nye be kwu Basabasi, nu Saɪlasi, ele rukna lawuru berere ele rumu nda nooso anya.

²³ Be gba ọkwukwo izi ka zizne be,

"Aɪwa ele izi Karaɪsi nu ele okno badnu, rumu nda anu, neebekwu kpakara rumu nda ele búo ele Ju wu nu rime Antioku, Siriya nu Silisia. A bekwulem anu.

²⁴ A nurnu nu agwna ele rukna n'esilawuru ai varu kpakna anu ehni, mee ovu la anu mini hite nu nhne be kwuru, be nuna nhne ka n'onu ai gbasiri a.

²⁵ A gbaru iznuznu n'otu, a kwekorita o zianu anu ele izi a hohiaru, be nu ele enyi ai a whurnu n'anya, Banabasi nu Polu,

²⁶ ele gweru budnu be nyee nu nhne oze budnu kwnornu nu n'ernu Nyenwe ai Jizosi Karaɪsi.

²⁷ A ziyannu anu Judasi nu Saɪlasi, ele jaakanu anu nu ruwhnu nu ruwhnu nhne a gbaru n'okwukwo.

²⁸ Ai nu Enine Nso kwekotaru, a tukwasi ivu berere, be gweme kpakara nhne ka zi mkpa.

²⁹ Anu riko wiri ọbula be kwaru ariohna nyee renwu, anu riko ọvnarna, anu riko anọ ọbula be higburu ehigbu, anu meko ọyi. O joburunu anu oma o buru anu mee kpm. Anu dazikwaru nkari."

³⁰ Be zizne ele izi wam Antioku, nga be duru Antioku, be sukwukota kpakara ele kweru ekwe nyega be ọkwukwo izi wam.

³¹ Nga ele badnu wam gwnurnu ọkwukwo izi wam, ovu sọru be n'onu k'agida kwnornu nu izi okwnagidne wam.

³² Judasi nu Saɪlasi, ele bu masi ele owhnurninya, kwu oka gbu okwnu naagba be inwe.

³³ Be daziri ige mati, be zihnala be n'udno znekwnusi ele ziyaru be. [

³⁴ Kọvu o masiri Saɪlasi o daziri pi.]

³⁵ Polu nu Banabasi daziri ige mati nu Antioku be nu agida ele berere, be zne kpo okwo ikwu-onu Nyenwe ai.

Polu nu Banabasi kewaru

³⁶ Omekwo, Polu kanu Banabasi, "Ngwa ma a lahna, lekasi rumu nda ai nu

kpakara ẹli-ọhna hne a znirni izi ọma Nyenwe aị, whnụ kpa be naagbali.”

³⁷ Banabasi piuru ma be nụ Jọni Makị snornu zne.

³⁸ Kọvu Pọlu kwége o snornu be, kwnornu a dázigidnege n'ernu wam, kọvu ọ ghasarụ be nụ Pamfilia.

³⁹ Be dogbuta ka k'agida, be kewa ẹhni be. Banabasi kwuru Makị kwowhe mini zne Saiporosi.

⁴⁰ Pọlu họru Saịlasi, rụmu nda gweru be yisi n'oru ke Nyenwe aị, be whọga.

⁴¹ Ọ gwahwe Siriya nụ Silisia naagba kpakara ọgbako Chiokike inwe.

16

Timoti snornu Pọlu nụ Saịlasi zne

¹ Pọlu zne Dẹbi nụ Lisitira. Otu nye sno apna Jizọsi zị pịi, nye rewhna a bụ Timoti, nne a bụ nyerinya Ju ke kweru ekwe, kọvu nda a bụ nye Giriki.

² Kpakara rụmu nda ele zị nụ Lisitira nụ Aikoniom nookwu Timoti ọka ọma.

³ Pọlu piuru o kwuru Timoti zne, ọ kpa a nka. O mernu ka kwnornu nụ kpakara ele Ju wu n'ẹli ka maam nụ nda a bụo nye Ju.

⁴ Kpa be neezne hite n'otu ẹli-ọhna dụ n'ẹli-ọhna berere, be nyee ele kweru ekwe iwu ke ele izi nụ ele okno badnụ zị nụ Jeruselem nyernu, kanụ be be bita kpakara iwu ka.

⁵ Kpakara ọgbako Chiokike gwuzosi rikne n'ọkwnata oву, naabahnasị n'ọbochi n'ọbochi.

Pọlu whnurnu ọwhnurninya nụ Torasi

⁶ Be gawhe n'esilawuru ẹli Firigia nụ Galasia, kwnornu nụ Enine Nsọ kwéle be kpọ okwo izi ọma nụ ẹli Esia.

⁷ Nga be duru n'ike ẹli Misia, be pio o zne ẹli Bitinia, kọvu Enine Jizọsi kwéle be.

⁸ Kam kpayarụ be jiri zne Misia nụ Torasi.

⁹ Pọlu whnụ ọwhnurninya n'abalị hne ọ whnurnu otu nwerukna Masidonia, gwuzo nụ ruwhnu a naariasno a, “Bikno, va Masidonia yisinu aị aka.”

¹⁰ Kpa Pọlu whnurnu ọwhnurninya ka, ngangam a jiknenu o zne Masidonia, kwnornu nụ a kweru nụ Chiokike sukwuru aị kpọ okwo izi ọma pịi.

Lidiya nụ ele ọro a

¹¹ A kwọru ọgbo hite nụ Torasi otu ngam zne Samotirasi, n'ekile a zne Niapolisi.

¹² A hite nụ pịi zne Filipaị, ẹli ele Rom nẹchi ke bụ risi ọchichi ẹli Masidonia. A daziri ọbochi ele nụ ele n'ẹli wam.

¹³ N'Ọbochi Ozukwa Inwe a whọga n'ẹli-ọhna zne ngeri osimini, hne a leru anya nụ a jọowhnu hne be kpe okpukpe. A daziri ẹli bete o kwunu ele rinya ele gbakọru pịi ọka.

¹⁴ Otu nye bnoteru nsni bụ Lidiya nye hi nụ Taịtira, nye neere iwo odno odno. O bụ nwerinya neekpenu Chiokike, Nyenwe aị kpume mkpọma a, o bno nsni nhne Pọlu nookwu.

¹⁵ Nga be wuru a mini ya nụ kpakara ele ọro a, o sukwu aị,

kaa, “Ọ bụru nụ anụ kweru nụ m bụ m nye kweru nụ Nyenwe aị, anụ va daziri n'oro m.” O kwnagidne aị.

Pọlu nụ Saịlasi n'oro ikelu

16 Otu ọbochi kpa a neezne hne okpukpe, otu ọhi rinya nye renwu ojo nwugwu zuru aị, nye nookwu nhne jeeme n'ige zị nụ ruwhnu. Ọ naakpanụ ele nwe a agịda iwai hite n'ọwhnurninya.

17 Nnwọ rinya ka snornu aị nụ Pọlu neesi okokoba, kaa, “Ele rukna ka bụ ele izi Chiokike ke Kakwo Nhne Dum Olu. Be neegesi anụ apna anụ jeenwe ọznohia.”

18 Ka bụ nhne o neeme agịda ọbochi, tem ovu we Pọlu ẹhni, ọ tūhnasna kanụ renwu ojo wam, “M ji m renwhna Jizọsi Karaisi nyee i iwu, hi nụ rime a whụya.” Renwu ojo wam hi nụ rime a whụya ngangam.

19 Nga ele nwe a whnurnu nụ apna be neeji naakpa iwai mesnirni, be pnurnu Pọlu nụ Saịlasi zne n'esilawuru ahia n'aka ele neechi ẹli-ọhna.

20 Be gwuzote be nụ ruwhnu ele risi, kaa, “Ele rukna ka bụ ele Ju, be neegweya mkpakpọ nụ rime ẹli-ọhna aị.

21 Be neezni omen'ẹli ke megidnernu iwu aị ele Rom, ke a nwée rikne bitali mọbu mee nhne be neezni.”

22 Agịda badnụ wam yisi aka megidne be, ele risi dọwa iwo Pọlu nụ Saịlasi, nyee iwu be pnia be nhne.

23 Nga be pniakworu be nhne k'agịda, be tūbna be nụ rime ọro ikelu, kanụ nye risi

oro ikelu o legidne be anya nkari.

24 Nga nye risi ọro ikelu nurnu iwu ka, ọ tūbna be nū rime rime ọro ikelu, tūsi ọchi be nū rime igwe isisi.

25 N'esilawuru abali Pọlu nū Saịlasi bete neekpe okpukpe, nọogwnunu Chiokike eri ọznarni, ele ikelu berere noobnonu be nsni.

26 Ngangam, ẹli tneru enye, ke mernu ntụ-ẹli ọro ikelu mernu imerne. Ngangam, kpakara ọnuhna gbamarnụ, ijigba dna hnala n'ẹhni kpakara ele ikelu.

27 Nye risi ọro ikelu wam tnenyarnụ n'anyarna, nga ọ whnurnu kpakara ọro ikelu gbamarnụ, o che nū kpakara ele ikelu gbawhulem, ọ mniornu ama-ogwnu a ma o gbu ẹhni a.

28 Kọvu Pọlu siwama okokoba, kaa, “I mékasi ẹhni i nhne, kpakara aị zị hna.”

29 Nye nye risi ọro ikelu wam kaa be nyee a tọnji, ọ gbabna rime ọro ikelu, ọ marnụ rururu dna n'ẹli n'ọchi Pọlu nū Saịlasi.

30 O kwuhia be, sika be, “Ele nwe m, kini bụ nhne me jeeme ma be znọhia m?”

31 Be kaa, “Kweru nū Nyenwe aị Jizọsi, be jọoznohia jị nū ele ọro i.”

32 Be kwunu a izi ọma Nyenwe aị, ya nū kpakara ele zị n'oro a.

33 N'ige abali wam, nye risi ọro ikelu wam kwuru be, snụ ẹnya be, otu ngam be wu ya nū ele ọro a mini.

³⁴ Nye risi ọro ikelu wam kwuru Pọlu nụ Saịlasi la n'ọro a, nyee be wiri, mkpọma sọru a n'ọnu, ya nụ ele ọro a, kwnornu nụ be kweruru nụ Chiokike.

³⁵ N'osisi, ele risi ẹli-ọhna zizne ele badnụ be sigbasi ele rukna wam la.

³⁶ Nye risi ọro ikelu wam kanụ Pọlu, "Ele risi nyernu iwu jì nụ Saịlasi la. Anụ la n'udno."

³⁷ Kọvu Pọlu kanụ ele wam be duyaru, "Be mágele aị ikpe nhne ọjọ ọbula, be pnià aị nhne n'ahịa, hne a bụ ele Rom. Be túbna aị n'ọro ikelu. Kítina, be néesigbasi aị nụ mgwugwa? Óza! Ele ọchichi ele risi ẹli-ọhna jaava hna, gbahịa aị n'ọro ikelu."

³⁸ Ele wam znernu kanụ ele risi ẹli-ọhna nhne Pọlu kwuru. Nga be nurnu nụ be bụ ele Rom, ogwnu tũru be.

³⁹ Be zne riasno be, gbahịa be n'ọro ikelu, kanụ be whọga nụ rime ẹli be.

⁴⁰ Pọlu nụ Saịlasi whọga n'ọro ikelu, zne n'ọro Lidiya. Be nụ rumu nda whnụ, be kwunu be ikwu-ọnu ọsnuta mkpọma, gharụ be, la.

17

Nụ rime Tẹsalonika

¹ Be gawhe nụ rime Amfipolisi nụ Apolonia, be vadu Tẹsalonika, hne be whnurnu ọro ọgbako ele Ju.

² Lele kpa omen'ẹli Pọlu zì, o zne n'ọro ọgbako ele Ju, n'Ọbochi Ozukwa Inwe ọbochi ẹto, ya nụ ele badnụ kwurita ọka nhne zì n'ọkwukwo nsọ.

³ Ọ kọwanu be, gesi be nụ Karaisi jaata awhnụwhnu, omekwo, o hi n'ẹnwu lizọ. Pọlu kanụ be, "Jizọsi nye me nọokpo okwo a, bụ Karaisi wam."

⁴ Agwna be kweru, snornu Pọlu nụ Saịlasi, ma agida ele bụo ele Ju neekpenu Chiokike nụ agida ele rinya be marnụ rẹwhna be.

⁵ Kọvu ele Ju kwnornu awụwa, chikota agwna ele ojo zì n'ahịa, be lizọ megidne be. Okne mkpakpọ dna n'ẹli wam. Be zne n'ọro Jasoni ma be pnuhia Pọlu nụ Saịlasi nyee ele wam.

⁶ Kọvu kpa be whnúge be, be pnurnu Jasoni nụ rumu nda berere zne nụ ruwhnu ele risi ẹli, neesi okokoba, kaa, "Ele rukna ka noovuya mkpaghasi kpakara ọhna valẹm ẹli aị.

⁷ Jasoni bikhwataru be n'ọro a. Be zá naabita iwu Siza, be naakaa eze berere zì, nye be nookwu Jizọsi."

⁸ Be ji ikwu-ọnu nụ kpa mee okne mkpakpọ dna n'ẹli-ọhna ma n'esilawuru ele risi ẹli.

⁹ Ele risi ẹli mee Jasoni nụ ele ya nụ be sno kwụ iwu, be sigbasi be la.

Nụ rime Beria

¹⁰ Nga chi jiri, rumu nda zihala Pọlu nụ Saịlasi zne Beria. Nga be dũru, be zne n'ọro ọgbako ele Ju.

¹¹ Ele zì nụ Beria nwernu ovu ọma karụ ele zì nụ Tẹsalonika. Mkpọma be jikn-ernu o bno nsnì n'ikwu-ọnu ka, be nyosna rime ọkwukwo nsọ kpakara ọbochi ma be

whnụ nhne Pọlu nookwu ọ bụ ezi ọka.

¹² Agịda ele Ju kweru, ma agịda ele bụo ele Ju, ka bụ ele rinya be marnụ rẹwhna be, nụ ele rukna, kweru masị.

¹³ Kọvu nga ele Ju ele zị nụ Tẹsalonika nurnu nụ Pọlu nọokpo okwo izi ọma Chiokike nụ rime Beria, be va kpakne ovu ele badnụ megidne Pọlu.

¹⁴ Ngangam, rụmu nda zihala Pọlu zne ngeri osimini, kọvu Saịlasi nụ Timoti dazịgidne nụ Beria.

¹⁵ Ele rukna sno Pọlu snornu a dụ Atęsi. Pọlu kanụ be, be kanụ Saịlasi nụ Timoti kwnusi a wara wara. Ele rukna lahna Beria.

Nụ rime Atęsi

¹⁶ Kpa Pọlu neese ma Saịlasi nụ Timoti vakwnusi a n'Atęsi, o gburu a igbugbu kpa ọ whnurnu nụ kpakara ele ẹli wam neekpenu rẹnwu zị ọdo n'ọdo.

¹⁷ Ya nụ be kwurita ọka n'ọro ọgbako ele Ju, ma ele Ju ma ele bụo Ju ele neekpenu Chiokike. Ya nụ kpakara ele ọ whnurnu nụ rime ahịa kpakara ọbochi nookwurita ọka.

¹⁸ Agwna ele zni nhne be kwu ele Epikuri nụ ele Sitoiki nụ Pọlu nọdogbuta, ele ka kaa, "Ndaa nhne nye iwhnirniwhno ka nookwu?" Ele berere kaa, "O nookwu nhne gbasiri chi ikne." Be kwuru ka kwnornu nụ Pọlu nọokpo okwo izi ọma gbasiri Jizọsi nụ kpa o hiri n'ẹnwu lizọ.

¹⁹ Be kwuru Pọlu zne n'ogbo ele Ariopagosi, kaa, "A

pioru ọ mahia nhne gbasiri iznizni ikne i nookwu.

²⁰ Agwna nhne i nookwu bụ nhne ikne nụ nsnị aị, a pioru ọ mahia risi ọka ka."

²¹ (Kpakara ele Atęsi nụ ele ẹli berere wu nụ Atęsi nootuwu ige be noobno nsnị nụ ọtnutnu ikne ọbula varu.)

²² Pọlu gwuzoru nụ ruwhnu ọgbako ele Ariopagosi, kaa, "Ele rukna Atęsi, m whnurnu m nụ anụ nwernu ovu okpukpe n'apna ọbula.

²³ Kpa me neezne izne nụ rime ẹli anụ, m whnurnu m nhne zị ọdo n'ọdo anụ neekpenu, m whnurnu m masị otu ojo ariohna be gbasiri nhne n'olu a, 'Nye Chi ke a máa.' Nye wam anụ neekpenu, ọ bụ n'ezi nụ anụ máa, bụ nye me nookwu ọka gbasiri a.

²⁴ Chiokike ke keru ọwa nụ kpakara nhne zị nụ rime a, bụ Nyenwe oligwe nụ ọwa, o wú n'ọro okpukpe ke ele badnụ jiri aka be wu.

²⁵ Nhne badnụ mernu nyee a zila mkpa, hne ọ bụ ya neenye badnụ budnu nụ inwe nụ kpakara nhne.

²⁶ Hite nụ otu badnụ o keru kpakara mba zị n'ọwa, mee be wuru nụ kpakara ọwa. O jiri aka a kpa ike ige kwesiri nụ hne ele badnụ joowu n'ọwa.

²⁷ O mernu ka ma ele badnụ pio a, dna ndidna gbasiri, pohia a. Kọvu Chiokike zila ikere hne a zị.

²⁸ Lele kpa otu badnụ kwuru, 'A zị budnu, neezne izne nụ rime a.' Agwna ele

nkari ọkwukwo anụ karu, ‘A bu rumu a masi.’

²⁹“Hne a bu rumu Chiokike, a chéko nụ Chiokike nụ lele nhne ọbula be pñiornu ọpniọ lele golu mọbu siliva, mọbu akaworugwu ke badnụ jiri nkari aka a nụ akoniche a pniọ.

³⁰ Chiokike lewhuru ige badnụ máa nhne anya, kovu, kịtna, o nyernu iwu kpakara ele badnụ hi nụ nhne ojo be whuya.

³¹ Kwnornu nụ ọ bitaru otu ọbochi o jeeji ikpe zị snam kpe kpakara ọwa ikpe, hite n'aka otu badnụ o hohiaru. O mernu ka whuya iwhne kwnornu nụ o mernu o hi n'ẹnwu lizo.”

³² Nga be nurnu Pọlu kwuru nhne gbasiri olizo n'ẹnwu, agwna be mee a nhne rumu, kovu agwna be kaa, “A pi-oru ọ nurnu nhne ka n'ọnu i berere.”

³³ Pọlu whoga nụ rime ọgbako be.

³⁴ Agwna ele rukna snornu Pọlu kweru, n'esilawuru be bu Dionisiosi nye otu ele Ariopagosi. Otu nwerinya rewhna a bu Damarisi nụ ele berere kweru masi.

18

Nu rime Korinti

¹ Nga ka wheru, Pọlu whoga nụ Atensi zne Korinti.

² O whnurnu otu nye Ju, rewhna a bu Akwila, nye be murnu nụ Pontosi, nye hiri n'Itali va, ya nụ nnwerne a Prisila, kwnornu Kalaudiosi nye nechi nyernu iwu

kpakara ele Ju whoga nụ rime Rom. Pọlu zne ọ whnụ be.

³ Ya nụ be wuru, o snornu be rnụ ernalu ome tenti, kwnornu nụ be nwernu otu aka ernalu.

⁴ O nookwu oka n'oro ọgbako ele Ju kpakara Ọbochi Ozukwa Inwe, naakanu ele Ju nụ ele Giriki oka.

⁵ Nga Saĩlasi nụ Timoti hiri nụ Masidonia va, Pọlu gweru kpakara ige yisi nụ ọkpo okwo izi oma, naagba ama nụ Jizosi bu Karaĩsi nyee ele Ju.

⁶ Nga be lizoru megidne Pọlu, kpari a, ọ lĩsnama iwo a kanu be, “Ovnarna anu dazim nụ risi anu, aka m zị richna. Hite kịtna, mjeeznekwnusi eli ele buo ele Ju.”

⁷ O gharu be, zne wuru n'oro otu nye buo nye Ju neekpenu Chiokike, rewhna a bu Taĩtosi Jositosi, nye oro a n'oro ọgbako ele Ju gba.

⁸ Nye risi oro ọgbako ele Ju wam, nye rewhna a bu Kirisiposi, kweru nụ Nyenwe ai, ya nụ ele oro a, nụ agida ele berere nụ rime Korinti nurnu izi oma, kweru, be wu be mini.

⁹ Pọlu whnurnu ọwhnurninya n'otu abali, Nyenwe ai kanu a, “Ogwnu tũko i, nọkpo okwo, i kpũsni ọnu i.

¹⁰ M dagwunu m ji, ọ zá nye jeenwe rikne mekasi i nhne, m nwernu m agida ele badnụ n'eli ka.”

¹¹ Pọlu daziri n'eli wam otu awha n'ẹnwa isunu, neezni ele badnụ ikwu-ọnu Chiokike.

¹² Nga Galio bu nye nechi Akaya, ele Ju gbakoru n'otu

mee mkpakpo megidne Polu, be kwuru a zne n'oro ikpe.

¹³ Be kaa, “Nwerukna ka neezni ele badnu kpa be jeekpenu Chiokike ke megidneru iwu ai.”

¹⁴ Polu noopio o kwu oka nga Galio kanu ele Ju, “O buru nu ka bu nhne ojo ke megidneru iwu eli, m joobnonu anu nsni.

¹⁵ Kovu hne o bu nhne gbasiri rewhna, n'oka ke iwu anu, anu lebna anya nu rime a, m jéenwe rikne kpe ikpe gbasiri a.”

¹⁶ O chihala be n'oro ikpe.

¹⁷ Be nwudne Sositenis, nye risi oro ogbako ele Ju, li a nhne nu ruwhnu oro ikpe. Kovu o gbasila Galio rja rja.

Polu lahnaru Antioku nu rime Siriya

¹⁸ Polu nu rumu nda daziri nu Korinti agida obochi, o whoga, Prisila nu Akwila snornu a zne Siriya. O ko rukeri-ize a nu Kenkiria, kwnornu mkwna o kweru ige wheru ewhe.

¹⁹ Be du Efesosi, Polu ghasa Prisila nu Akwila. O bna nu rime oro ogbako ele Ju, ya nu ele Ju kwurita oka.

²⁰ Be kanu a, o daziri gbu okwnu, kovu o kwéle.

²¹ Nga o naala, o kanu be, “O buru o masi Chiokike, m jeehiehnakwnusi anu.” O kworu ogbo whoga nu Efesosi.

²² Nga o duru Sizaria, o zne Jeruselem bekwu ogbako Karaishi, hite pii zne Antioku.

²³ O daziri ige mati pii, o whoga zne nu rime Galasia

nu Firigia, naagba kpakara ele kweru ekwe inwe.

Polu nu rime Efesosi

²⁴ Otu nye Ju rewhna a bu Apolosi, nye be muru nu Alekizandaria varu Efesosi, o bu nye nkari oka, nye marnu nhne be gbaru n'okwukwo nsu nkari.

²⁵ Be zurnu a n'apna ke Nyenwe ai. O ji onwunwu bekwnu mkpoma zni nhne gbasiri Jizosi nu kpa o kwe-siri, kovu o magwu nhne gbasiri owu mini Joni kpoi.

²⁶ O bete nookwu oka n'anya rikne n'oro ogbako ele Ju. Nga Prisila nu Akwila nuru a, be kwuru a la n'oro be, znikwata a n'apna Chiokike nkari.

²⁷ Apolosi kpebi o zne Akaya, rumu nda ele zi n'Efesosi gba okwukwo ma rumu nda ele zi n'Akaya nabnanya a. Nga o duru, o zneknusi ele kwehjaru hite n'oru Chiokike, o yinu be aka.

²⁸ Hite n'anya rikne ke oka a, o mernu ele Ju kpusni onu n'ohna, o mernu be mahia hite n'okwukwo nsu nu Jizosi bu Karaishi.

19

Polu nu rime Efesosi

¹ Kpa Apolosi zi nu Korinti, Polu gawheru nu rime eli vadu Efesosi. O whurnu agwna ele sno apna Jizosi pii.

² O sikwa be, “Anu nahiala Enine Nso kpa anu kwerru?”

Be kaa, “A nuna rja rja ma o zi nhne be nookwu Enine Nso.”

3 Pọlu sịkwa be, “Nda kpa be wụru anụ mini?”

Be kaa, “Hite n'ọwuwu mini Jọni.”

4 Pọlu kaa, “Jọni wụru ele tųhnasnarnu nụ nhne ojo be mini, ọ kanụ ele Izireli be kweru nụ nye naava n'aznụ a, nye wam bụ Jizọsi.”

5 Nga be nurnu a, be wụ be mini nụ rẹwhna Nyenwe aị Jizọsi.

6 Pọlu tųkwasi be aka nụ risi, Enine Nsọ dnakwasị be, be kwu ọka nụ riro ikne, kwusa izi ọma Chiokike.

7 Be hna lele ele nri ele rukna lawuru.

8 Pọlu zne n'oro ọgbako ele Ju, ẹnwa ẹto ya nụ be nọdogbuta, o jiri anya rikne kwu ọka gbalị ọ kanụ ele Ju nhne gbasiri ẹli-eze Chiokike.

9 Kọvu agwna be mernu risi rikne, be kwéle o kweru, be kwu ọka ojo megidne apna Nyenwe aị nụ ruwhnu agida ele badnụ. Pọlu gharu be, kwuru ele sno apna Jizọsi, ya nụ be nookwurita ọka kpakara ọbochi n'oro ọmumu ọkwukwo Tairanosi.

10 Be mernu nhne ka awha lawuru ke mernu kpakara ele wu n'ẹli Esia nurnu ikwu-ọnu Nyenwe aị, ma ele Ju nụ ele bụo ele Ju.

11 Chiokike rnurnu ernalu elekema zị n'ichne hite n'aka Pọlu.

12 Hite n'ẹhni a be neegwepiya wepe nụ nkiti nhne gweznenu ele nriria zị ọdo n'ọdo ji, be gwọ be, rẹnwu ojo hi n'ẹhni be whọga.

13 Agwna ele Ju ele naagaghari nẹechihala rẹnwu ojo pio o ji rẹwhna Jizọsi mee kpam. Be kanu rẹnwu ojo, “M neenye i iwu nụ rẹwhna Jizọsi nye Pọlu nọokpo okwo a.”

14 Rumu rukna ẹsau otu nye Ju, nye risi ariohna rẹwhna a bụ Sikeva, mernu kpa.

15 Kọvu rẹnwu ojo wam kanu be, “M maam Jizọsi, m maam Pọlu, kọvu anụ bụ ele kele?”

16 Nwerukna wam rẹnwu ojo wam wu nụ rime a bna be, megbu kpakara be, mekasi be ẹhni. Be hi nụ rime ọro wam vuru ọru, gbaru ẹto gbawhu.

17 Kpakara ele Ju nụ ele bụo ele Ju wu nụ Efesosi nurnu nhne ka, ogwnu tų kpakara be. Be sọbisinu rẹwhna Nyenwe aị Jizọsi k'agida.

18 Agida ele kweru ekwe varu kwuhia nhne be mernu nụ ruwhnu ele badnụ.

19 Agida ele amusu vuyaru kpakara ọkwukwo be, kpọ be bekwunu nụ ruwhnu ele badnụ. Be gwnukota ọnu ahia be, pokwu mkpuru iwai siliva isne.

20 Kpam ikwu-ọnu Chiokike gbasaru, ji iknernema gwuzosi rikne.

21 Nga nhne ka mekworu, Pọlu kpebi ọ gawhe Masidonia nụ Akaya zne Jeruselem. O kaa, “Me znekwo, m jeezne Rom.”

22 O zizne ele neeyinu a aka izi, Timoti nụ Erasitosi, zne Masidonia. O daziri ige matị n'ẹli Esia.

Ēli ghara ghara n'Efesosi

23 Okne ėli ghara ghara dnarnu n'Efesosi kwnornu n'apna Nyenwe aĭ.

24 Otu nye nŋokpu siliva, nye řewhna a bu Demetirisi, nye nŋokpu oro igbudu Dĭana, chi ele Efesosi, nye mernu ele řernu a nwe mbnarna k'agĭda.

25 O sukwukŋta ele řernu a nu kpakara ele nu ya nwernu otu aka řernu, ŋ kanu be, "Anu magwu nu a neenwehia agĭda ĭwai hite n'řernu aĭ.

26 Anu nŋowhnu, nŋonu nhne badnu ka be kwu Polu neeme. Ő karu nu chi be jiri aka kpu buŋo chi řia řia. O mernu agĭda ele badnu kweru ŋka a, nu hna n'Efesosi ma nu kpakara ėli Esia.

27 Ő buŋo nu řernu aĭ joowhu dai, kŋvu ogwnu nŋotu aĭ nu oro okne chi aĭ Dĭana jŋoburu nhne etekne, igwugwu a whu, bu chi ke kpakara ele Esia nu kpakara ŋwa nŋokponu risi ėli."

28 Nga agĭda ele badnu wam nurnu a, ŋuma jihĭa be mkpŋma, be bete neesi okokoba, "Dĭana ele Efesosi bu dikne."

29 Mkpakpo wam gbasa kpakara ėli-ŋhna. Agĭda ele badnu wam nwudne Gayosi nu Arĭsitakosi, ele rukna Masidonia be nu Polu sno neezne izi, pnurnu be zne ŋbakoro ėli-ŋhna.

30 Polu pioru ma o zne nu ruwhnu ele badnu wam, kŋvu ele kweru ekwe kwėle a.

31 Agwna ele nechi ėchi ele enyi Polu zi izi, naarĭasno a, o

gĕsikŋ ėhni a n'ŋbakoro.

32 Kŋvu nu mkpakpo zi nu rime oro ŋbakowam, agwna badnu neesi otu nhne, ele berere neesi nhne berere, ele kakwo n'esilawuru be mĕa nhne be kwnornu gbako.

33 Agwna be kaa nu Alĕkizanda bu nye risi mkpakpo wam, ele Ju gwuzote a nu ruwhnu ŋhna. Alĕkizanda whenu be aka ma o nwernu rikne kwu ŋka, ma ŋ gŋhoru ŋnu nu ruwhnu ele badnu.

34 Kŋvu nga be mahĭaru nu ŋ bu nye Ju, be si okokoba n'otu ŋnu lele awa lawuru, kaa, "Dĭana ele Efesosi bu dikne."

35 N'ipne-aznu, nye gba ŋkwukwo ėli-ŋhna mee be daziri bii, ŋ kaa, "Ele rukna Efesosi, ele badnu magwu nu ėli Efesosi bĭtaru oro Dĭana nu igbudu a ke hiri n'olu dna.

36 Badnu nwĕe rikne gŋnahoru nhne ka. Anu daziri bii, anu mĕe nhne buŋo ŋma.

37 Anu kwuyaru ele rukna ka hna, ŋ bu n'ezi nu be znuge buznu n'oro Dĭana, mŋbu kparĭ chi aĭ.

38 Ő buru nu Demetirisi nu ele řernu a noobno nye ŋbula nhne, ŋbochi ikpe zi, ele risi ikpe zimako, be kpe ėhni be ikpe nu ruwhnu ele ikpe.

39 Ő zi nhne berere anu pi-oru, be jookwu a n'oro ŋbakowam ikpe lele kpa iwu kwuru.

40 Kwnornu nu ogwnu nŋotu aĭ nu be jaakaa nu a mernu mkpakpo nu nhne mernu tna. A nwĕe rikne kŋwali risi mkpakpo ka mŋbu kaa nhne vuyaru a."

41 Nga o kwukworu kpa, o gbaso ogbako wam.

20

Polu znernu Masidonia nu Girisi

1 Nga mkpakpo wam biri, Polu sukwukota ele kweru ekwe n'otu, kwunu be oka osnuta mkpoma, o kanu be, be dazikwaru nkari, o whoga zne Masidonia.

2 O zne nu rime kpakara eli wam nookwu agida ikwu-onu osnuta mkpoma tem o vadu Girisi.

3 O daziri pii enwa eto. Ele Ju naagba iznuznu nhne be jeeme a kpa o piuru o zne Siriya, o kpebi o lahna hite nu Masidonia.

4 Sopata nnwo Pirosi nye Beria snornu a zne, ma Arisitakosi nu Sekundosi hi nu Tesalonika, Gayosi hi nu Debi, Taikikosi nu Tirofimosi ele hi n'Esia, nu Timoti.

5 Ele ka beru osno neese ai nu Torasi.

6 Nga Iriri Bredi Whuge Owhu whemernu, a hi nu Filipai kworu ogbo zne ke obochi isne wheru du Torasi. A daziri otu ikwezu.

Polu znernu Torasi

7 N'obochi mbom n'ikwezu, kpakara ai gbakoru ma a ri wiri n'otu, Polu bete nookwunu ele badnu oka tem du n'esilawuru abali, hne o bu nu o naala n'osisi.

8 Agida tonji noonwu n'oro olu hne a zi n'ogbako.

9 Otu nnwo ikoro rukna rewhna a bu Yutikosi dazigwu eli n'olu mgbo-wekpeke. O

bete neezni anyarna kpa Polu zi koriri nookwu oka, o hi n'olu oro ke ikwnu eto dna n'eli n'anyarna. Be vulizo a, kovu o nwunam.

10 Polu gbadna eli, dnagidne a, bnagidne a, o kaa, "Ogwunu toko anu, o zi budnu."

11 O lahna nu rime oro olu, nyawa bredi, ri, kpa o kwukworu oka gbu okwnu tem ennam wasi, o la.

12 Be kwula nnwo ikoro rukna wam oro nu budnu, be snuta be ovu k'agida.

Hite nu Torasi zne Miletosi

13 A bna ogbo kworu zne Asosi, hne a jookwuru Polu n'ogbo. O kannu ai a mee kpa, o jeeji ochi zne pii.

14 Kpa o kwnusiri ai nu Asosi, a vuru a n'ogbo zne Mitelini.

15 N'ekile a, a hi nu pii kworu ogbo zne nhne zi Kiosi ndundu. N'obochi ke sno a, a du Samosi n'obochi ke berere, a du Miletosi.

16 Polu kpebiri o kworu ogbo whe Efesosi ma o gharu o tuwhu ige n'Esia. O zi a wara wara o du Jeruselem, o buru nu o jeekwe o mee n'obochi Pentikosi.

Polu kwunnu ele okno badnu Efesosi oka

17 Polu zizne izi hite nu Miletosi zne Efesosi kanu ele okno badnu ogbako whnu a.

18 Nga be vaduru, o kanu be, "Anu magwu kpa me tuwhuru ige me nu anu zi, hite n'obochi me varu eli Esia.

19 M ji m ovu hieru ẹli nụ anya-mini ẹkwna rnụ ernalle nnwọ izi Chiokike, ọ bụ n'ezinụ ele Ju ji mmụma ojo be kpakna m ẹhni.

20 Anụ magwụ nụ ọ zánhne ke jaabnanụ anụ iru ke me tugwannu anụ kpa me neezni anụ izi ọma, kọvu m znirni m nhne nụ ruwhnu ọhna nụ hite n'oro anụ zị ichne ichne.

21 Ma ele Ju ma ele búo ele Ju, m dọru m anụ aka nụ nsnị, ma anụ hi nụ nhne ojo anụ tughnasnakwnusi Chiokike, kweru nụ Nyenwe aị Jizọsi.

22 Hite n'obno nsnị nhne Enine Nsọ kwuru, m jeezne Jeruselem, m máam nhne jaadnakwasị m pịi.

23 Kọvu m magwụ m nụ rime kpakara ẹli-ọhna, Enine Nsọ dọru m aka nụ nsnị, nụ ikelu nụ ọkpagbu neese m.

24 Kọvu nụ kpakara nhne ka zánakpa m, m zám nọogwnu búdnụ m nụ nhne zị mkpa, ma m rnụkwo m ernalle Nyenwe aị Jizọsi nyernu m me rnụ. Ernu wam bụ ọ kpo okwo izi ọma oru Chiokike.

25 “M zneghariiri m n'asilawuru anụ zni izi ọma ẹli-eze Chiokike. M magwụ m nụ anụ jóowhnu m anya berere.

26 Me kanụ anụ tna, nụ ọ zánye ikpe ọvnarna a jaama m.

27 Kwnornu nụ ọ zánhne bụ echiche Chiokike ke me bitaru, gharu ọ kanụ anụ.

28 Anya dụ anụ ẹli n'ẹhni anụ, anụ legidne rụmu atnurnu Chiokike ke Enine Nsọ yisiri n'aka anụ. Anụ

znụ rụmu atnurnu ọgbako Chiokike jiri ọvnarna Nnwọ a zuru.

29 M magwụ m nụ me la, edu wanohia jaava n'asilawuru anụ, be jóodonu rụmu atnurnu wam obirizi.

30 Ige vawa nga ele zị n'asilawuru anụ joolulu ezi ọka wam ma be duwhu ele kweru ekwe, mee be snornu be.

31 Anya dụ anụ ẹli, anụ chenwanya nụ m ji m agida anya-mini ẹkwna iwhnehnie nụ abali neezni anụ nhne awha ẹto.

32 “Kítna, m neeyisi anụ n'aka Chiokike nụ ezi ọka ke ikwu-ọnu oru a, ke nwernu rikne o wulizọ anụ olu lele ọro, nyee anụ ngọzi nhne okehia ke a n'asilawuru ele ọ bitaru nsọ.

33 M nwége m ọwho-anya nū hne siliva mọbu golu mọbu iwo nye ọbula zị.

34 Anụ magwụ nụ aka m lawuru rnūhiaru kpakara nhne ke zị m mkpa, nū ke me nū ele sno m.

35 M gesiri m anụ nū hite n'ernalle aka aị, a jeeyisinu ele zánrikne aka. Anụ chenwanya ikwu-ọnu Nyenwe aị, ‘Owa ọma zinu nye neekesi nhne kakwo nye nanahoru nhne.’”

36 Nga Pọlu kwukworu ọka ka, ya nū be gwute mpnerne ọchi n'ẹli kpe okpukpe.

37 Kpakara be naakwna ẹkwna kpa be bnakwnusiri a, snutu a ọnu ipne-aznụ.

38 Ẹhni nwurnu be n'ikwu-ọnu wam o kwuru nū be jóowhnu a anya berere,

Kpakara be snornu a zne, o bna n'ogbo.

21

Pọlu znernu Jeruselem

1 Nga aị nụ be gbasarụ, a kwọru ogbo zne Kọsi otu ruwhnu, n'ekile a, a dụ Rodisi, hite pịi a zne Patara.

2 A whnurnu otu ogbo neezne Fonisia, a bna ogbo kwọru whọga.

3 Nga a duru hne a nọowhnu Saiporosi, a gharu a n'akarita zne Siriya. A hiedna nụ Taya hne ogbo wam noovume ivu a.

4 A whnurnu agwna ele kweru ekwe pịi, aị nụ be daziri otu ikwezu. Hite nụ rikne Enine Chiokike, be kanu Pọlu o znéko Jeruselem.

5 Kọvu nga ige aị zuru, a whọga. Kpakara be nū nnwerne be, nū rumu be snornu aị whọga n'eli-ohna. Kpakara aị gwute mperne ọchi nū ngeri osimini kpe okpukpe.

6 A bekwurita ẹhni aị, a bna n'ogbo, be lahna ọro.

7 A kwọru ogbo aị hite nū Taya zne Pitolimasi, a zne bekwu rumu nda aị, aị nū be daziri otu ọbochi.

8 N'ọbochi ke sno a, a vadu Sizaria. A bna n'oro otu nye nọokpo okwo izi oma Chiokike, nye rẹwhna a bu Filipu, a daziri n'oro a. Filipu bu otu nū rime ele izi ẹsau wam be hohiaru nū Jeruselem.

*

9 Filipu nwernu rumu oknornokno ẹno yọogbola

*

izi ele nọokpo okwo izi oma Chiokike.

10 Kpa a daziri n'oro a agida ọbochi, otu nye ọwhnurninya be kwu Agabọsi hiri nū Judiya va.

11 O vakwnusi aị, gweru ajni Pọlu, kne ẹhni a ọchi n'aka, o kaa, "Ka bu nhne Enine Nso kwuru, 'O bu kpa be ele Ju jeekne nye nwe ajni ka nū Jeruselem, gweru a nye-whete a n'aka ele buo ele Ju.'"

12 Nga a nurnu a, aị nū ele eli wam riasno Pọlu o znékwadia Jeruselem.

13 Pọlu kaa, "Ndaa kpa anu naakwna ẹkwna neeme ma inwe gwu mkpoma m? Be jeekne m eriri kpọi nū Jeruselem, kọvu m kwelem o nwu ẹnwu kwnornu rẹwhna Nyenwe aị Jizosi."

14 Kpa a nwée rikne mee o gbanwo ovu a, a gweme aka aị, kaa, "Chiokike mee nhne bu echiche a."

15 Nga a daziri ige matị pịi, a jiknerno o zne Jeruselem.

16 Agwna ele sno apna Jizosi ele zị nū Sizaria snornu aị, be duru aị zne n'oro otu nyerukna nye be kwu Masoni, nye Saiporosi, nye sno apna Jizosi gbu okwnu, a daziri nū n'oro a.

Pọlu vaduru Jeruselem

17 Nga a vaduru Jeruselem, rumu nda aị kwubnanya aị nkarị nkarị.

18 Ke chi bọru, aị nū Pọlu snornu zne o whnụ Jemisi, kpakara ele okno badnụ ọgbako Chiokike zị masị pịi.

19 Pọlu bekwu be, kanu be otu otu kpakara nhne Chiokike mernu n'esilawuru ele buo ele Ju hite n'ernu izi oma a.

20 Kpa be nurnu a, be znarni Chiokike. Be kanu Pọlu, "Nwene a, agida pokwu ele Ju kweru ekwe, be zi koriri neerne bekwu nu mkpoma be, naabita Iwu Mozizi.

21 Agwna ele badnu kannu be nu i neezni kpakara Ju ele wu n'eli ele berere be sigbasi Iwu Mozizi, nu i neezni be kpa rumu be nka, be snó omen'eli ele Ju.

22 Be jonu nu i varu, ndaa kpa a jeeme?

23 Bikno mee nhne a karu ji mee. Ele rukna eno zi n'esilawuru a, ele kweru mkwna,

24 snornu be zne mee mmemem obita ehni be richna, kwu ogwo nhne be mewhuru, ma be nwernu rikne koma risi be. Kpakara badnu jeeji ka mahia nu nhne be kwuru gbasiri i buo ezi oka, nu ji n'iwuhuru i naabita Iwu Mozizi.

25 Kovu ele buo ele Ju ele kweru ekwe, a ziznenu be okwukwo izi, kanu be nhne a kpebiri, be rikọ wiri be kwaru ariohna nyee renwu, mọbu onarna, mọbu anọ obula be hıgburu ehıgbu, be meko ọyi."

26 Pọlu kwuru ele rukna wam, n'ekile a, ya nu be mernu mmemem obita ehni be richna. O bna n'Oro Nso Chiokike, kanu ele badnu obochi be jeemezu o bita ehni

be richna, kwa masi ariohna nu risi kpakara be.

Be nwudnernu Pọlu n'Oro Nso

27 O gwnarnu mati obochi esau obita ehni be richna zute, agwna ele Ju hiri n'Esia whnurnu Pọlu n'Oro Nso. Be kpakne igbudu badnu wam, be nwudne Pọlu.

28 Be siwama okokoba, "Ele Izireli, anu yisi aka, ka bu nwerukna wam naagaghari kpakara ohna neezni ele badnu nhne megidne ele Izireli, megidne Iwu Mozizi, ma Oro Nso ka. Kitna, o kwubnarnu ele buo ele Ju n'Oro Nso, meru hna zi nso."

29 Ka bu kwnornu nu be whnurnu Tirofimosi nye Efesosi hne ya nu Pọlu sno nu rime eli-ohna, be che nu Pọlu kwubnarnu a Oro Nso.

30 Okne mkpakpo dna nu kpakara eli-ohna, ele badnu gbakota n'otu, nwudne Pọlu, dghala a nu rime Oro Nso, gbasni mgbo.

31 Igbudu badnu wam pi-oru o gbu Pọlu, kovu izi duru nye risi ele ogwnu Rom nsni nu kpakara Jeruselem neeme mkpakpo.

32 Ngangam, nye risi ogwnu ele Rom chiri ele nechi otu riwhu ele ogwnu nu ele ogwnu be, gbazne n'esilawuru igbudu badnu wam. Nga be whnurnu a, ya nu ele ogwnu a, be sigbasi o li Pọlu nhne.

33 Nye risi ogwnu wam znekwnusi Pọlu nwudne a, nyee iwu be tu a ijigba lawuru. O sika be, "Nyele bu

nwerukna ka, k̄ini b̄u nhne o mernu?"

³⁴ Agwna ele z̄i n'igbudu badn̄u wam neesi otu nhne, ele berere neesi nhne berere. Okne mkpakp̄o dnarn̄u ke mernu nye risi ɔgw̄nu wam nw̄ee rikne mah̄ia risi nhne mernu. Ọ kan̄u ele ɔgw̄nu be kwubna P̄olu rime hne ele ɔgw̄nu wu.

³⁵ Ya n̄u be snornu d̄u mgbamgba ɔchi ɔro,† ele ɔgw̄nu wam kwuru a, ọ z̄i ele badn̄u wam mekasi nhne kwnornu ɔvnarna chnarn̄u be n'anya.

³⁶ Be gbasnornu a, neesi okokoba, "Gbu nwerukna ka."

P̄olu ɔroruru ɔnu a

³⁷ Kpa be nookwubna P̄olu n̄u rime hne ele ɔgw̄nu wu, ọ kan̄u nye risi ɔgw̄nu, "Me kan̄u ị ọka sa?"

Nye risi ɔgw̄nu wam s̄ikwa a, "I jeenwe rikne kwu Giriki?"

³⁸ Ị búo nye Ijipiti wam nye n'ige wheru ewhe vuyar̄u omegidne, nye duru pokwu badn̄u ɛno ele ɔgbu badn̄u bna n'ɛli-ikpa?"

³⁹ P̄olu kaa, "M b̄u m nye Ju, be m̄urnu m n̄u Tas̄osi n̄u ɛli Silisia, m b̄u m nye ɛli ke z̄i okne mkpa. Bikno, me kwunu ele badn̄u ka ọka."

⁴⁰ Nye risi ɔgw̄nu wam nyee a rikne, P̄olu gwuzoru n̄u olu mgbamgba ɔchi ɔro, whenu ele badn̄u wam aka. Nga be daz̄iri bii, P̄olu kwunu be ọka ikwu-ɔnu ele Hiburu.

22

¹ Ọ kaa, "Ele rukna, r̄umu nda, n̄u ele nda, bikno, an̄u bno nsn̄i kpa me n̄ogoru ɔnu m n̄u ruwhnu an̄u."

² Nga be n̄urnu kpa o nookwu ọka n'ɔnu ele Hiburu, be daz̄iri bii k'aḡida, P̄olu zne n̄u ruwhnu kaa,

³ "M b̄u m nye Ju, be m̄urnu m n̄u Tas̄osi n'ɛli Silisia, k̄ovu m soru m hna n̄u rime Jeruselem, lele nnw̄o ɔkwukwo ke Gamaliɛli zn̄ukwaru nkari n'iwu ele nda āi, m ji m mkp̄oma orne b̄ekwnu rn̄unu Chiokike ɛnu lele kpa an̄u z̄i tna.

⁴ M kpaknarn̄u m ele sno apna ka ɛhni d̄u n'ɛnwu. M nwudnernu m ele rukna n̄u ele rinya t̄ubna be n'oro ikelu.

⁵ Nye risi ariohna n̄u kpakara ele eze-ikpe magw̄u n̄u m nookwu ezi ọka. M naah̄iaru m n'aka be ɔkwukwo izi be gbaznennu r̄umu nda ele Ju z̄i n̄u Damas̄ikosi, m neezne p̄i ma m nwudne m ele badn̄u, t̄u be ijigba, pn̄urnu be va Jeruselem ma be ta be awhn̄uwhnu.

P̄olu kwuru nhne

gbas̄iri ɔtuhnasna a

(Ernu 9:1-19; 26:12-18)

⁶ "Kpa me neezne, ọ gw̄narn̄u mat̄i m d̄u Damas̄ikosi, n'iwhnehnie, n̄u ibiri, okne iwhne hiri n'oligwe m̄ukwasi m.

⁷ M dna n'ɛli, otu akp̄iri kann̄u m, 'S̄olu, S̄olu, k̄ini mernu ị naakpakna m ɛhni?"

⁸ "M s̄ikwa, 'I b̄u nyele, Nyenwe āi?"

† 21:35 *mgbamgba ɔchi ɔro*: Ka b̄u hne be pne neezne ɔro olu.

“O kaa, ‘M bu m Jizosi nye Nazareti, nye i naakpakna ehni.’

⁹ Ele rukna me nu be sno whnurnu iwhne wam, kovu be nuge akpiri nye nookwunu m oka.

¹⁰ M sikwa, ‘Ndaa nhne me jeeme, Nyenwe ai?’

“Nyenwe ai kaa, ‘Lizo, zne nu rime Damasikosi, be jaakanu i kpakara nhne Chiokike karu ji mee.’

¹¹ Isni kpuru m kwnornu okne iwhne wam, ele me nu be sno toru m n'aka, duru m zne Damasikosi.

¹² “Otu nye rewhna a bu Ananayasi, nye notu ogwnu Chiokike lele kpa iwu ai kwuru, nye kpakara ele Ju wu nu Damasikosi nooso anya,

¹³ o vakwnusi m, gwuzoru n'ehni m, kaa, ‘Nnwoda Solu, whnurnu osno,’ ngangam, m whnurnu m osno, le a anya.

¹⁴ “O kaa, ‘Chiokike ke ele nda ai, hohiaru i ma i mahia echiche a, ma i whnu Nye Izi a ke mee mma, ma i nurnu kpa o nookwunu i oka n'akpiri ke a.

¹⁵ I jobu nye akebne a, ma i kanu ele badnu nhne i whnurnu nu nhne i nurnu.

¹⁶ Kitna, i dazima, lizo, ma be wu i mini, ma be snusnama mmehie i hite n'okpokwu rewhna a.’

Polu, nye izi ele buo ele Ju

¹⁷ “M lahna nu rime Jeruselem, kpa me neekpe okpukpe n'Oro Nso, m whnurnu m owhnurninya.

¹⁸ M whnurnu m Nyenwe ai, o kaa, ‘Lizo, wara wara, whoga nu rime Jeruselem, kwnornu be jeekwe akebne i gbasiri m.’

¹⁹ “M kaa, ‘Nyenwe ai, be magwu nu m znernu m n'otu oro ogbako ele Ju du n'oro ogbako, nwudne ele kweru nu rewhna i, li be nhne yisi be n'ikelu.

²⁰ Nga be gburu Sitivini nye akebne i, m gwuzo m yisi aka n'enwu a, m legidnenu m iwo ele gburu a.’

²¹ “O kaa, ‘Whoga, kwnornu m jeezizne i hne zi ikere, nu eli ele buo ele Ju.’ ”

Polu bu nye Rom

²² Ele badnu wam bnonu a nsni tem Polu kwu ka, be bete neesi okokoba n'okne nkoli, kaa, “Gweme nwerukna ka n'owa, o kwesile o zi budnu.”

²³ Be neesi okokoba, nee-whe iwo be n'olu risi be, noobolizo ruznurnuznu.

²⁴ Nye risi ogwnu wam nyee ele ogwnu a iwu be kwubna Polu rime hne ele ogwnu wu, be pnia a nhne ma be mahia nhne ele Ju kwno neesi okokoba megidne a.

²⁵ Kpa be knernu a eriri ma be pnia nhne, Polu kanu nye wam nechi otu riwhu ele ogwnu gwuzo pii, “O kwesiri n'iwu o pnia nye Rom nhne, nye be kpege ikpe nhne ojo o mernu?”

²⁶ Nga nye ogwnu wam nurnu a, o znekwnusi nye risi ogwnu kanu a, “Anyadu eli nhne i neeme, nwerukna ka bu nye Rom.”

27 Nye risi ọgwu wam znekwnusi Pọlu sịkwa a, “Kanụ m, ị bụ nye Rom?”

Pọlu kaa, “Owe.”

28 Nye risi ọgwu wam kaa, “M kwuru m agịda ịwai sị me ghoru nye Rom.”

Pọlu kaa, “M bụ m nye be mụrnu lele nye Rom.”

29 Ngangam, ele rukna wam noopio ọ sịkwa Pọlu ajiji sigbasi a, ogwu turu nye risi ọgwu nga ọ nuru nụ Pọlu bụ nye Rom, nụ ọ turu a ijigba.

*Pọlu nụ ruwhnu
ele eze-ikpe*

30 Nye risi ọgwu piuru ọ mahia nhne bụ ezi ọka ele Ju kwno noobno Pọlu nhne, ke chi boru, ọ toma Pọlu ijigba, kanụ ele risi ariohna nụ kpakara ele eze-ikpe be gbakọ. O kwupiya Pọlu, gwuzote a nụ ruwhnu be.

23

1 Pọlu lebna anya n'esilawuru ele eze-ikpe wam, kaa, “Rumu nda m, ovu m zị snam nụ ruwhnu Chiokike kpakara budnu m du tna.”

2 Nye risi ariohna be kwu Ananayasị kanụ ele gwuzo Pọlu ndundu be gbọ Pọlu aka n'onu.

3 Pọlu kanụ a, “Chiokike jọgbo ị aka, jị mkpọ be teru nznu. Ị dazị ẹli neekpe m ikpe lele kpa iwu kwuru, i noolulu iwu naakaa be gbọ m aka.”

4 Ele rukna gwuzo Pọlu ndundu kaa, “Ị naakaja nye risi ariohna Chiokike?”

5 Pọlu saru be, “Rumu nda m, m maam nụ ọ bụ nye risi

ariohna Chiokike. Be gbaru a n'okwukwo nsọ, kaa, ‘I kwu nhne ojo megidne nye risi ele ke i.’”

6 Nga Pọlu whuru nụ agwna ele eze-ikpe wam bụ ele Sadusi, ele berere bụ ele Farisi, o siwama, “Rumu nda m, m bụ m nye Farisi, ele nda m oknani bụ ele Farisi. Be kwuyaru m n'ikpe hna kwnornu okwnata mkpoma me nwernu n'olizo n'enwu ke budnu.”

7 Kpa o kwuru ka, ele Farisi nụ ele Sadusi bete n'odugbuta, ogbako iznuznu ikpe wam kewa.

8 (Kwnornu nụ ele Sadusi karu nụ ele nwuru onwu jeelezo n'enwu, enine izi zila, nụ enine zila masi, kovu ele Farisi kweru nụ eto wam zi.)

9 Ogbugbo naala olu k'agida, agwna ele zni iwu ele otu Farisi gwuzoru kwusi ọka rikne, kaa, “O za nhne ojo a whuru nụ rime nwerukna ka, ọ buru nụ enine mọbu enine izi kwunu a ọka.”

10 Odugbuta wam laru olu k'agida ke mernu ogwu turu nye risi ọgwu nụ be jodogbu Pọlu. O nyee ele ọgwu a iwu be zne n'esilawuru be gweme Pọlu, kwubna a nụ rime hne ele ọgwu wu.

11 N'abalị ke sno a, Nyenwe aị gwuzoru n'ehni Pọlu, kaa, “Ogwu tuko ị, kpa i gbaru akebne m hna nụ Jeruselem, bụ kpa ị jaagba akebne m nụ Rom masi.”

*Be gbaru iznuznu
o gbụ Pọlu*

12 N'osisi, ele Ju gbakoru n'otu gba iznuznu. Be duru risi nu be jeri wiri mabu nwo nhne obula tem be gbu Polu.

13 Be kakwo nri ele rukna eno ele snornu gba iznuznu be gbu Polu.

14 Be znekwnusi ele risi arjohna nu ele okno badnu, kaa, "A duru risi n'otu nu a jeri nhne obula tem a gbu Polu.

15 Kitna, bikno, ji nu ele eze-ikpe ziznenu nye risi ogwnu ele Rom izi, ma o kwuhia Polu, anu mee lele nu anu jaasikwahia nhne bu risi oka. A joogbu a su o vadu hna."

16 Nnwọ rukna nwene rinya Polu nuru iznuznu wam, o zne bna nu rime hne be bitaru Polu, kanu a.

17 Polu sukwu otu nye ogwnu nechi otu riwhu ele ogwnu, kanu a, "Kwuru nnwo ikoro ka znekwnusi nye risi ogwnu, o nwernu nhne o jaakanu a."

18 Nye ogwnu wam kwuru a, duzne a nu hne nye risi ogwnu zi, kaa, "Polu nye ikelu sukuru m, kaa me kwuya nnwo ikoro ka hne i zi, kwnornu nu o nwernu nhne o jaakanu i."

19 Nye risi ogwnu wam toru a n'aka whoga, sikwa a, "Kini bu nhne i jaakanu m?"

20 O kaa, "Ele risi ele Ju kwekotaru nu be jaakanu i kwuhianu be Polu nu ruwhnu ele eze-ikpe ekile, be noogho aghigho, nu ele ikpe jaasikwahia nhne bu risi oka gbasiri a.

21 Kovu i bnó be nsni, kwnornu nu nhne nu lele nri ele rukna eno jootugwa neese a. Be duru risi nu be jeri wiri mabu nwo mini tem be gbu Polu. Be jiknenu o mee kpm, be neese nhne i jeekpebi."

22 Nye risi ogwnu wam kaa, "O za nye i kanu nu i tnusinu m." O zihala nnwo ikoro wam.

Be ziznenu Polu znekwnusi Felikisi

23 Nye risi ogwnu wam sukwu ele ogwnu a lawuru nechi otu riwhu ele ogwnu, kanu be, "Anu jiknenu riwhu ele ogwnu lawuru o zne Sizaria, nu ele gba iyinya nri esau, ele ama-ogwnu riwhu lawuru, be jiknenu o zne n'otnu-ige ke tolu n'abali.*

24 Anu gweya iyinya Polu jaagba, anu kwuzne a n'udno ke nye ochichi Felikisi."

25 Nye risi ogwnu wam gba okwukwo izi nu kpa,

26 Hite n'aka Kalaudiōsi Lisiasi, nyee Nye zi Ogwnu, nye ochichi Felikisi, m bek-wulem ji.

27 Ele Ju nwudnenu nwerukna ka noopio o gbu a, m nuru m nu o bu nye Rom, m chiri ele ogwnu dōhia a n'aka be.

28 M pioru m o mahia nhne be noobno a, m kwuru a zne nu ruwhnu ele eze-ikpe be.

29 M whnuru m nu o za nhne o mernu be jeeji noogbu a mabu tu a ikelu,

* 23:23 otu-ige tolu n'abali: okwukwo ke mbom kwuru ige awa ke eto n'abali

nhne be noobno a bu nhne gbasiri iwu be.

³⁰ Nga be kanu m nu agwa ele Ju naagba iznuznu megidne a, m kpebi o ziyanu i ya. M kanu ele noobno a nhne be va gwnu iwu be megidne a nu ruwhnu i.

³¹ Ele ogwnu wam mee kpa be nyernu be iwu. Be kwuru Polu n'abali wam zne Antipatirisi.

³² N'ekile a, ele ogwnu ji ochi hiehna oro, be sigbasi ele gba iyinya ma be kwuru Polu zne.

³³ Be kwuru a zne Sizaria, nyee nye ochichi okwukwo izi wam, nyewhete a Polu masi.

³⁴ Nye ochichi wam gwnu okwukwo izi wam, o sika Polu eli o hi. Nga o whuru nu o hi nu Silisia,

³⁵ o kaa, "M jonu onu i nga ele noobno i nhne varu." O nyee iwu be bita Polu n'obna Erodu hne be jeese a nse.

24

Polu nu ruwhnu Felikisi

¹ Nga obochi isne wemernu, nye risi ariohna Ananayasi nu agwna ele okno badnu nu otu nye nogwnu iwu be kwu Tetulasi znernu Sizaria. Be gwuzo nu ruwhnu Felikisi, gwnuhia nhne be noobno Polu.

² Be sukwu Polu, Tetulasi bete noobno Polu nhne nu ruwhnu Felikisi, kaa, "Nye zi Ogwnu, hite n'ochichi i nu akoniche i, a nwernu udno gbu okwnu, i mernu agida nhne oma n'eli ai.

³ A nakweru ka, n'ige obula nu kpakara ohna ai hite n'otu mmamma a notunu i.

⁴ M chioige m o tuwhu ige i, m naariasno i, i gweru ovu oma i bno nsni nu nhne a nookwu ige mati.

⁵ "A whuru nwerukna ka nu o bu nye naakpakna ele badnu ehni, o noovuya mkpakpo n'esilawuru ele Ju nu kpakara owa, o bu nye risi otu nye Nazareti.

⁶ O pioru o meru Oro Nso ai, a nwudne a. [A pioru o kpe a ikpe lele kpa iwu ai kwuru.

⁷ Kovu nye risi ogwnu Lisiasi varu gweru anya rikne dhoru a n'esilawuru ai.

⁸ Lisiasi nyee iwu ele noobno nhne va nu ruwhnu i.] O buru nu i sika a ajiji, i jaamahia hite n'onu a kpakara nhne a noobno a."

⁹ Kpakara ele Ju yisi onu noobno Polu nhne nu o bu ezi oka nhne Lisiasi kwuru.

Polu goru onu a nu ruwhnu Felikisi

¹⁰ Nye ochichi wam whenu Polu aka, o kwu oka. Polu kaa, "M magwu m nu i bu nye ikpe eli ka agida awaha. Mkpoma noso m n'onu o goru onu m nu ruwhnu i.

¹¹ Ijeenwe rikne pohia nu o kkwole nri obochi nu ebo me znernu nu Jeruselem o kpo risi eli.

¹² Ele Ju whunge me nu nye obula nodogbuta nu rime Oro Nso, be whunge hne me naakpakne mkpoma ele badnu mobu n'oro ogbako mobu nu hne berere nu rime eli-ohna.

13 Be nwée rikne kahja nhne be kwno noobno m nhne.

14 Kõvu m nookwu ka nù ruwhnu i, m neekpenu Chiokike ke ele nda aì hite nù osno apna be karù nù ọ búo ezi apna. M kweru m nù kpakara nhne be gbarù n'Iwu Mozizi nù ọkwukwo ele ọwhnurninya.

15 M nwernu m otu olile anya nù Chiokike kpa ele ka nwernu, nù ele mee mma ma ele ojo jeehi n'ẹnwu lizọ.

16 Kwnornu nù m nwernu m olile anya ka, m naakpakna ẹhni m ẹhni ma m nwernu m ovu zì snam nù ruwhnu Chiokike ma nù ruwhnu badnù ige ọbula.

17 "Agida awha m zila m nù Jeruselem, m va gweyanù ele ke m iwai, kwa masi ariohna.

18 Kpa me neeme ka n'Oro Nso, be whnurnu m kpa me mezuru mmemem ọbita ẹhni m richna, be whnúge m hne me nù ele badnù zì, ọ zá mkpakpọ me naakpakne.

19 Kõvu agwna ele Ju hi n'Esia va zì pji, be n'iwhuru be kwesiri ọ zì hna nù ruwhnu i bno m nhne ọ buru nù o nwernu nhne be ji megidne m.

20 Mọbu ele rukna ka zì hna kahja nhne ojo be piohjaru nù rime m nga me gwuzoru nù ruwhnu ele eze-ikpe,

21 okwolem otu nhne me kwuru nga me gwuzoru nù ruwhnu be, 'Anù neekpe m ikpe tna nù ruwhnu anù kwnornu nù m kweru m nù ele nwurnu ọnwu jeelizo n'ẹnwu bna nù budnu.'

22 Felikisi nye magwu nhne gbasiri apna ka, mesni ikpe, kaa, "M jaawa ikpe nga nye risi ogwnu Lisiasi varu."

23 O kanù nye ogwnu wam neechi otu riwhu ele ogwnu o legidne Pọlu anya, kọvu o nyee a oghere, kweru ele enyi a znenu a izi.

Pọlu nù ruwhnu Felikisi nù Durusila

24 Nga ọbochi ele wheru, Felikisi nù nnwerne a Durusila nyerinya Ju varu. O dusi be sukwu Pọlu ma o bno nsni kpa o jookwu nhne gbasiri ọkwadata ovu nù Karaisi Jizosi.

25 Kpa Pọlu nookwu nhne gbasiri ome mma, badnù ojikwaru ẹhni a, nù ikpe ke jaava, ogwnu turu Felikisi, ọ kaa, "Bikno, la kitna, m joosukwu i nga me nwernu oghere."

26 O leru anya nù Pọlu jeenye a iwai, o noosukwu a ige ọbula ya nù a nookwurita ọka.

27 Kpa awha lawuru whemernu, Pokiosi Fesitosi gweru ọnodi Felikisi lele nye ọchichi. Felikisi mernu ma mkpọma sọ ele Ju n'ọnu, ọ sigbasi koriri Pọlu n'oro ikelu.

25

Pọlu kweru o zne nù ruwhnu Siza

1 Kpa Fesitosi varu, ke ọbochi ẹto whemernu, o hi nù Sizaria zne Jeruselem.

2 Ele risi ariohna nù ele risi ele Ju bno Pọlu nhne nù ruwhnu Fesitosi. Be riasno a

3 o menu be nhne ọma, o mee ma Pọlu va Jeruselem.

Be kwuru kpa kwnornu nù be gbalam iznuznu o gbu a n'apna.

⁴ Fesitòsi kaa, “Pòlu zì n'ikelu nù Sizaria, m jaalahna pìi ige matì.

⁵ Ele risi anù snornu m zne Sizaria bno nwerukna ka nhne ò bùru nù o mernu nhne òjo.”

⁶ Fesitòsi dazì òbochi ẹsato mọbu nri berere, lahna Sizaria. N'òbochi ke sno a, ò dazìri nù ngadna ikpe, kaa be kwuya Pòlu.

⁷ Nga Pòlu varù, ele Ju hi nù Jeruselem varù gwuzoru a ndundu, bete noobno a agìda nhne tù ogwnu be nwée rikne gwuzote nkari.

⁸ Pòlu gòru ọnu a, “Ò zá nhne òjo me mernu megidne iwu ele Ju, mọbu Oro Nsọ Chiokike mọbu Siza.”

⁹ Fesitòsi ma o mee nhne jòoso ele Ju n'ọnu, ò sịkwa Pòlu, “Ò jaamasì ì o zne Jeruselem ma m kpe jì ikpe nù nhne be noobno i nù ruwhnu m pìi?”

¹⁰ Pòlu kaa, “M gwuzo m nù ruwhnu ọro ikpe Siza, hne be kwesiri o kpe m ikpe. Ò zá nhne òjo me mernu ele Ju ke jì n'iwuhuru i magwù.

¹¹ Ò bùru nù m luluru m iwu, mọbu mee nhne me kwesiri ẹnwu, m kwerulem ò nwù ẹnwu. Kọvu nù nhne be noobno m búo ezi ọka, ò zá nye jeeuwe rikne kwuru m nyee be, m jeezne nù ruwhnu Siza.”

¹² Fesitòsi nù ele neezni a ezni gba iznuznu, ò kaa, “Ì karù nù i jeezne nù ruwhnu Siza, i jeezne nù ruwhnu Siza.”

*Pòlu nù ruwhnu
Agìripa nù Bẹnisi*

¹³ Kpa òbochi ele nù ele wheru, Eze Agìripa nù nwene a rinya Bẹnisi varù Sizaria va o bekwu Fesitòsi.

¹⁴ Kpa be dazìri agìda òbochi, Fesitòsi kanù eze nhne gbasìri Pòlu, “Ò zì otu nwerukna Felikisi sịgbasiri n'ikelu hna.

¹⁵ Nga me znernu Jeruselem, ele risi arìohna ele Ju nù ele okno badnù bnornu Pòlu nhne, kaa, me kpe a ikpe ẹnwu.

¹⁶ Kọvu m kannù m be nù ele Rom zá neekpe nye òbula ikpe ẹnwu hna be béle ọsno mee ya nù ele noobno a nhne whnùta ruwhnu nù ruwhnu, ma o nwernu oghere gòru ọnu a.

¹⁷ Nga be varù hna, m gbúgele m ọkwnu, ke chi bọru m dazìri nù ọro ikpe, kaa be kwuya nwerukna wam.

¹⁸ Ele noobno a nhne nwée rikne bno a nhne òjo òbula me neeche be jooobno a.

¹⁹ Kọvu be nù Pòlu nọdogbuta nhne gbasìri ọkwa Chiokike be, nù otu nwerukna rẹwhna a bụ Jizọsi, nye nwùrnù ọnwu, kọvu Pòlu naakaa nù ò zì bụdnu.

²⁰ M máam nhne me jeeme dna ndìdna gbasìri ọka ka, m sịkwa Pòlu ma ò jaamasì a o zne Jeruselem, ma m kpe m a ikpe kwnornu nhne be noobno a.

²¹ Kọvu Pòlu karù be bítà a n'ikelu ma Siza kpe a ikpe. M nyee iwu be bítà a n'ikelu tem m zizne a ke Siza.”

22 Agiripa kanu Fesitosi, “M jeeji nsn̄i m nurnu nwerukna ka.”

Fesitosi kaa, “I j̄onu a n'ekile.”

Polu nu ruwhnu

Eze Agiripa

23 N'ekile a, Agiripa nu Benisi jiri okne tne eri nu dudugna bnanya oro ogbako, ma ele risi ele ogwnu nu ele risi eli. Fesitosi kaa be kwuya Polu, be kwuya Polu.

24 Fesitosi kaa, “Eze Agiripa, nu kpakara ele ai nu be zi hna, anu whnurnu nwerukna ka nye kpakara ele Ju zi hna nu Jeruselem dnarnu ikpo gbasiri a nu ruwhnu m. Be siwama okokoba nu o kwesile o zi budnu neezne nu ruwhnu.

25 Kovu nu m piohjala m nhne o mernu ke kwesiri be ji kpe a ikpe enwu. O kaa nu o jeezne nu ruwhnu Siza, m kaa nu m jeezizne a.

26 Kovu m nwée m risi nhne me jaagbaznenu Siza okwukwo gbasiri a. O bu nhne mernu me kwuharu a nu ruwhnu anu, ke kakwo nu ruwhnu i, Eze Agiripa, ma a dna ndidna oka ka, m jeenwe risi nhne me jaagba n'okwukwo.

27 Kwnornu nu m kwesile m o zizne nye ikelu hne me nwée rikne kahia risi nhne be noobno a.”

26

Polu n̄ogoru onu nu ruwhnu Agiripa

1 Agiripa kanu Polu, “Ka bu oghere inwernu i jookwu onu i.”

Polu dn̄osnima aka a, goru onu a,

2 “Eze Agiripa, m gwnurnu m ehni m nye ruwhnu oma nu m j̄ogoru onu m nu ruwhnu i tna, hite nu kpakara nhne ele Ju noobno m.

3 Ke kakwo, kwnornu nu i magwu kpakara omen'eli ele Ju nu nhne a kwno n̄odogbuta, m naariasno, bikno, nwe ndidi, bnote m nsn̄i n'onu.

4 Kpakara ele Ju magwu kpa budnu m zi hite nga me bu nnwo ikoro. Be magwu hite nu mbom kpa me wuru kpakara budnu m nu rime eli m ma nu Jeruselem.

5 Be magwu, o buru be jeekwe agba akebbe, nu hite nu mbom m bu m nye otu siri rikne nu okpukpe ai, m bu m nye Farisi.

6 Kitna, m gwuzogwu m n'ikpe kwnornu nu m nwernu m olile anya nu mkwna Chiokike kweru ele nda ai.

7 Ka bu mkwna ke Chiokike kweru kpakara nri avnurnu nu ebo ke ai, kpa be neekpenu Chiokike iwhnehnie nu abali. O bu kwnornu okwnata ovu ka, Eze Agiripa, nhne ele Ju kwno noobno m nhne.

8 Ndaa kpa anu nwée rikne kwe nu Chiokike neeme ele nwurnu onwu hi n'enwu lizo?

9 “Me n'iwhuru m cheru nu m jeenwe rikne mee nhne megidne rehna Jizosi nye Nazareti.

10 O bu nhne me mernu nu Jeruselem. M nahjaru m rikne n'aka ele risi ariohna yisi agida ele Chiokike n'ikelu, nga be noogbu be, m yisiri m aka m megidne be.

11 Agida ige m znernu m hite n'otu oro ogbako ele Ju du berere ta be awhnuwhnu, mee ma be gonahoru rewhna Jizosi, m vuru okne onuma ke mernu m zne n'eli ele berere kpakna be ehni.

Otuhasna mkpoma Polu
(Ernu 9:1-19; 22:6-16)

12 “Ka bu nhne me kwno neezne Damasikosu nu rikne nu iwu ele risi ariohna.

13 N'apna n'esilawuru iwhne hnie, Eze, m whnuru m okne iwhne kpakpa iwhne ehnam hiri n'oligwe mukwasi me nu ele nu me sno.

14 Kpakara ai dna n'eli, m nuru m otu nkoli kanu m n'onu ele Hiburu, ‘Solu, Solu, ndaa nhne i kwno naakpakna m ehni, i nwee rikne gba ochi n'igwnu.’

15 “M sika, ‘I bu nyele, Nyenwe ai?’

“Nyenwe ai kaa, ‘M bu m Jizosi nye i naakpakna ehni.

16 Lizo, gwuzoru n'ochi i lawuru. M mernu m ma i whnu m anya, ma m hohia m ji buru nye izi m, i jaakanu ele berere nhne i whnuru tna, nu nhne me jeegesi i nu ruwhnu.

17 M jodohia i n'aka ele Izireli ma n'aka ele buo ele Ju ele me jeezine i.

18 M jeezine i ma i kpume anya be, mee be hi n'ochichiri bna n'iwhne, hite nu rikne

Ekwensu tuhhasna hne Chiokike zi. Ngam, Chiokike jaagbarunu be mmehie be, ma be nwehia oghere n'esilawuru ele Chiokike bitaru nso hite n'okwnata ovu nu me.’

Polu tnrnu otnutnu ernu a

19 “Eze Agiripa, m mene m risi rikne n'owhnurninya wam hiri n'oligwe va.

20 Hite nu rime Damasikosu, Jeruselem nu kpakara Judiya, du ele buo ele Ju, m kporu m okwo be hi nu nhne ojo be tuhhasna, vakwnusi Chiokike, mee nhne neegesi nu be hiri nu mmehie be whuya.

21 Ka bu nhne mernu ele Ju nwugwuru m n'Oro Nso, ma be gbu m.

22 Kovu Chiokike yinu m aka du tna, m gwuzo m hna naagba akebe nyee ele ezi nu ele mati. Nhne me nookwu bu nhne ele owhnurninya nu Mozizi kwuru jeeme.

23 Be karu nu Karaisi jaatariri awhnuwhnu, kovu o jobu nye mbom jechi n'enwu lizo, gesi ele Ju iwhne ke oznohia ma ele buo ele Ju.”

24 Kpa Polu zi n'ogoru onu a kpa, Fesitosi gweru okne nkoli si okokoba, kaa, “Polu, era naachna i, okne omumu okwukwo i neeme era naagba i.”

25 Polu kaa, “O za era naagba m, Fesitosi Nye zi Ogwnu. Nhne me nookwu bu ezi oka nu oka nye anya dnornu.

26 Eze, i magwu kpakara nhne me ji m onu nookwu.

M magwụ m nụ i magwụ kpakara be, kwnornu nụ ọ zà nhne be mernu nụ hne zị mgwụgwa.

²⁷ Eze Agiripa, i kwegwu nụ nhne ele ọwhnurninya kwuru? M magwụ m nụ i kwegwu.”

²⁸ Agiripa kanụ Pọlu, “N’ige matị ka, i nwernu rikne mee m bụru nye kweru nụ Karaisi?”

²⁹ Pọlu saru a, “N’ige matị mọbu ke kwu, okpukpe m hne Chiokike zị bụ ma jị nụ kpakara ele noobno m nsni tna bụru nhne me bụ, ọ bụo n’ijigba ka.”

³⁰ Eze nụ nye ọchichi nụ Bēnisi nụ kpakara ele nụ be dazị lizọ.

³¹ Be whọga, zne nookwu n’esilawuru be, be kaa, “Ọ zà nhne ọjọ nwerukna ka mernu be jeeji gbu a mọbu tū a ikelu.”

³² Agiripa kanụ Fesitọsi, “Ọ bụru nụ nwerukna ka kwúle nụ o jeezne nụ ruwhnu Siza, be znernu sigbasi a, ọ la.”

27

Pọlu kwọru ọgbo zne Rom

¹ Nga be kpebiri nụ a jeezne Itali, be gweru Pọlu nụ agwna ele ikelu berere yisi n’aka otu nye nęechi otu riwhu ele ọgwnu rẹwhna a bụ Jilios, nye ọgwnu ele otu Ọgositosi.

² A bna ọgbo hite n’Adiramitium ma a zne n’apna ẹli Esia, a kwọru ọgbo zne. Arisitakosi nye Tęsalonika n’ẹli Masidonia snornu aị.

³ Ke chi bọru, a dū Saịdoni. Hite n’ovu ọma, Jilios sigbasi Pọlu o zne whnụ ele enyi a, be nyee nhne zị a mkpa.

⁴ A hite nụ pịi zne, kọvu ruwhere neewhegidne aị, a kwọru ọgbo whe aznụ ẹli ọhia esilawuru Saiporosi.

⁵ A kwọwhe osimini Silisia nụ Pamfilia, vadu Mira nụ rime Lisia.

⁶ Nye nęechi ele ọgwnu whnurnu otu ọgbo hi nụ Alękizandaria ke neezne Itali, o yisi aị n’ọgbo wam.

⁷ A kwọru wọhnerne agida ọbochi, hite nụ nhne osi rikne a vadu n’ẹli Sinidusi, ruwhere kwéle a zne nụ ruwhnu, a kwọru ọgbo whe aznụ ẹli Kiriti whe Salimone.

⁸ A nọkwo ọgbo nụ ngeri ẹli. Hite nụ nhne osi rikne a dū hne be kwu “Ọnu Mini Udno,” ke zà ikere nụ ẹli-ọhna Lasia.

⁹ Kpa a tuwhuru agida ige, a whnurnu nụ ọ kwọ ọgbo kịtna nụ lele nhne aghom, kwnornu nụ Ọbochi Okpusni Mmehie* gawhelem. Pọlu zni be ezni,

¹⁰ “Ele nwe m, m whnurnu m nū izne mini aị ka hite kịtna jọoburu nhne aghom, ivu nū ọgbo joolulu, ma budsonu ele badnu.”

¹¹ Kọvu nye nęechi ele ọgwnu gnernu nsni nhne nye nọkwo ọgbo nū nye nwe ọgbo kwuru karu nhne Pọlu kwuru.

¹² Ẹli ngeri osimini wam bụo ọma ọ daziri n’ige okirika, agida ele kakwo kweru be kwọma ọgbo bna osimini ma

* **27:9** Ọbochi Okpusni Mmehie mọbu ọwhaji-ẹli Ọkwukwo ke mbom kwuru ọbochi ovu ọnu

be zne Fonikisi. Hna bu ọnu mini n'ẹli Kiriti ke keteru ruwhnu nọ nkala lawuru nọ ọdidna ẹhnam.

Abaka-mini osimini

¹³ Ruwhere matị hite nọ ẹli ẹli bete neewhe, ele rukna wam neeche nọ be jeeme kpa be kwuru, be ọlizo nkno ọgbo kwọru ọgbo neezne nọ ngeri Kiriti.

¹⁴ O gbúle ọkwnu ruwhere siri rikne be kwu rugwu ọbosi ẹhnam bete ewhe hite n'ẹli ọhia esilawuru wam.

¹⁵ O whekwasị ọgbo wam, a nwée rikne knekwali ọgbo wam, a sigbasi a ma ruwhere vuru a neezne.

¹⁶ A kwọru ọgba whe aznọ ẹli ọhia esilawuru matị be kwu Kauda. O rarọ ẹhni o vubna ọgbo matị aị nọ rime ọgbo aị.

¹⁷ Nga be vuru ọgbo matị wam, be gweru eriri knegidne ọgbo aị gburugburu. Be nọotu ogwnu ọ zị be dnabna nọ rime rızna rọto nọ ngeri Libiya, be gwedna bala ọgbo, sigbasi ọgbo ma ruwhere vuru a neezne.

¹⁸ Okne abaka-mini bete ewhe, ke chi bọru be bete nootuwhu ivu zị n'ọgbo nọ rime mini.

¹⁹ N'ọbochi ke sno a, be gweru aka be túbna nhne be ji nọokwo ọgbo osimini.

²⁰ Agịda ọbochi, a whnúna ẹhnam mọbu mbo, ruwhere zị kọriri neewhesi rikne. A nwéma ntúkwasị ovu nọ o nwernu nye be jọoznohia.

²¹ Ele rukna wam dazị agịda ọbochi, rife wiri, Pọlu gwuzoru nọ ruwhnu be, kaa,

“Ele nwe m, anọ bnóne nsnị nhne me kwuru, a znékele ọkwohala ọgbo hite nọ Kiriti, a znékele owhu mwhu kpakara nhne ka.

²² Kítna, anọ nwe ovu siri rikne, ọ zá nye ọbula n'esilawuru anọ jootuwhu budnu a, okwolem ọgbo joowhu.

²³ Kwnornu nọ enine izi Chiokike nye nwe m, nọ nye me neekpenu gwuzoru nọ ngeri m abalị tna.

²⁴ O kaa, 'Pọlu, ogwnu tú i, i joogwuzoriri nọ ruwhnu Siza, Chiokike hite n'oru a nyenem ji kpakara budnu ele ji nọ be zị n'ọgbo.'

²⁵ Ele nwe m, anọ nwe ovu siri rikne, kwnornu nọ m kw-natarnu m Chiokike mkpọma nọ o jeeme kpa ọ kanu m.

²⁶ Kọvu a jaakpọtasi n'otu ẹli ọhia esilawuru n'osimini.”

Ọgbo wam kpuru

²⁷ N'ọbochi ke nri nọ ẹno n'abalị, abaka-mini noovughari aị nọ osimini Adiratiki. N'esilawuru abalị ele nọokwo ọgbo neeche nọ a zị ndundu ngeri ẹli.

²⁸ Be gwedna eriri whnọ nọ mini zị otu riwhu nọ nri lawuru rula ẹli ẹli, ige matị be tọ kwno a berere whnọ nọ ọ bọ nri tolu.

²⁹ Be nọotu ogwnu n'ọgbo aị jọokpotasi nọ rugwu, be gwedna nkno ẹno hite n'aznọ ọgbo, neekpe okpukpe ma iwhe whuya.

³⁰ Ele nọokwo ọgbo noopio ma be gbawhu n'ọgbo, be gwedna ọgbo matị nọ mini nọogho aghigho lele be

neeze bīta nkno nū ruwhnu ọgbo.

31 Kọvu Pọlu kanu nye neechi ele ọgwunu nū ele ọgwunu, “Ọ buri ele nọokwo ọgbo dázila nū rime ọgbo, be jọoznohia anu.”

32 Ele ọgwunu wam gbubi eriri knegwu ọgbo maṭi wam, sigbasi a, o wheru zne.

33 Kpa chi nọobo, Pọlu riasno be ri wiri, “Anu neese ka bu nri ọbochi nū ẹno, anu ríle nhne ọbula kpakara ige ka.

34 Bikno, anu ri wiri, ọ zị mkpa ma anu ziri budnu, otu rukeri-ize anu jáadnahala nū risi anu.”

35 Kpa o kwukworu ka, Pọlu gweru brẹdi, tunu Chiokike mmamma nū ruwhnu kpakara be, nyawa a, bete neeri.

36 Be yisi ẹhni, nye ọbula n'esilawuru be ri wiri.

37 A zị riwhu badnu lawuru nū nri ẹsau nū isunu nū rime ọgbo.

38 Kpa be rikworu wiri, be tubna kpakara ikpa zị n'ọgbo ma ọgbo ziri ewheke n'olu mini.

39 Nga chi bọru, ele nọokwo ọgbo máa ẹli ka, kọvu be whnurnu otu ọnu mini rịzna rịzna, be kaa, ọ buri o jeekwe omume be jọokwo ọgbo n'olu rịzna.

40 Be gbuhala nkno, sigbasi ọ dnabna nū rime osimini, be kneme eriri kne nhne be jeeji ọ kwọ ọgbo. Be gwelizọ bala nū ruwhnu ọgbo, ma ruwhere whekwasị a nū ruwhnu, be neeze nū mkpomkpo ẹli.

41 Ọgbo dnakwasị olu rịzna, mii nū rịzna, ruwhnu ọgbo takwnusi nwée rikne whuya, aznu a gbaja mpekele mpekele hite n'abaka-mini.

42 Ele ọgwunu pioru ma be gbu kpakara ele ikelu, ọ zị otu badnu gwu mini gbawhu.

43 Kọvu nye neechi ele ọgwunu pioru ọ bīta Pọlu budnu, kwéle be mee kpm. Kọvu ọ kanu kpakara ele rukna wam ele marnu o gwu mini be dnabna mini, beru ọsno gwuru mini zne mkpomkpo ẹli.

44 Ọ kanu ele berere snornu be, knernu aka n'isisi mọbu mpekele ọgbo, kpakara ai mernu kpa du olu ẹli.

28

N'eli Malita

1 Nga a duru n'eli n'udno, a nurnu nū ẹli ọhia esilawuru wam be kwu a Malita.

2 Ele nwe ẹli wam gesiri ai ovu ọma k'agida, kpa mini noozo, iyi nọotu, be kpawhusi bekwnu kwnornu ai.

3 Pọlu chikota nkala isisi nọotubna be nū rime bekwnu, otu okpu-ẹli bekwnu chihiaru gbakwnusi Pọlu n'aka.

4 Ele nwe ẹli whnurnu hne agwo wam gbakwnusiri Pọlu n'aka, be kwu n'ehni be, “Nwerukna ka bu nye noogbu badnu, ọ bu n'ezí nū ọ whuyaru nū rime ọgbo, nhne ojo a noosno a.”

5 Kọvu Pọlu kpabna agwo wam nū rime bekwnu. Ọ zá nhne mernu a.

6 Be neese, neele anya nū ọ jaaza, mọbu dna n'eli nwuma. Be se gbu okwnu, ọ zá nhne

búo oma be whnurnu, be gbanwo mkpoma be kaa, “O bú chi.”

⁷ Hne zila ikere bú agida ẹli nye risi ẹli wam be kwu Pubiliysi. O kwubnanyarnu aị nkari, ọbochi ẹto a zị n'oro lele ele izne.

⁸ Nda Pubiliysi dnanyi ẹli naariya ẹhni igbugbu ogori nu ruwho ọwuwu. Pọlu zne nu rime ọro hne ọ zị, kpenu a okpukpe, tukwasi a aka a lawuru, gwọ a.

⁹ Nga ka mernu, kpakara ele berere n'ẹli wam naariya ẹhni igbugbu varu, Pọlu gwọ kpakara be.

¹⁰ Be nyee aị agida nkesi, nga a bnarnu ọgbo panizo izne mini aị, be nyee aị agida nhne zị aị mkpa.

Hite nu Malita du Rom

¹¹ Ke ẹnwa ẹto wheru, a kworu ọgbo hi nu Alekizandaria be kwu “Rumu Ejima.” Ọgbo ka daziri hna n'okirika.

¹² A vadu ẹli Sirakosi daziri pii ọbochi ẹto.

¹³ Hite nu pii, a kworu ọgbo zne ẹli Regium, ke chi a boru, ruwhere bete neewhe hite nu ẹli ẹli, n'ọbochi lawuru a vadu ẹli Puteoli.

¹⁴ A whnurnu agwna rumu nda, be riasno aị daziri otu ikwezu pii. Ka bú kpa a jiri vadu Rom.

¹⁵ Rumu nda ele zị nu Rom nurnu nhne gbasiri aị, be va hne zị ikere lele Ahia Apiusi nu Oro Ẹto Ele Izne, kwnusi aị. Nga Pọlu whnurnu be, ọ tunu Chiokike mmamma, mesi mkpoma rikne.

Pọlu nu rime Rom

¹⁶ Nga a vaduru Rom, be kweru Pọlu wuru ke a ichne ya nu nye ọgwnu neese a.

¹⁷ Kpa ọbochi ẹto wheru, Pọlu sukwukọta ele risi Ju ikwu. Nga be gbakoru, ọ kanu be, “Rumu nda m, ọ bú n'ezi nu ọ zá nhne ojo me mernu megidne ele ke aị mọbu omen'ẹli a nahiaru n'aka ele nda aị, be mernu m nye ikelu nu rime Jeruselem, gweru m nyewhete n'aka ele Rom.

¹⁸ Be sikhwaru m ajiji, be pioru ọ sigbasi m kwnornu nu be whnurnu nu ọ zá nhne ojo me mernu ke kwesiri ẹnwu.

¹⁹ Nga ele Ju kwéle, be mernu m, m kaa nu m jeezne nu ruwhnu Siza, ọ bú n'ezi nu ọ zá nhne me noobno ele ke m.

²⁰ Ọ bú nhne me kwno pio ma me nu anu kwurita oka, kwnornu be turu m ijigba ka kwnornu nu nhne wam kpakara ele Izireli neele anya a.”

²¹ Be saru Pọlu, “Ọ zá ọkwukwo izi ọbula a whnurnu hite nu Judiya gbasiri i, ọ zá rumu nda aị vuyaru ọtnutnu mọbu oka ojo ọbula gbasiri i.

²² Kọvu a jọonu nhne i jookwu, kwnornu nu kpakara ele badnu nookwu oka megidne otu wam i noosno.”

²³ Be nu Pọlu yi igba, agida be varu n'ọbochi wam hne Pọlu zị. Hite n'osisi du abali o znirni be izi oma ẹli-eze Chiokike. Ọ gbalị ma be jeekweru nhne gbasiri Jizosi. Pọlu kanu be kpakara nhne

be gbarụ n'Iwu Mozizi nụ
nhne ele ọwhnurninya gbarụ
n'ọkwukwo nsọ.

²⁴ Agwna be kweru ikwu-
ọnu a, kọvu ele berere kwéle.

²⁵ Kpa be naala, okewa zịri
n'esilawuru be, Pọlu kwuru
otu nhne ka, “Enine Nsọ
kwuru nkari hite n'ọnu Azaya
nye ọwhnurninya nyee ele nda
anụ,

²⁶ ‘Zne kanụ ele ka,
Anụ jaazị nọonu kpoi, kọvu
anụ jọoghohia.

Anụ jaazị neele anya, kọvu
anụ jọowhnu ọsno.

²⁷ Kwnornu ovu ele ka zị
rinya,

nsni nynọnu be,
anya be kpuru isni,
ọ zị be whnụ n'anya be,
nsni be nurnu,
echiche be ghohia, be
tuhnasna mkpoma,
m gwọ ẹhni igbugbu be.’ ”

²⁸ Pọlu kwukwo ọka a,
kaa, “Anụ mahia nụ ọznohia
Chiokike bụ nhne be gwez-
nenu ele búo ele Ju. Be
joojno nsni.” [

²⁹ Kpa Pọlu kwukworu ọka,
ele Ju la, nọdogbuta n'anya
rikne n'esilawuru ẹhni be.]

³⁰ Awaha lawuru Pọlu wuru
n'oro ke a, nọkwu ọgwo ọro,
nanabnanya kpakara ele
naavakwnusi a.

³¹ Ọ kpọ okwo izi oma ẹli-
eze Chiokike, zni nhne gbasiri
Nyenwe aị Jizọsi Karaịsi hite
n'ọnu rikne, ọ zá nye noob-
nosni a.

**Okwukwo izi Pọlu
gbaznennu
Ele Rom
Nhne gbasiri
okwukwo izi ka**

Okwukwo izi Pọlu gbaznennu ele Rom bu ma be jikneru o nabnanya Pọlu nu Rom. Echiche a bu ma o rnu ernalu n'esilawuru be ige matị, hite n'oyi aka be, o zne Sipeni. Okwukwo izi ele Rom neegesi kpa Chiokike nọogwnu ele badnu ele ikpe mana, mee ya nu be ziri n'udno. Chiokike mernu ele badnu nu a ziri n'udno hite n'okwnata mkpoma ke zi nu Jizosi Karaisi. Nye Karaisi obula nwernu udno kwnornu nu Chiokike mernu badnu nwernu ehni a, whoga nu rikne ke mmehie nu enwu. Pọlu kwuru nu ele Ju nu ele buo ele Ju nwernu igwe n'oru Chiokike hite nu Jizosi Karaisi.

Nhne zi n'okwukwo ka

Opanizo (1:1-17)

Oznohia hite nu mmehie zi mkpa (1:18--3:20)

Apna Chiokike kwnornu oznohia (3:21--4:25)

Budnu ikne nu rime Karaisi (5:1--8:39)

Izireli zi nu mmuma Chiokike (9:1--11:36)

Agwa nye Karaisi (12:1--15:13)

Okwukwo nu obekwu ikwu (15:14--16:27)

ma m buru m nye izi Jizosi, hohia masi a ma m buru m nye zni izi oma a, naagba okwukwo izi ka.

² Ka bu izi oma Chiokike kweru mkwna ogologo ige wheru ewhe hite n'onu ele owhnurninya, lele kpa be gbaru a n'okwukwo nsọ.

³ Izi oma ka gbasiri Nnwọ a, Nyenwe a Jizosi Karaisi, nye ghoru badnu, be mu a n'avnurru Devidi.

⁴ Chiokike gesiri nu Jizosi Karaisi bu Nnwọ a, nga o mernu o hi n'enwulizo hite nu rikne ke Enine Nso.

⁵ Hite n'aka a, Chiokike nyernu a oru o buru ele izi kwnornu Karaisi, ma a sukwu kpakara mba ma be kweru nu ya, bno a masi nsni.

⁶ Kpakara anu ele zi nu Rom, zi n'esilawuru ele Chiokike sukwuru ma be buru ke Jizosi Karaisi.

⁷ M naagbanu anu ele zi nu Rom okwukwo, ele Chiokike whnurru n'anya, sukwu ma be buru ele ke a,

Oru nu udno ke Chiokike Nda a nu Nyenwe a Jizosi Karaisi dazinu anu.

Okpukpe otu mmamma

⁸ Ke mbom, m notunu Chiokike mmamma hite nu Jizosi Karaisi kwnornu anu, nu okwnata mkpoma anu gazuru owa.

⁹ Chiokike, nye me ji kpakara mkpoma m naakwanu, hite n'okpo okwo izi oma Nnwọ a, bu nye akebne m, nu m neechenwanya anu ige obula.

¹ Mawa Pọlu, nye izi Karaisi Jizosi, nye Chiokike sukwuru,

10 Ige ọbula me neekpe okpukpe, m nọorio Chiokike ma hite n'echiche ọma a, o nyee m oghere me va lekasi anụ.

11 Kwnornu nụ m pioru m ọ whnụ anụ anya ma me nụ anụ kerị ngozi ke enine, ke jeeme anụ gwuzosi rikne.

12 Ke bụ me va, a kasirita ẹhni aị ovu, ọkwnata ovu m jaakasi anụ ovu, ọkwnata anụ jaakasi m ovu.

13 Rụmu nda m, m pioru anụ mahia nụ agida ige, m pioru m ọ va lekasi anụ, kọvu m nwée m rikne dụ kịtna. M pioru m o rihia mkpuru ovu n'esilawuru anụ lele kpa me rihiaru mkpuru ovu n'esilawuru ele búo ele Ju.

14 Kwnornu nụ m ji m kpakara ele badnụ ọgwo ọkpo okwo izi ọma, ma ele Giriki, ma ele búo ele Giriki, ele nwernu akọ, ma ele nwée akọ.

15 Ke bụ nụ ọ zị m mkpa o zni anụ ele zị nụ Rom izi ọma.

Iknerne ma ke izi ọma

16 Iwhnerne izi ọma ka zá nọtụ m, ọ bụ rikne Chiokike dụ ọznohia kpakara ele kweru, ele Ju ke mbom, nụ ele búo ele Ju.

17 Kwnornu nụ ome mma ke Chiokike whayarụ iwhe n'izi ọma, hite n'okwnata ovu dụ ọkwnata ovu, lele kpa be gbarụ a n'okwukwo nsọ, "Nye mee mma jeehi nụ ọkwnata ovu a ziri bụdnụ."

Onuma Chiokike megidne badnụ

18 Kwnornu nụ ovu owe ẹhni Chiokike hiri n'oligwe

whaya iwhe megidne kpakara ele máa Chiokike, ele hi nụ risi rikne aruru-eli be naakpagidne ezi ọka.

19 Chiokike neewe ẹhni megidne be, kwnornu nụ nhne be kwesiri ọ mahia gbasiri Chiokike whayarụ iwhe. Ọ bụ Chiokike n'iwhuru a gesiri be ẹhni a.

20 Hite n'okike ọwa, nhne be whnụ anya gbasiri Chiokike, nụ rikne a zị ọkwnukokwnu, nụ oyiyi a zị nsọ bụ ke badnụ whnurnu anya, be whnurnu be nụ kpakara nhne Chiokike keru, ke bụ nụ badnụ nwée nhne o ji gọnahoru ẹhni a.

21 Be marnụ Chiokike, kọvu be nyéne a igwugwu kwesiri a, be tú mmamma, kọvu echiche be bụ nhne etekne, mkpoma iwhnirniwhno be jihiaru n'ochichiri.

22 Be kaa nụ be bụ ele nwernu akoniche, be bụ ele iwhnirniwhno.

23 Tnụnuma be jaakwanụ Chiokike ke nwụ ọnwu, be nọkpo risi eli nyee nhne be nriornu ọnio lele badnụ ke nnonwu ọnwu, nụ ọnunu, nụ anohia nụ agwọ.

24 Chiokike gweru be nyewhete n'aka nhne zila richna hite nụ ome nhne ovu ojo be pioru, be gweru ẹhni be mee nhne tị iwhnerne n'esilawuru ẹhni be.

25 Be gweru aghalaghala gbanwo ezi ọka Chiokike, be nọkpo risi eli nyee nhne be keru eke tnụnuma nye keru nhne n'iwhuru a, nye nwe ọznarni ọkwnukokwnu. Amim.

26 Kam kpayarụ, Chiokike nyernu be n'aka ome nhne tị

iwhnerne. Ele rinya gharu o mee nhne lele kpa omen'eli omekorita nyerukna nu nyerinya zi, be be neemekorita.

²⁷ Kpam masi, ele rukna sigbasiri o dnanyi ele rinya, be naadnanyitaru ehni be. Be neeme nhne tu iwhnerne n'esilawuru be, be naata awhnuwunu nhne ojo be mernu.

²⁸ Kpa be kwéle o marnu Chiokike nu mkpoma be, Chiokike nyewhete be n'aka ovu ruru oru, ma be mee nhne be kwésile o mee.

²⁹ Aruru-eli zi odo nu odo jihiaru mkpoma be, mmehie, owho-anya, okne nhne ojo, ntaknarnama ovu, ogbu badnu, olu ogwunu, aghigho, nu osno irno, ozno izno.

³⁰ Ele naakaja ehni be, be snornu Chiokike irno, ele so anya, ele noolu onu, ele neechehia apna ikne kpa be jeeme nhne ojo, ele za noobnonu ele muru be nsni,

³¹ ele nwée oghohia, ele za naabita ogba-njo-ehni, ele nwée ovu oma, ele za nodonu ele berere obirizi.

³² Be magwu nu iwu Chiokike kwuru nu ele neeme nhne ojo ka jonwu enwu, o buo nu be neeme nhne ele ka kpoi, kovu be naadasinu ele neeme nhne ele ka n'ikwunu.

2

Ikpe zi snam ke Chiokike

¹ Ji badnu, i nwée rikne gonahoru ehni i, ji nye neekpe nye berere ikpe, kwnornu nu hne i zi neekpe nye berere ikpe bu hne ikpe zi naama

i, kwnornu nu i neeme otu nhne wam.

² A magwu nu Chiokike neekpe ikpe zi snam nu risi ele neeme kpakara nhne ka.

³ Ji badnu etekne ke neeme nhne ke i kwno neekpe ele berere ikpe, i che nu i jaagbanahoru ikpe Chiokike sa?

⁴ Movu i neeledna okne ovu oma Chiokike anya, nu onabnanya a, nu ogologo osnuta ovu a? N'ezi, Chiokike neemenu i nhne oma ka ma o dubna i nu otuhnasna ovu.

⁵ Kovu hite nu ovu rikne nu ovu kwé obniaji i, i naabitanu ehni i awhnuwunu ke kakwo n'obochi ovu owe ehni Chiokike nu okpume ikpe a zi snam.

⁶ Chiokike jookwu nye obula ogwo lele kpa ernu a jiri zi.

⁷ Ele gwuzosi rikne neeme nhne oma, noopio igwugwu nu osobisi, nu nkoli budnu, Chiokike jeenye be budnu kwó okwo.

⁸ Kovu, ele noopio nhne ke aka be, ele kwéle ezi oka, ele noosno nhne ojo, Chiokike jowukwasi be ovu owe ehni a nu onuma a.

⁹ Okne awhnuwunu nu nhne igbugbu jaazinu kpakara ele neeme nhne ojo, ke mbom ele Ju, ma ele buo ele Ju.

¹⁰ Kovu igwugwu, osobisinu nu udno jaazinu nye obula neeme nhne oma, ke mbom ele Ju, nu ele buo ele Ju.

¹¹ Kwnornu nu Chiokike za neele badnu anya nu ruwunu.

¹² Kpakara ele mernu mmehie hne be nwée Iwu

Mozizi j̄onwu hne Iwu z̄ila, ele mehieru hne Iwu z̄i, Iwu jeekpe be ikpe.

¹³ Ọ b̄uo ele n̄onnu Iwu bu ele z̄i snam n̄u ruwhnu Chiokike, k̄ovu ele neeme nhne Iwu kwuru.

¹⁴ Nga ele b̄uo ele Ju ele nwée Iwu hiri n'ovu be mee nhne Iwu kwuru, kam b̄unu be Iwu, ọ b̄u n'ezi n̄u be nwée Iwu.

¹⁵ B̄udnu be neegesi n̄u be gbagw̄u Iwu n'ovu be, ovu be naagban̄u be akebne, noobno be nhne, m̄obu n̄ogomanu be.

¹⁶ Ka j̄obu n'ọbochi Chiokike jeekpe nhne tugwaru otugwa ke badn̄u ikpe, hite n'aka Karāisi Jiz̄osi lele kpa izi ọma me neezni kwuru.

Ele Ju n̄u Iwu

¹⁷ I noosukwu ẹhni ị nye Ju, n̄otukwasi ovu n'Iwu, neeji Chiokike naanya risi.

¹⁸ Ị magw̄u echiche a, i nah̄oru nhne ke kakwo mma, kwnornu n̄u ị m̄uhiaru a n'iwu.

¹⁹ Ị kwnatar̄u ovu n̄u i bu nye noodu nye isni, iwhne ele z̄i n'ọchichiri,

²⁰ nye neezni ele iwhnirni-whno nhne, nye neezni r̄umu tak̄iri nhne, nye nwegwu ak̄oniche zuru ozu, n̄u ezi ọka.

²¹ Ị nye neezni ele berere nhne, i zn̄i ẹhni i nhne sa? I neezni ọ z̄a nye znu buznu sa? I n'iwuru i zn̄u buznu sa?

²² Ị kaa, “Ọ z̄a nye mee ọyi,” j̄iwa, i mée ọyi sa? I snornu chi berere irno, k̄ovu i zn̄u buznu n̄u ruwhnu r̄enwu?

²³ Ị nye ị iwu Chiokike noolu ọnu, ọ b̄u ị z̄a neeme

Chiokike nhne iwhnerne hite n'olulu iwu a?

²⁴ Lele kpa be gbar̄u a n'ọkwukwo nsọ, “Ele b̄uo ele Ju naakaja r̄ewhna Chiokike kwnornu an̄u ele Ju.”

²⁵ Ọ b̄uru n̄u ị b̄ita iwu, ọkpa nka ị bu nhne, k̄ovu ọ b̄uru n̄u ị b̄itage iwu, ọkpa nka ị bu nhne etekne.

²⁶ Ọ b̄uru n̄u ele b̄uo ele Ju be kp̄age nka, b̄ita Iwu, be jeegweru be lele ele be kpar̄u nka.

²⁷ Nye be kp̄age nka n'anọ-ẹhni k̄ovu ọ b̄itaru Iwu jaama ị ikpe, ị nye nwegwu Iwu be gbar̄u n'ọkwukwo n̄u nye be kpar̄u nka, k̄ovu ị z̄a naab̄ita Iwu.

²⁸ Badn̄u b̄uo nye Ju n'anọ-ẹhni kp̄oi, ọkpa nka b̄uo masi ke anọ-ẹhni kp̄oi.

²⁹ Nye Ju n'ezi bu nye Ju n'ovu. Ọkpa nka bu ke be kpar̄u n'ovu hite n'enine Chiokike, ọ b̄uo n'Iwu be gbar̄u n'ọkwukwo. Ọznarni badn̄u wam híge n'aka badn̄u, k̄ovu n'aka Chiokike.

3

Chiokike kwesiri ọ kwnata ovu

¹ K̄ini bu nhne ele Ju nwernu kakwo ele b̄uo ele Ju? Ọ z̄i mbnarna z̄i n̄u ọkpa nka?

² Owe! K'aḡida n'apna ọbula. Ke mb̄om, Chiokike nyernu ele Ju ikwu-ọnu a.

³ Ọ b̄uru n̄u agwna be nwée ọkwnata ovu? O jeeme Chiokike b̄uru nye kwésile ọ t̄ukwasi ovu?

⁴ Ọza r̄ia r̄ia! Chiokike j̄oburiri nye ezi ọka, ọ b̄ubedi

nụ kpakara badnụ jọburu ele aghalaghala. Lele kpa ọkwukwo nsọ kwuru,
 “Ma i gesi nù ìbụ nye nookwu ezi ọka,
 Ikpe jáama ì nga be neekpe i ikpe.”

5 Ọ bụrụ nù a mernu nhne búo ọma, ke jeegesi ome mma Chiokike ke zì snam, kìnì bụ nhne a jookwu? Nù Chiokike mernu nhne ojo nù ọ ta aì awnụwhnu nù ovu owe ẹhni sa? (M nookwu lele badnụ etekne.)

6 Ọza rịa rịa! Ọ bụrụ nù Chiokike búo nye mee mma, ndaa kpa o jeeji kpe ọwa ikpe?

7 Ọ bụrụ nù aghalaghala m jeenye Chiokike igwugwu hite nù ome ezi ọka a whụya iwhne, ndaa kpa be jaama m ikpe lele nye mmehie?

8 Ọ bụrụ nù anụ neeche kpam, anụ jaakaa, “Ngwa ma a mee nhne ojo ma nhne bụrụ ọma va”? Agwna ele badnụ nyernu m mkpari, noobno m nù ka bụ nhne me neezni ele badnụ. Be jaama be ikpe lele kpa o kwesiri.

Nye mee mma zá

9 Ndaa, a ka ele búo ele Ju mma? Ọza rịa rịa. M karụ m nù ele Ju ma ele búo ele Ju n'otu zì nù mkpururu mmehie.

10 Lele kpa ọkwukwo nsọ kwuru,
 “Ọ zá nye bụ nye mee mma, ọ búbedi otu.

11 Ọ zá nye nwernu akoniche,
 ọ zá nye noopio Chiokike.

12 Kpakara ele badnụ dasinnu Chiokike aznụ,

ọ zá iru be bnarnụ,
 ọ zá nye neeme nhne ọma ọ búbedi otu.

13 Ọnu be nù lele ilili gberu anya,
 riro be nookwu ọka aghigho,
 ọka ojo lele njulu agwo neehi nù mgbele-ọnu be whụya.

14 Ọvu ọnu nù okne ọnu ojo jihiaru be nù mkpọma.

15 Ọchi be zì snarna snarna n'ọwusa ọvnarna.

16 Olulu nhne nù nhne anya-mini noosno be n'apna be.

17 Be máa apna udno.

18 Ogwnu Chiokike zá be n'anya.”

19 Kìtna a magwụ nù kpakara nhne Iwu kwuru zìnu ele zì nù mkpururu Iwu, ma be kpusni kpakara ọnu ele badnụ, ma kpakara ọwa bna n'ikpe Chiokike.

20 Kwnornu nù ọ zá nye mee mma n'anya Chiokike hite nù ome nhne Iwu kwuru, kọvu Iwu neeme ele badnụ mahia nù be mehieru.

Ome mma hite n'ọkwnata mkpọma

21 Kọvu ome mma Chiokike whụyaru iwhne hne Iwu zìla, ọ bụ ezi ọka nù Iwu nù ele ọwhnurninya naagbanụ a akebne.

22 Ome mma Chiokike ka hiri n'ọkwnata ovu nù Jizọsi Karaisi zìnu kpakara ele kwehíaru, kwnornu nù ọkpa ike zìla nù rime a rịa rịa.

23 Kwnornu nù kpakara ele badnụ mehieru, be nwée rikne dụ igwugwu Chiokike.

24 Kòvụ nkesi ke oru Chiokike mernu kpakara badnụ bụru ele ikpe mámana hite n'ògbahia aị ke hi n'aka Karaisi Jizosi.

25 Chiokike nyernu a lele nkesi ọwhaji-ẹli hite n'òkwnata ovu, ka bụ ma Chiokike gesi ome mma a. N'ige wheru ewhe Chiokike jiri ogologo ọsnuta ovu lewhuru mmehie ke badnụ anya.

26 O mernu kam ma o gesi ikpe a zị snam n'ige ka, ma ọ bụru nye mee mma nga ọ neegweru badnụ lele nye ikpe mámana hite n'òkwnata ovu nụ Jizosi.

27 Ọ bụru kpam, ndaa hne mpako zị? Ọ zịla! Kịni kpararụ a? Ọ bụ nụ hite n'òbita nhne Iwu kwuru? Óza! Kòvụ a kwnatarụ ovu.

28 A nookwusi a rikne nụ be neegweru badnụ lele nye ikpe mámana hite n'òkwnata ovu, ọ bụo hite n'ẹrnu ke Iwu.

29 Chiokike, ọ bụ Chiokike ke ele Ju kpọi? Ọ bụo Chiokike ke ele bụo ele Ju sa? Owe! Ọ bụ ya.

30 Hne ọ bụ otu Chiokike, ọ jọogwnu ele be kparụ nka lele ele ikpe mámana hite n'òkwnata ovu be, nụ ele be kpála nka hite n'òkwnata ovu be.

31 A jaakaa nụ ka neegesi n'Iwu bnáge nụ nhne hite n'òkwnata ovu ka? Óza rịa rịa, kòvụ a neeme Iwu gwuzosi rikne.

4

Okwnata ovu Eberham

1 Ndaa nhne a jaakaa gbasiri Eberham nda aị? Kịni bụ nhne o piohiaru?

2 Ọ bụru nụ be hiri n'ẹrnu Eberham gwnụsi a nụ nye mee mma, o zneru anyaa risi nụ ka. Kòvụ o nwée rikne mee oknomokno nụ ruwhnu Chiokike.

3 Ọkwukwo nsọ kwuru kịni? “Eberham kweruru Chiokike, Chiokike gwnụsinu a nụ ọ bụ nye mee mma.”

4 Nye be kwuru ọgwo ẹrnu a, ọgwo ẹrnu a bụla nkesi, kòvụ nhne ọ rnhiaru n'ẹrnu.

5 Kòvụ nye rnúge ẹrnu, ke kwnatarụ Chiokike, nye nọogwnu ele ojo lele ele ikpe mána ovu, Chiokike ji ọkwnata ovu a gwnụ a nye mee mma.

6 Ka bụ nhne Devidi kwuru gbasiri nye ọwa ọma, nye Chiokike híge n'ẹrnu a gwnụ nụ nye mee mma,

7 “Nye ọwa ọma bụ nye Chiokike gbarụnu mmehie, nye be kpusnirni aruru-ẹli a.

8 Nye ọwa ọma bụ nye Chiokike zá nọogwnu mmehie a megidne a.”

9 Ngọzi ka, ọ zịnu ele be kparụ nka kpọi sa? Óza, ma ele be kpála nka. Kwnornu nụ a karụ nụ Eberham kweruru Chiokike, Chiokike gwnụsinu a nụ ọ bụ nye mee mma.

10 Ndaa hne nhne ka mernu? Ọ nga be kparụ a nka, sụ ọ bụ nga be kpála a nka? Ọ bụ nga be kpála nka.

11 Be kparụ a nka ma ọ bụru nhne elekema ke ome mma nụ ọ kwnatarụ Chiokike ovu

nga be kpála a nka, ma ọ bụru nda kpakara ele kweru, ma be gwnụsi be n'ele mee mma, ọ bụ n'ezi nụ be kpála be nka.

12 Ọ bụ masị nda ele be kparụ nka, ọ b́la nụ be kparụ be nka kpọi, kọvu nụ be noowu b́dnu ọkwnata ovu lele nda aị Eberham wuru sụ be kparụ a nka.

Mkwna Chiokike

13 Mkwna Chiokike kweru Eberham nụ avnurnu a nụ be jeekehia ọwa b́o hite n'ọbita Iwu, kọvu ome mma ke hiri n'ọkwnata.

14 Ọ b́ru nụ ele zị nụ mkpururu Iwu jeekehia mkwna wam, ọkwnata ovu b́u nhne etekne, mkwna Chiokike kweru bnána iru.

15 Iwu neegweya ovu owe ẹhni Chiokike. Hne Iwu źla, ọ źa nye jaadna Iwu.

16 Mkwna wam hiri n'ọkwnata mkpọma. O mernu o hite n'oru gwuzoru kwem nụ rime kpakara rụmu Eberham. Ọ b́o ele zị n'Iwu kpọi, kọvu ma ele sno ọkwnata ovu Eberham, kwnornu nụ ọ b́u nda kpakara aị.

17 Lele kpa be gbarụ a n'ọkwukwo nsọ, "M mernu m j́i nda aǵda mba." Ọ b́u nda aị n'anya Chiokike, nye ọ kwnatarụ ovu, Chiokike ke naakpatne nye nwurnu ọnwu, nye neeme nhne źgele a whụya iwhne.

18 Nga olile anya źla a, Eberham kwnatarụ ovu, ọ b́ru nda aǵda mba, lele kpa ọkwukwo nsọ kwuru, "Mkpuru i jaazi aǵda kpa."

19 Ọkwnata ovu a dnáge adna, nga ọ whnurnu nụ anọ-ẹhni a b́u nhne nwurnu ọnwu, hne ọ b́u otu riwhu awha, nụ rẹkpa-nnwọ Sera nwurnu ọnwu.

20 Kọvu ọkwnata ovu a dnáge adna hite nụ ọkwe ekwe mọbu onwe mkpọma lawuru gbasiri nhne Chiokike kweru a mkwna, ọkwnata ovu a mernu o gwuzosi rikne naaznarni Chiokike.

21 Ovu siri a rikne nụ Chiokike nwernu rikne o mezu nhne o kweru mkwna.

22 Kam kpayarụ, "Chiokike gwnụsinu a nụ ọ b́u nye mee mma."

23 Nụ be gwnụsiri a nụ nye mee mma, b́o nhne ke źnu a kpọi.

24 Ọ źi masinu aị ele be jọgwnusi n'ele mee mma, ele kweru nụ nye wam mernu Jizọsi Nyenwe aị hi n'ẹnwu lizọ.

25 Be nyernu a ma ọ nwụ kwnornu mmehie aị, o hiri n'ẹnwu lizọ ma Chiokike gwnụsi aị lele ele ikpe mámana.

5

Snarnima nụ udno

1 Ḱtina, hne Chiokike gwnurnu aị lele ele ikpe mána hite n'ọkwnata ovu, a nwernu udno nụ Chiokike hite n'aka Nyenwe aị Jizọsi Karaịsi.

2 Jizọsi b́u nye a hiri n'aka a, hite n'ọkwnata ovu gwuzoru n'oru Chiokike. A nọnwudna ọnwudna nụ a nwernu olile anya nụ a jeekehia igwugwu Chiokike.

3 Ọ b́o kam kpọi, a nọnwudna nụ rime

awhñuwhnu, kwnornu nù awhñuwhnu neegweya ọsnuta ovu,

⁴ Ọsnuta ovu neegweya agwa ọma, agwa ọma gweya olile anya.

⁵ Olile anya aị jọbu nhne etekne, kwnornu nù Chiokike wụkwasiri aị ọwhnun'anya a n'ovu aị hite n'Enine Nso, ke o kesiri aị.

⁶ Kwnornu nù nga a nwée rikne, Karaịsi nwurnu kwnornu aị ele ojo máa Chiokike.

⁷ O bụ nhne siri rikne nù badnụ jookwno nye ọma nwụ ẹnwu. Kọvu badnụ eleghi anya jeenwe rikne kwnornu nye mee mma nwụ.

⁸ Kọvu Chiokike gesiri aị ọwhnun'anya a ke bụ nù Karaịsi kwnornu aị nwụma kpa a zị kọriri nù rime mmehie.

⁹ Be hiri n'ọvnarna a gwnụ aị lele ele ikpe mána, ọ jọoznohia aị n'ovu owe ẹhni Chiokike.

¹⁰ Kwnornu nù a bụ ele irno Chiokike nù mbom, kọvu aị nù Chiokike mernu udno hite n'ẹnwu Nnwọ a. Kịna, a bụ ele enyi Chiokike, ọ jọoznohia a hite nù bụdnu Nnwọ a.

¹¹ O bụo kam kọi, kọvu a nọonwudna ọnwudna nù rime Chiokike hite nù Nyenwe aị Jizọsi Karaịsi, nye mernu aị nù Chiokike ziri n'udno.

Adam nù Karaịsi

¹² Lele kpa mmehie hiri n'aka otu badnụ bna nù rime ọwa, mmehie vuyarụ ẹnwu, ẹnwu wam zuru kpakara ọwa, kwnornu nù kpakara badnụ mehieru.

¹³ Mmehie zị n'ọwa sụ be nyernu Iwu, kọvu mmehie zila ire nga Iwu zila a.

¹⁴ Ẹnwu hiteru n'Adam du n'ige Mozizi nẹchi kpakara badnụ, ma ele méhiele lele kpa Adam mehieru. Adam bụ nye bítaala nhne Chiokike nyernu n'iwu.

Adam bụ oyiyi nye wam jaava.

¹⁵ Kọvu nkesi wam nuna lele mmehie. Kwnornu ọ bụru nù agida badnụ nwurnu hite nù mmehie otu badnụ, oru nù nkesi Chiokike zị agida kakwo, ke gazuru kpakara ele badnụ hite n'oru otu nye wam bụ Jizọsi Karaịsi.

¹⁶ Nkesi Chiokike zị ichne nù hne mmehie otu badnụ zị. Ikpe snornu otu mmehie wam ke vuyarụ ọmuma ikpe, kọvu nkesi wam sno agida mmehie ke vuyarụ ọgwunsi badnụ lele nye ikpe mánana.

¹⁷ Mmehie otu badnụ ka, Adam, mernu ẹnwu nẹchi ọwa, kọvu kpakara ele nahiaru nkesi oru zị agida ke Chiokike nù ome mma a, jeemegbu mmehie nù ẹnwu hite nù otu badnụ wam ke bụ Jizọsi Karaịsi.

¹⁸ Owe! Otu mmehie Adam vuyarụ ọmuma ikpe nù risi kpakara ele badnụ, kọvu, otu ẹrnu ome mma Karaịsi mernu ele badnụ bụru ele ikpe mánana n'anya Chiokike, ke nyernu be bụdnu.

¹⁹ Hite nù risi rikne otu badnụ kpakara ele badnụ ghọru ele mmehie, otu aka wam masị, obno nsni otu badnụ jeeme kpakara ele

badnu buru ele mee mma.

²⁰ Iwu varu ma nhne ojo zi agida, kovu hne mmehie zi agida, oru Chiokike baru aba k'agida.

²¹ Hne mmehie nechi hite n'enwu, oru Chiokike nechi hite n'ome mma ke noodubna nu budnu kwó okwo hite nu Jizosi Karaishi Nyenwe ai.

6

*Nwu nu mmehie,
ziri budnu nu Karaishi*

¹ Kini bu nhne a jaakaa? O bu ma a zi koriri nu neeme mmehie ma oru Chiokike ba oba?

² Oza rja rja! Ndaa kpa ai ele nwurru onwu nu rime mmehie jaazi koriri budnu nu rime a?

³ O bu nu anu ma sa, be wuru ai mini ma ai nu Karaishi Jizosi buru otu, nu be wuru ai mini ma ai nu Karaishi buru masi otu n'enwu a?

⁴ Hite nu mini be wuru ai, be likotaru ai nu Karaishi n'enwu a, ma a nu lele Karaishi nga o hiri n'enwu lizo hite n'igwugwu ke Nda, a joowu budnu ikne.

⁵ Kwnornu nu o buru nu ai nu a bu otu n'enwu a, kpm masi, ai nu a joburu otu n'olizo n'enwu a.

⁶ A magwu nu ehni oknani ai bu ke be kpogidnenu ya nu Karaishi n'olu ogba a, ma be lulu ehni mmehie, ma a gharu o buru ohi ke mmehie.

⁷ Kwnornu nga badnu nwurru, mmehie nwema iknernema n'ehni a berere.

⁸ O buru a snornu Karaishi nwu enwu, a kweru nu a joosno a ziri budnu.

⁹ A magwu nu Chiokike mernu Karaishi hi n'enwu lizo, o joonwu kwno berere, enwu nwema iknernema hne o zi berere.

¹⁰ Enwu o nwurru, o nwurru kwnornu mmehie otu mba, o zi budnu kitna, o zinu Chiokike budnu.

¹¹ Kpm masi, anu gwnu ehni anu lele ele nwurru onwu kwnornu mmehie, kovu ele zi budnu nyee Chiokike hite nu Karaishi Jizosi.

¹² Anu kwé mmehie nechi ano-ehni anu, neeme anu noobno nsni nhne ojo ano-ehni noopio.

¹³ Anu kwéko o gweru ehni anu nyee mmehie ma o buru nhne enu ke risi rikne. Kovu anu gweru ehni anu nyee Chiokike, lele ele hiri n'enwu bna nu budnu, anu gweru kpakara ehni anu nyee ma be buru nhne enu ke nhne oma.

¹⁴ Kwnornu nu mmehie za nechi anu, anu zila nu mkpururu Iwu, kovu nu mkpururu oru ke Chiokike.

Ele ohi ke ome mma

¹⁵ Kini bu ka? A jaazi neeme mmehie kwnornu nu a za nu mkpururu Iwu, kovu mkpururu oru ke Chiokike? Oza rja rja.

¹⁶ Anu magwu nu nye anu noobno nsni nhne o nookwu, anu bu ele ohi nye anu noobno nsni. Anu bu ohi ke mmehie ke noodubna n'enwu, mabu ohi obno nsni ke noodubna n'ome mma.

17 Kòvu ọ̀znarni zìnu Chiokike, kwnornu nù mbòm anù bụ ọ̀hi ke mmehie, kòvu anù bñornu nsnì hite nù mkpọ̀ma anù bna n'ezì ọ̀ka wam anù nahìaru.

18 Be dọ̀hiaru anù nù mmehie anù, ma anù bụru ọ̀hi ke ome mma.

19 M nookwu lele badnù, kwnornu nù anù zá rikne. Nù mbòm, anù gweru ẹ̀hni anù nyee nhne zìla rìchna nù risi rikne o mee nhne ojo, kpam masì, anù gweru ẹ̀hni anù bụru ọ̀hi ome mma bna n'ẹ̀rnu zì nsọ.

20 Nga anù bụ ọ̀hi ke mmehie, anù nwée igwe n'ome mma.

21 Ndaa mbnarna anù nwehìaru hite nhne kam nọotu iwhnerne? Risi kpakara nhne kam, bụ ẹ̀nwu.

22 Kòvu kịtna, be dọ̀hiaru anù nù rime mmehie, anù bụru ele ọ̀hi ke Chiokike, mbnarna anù jeenwehìja jeeme anù zìri nsọ ke joodubna nù bụdnu kwó okwo.

23 Kwnornu nù ọ̀gwo ẹ̀rnu mmehie bụ ẹ̀nwu, kòvu nkesi ke Chiokike bụ bụdnu kwó okwo hite nù Karaisi Jizọ̀si Nyenwe aì.

7

Nhne atụ ke ọ̀lulu nzi nù nnwerne

1 Rùmu nda m, m nookwunu anù ọ̀ka lele ele magwù Iwu, anù magwù nù Iwu jigwu badnù hne nye wam zì bụdnu.

2 Nyerinya nwernu nzi zì n'iwu nga nzi a zì bụdnu, kòvu

ọ̀ bụru nzi a nwù, ọ̀ zìma iwu jigwu a lele nye zì nù nzi.

3 Ka neegesi, ọ̀ bụru nù nzi a zì bụdnu, nyerinya wam gbọ nzi berere, be jookwu a nye neeme ọ̀yi. Kòvu ọ̀ bụru nù nzi a nwùrnu ọ̀nwu, iwu jígele a, ọ̀ bụru nù ọ̀ gbọru nzi berere. O méne ọ̀yi.

4 Rùmu nda m, otu aka wam, bụ kpa ọ̀ zìnu anù. Anù nwùrnu ọ̀nwu n'Iwu hite n'ẹ̀hni Karaisi. Anù bụ ke nye wam hiri n'ẹ̀nwu lizọ, ma anù bụru mgwna ẹ̀rnu ke bnarnù iru n'aka Chiokike.

5 Nga a zì bụdnu n'anọ-ẹ̀hni, nhne ojo ke Iwu Mozizi vuyarù bụ nhne a noosno, kpakara nhne a mernu dubnarnù aì n'ẹ̀nwu.

6 Kòvu kịtna, a nwernunem ẹ̀hni aì n'Iwu, kwnornu nù a agbùrulam n'iwu wam jigwu aì, a kpenu Chiokike n'apna ikne ke Enine, ọ̀ búo n'apna ọ̀knani ke Iwu be gbarù n'ọ̀kwukwo.

Iwu nù mmehie

7 Kìni bụ nhne a jookwu? Iwu wam ọ̀ bụ mmehie sa? Óza rìja rìja. Kòvu iwu mernu m mahìja mmehie. M znégele m amahìja nhne bụ a ọ̀who-anya ọ̀ bụru n'Iwu kwúle, "I nwékọ ọ̀who-anya."

8 Kòvu mmehie hite nù nhne be nyernu n'iwu nwehìaru oghere ọ̀ kpakne ọ̀who-anya zì ichne ichne. Kwnornu nù mmehie nwùrnu ọ̀nwu hne iwu zìla.

9 M zì m bụdnu hne iwu zìla, kòvu nga nhne be nyernu n'iwu varù, mmehie zìri bụdnu nù rime m, m nwùma.

10 Nhne be nyernu n'iwu ke kwesiri o gweya budnu, vuyanu m ɛnwu.

11 Mmehie hite nu nhne be nyernu n'iwu duwhuru m, hite nhne be nyernu n'iwu, gbu m.

12 Iwu wam zi nsɔ, nhne be nyernu n'Iwu zi masi nsɔ, o zi kwem, o buru oma.

13 Ka o neegesi nu nhne buru oma vuyanu m ɛnwu? Óza ría ría. O bu mmehie ke kpayaru a. Mmehie gweruru nhne buru oma mee a o vuyanu m ɛnwu, ma mmehie whuya iwhne nu o bu mmehie n'ezi. Hite nu nhne be nyernu n'iwu be jeegesi nu mmehie búo oma ría ría.

14 A magwu nu Iwu bu nhne enine. Kɔvu m bu m badnu etekne, nye be reru lele ohi ke mmehie.

15 M máam nhne me neeme, kwnornu nu nhne me noopio o mee, m nwée m rikne mee a, kɔvu nhne me píole o mee, bu nhne me neeme.

16 Nga me neeme nhne me píole o mee, ka neegesi nu Iwu wam buru oma.

17 Kɔvu o búo me neeme nhne ka, kɔvu o bu mmehie ke wu nu rime m.

18 M magwu m nu o zá nhne oma obula zi nu rime m (ke bu n'anɔ-ɛhni m). Kwnornu nu o naamasɔ m o mee nhne buru oma, kɔvu m nwée m rikne o mee a.

19 M mée m nhne oma me pioru o mee, kɔvu nhne búo oma me píole o mee, bu nhne me neeme.

20 O buru nu me mee nhne me píole o mee, ka neegesi nu o búo me bu nye neeme a, kɔvu o bu mmehie wam ke wu nu rime m.

21 M magwu m nu iwu nɔornu ɛnu, nga me pioru o mee nhne buru oma, nhne oju zi nu ruwhnu m.

22 Nu rime enine m, m noopio iwu Chiokike.

23 Kɔvu m nɔowhnu iwu berere nɔornu ɛnu nu rime m, iwu ke nɔolusi iwu ke ovu oɔwnu. O neeme m buru ohi iwu ke mmehie ke nɔornu ɛnu nu anɔ-ɛhni m.

24 M bu m badnu ke nɔowhnuji anya. Nyele jɔdohia m n'anɔ-ɛhni ke ɛnwu ka?

25 A nɔotunu Chiokike mmamma hite nu Nyenwe aɔ Jizɔsi Karaɔsi.

Hite n'echiche m, m bu m ohi ke iwu ke Chiokike, kɔvu, anɔ-ɛhni m bu ohi iwu ke mmehie.

8

Budnu hite n'Enine

1 Kɔtɔna, o zá ikpe naama ele zi nu rime Karaɔsi Jizɔsi. *

2 Kwnornu nu iwu ke Enine ke neegweya budnu nu Karaɔsi Jizɔsi, mernu m whɔga n'ohi iwu ke mmehie nu ɛnwu.

3 Nhne Iwu nwée rikne meli kwnornu nu anɔ-ɛhni badnu zɔla rikne, Chiokike mernu a, o ziyaru Nnwɔ a lele badnu ke mmehie ma o buru ariohna mmehie. Hite

* 8:1 Agwna ɔkwukwo ɔknani kwuru: ele zá noowu budnu lele kpa mmehie pioru, kɔvu lele kpa enine noopio.

nụ ya ọ ma bụdnu mmehie ke badnụ ikpe.

⁴ Chiokike mernu ka ma nhne ziri ezi ke Iwu zu ozu nụ rime aị ele noowu bụdnu lele kpa Enine noopio, ọ bụo kpa anọ-ẹhni noopio.

⁵ Ele noowu bụdnu n'anọ-ẹhni neeme nhne anọ-ẹhni noopio, ele noowu bụdnu n'Enine neeme nhne Enine noopio.

⁶ Nye anọ-ẹhni nẹchi nwurnu ọnwu, kọvu nye Enine nẹchi nwernu bụdnu nụ udno.

⁷ Kwnornu nụ nye anọ-ẹhni nẹchi bụ nye irno Chiokike, o nwée rikne b́ta iwu Chiokike, n'ezi, o j́enwe rikne b́ta a.

⁸ Ele anọ-ẹhni nẹchi j́enwe rikne mee nhne j́ooso Chiokike n'ọnu.

⁹ Anọ-ẹhni zá nẹchi anụ, kọvu Enine, ọ bụru nụ Enine Chiokike wu nụ rime anụ. Nye ọbula ke nwée Enine Karaịsi, b́o ke Karaịsi.

¹⁰ Ọ bụru nụ Karaịsi zị nụ rime anụ, ọ bụ n'ezi nụ anọ-ẹhni anụ nwurnu ọnwu kwnornu mmehie, kọvu enine anụ zị bụdnu kwnornu ome mmá.

¹¹ Ọ bụru nụ Enine Chiokike ke mernu Jizọsi hi n'ẹnwu lizọ wuru nụ rime anụ, nye wam ke mernu Karaịsi hi n'ẹnwu lizọ jeeme anọ-ẹhni anụ ziri bụdnu hite n'Enine a ke wu nụ rime anụ.

¹² Kam kpayaru, rụmu nda m, a jigwu ọgwo o wu bụdnu aị, ọ b́o kpa anọ-ẹhni noopio.

¹³ Kwnornu nụ ọ bụru nụ anụ wu lele kpa anọ-ẹhni anụ noopio, anụ j́onwu ẹnwu,

kọvu ọ bụru nụ anụ jeehi n'enine gbu kpakara ẹnụ ọjọ ke anọ-ẹhni, anụ jaazị bụdnu.

¹⁴ Kpakara ele Enine Nsọ Chiokike nẹchi bụ rụmu Chiokike.

¹⁵ Kwnornu nụ Enine Chiokike nyernu anụ méne anụ ele ọhi, ke neeme anụ bụru ele ogwnu. Kọvu Enine neeme anụ bụru rụmu Chiokike, anụ jeenwe rikne kwnakwu a, "Papa, Nda m."

¹⁶ Enine Nsọ Chiokike naagbanụ enine aị akebne nụ a bụ rụmu Chiokike.

¹⁷ Ọ bụru nụ a bụ rụmu Chiokike, a bụ ele nekehia mkpe, ele nekehia mkpe Chiokike, ele be nụ Karaịsi neekerikọta mkpe. Ọ bụru a snornu a ta awhnụwhnu, a jooosno a kehia igwugwu a masi.

Igwugwu ke zị nụ ruwhnu

¹⁸ M whnurnu m nụ awhnụwhnu ke ige ka bụ nhne a j́eji t́sinu igwugwu ke be jookpumenu aị.

¹⁹ Kpakara nhne be keru eke ji olile anya siri rikne neese nga be jeegesi rụmu Chiokike.

²⁰ Kwnornu nụ nhne be keru eke ǵọru nhne etekne, ọ b́o nụ rikne aka ke be, kọvu kpa Chiokike mernu be, be zị kọriri neele anya,

²¹ nụ nhne be keru eke jeenwernu ẹhni be whọga n'ẹhni oro oro, kehia igwe nụ o nwernu ẹhni zị igwugwu ke be b́tannu rụmu Chiokike.

²² A magwụ dụ ḱtna nụ kpakara nhne be keru eke

nɔsnu idne lele nye rime ɔmumu nnwɔ neeme.

²³ Kɔvu ɔ bɔo nhne be keru eke kpɔi, ma aɪ masi ele nwernu Enine ke bu nkesi mbom ke Chiokike, a nɔsnu idne nu rime ovu aɪ, neese nga Chiokike jeeme a buru rumu a, ma ɔ gbahia anɔ-ehni aɪ.

²⁴ Kwnornu be znɔhiaru aɪ hite n'olile anya, kɔvu ɔ buru a whnu nhne a neele anya a, ɔ buma olile anya n'ezɪ. ɔ za nye neele anya nhne ke ɔ whnugwu anya.

²⁵ Kɔvu ɔ buru a neele anya nhne a za nɔowhnu anya, a jeeji nkasi ovu neese a.

²⁶ Kpam masi, Enine Nso neeyinu aɪ aka, ɔ bu ezi nu a za rikne. Kwnornu nu a ma kpa a jeekpe okpukpe, kɔvu Enine Nso Chiokike neekpehianu aɪ, hite n'osnu idne ke ɔnu jɔokwuli.

²⁷ Kwnornu nu Chiokike nye noonynosna mkpoma badnu magwu echiche Enine, ɔ bu Enine Nso nɔorio aririo nu risi ele nso lele kpa echiche Chiokike jiri zi.

A kakwo ele mmeri

²⁸ A magwu nu Chiokike neeme kpakara nhne nɔornuko ɛnu ɔma n'otu kwnornu ele whnurnu Chiokike n'anya, ele o sukuru nu ma be mee echiche a.

²⁹ Kwnornu nu ele Chiokike mahiamarnu, ɔ bitaru be ichne, ma be nu lele Nnwɔ a, ma Nnwɔ wam buru ɔpnarna n'esilawuru agida rumu nda.

³⁰ Ele Chiokike bitaru ichne, o sukuru be, ele o sukuru, o mee be ele ikpe mama, ele o mernu ikpe ele mama, o mernu be kehia igwugwu a.

³¹ Ndaa nhne a jookwu nu kpakara nhne ka? ɔ buru nu Chiokike dasi aɪ n'ikwnu, nyele jeemegidne aɪ?

³² Nye wam ke bitala Nnwɔ a, kɔvu kesi aɪ ya, ndaa kpa o jee nye aɪ kpakara nhne?

³³ Nyele joobno ele Chiokike hɔhiaru nhne? ɔ bu Chiokike bu nye neeme ele badnu ele ikpe mama.

³⁴ Nyele bu nye naama aɪ ikpe? ɔ bɔo Karaɪsi Jizosi, nye nwurnu ɛnu, nye hiri n'ɛnu lizo, daziri n'akarikwnunga Chiokike nɔorionu aɪ aririo.

³⁵ Nyele jeekewa aɪ n'owhnnun'anya ke Karaɪsi? ɔ bu mkpa, sɔbu nhne osi rikne sa, sɔbu okne ɔkpagbu, sɔbu ɔknunyo, sɔbu ɔgba-eto, sɔbu aghom, sɔbu ama-ogwnu?

³⁶ Lele kpa be gbaru a n'okwukwo nso,

“Kwnornu anu, ɛnu neeche aɪ aka nu ruwhnu kpakara ɔbochi,

be nɔopnughari aɪ lele atnurnu be noogbu ogbu.”

³⁷ ɔza! A nwernu omeri nu kpakara nhne ka hite nu nye wam ke whnurnu aɪ n'anya.

³⁸ Kwnornu nu m magwu m nu ɛnu mɔbu budnu, mɔbu enine izi, mɔbu renwu ojo, mɔbu nhne ke zi kina, mɔbu nhne ke jaava, mɔbu rikne obula,

³⁹ mɔbu olu mɔbu nhne zi nu rime eli, mɔbu

nhne berere be keru eke, jéenwe rikne kewama aì n'òwhnun'anya ke Chiokike ke zì nù rime Karaìsi Jizòsi.

9

Chiokike nù ele ke

ò hòhoruru

¹ M nookwu ezi òka nù rime Karaìsi, ò búo aghalaghala, Enine Nso naagbanù ovu m akebne nù m zá m naagha aghalaghala.

² Anya-mini zì m nù mkpòma, nhne igbugbu zì m nù mkpòma kpakara ige.

³ Ò jaamasì m, ò búru nù Chiokike vùru m ònu, kewama m nù hne Karaìsi zì, kwnornu rùmu nda m, ele èli m,

⁴ ele Izireli. Chiokike mernu be búru rùmu a, ò okpumennu be igwugwu a, ya nù be gbarù njò-èhni, ò nyernu be Iwu, be nwernu okpukpe òma, nù kpakara mkwna Chiokike,

⁵ be bú avnùnu kwu ele nda òknani, Karaìsi hiri n'avnùnu be va n'anò-èhni. Òznarni zìnu Chiokike ke nèchi kpakara nhne òkwnukokwnu. Amim.

⁶ Ò búo nù Chiokike mézule ikwu-ònu a, kwnornu nù ò búo kpakara ele hi n'avnùnu Izireli bú rùmu Izireli n'èzi.

⁷ Kpakara be búo rùmu Eberham n'èzi, ò búbedi nù be hi n'avnùnu Eberham. Kwnornu nù òkwukwo nsò kwuru, “Kòvu be jòogwnu rùmu ì hite n'Aziki.”

⁸ Ka bú nù ò búo rùmu be múnru n'anò-èhni bú rùmu Chiokike, kòvu ele be múnru

lele kpa Chiokike kweru Eberham nù mkwna bú rùmu a n'èzi.

⁹ Kwnornu nù ka bú nhne mkwna wam kwuru, “N'ige be karù aka, m jeehieha, Sera jòomu nnwò rukna.”

¹⁰ Ò búo ka kpòì, rùmu Ribeka nwernu otu nda, ke bú nda òknani aì Aziki.

¹¹ Sù ò múnru rùmu ejima rukna lawùru wam, nga be mége nhne òma mòbu ke ojo, ma nhne Chiokike kwuru gwuzosi rikne,

¹² ò búo hite n'ènu kòvu kwnornu nù ò sukwu ikwu a, Chiokike kannù Ribeka, “Nye ke okno badnù jeeznenu nye ke matì izi.”

¹³ Lele kpa be gbarù a n'òkwukwo nsò, “M whnùnu m Jekòpu n'anya, sno Isò irno.”

¹⁴ Ndaa nhne a jookwu? Ò bú nù Chiokike bú nye ndala sa? Óza rìà rìà.

¹⁵ Kwnornu nù ò kannù Mozizi,

“M jòodonu nye me jòodonu obirizi, obirizi,

mee masìnu nye masìri m oru.”

¹⁶ Ka neegesi nù ò búo hite nù nhne badnù noopio mòbu nhne be nòornu, kòvu ò bú obirizi Chiokike.

¹⁷ Kwnornu nù òkwukwo nsò kannù Fero, “Ka bú nhne me kwnò gwuzote ì, ma m gesi m iknernema m n'èhni ì, ma kpakara òwa mahìa rèwhna m.”

¹⁸ Chiokike nòodonu nye masìri a obirizi, neemenu nye ò pioru ma ò knesni mkpòma, knesni mkpòma a.

Ikpe nụ obirizi Chiokike

19 Otu badnụ jaakanụ m, “Ndaa kpa Chiokike naama aị ikpe? Nyele nwernu rikne o gwuzogidne echiche a?”

20 Jị badnụ etekne, ị bụ nyele naasa Chiokike ọka? Nhne be kpuru ọkpu ọ jaasikwa nye kpuru a ajiji, “I kwno kịni kpụ m kpa?”

21 Ọ bụ nye nọkpu ite o nwée rikne n'ehni otu ọrura wam kpụ ite lawuru, otu bna n'ernu zị okne mkpa, ke berere be ji a rnụ ernalu kpakara ige?

22 Ọ zị Chiokike n'aka o gesi ikpe nụ iknernema a, kovu, ọ zị kwno a n'aka o gesi ogologo ọsnuta ovu n'ehni ele o neekpe ikpe, bụ ele ọ bítaru ma ọ la be n'iyi.

23 Ọ zị masị n'aka a ọ wụkwasi ọkwnamarna igwugwu a nụ bụdnụ ele ọ bítannu obirizi a.

24 Kwnornu nụ a bụ ele o sukwuru, ọ bụo hite n'avnurnu ele Ju kpọi, kovu ma hite n'eli ele bụo ele Ju.

25 Ka bụ nhne o kwuru n'okwukwo Hosiya,

“M jookwu be ele ke m, ele wam bụo ele ke m,
ele wam me whnúge n'anya, m jookwu be ele me whnurnu n'anya.

26 Ọ jọobu nụ hne be zị kaa, nụ be bụo ele ke m,
jọobu hne be jookwu be rụmu Chiokike ke zị bụdnụ.”

27 “Azaya siri okokoba gbasiri rụmu Izireli, kaa,

Ọ bụ n'ezị nụ rụmu Izireli nụ lele rịzna ke ngeri osimini,
ele be jọoznohia jaazi matị k'agịda.

28 Kwnornu nụ Jihova jeekpebi ikpe ọwa wara wara n'ome mma.”

29 Lele kpa Azaya kwuru nụ mbom,

“Ọ bụru nụ Chiokike ke Meli Nhne Dum
dónu aị obirizi ghasanụ aị agwna rụmu,
a znernu ọnu lele Sodom,
a znernu ọnu lele Gómora.”

Ele Izireli kwéle ọ nabnarnụ izi ọma

30 Ndaa nhne a jookwu? Ọ bụ nụ ele bụo ele Ju ele zá noosno ome mma Chiokike, nwehíaru ome mma ke hi n'okwnata mkpoma?

31 Kovu ele Izireli, noosno iwu ome mma nwée nhne iwu ome mma karụ, be píońjala a.

32 Kịni kpayarụ ka? Kwnornu nụ be jíge ọtukwasi ovu pio a, kovu lele nụ ọ bụ n'ernalu. Be dna n'olu rugwu nọkpobi ọchi.

33 Lele kpa be gbarụ a n'okwukwo nsọ, kaa,

“Le, m bítaru m otu akaworugwu nụ rime Zayoni

ke jeeme ele badnụ kpọbi ọchi,
rugwu ke jeeme be dna.

Kovu nye ọbula ke tükwasiri a mkpoma,
be jéekwe iwernerne tų a.”

10

1 Rụmu nda m, nhne nọogwnu m nụ mkpọma, m neekpe masiṅu Chiokike gbasiri ele ke m bu Izireli, bu ma be znohia be.

2 M jaagbanu be akebne nu be nwegwu mkpọma o kpenu Chiokike, kovu be nwée oghohia.

3 Kwnornu nu be máa ome mma ke Chiokike, be bete noogwuzote ome mma ke be, be bitala eḅni be nu mkpururu ome mma Chiokike.

4 Karaṣi bu mbimambi Iwu, nye obula ke tukwasiri a mkpọma, jeenwehia ome mma.

Oznohia zinu kpakara badnu

5 Ka bu nhne Mozizi kwuru gbasiri ome mma ke hi n'Iwu, "Nye obula ke bitaru Iwu jaazi budnu nu rime be."

6 Kovu ome mma ke hiri n'otukwasi mkpọma karu kpa, "Ikwuko nu mkpọma i, 'Nyele jeezne oligwe?' (zne gwedna Karaṣi).

7 Mọbu, 'Nyele jeezne nu rime eli?' (zne gwelizo Karaṣi n'enwu)."

8 Kovu ndaa nhne o kwuru? "Ikwu-onu wam zi i ndundu, o zi n'onu i ma n'ovu i." Kam bu ikwu-onu otukwasi ovu ke a nọokpo okwo.

9 O buru nu i jeeji onu i kwuhia nu Jizosi bu Nyenwe ai, gweru mkpọma i kweru nu Chiokike mernu o hi n'enwu lizo, be joznohia i.

10 Kwnornu nu badnu ji ovu a kweru, be gwnusi a

nu nye ikpe mana, o ji onu a kwuhia, o nwehia oznohia.

11 Okwukwo nsọ kwuru kpa, "Iwhnerne za notu ele kw-nataru a ovu."

12 O za nhne zi ichne hne nye Ju nu nye buo nye Ju zi. Chiokike bu Nyenwe kpakara badnu, nọowukwasi ngozi a nu risi ele naakwnakwu a.

13 Kwnornu nu be joznohia kpakara ele noosukwu rewhna Nyenwe ai.

14 Kovu ndaa kpa be joosukwu a, o buru nu be kwéle nu ya? Ndaa kpa be jeekweru, o buru nu be nuna nhne gbasiri a sa? Mọbu ndaa kpa be jonu, hne o za nye nọokpo okwo izi oma?

15 Ndaa kpa be jokpo okwo hne o za nye zizneru be? Lele kpa be gbaru a n'okwukwo nsọ, kaa, "Le kpa ochi be marnu mma bu ele neezni izi oma."

16 Kovu, o buo kpakara be kweru izi oma wam, kwnornu nu Azaya karu, "Nyenwe ai, nyele kweru izi a ziri?"

17 Ka neegesi nu okwnata mkpọma jeehi nu onurnu izi oma va, onurnu jeehi n'okpo okwo izi oma Karaṣi.

18 Kovu m neesikwa, o bu ezi nu be nuna izi oma wam? Be nuru a. Lele kpa okwukwo nsọ kwuru,

"Nkọli be gazuru kpakara owa,
ikwu-onu be duru hne owa sotoru."

19 M neesikwa kwno, o bu nu ele Izireli mana? Mozizi n'iwuru a beru osno kaa,

“M jeeji ele mba ọ zá nhne be
bụ mee anụ nwe anya-
kwu,
m jeeji mba ke nwée
akõniche kpasu anụ
iwe.”

²⁰ Azaya kwusiri a rikne
kaa,

“Ele zá noopio m, piohiaru m,
m mernu m ele zá
nẹsikwa ajiji gbasiri m
whnụ m anya.”

²¹ Ka бү nhne o kwuru
gbasiri Izireli,

“Kpakara obochi, m gbasaru
m aka m lawuru o
kwubnanya
ele risi rikne nụ ele zá
noobno nsni.”

11

Chiokike ghásala ele ke a

¹ M sika kwno, ọ бү нү
Chiokike ghasaru ele ke a sa?
Óza! Ma n'iwuru m бү nye
Izireli, ke avnuru Ebereham,
eriri ruwho Benjamini.

² Chiokike ghásala ele ke a
ọ mahiamarnu нү mbom. Anụ
magwu nhne okwukwo nsọ
kwuru нү hne Elaija naariasno
Chiokike megidne Izireli,

³ “Nyenwe ai, be gburu ele
owhurninya i, be kwnadna
ojo ariohna i, me нү nsunu
m gwnarnu, be noopio o gbu
m.”

⁴ Kini бү nhne Chiokike
kannu a? “M bitannu m eñni
m pokwu ele rukna esau, ele
kponna Bali risi eli.”

⁵ Kpam masi, n'ige ka,
Chiokike, hite n'oru a hohiaru
ele ke gwnarnu.

⁶ Kwnornu нү ọ бү oru a, ọ
bũo n'ernu, ọ бүru нү ọ бү hite
n'ernu, oru bũma oru.

⁷ Kini kwno? Ele Izireli
piohiala nhne be noopio, kovu
ele wam ọ hohiaru piohiaru a,
ovu kporu ele berere bekwu.

⁸ Lele kpa be gbaru
n'okwukwo nsọ, kaa,
“Chiokike nyernu be enine
iwhnirniwhno
be nwernu anya, kovu be
whnu osno,
be nwernu nsni, kovu be
nu nhne,
du tna.”

⁹ Devidi karu,
“Iriri be ghọ mbita нү nhne
joogbu be,
be dna n'olu a, ta
awhnuwhnu.

¹⁰ Isni kpu be, be whnu osno,
ivu rinya nyigbu be
okwnukokwuu.”

Oznohia ele bũo ele Ju

¹¹ M nẹsikwa, ele Izireli be
dnarnu ma be la n'iyi sa? Óza
ria ria. Kwnornu нү mmehie
be, ele bũo ele Ju nwehiaru
oznohia, ke jeeme ele Izireli
nwe anya-kwu.

¹² Ọ бүru нү mmehie be
mernu kpakara owa nwe
ngõzi, be dnarnu mboni ma
ele bũo ele Ju nwehia ngõzi,
kpakara owa jeenwe agida
ngõzi nga be jeekweru нү
Karaisi.

¹³ M nookwunu anụ ọka
kitna ele bũo ele Ju. Hne me
bү nye izi ele bũo ele Ju, m
jeeji ernu m kpa nganga.

¹⁴ Nyele ma, m nwernu
rikne mee ele eli m nwe anya-
kwu, ma m nwernu m rikne
znohia agwana be.

15 Kwnornu nū nga Chiokike ghasarū be, kpakara ọwa nū Chiokike mernu udno. Kīni jeeme nga Chiokike jookwubnanya be? Ọ jọbu nū ele nwurnu ọnwu jaazi budsonu.

16 Ọ buri nū mpekele bredi mbom be nyernu Chiokike zi nsọ, kpakara ke gwnarnū zi nsọ. Ọ buri nū egwnugwnu isisi zi nsọ, kpakara nkala a zi masi nsọ.

17 Ọ buri nū be o gbukwahalarū agwna nkala olivu, be gweru anū buri nkala olivu ọhia nyakwnusi a, anū neeri nhne ọma ke hi n'isisi olivu wam.

18 Anū menu nkala wam oknomokno, chenwanya nū ọ buri anū vu egwnugwnu, kovu egwnugwnu vugwu anū.

19 Kovu kwu kpa, “Be gbukwahalarū nkala isisi gweru ai nyakwnusi.”

20 Owe! Be gbukwahalarū be kwnornu nū be kwé ekwe, kovu, anū gwuzo kwnornu nū anū tukwasiri ovu. Anū vúlizo ẹhni anū olu, tñnuma, anū tẹ gwnu.

21 Kwnornu nū ọ buri nū Chiokike gharula ọ ta nkala isisi olivu ke ruhjaru awhnūwhnu, ọ jaagharū ọ ta anū awhnūwhnu.

22 Le mkpoma ọma nū nhne rikne ke Chiokike, nū o mesiri ele dnarnū adna rikne, kovu ọ donu anū obirizi, ọ buri nū anū jaadazigidne nū mkpoma ọma a. Ọ buri nū anū jaadazigidne nū mkpoma a, o joogbukwahala anū.

23 Ọ buri nū ele Ju jeehi n'ókwe ekwe be whuya, Chiokike jaanyakwnusi be berere, kwnornu nū Chiokike nwernu rikne ọ nyakwnusi be.

24 Anū buri nkala isisi olivu ọhia, ke Chiokike nyakwnusiri n'ẹhni isisi olivu be znurnu ọznu, lele kpa o kwésile. Ọ buri nū Chiokike mernu kpa, anū mahia nū o nwernu rikne nyakwnuhnasi nkala isisi olivu be znurnu ọznu n'ẹhni isisi olivu kam be zi.

*Obirizi Chiokike
zini kpakara badnu*

25 Rumu nda m, o nwernu nhne omimi me noopio anū mahia, ma anū gharū eche nū anū buri ele akọ n'anya anū. Nhne omimi kam buri nū risi rikne rumu Izireli jaazi okwnukokwnu. Kovu ọ jaazi tem ọnu ogwnugwnu ele buri ele Ju ele jaavakwnusi Chiokike zute.

26 Kpam masi, be jọznohia kpakara ele Izireli, lele kpa be gbarū a n'okwukwo nsọ,

“Nye Ọznohia jeehi nū Zayoni va,

o joovume kpakara mmehie rumu Jekọpu.

27 Me nū be jaagba njo-ẹhni, nga me vumernu mmehie be.”

28 Ele Ju buri ele irno izi ọma. Ka buri mbnarna ke anū ele buri ele Ju. Kovu be buri ele ọ hohiaru, whnu be n'anya kwnornu ele nda be oknani.

29 Chiokike zá naagbanwo echiche a n'ẹhni ele ọ hohiaru, gozi masi.

30 Hne anụ ele bụo ele Ju zị, anụ bnóge Chiokike nsni nụ mbom, kovu kítna, anụ nwernu obirizi Chiokike kwnornu ele Ju ele bnóge nsni.

31 Kpam masị, anụ nwehíaru obirizi Chiokike mernu ele Ju bnóge Chiokike nsni ma be nwehí masị obirizi Chiokike.

32 Kwnornu nụ Chiokike mernu kpakara ele badnụ bụru ele risi rikne ma be nwehíaru obirizi a.

Oznarni zínu Chiokike

33 A! Le kpa ẹkwnu nụ akoniche nụ nhne omuma Chiokike hna omimi.

Kpa a nwée rikne nyosna a echiche a,
badnụ nwée rikne pi-
ohíali apna a.

34 “Nyele magwụ mkpoma Nyenwe aị?

Nyele nwernu rikne zni a ezni?”

35 “Nyele nyeleru Chiokike nhne,
ma Chiokike kwụ a ọgwo?”

36 Ya keru kpakara nhne, kpakara nhne ke zị bụ ke a, ya nwe kpakara nhne.

Oznarni zínu a ọkwukokwnu. Amim.

12

Budnu nye ẹrnu Chiokike

1 Rumu nda m, kam kparyarụ, m ji m obirizi Chiokike naariasno anụ, anụ gweru ẹhni anụ yisi n'aka Chiokike lele aríohna zị budnu, zị nsọ, ke nọso Chiokike n'ọnu, bụ

ke anụ kwannụ Chiokike n'ezi.

2 Anụ núko lele ele ọwa ka, kovu Chiokike gbanwo echiche anụ ma ọ ziri ikne ikne, ma anụ mahía nhne bụ echiche Chiokike, echiche ọma a, ke nọso a n'ọnu, ke zuru ozu.

3 Kwnornu nụ oru Chiokike nyernu m, me kanụ anụ, ọ zá nye vulizọ ẹhni a olu n'oriri a karụ kpa o kwesiri, kovu anya dno anụ nụ risi n'okpe ẹhni anụ ikpe. Anụ gweru ọkwata ovu Chiokike túsinnu anụ kpe ẹhni anụ ikpe.

4 Lele kpa a nwernu agída nhne ke zị ẹhni, ke ọbula nwernu ẹrnu ke a.

5 Kpam masị, ọ bụ n'ezí nụ a zị agída, a bụ otu nụ rime Karaisi, be knekotaru aị n'otu lele nhne zị ọdo nụ ọdo n'otu anọ-ẹhni.

6 Nye ọbula nwernu nkesi ke a lele kpa oru Chiokike nyernu a. Ọ bụru nụ nkesi otu badnụ bụ whnụ ọwhnurninya, nye wam gweru ọtukwasi ovu mee a.

7 Ọ bụru nụ nkesi a bụ o zne izi, o zne a, ọ bụru o zni nhne, o zni nhne.

8 Ọ bụru ọ gba ele badnụ inwe, o mee kpam. Nye neekesi ele berere nhne, o mee a nụ mkpoma ọma, nye noodu ele badnụ, ọ rnusi ẹrnu a rikne. Nye nọodo obirizi, o gweru mkpoma ọma mee a.

Iznizni gbasiru

Ọwhnun'anya

9 Ọwhnun'anya kwesiri ọ zị snam. Anụ sno nhne ojo irno, anụ knekwaru nhne ọma aka rikne.

10 Anụ gweru ọwhnun'anya rụmu nda whnụ ibne anụ n'anya nụ rime Karaisi, anụ sọbisinu ibne anụ karụ ẹhni anụ.

11 Anụ búo ele ime mgwụ, anụ rnụsi ẹrnu rikne, anụ gweru mkpọma zị snam neez-nenu Nyenwe aị izi.

12 Anụ nwụdna n'olile anya, anụ snụta mkpọma nụ rime ọkpagbu, neekpe okpukpe kpakara ige.

13 Anụ nụ ele nwée nhne kerita ẹkwnu anụ, anụ lekọta ele izne.

14 Anụ nọgozi ele naak-pagbu anụ, anụ nọgozi, anụ vúko be ọnu.

15 Anụ snornu ele nọonwudna ọnwudna, nwụdnahorú, anụ snornu ele naagba mkpe, gba mkpe.

16 Nhne gbasiri ele berere metụ anụ nụ mkpọma. Anụ búko ele oknomokno, anụ snornu ele ovu dūru ẹli meko nhne. Anụ búo ele akọ n'anya anụ.

17 Anụ jíko nhne ojo kwụ nye mernu anụ nhne ojo ọgwo. Anụ mee nhne bụru ọma n'anya ele badnụ.

18 Anụ nụ kpakara ele badnụ ziri n'udno, ọ bụru nụ o kwe omume, kpa anụ nwernu rikne.

19 Ele me whnurnu n'anya, anụ mégwarnnụ, kọvu gharu ọnuma Chiokike rnụ ẹrnu a, kwnornu nụ ọkwukwo nsọ kwuru, nụ Nyenwe aị kwuru, "Mawa nwe mmegwnahia, m jeemegwnarnụ."

20 Kọvu lele nhne ọkwukwo nsọ kwuru,

"Ọ bụru nụ wiri nọogwnu nye irno i, nyee a wiri, ọ bụru nụ akpiri nọokpo a bẹkwnu, kwute a mini, o nwọrnu,

kpam, i naaghakwasị esekere bẹkwnu n'olu risi a."

21 Anụ kwé nhne ojo megbu anụ, kọvu anụ gweru nhne ọma megbu nhne ojo.

13

Mkpururu ele ọchichi

1 Nye ọbula bita ẹhni a nụ mkpururu ọchichi, kwnornu nụ ọ zá ele nẹchi ọchichi ke Chiokike bitala, Chiokike bitaru kpakara ele nẹchi ọchichi.

2 Nye ọbula ke neemegidne ọchichi neemegidne nhne Chiokike bitaru, nye mernu kpam jeegweyanu ẹhni a ikpe.

3 Ele neeme nhne ọma zá nọotu ogwnu ele ọchichi, kọvu ele neeme nhne ojo jọotu ogwnu. I pioru ogwnu ele nẹchi ẹchi gharu ọ tụ i? Mee nhne bụru ọma, be jaaznari i.

4 Kwnornu nụ ọ bụ nnwọ izi Chiokike neeme nhne ọma. Kọvu ọ bụru nụ i mee nhne ojo, ogwnu a tụ i, kwnornu nụ o vule ama-ogwnu a etekne. Ọ bụ nnwọ izi Chiokike, neemegwnahianu a ovu owe ẹhni a n'ẹhni ele neeme nhne ojo.

5 Kam kpayarụ, i joobno nsni ele ọchichi, ọ búo kwnornu nụ ovu owe ẹhni Chiokike kpọi, kọvu kwnornu nụ mkpọma i.

⁶ Ke bu anụ jootu ntụ-eli, kwnornu nụ ele ọchichi bu rụmu izi Chiokike n̄ornu ẹrnu z̄inu be, ele ji kpakara ige be n̄echi ọchichi.

⁷ Anụ kwụ ọgwo anụ ji be, tu ntụ-eli ọ buru anụ ji ọgwo ntụ-eli, tu ntụ ahịa ọ buru nụ anụ ji ọgwo ntụ ahịa, sọ nye kwesiri anya, bisinu nye kwesiri.

Whnụ ibne anụ n'anya

⁸ Anụ jí nye ọbula ọgwo, kovu anụ whn̄urita ẹhni anụ n'anya. Nye ọbula ke n̄owhnu badn̄u ibne a n'anya mezuru Iwu.

⁹ Iwu wam, “I mékọ ọyi, i gbúko badn̄u, i znúko buznu, i nwéko ọwho-anya.” Ka nụ kpakara iwu berere jikogwu aka n'otu iwu ka, “Whn̄u nye agbatibi i n'anya lele ẹhni i.”

¹⁰ Nye ọbula ke whn̄urnu nye agbatibi a n'anya jéeme a nhne ọjo. Ọwhnun'anya bu o mezu kpakara Iwu.

¹¹ Anụ mee kpa, anụ magwụ nhne ige ka bu. Ka bu ige anụ jeetn̄enya n'anyarna, kwnornu nụ ọznohia aị z̄i nd̄undu k̄itna karụ nga a kweru nụ mbom.

¹² Chi jiminem, chi ọbubo z̄i masi nd̄undu, a gharu ẹrnu ọchichiri, woru mgwna ọgwnu ke iwhne.

¹³ Ngwa ma a kpa agwa lele ele z̄i n'iwhne ke ọbochi, ọ búo ele okne iriri nụ ele ẹra manya naagba, ọ búo nụ nhne rune nụ nhne tu iwhnerne, ọ búo ọlu ọgwnu, nụ anya-kwu.

¹⁴ Kovu anụ woru Nyenwe aị Jiz̄osi Karāisi lele iwo, anụ

nyée an̄o-ẹhni anụ oghere o mee nhne ọjo ke n̄ogwnu a.

14

Anụ kpé rụmu nda anụ ikpe

¹ Anụ kwubnanya nye zá rikne nụ ọkwnata ovu, kovu anụ nụ a d̄ogbuta kwnornu nhne o kweru.

² Ọkwnata ovu otu badn̄u kweru a, o ri kpakara nhne, kovu nye berere, ọkwnata ovu a zá rikne, neeri ọkwukwo ọhia kp̄oi.

³ Nye ke neeri kpakara nhne lédna nye zá neeri anya, nye zá neeri kpakara nhne kpé nye neeri kpakara nhne ikpe kwnornu nụ Chiokike nakweruru a.

⁴ I bu nyele ke neekpe ọhi nye berere ikpe? Ọ bu nyenwe a jaaka ma ọ mekwah̄aru m̄obu o mékwah̄ala. O jeemekwah̄a, kwnornu nụ Nyenwe aị jeeme a o gwuzoru kwem.

⁵ Otu badn̄u kanu otu ọbochi z̄i mkpa k'agida n'esilawuru ọbochi berere, nye berere jaaka nụ kpakara ọbochi bu otu. Echiche nye ọbula ji a rụwho.

⁶ Nye karu nụ otu ọbochi z̄i mkpa k'agida neeme a n̄osobisinu Nyenwe aị, nye neeri nhne ọbula n̄osobisinu Nyenwe aị, kwnornu nụ ọ n̄otunu Chiokike mmamma nụ wiri wam. Nye zá neeri agwna nhne n̄osobisinu Nyenwe aị, n̄otunu Chiokike mmamma.

⁷ Ọ zá nye z̄inu ẹhni a budnu kp̄oi, ọ zá nye n̄onwunu ẹhni a ẹnwu.

8 Ọ bụru nụ a zị bụdnu, a zinu Nyenwe aị bụdnu, a nwurru ẹnwu, a nwunu Nyenwe aị, ma a zị bụdnu ma a nwurru ọnwu, a bụ ke Nyenwe aị.

9 Kwnornu nụ Karaisi nwurru, hi n'ẹnwu lizọ ma ọ bụru Nyenwe ele zị bụdnu nụ ele nwurru ọnwu.

10 Jịwa, i kwno kịni neekpe nnwọ nda i ikpe? I kwno kịni neeledna nnwọ nda i anya? Kpakara aị joogwuzo nụ ruwhnu ngadna ikpe Chiokike.

11 Lele kpa be gbarụ a n'ọkwukwo nsọ,

“Nyenwe aị kwuru kpa, ‘Kpa me zị bụdnu
kpakara mpnerne ọchi
joogbunu m n'eli,
kpakara riro jookwupiya
nụ mawa bụ Chiokike.’”

12 Kpakara aị n'otu n'otu jaakahia nhne a mernu nụ ruwhnu Chiokike.

13 A gharụ o kpe ẹhni aị ikpe, tñunuma, i bita nhne jọkpo nnwọ nda i ọchi, mọbu nhne jeeme ọ dna.

14 M magwụ m nụ hite nụ mmekọrita ke me nụ Nyenwe aị Jizọsi, ọ zá nhne ke zila richna, ọ bụru nụ badnụ kaa nụ otu wiri zila richna, ọ zila richna hne ọ zị.

15 Ọ bụru nụ nhne i riri jeemekasi nnwọ nda i ẹhni, i zá neezne izne n'owhnun'anya. I kwéko nhne i riri lulu nye Karaisi kwnornu nwu ẹnwu.

16 I kwéko be kaa nụ nhne ọma i bụ nhne ojo.

17 Kwnornu nụ ẹli-eze Chiokike búo nhne oriri nụ

onwunwo, kọvu ọ bụ ome mma, udno nụ snarnima nụ rime Enine Nsọ.

18 Kwnornu nụ nye neez-nenu Karaisi izi kpa neeme nhne nọoso Chiokike n'ọnu ma nụ ruwhnu ele badnụ.

19 Ngwa ma a neeme nhne jeegweya udno, nụ ke joowuli aị olu lele ọro.

20 I kwnó wiri lulu ẹnwu aka Chiokike. Kpakara wiri zị richna, kọvu ọ búo ọma o ri nhne jeeme badnụ dna.

21 Ọ bụru ọma i gharụ o ri wiri, mọbu nwọ manya, mọbu mee nhne ọbula ke jeeme nnwọ nda i dna.

22 Kpakara nhne i kweru nụ rime nhne ele ka, dazinum jị nụ Chiokike. Nye ikpe máge nụ nhne o kweru bụ nye ọwa ọma.

23 Kọvu ọ bụru nụ mkpọma badnụ marnụ a ikpe nụ nhne o riri, Chiokike jaama a ikpe ma o ri a, kwnornu nụ ọ kwnátala mkpọma nụ nhne o neeme. Nhne ọbula ke híge n'ọkwnata mkpọma bụ mmehie.

15

Mee nhne jọoso ele berere n'ọnu

1 Aị ele zị rikne nụ ọkwnata mkpọma kwesiri o vuru ekperi ele zá rikne. Ọ búo neeme nhne nọoso aị n'ọnu.

2 Nye ọbula menu badnụ ibne a nhne bụru ọma, ke jọoso a n'ọnu, ma o wulizọ a olu lele ọro.

3 Kwnornu nụ Karaisi méne nhne jọoso ẹhni a n'ọnu, lele kpa be gbarụ a n'ọkwukwo nsọ, “Nhne

iwhnerne ele naakpasi i iwhnerne dnakwasiri m.”

⁴ Kpakara nhne be gbaru n'okwukwo nsọ n'obochi wheru ewhe zinu ai, neezni ai nhne, ma a nwernu olile anya hite n'ndidi nu ọgba inwe ke okwukwo nsọ nyernu ai.

⁵ Chiokike ke neenye ndidi nu ọgba inwe mee anu nwernu enine oziri n'otu kpa anu noosno Karaishi Jizosi,

⁶ ma kpakara anu n'otu jeegweru otu onu znarni Chiokike nu Nda Nyenwe ai Jizosi Karaishi.

⁷ Anu kwubnanya ibne anu lele kpa Karaishi kwubnanyanu anu ma anu znarni Chiokike.

⁸ M naakanu nu Karaishi ghoru nnwo izi ele Ju ma o gesi ezi oka Chiokike, mezu mkwna o kweru nda be oknani,

⁹ ma ele buo ele Ju nyee Chiokike igwugwu kwnornu obirizi a, lele kpa be gbaru a n'okwukwo nsọ,

“Ka bu nhne me kwno znarni i n'esilawuru ele buo ele Ju,

m jogwnunu rewhna i eri.”

¹⁰ O kaa, berere,

“Anu snornu rumu Chiokike nwudna, anu ele buo ele Ju.”

¹¹ O kaa, berere,

“Anu ja Nyenwe ai, kpakara ele buo ele Ju,

kpakara ele badnu gwnunu a eri oznarni.”

¹² Berere kwno, Azaya karu,

“Otu Badnu jeehi n'ebnurnu Jesi va,

o jeelizo chi kpakara mbam,

ele buo ele Ju jeelekwasi a anya.”

¹³ Kitna, Chiokike ke olile anya gweru ovu oso nu udno mejite okwnata mkpoma anu nu rime a, ma olile anya anu nooso oso hite nu rikne Enine Nso.

Polu nye izi ele buo ele Ju

¹⁴ Rumu nda m, m magwu m nu nhne oma zi nu mkpoma anu. Anu magwu kpakara nhne ka nkari nkari, ke jeeme anu nwernu rikne neeznitaru ehni anu nhne.

¹⁵ M ji m anya siri rikne gbanu anu okwukwo, ma anu chenwanya agwna nhne, kwnornu nu oru Chiokike nyernu m.

¹⁶ Chiokike mernu m nye izi Karaishi Jizosi, nye nonunu ele buo ele Ju ernu, nye naakwa arihna, nokpo okwo izi oma Chiokike, ma ele buo ele Ju buru nhne arihna Chiokike jeegweru, ke Enine Nso bitaru nsọ.

¹⁷ Kam kpayaru, m ji m ernu m naanya risi nu rime Karaishi Jizosi nhne gbasiri Chiokike.

¹⁸ M jokwu nhne berere karu nhne Karaishi mernu hite n'aka m, o duru ele buo ele Ju be buru ele noobnonu Chiokike nsni hite n'ikwu-onu m nu ernu m.

¹⁹ Hite nu rikne nhne ọgba akebne nu ernu ndu-ehni ke Enine Chiokike hite nu Jeruselem du Ilirikom, m nokpo okwo izi oma gbasiri Karaishi n'apna zuru ozu.

20 O bu nhne zi nu mkpoma m o zni izi oma hne be nuna nhne gbasiri Karaishi, ma m gharu m o wu oro n'olu ntụ-eli oro nye berere.

21 Lele kpa be gbaru a n'okwukwo nsọ,
 "Ele be kanna be nhne gbasiri a jowhnurnu,
 ele nuna nhne gbasiri a joghohia."

22 Kam kpayaru, be kwéle me vakwnusi anu.

*Polu marnu mmuma
 o zne Rom*

23 Kovu kitna, o za nhne me jorunu nu kpakara eli ka, o noogwnu m o whnu anu anya agida awha ka.

24 M jeeme kpa kitna, m jowhnu anu kpa me neezne Sipi. Anu jeeyinu m aka nizne m, ma me nu anu dazikwole ige mati.

25 Kovu kitna, m neezne Jeruselem kwnornu ele ke Chiokike zi pii.

26 Kwnornu nu o masiri ogbako Chiokike ke zi nu Masidonia nu Akaya o gweya nhne be jeekesi ele mboni zi n'esilawuru rumu Chiokike ke zi nu Jeruselem.

27 O masiri be o yinu be aka, kovu ezi oka zi a bu ka, o bu eru zinu be o yinu ele mboni wam aka, kwnornu nu ele Ju nu ele buo ele Ju neekerita ngozi ke enine, ele buo ele Ju kwesiri o kesi ele Ju ngozi ke ekwnu be.

28 Nga me rnkparu eru ka, nyega be nhne be tuiaru, m jowhnu anu nga me neezne Sipi.

29 M magwu m nu nga me jaava, m jeeji agida ngozi Karaishi va.

30 M naariasno anu, rumu nda m, hite nu Nyenwe ai Jizosi Karaishi nu owhnun'anya ke Enine Nso, anu snornu m kpesi okpukpe rikne nu ruwhnu Chiokike kwnornu nhne me nowhnu.

31 Anu kpe okpukpe ma be dohia m n'aka ele kwé ekwe zi nu Judiya, ma ele Chiokike zi nu Jeruselem nabnaru eru m n'esilawuru be,

32 ma hite n'echiche Chiokike, m jeeji snarnima vakwnusi anu, ma me nu anu dazirikota nu mkpoma oma.

33 Chiokike ke udno dazinu kpakara anu. Amim.

16

Obekwu ikwu Polu

1 M neegesi anu nwene ai rinya Febi, ke noornunu ogbako Chiokike ke zi nu Kenkiria eru.

2 Anu bikno nabnanya a nu rewhna Nyenwe ai lele kpa rumu Chiokike kwesiri, anu yisinu a aka nu nhne obula zi mkpa, kwnornu nu o bu nye ovu oma neeyinu agida ele berere aka ma me masi.

3 Anu bekwu Prisila nu Akwila, ele eru ibne m, ele me nu be sno noornunu Karaishi Jizosi eru.

4 Be gweru budnu be bita nu nhne oze budnu nu risi m, m notnu be mmamma, o buo me nu nsunu m kpoi, kovu kpakara ogbako Chiokike zi n'eli ele buo ele Ju notu masinu be mmamma.

5 Anụ bekwu ọgbako Chiokike zị n'oro be. Anụ bekwu enyi m me whnurnu n'anya Epenetusi, nye mbom ke hi n'Esia kweru nụ Karaisi.

6 Anụ bekwu Meri nye nrunu anụ agida ọnu.

7 Anụ bekwu Andoronikusi nụ Junias, ele Ju ibne m me nụ be zị n'ikelu, be bu ele badnụ marnụ nkari nkari n'esilawuru ele izi, be beru m ọsno mahia Karaisi.

8 Anụ bekwu Ampilatusi, nye me whnurnu n'anya nụ rime Nyenwe aị.

9 Anụ bekwu Uribanusi nye ọnu ibne aị n'ọnu Karaisi, nụ Sitakisi enyi ọma m.

10 Anụ bekwu Apelesi nye be kparu iru, o whe nụ Karaisi.

Anụ bekwu ezi-nu-oro Arisitobulosi.

11 Anụ bekwu Erodiōni nye Ju ibne m. Anụ bekwu ele ezi-nu-oro Nakisosi, ele zị nụ rime Nyenwe aị.

12 Anụ bekwu Terifena nụ Terifosa ele ọnu nụ rime Nyenwe aị, nụ nye me whnurnu n'anya bu Pesis nye ọnu nụ rime Nyenwe aị.

13 Anụ bekwu Rufosi, nye ọnu Nyenwe aị ọhiaru. Anụ bekwu nne a, nye bu masi nne m.

14 Anụ bekwu Asikiritosi, Filegōni, Hemisi, Patirobasi, Hemasi nụ kpakara rumu nda anụ nụ be zị.

15 Anụ bekwu Filologosi nụ Julia, nụ Nerusi nụ nwene a rinya, nụ Olimpasi nụ kpakara rumu Chiokike be nụ be zị.

16 Anụ gweru obekwu ikwu nsọ ke rumu nda bekwurita ọhni anụ. Kpakara ọgbako Chiokike neebekwu anụ.

Ezni ipne-aznu Polu

17 Rumu nda m, anụ bikno, anya du anụ eli gbasiri ele neegweya okewa nụ naakpahie okwnata oву ele badnụ anya, ele neezni nhne ke neemegidne iznizni anụ nahiaru. Anụ neeze be.

18 Kwnornu nụ ele nụ kpam za nornunu Karaisi ọnu, kovu ruwho be. Hite n'onu biri biri be nụ oka so n'onu, be nooduwhu ele zị snam nụ mkpoma.

19 Kpakara ọhna nurnu obno nsni anụ, ke mernu mkpoma so m n'onu k'agida kwnornu anụ. Kovu m pioru m anụ buru ele nwernu akoniche hne nhne ọma zị, ele ikpe mana hne nhne ojo zị.

20 N'ige matị Chiokike ke udno jozogbu Ekwensu nụ mkpururu ọchi anụ. Oru ke Nyenwe aị Jizosi dazinu anụ.

21 Timoti nye ọnu ibne m neebekwu anụ, ya nụ Lusosi, nụ Jasoni nụ Sosipata ele Ju ibne m.

22 Mawa, Tetiōsi, nye gbaru okwukwo ka neebekwu anụ nụ rime Nyenwe aị.

23 Gayosi nye me zị n'oro a, nye ọgbako Chiokike zị n'oro a, neebekwu anụ. Ọchi-ịwai ọhna bu Erasitōsi nụ nwene aị rukna Kwatusi neebekwu anụ. [

24 Oru ke Nyenwe aị Jizosi Karaisi dazinu kpakara anụ. Amim.]

²⁵ Ọznarni zịnu Chiokike nye nwernu rikne mee anụ gwuzoru lele kpa izi ọma me neezni kwuru, nụ ọkpo okwo Jizọsi Karaịsi, lele kpa okpume nhne gwnarnụ agwna ke zị omimi ogologo ige wheru ewhe.

²⁶ Kọvu be kpumernu a hite nụ nhne ele ọwhnurninya gbarụ n'ọkwukwo hite n'iwu Chiokike zị ọkwnukokwnu. O mernu kpakara mbam mahịa, ma be kweru bnonu a nsnị.

²⁷ Ọznarni zịnu Chiokike nye nụ nsnụnu a bụ nye akọ hite nụ Jizọsi Karaịsi ọkwnukokwnu. Amịm.

**Ọkwukwo izi
ke Mbọm
Pọlu gbaznenu
Ele Kọrinti
Nhne gbasiri
ọkwukwo izi ka**

Ọkwukwo izi Pọlu gbaznenu ele Kọrinti ke mbọm neelebna anya nọ bụdnu nọ ọkwukwo mkpọma ke nye Karaịsi. O nookwu ọka gbasiri mkpa ke zị nọ ọgbako Chiokike ke zị nọ Kọrinti ke Pọlu miteru. Nọ ige wam, Kọrinti bụ ẹli-ọhna ke zị mkpa n'ẹli Girisi, ke bụ risi ọchichi ẹli Rom n'ọdoru-ẹli wam. Ele ẹli ka bụ ele be marnu rẹwhna be n'ahia, ele mkpako, nọ ele agwa ojo, ele nọkponu chi zị ichne ichne risi ẹli.

Pọlu nookwu gbasiri okewa nọ agwa ojo ke zị nọ rime ọgbako Chiokike pị. O kwuru nhne gbasiri bụdnu ọgbako Chiokike nọ okpukpe, olizo n'ẹnwu, ọlulu nzi nọ nnwerne. O kwuru nọ Izi Oma nwernu ọsisa kpakara ajiji ele ka.

Nọ risi 13, Pọlu gesiri nọ ọwhnun'anya bụ ngozi ke kakwo mma Chiokike nyernu ele badnu.

Nhne zị n'ọkwukwo izi ka

Ọpanizo (1:1-9)

Okewa nọ rime ọgbako (1:10--4:21)

Agwa oma nọ bụdnu ezi-nu-oro (5:1--7:40)

Ele Karaịsi nọ ele naakwa rẹnwu (8:1--11:1)

Budnu ọgbako nọ okpukpe Chiokike (11:2--14:40)

Olizo n'ẹnwu Karaịsi nọ ke ele kweru ekwe (15:1-58)
Nkesi ele Karaịsi nye ele zị nọ Judiya (16:1-4)
Mmuma Pọlu nọ okwukwo (16:5-24)

¹ Mawa, Pọlu, nye Chiokike sukwuru hite n'echiche ma ọ bụru nye izi Karaịsi Jizọsi nọ nnwọ nda aị Sọsitenisi,

² naagbaznenu anu, ọgbako Chiokike ke zị nọ Kọrinti ọkwukwo. Anu bụ ele Chiokike sukwuru ma anu be bụru ele ke a zị nsọ nọ Karaịsi Jizọsi, anu nọ kpakara ele zị nọ hne ọbula be nọkpokwu rẹwhna Nyenwe aị Jizọsi Karaịsi, Nyenwe be nọ Nyenwe aị.

³ Oru nọ udno ke Chiokike Nda aị nọ Nyenwe aị Jizọsi Karaịsi dazinu anu.

Ọtu mmamma

⁴ M nọotunu Chiokike m mmamma ige ọbula nọ risi anu, o nyernu anu oru hite nọ Karaịsi Jizọsi.

⁵ O mernu anu ba aba nọ rime Karaịsi nọ kpakara nhne, ma nọ ikwu-ọnu nọ nhne omuma anu.

⁶ Izi gbasiri Karaịsi gwuzosiri rikne nọ rime anu.

⁷ Kam kpayarụ, ọ zá nkesi ke enine kọgwu anu kpa anu neese ige be jookpume Nyenwe aị Jizọsi Karaịsi.

⁸ O jeeme anu gwuzoru kwem dụ ọsoto, ma anu bụru ele nwée ọru n'ọbochi Nyenwe aị Jizọsi Karaịsi.

⁹ Chiokike, nye sukwuru anu ma anu nọ Nnwọ a Jizọsi Karaịsi Nyenwe aị nwekọta

nhne, bụ nye kwesiri ọkwnata ovu.

*Okewa nū rime
ogbako Chiokike*

10 Rụmu nda m, m ji m rẹwhna Nyenwe aị Jizọsi Karaịsi naariasno anụ, anụ bikno, anụ kwekọrita n'otu nhne anụ nookwu, okewa zọma n'esilawuru anụ. Anụ ziri n'otu n'echiche ma nū nhne anụ neeme.

11 Rụmu nda m, agwna ele hi n'ezinụ-oro Kilo kannu m kpa o dnornu m anya, nū okno ọka zi n'esilawuru anụ.

12 Ka bụ nhne me naakaa, otu badnū naakaa, “M bụ m ke Pọlu,” nye berere kaa, “M bụ m ke Apọlosi,” nye berere kwno kaa, “M bụ m ke Pita,” nye berere masi kaa, “M bụ m ke Karaịsi.”

13 Be kewaru Karaịsi sa? Be kpogidnenu Pọlu n'olu ogba kwnornu anụ? Be wuru anụ mini nū rẹwhna Pọlu sa?

14 M nọtunu Chiokike mmamma nū ọ zá nye me wuru mini kwekọlam Kirisiposi nū Gayosi.

15 Ọ zá nye jaakaa si nū me wuru a mini nū rẹwhna m.

16 (Owe, m wuru m ezinụ-oro Stefanasi mini, be gweme kpam, m máam ma m wuru m nye berere mini.)

17 Karaịsi ziyage m me wu mini, kovu o zni izi ọma. Ọ bụo hite n'ikwu-ọnu ke akoniche badnū, ọ zi ẹnwu Karaịsi n'olu ogba bụru nhne etekne.

*Karaịsi bụ akoniche
nū iknernema Chiokike*

18 Kwnornu nū izi gbasiri ogba bụ nhne etekne hne ele

nwonwu onwu zi, kovu hne ele be noznohia zi, ọ bụ ikn-ernema Chiokike.

19 Be gbarū a n'okwukwo nsọ, kaa,

“M joolulu akoniche ke ele akọ,
tuwhu oghohia ke ele marnū nhne.”

20 Ndaa hne nye akọ zi? Ndaa hne nye okne okwukwo zi? Ndaa hne nye agirigo ke ọwa ka zi? Chiokike mernu akoniche ke ọwa bụru nhne iwhnirniwhno.

21 Kwnornu nū hite n'akoniche Chiokike o kwéle ọwa mahia nye ọ bụ hite n'akoniche ke ọwa. Ọ sọru Chiokike n'ọnu o hite n'iwhnirniwhno ke okpo okwo izi ọma znohia ele kweru ekwe.

22 Ele Ju noopio nhne elekema, ele Giriki noopio akoniche.

23 Kovu a nookpo okwo nū be kpogidnenu Karaịsi n'olu ogba, ke bunu ele Ju rugwu okpobi ọchi, hne ele bụo ele Ju zi, ọ bụ nhne iwhnirniwhno.

24 Kovu hne ele Chiokike sukwuru zi, ele Ju ma ele bụo ele Ju, Karaịsi bụ ikn-ernema Chiokike nū akoniche Chiokike.

25 Kwnornu nū iwh-nirniwhno Chiokike kakwo akoniche ke badnū, rikne ogwugwu Chiokike kakwo iknernema ke badnū.

26 Rụmu nda m, anụ chenwanya nhne anụ bụ sū Chiokike sukwuru anụ. Agida anụ bụ ele ọwa karū nū be nwée akoniche, agida anụ bụ

ele ọwa máa, agída anụ bụ ele híge ezi-nụ-ọro eze whụya.

²⁷ Kọvu Chiokike hōhiaru nhne iwhnirniwhno ke ọwa ma iwhnerne tū ele akọ. Chiokike hōhiaru nhne ele ọwa karụ nū ọ zílá rikne ma iwhnerne tū ele zì rikne.

²⁸ Chiokike hōhiaru nhne ele ọwa lednarnū anya nū nhne zá nhne ọ bụ, mee nhne ke be kwuru nhne bụru nhne etekne.

²⁹ O mernu ka ma badnū ọbula gharū o mee oknomokno nū ruwhnu Chiokike.

³⁰ Chiokike mernu anū nū Karaisi Jizọsi bụru otu, nye bürunu aì akọniche nū rime Chiokike. Ya bụ ome mma aì nū ọzi nsọ aì nū ọgbahia aì.

³¹ Lele kpa be gbarū a n'ọkwukwo nsọ, “Nye ọbula ke jeeme oknomokno, o mee oknomokno nū nhne Nyenwe aì rnūnu.”

2

Izi ọma gbasiri Karaisi nū ọgba a

¹ Rụmu nda m, nga me vakwnusiri anū, m jíle m okne ọka mọbu akọniche ke badnū va kọọ okwo nhne tugwaru otugwa ke Chiokike.

² Kwnornu nū m píole m ọ marnū nhne ọbula kpa me nū anū zì, kwekọlam nhne gbasiri Jizọsi Karaisi, nye be kọọgidnernu n'ọgba.

³ M ji m ọza rikne nū ogwnu nū ẹhni ọznu biri biri va.

⁴ Nhne me znirni nū izi m búo hite nū nkari ọka ke akọniche ke badnū, kọvu o

gesi Enine nū iknernema a n'esilawuru anū,

⁵ ma anū bụru ele kweru ekwe, ọ búo kwnornu nū akọniche ke badnū, kọvu n'iknernema Chiokike.

Akọniche Chiokike

⁶ Kọvu n'esilawuru ele sozuru osozu bụ hne a nookwu ọka akọniche, ọ búo akọniche ke ọwa ka, mọbu ke ele nẹechi ọwa ka. Ige matì, ọ zá nhne be jọbu.

⁷ A nookwu nhne gbasiri akọniche Chiokike ke tugwaru otugwa, ke Chiokike hōhiaru kwnornu igwugwu aì tütu sụ ọwa panizoru.

⁸ Ele ọchichi ke ọwa ka máa akọniche ka. Kwnornu nū ọ bụru nū be marnū a, be bó kọọgidene Nyenwe igwugwu n'olu ọgba.

⁹ Kọvu kpa be gbarū a n'ọkwukwo nsọ, “Anyá whnúlele, nsni núlele,

ọ bnána n'ovu badnū ría ría, nhne Chiokike bitannu ele whnúnu a n'anya.”

¹⁰ Kọvu Chiokike hiri n'Enine a kpumenu aì nhne o tugwaru otugwa, kwnornu nū Enine noonyosna kpakara nhne, ma nhne miri emi ke Chiokike.

¹¹ Ọ zá nye magwụ echiche ke mkpọma badnū, o kwolem enine ke zì nū rime badnū. Kpam masì, ọ zá badnū ke magwụ echiche Chiokike, okwolem Enine Chiokike magwụ kpakara nhne gbasiri Chiokike.

¹² A náhiage enine ke ọwa ka, kọvu a nahiaru Enine Chiokike ziyaru ma a mahia

kpakara nhne Chiokike hiri n'ovu ọma a kesi aị.

¹³ Ka bụ nhne a nookwu, ọ bụo hite nụ nhne ke badnụ znirni aị nụ akoniche ke badnụ, kọvu nhne Enine znirni aị. A nọkowa ezi ọka ke enine hne ele nwernu Enine Chiokike zị.

¹⁴ Badnụ ke nwée Enine Chiokike nwée rikne kweru nhne hi n'Enine Chiokike va, kwnornu nụ be bụnu a nhne iwhnirniwhno, o nwée rikne nahia be kwnornu nụ Enine Chiokike nọkowanu ele nwernu Enine.

¹⁵ Badnụ ke nwernu Enine Chiokike neekpe kpakara nhne ikpe, kọvu ọ zá nye jeekpe a ikpe.

¹⁶ Lele kpa be gbarụ a n'okwukwo nsọ, "Nyele magwụ echiche Nyenwe aị,

ma nye wam zni a ezni?"

Kọvu a nwernu echiche ke Karaịsi.

3

Ele ọnu Chiokike

¹ Rụmu nda m, m nwée m rikne kwunu anụ ọka lele ele nwernu Enine, kọvu m nookwunu anụ ọka lele badnụ etekne, lele rụmu takiri nụ rime Karaịsi.

² M jeeji mini-remā nọoznu anụ, ọ bụo wiri siri rikne, kwnornu nụ anụ jéenwe rikne ri be. Tem dū kịtna, anụ nwée rikne ri wiri siri rikne.

³ Anụ zị kọriri n'anọ-ẹhni, kwnornu nụ okwno-awụwa nụ okno ọka zị n'esilawuru anụ, ka ọ zá neegesi nụ anụ zị n'anọ-ẹhni? Anụ neeme lele badnụ etekne.

⁴ Otu badnụ naakaa, "M bụ m ke Pọlu." Nye berere kaa, "M bụ m ke Apọlosi." Anụ zá neeme lele badnụ etekne?

⁵ Nyele bụ Pọlu? Nyele bụ Apọlosi? A bụ ele ọnu, ele anụ hiri n'aka be kweru. Nye ọbula nọornu ọnu ke Nyenwe aị nyernu a.

⁶ Mawa kpasiri mkpuru, Apọlosi wụsi a mini. Kọvu Chiokike mernu mkpuru wam so oso.

⁷ Nye wam kpasiri mkpuru nụ nye wam wụsiri a mini bụ nhne etekne. Chiokike zị mkpa kwnornu nụ ọ bụ ya mernu mkpuru wam so oso.

⁸ Nye wam kpasiri mkpuru nụ nye wam wụsiri a mini bụ otu. Nye ọbula jaanarnụ ọgwo ọnu a lele kpa ọnu a hna.

⁹ Kwnornu nụ aị nụ Chiokike nọornuko ọnu n'otu, anụ bụ ẹkwu Chiokike. Anụ bụ ọro Chiokike noowu.

¹⁰ Hite nụ oru Chiokike nyernu m, m nọornu ọnu lele nye nka-owu ọro. M tūru m ntụ-ẹli ọro, nye berere noowukwasị ọro n'olu a. Kọvu anya dū nye noowu ọro n'olu a ẹli.

¹¹ Kwnornu nụ ọ zá ntụ-ẹli berere badnụ jéenwe rikne tū, kakwo ke Chiokike tūru, ke bụ Jizọsi Karaịsi.

¹² Ọ bụru nụ badnụ ọbula jeeji golu, mọbu siliva, mọbu akaworugwu zị okne ọnu ahia, mọbu isisi, mọbu rụhiara, mọbu isisi ikpa wukwasị ọro n'olu ntụ-ẹli ka,

¹³ ọnu a jọowhuya iwhne, kwnornu nụ ọbochi Karaịsi jookpume a. Be jeeji bẹkwnu kpa ọnu nye ọbula iru,

bẹkwnu jeegesi nhne nye ọbula jiri wu ọro a.

14 Ọ bọru nhne badnu jiri wu ọro n'olu ntụ-ẹli wam gwuzogidne bẹkwnu, ọ jaanahia ọgwo ẹnu.

15 Kọvu ọ bọru nọ bẹkwnu rne ẹnu a, nhne whuru a, kọvu be jọoznohia a, kọvu lele nye hi nọ bẹkwnu whuya.

16 Anu máa nọ anu bu Oro Nso Chiokike, nọ Enine Chiokike wu nọ rime anu?

17 Ọ bọru nye ọbula lulu Oro Nso Chiokike, Chiokike joolulu a. Oro Nso Chiokike zị nsọ, anu bu Oro Nso a.

18 Ọ zá nye duhie ẹni a, ọ bọru nọ nye ọbula neeche nọ o nwernu akọ nọ nhne ke ọwa ka, ọ ghọ nye iwahnirni-whno ma ọ bọru nye nwernu akoniche.

19 Kwnornu nọ akoniche ke ọwa ka bu nhne iwahnirni-whno n'anya Chiokike. Lele kpa be gbaru a n'okwukwo nsọ, "O jidnenu ele akọ n'aghigo be."

20 Be gba kwno a n'okwukwo nsọ, kaa, "Nyenwe aị magwu echiche ele akọ nọ ọ bu nhne etekne."

21 Ọ zị badnu ke ji nhne badnu etekne nwernu rikne mee nyaa risi. Kwnornu nọ kpakara nhne bu ke anu,

22 Pọlu mọbu Apọlosi, mọbu Pita, ọwa ka, budnu nọ ẹnuw, nhne zị kịtna mọbu ke zị nọ ruwhnu, kpakara be bu ke anu,

23 anu bu ke Karaịsi, Karaịsi bu ke Chiokike.

Ele izi Karaịsi

1 Ele badnu kwesiri ọ gwnu aị lele ele izi Karaịsi, ele Chiokike nyernu nhne tugwaru otugwa ke ezi ọka a n'aka.

2 Nhne be pioru n'aka nye neelegidne nhne ọbula bu be whnu a nọ ọ bu nye kwesiri okwnata ovu.

3 Nhne anu nookwu gbasiri m zá m mkpa, mọbu ikpe nye berere neekpe m, m jéekpe ẹni m ikpe.

4 Ovu m zị snam, kọvu ka zá neegesi nọ m bu m nye ikpe mána. Nyenwe aị bu nye neekpe m ikpe.

5 Kam kpayaru, anu kpé nhne ọbula ikpe hne ige yóoduge, seru tem Nyenwe aị va, o jeeme kpakara nhne tugwaru otugwa n'ochichiri whuya iwhe. Ọ jaakahia kpakara nhne zị n'ovu badnu. Ige wam nye ọbula jaanahia ọznarni a n'aka Chiokike.

6 Rumu nda m, m gweru m kpakara nhne ka tusun ẹni m nọ ẹni Apọlosi kwnornu anu, ma anu jiri aị mụhia nhne ele badnu nookwu, "Ọ zá nye mee nhne be gbáge n'okwukwo." Ọ zá nye ji otu badnu nyaa risi megidne ibne a.

7 Nyele mernu i, i ziri ichne hne ele berere zị? Kini bu nhne i nwernu ke be késige i? Ọ bọru nọ nhne i nwernu bu nkesi, ndaa kpa i jeeji a nyaa risi lele nọ ọ búo nkesi?

8 Kịtna, ruwho jihiaru anu. Anu balam aba. Anu gholam eze, ọ bu n'ezi a búo ele eze.

Ọ jaama mma ọ bụru nụ anụ bụ ele eze, ma a snornu anụ bụru masị eze.

⁹ M che m nụ Chiokike beteru aị ele izi aznụ, lele ele be joogbu ogbu, nhne olekiri nyee ọwa, ma hne ele enine izi nụ hne ele badnụ zi.

¹⁰ A bụ ele iwhnirniwhno kwnornu Karaisi, kovu anụ bụ ele nwernu akọ nụ Karaisi. A nwée rikne, kovu anụ nwernu rikne. Be lednarnu aị anya, kovu anụ nwernu igwugwu.

¹¹ Tem dụ kịtna, wiri nọogwnu aị, akpịri nọokpo aị bẹkwnu, a gba ẹto, be mejọru aị, a nwée hne a bīta risi.

¹² A nọdogbu ẹhni aị n'ernu, a ji aka aị nọornu nhne a neeri. Be nọovu aị ọnu, a nọgozi, nga be kpagburu aị, a snūta ovu.

¹³ Nga be kpararụ aị, a ji ovu ọma sa ọka. A nụ lele nhne mkpomkpo ke ọwa ka, tem dụ kịtna, ele ọwa kwúge aị nhne ọbula.

¹⁴ M zá m naagba ọkwukwo ka ma iwhnerne tų anụ, kovu ma m zni m anụ ezni lele rumu ke m me whnurnu n'anya.

¹⁵ Kwnornu nụ ọ bụru nụ anụ nwernu nri pokwu ele noodu anụ nụ rime Karaisi, anụ nwernu otu nda. M bụ m nda anụ nụ rime Karaisi Jizọsi kwnornu nụ m gweyanu m anụ izi ọma.

¹⁶ M naariasno anụ snornu rẹnu ọchi m.

¹⁷ Kam kpararụ, me neeziyanu anụ Timoti. Ọ bụ nnwọ m me whnurnu n'anya ke kwesiri be kwnata

a ovu nụ rime Nyenwe aị. Ọ jeechenwanyanu anụ kpa me noowu bụdnu m nụ rime Karaisi Jizọsi, kpa me neezni nụ rime kpakara ọgbako Chiokike ke zị nụ hne ọbula.

¹⁸ Agwna anụ bụ ele oknomokno, anụ neeche nụ m jáava lekwa anụ.

¹⁹ Ọ bụru nụ Nyenwe aị kweru, m jaava kwnusi anụ wara wara, m jaamahia nhne ele oknomokno wam jeeme. Ọ bụo nhne be jookwu kpọi, ma rikne be nwernu masị.

²⁰ Kwnornu nụ ẹli-eze Chiokike bụo n'agida ikwu-ọnu kpọi, kovu iknernema.

²¹ Ndaa nhne anụ pioru? Me gweru mbịnibini va, sụ ọ bụ ovu ọwhnun'anya nụ enine zị wọhnerne?

5

Anụ gweme nnwọ nda ke zila richna

¹ M nọonu nụ ome ọyi zị n'esilawuru anụ, ke zila n'esilawuru ele máa Chiokike, nụ badnụ nookwuru nnwerne nda a.

² Ndaa kpa anụ neeme oknomokno nụ kpa? Anụ kwesiri ọ kwna ẹkwna, nwe ovu ojo, anụ kwesiri ọ chihala nyerukna ke mernu nhne ka n'esilawuru anụ.

³ Ọ bụ n'ezi m zị m ikere hne anụ zị n'ano-ẹhni, kovu me nụ anụ zị n'enine, m marnu m nye mernu nhne ojo ka ikpe lele nụ me nụ anụ zị.

⁴ Kpa anụ gbakọru nụ rẹwhna Nyenwe aị Jizọsi, m joosno anụ gbakọ n'enine,

rikne Nyenwe aị Jizọsi jaadazịnu aị masị.

⁵ Anụ gweru nye wam yisi n'aka Ekwensu ma o lulu anọ-ẹhni a, ma be znọhia enine a n'ọbochi Nyenwe aị.

⁶ Anụ méma oknomokno, kwnornu nụ nhne whụ brẹdi matị neeme kpakara brẹdi whụ ọwhu.

⁷ Anụ gweme mmehie ke nụ lele nhne whụ brẹdi ọknani ma anụ ziri richna. Nga wam, anụ jọonu lele brẹdi ikne ke nwée nhne whụ brẹdi, lele kpa anụ kwesiri. Kwnornu nụ be jiri Karaịsi Nnwọ Atnurnu Ọgawhe aị kwanụ aị ariọhna.

⁸ Ngwa ma a ịbita Iriri ka, ọ bụo hite nụ nhne whụ brẹdi ke mmehie ọknani nụ risi rikne, kọvu brẹdi ke nwée nhne whụ brẹdi nụ rime a, brẹdi ke zị richna ke nwernu ezi ọka nụ rime a.

⁹ M gbannụ m anụ ọkwukwo, anụ nụ ele neeme ọyi mékọta nhne.

¹⁰ M zá m nookwu gbasiri ele neeme ọyi k'owa, ele ọwho-anya nụ ele buznu nụ ele naakwa renwu. Ọ bụru kpa, anụ jọowhoga n'owa.

¹¹ Kọvu m naagbanụ anụ kịta, naakaa, anụ nụ nye ọbula ke kwuru ẹhni a nnwọ nda, kọvu o neeme ọyi, ke nwernu ọwho-anya, nye naakwa renwu, mọbu nye naakaja badnụ, nye okne manya, mọbu nye buznu mékọta nhne. Anụ nụ nye wam dázikota ẹli ri wiri.

¹² Ọ zá m mkpa me kpe ele zị n'ederezi ikpe. Ọ bụo

anụ kwesiri o kpe ele zị n'esilawuru anụ ikpe?

¹³ Chiokike jeekpe ele zị n'ederezi ikpe. Lele kpa ọkwukwo nsọ kwuru, "Anụ chihala badnụ ojo wam n'esilawuru anụ."

6

O kwuru badnụ zne ọro ikpe

¹ Ọ bụru nụ otu badnụ nwernu nhne megidne nnwọ nda, ị ga ọla gba nnwọ nda ị ọkwukwo n'oro ikpe, ele máa Chiokike kpe be ikpe, tnunuma, o jookwuru a zne n'esilawuru rụmu Chiokike?

² Anụ máa nụ rụmu Chiokike jeekpe ọwa ikpe sa? Ọ bụru nụ anụ jeekpe ọwa ikpe, anụ nwée rikne kpe ikpe ọka matị n'esilawuru anụ?

³ Ọ bụ nụ anụ máa nụ a jeekpe ele enine izi ikpe? Ọ kọ bụru nhne ke bụdnụ ka.

⁴ Ọ bụru nụ ọka dnarnụ ke gbasiri bụdnụ ka, kịni mernu anụ neekwe ele zị n'ederezi kpe anụ ikpe? Ele ikpe ka bụ ele nwée ọso anya n'ogbako Chiokike.

⁵ Iwhnerne tị anụ. M kweru m nụ otu badnụ ke nwernu akoniche zị n'esilawuru anụ, nye jeenwe rikne kpe ikpe n'esilawuru rụmu nda.

⁶ Tnunuma, otu nnwọ nda jookwuru nnwọ nda berere zne n'oro ikpe ma ele kwé ekwe kpe be ikpe.

⁷ Anụ naagbarịta ẹhni anụ ọkwukwo n'oro ikpe, ka neegesi nụ anụ dnarnụ adna. O

jáaka mma nù i bụ nye be mejọru? Ọ jáaka mma nù nhne whunahọru i?

⁸ Tnụnuma, anụ neeme ibne nhne ojo, anụ znunahoru nnwọ nda anụ nhne.

⁹ Ọ bụ nù anụ máa nù ele ojo jéekehia ẹli-eze Chiokike? Anụ dúwhu ẹhni anụ, ele naagba ewhere, mọbu ele naakwa renwu, mọbu ele neeme ọyi, ele rukna naadnanyi ele rukna ibne be,

¹⁰ mọbu ele buznu, mọbu ele owho-anya, mọbu ele okne manya, mọbu ele naakaja badnụ, mọbu ele nọoghogbu ele badnụ jéekehia ẹli-eze Chiokike.

¹¹ Agwna anụ nù kpam nù mbom. Kọvu be snumarnu mmehie anụ, be gweru anụ nyewhete n'aka Chiokike. Be mernu anụ nù Chiokike ziri n'udno hite nù rewhna Nyenwe aị Jizọsi Karaịsi nù Enine ke Chiokike aị.

Kwasịnu Chiokike igwugwu

¹² “M nwernu m rikne mee kpakara nhne.” Kọvu ọ búo kpakara nhne naabna mb-narna. “M nwernu m rikne mee kpakara nhne.” Kọvu m jọbu ọhi nhne ọbula.

¹³ “Wiri zinu ruwho, ruwho zi masinu wiri.” Kọvu Chiokike joolulu kpakara be. Be jéjei ẹhni badnụ neeme ọyi, kọvu kpenu Nyenwe aị, Nyenwe aị jeeme ẹhni badnụ nwehia nhne zi mkpa.

¹⁴ Chiokike nye mernu Nyenwe aị hi n'ẹnwu lizo, o jeeme masi anọ-ẹhni aị hi

n'ẹnwu lizo hite n'iknernema a.

¹⁵ Ọ bụ nù anụ máa nù ẹhni anụ bụ nhne zi n'ẹhni Karaịsi? M jeegweru nhne zi n'ẹhni Karaịsi mee be bụru nhne zi n'ẹhni nyerinya ewhere? Ọza rịa rịa.

¹⁶ Ọ bụ nù anụ máa nù nye gweru ẹhni a yisi n'ẹhni nye ewhere, ya nù a gholam otu anọ-ẹhni? Kwnornu nù ọkwukwo nsọ kwuru, “Be lawuru jọburu otu anọ-ẹhni.”

¹⁷ Kọvu nye gweru ẹhni a yisi nù Nyenwe aị, ya nù Nyenwe aị gholam otu n'enine.

¹⁸ Anụ gbanahọru ome ọyi. Kpakara mmehie berere badnụ mernu zi n'olu ẹhni, kọvu nye neeme ọyi megid-nernu ẹhni a mmehie.

¹⁹ Ọ bụ nù anụ máa nù ẹhni anụ bụ Oro Nsọ ke Enine Nsọ, nye wu nù rime anụ, ke Chiokike nyernu anụ? Anụ nwée ẹhni anụ, Chiokike nwe anụ.

²⁰ Ọ jiri ọnu ahia gbahia anụ. Anụ gweru ẹhni anụ kwasịnu Chiokike igwugwu.

7

Ajiji gbasiri ọlulu nzi nù nnwerne

¹ Nhne gbasiri nhne anụ gbarụ n'ọkwukwo, “Ọ bụru ọma nù nyerukna nù nyerinya dnanyi lele nzi nù nnwerne.”

² Kọvu kwnornu nù agida ele neeme ọyi zi n'esilawuru anụ, ọ bụru ọma nyerukna ọbula luru nnwerne ke aka a, nù nyerinya gbọru nzi ke aka a.

3 Nyerukna ọbula mee nhne kwesiri a lele nzi hne nnwerne a zi, nyerinya ọbula mee nhne kwesiri a lele nnwerne hne nzi a zi.

4 Nnwerne nwée rikne hne ẹhni a zi, kọvu nzi nwernu, kpm masi nzi nwée rikne hne ẹhni a zi, kọvu nnwerne a nwernu.

5 Anu gónahoru ẹhni anu ẹhni anu, okwolem ma o bu ige mati kpa anu kwekọtaru, ma anu vu onu nu kpe okpukpe. Omekwo, anu ziri n'otu berere ma Ekwensu gharu o rna anu ọrnurna, kwnornu nu anu nwée rikne jikwaru ẹhni anu.

6 Ka bu rikne me neenye anu, o buo iwu.

7 N'ezi oka, o jaamasị m nu kpakara badnu jaadazi lele me. Kọvu nye ọbula nwernu nkesi ke Chiokike kesiri, otu nyenum kpa, nye berere nkesi berere.

8 Kiti na, m naakanu ele luge nnwerne mọbu ele gboge nzi, mọbu ele rinya nzi be nwurnu, o jaaka mma anu daziri etekne, lele kpa me daziri.

9 Kọvu o buru nu anu jeenwe rikne jikwaru ẹhni anu, anu luru nnwerne mọbu gbọru nzi. O ka mma o luru nnwerne mọbu gbọru nzi, tnuuma ẹhni anu jeerne bekwnu.

10 Ele nwernu nzi mọbu nnwerne, m neenye anu iwu Nyenwe ai, o buo ke m. Nnwerne gbakwadia nzi a nnam.

11 Kọvu, o mee kpm, o jaadaziri etekne mọbu o

lahna ke nzi a, nzi gbakwadia nnwerne a nnam.

12 M naakanu ele ke gw-narnu, o buo Nyenwe ai, o buru nu nye Karaisi ọbula nwernu nnwerne ke kwé ekwe, kọvu o kweru ya nu a wugidne, o gbala a nnam.

13 O buru nu nyerinya Karaisi ọbula nwernu nzi ke kwé ekwe, kọvu nzi a kweru ma be wugidne n'otu, o gbala a nnam.

14 Kwnornu nu Chiokike nabnanyarnu nzi ke kwé ekwe kwnornu nnwerne a ke kweru ekwe. Chiokike naabanyarnu nnwerne ke kwé ekwe kwnornu nzi a ke kweru ekwe. O buru nu o buo kpm, rumu takiri anu jọoburu ele zila richna, kọvu be zi nsọ kitna.

15 Kọvu o buru nu o masiri nye ke kwé ekwe o gba nnam, o mee kpm. O za iwu ke ji nye Karaisi, nzi mọbu nnwerne, n'onodi nu kpa. Chiokike sukwuru ai ma a wuru n'udno.

16 Ndaa kpa i jiri mahia, ji nnwerne ke kweru ekwe, nu i jọoznohia nzi i? Mọbu ji nzi ke kweru ekwe, ndaa kpa i jiri mahia nu i jọoznohia nnwerne i?

Daziri n'onodi Chiokike sukwuru i

17 Kọvu nye ọbula daziri n'onodi o zi nga Chiokike sukwuru a, bu ke Chiokike nyernu a. Ka bu nhne me neezni nu rime kpakara ọgbako Chiokike.

18 O buru nu nye be kparu nka nurnu ikwu Chiokike, o gwepuko nhne atu okpa nka a.

Ọ bụru masị nụ nye be kpáge nka nǎnnu ikwu Chiokike, be kpála a nka.

¹⁹ Ọkpa nka nụ be kpáge nka zá nhne ọ bụ, nhne zị mkpa bụ ọbita iwu Chiokike.

²⁰ Badnụ ọbula daziri n'ọnodi ọ zị nga Chiokike sukwuru a.

²¹ I zị n'ọhi nga Chiokike sukwuru i? O mékpa i ẹhni, kọvu ọ bụru nụ i nwernu oghere ọ whọga n'ọhi, mee kpam.

²² Kwnornu nụ nye bụ ọhi nga Nyenwe aị sukwuru a bụ nye nwernu ẹhni a nụ rime Nyenwe aị. Kpam masị, badnụ ke nwernu ẹhni a nga Nyenwe aị sukwuru bụ ọhi Karaịsi.

²³ Chiokike ji ọnu ahia gbahia anụ, anụ ghọko ọhi ke badnụ.

²⁴ Rụmu nda m, badnụ ọbula daziri n'anya Chiokike n'ọnodi ọ zị nga Chiokike sukwuru a.

Ele nwée nzi mọbu nnwerne

²⁵ Nhne gbasiri ele rinya máa nyerukna, mọbu ele rukna máa nyerinya, m nwée m nhne Nyenwe aị nyernu n'iwu, kọvu m neenye anụ nhne bụ echiche m, nye hite n'obirizi ke Nyenwe aị m kwesiri m ọtukwasi ovu.

²⁶ Mkpa karilam n'ọwa kịtna, m che m nụ ọ bụru ọma ọ bụru nụ badnụ daziri kpa ọ zị.

²⁷ Ọ bụru nụ i nwernu nnwerne? I ghásala a. I nwée nnwerne sa? I lúko nnwerne.

²⁸ Ọ bụru nụ i luru nnwerne ọ zá mmehie i mernu. Ọ bụru

nyerinya máa nyerukna gbọ nzi, ọ zá nhne ọjọ ọ bụ. Kọvu ele nwernu nnwerne mọbu nzi jeenwe agida mkpa n'ọwa ka, m noopio ọ dọhia anụ nụ nhne ka.

²⁹ Rụmu nda m, nhne me nookwu bụ ka, ige wam zị ndundu, hite kịtna ele nwernu nnwerne ziri lele nụ be nwée nnwerne,

³⁰ ele naakwna ẹkwna lele nụ be zá n'anya-mini, ele nọomu rụmu lele nụ ovu zá nọoso be n'ọnu, ele nọozu ahia lele nụ ọ zá nhne be zụhiaru,

³¹ ele ji nhne ọwa ka lele nụ ọ zá be mkpa. Kwnornu nụ ọwa ka n'ọnodi a jaagawhe.

³² M noopio ma nhne ọbula gharu ọ kpakna anụ ẹhni. Nyerukna ọbula ke nwée nnwerne neeché echiche gbasiri ẹru Nyenwe aị, kwnornu nụ o pioru o mee nhne jaamasị Nyenwe aị.

³³ Kọvu nyerukna ke nwernu nnwerne neeché echiche gbasiri nhne ke ọwa ka, kwnornu nụ o pioru o mee nhne jaamasị nnwerne a,

³⁴ ke nọdoghari a n'apna lawuru. Nyerinya ke nwée nzi mọbu ke máa nyerukna neeché echiche gbasiri ẹru Nyenwe aị, kwnornu nụ o pioru o gweru ẹhni a nụ enine a nyee Nyenwe aị. Kọvu nyerinya ke nwernu nzi neeché echiche gbasiri nhne ke ọwa ka, kpa o jeeme nhne jaamasị nzi a.

³⁵ M nookwu nhne ka ma ọ bnanụ anụ iru. M zá m noobnosni anụ. Kọvu m pioru m ma anụ mee nhne bụru ọma

nụ ke kwesiri ekwesi, ma anụ gweru kpakara ẹhni anụ yisi n'ẹrnu Nyenwe aị, gharu o le anya n'aznụ.

³⁶ Nhne ke gbasiri ele kwekọtaru olulu, ọ buru nụ badnụ ọbula whnurnu nụ ọ zá naakpakwa agwa nkari hne nyerinya o kweru ọ lụ zi, ọ buru n'awha neezne, ọ luru a, be mége mmehie.

³⁷ Kọvu hne badnụ kpebiri n'ovu a, ọ zá nye naamagidne a nụ ọ jóolu nnwerne, o nwernu rikne gharu ọ lụ nnwerne wam, o mernu nhne kwesiri.

³⁸ Nye ke luru nnwerne mernu nhne ọma, kọvu nye ke luge rịa rịa mekakworu nụ nhne ọma.

³⁹ Nyerinya gbọru nzi zi n'iwu kpa nzi a zi budnu, kọvu hne nzi a nwurnu, ọ zá iwu ji a ma ọ gbọru nzi berere. Kọvu ọ jọbu nye magwu Nyenwe aị.

⁴⁰ Kọvu n'echiche m, ovu jọso a n'onu ọ buru ọ daziri etekne. M che m nụ m nwernu m Enine Chiokike.

8

Wiri be jiri kwanu renwu ariohna

¹ Nhne ke gbasiri wiri be jiri kwanu renwu ariohna, ọ bu n'ezi nụ, “Kpakara aị nwernu nhne ọmuma.” Kọvu nhne ọmuma neegweya badnụ vulizo ẹhni a olu. Owhnun'anya noowulizo badnụ olu lele ọro.

² O buru nụ badnụ ọbula neechे nụ ọ magwu nhne, ọ máa kpa o kwesiri ọ mahia.

³ Kọvu Chiokike magwu ele whnurnu a n'anya.

⁴ Nhne gbasiri wiri be jiri kwanu renwu ariohna, a magwu nụ ọ zá nhne renwu ke ọwa ka bu, kwnornu nụ chi berere zá, okwolem Chiokike kpoi.

⁵ O bubedi nụ agida nhne be nookwu “chi” zi n'oligwe mọbu n'owa, ọ bu n'ezi nụ be zi agida “chi” nụ “nyenwe,”

⁶ kọvu hne a zi, otu Chiokike kpoi nye bu Nda. O keru kpakara nhne, a zinu a budnu. Otu Nyenwe aị Jizosi Karaịsi zi, nye be hiri n'aka a ke kpakara nhne, nye a zi budnu n'aka a.

⁷ Kọvu ọ buo kpakara badnụ magwu ezi oka ka. Agwna badnụ yiri risi nụ renwu du kitna, nga be riri wiri ki, be neechе nụ be ji a kwanu renwu ariohna. Echiche ovu be zá rikne, wiri be riri kparu be.

⁸ Kọvu wiri jéeme aị nụ Chiokike ziri ndundu. A ríle wiri, ọ zá nhne o neegweme n'ẹhni aị, a ri wiri ọ zá nhne o neeyisi ẹhni aị.

⁹ Kam kpararu, anya du anu eli, i kwékwadia oghere i nwernu nụ ome kpa ọ masiri i mee ele zá rikne n'okwnata ovu dnabna nụ mmehie.

¹⁰ O buru nụ otu badnụ ke mkpoma síle rikne whnurnu i hne i dazi eli neeri wiri n'oro renwu, kwnornu nụ i nwernu “nhne ọmuma,” o jéenyе a mkpoma siri rikne o ri nhne be jiri kwanu renwu ariohna?

¹¹ Nnwọ nda wam zá rikne, nye Karaịsi kwnornu nụ

a nwụma, joowhu etekne kwnornu nụ nhne ọmuma i.

¹² Kpam, anụ mehieru nnwọ nda anụ wam zá rikne, lulu ovu a, anụ mehielem Karaịsi masi.

¹³ Ọ bụru nụ wiri me jeeri jeeme nnwọ nda m mmehie, m jéeri ọkpna rịa rịa kpa me zị bụdnu, ọ zị me mee nnwọ nda m dnabna nụ rime mmehie.

9

Rikne nụ ọrnu ke nye izi

¹ Ọ bụ nụ m nwée m ẹhni sa? Me búo nye izi sa? Me whnúge Jizọsi Nyenwe aị anya? Anụ búo nhne me rnụhiaru n'ọrnu Nyenwe aị?

² Ọ bụru nụ ele berere whnúge m lele nye izi, anụ magwụ nụ m bụ m nye izi. Anụ bụ nhne atụ ke neegesi nụ m bụ m nye izi Nyenwe aị.

³ Nhne me naakanụ ele nookwulu m bụ ka,

⁴ a nwée rikne ri wiri mọbu nnwọ mini n'ọrnu aị sa?

⁵ A nwée rikne mee nhne ele izi berere neeme? A nwée rikne luru otu nnwọ rinya Karaịsi lele nnwerne, o snornu aị zne izi lele ele izi ele berere nụ rụmu nne Nyenwe aị nụ Pita?

⁶ Okwokọla me nụ Banabasị kwesiri ọ rnụ ọrnu sị a ri wiri?

⁷ Ndaa nye ọgwu ke nọlu ọgwu hite n'iwai ke hi nụ rẹkpa a whụya? Ndaa nye jọrnu ẹkwu, ma o jéeri mkpuru hi nụ rime ẹkwu a? Ndaa nye nọoznu atnurnu ma ọ zá nọonwo mini-rẹma atnurnu a?

⁸ Me nookwu lele badnụ etekne sa? Ọ búo nhne Iwu aị kwuru sa?

⁹ Kwnornu nụ be gbarụ n'ọkwukwo Iwu Mozizi, “I knésni ọnu ehni ke nọzosna ịkpa.” Chiokike o nookwu nhne gbasiri ehni kpọi?

¹⁰ O kwuru nhne ka kwnornu aị. Be gbarụ a n'ọkwukwo kwnornu aị, nụ nye nọotu ọnu-ẹli nụ nye nọzosna mkpuru nwernu ọkwnata ovu nụ be jeeri mkpuru hiri n'ẹkwu.

¹¹ A kpasiri mkpuru ke enine nụ rime anụ, ọ búo nhne kwesiri nụ a jọghoru mkpuru etekne n'ẹhni anụ?

¹² Ọ bụru nụ ele berere nwernu rikne kpa hne anụ zị, ọ bụ ayila jéenwe rikne karukwo hne anụ zị?

Kovu a mége kpam, a nwernu ndidi nụ kpakara nhne, ọ zị a bíta nhne ọkpobi ọchi n'apna izi ọma Karaịsi.

¹³ Ọ bụ nụ anụ máa nụ ele nọornu ọrnu n'Ọro Nsọ neeri nhne hi n'Ọro Nsọ whụya? Ọ bụ nụ anụ máa masi nụ ele nọornu ọrnu n'ọjo ariohna neeri agwna nhne be jiri kwa ariohna?

¹⁴ Kpam masi, Chiokike nyernu iwu nụ ele neezni izi ọma be ri wiri hiri n'izi ọma whụya.

¹⁵ Kovu m mége m kpam. M zá m naagba ọkwukwo ka ma m nwernu rikne mee kpam. Kwnornu nụ ọ jaakanụ m mma me beru ọsno nwụma ẹnwu tna, ọ zá nye mee igwugwu m nhne etekne.

¹⁶ M nwée m rikne nyaa risi

nụ m neezni izi ọma. Mkpa naakpa m bụ o zni izi ọma. Owe! Ọvu ọnu zinu m ọ bụru nụ m zni ige m izi ọma.

17 Ọ bụ me gweru mkpoma m zni izi ọma ka, m nwernu m ọgwo ọnu, kọvu ọ bụru nụ jige m mkpoma m zni izi ọma, m nọornu ọnu Chiokike yisiri m n'aka.

18 Ọ bụru kpam, kini bụ ọgwo ọnu m? Ọ bụ oghere o zni izi ọma gharu ọ whnu ọnu ahia, gharu o gweru rikne me nwernu n'izi ọma mee nhne.

19 Ọ bụ n'ezi nụ m bụo m ọhi nye ọbula, m nwernu m ẹhni, kọvu m mernu m ẹhni ọhi kpakara badnu ma m rihia m agida badnu n'iru.

20 Hne ele Ju zi, m bụ m nye Ju ma m rihia m ele Ju. Hne ele zi nụ mkpururu iwu zi, m ziri lele nụ m zi m nụ mkpururu iwu (ọ bụ n'ezi nụ m zá m nụ mkpururu iwu), ma m rihia m be n'iru.

21 Hne ele zá nụ mkpururu iwu, m ziri lele nye zá nụ mkpururu iwu (ọ bụ n'ezi nụ m léwhule m iwu Chiokike anya, m zi nụ mkpururu iwu Karaisi), ma m rihia m be n'iru.

22 N'esilawuru ele zá rikne n'okwnata ovu, m nụ m lele be, ma m rihia m be n'iru. M bụ m kpakara nhne hne ele badnu zi, m neeme kpa me nwernu rikne, ma m rihia m agwna be n'iru.

23 M neeme kpakara nhne ka kwnornu izi ọma, ma m kehia m igwe nụ ngozi a.

24 N'ezi ọka, anụ magwu nụ ele naagba ọso naagba ọso n'otu, kọvu otu badnu kpọi

naagbahia nhne ọso. Anụ gba ọso, ma anụ gbahia nhne n'eso.

25 Nye ọbula ke naagba ọso jooknekwaru ẹhni a nkari, ma be kpusi a okpu ọ gbahiaru n'eso ke jáazi okwnukokwnu, kọvu a naagba ọso ma a nwehia okpu-eze ke jaazi okwnukokwnu.

26 Ka kpahiaru m zá m naagba ọso lele nye ọ zá nhne o vu nụ mkpoma, m zá m nọolo igbakwu lele nye nọolo ruwhere igbakwu.

27 M naata ẹhni m awhnwhnu ma m nwernu m rikne nẹchi a, ọ zi me znikpa ele berere izi ọma, m bụru nye kwésile okpu-eze wam.

10

*Ọ dọ aka nụ nsni gbasiri
okwa renwu*

1 Rumu nda m, m pioru m anụ mahia, nhne mernu ele nda aị oknani ele snornu Mozizi kpa be zi nụ mkpururu erumeru, kpakara be gawheru Osimini Ihie.

2 Be wuru be mini nụ rime erumeru nụ osimini ke neeges nụ be sno Mozizi.

3 Kpakara be riri otu wiri enine wam.

4 Kpakara be nwornu otu mini enine wam, kwnornu nụ be nwornu mini enine ke hiri nụ rugwu wam snornu be, rugwu wam bụ Karaisi.

5 Kọvu nhne gbasiri agwna be soge Chiokike ovu n'onu, iznu be wusaru n'eli-ikpa wam.

6 Kpakara nhne ka bunnu aị nhne atụ ke nọodo aị aka nụ

nsni. Nhne ojo gwnúko aì lele kpa ọ gwnurru be.

⁷ Anụ kwákọ rẹnwu lele kpa agwna be kwaru, lele kpa ọkwukwo nsọ kwuru, “Ele wam daziri ẹli ri nhne, nwọ nhne ọnwunwo, be lizọ tne eri.”

⁸ A mékọ ọyi, lele kpa agwna be mernu, nri pokwu lawuru nọ pokwu ẹto nwọ otu ọbochi.

⁹ A kpákọ Nyenwe aì iru, lele kpa agwna be mernu, agwọ tagbu be.

¹⁰ Anụ támu, lele kpa agwna be tamurru, enine izi ke ẹnwu gbu be.

¹¹ Kpakara nhne ka mernu be nọ lele nhne atụ, be gba be n'ọkwukwo nsọ, ma be buru nhne jeezi aì ezni, aì ele zì budnu n'okwukwo ọwa ka.

¹² Nye ọbula ke neeche nọ o gwuzogwu kwem, ledu anya, ọ zì ọ dna.

¹³ Ọ zá ọrnurna ke vakwnusiri anụ ke vákwnusilele badnu. Kọvu Chiokike kwe-siri be kwnata a ovu, o jéekwe ọrnurna ke anụ nwée rikne gwuzoli vakwnusi anụ. Kọvu nga be naarna anụ ọrnurna, Chiokike jeenye anụ rikne o gwuzo, gbamanu anụ apna anụ jeeji whuya nọ rime a.

¹⁴ Nhne atụ ele ka neegesi, ele me whurru n'anya, ma anụ ghanahọru ọkwa rẹnwu.

¹⁵ M nookwunu anụ ọka lele ele nwernu akoniche, anụ tulekọm nhne me nookwu.

¹⁶ Okiko Iri Nsọ wam ke a nọtunu Chiokike mmamma, ọ búo ọvnarna Karaisi nhne a neekeri nga a nọonwo nhne hi

n'okiko wam? Brẹdi wam a naanyawa, a zá neekeri anọ-ẹhni Karaisi nga a neeri brẹdi wam?

¹⁷ Kwnornu nọ otu brẹdi zinu kpakara aì. Ọ bú n'ezì nọ a zì agida, kọvu a bú otu anọ-ẹhni, a neeri otu brẹdi wam.

¹⁸ Anụ tule ele Izireli, ele neeri nhne be jiri kwa ariohna, neekerikọta nhne n'otu n'ọjo ariohna Chiokike.

¹⁹ Ndaa nhne me nookwu? Ọ bú nọ rẹnwu mọbu wiri be kwanu rẹnwu ariohna bú nhne ọbula?

²⁰ Ọza! Nhne me naakaa bú nọ nhne ele naakwanu rẹnwu kwaru ariohna bú nhne be kwannu ele rẹnwu ojo. Ọ búo Chiokike. M chíoge m anụ nọ ele rẹnwu ojo neekeri nhne n'otu.

²¹ Anụ jéenwe rikne nwọ okiko Nyenwe aì, nwọ kwno okiko ele rẹnwu ojo. Anụ jéenwe rikne ri wiri n'ikpechi Nyenwe aì, ri kwno n'ikpechi rẹnwu ojo.

²² Anụ noopio o mee Nyenwe aì kwno awuwa? A nwernu iknernema karu a sa?

²³ “A nwernu rikne mee kpakara nhne,” kọvu ọ búo kpakara nhne buru ọma. “A nwernu rikne mee kpakara nhne,” kọvu ọ búo kpakara nhne nọowulizo badnu olu lele ọro.

²⁴ Ọ zá nye lebna anya nọ nhne ke a, kọvu nọ nhne ọma ke jeenyinu ele berere aka.

²⁵ Anụ ri nhne ọbula be neere n'ahia, anụ síkwa ajiji kwnornu mkpuru ovu anụ.

26 Ọkwukwo nsọ kwuru, “Chiokike nwe ọwa nù kpakara nhne zị nù rime a.”

27 Ọ bụru nù nye kwé ekwe sukwuru anụ ma anụ ri wiri, ọ masị anụ o zne, anụ ri nhne ọbula ọ bítaru nù ruwhnu anụ, anụ sịkwa ajiji ọbula kwnornu mkpuru ovu anụ.

28 Kọvu ọ bụru nù otu badnụ kanụ anụ, “Be jiri wiri ka kwanụ rẹnwu ariohna,” anụ rikọ wiri wam kwnornu nù nye wam kannụ anụ kpam, ma kwnornu masị mkpuru ovu.

29 Ọ bụo kwnornu mkpuru ovu anụ, kọvu mkpuru ovu nye berere wam. Ndaa kpa rikne me nwernu o mee nhne jiri gbasị mkpuru ovu nye berere?

30 Ọ bụru nù me ri wiri tũnu Chiokike mmamma, kịni mernu nye berere jaama m ikpe nù wiri me tũru mmamma?

31 Kọvu, nhne ọbula anụ neeme, anụ neeri wiri mọbu anụ nọnwọ mini, anụ mee kpakara nhne kwnornu igwugwu Chiokike.

32 Anụ mékọ nye ọbula dna, mọbu nye Ju mọbu nye bụo nye Ju, mọbu ọgbako Chiokike,

33 lele kpa me naagbalị o mee kpakara nhne jaamasị kpakara badnụ. M zá m neeche nhne gbasiri nhne ọma ke m, kọvu nhne ọma agịda badnụ ma be znọhia be.

11

1 Anụ snornu m lele kpa me noosno Karaịsi.

Okpukpe nù ọgbako Chiokike

2 M naaja anụ mma kwnornu nù anụ neechenwanya m, naabita kpakara nhne me znirni anụ.

3 Kịtna, m pioru m anụ ghọhia nù Karaịsi bụ risi nyerukna ọbula, nzi bụ risi nnwerne, Chiokike bụ risi Karaịsi.

4 Nyerukna ọbula ke neekpe okpukpe mọbu nọkpo okwo izi ọma Chiokike kpusnime risi a, bụ nhne iwhnerne nyee Karaịsi.

5 Nyerinya ọbula ke neekpe okpukpe mọbu nọkpo okwo izi ọma Chiokike, gbesa risi a anya, neeme risi a nhne iwhnerne, ọ nù lele ọ kọpuru rukeri-ize risi a.

6 Ọ bụru nù nyerinya kpúsni risi a, ọ kọma rukeri-ize a. Kọvu ọ bụ nhne iwhnerne nù nyerinya jọoko rukeri-ize a, o kpusi risi a.

7 Nyerukna kpúsni risi a kwnornu nù ọ bụ oyi yi ke neegesi igwugwu Chiokike. Kọvu nyerinya neegesi igwugwu ke nyerukna.

8 Kwnornu nù Chiokike híge nù nyerinya kpụ nyerukna, kọvu hiri nù nyerukna kpụ nyerinya.

9 Ọ kpúge nyerukna kwnornu nyerinya, kọvu ọ kpuru nyerinya kwnornu nyerukna.

10 Kam kpayarụ, kwnornu ele enine izi, nyerinya kwe-siri o kpusni risi a, ke neegesi ọ zị nù mkpururu nzi a.

11 Lele kpa bụdnụ nù rime Nyenwe aị zị, nyerinya zị nyerukna mkpa, nyerukna zị masị nyerinya mkpa.

12 Kwnornu kpa be kpuru nyerinya hite nū nyerukna, kpm masi, nyerinya murnu nyerukna. Kpakara nhne hi n'aka Chiokike va.

13 Anu kpekọm ma o buru oma nū nyerinya jeekpe okpukpe gbesa risi a anya.

14 Iwu okike kwuru nū nyerukna ke nwernu ogologo rukeri-ize bunu a nhne iwhnerne.

15 Kọvu o buru nū nyerinya ke nwernu ogologo rukeri-ize, o bu igwugwu a, kwnornu nū rukeri-ize a bu nhne Chiokike nyernu, o jeeji nookpusni risi a.

16 Kọvu o buru nū nye obula kwége kpm, nhne me jaakaa bu, ai mọbu ogbako Chiokike nwée omen'eli berere karu kpm.

Wiri Anyasnu Nyenwe ai

(*Mat 26:26-29; Mak 14:22-25; Luk 22:14-20*)

17 Gbasiri nhne ke a nookwu kitna, m jáaja anu mma. Nhne anu neeme nū rime ogbako anu bu nhne ojo, o buo oma ría ría.

18 Ke mbom, be kannu m nū agida okewa zi n'esilawuru anu, m neekweru agwna a.

19 O dnornu m anya nū okewa jaaziri n'esilawuru anu ma nye zi snam whuya iwhne.

20 Nga anu vakotaru n'otu, anu vage o ri Wiri Anyasnu Nyenwe ai.

21 Kpa anu neeri, nye obula neeri, o za nye neese ibne a. Kam kpayaru wiri nọgwnu agwna badnu nga manya noogbu ele berere.

22 Anu nwée oro, hne anu jeeri wiri, nwọ manya? Anu neeledna ogbako Chiokike anya, kpasí ele nwée nhne iwhnerne? Ndaa nhne anu pioru me kwu gbasiri nhne ka? Me ja anu mma sa? Óza! M jáaja anu mma ría ría.

23 M nahjaru m nhne me znirni anu n'aka Nyenwe ai Jizosi. N'abalí wam be reru a, Nyenwe ai Jizosi gweruru brẹdi,

24 tūnu Chiokike mmamma, nyawa a, kaa, "Ka bu anọ-ehni m ke zinu anu, anu neeme ka neechenwanya m."

25 Kpm masi, nga wiri anyasnu whemernu, o gweru okiko, kaa, "Ka bu okiko ogbanjọ-ehni ikne ke onarna m. Nga obula anu nonwo a, anu neeme ka neechenwanya m."

26 Kpa anu neeri brẹdi ka, nonwo okiko ka, anu nookwusa enwu Nyenwe ai tem o va.

27 Ka neegesi nū o buru nū nye obula ri brẹdi Nyenwe ai mọbu nwọ nhne hi n'okiko, kpa o kwésige, ikpe anọ-ehni Nyenwe ai nū onarna a naama a.

28 Nye obula beru osno nyosnama ehni a su o ri brẹdi wam mọbu nwọ nhne hi n'okiko wam.

29 Kwnornu nū nye obula ke jeeri mọbu nwọ nhne hi n'okiko wam hne o máa anọ-ehni Nyenwe ai, neeri, nonwo ikpe nū risi a.

30 Kam kpayaru, agida anu zi nū nriria, agida anu za rikne, ele berere nwunam.

31 O buru a beru osno nyosnama ehni ai, Chiokike jeekepe

aị ikpe.

³² Kọvu Nyenwe aị neekpe aị ikpe, naata aị awññwhnu, ma a gharu o sno ele zị n'owa buru ele ikpe marnu.

³³ Rumu nda m, nga anu gbakoru n'otu neeri wiri Nyenwe aị, anu sete ibne anu.

³⁴ O buru nu wiri noogwnu nye obula, o ri wiri n'oro a, o zị ikpe Chiokike ma anu kpa anu gbakoru n'otu.

M jeemekwata nhne ke berere nga me varu.

12

Nkesi ke Enine Nso

¹ Rumu nda m, nhne gbasiri nkesi zị odo n'odo ke Enine Nso, m pioru m anu mahia nhne gbasiri be.

² Anu magwu nu nga anu bu ele naakwa renwu ke dnarnu mgbu, be duru anu hie apna.

³ M neeme ma anu mahia nu o za nye Enine Nso Chiokike noodu jeenwe rikne kaa, "Kosna Jizosi." O za nye jeenwe rikne kaa nu, "Jizosi bu Nyenwe aị," okwokolam ma Enine Nso hiri n'onu a kwu kpa.

⁴ Agida nkesi enine zị odo n'odo, kovu otu Enine Nso.

⁵ Agida apna be jeezne izi, kovu otu Nyenwe aị.

⁶ Agida ernu zị odo n'odo, kovu otu Chiokike wam neenye rikne be jeeji noornu ernu.

⁷ Enine Nso nyernu badnu obula nkesi ma o buru mb-narna kpakara badnu.

⁸ O nyernu otu badnu izi akoniche, nyee nye berere izi

oghohia nhne hite n'otu Enine wam.

⁹ Otu Enine wam nyee nye berere okwnata ovu, o nyee nye berere rikne o gwọ nriria.

¹⁰ Enine wam masi nyee otu badnu rikne o rnu ernu ndu-ehni, nyee nye berere rikne o kpọ okwo izi oma, nyee nye berere rikne o mahia nhne zị ichne nu hne enine zị ichne ichne, nyee nye berere rikne o kwu oka nu riro zị ichne ichne, nyee nye berere rikne o tuhna na ikwu-onu.

¹¹ Kovu o bu otu Enine wam noornu kpakara nhne, o neenye badnu obula nkesi zị odo n'odo lele kpa o jiri masi a.

¹² Ehni badnu bu otu. Kovu o nwernu agida nhne zị odo n'odo ke knekotaru a n'otu. O bu masi kpa o zị n'ano-ehni Karaisi.

¹³ Kwnornu nu be jiri otu Enine wu aị mini bna n'otu ano-ehni. A bu ele Ju, ma a bu ele buo ele Ju, ohi mobu nye buo ohi, be mernu a nwọ otu Enine wam.

¹⁴ O buo otu nhne zị n'ehni badnu, be zị agida.

¹⁵ O buru nu ochi jaakaa, "Kwnornu nu m buła m aka, m buła m nhne zị n'ehni," ki jeeme a o gharu o buru nhne zị n'ehni badnu.

¹⁶ O buru nu nsni kaa, "Kwnornu nu m buła m anya, m buła m nhne zị n'ehni," ki jeeme a o gharu o buru nhne zị n'ehni badnu.

¹⁷ O buru nu kpakara ehni bu anya anya, ndaa kpa o jonu nhne? O buru nu

kpakara ẹhni bụ nsni nsni, ndaa kpa ọ jọonu ẹknarna nhne?

18 Kọvu Chiokike yisiri kpakara nhne zị n'ẹhni badnu lele kpa o jiri masị a.

19 Ọ bụru nụ kpakara be bụ otu nhne, ndaa hne ẹhni jaazi?

20 Kịtna, agịda nhne zị n'otu ẹhni badnu.

21 Kam kpayarụ, anya jáakanụ aka, "Ị zá m mkpa." Mọbu risi kanụ ọchi, "Ị zá m mkpa."

22 N'ezi, a jéenwe rikne gwuzoli ọ bụru nụ nhne ke zị n'ẹhni ke a neeche nụ be zá rikne zịla.

23 Nhne ke zị n'ẹhni aị ke a neeche nụ be nwée igwugwu, bụ ke a neeledu anya gbasiri be, ele ke tų iwhnerne bụ ele ke a ji iwo nookpusni.

24 Ngeri ẹhni aị ke marnu mma a zá neeledu a anya. Chiokike n'iwhuru a yisiri ẹhni aị n'otu, o nyernu nhne zị n'ẹhni ke nwée igwugwu, igwugwu ke kakwo.

25 Okewa kwésile ọ zị n'ẹhni, kọvu kpakara nhne zị ọdo n'ọdo n'ẹhni magwụ nhne gbasiri ibne be.

26 Ọ bụru n'otu nhne zị n'ẹhni nọowhnu awhnụwhnu, kpakara ele ke berere sno a whnụ awhnụwhnu. Ọ bụru be znarni otu, kpakara be sno a nwe ovu ọso n'ọnu.

27 Kpakara anụ bụ ẹhni Karaịsi, anụ n'otu n'otu bụ nhne zị n'ẹhni Karaịsi.

28 Chiokike bítaru kpakara nhne kpa o kwesiri n'ogbako a. Ọ bítaru ke mbom, ele izi,

ke ẹbo, ele nọokpo okwo, ke ẹto, ele zni nhne, ele nọornu ẹrnu ndu-ẹhni sno be, nụ ele nwernu nkesi ọgwo nriria, mọbu ele neeyinu ele berere aka, ele nẹchi ẹchi, nụ ele nookwu ọka nụ riro zị ọdo n'ọdo.

29 Kpakara be búo ele izi, kpakara be búo ele nọokpo okwo, mọbu ele neezni nhne. Ọ búo kpakara be nwernu rikne rñụ ẹrnu ndu-ẹhni,

30 mọbu gwọ nriria zị ọdo n'ọdo, mọbu kwu ọka nụ riro zị ọdo n'ọdo, mọbu ọ tųhnasna ikwu-ọnu.

31 Kọvu nkesi ke kakwo mma gwnụ anụ lele wiri.

Kọvu me gesi anụ apna ke kakwo mma.

13

Qwhnun'anya

1 Ọ bụru m nwernu m rikne kwu ọka nụ riro ele badnu nụ ke enine izi, kọvu m nwée m ọwhnun'anya, ọka m jọoburu ọgbugbo etekne mọbu igele warụ-awa.

2 Ọ bụru m nwernu m nkesi ke ọkpo okwo izi ọma, nụ ọghohia kpakara nhne zị omimi, nụ kpakara nhne ọmuma, ọ bụru nụ m nwernu m kpakara ọkwnata ovu ke joovume rugwu, kọvu m nwée m ọwhnun'anya, ọ zá nhne me bụ.

3 Ọ bụru me nyee ele mboni kpakara nhne me nwernu, mọbu nyee ẹhni m be gba bẹkwnu, kọvu m nwée m ọwhnun'anya, ọ zá ọgwo ẹrnu me jeekehia.

4 Ọwhnun'anya nwernu ọsnuta ovu, nụ ovu ọma.

Qwhnun'anya kwnó awuwa, o mée oknomokno, o kpá nganga.

⁵ Qwhnun'anya mée nhne búo oma n'anya. O píó nhne ke aka ke a, o nwée ovu owe ehni. Qwhnun'anya zá nõogwnu nhne ojo be mernu a.

⁶ Qwhnun'anya zá nõonwudna nu nhne ojo, kovu ezi oka neeme ovu oso a n'õnu.

⁷ Inwe zá nõogwu qwhnun'anya. O neekweru kpakara nhne, o nwernu olile anya nu kpakara nhne, o needi kpakara nhne.

⁸ Qwhnun'anya zi okwnukokwnu. Okpo okwo jeebi, riro zi odo n'odo jookwusi. O buru oghohia, be jaagawhe.

⁹ Oghohia ai nu okpo okwo ai zú ozu.

¹⁰ Nga nhne ke zuru ozu varu, nhne ke zúge ozu jaagawhe.

¹¹ Nga me bu watakiri, m nookwu oka lele watakiri, m naari oriri lele watakiri, m ghohiaru m nhne lele watakiri, kovu nga me sozuru nu badnu, m gweme kpakara agwa watakiri n'ehni m.

¹² Kwnornu nu kitna, a nõowhnu nhne nu nyno ke nõotu ewheke, kovu nga wam a jowhnu ruwhnu nu ruwhnu. Kitna, m maam agwna nhne, nga wam m jaamakwo kpakara nhne lele ka Chiokike magwu m.

¹³ Kitna, nhne eto ka zi, okwnata ovu, olile anya, nu qwhnun'anya. Kovu qwhnun'anya kakwo kpakara be.

14

Okpo okwo nu riro ikne

¹ Anu snornu apna qwhnun'anya, nkesi ke Enine nõogwnu anu lele wiri, ke kakwo ibne a, nkesi ke okpo okwo izi oma.

² Nye nookwu oka nu riro zi ichne ichne zá nookwunu badnu, kovu Chiokike. Kwnornu nu o zá nye nõoghohia nhne o nookwu, nhne o nookwu bu nhne tugwaru otugwa hite nu rikne Enine.

³ Kovu nye nõokpo okwo izi oma nookwunu ele badnu oka, noowulizo ele badnu olu lele oro, neezni nhne, naakasi mkpoma.

⁴ Badnu ke nookwu oka nu riro zi ichne ichne noowulizo ehni a olu lele oro, kovu nye nõokpo okwo izi oma noowulizo ogbako Chiokike olu lele oro.

⁵ O jaamasì m o buru nu kpakara anu jookwu oka nu riro zi ichne ichne. Kovu o ka mma, o buru nu kpakara anu kpõ okwo izi oma Chiokike. Kwnornu nu nye nõokpo okwo izi oma Chiokike zi okne õnu ahia kakwo nye nookwu oka nu riro ichne ichne, okwolem ma o zi nye jootuhnasnanu ogbako Chiokike nhne o nookwu, ma be wulizo ogbako Chiokike olu lele oro.

⁶ O buru me vakwnusi anu nookwu oka nu riro ichne ichne, mbnarna kini nhne anu jeenwe n'aka m, okwolem ma m nookwu nhne Chiokike kpumennu m

mọbu nhne ọmuma mọbu ọkpo okwo izi ọma mọbu zni nhne?

⁷ Nhne ke nwée bụdnu lele opi mọbu ọbo, ọ zà nye jaamahia nhne ọ nọogwnu n'eri ọ bụru nụ be gbúgele a kpa ọ bụru ọma.

⁸ Ọ bụru nụ nye nọogbu ọkwodu gbúgele a nkari, ọ zà nye jeejknernu o zne ọgwnu.

⁹ Kpam masi, ọ bụru nụ i kwúkwala ọka nkari, ọ zà nye jọoghohia nhne i nookwu, ọ bụru nụ i kwu ọka nụ riro zị ichne ichne. Ruwhere joovu ọka i.

¹⁰ Ọ bụ n'ezi n'agida ikwu-ọnu zị n'owa. Ọ zà ke nwée nhne ọ naakasi.

¹¹ Ọ bụru nụ m ghóhiage m nhne badnụ nookwu, m bụnu m nye wam nye ẹli berere, nye wam masi bụnu m nye ẹli berere.

¹² Ọ bụ masi kpa ọ zinu anụ. Hne nkesi ke Enine nọogwnu anụ, anụ gbalị nwehia masi nkesi ke jeewulizọ ọgbako Chiokike olu lele ọro.

¹³ Nye nookwu ọka nụ riro zị ichne ichne, kpe okpukpe ma ọ tughasna ikwu-ọnu a.

¹⁴ Ọ bụru me kpe okpukpe kpa nụ riro zị ichne ichne, enine m neekpe, kọvu echiche m nwée igwe nụ rime a.

¹⁵ Ndaa nhne me jeeme? M jeeji enine m nụ echiche m kpe okpukpe, m jeeji masi enine m nụ echiche m gwnu eri.

¹⁶ Kpa i naaznarni Chiokike nụ rime enine, nye izne ke zị nụ rime ọgbako jéenwe rikne kwe Amim, kwnornu nụ o máa nhne i nookwu.

¹⁷ I nọtunu Chiokike mmamma nkari nkari, kọvu nhne i neeme zà noowulizọ nye wam olu lele ọro.

¹⁸ M nọtunu Chiokike mmamma kwnornu nụ m nookwu ọka nụ riro zị ichne ichne kakwo kpakara anụ.

¹⁹ Kọvu nụ rime ọgbako Chiokike, ọ bụru ọma me kwu mkpuru ọka isne ke ele badnụ jọoghohia, zni be nhne, karu o kwu nri pokwu ọka ọ zà nye jọoghohia.

²⁰ Rumu nda m, anụ ghó rumu takiri nụ n'oriri anụ, kọvu anụ bụru rumu takiri nụ hne mmehie zị, anụ bụru dimkpa nụ ọghohia anụ.

²¹ Be gbaru a n'okwukwo nsọ, kaa,

“M jeeji ikwu-ọnu ele ẹli berere,

kwunu ele ka ọka,
m jeeji masi mgbele-ọnu ele ẹli berere

kwunu ele ka ọka,
kọvu be kwéle o bnonu m nsni.”

Ka bụ nhne Nyenwe ai kwuru.

²² Riro zị ichne ichne bụ nhne elekema ele kwé ekwe, ọ búo ke ele kweru ekwe. Ọkpo okwo izi ọma Chiokike bụ ke ele kweru ekwe, ọ búo ke ele kwé ekwe.

²³ Ọ bụru nụ kpakara ọgbako Chiokike gbakọ n'otu, kpakara anụ nookwu ọka nụ riro zị ichne ichne, ọ bụru ele izne mọbu ele kwé ekwe va n'esilawuru anụ, be jáakaa nụ kpakara anụ bụ ele ọra?

²⁴ Kọvu ọ bụru kpakara anụ nọokpo okwo izi ọma Chiokike, nye kwé ekwe

mọbu nye izne va n'esilawuru anụ, be jootu a mmehie a n'anya, kpakara nhne ọ nurnu jaama a ikpe.

²⁵ Nhne tugwaru otugwa ke zị n'ovu a jowhnuya iwhe. Ọ jaadna kpọ risi ẹli nyee Chiokike, kwuhia, "N'ezị ọka nụ Chiokike zị n'esilawuru anụ."

Okpenu Chiokike n'ahiri n'ahiri

²⁶ Rumu nda m, nhne me nookwu bu ka, nga anụ gbakọru n'otu, anụ ji ọgwu eri, anụ ji iznizni, nye berere jigwu nhne be kpumennu a, nye berere ji riro zị ichne ichne, nye berere ọtuhnasna nhne be nookwu. Kpakara nhne bu ma be wulizo ọgbako Chiokike olu lele ọro.

²⁷ Ọ bụru nye ọbula kwu ọka nụ riro zị ichne ichne, be jaazị badnụ lawuru, mọbu ke kakwo ẹto. Otu kwukwo, ibne a kwu, otu badnụ tūnasna nhne be nookwu.

²⁸ Ọ bụru nụ ọ zá nye jootuhnasna nhne be nookwu, nye wam nookwu nụ riro zị ichne ichne daziri bii, nye wam kwunu ẹhni a ọka, kwu masinu Chiokike ọka.

²⁹ Badnụ lawuru mọbu ẹto kpọ okwo izi ọma Chiokike, ele berere tule nhne be neezni.

³⁰ Kọvu ọ bụru nụ otu dazigwu ẹli nụ rime ọgbako nwehjaru izi n'aka Chiokike, nye nookwu ọka daziri bii.

³¹ Kpakara anụ jeenwe rikne kpọ okwo izi ọma Chiokike otu n'otu, ma

kpakara anụ mụhia nhne, kpakara anụ nwehia nkasi ovu.

³² Enine nye ọokpo okwo noobnonu nye ọokpo okwo nsni.

³³ Kwnornu nụ Chiokike bụo nye ẹyiriya, kọvu nye udno.

Lele kpa ọ zị nụ kpakara ọgbako Chiokike,

³⁴ ele rinya daziri bii nụ rime ọgbako Chiokike. Be kwú ọka, be bụo ele risi lele kpa Iwu kwuru.

³⁵ Ọ bụru nụ be pioru ọ mahia nhne ọbula, be sika nzi be n'oro. Ọ bu nhne iwhe-erne nụ nyerinya jookwu ọka nụ rime ọgbako Chiokike.

³⁶ Kini masi? Ikwu-ọnu Chiokike ọpanizoru nhne anụ zị sa? Mọbu ọ bu anụ kpọ bu ele ọ vakwnusiri?

³⁷ Ọ bụru nụ nye ọbula neche nụ ọ bu nye ọokpo okwo izi ọma, mọbu nye nwernu nkesi enine, nye wam marnu nụ nhne me naagbanu anụ n'okwukwo bu nhne Nyenwe a nyernu n'iwu.

³⁸ Nye bnoge nsni nụ nhne ka, anụ bnónu a nsni.

³⁹ Rumu nda m, kam kpayaru, ọkpo okwo izi ọma Chiokike ọogwu anụ lele wiri, anụ bnóni ele nookwu ọka nụ riro ichne ichne.

⁴⁰ Anụ gweru ovu duru ẹli mee kpakara nhne kwesiri n'apna bụru ọma, ma n'ahiri n'ahiri.

15

Olizo n'ẹnwu Karaịsi

1 Kìtina, rùmu nda m, m neechenwanyanụ anụ izi ọma wam me znirni anụ, ke anụ nahịaru, bụ ke anụ gwuzogwu n'olu a.

2 Chiokike znọhiaru anụ hite n'izi ọma ka, ọ bụru nụ anụ bīta nhne me znirni anụ, okwolem ma anụ kweru n'etekne.

3 M nyernu m anụ nhne me nahịaru, ke zị okne mkpa, nụ Karaisi nwurnu kwnornu mmehie aị, lele kpa be gbarụ a n'okwukwo nsọ.

4 Be liri a, Chiokike mernu o hi n'ẹnwu lizọ n'ọbochi ke ẹto, lele kpa be gbarụ a n'okwukwo nsọ.

5 O mernu Pita whnụ a anya, omekwo, ele izi nri nụ ẹbo wam whnụ a anya.

6 Omekwo, o mernu nhne nụ lele ele kakwo riwhu badnụ isne whnụ a anya otu mgba, ele bụ rùmu nda aị. Agwna be zị bụdnụ dū tna, kọvu agwna be dnarnu n'anyarna ẹnwu.

7 Omekwo, Jemisi whnụ a anya, nụ kpakara ele izi.

8 N'ipne-aznụ, o mernu m m whnụ a anya, me nye be murnu lele nnwọ ká aka.

9 M bụ m nye zikakworu matị n'esilawuru ele izi, m kwésile m be sukwu m nye izi, kwnornu nụ m mekparụ m ọgbako Chiokike ẹhni.

10 Kọvu hite n'oru Chiokike, m bụ m nhne me bụ. Oru o nyernu m bụo n'etekne. Kọvu m dọligburu m ẹhni m n'ernu kakwo kpakara ele izi, ọ bụ n'ezi nụ ọ bụo me nọornu, kọvu oru Chiokike nọornu ernu nụ rime m.

11 Kam kpayarụ, ọ bụ me, mọbu be, a znirni izi ọma, kam bụ nhne anụ kweru.

*Olizọ n'ẹnwu ele
nwurnu ẹnwu*

12 Ọ bụru nụ izi ọma aị bụ nụ Karaisi hiri n'ẹnwu lizọ, ndaa kpa agwna anụ naakaa nụ ele nwurnu ọnwu zá neelizo n'ẹnwu?

13 Ọ bụru nụ ele nwurnu ọnwu zá neelizo n'ẹnwu, o neegesi nụ Karaisi híge n'ẹnwu lizọ.

14 Ọ bụru nụ Karaisi híge n'ẹnwu lizọ, izi ọma a znirni anụ bụ nhne etekne, ọkwnata ovu anụ bụ masị nhne etekne.

15 Tụkwasi n'olu a, a bụ ele akebne aghalaghala megidne Chiokike, a naagba akebne megidne Chiokike nụ o mernu Karaisi hi n'ẹnwu lizọ, nye o méne o hi n'ẹnwu lizọ, ọ bụru nụ ele nwurnu ọnwu jéelizo n'ẹnwu.

16 Kwnornu nụ ọ bụru nụ ele nwurnu ọnwu jéelizo n'ẹnwu, Karaisi híge n'ẹnwu lizọ.

17 Ọ bụru nụ Karaisi híge n'ẹnwu lizọ, ọkwnata ovu anụ bụ nhne etekne, anụ zị kọriri nụ mmehie anụ.

18 Kam neegesi nụ ele dnarnu n'anyarna ẹnwu bụ ele kweru nụ Karaisi whuru etekne.

19 Ọ bụru nụ okwokọlam nụ bụdnụ ka a zị bụ hne a nwernu ọkwnata ovu nụ Karaisi, a bụ ele be kwesiri ọ dọnu obirizi kakwo kpakara ele wu n'ọwa.

20 N'ezi ọka, Chiokike mernu Karaisi hi n'ẹnwu lizọ,

bụ mkpuru mbom ke ele nwurru onwu.

21 Kpa enwu hiri n'aka badnu va, kpam masi, olizo n'enwu hiri n'aka badnu va.

22 Kwnornu nu kpakara badnu nwurru enwu nu rime Adam, kpam masi, Chiokike jeeme kpakara badnu ziri budnu nu rime Karaishi.

23 Kovu nye obula n'ige ke a, Karaishi bu mkpuru mbom, omekwo, kpakara ele kweru nu Karaishi nga o jaava.

24 Omekwo, okwukwo kpakara nhne jaava, nga Karaishi lugburu kpakara rikne, nu ele n'echi echi, nu kpakara iknernema, o jeenyewhete Chiokike Nda eli-eze a.

25 Kwnornu o jaachi tem o bita kpakara ele irno nu mkpururu ochi a.

26 Nye irno ipne-aznu o joolulu bu enwu.

27 Kwnornu nu okwukwo nsọ kwuru, "Chiokike bitaru kpakara nhne nu mkpururu ochi a." A magwu nu Chiokike za n'esilawuru kpakara nhne ka, nye bitaru kpakara nhne nu mkpururu Karaishi.

28 Nga kpakara nhne daziri nu mkpururu Karaishi, Karaishi jaadazi nu mkpururu nye wam bitaru kpakara nhne nu mkpururu a, ma Chiokike buru nye n'echi kpakara nhne.

29 O buru nu ele nwurru onwu za neelizo n'enwu, mbnarna kini bu nhne ele be nowu mini kwnornu ele nwurru onwu jeenwe? Kini kpayaru be nowu be mini

kwnornu ele nwurru onwu?

30 Ndaa nhne mernu a neeze budnu ige obula?

31 M zi m n'onu enwu kpakara obochi. Rumu nda m, m nookwu ka kwnornu nu m ji m anu naanya risi, anu zi nu rime Karaishi Jizosi Nyenwe ai.

32 O buru lele badnu etekne me nu anohia ojo luru ogwnu nu Efesosi, ndaa nhne me jeenwehia? O buru nu ele nwurru onwu za neelizo n'enwu,

"Ngwa ma a ri, nwọ tna, kwnornu ekile a jonwu."

33 Anu kwé be duwhu anu. "Ele enyi ojo noolulu agwa oma."

34 Anya dno anu nu risi, anu mee mmehie. Agwna anu ma Chiokike. M nookwu ka ma iwhnerne tu anu.

Ano-ehni a jeenwe

35 Kovu agwna anu jaakaa, "Ndaa kpa ele nwurru onwu jeelizo? Ndaa ano-ehni be jeenwe?"

36 Ji nye iwhnirniwhno. Nga i kpasiri mkpuru n'eli, o jofu okwolem ma o beru osno nwu.

37 Nhne i kpasiri n'eli bu mkpuru etekne, mkpuru ikpa, mabu mkpuru berere, o buo isisi.

38 Chiokike jeenye mkpuru wam ehni ke masiri a. O neenye mkpuru obula ehni ke a.

39 Kpakara ano-ehni buo otu, badnu nwernu ano-ehni, anohia nwernu ano-ehni ke berere, onunu nwernu ano-ehni ke berere, aznu ano-ehni berere.

40 Anọ-ẹhni ke oligwe zị, anọ-ẹhni ke ọwa zị masị, ọma mma ke oligwe zị, ọma mma ke ọwa zị masị.

41 Mma ke ẹhnam zị ichne, ẹnwa nwernu ọma mma ke a, mma ke mbọ zị ichne, mma ke mbọ zị ọdo n'ọdo.

42 Kpam masị bụ kpa olizọ n'ẹnwu zị, anọ-ẹhni ke be kpasiri n'ẹnwu nwernu rikne ro oro, nga Chiokike gwelizọru a, o jóoro oro.

43 Be kpasiri a n'iwahnerne, Chiokike gwelizọ a n'igwugwu, be kpasiri a n'inwe ọgwugwu, Chiokike gwelizọ a n'iknerna.

44 Be kpasiri a anọ-ẹhni etekne, Chiokike gwelizọ a n'anọ-ẹhni ke enine. Anọ-ẹhni ke etekne zị, anọ-ẹhni ke enine zị masị.

45 Kwnornu be gbarụ n'ọkwukwo nsọ, "Adam badnu mbom bụ badnu ke zị budnu." Kọvu Adam ke ipne-aznu bụ Enine ke neenye budnu.

46 Anọ-ẹhni ke enine bége ọsno, kọvu anọ-ẹhni etekne, omekwo, ke enine sno a.

47 Adam ke mbom bụ rịzna ke ọwa, Adam ke ẹbo hi n'oligwe va.

48 Lele badnu be jiri rịzna kpu, bụ kpa ele ke rịzna bụ, ele ke oligwe nụ lele nye wam hi n'oligwe va.

49 Lele kpa a vuru oyiyi ke badnu ke rịzna, kpam masị bụ kpa a joovuru ke oligwe lele badnu wam hi n'oligwe va.

50 Rụmu nda m, ka bụ nhne me nookwu, kwnornu anọ-ẹhni nụ ọvnarna jéekheja ẹli-eze

Chiokike. Nhne jọonwu ọnwu jéekheja nhne jọonwu ọnwu.

51 Le, me kanu anu nhne miri emi, ọ búo kpakara a jọonwu ẹnwu, kọvu be jaagbanwo kpakara a,

52 n'ige matị, n'otu nsnabi anya, nga ọkwodu ipne-aznu dnarnu. Kwnornu nụ be jọogbu ọkwodu, ele nwurnu ọnwu jeelizo róge oro, be jaagbanwo a.

53 Kwnornu nụ anọ-ẹhni ke joro oro jooworu anọ-ẹhni ke jóoro oro, anọ-ẹhni ke jọonwu ẹnwu jooworu anọ-ẹhni ke jọonwu ẹnwu.

54 Nga anọ-ẹhni ke joro oro wokparu anọ-ẹhni ke jóoro oro, anọ-ẹhni ke jọonwu ọnwu woru anọ-ẹhni ke jọonwu ọnwu, nhne be gbarụ n'ọkwukwo nsọ jeemezu, "Be megburu ẹnwu."

55 "Enwu, ndaa hne mmeri i zị?"

Enwu, ndaa hne nhne ọgbugba i zị?"

56 Nhne ọgbugba ẹnwu bụ mmehie, iknerna mmehie bụ iwu.

57 Kọvu a nọtunu Chiokike mmamma nye neenye a jmeri hite nụ Nyenwe a Jizosi Karaisi.

58 Rụmu nda m, ele me whnurnu n'anya, anu gwuzosi rikne, anu kwéko be whome anu, anu gweru kpakara mkpoma anu ọornu ẹnu Nyenwe a ige ọbula, hne anu magwu nụ ẹnu anu nụ rime Nyenwe a jóowhu etekne.

16

Otu iwai ke rũmu Chiokike

1 Gbasiri iwai be jootunu rũmu Chiokike ke zi nu Judiya, anu mee kpa me kannu ogbako Chiokike ke zi nu Galasia.

2 N'obochi mbom ke ikwezu, nye obula bita iwai ichne lele kpa o nwernu, o bitakwata a nkari ma anu zoma o tu iwai nga me jaava.

3 Nga me varu m jaagba okwukwo izi nyee ele anu hohiaru, m zizne be gwezne nkesi anu nu Jeruselem.

4 O buru nu o buru oma, me nu be joosno zne.

Oriasno Polu

5 Nga me zne zuru Masi- donia, m jaavakwnusi anu, kwnornu m jeezne Masido- nia.

6 Me nu anu jaadazi ige mati mabu tem okirika whe, ma anu yinu m aka m zne hne obula me jeezne.

7 M piole m o whnu anu ige mati, kovu m pioru m me nu anu daziri gbu okwnu, o buru nu Chiokike kwe.

8 Kovu m jaadazi hna nu Efesosi du obochi Pentikosi.

9 Kwnornu nu be gba- mannu m okne onuhna ernu izi oma hna, kovu agida ele neemegidne m zi masi.

10 O buru nu Timoti va, anu kweko ogwnu tu a kpa o zi n'esilawuru anu, kwnornu nu o nornu ernu Nyenwe ai lele me.

11 O za nye ledna a anya, anu yinu a aka ma o lizo izne

a n'udno, vakwnusi m. M neele anya ya nu rumu nda ai.

12 Nhne gbasiri nwene ai rukna Apolosi, m riasornu m a agida ige ma ya nu rumu nda ai va lekasi anu, kovu o jiknene o va kitna. O jaava nga o nwehjaru oghere.

13 Anu sama anya anu, anu gwuzosi rikne n'okwnata ovu, ovu si anu rikne, anu gho ele dikne.

14 Anu gweru owhnun'anya rnu kpakara ernu anu.

15 Anu magwu nu ele oro Stefanasi bu ele mbom ghoru ele Karaisi nu Akaya. Be ji kpakara nhne be nwernu nornu ele Chiokike ernu. M naariasno anu,

16 anu bita ehni anu nu mkpururu ele nu kpa nu nye obula ke ji mkpoma be snornu be nornu ernu.

17 Ovu soru m n'onu nga Stefanasi nu Fotunatosi nu Akaikosi varu, be mesirni owu anu ke koru m.

18 Be vulizoru ovu m nu ovu anu masi. Ele nu kpa kwesiri be hnata be ama.

19 Ogbako Chiokike ke zi nu Esia neebekwu anu. Akwila nu Prisila nu ogbako Chiokike zi n'oro be ji rehwna Nyenwe ai neebekwu anu k'agida.

20 Kpakara rumu nda ele zi hna neebekwu anu. Anu bekwurita ibne anu lele rumu nda.

21 Mawa, Polu, ji aka m naagba obekwu ikwu ka.

22 Be vu nye obula ke whnuge Nyenwe ai n'anya onu. Nyenwe ai, vaa.

²³ Oru ke Nyenwe aĩ Jizõsi
dazĩnu anũ.

²⁴ Qwhnun'anya m nũ rime
Karaĩsi Jizõsi dazĩnu kpakara
anũ.

**Ọkwukwo izi
ke Ẹbo
Pọlu gbazennu
Ele Kọrinti
Nhne gbasiri
ọkwukwo izi ka**

Ọkwukwo izi Pọlu gbazennu ele Kọrinti ke ẹbo bu ke Pọlu gbaru nga ọgbako Chiokike ke zi nu Kọrinti nu Pọlu zi nu mkpa. Agwa ele zi nu rime ọgbako wam bnornu Pọlu nhne, kovu Pọlu noopio ma ya nu be mee udno.

Nu rime nhne mbom Pọlu gbaru n'ọkwukwo, o nookwu oka nhne gbasiri ọgbako Chiokike ke zi nu Kọrinti, nọokowa nu mkpoma nọoso a n'onu k'agida kwnornu nu be tuhnasarnu mkpoma. O naariasno ọgbako Chiokike gbalı gweru mkpoma be gweya nhne be jeekesi ele Karaısi zi nu Judiya. Nu ipne-aznu, Pọlu nọogoru onu a lele omamarna nye izi Karaısi, megidne agwa ele kwuru ehni be omamarna ele izi. Be naakaa nu Pọlu bu nye izi aghalaghala.

Nhne zi n'ọkwukwo ka

Opanizo (1:1-11)

Pọlu nu ọgbako Chiokike zi nu Kọrinti (1:12--7:16)

Nkesi be nyernu ọgbako Chiokike zi nu Judiya (8:1--9:15)

Pọlu goru onu a lele nye izi (10:1--13:10)

Obekwu ikwu ipne-aznu (13:11-14)

¹ Mawa Pọlu, nye izi Jizosi Karaısi lele kpa o masiri Chiokike, nu nnwo nda ai Timoti, gbazennu ọgbako Karaısi ke zi nu Kọrinti nu kpakara ele ke Chiokike zi nu kpakara Akaya ọkwukwo.

² Oru nu udno ke Chiokike Nda ai nu Nyenwe ai Jizosi Karaısi dazinu anu.

*Pọlu nọtunu Chiokike
mmamma*

³ Ozarni zinu Chiokike bu Nda Nyenwe ai Jizosi Karaısi, Nda ke obirizi, Chiokike ke nkasi ovu,

⁴ nye naakasi ai ovu nu rime kpakara awhnuwhnu ai, ma a nwernu rikne kasi ele berere zi n'awhnuwhnu obula ovu hite n'okasi ovu a nwehıaru n'aka Chiokike.

⁵ Lele kpa a snornu Karaısi tako agida awhnuwhnu a, o bu masi kpa Karaısi naakasi ai ovu k'agida.

⁶ O buru nu a zi nu mkpa, o bu ma be snuta ovu anu, znohia masi anu. Okasi ai ovu bu nkasi ovu anu masi, okasi ovu wam nornusi ernu rikne neegwehia ndidi nu rime awhnuwhnu wam a nownuzulu.

⁷ Olile anya ai nu hne anu zi, zi chim chim, kwnornu nu a maam nu kpa anu sno ai ta awhnuwhnu anu joosno masi ai nwe nkasi ovu.

⁸ A pioru anu mahia nhne dnakwasiri ai n'Esia, nhne zi ogwnu ke dnakwasiri ai kakwo ai rikne, a nwema olile anya budnu.

⁹ A neeche nu be joogbu ai. Kovu ka gesiri ai nu a kwesile

ọ tūkwasì ẹhni aì mkpọma, kọvu a tūkwasìrì Chiokike ovu, nye neeme nye nwurunu ọnwu hi n'ẹnwu lizọ.

10 Ọ dọhiaru aì n'aka ẹnwu tų ogwnu, nọdohia aì kọriri, a kwnataru ovu nų hne ọ zì nų ọ jaazì kọriri nọdohia aì,

11 kpa anų zì neekpenu aì okpukpe. Agìda ele badnu jọotunu Chiokike mmamma kwnornu nų ruwhnu ọma o jeenye aì, ọ jaaza okpukpe agìda ele badnu.

Polu gbanwornu mmụma a

12 Ka bu nhne a jì naanya risi, nhne mkpọma aì naagba akebne, a wuru budnu zì snam, zì masì nsọ ke hi n'aka Chiokike. Ọ búo kpa akọnichè ke badnu piọru, kọvu hite n'oru ke Chiokike, a wuru budnu aì nų rime ọwa, ke kakwo nų hne anų zì.

13 A gbála ọkwukwo nhne anų jọogwnuli mọbu jọoghohiali, kọvu nhne anų jọoghohiali. M neele anya nų anų jọoghohiazu a,

14 lele kpa anų ghọhiaru aì matì, ma a kpa nganga kwnornu anų, anų kpa masì nganga kwnornu aì n'ọbochi Nyenwe aì.

15 Ka bu olile anya me vu nų mkpọma nų mbọm kpa me marnų mmụma ọ va, ma anų nwehìà ngọzi okpukpu lawuru.

16 M marnų m mmụma ọ vakwnusi anų kpa me neezne Masidonia nų nga me jeehi Masidonia hiehna. Anų znernu eyinu m aka m zne Judiya.

17 Nga me neeme ka, m mernu m a ewheke ewheke sa? M marnų m mmụma kwnornu nhne anọ-ẹhni m piọru, ọ kaa, "Owe, owe" nų "Ọza, ọza"?

18 Kọvu kpa Chiokike bu nye ezi ọka, izi me znirni anų búo izi "Owe" nų "Ọza."

19 Kwnornu nų Jizọsi Karaìsi Nnwọ Chiokike nye Saìlasi nų Timoti nų me gbasaru n'esilawuru anų búo nye "Owe" nų "Ọza." Kọvu kpakara nhne bu "Owe" hne ọ zì.

20 Jizọsi neeji "Owe" neemezu kpakara mkwna Chiokike kweru. Hite nų rime Jizọsi a naakaa, "Amim" neenye Chiokike igwugwu.

21 Ọ bu Chiokike nye neeme aì nų anų gwuzosi rikne nų rime Karaìsi, Chiokike jiri aka a hohia aì,

22 nye bnìasiri aka nyenwe nų risi aì, nye kesiri aì Enine Nsọ nų rime mkpọma aì neemesi nhne ọ bitannu aì rikne.

23 M noosukwu Chiokike nye akebne m, ọ magwu mkpọma m, nhne mernu me vála Kọrinti bu m gharu o bigbo anų.

24 A zá neeme ẹhni aì lele nų ọ bu aì nwe anų, ele naakanų anų nhne anų jeekweru. Tnụnuma, aì nų anų nọornuko ẹnru ma ovu sọ anų n'ọnu. Anų gwuzoru kwem n'ọkwnata mkpọma anų.

2

1 Ka bu nhne me kpebirì nų mkpọma m, m jáavakwnusi

anụ berere mee nhne joogbu anụ igbugbu.

² Ọ bụru me mee nhne gbu anụ igbugbu, nyele jeeme ovu sọ m n'ọnu? Okwolem nye wam me mernu nhne gbu a igbugbu.

³ Kam kpayarụ, me gbannụ anụ ọkwukwo nụ mbom, ọ zị nga me varụ, ele wam kwe-siri o mee ovu sọ m n'ọnu mee m nhne gbu m igbugbu. Kwnornu nụ m maam nụ anụ joosno m nwụdna.

⁴ M zị m n'awhnuwhnu k'agida kpa me ji igbugbu mkpoma nụ agida anya-mini gbanụ anụ ọkwukwo, ọ bụo ma o gbu anụ igbugbu, kovu o gesi nụ m whnuru m anụ n'anya k'agida.

Ọgbarunu nye mmehie

⁵ Ọ bụru nụ nye ọbula mernu nhne igbugbu, o méne me kpọi, kovu nhne gburu kpakara anụ igbugbu matị, me kwú k'agida.

⁶ Awhnuwhnu nye wam tarụ n'aka agida ele badnụ zulem.

⁷ Bikno, anụ gbarunu a, kasi a mkpoma, ọ zị igbugbu a nyigbu a, mee mkpoma dna mba.

⁸ Anụ mee a ma ọ mahia nụ anụ whnuru a n'anya n'ezi.

⁹ Ka bụ nhne me kwno gbanụ anụ ọkwukwo, ma m mahia m ma anụ gwuzosiri rikne, noobno nsni kpakara nhne me kannu anụ.

¹⁰ Ọ bụru nụ anụ gbarunu badnụ nhne o mernu, m gbarulam masi. M gbarulam, ọ bụru nụ ọ zị nhne ọbula ke zị nụ ọ gbarunu, ka bụ nhne

me mernu anụ nụ ruwhnu Karaịsi,

¹¹ ma Ekwensu gharu o megbu ai, kwnornu nụ a magwu kpakara aghigho a.

Mkpoma ọla mini Pọlu nụ Torasi

¹² Nga me vaduru Torasi o zni izi ọma Karaịsi, Nyenwe ai gbamannu m ọnu-mgbo izi ọma.

¹³ Kovu nụ enine m kwé ozukwa inwe kwnornu nụ m whnuna m nnwo nda m Taịtosị, m ghasarụ m be zne Masidonia.

Omegbu hite nụ Karaịsi

¹⁴ Kovu Chiokike nwe kpakara mmamma, nye mernu a snornu Karaịsi tne eri omeri a. O ji ai mee ele badnụ mahia Karaịsi, nhne ke nụ lele ẹknarna ọma ke noozute penupe ọbula.

¹⁵ Kwnornu nụ a bụ nhne ẹknarna ọma Karaịsi ke neeznekwnusi Chiokike n'esilawuru ele be nọznohia nụ ele noowhu owhu.

¹⁶ Nụ hne ele noowhu owhu zị, a bụ ẹknarna ẹnwu, hne ele be nọznohia zị, a bụ ẹknarna bụdnu. Nyele jọornuli ẹrnu ka hna rikne kpa?

¹⁷ A bụo ele ji izi ọma Chiokike nọzu ahia lele agida ele berere, kovu a bụ ele ezi, nookwu ezi ọka Karaịsi nụ ruwhnu Chiokike lele ele Chiokike ziyaru.

3

Ele ẹrnu ọgba-njo-ehni ikne

¹ A naanya risi nụ rime ehni ai berere sa? A neeme lele

ele berere, noopio ọkwukwo ọ kahia nhne a bu ke a jeenye anu, mọbu ke hi n'aka anu?

² Anu n'iwuhuru anu bu ọkwukwo izi ai, be gbaru anu nu mkpoma ai ke ele badnu magwu, nọogwnu masi.

³ Ka neegesi nu anu bu ọkwukwo izi ke Karaisi ke hi n'aka ai. Be jile nki gba a n'olu rugwu, kovu be ji Enine Chiokike zi budnu gbasị anu n'anọ-ẹhni ke mkpoma.

⁴ Ka bu okne ọtukwasi ovu ai nu Chiokike hite nu Karaisi.

⁵ O buo nu a nwernu rikne nu rime ai ke a kwesiri o rnu ẹnu ka, kovu ozu ozu ai hi n'aka Chiokike va.

⁶ Chiokike mernu ai a buru ele zuru ozu n'ẹnu ọgba-njọ-ẹhni ikne, o buo ke mkpuru ọkwukwo, kovu ke enine, kwnornu nu mkpuru ọkwukwo neegweya ẹnu, kovu enine neenye budnu.

Igwugwu ke ọgba-njọ-ẹhni ikne

⁷ O buru nu ẹnu ke ẹnu be gbakwasiri n'olu rugwu vuru igwugwu va, ke mernu rumu Izireli nwée rikne legidne Mozizi anya nu ruhnu, o bu n'ezi nu igwugwu a jaagawhe,

⁸ ndaa kpa igwugwu ke ẹnu Enine jaahna?

⁹ O buru nu ẹnu ke noovuya ẹnu nwernu igwugwu, le kpa ẹnu ke neegweya ome mma jaahna n'igwugwu karukwo.

¹⁰ N'ezi, nhne ke nwernu igwugwu nwéma igwugwu kwnornu nu nhne ke kakwo n'igwugwu whuyaru iwuhne.

¹¹ O buru nu nhne ke jaazi ige mati vu igwugwu, le kpa nhne ke jaazi ọkwnukokwnu jaahna n'igwugwu karukwo.

¹² Kwnornu nu a nwernu olile anya ke nu kpa, a nwernu onu rikne nookwu oka.

¹³ A nu lele Mozizi nye jiri ikpe kpusni ruhnu a ma ele Izireli gharu o whnu okwukwo ogbu marna marna ke naagawhe agawhe.

¹⁴ Mkpoma be zi koriri n'ochichiri, tem du tna. Ikpe wam be jiri kpusni zi koriri nga be nọogwnu ọgba-njọ-ẹhni ọknani. Be kpumene ikpe wam, Karaisi kpọi nwernu rikne o kpume a.

¹⁵ Du tna, ige obula be nọogwnu Iwu Mozizi, ikpe wam nookpusni mkpoma be.

¹⁶ Kovu ige obula nye obula zneknusiri Nyenwe ai, be jeegweme ikpe wam.

¹⁷ Nyenwe ai bu Enine, hne obula Enine Nyenwe ai zi, badnu jeenwernu ẹni a.

¹⁸ Kovu kpakara ai, ji ruhnu be jile ikpe kpusni neele igwugwu ke Nyenwe ai lele nhne a nọowhnu nu nyno, a naagbanwo hite n'otu igwugwu bna n'igwugwu berere. Enine Nyenwe ai neeme nhne ka.

4

Ekwnu ke zi nu rime ite rizna

¹ Kam kpayaru, hne Chiokike nyernu ai ẹnu ka hite n'obirizi a, a jiekwe inwe gwu ai.

2 Tn̄numa, a s̄igbasiri kpakara nhne ke tugwaru otugwa ke t̄u iw̄hnerne. A z̄a n̄ogho agh̄igho m̄obu mee ikwu-̄onu Chiokike aghalaghala. A gwuzo n̄u ruwhnu Chiokike nookwu ezi ̄oka, neegesi ele badn̄u n̄u a b̄u ele ezi ̄oka.

3 ̄O b̄uru n̄u be tugwaru izi ̄oma a n̄okpo okwo a otugwa, ̄o b̄u n̄'anya ele noowhu ow̄hu.

4 Chi ke ̄owa ka mernu mkp̄oma ele ke kw̄e ekwe gba ̄ochichiri. O mernu be whn̄una iw̄hne ke izi ̄oma n̄omukwasi be, b̄u izi ̄oma igwugwu Karāisi, nye b̄u oyiya ke Chiokike n'ezi.

5 Kwnornu n̄u a z̄a n̄okponu ̄ehni āi okwo, k̄ovu a n̄okpo okwo Jiz̄osi Karāisi b̄u Nyenwe āi, āi n'iw̄huru āi b̄u ele izi an̄u kwnornu Karāisi.

6 Chiokike wam ke kar̄u, "Iw̄hne m̄u n'̄ochichiri," b̄u otu Chiokike wam ke mernu iw̄hne a m̄ukwasi n̄u mkp̄oma āi, ma a m̄uhia igwugwu Chiokike ke a n̄owhnu n̄u ruwhnu Karāisi.

7 A nwernu ̄ekwnu ka n̄u rime ite r̄izna, ke neegesi n̄u rikne ke kakwo rikne hi n̄u Chiokike, ̄o b̄uo n̄u rime āi.

8 Be naakpakna āi ̄ehni n'apna ̄obula, k̄ovu inwe z̄a n̄ogwu āi, a neenwe mkp̄oma law̄uru, k̄ovu inwe z̄a n̄ogwu āi.

9 Ele irno naakpakna āi ̄ehni, k̄ovu Chiokike gh̄asala āi etekne. Be mekasi āi ̄ehni, k̄ovu a nw̄una.

10 A vu n'̄ehni āi ̄enwu Jiz̄osi ige ̄obula, ma b̄udnu Jiz̄osi

wh̄uya iw̄hne n̄u rime āi.

11 Āi ele z̄i b̄udnu z̄i n'̄onu ̄enwu ige ̄obula kwnornu Jiz̄osi, ma b̄udnu a wh̄uya iw̄hne n'an̄o-̄ehni āi ke n̄onwu ̄onwu.

12 Kam kpayar̄u, ̄enwu n̄ornu ̄ernu n̄u rime āi, k̄ovu b̄udnu z̄i n̄u rime an̄u.

13 Be gbar̄u n'̄okwukwo ns̄o, kaa, "M kwuru m ̄oka kwnornu n̄u m kweru m." A ji otu enine ̄okwnata ovu wam kwu ̄oka kwnornu n̄u a kweru ekwe.

14 A magw̄u n̄u Chiokike wam ke mernu Jiz̄osi hi n'̄enwu lizo, jeeme a snornu Jiz̄osi hi n'̄enwu lizo mas̄i, mee āi n̄u an̄u gwuzoru n̄u ruwhnu a.

15 Kpakara nhne ka b̄u kwnornu an̄u, ma oru ke naaban̄u an̄u ̄oba d̄unu aḡida ele badn̄u, ma be t̄unu Chiokike mmamma k'aḡida, neenye a igwugwu.

16 Kam kpayar̄u, inwe z̄a n̄ogwu āi, ̄o b̄u n'ezi n̄u a naata ̄ehni n'an̄o-̄ehni āi, k̄ovu badn̄u ke enine āi z̄i ikne ikne hite n'̄obochi d̄u n'̄obochi.

17 Awhn̄uwhnu mat̄i ka a naata neegweyan̄u āi okne igwugwu ke z̄i ̄okwnukokwnu ke kakwo kpakara awhn̄uwhnu.

18 A z̄a nee anyanya nhne a n̄owhnu anyanya, k̄ovu nhne a whn̄u anyanya. Kwnornu n̄u nhne a n̄owhnu anyanya z̄i ige mat̄i, k̄ovu nhne a z̄a n̄owhnu anyanya z̄i ̄okwnukokwnu.

5

Oro āi n'oligwe

1 A magwụ nụ ọ buru nụ ọro-eka ke ọwa ka, ke bụ ẹhni aị dnarnụ, Chiokike wunnu aị ọro berere n'oligwe ke jaadazigidne, ke be jíle aka badnụ wu, ke jaazị tim tọm.

2 Kam kpayarụ, a nọosnu idne k'agịda, ọ nọogwu aị ma a wuru nụ rime ọro aị ke zị n'oligwe,

3 ma a woru a lele iwo, a jọobu ele gba ẹto.

4 Hne a zị kọriri n'anọ-ẹhni ka, a zị nọosnu idne nụ rime awghnụwhnu, ọ bụo nụ a pioru ọ whọga n'anọ-ẹhni ka, kọvu ma be wosi aị anọ-ẹhni ke oligwe, ma Chiokike gbanwo anọ-ẹhni aị ke nọonwu ọnwu nụ anọ-ẹhni ke zị ọkwnukokwnu.

5 Chiokike n'iwuhuru a kpuru aị ma a jiknenu ọ gbanwo ka, o nyernu aị Enine a ma ọ buru nhne neemesi kpakara nhne jaava rikne.

6 Kam kpayarụ, mkpọma siri aị rikne ige ọbula. A mahjaru nụ nga a zị n'oro aị n'anọ-ẹhni, a zila hne Chiokike zị.

7 Kwnornu nụ a noowu bụdnu hite n'okwnata mkpọma, ọ bụo nụ nhne anya nọowhnu.

8 Mkpọma siri aị rikne, ọ jaamasị aị a whọga n'anọ-ẹhni ka, wuru hne Nyenwe aị zị.

9 Ke kakwo, a pioru o mee nhne jaamasị Chiokike, ma a wu hne Nyenwe aị zị, mọbu a zị n'owa ka.

10 Kwnornu nụ kpakara aị joogwuzo nụ ruwhnu ngadna ikpe Karaịsi, ma nye ọbula nahọru ọgwo ẹrnu

kpakara nhne a rnurnu nga a zị bụdnu, mọbu nhne ọma mọbu nhne bụo ọma.

Badnụ nụ Chiokike ziri n'udno

11 Hne a mahjaru ọ tu ogwnu Chiokike, a naariasno ele badnụ be vakwnusi Chiokike. Chiokike mazuru aị, m neele anya nụ anụ mazuru aị masị n'echiche anụ.

12 A zá naaja ẹhni aị n'anya anụ berere, kọvu a neenye anụ oghere ma anụ gweru aị nyaa risi, ma anụ mahja nhne anụ jaasa ele ji nhne be nọowhnu nụ ruwhnu badnụ naanya risi kakwo nhne zị nụ mkpọma badnụ.

13 Anụ neeche nụ a bụ ele ẹra naagba? Ọ bụ kwnornu Chiokike. Kọvu ọ buru nụ a bụ ele anya dnornu, ọ bụ kwnornu anụ.

14 Ọwhnun'anya Karaịsi neeme a mee kpa a neeme. A magwụ nụ otu badnụ nwuhianu kpakara badnụ ẹnwu, ka gesiri nụ kpakara badnụ snornu a n'ẹnwu.

15 Ọ nwuhianu kpakara badnụ ẹnwu, ma ele zị bụdnu gharu o wunu ẹhni be bụdnu, kọvu wunu Nyenwe aị nye nwuhianu be ẹnwu, ke hiri n'ẹnwu lizọ masị.

16 A zá neele badnụ anya nụ ruwhnu lele kpa ele berere neele, ọ bụ n'ezị nụ ọ bụ kpa a leri Karaịsi nụ mbom. Kọvu a zá neeme kpam kịtna.

17 Ọ buru nụ nye ọbula zị nụ rime Karaịsi, ọ bụ nye be kpughariri ikne, nhne ọknani

whelem, be gholam nhne ikne.

¹⁸ Kpakara nhne ka hi n'aka Chiokike va, nye hiteru nū Karaṣi mee ma aṣi nū ya ziri n'udno, nyee masi aṣi ẹrnu ma a mee ya nū ele badnū ziri n'udno.

¹⁹ Chiokike hiteru nū Karaṣi neeme ma ya nū kpakara ele badnū ziri n'udno. Chiokike zá nṣogwnu mmehie be megidne be. O nyernu aṣi ẹrnu a mee ya nū ele badnū ziri n'udno.

²⁰ A bụ ele naadnasni anya Karaṣi, Chiokike zṣi nū rime aṣi naariṣasno. A ji Karaṣi naariṣasno anū, anū mee ma anū nū Chiokike ziri n'udno.

²¹ Karaṣi méne mmehie, kṣovu Chiokike mernu a o buri mmehie kwnornu aṣi, ma a hite nū rime a kehṣia igwe nū ome mma ke Chiokike.

6

¹ Lele ele be nū Chiokike sno nṣornu ẹrnu, a naariṣasno anū kwé oru Chiokike anū nahṣaru buri nhne etekne.

² Ka bụ nhne Chiokike kwuru,

“M nurnu m anū n'ige o gesi anū ruwhnu ọma,
m yinu m anū aka n'ọbochi ọznohia.”

Anū bno nsni, kṣitna bụ ige ọ nahṣaru ruwhnu ọma Chiokike, kṣitna bụ ọbochi ọznohia.

³ A píole badnū ọbula piohṣia nhne ojo n'ẹrnu aṣi, kpayaru a kwéle ọ biṣa nhne jṣokpobi badnū ọchi n'ogodo apna.

⁴ Kṣovu nū kpakara nhne a neeme, a neegesi ẹhni aṣi

lele ele ẹrnu Chiokike hite n'ṣnuta mkpṣoma nū rime awhnūwhnu, nū nhne siri rikne, nū nhne igbugbu,

⁵ ma ọli nhne, ma nū ọro ikelu, nū mkpakpṣo, nū ẹrnu rikne, ma nū ọka anyarna abali, ma nū ọgwnu wiri,

⁶ ma nū ọzi riṣhna, ma nū nhne ọmuma, nū ndidi, ma nū ovu ọma, hite n'Enine Nsṣo, n'ezi ọka ọwhnun'anya,

⁷ hite n'okwu ezi ọka nū rikne Chiokike, ya nū mgwna ọgwnu ke ome mma nū akarikwnunga ma nū akarita.

⁸ A nwernu ọson'anya agwna ige, agwna ige be ledna aṣi anya, agwna ige ele badnū kpari aṣi, agwna ige be znarni aṣi. Be neeme aṣi ele aghalaghala, kṣovu a bụ ele kwu ezi ọka.

⁹ A bụ ele be máa, kṣovu kpakara ele badnū magwṣu aṣi. A nū lele ele nṣowu ọnwu, kṣovu a zṣi kṣoriri bṣudnu, awhnūwhnu a naata nwé rikne gbu aṣi.

¹⁰ A bụ ele mkpṣoma só n'ọnu, kṣovu a nwernu snarniṣma, ele mboni, kṣovu neeme ele berere ele eze. O zá nhne a nwernu, kṣovu kpakara nhne bụ ke aṣi.

¹¹ Anū ele Kṣorinti, a kpumernu mkpṣoma aṣi kwunu anū ezi ọka.

¹² Anū kpusnirni mkpṣoma anū megidne aṣi, ọ búo aṣi megidne anū.

¹³ Anū menu aṣi kpa a mennu anū, m nookwu lele nū anū bṣu rṣumu m, anū kpume mkpṣoma anū.

Ọdo aka nū nsni

gbasiri ele kwé ekwe

14 Anụ nụ ele kwé ekwe knékọta ẹhni anụ n'otu. Kini bu nhne ome mma nụ arụrụ-ẹli nwekọru? Ndaa ọzi n'otu ke iwhne n'ọchichiri nwekọru?

15 Mọbu ndaa nhne Karaisi nụ Ekwensu neekeko? Kini bu nhne nye Karaisi nụ nye kwé ekwe nwekọru n'otu?

16 Ndaa okwerikọta ke Oro Nso Chiokike nụ renwu nwernu? Kwnornu nụ a bu Oro Nso Chiokike ke zi budnu, lele kpa Chiokike kwuru,

“M jooosno be wuru, zne izne n'esilawuru be.

M jọobu Chiokike be,
be jọobu ele ke m.”

17 Kam kpayaru, “Anụ hi nụ rime be whuya, ziri ichne,
anụ kpátu nhne zila richna aka,
m jaanabnanya anụ,” ka bu nhne Nyenwe ai kwuru.

18 “M jọoburu Nda anụ,
anụ jọoburu rumu m rukna nụ rumu m rinya.

Ka bu nhne Nyenwe ai ke Meli Nhne Dum kwuru.”

7

1 Ele me whnurnu n'anya, hne a nwernu kpakara mkwna ka, a mee ẹhni ai ma a ziri richna ma n'anọ-ẹhni ma nụ rime enine, whoga nụ kpakara nhne ke neemeru emeru, ma a ziri nsọ kпам kпам noowu budnu ke notu ogwnu Chiokike.

Ovu ọso n'ọnu Pọlu

2 Anụ gweru ai kwnornu nụ ọ zá badnu ọbula a mejoru, mọbu lulu, mọbu megbu n'apna ọbula.

3 Nhne me kwno nookwu ka buo ma ikpe ma anụ, lele kpa me kwuru nụ mbom, anụ zi ai mkpa nụ mkpoma, ma a snornu anụ ziri budnu mọbu a snornu anụ nwụ ẹnwu.

4 M tukwasiri m anụ mkpoma k'agida, m ji m anụ noolu onu. Anụ mernu mkpoma neesi m rikne, mkpoma nọoso m n'onu nụ rime awhnwhnu.

5 Nga a vaduru Masi- donia, a nwée ozukwa inwe n'anọ-ẹhni, be kpaknarnu ai ẹhni n'apna ọbula, ogwnu n'ederezi, ogwnu nụ mkpoma.

6 Kọvu Chiokike ke naakasi ele inwe gwuru mkpoma kasiri ai mkpoma nga Taitosi varu.

7 O buo kwnornu nụ Taitosi varu kpọi, kọvu nkasi mkpoma anụ nyernu a. O kannu ai nhne gbasiri obirizi anụ, nụ nhne igbugbu nụ nhne gbasiri m meturu anụ nụ mkpoma. Ka mernu mkpoma so m n'onu k'agida.

8 O burubedi nụ okwukwo izi me gbaru vuteru anụ nhne igbugbu, m nwée m mkpoma lawuru nụ me gbaru a. Nụ mbom, o mernu m mkpoma lawuru, nga me whnurnu nụ okwukwo me gbaru vuteru anụ nhne igbugbu ige mati.

9 Kina, mkpoma nọoso m n'onu, ọ buo nụ m vuteru anụ nhne igbugbu, kọvu kwnornu nụ nhne igbugbu

anụ mernu anụ tũhnasna mkpọma. Chiokike jiri nhne igbugbu anụ rnụ ẹrnu, ka neegesi nù ọ zá nhne ojo a mernu anụ.

¹⁰ Kwnornu nù nhne igbugbu ke Chiokike noodubna badnù ọ tũhnasna mkpọma dù ọznohia, ka nwée mkpọma lawuru. Kọvu nhne igbugbu ke ọwa noodubna n'ẹnwu.

¹¹ Anụ le kpa nhne igbugbu ke Chiokike kpahiaru anụ jiknernu ọ gọru ọnu anụ. Nhne ka kpahiaru ovu owe ẹhni, o ji anụ anya, o neerne anụ lele bẹkwnu, o meturu anụ nù mkpọma, anụ jiknernu ọ ta nye mmehie awhnũwhnu. Anụ gesiri ẹhni anụ lele ele ikpe mána.

¹² Ọ bụ n'ezi nù me gbarụ ọkwukwo izi wam, ọ búo kwnornu nye mernu nhne ojo mọbu nye o mejọru. Kọvu m gbarụ m ma anụ mahia nù ruwhnu Chiokike kpa anụ noobnonu aị nsni.

¹³ Ka mernu mkpọma si aị rikne.

Ọ búo nù mkpọma siri aị rikne kpọi, Taitosi mernu mkpọma sọ aị n'ọnu, kpa anụ mernu a ọ nwụdna nga ọ vakwnusiri anụ.

¹⁴ M ji m anụ noolu ọnu nù ruwhnu a. Anụ kpásila m iwhnerne. A nookwunu anụ ezi ọka ige ọbula, kpam masi, a jiri Taitosi luu ọnu nù ruwhnu anụ, anụ whnurnu nù ọ bụ ezi ọka.

¹⁵ Ka mernu ọwhnun'anya o nwernu hne anụ zị si rikne, nga o neechenwanya anụ noobno nsni, kpa anụ

jiri ogwnu nù ọznu biri biri nabnanya a.

¹⁶ Mkpọma nọoso m n'ọnu nù m nwernu rikne tũkwasi anụ mkpọma.

8

Nkesi ke nye Karaịsi

¹ Rumu nda m, a pioru ma anụ mahia nhne Chiokike jiri oru a rnù n'ọgbako Chiokike ke zị nù Masidonia.

² Ọ bụ n'ezi nù be gawheru agida ọkpagbu, kọvu okne mkpọma ọso n'ọnu mernu be gweya agida nkesi, ọ bụ n'ezi nù be bụ ele ọwa nyiri.

³ M naagbanu be akebne nù be nyernu kpa be nwernu rikne, n'ezi, kakwo kpa be nwernu rikne, hite nù mkpọma be.

⁴ Be riasnosi aị rikne ma be nwernu oghere yisi aka be n'oyinu ele Chiokike ke zị nù Judiya aka.

⁵ Be mernu nhne a túla anya a, be beru ọsno gweru ẹhni be nyega Nyenwe aị, nyee kwno aị hite n'echiche Chiokike.

⁶ Kam kpayarụ, a riasno Taitosi nye panizoru ẹrnu ka, rnurnu a zne nù ruwhnu mee anụ rnuzu ẹrnu ọwhnun'anya ka.

⁷ Anụ nwernu kpakara nhne, ọkwadata ovu, nù ikwu-ọnu, nù nhne ọmuma, nù ezi ọka zuru ozu nù ọwhnun'anya anụ nwernu hne a zị. Anụ buri masi ele zuru ozu nù oru ke nkesi.

⁸ M zá m neenye anụ iwu. Kọvu m kannu m anụ kpa ele berere nwernu mkpọma

o kesi be nhne, ma m mahja m ezi oka ke owhnun'anya anu hite nu nhne anu jeenye be.

⁹ Anu magwu oru ke Nyenwe a Jizosi Karaisi, o bu n'ezi nu o bu nye eze, kovu o mernu ehni a womboni kwnornu anu, ma o mee anu buru ele eze hite n'odna mboni a.

¹⁰ Ka bu ezni me neezni anu, o joburu oma o buru nu anu rnuzne ernu anu panizoru otu awha wheru ewhe. Anu bu ele mbom panizoru ernu wam, ma ele mbom jiknernu o rnu a.

¹¹ Anu zne nu ruwhnu noornu a, rnu kwo a masi. Anu ziri gnarnagnarna nu o rnu kwo ernu wam hite nu nhne anu nwernu, lele kpa o zi nga anu marnu mmuma a.

¹² O buru nu anu nwernu mkpoma nkesi, Chiokike jaanarnu nkesi anu hite nu nhne anu nwernu, o buo hite nu nhne anu nwée.

¹³ A za nookwu ma ele berere nwedna inwe ozukwa inwe, anu buru ele zi nu mkpa, kovu ma nye obula hnata n'otu.

¹⁴ Kitna, agida nhne anu nwernu anu jeenye be nu mkpa be. Ige berere, be jeenwe nhne be jeenye anu nu mkpa anu, ma nye obula hnata n'otu.

¹⁵ Lele kpa be gbaru a n'okwukwo nsọ,

“Nye chikataru agida nwée kakwo nye wam ke chikataru mati, ke o chikataru zunnu a.”

Be ziznernu Taitosi Kọrinti

¹⁶ M notunu Chiokike mmamma nye yisiri nu mkpoma Taitosi, nhne gbasiri anu lele kpa o zi nu mkpoma m.

¹⁷ O kweruru, o buo kwnornu nu a kannu a, kovu o jiknernu hite nu mkpoma a o va.

¹⁸ A neeziya ya nu otu nnwo nda ke nwernu igwugwu nu kpakara ogbako Chiokike n'okpo okwo izi oma.

¹⁹ Tukwasi nu ka, ogbako Chiokike hohiaru a ma o snornu a vuru nkesi ka zne Judiya. Ernu ka neenye Nyenwe a igwugwu, neegesi nu a nwernu mkpoma o yisi aka n'ernu ka.

²⁰ A neeze ehni a o zi badnu obula ma a ikpe kpa a neeke agida nkesi.

²¹ A naagbali o mee nhne kwesiri ekwesi, o buo n'anya Chiokike kpoi, kovu ma n'anya ele badnu.

²² A neeziya otu nnwo nda berere yisinu be, bu nye a kparu iru agida ige, whnu nu a nwernu rikne kwnata a mkpoma. Nu olu ka, kitna, o jiknernu o yinu anu aka, ke kakwo kpa o tukwasiri anu mkpoma.

²³ Nhne gbasiri Taitosi, o bu nye me nu a noornu ernu, neenyinu anu aka. Rumu nda ele ya nu be sno bu ele dnasni anya ogbako Chiokike, be bu igwugwu Karaisi.

²⁴ Anu gesi be owhnun'anya anu ma kpakara ogbako Chiokike whnu nhne kparu a jiri anu luu onu n'ezi.

9

O yinu ele Karaṣi aka

1 O zá mkpa nù me jaagbanù anù ọkwukwo gbasiri o yinu ele Chiokike ele zì nù Judiya aka.

2 M maam nù anù jiknernu o yinu be aka, m ji m anù lunu ele zì nù Masidonia ọnu. M kanù m be nù rùmu nda aì ele zì nù Akaya jiknernu o yi aka hite n'awha ke wheru ewhe. Nga be nùrnù nù anù jiknernu o kesi nhne, mkpọma be kwnalizọru o mee kpam.

3 Kọvu m neeziya rùmu nda ka, ma ọnu a jiri anù luu gharù ọ bụ nhne etekne. Lele kpa me kwuru, anù bita nhne nkesi anù,

4 ọ zì ele Masidonia snornu m va whnù nù anù jiknernune, ọ jọobunu aì nhne iwhterne, ke kakwo iwhterne jọotu anù k'agida.

5 Kam kpayarù, me riasno rùmu nda ele ka be beru ọsno va, ma be whnù anù jaabita nkesi anù kweru mkwna sù me va. Ka jeegesi nù anù nyernu hite nù mkpọma anù, ọ bụo nù be kwnagidnernu anù.

6 Anù chenwanya nù nye kpasiri mkpuru matì jọoghohia mkpuru matì, nye wam ke kpasiri agida mkpuru jọoghohia agida mkpuru.

7 Nye ọbula nyee lele kpa o kpebiri nù mkpọma a, ọ bụo nù mkpọma lawuru kwnornu nù be karù be nyee. Chiokike whnurnu nye wam jiri mkpọma ọma a nyee n'anya.

8 Chiokike nwernu rikne o nyee anù karukwo kpa ọ zì anù mkpa, ma anù nwernu nhne kpakara ige, nù karukwo kpa anù jeeji o mee nhne buri ọma.

9 Lele kpa be gbarù a n'ọkwukwo nsọ, kaa, "O neenye ele mboni k'agida, ome mma a jaazi ọkwukokwnu."

10 Chiokike, nye neenye nye ọnu ọkwu mkpuru ọkpukpa nù wiri ele badnù jeeri, jeeme kpakara mkpuru anù so oso, minya agida mkpuru hite nù nkesi anù nyernu hite nù mkpọma ọma anù.

11 O jeeme anù ba agida nù kpakara nhne, ma anù buri ele jeekesi ele badnù nhne ige ọbula, ke jeeme ele badnù tũnu Chiokike mmamma kwnornu anù.

12 Ọnu ọma ka anù nọornu zá neeme ele Chiokike riji rùwho kpọi, kọvu o neeme ele badnù nọotunu Chiokike mmamma k'agida.

13 Lele kpa ọnu ọma ka neegesi nù anù buri ele ezi ọka, ele badnù jaaznarni Chiokike kwnornu nù anù noobno nsni izi ọma Karaṣi ke anù kwuharu, anù neeji mkpọma ọma neekesi be nù ele berere nhne.

14 Be jeeji mkpọma ọwhnun'anya be kpenu anù okpukpe kwnornu oru Chiokike ke zì agida hne anù zì.

15 Ngwa ma a tũnu Chiokike mmamma kwnornu nkesi a ke ọnu jọokowali.

10

Pọlu gọru ọnu ẹrnu a

1 Mawa Pọlu, naarijasno anu, me nye be karu nu m bu m nye mesi rikne nga me zi nu ruwhnu anu, kovu nye nwernu anya rikne hne anu zila. M ji m ọzi wohnernerne nu mkpoma oma Karaisi, naarijasno anu, anu bikno,

2 anu mee m, m buru nye anya rikne hne anu zi nga me varu, kwnornu nu m nwernu m rikne nwe anya rikne n'ehni ele nookwu nu a noowu budnu lele kpa ele ọwa noowu.

3 O bu n'ezi nu a zi n'owa, kovu a za noolu ogwnu lele kpa ele ọwa noolu.

4 Kwnornu nu mgwna ogwnu ai buo ke badnu, kovu o zi rikne nu Chiokike ke naakwnadna hne be wusiri rikne. A naakwnadna kpakara agirigo

5 nu kpakara nhne ke noovulizo ehni a olu megidne omahia Chiokike, a noodoru kpakara echiche n'ogwnu mee be bonu Karaisi nsni.

6 Nga anu ghoru ele bnozuru nsni, a jeejiknerneru o ta kpakara nye obula ke za noobno nsni awhnwhnu.

7 Anu neele kpakara nhne anya n'olu kpoi. O zi nye obula n'esilawuru anu ke neeche nu o bu nye Karaisi? Nye wam che kwno echiche, kwnornu nu a bu ele Karaisi lele nye wam.

8 O burubedi nu me gweru rikne Nyenwe ai nyernu ai mee oknomokno k'agida, iwhnerne jootu m. Nyenwe ai nyernu ai rikne o wulizo

anu olu lele oro, o buo rikne o kwnadna anu akwnadna.

9 M piole m o ji okwukwo izi me gbannu anu kpasu anu ogwnu.

10 Otu badnu jaakaa, "Okwukwo Pọlu naagba siri rikne, nootu ogwnu, kovu, nga ai nu a ziri, o nwee rikne, ikwu-ọnu a bu nhne etekne."

11 Nye wam mahia nu o za nhne zi ichne nu nhne a gbaru n'okwukwo nga a zi ikere nu nhne a jeeme nga ai nu anu zi.

12 Kwnornu nu a za noogwnu ehni ai n'esilawuru ele ji ehni be nootu nhne zi olu k'agida. Ele ji ehni be nootunu n'ehni be, neekpe ehni be ikpe n'iwu ke be nyernu, bu ele nwee akoniche.

13 Kovu nu oknomokno ai za neewhe hne a nwernu rikne, oknomokno ai bu n'ernu Chiokike nyernu ai, bu ke duru nu hne anu zi.

14 Hne o bu nu ernu ai zi n'esilawuru anu, a gawhele a. A wuru izi oma Karaisi vakwnusi anu.

15 A za neeji ernu ele berere rnurnu naanya risi. Ernu kam wheru hne Chiokike nyernu. Kovu a neele anya nu okwnata mkpoma anu jooso oso, ma a nwe rikne rnun agida ernu n'esilawuru anu du hne Chiokike nyernu ai.

16 Nga wam, a jeenwe rikne kpo okwo izi oma nu mba berere whe anu. Kovu a jeeji ernu ele berere rnurnu nyaa risi.

17 Lele kpa okwukwo nsokwuru, "Nye obula ke jeeme

oknomokno, o mee oknomokno nù nhne Nyenwe aì rnùrnu.”

¹⁸ Kwnornu nù nye naaja ẹhni a mma bụ nhne etekne, kọvu nye wam Nyenwe aì naaja mma bụ nhne.

11

Polu nù ele izi aghalaghala

¹ O jaamasì m o bụru nù anụ jeenwe rikne nagidne iwhnirniwhno m, bikno, anụ gweru m.

² Mkpọma m zì nù hne anụ zì lele Chiokike, anụ nù lele nyerinya máa nyerukna zì snam me kweru o nìsì otu badnù, ke bụ Karaìsì.

³ Kọvu ogwnu nọotu m nù be joolulu mkpọma anụ, lele kpa agwọ wam jiri aghìgho rnawhu Ivu, mee anụ gharu o gweru kpakara mkpọma anụ kpenu Karaìsì.

⁴ Kwnornu nù anụ jiri ẹso nahọru nye wam ke znirni anụ Jizọsì berere búo Jizọsì ke a znirni anụ, nù enine berere nù izi ọma berere ke búo ke a znirni anụ.

⁵ Kọvu o búo nù m zì m matì kakwo ele izi ka anụ kaa nù be ka m mma.

⁶ Nyele ma, m máam kpa be kwu ọka sọ n'ọnu, kọvu m magwu m nhne, a mernu ka whuya iwhne hne anụ zì ige ọbula ma nù ọnodi ọbula.

⁷ M náge m anụ nhne ọbula nga me znirni anụ izi ọma Chiokike, m gwednarnu m ẹhni m ẹli ma anụ bụru ele be gwelizọru olu. Kì ọ bụ nhne ọjo me mernu sa?

⁸ M nahiaru m ọgbako Chiokike berere nhne me jiri nọornu ẹrnu n'esilawuru anụ.

⁹ Ige me nù anụ zì, m kpáknage m anụ ẹhni nù iwai nga me zì nù mkpa, rụmu nda ele hi nù Masidonia va gweyaru kpakara nhne zì m mkpa. Lele kpa me neeme, m jọbu ivu nyee anụ tna mọbu ekile.

¹⁰ Hite n'ezì ọka Karaìsì ke zì nù rime m, o zá badnù ọbula ke zì n'Akaya jeenwe rikne kpusni ọnu m, kpa me naanya risi.

¹¹ Ndaa nhne me jiri kwu kpa? Me whnúge anụ n'anya sa? Chiokike magwu nù m whnurnu m anụ n'anya.

¹² M jaazì kọriri neeme kpa me neeme, ma ele izi ka gharu o nwe oghere be noopio gweru luu ọnu, kaa nù be nù aì neeme otu nhne.

¹³ Be bụ ele izi aghalaghala, be búo ezi, be jì ẹrnu be naagha ọgha, ma be nù lele ele izi Karaìsì n'ezì.

¹⁴ O jí anụ anya, Setani n'iwhuru a gbanwornu ẹhni a lele enine izi ke iwhne.

¹⁵ O búo okne nhne o bụru nù ele ẹrnu a gbanwornu ẹhni be ma be nù lele ele ẹrnu ome mma. Be jeeji aka ẹrnu be kwu be ọgwo ẹrnu.

Awhnùwhnu Polu lele nye izi Karaìsì

¹⁶ M nookwu kwno a berere, o zá nye kwu m nye iwhnirniwhno. O bụru nù o bụ nhne me bụ, anụ gweru m kpam, ma m gweru m nhne matì luu ọnu.

17 Nhne me nookwu kịta buo nhne Nyenwe aị pioru me kwu, ke gbasiri olu onu ka, m nookwu lele nye iwhnirni-whno.

18 Agida ele badnu noolu onu lele kpa ele badnu noolu, m jeeme kпам.

19 Anu bu ele ji ovu oso n'onu nagidne ele iwhnirni-whno, o bu n'ezi nu anu bu ele nwernu akoniche.

20 Anu nagidnerneru ele merneru anu lele ohi, nahoru anu nhne, kwnaghari anu, gwuzote ehni a, gbọ anu aka nu nti.

21 Ka notu m iwhnerne nu a nwée rikne mee anu kпам.

Kovu o buru nu nye obula luu onu nhne obula, m jeeme masi kпам. M nookwu lele nye iwhnirniwhno.

22 Be bu ele Hiburu? M bu m masi. Be bu ele Izireli? M bu m masi. Be bu ele hi n'avnurnu Ebereham? M bu m masi.

23 Be bu ele ernalu Karaisi? Era naagba m sa? M bu m nye ernalu Karaisi kakwo be. M noturu ernalu kakwo be. M lala m ikelu agida ige kakwo be, be pniarnu m nhne k'agida kakwo be, agida ige o gw-narnu mati m nwu.

24 Mgba isne ele Ju pniarnu m nri eto nu tolu onu mbinibini.

25 Ele Rom liri m isisi mgba eto, be turu m akaworugwu otu mgba, ogbo me zi nu rime a kpuru mgba eto, m daziri m nu rime mini iwhnehnue nu abali.

26 Kpa me neezne izne ige

obula, m neeze budnu nu rime mini, ma n'aka ele buznu, m neeze budnu n'aka ele Ju ma n'aka ele buo ele Ju. Nhne oze budnu nu rime eli-ohna, ma nu rime eli-ikpa, neeze budnu n'okne abaji, neeze budnu n'aka rumu nda aghalaghala.

27 M noturu ernalu, notodoli ndoli, ma n'oka anyarna abali, ma wiri ogwnugwnu nu akpiri okpo bekwnu, m dazila m agida ige nwée wiri o riri, ma nu iyi otutu, m nwée m iwo o kpusni eto.

28 Be gweme kpakara nhne ka, nhne naakpa m kpakara obochi bu nhne gbasiri ogbako Chiokike.

29 Ndaa nye rikne gwuru ke rikne gwulam? Ndaa nye dnabnarnu nu mmehie ke mkpoma lala m mini, neerne m bekwnu?

30 O buru nhne be luu onu, m jeeji kpakara nhne neegesi nu m bu nye nwée rikne noolu onu.

31 Chiokike nu Nda Nyenwe aị Jizosi, nye nwe oznarni okwnukokwnu, magwu nu m nookwu ezi oka.

32 Nga me zi nu Damasikos, nye neechi eli, nye zi nu mkpururu Eze Arətasi, bitaru ele neese onu-mgbo eli-ohna, be nwudne m.

33 Kovu be yisiri m nu rime nkita garu n'onunu zi nu mkpo eli-ohna kwuhala m n'eli a, o bu kpa me jiri gbawhunahoru a.

12

1 M joolu ọnu, ọ bu n'ezì nù ọ zà nhne zì nù rime a. Kọvu m jookwu ọka gbasìri nhne me whnùnnu nù nhne Nyenwe aì kpumennu m.

2 M maam otu nye Karaisi nri nù awha ẹno wheru ewhe, nye be gwelizọru zne oligwe k'ẹto. (Ọ bụru nù ọ bu n'anọ-ẹhni mọbu ọ bụo n'anọ-ẹhni, m máam, Chiokike kpọi ma.)

3 Berere, m máam ma ọ bu n'anọ-ẹhni ma ọ bụo n'anọ-ẹhni, Chiokike kpọi ma.) Nhne me magwụ bụ nù

4 be gwelizọru badnụ ka zne Paradasì. Ọ nùnnu nhne ke be jáagbali n'ọkwukwo, nhne ọnu badnụ jéenwe rikne kwu.

5 M jeeji nyerukna ka nọolu ọnu, m jéji ẹhni m noolu ọnu, okwolem nhne neegesi nù m bụ m nye nwée rikne.

6 Ọ bụru nù me luu ọnu m jóobu nye iwahnirniwhno, kwnornu nù m nookwu ezi ọka. Kọvu m jóolu ọnu, ọ jáamasì m badnụ ọbula gweru m kakwo kpa ọ gweruru m hite nù nhne ọ whnùnnu me mernu nù ke ọ nùnnu me kwuru.

7 Lele kpa ọ bụo ọma me vulizọ ẹhni m olu kwnornu okne nhne me whnùnnu, be nyernu m nhne igbugbu n'ẹhni m. Ọ bụ nye izi ke Setani, ma ọ kpakna m ẹhni ma m gharụ m o luu ọnu.

8 M rjoru m Nyenwe aì nhne gbasìri a mgba ẹto, ma o gweme a n'ẹhni m.

9 Ka bụ nhne ọ sarụ m, "Oru m zunnem jì, iknernema m zuru ozu nga i nwée rikne."

Kam kpayarụ, mkpọma nọoso m n'ọnu me luu ọnu nù m nwée m rikne, ma rikne Karaisi whụya iwhe nù rime m.

10 Kam kpayarụ, m bụ m nye nwée rikne. Ele badnụ naakpasì m iwheerne, be ta m awhnùwhnu, be kpagburu m. Kpakara nhne igbugbu me gawheru kwnornu Karaisi jiri m rụwho. Nga me nwée rikne, iknernema zì m n'ẹhni.

Ele Kọrinti meturu Pọlu nù mkpọma

11 Anụ mernu m mee lele nye iwahnirniwhno. Anụ bụ ele kwesiri o kwu nhne ọma gbasìri m, kwnornu nù ele izi anụ wam, ke anụ kaa nù be ka m mma, béle m ọsno. Ọ bụ n'ezì nù ọ zà nhne me bụ.

12 Kwnornu n'ezì, nhne neegesi nhne nye izi whụyaru iwhe n'esilawuru anụ. Be bụ ẹrnu elekema, nù ẹrnu ndu-ẹhni nù ẹrnu rikne zì ọdo nù ọdo me jiri ndidi rnu.

13 Ndaa nhne me mernu ọgbako Chiokike ele berere ke me méne hne anụ zì? Ọ bụ nù m kwéle m ọ bụru nhne ivu rinya hne anụ zì? Anụ gbarunnu m nhne ojo ka.

14 Ka jóobu mgba ẹto me jiknenu ọ vakwnusi anụ. M jóoburu ivu rinya hne anụ zì. Anụ zì m mkpa, ọ bụo nhne anụ nwernu. Ọ bụo rụmu naakpabitanu ele murnu be ẹkwnu, kọvu ele nda nù nne naakpabitanu rụmu be ẹkwnu.

15 Ọ jaamasì m o nyega anụ nhne me nwernu. Owe! M jeenye iwhe nù nù risi

anụ ma m yisinu m anụ aka. Ka o jeeme anụ bọ whnụ m n'anya, lele kpa me whnuru anụ n'anya k'agida?

16 Anụ jeekweru, nụ m bụo m ivu rinya nyee anụ. Hne me bụ nye aghigho, m ji m aghigho nwudne anụ.

17 Ndaa? Ele me ziyannu anụ, m jiri be nahoru anụ nhne sa?

18 M riasnornu m Taiṭosi o va, ya nụ nye Karaṣi berere, anụ jaakaa nụ Taiṭosi nahoru anụ nhne? Me nụ ya a jile otu enine mee nhne lele nụ a bụ otu badnụ?

19 Anụ neeche nụ a noopio o goro eḥni aṣi nụ hne anụ zi? Óza! A nookwu oka nụ ruwhnu Chiokike lele ele Karaṣi, kpakara nhne a neeme bụ ma anụ buru ele zi kwem lele ele a whnuru n'anya.

20 Ogwnu nootu m nụ me vadu n'esilawuru anụ, m jowhnu nụ anụ zi ichne, ke bụo nhne me leru anya a. Anụ jowhnu masi nụ m zi m ichne, ke bụo nhne anụ leru anya a. Ogwnu nootu m nụ m jowhnu oknorno nụ okwno-awuwa, mkpoma bekwnu nụ okewa, onu-ojo, izno, oknomokno nụ mkpakpo.

21 Ogwnu nootu m nụ me va berere nụ Chiokike m jeegwedna m eli nụ ruwhnu anụ, m jaakwa ekwna kwnornu agida ele mernu mmehie ke kwéle o tūhnasna, hite nụ nhne zá rìchna be mernu, ke bụ ome oyi n'apna tū iwhnerne.

13

Odo aka nụ nsṣi ipne-aznụ

1 Ka jọbu mgba eto me naava lekasi anụ. “Kpakara nhne be bnornu badnụ, jeenweriri ele akebne lawuru mọbu eto,” lele kpa okwukwo nsokwuru.

2 Lele kpa me kannu anụ nga me varu ke mgba lawuru, ele mehieu n'ige wheru ewhe, nụ kpakara ele berere, m nookwu a berere kpa me zi ikere, me va kwno, kpakara be jaata awhnūwhnu mmehie be.

3 Hne anụ noopio nhne ke neegesi nụ Karaṣi ji m nookwu oka, o bụo nye nwée rikne n'esilawuru anụ kovu o jeegesi iknerna a hne anụ zi.

4 O bụ n'ezi nụ be gburu a n'enwe rikne, kovu o zi budnu hite nụ iknerna Chiokike. A bụ ele nwée rikne nụ rime Karaṣi, kovu hne anụ zi a joosno a ziri budnu n'iknerna Chiokike.

5 Anụ nyosnama eḥni anụ lekasi ma anụ zi koriri budnu n'okwnata mkpoma. O bụ nụ anụ máa Karaṣi Jizosi wu nụ rime anụ? Okwolem ma anụ dnarnu adna.

6 M kweru m nụ anụ jaamahia nụ a bụo ele dnarnu adna.

7 A naariasno Chiokike, anụ mee nhne ojo. O bụo ma ele badnụ kaa nụ a bụ ele oma, kovu ma anụ mee nhne ke kwesiri, o bubi nụ a nụ lele ele dnarnu adna.

⁸ A jéenwe rikne mee nhne megidne ezi ọka, kọvu dasinu ezi ọka n'ikwnu.

⁹ Mkpọma nọoso aị n'ọnu nga a nwée rikne, kọvu nụ anụ nwernu rikne. A neekpe ma anụ bụru ele zuru ozu.

¹⁰ Kam kpayarụ, me naagbanụ anụ ọkwukwo ka kpa me zị ikere, ma ọ bụru me va, m jéeme anụ nhne rikne hite n'iknerna Nyenwe aị nyernu m, rikne o wulizọ anụ olu lele ọro, ọ bụo ọ kwnadna anụ akwnadna.

Obekwu ikwu ipne-aznụ

¹¹ N'ipne-aznụ, rụmu nda m, anụ dazikwaru nkari. Anụ gbalị dū ozuzu. Anụ bno nsnị nū nhne me nọorio anụ, anụ bụru ele nwernu otu mkpọma, anụ wuru n'udno. Chiokike ke ọwhnun'anya nū udno dazigidnenu anụ.

¹² Anụ bekwurita ibne anụ lele rụmu nda.

¹³ Kpakara ele nsọ Chiokike neebekwu anụ.

¹⁴ Oru ke Nyenwe aị Jizọsi Karaịsi, ọwhnun'anya ke Chiokike, nū owugidne ke Enine Nsọ dazinu kpakara anụ.

**Ọkwukwo izi Ọlu
gbaznenu
Ele Galasia
Nhne gbasiri
ọkwukwo izi ka**

Hite n'ọpanizo ọkwukwo izi Ọlu gbaznenu ọgbako Chiokike ke zị nụ Galasia, o mernu be mahia nhne lawuru ke zị mkpa. Ke mbom, bu ma be mahia nụ ọ bu ezi nye izi Karaịsi, ke ẹbo bu nụ izi ọma ọ nọokpo okwo a bu ezi ọka. Ka bu kwnornu nụ agida ele badnu naakaa nụ Ọlu bu nye izi aghalaghala nụ nye nọokpo okwo izi ọma aghalaghala.

Ọlu bu nye izi Karaịsi n'ezi ọka, nye Nyenwe aị nyernu ẹrnu o zni ele buo ele Ju izi ọma. Ọlu kannu Pita nụ ọ bu nye ruwhnu lawuru, kwnornu nụ o kwemana o snornu ele buo ele Ju ele za naabita Iwu Mozizi ri wiri nga ọ whnuru ele hi nụ Jeruselem va.

Ọlu kwusiri a rikne nụ okwolem hite n'okwnata mkpoma nhne Chiokike jeeji znohia badnu. Ka whuyaru iwhne nụ budnu Ebereham, nye naharu mkwna Chiokike hite n'okwnata mkpoma.

Nhne zị n'okwukwo izi ka

Ezi nye izi nụ ezi izi ọma (1:1-10)

Chiokike hohiaru Ọlu lele nye izi Karaịsi (1:11-24)

Ọlu naagbanu izi ọma akebe (2:1-21)

Ọznohia kwolem hite n'okwnata mkpoma (3:1-4:31)

Ele Enine Nso nū ọwhnun'anya noodu (5:1--6:10)

Odo aka nū nsni ipne-aznu (6:11-18)

¹ Mawa, Ọlu, nye izi Karaịsi ke híge n'aka badnu mọbu nū rikne ke badnu, kovu hite nū Jizosi Karaịsi nū Chiokike Nda, nye mernu Jizosi hi n'enwu lizo,

² nū kpakara rumu nda ele me nū be zị naagbaznenu kpakara ọgbako Chiokike ke zị nū Galasia ọkwukwo.

³ Oru nū udno ke Chiokike Nda aị nū ke hi n'aka Nyenwe aị Jizosi Karaịsi dazinu anu.

⁴ Karaịsi gweru budnu a nyee kwnornu mmehie aị ma ọ dọhia aị n'ige ojo ka lele kpa echiche Chiokike Nda aị pi-oru.

⁵ Ọznarni zinu a ọkwukokwnu. Amim.

Izi ọma berere zila

⁶ Ọ gbagwojiri m anya nū anu ghasaru nye wam sukwuru anu bna n'oru ke Karaịsi, zne izi ọma berere.

⁷ N'ezi, izi ọma berere zila, kovu agwna ele badnu naakpahie anu anya, noopio ọ gbanwo izi ọma Karaịsi.

⁸ Kovu ọ buru aị mọbu enine izi hi n'oligwe va zni anu izi ọma berere ke buo ke a znirni anu, Chiokike vu a onu ọkwukokwnu.

⁹ Lele kpa a kwuru nū mbom, m nookwu kwno a berere, ọ buru nū nye ọbula zni anu izi ọma ke zị ichne nū

ke anụ nahjaru, Chiokike vụ a ọnu ọkwukokwunu.

10 Ka o neegesi nụ m noopio ruwhnu ọma ke badnụ, bụo ke Chiokike? M noopio nhne jaamasị badnụ sa? Ọ bụru nụ m noopio ruwhnu ọma ke badnụ, m jọbu nye izi Karaịsi.

Chiokike sukwuru Pọlu

11 Me kanụ anụ, rụmu nda m, izi ọma me nọkpo okwo a bụo nhne hi n'aka badnụ.

12 M náhage m a n'aka badnụ, ọ bụo badnụ znirni m a, kọvu Jizọsi Karaịsi kpumernu a nyee m.

13 Anụ nurnu kpa me wuru budnu nụ mbom n'okpukpe ele Ju, nụ kpa me kpaknarnụ ọgbako Chiokike ẹhni k'agịda, gbalị ma o whu.

14 M be m ele Ju ibne m ọsno ele me nụ be bụ ebiri n'okpukpe ele Ju, m ji m kpakara mkpoma yisi n'omen'eli ele nda aị ọknani.

15 Kọvu Chiokike bítaru m ichne hite nụ rụwho nne m, o sukwuru m hite n'oru a. Nga ọ masịri a,

16 o kpumennu m Nnwọ a, ma m nwernu m rikne znirni ele bụo ele Ju izi ọma gbasịri a. Ige wam, m znége ma me nụ badnụ ọbula tñụ ọnutnu gbasịri a.

17 M znége m Jeruselem zne ọ whnụ ele be m ọsno bụru ele izi, kọvu m znernu m Arebịa, m lahna Damasịkosi.

18 Nga awha ẹto wemernu, m znernu m Jeruselem zne mahịa Pita, me nụ a dazịri nri nụ ọbochi isne.

19 M whnúge m nye izi berere okwolem Jemisi nwene Nyenwe aị Jizọsi.

20 Nhne me gbannu anụ n'okwukwo bụ ezi ọka, Chiokike magwụ nụ ọ bụo aghalaghala.

21 Omekwo, m zne n'eli ke zị nụ rime Siriya nụ Silisia.

22 Ọ zá nye Karaịsi ke zị nụ ọgbako Chiokike ke zị nụ Judiya magwụ nye me bụ ruwhnu nụ ruwhnu.

23 Kọvu nụ be nurnu ọnutnu, “Nye wam ke naakpakna aị ẹhni neezni izi ọma ọkwunata mkpoma wam ọ gbalịri o mee ma o whu nụ mbom.”

24 Be znarnị Chiokike kwnornu m.

2

Ele izi berere nabnanyarnu Pọlu

1 Nga nri nụ awha ẹno wemernu, m lahna m Jeruselem, me nụ Banabasị, m kwuru Taịtosị zne.

2 M znernu m kwnornu nụ Chiokike kpumennu m me zne. N'iznuznu ke me nụ ele risi gbarụ ichne, m kọwaru m izi ọma me znirni ele bụo ele Ju, ọ zị ẹnu me nurnu mọbu ke me nọornu kịtna bọ bụ nhne etekne.

3 Taịtosị nye me nụ a sno, ọ bụ n'ezi nụ ọ bụ nye Giriki, be kwnágidnene a ọ kpa nka.

4 Agwna rụmu nda aghalaghala gbebnarnu va o nyosna kpa a jiri nwernu ẹhni aị nụ rime Karaịsi Jizọsi, be pioru ma a bụru ọhi iwu ele Ju.

⁵ A nyége be oghere rja rja ma a bítannu anụ ezi ọka ke izi ọma chịm chịm.

⁶ Agwna ele nụ lele be bụ ele risi. Nhne ọbula be bụ zá m mkpa, kwnornu nụ Chiokike lé badnụ anya nụ ruwhnu n'ikpe. Ọ zá nhne ele ka tụtwasiri nụ izi me znirni.

⁷ Kọvu be whnurnu nụ Chiokike nyernu m izi ọma me zni ele bụo ele Ju, lele kpa o nyernu Pita ẹrnu o zni ele Ju izi ọma.

⁸ Chiokike wam ke nọrnu ẹrnu n'izi ọma Pita znirni ele Ju lele nye izi, bụ masị nye nọrnu ẹrnu n'izi ọma me znirni ele bụo ele Ju lele nye izi.

⁹ Nga Jemisi nụ Pita nụ Jọni, ele nụ lele ele risi whnurnu nụ Chiokike nyernu m ẹrnu ka zị ichne, be gbasịri me nụ Banabasị akarikwnunga ke neegesi nụ a bụ otu. Be kweru a zne zni ele bụo ele Ju izi ọma, be zne zni ele Ju izi ọma.

¹⁰ Nhne be nọorio kpọi bụ, a chenwanya ele mboni, kị bụ nhne me mernu wara wara.

*Pọlu bigbọru Pita
n'Antiọku*

¹¹ Nga Pita vaduru Antiọku, m bigbọru m a nụ ruwhnu ọhna kwnornu nụ ọ dnahieru.

¹² Sụ ele Jemisi ziyaru va, Pita nụ ele bụo ele Ju neerikọ wiri. Kọvu nga be vaduru, o kwéle o sno be ri wiri, kwnornu nụ ogwnu ele be kparụ nka tųru a.

¹³ Ele Ju ke gwnarnụ snornu a kpa ichne ichne kwnornu nụ ruwhnu lawųru

a, ke kpayarụ Banabasị sno be nụ ruwhnu lawųru be.

¹⁴ Nga me whnurnu nụ be méne lele ezi ọka ke izi ọma, m kanụ Pita nụ ruwhnu kpakara be, "Ị bụ nye Ju, kọvu ị noowu bụdnu lele ele bụo ele Ju, ọ bụo lele nye Ju. Ndaa kpa ị naakwnagidne ele bụo ele Ju be snornu omen'ẹli ele Ju?"

Ọznohia bụ hite n'oru

¹⁵ N'ezi, a bụ ele Ju hite n'omumu aị, a bụo ele mmehie lele kpa be nookwu ele bụo ele Ju.

¹⁶ Kọvu a magwụ nụ badnụ nụ Chiokike mernu udno hite n'ọkwnata mkpọma nụ Jizọsi Karaịsi, ọ bụo n'ome nhne iwụ kwuru. A kweru nụ Karaịsi Jizọsi ma aị nụ Chiokike ziri n'udno hite n'ọkwnata mkpọma nụ Karaịsi. Ọ bụo n'ome nhne iwu kwuru, kwnornu nụ ọ zá nye ọbula bụ nye ọma hite n'ome nhne iwu kwuru.

¹⁷ Ọ bụru nụ nga a noopio ma aị nụ Karaịsi ziri n'udno, a whnụ ẹhni aị nụ a bụ ele mmehie lele ele berere, ka o neegesi nụ Karaịsi naadasị mmehie n'ikwnu? Chiokike kwé.

¹⁸ Ọ bụru nụ me panizo noowu nhne me kwnadnarnụ akwnadna, ka neegesi nụ m bụ m nye noolulu iwu.

¹⁹ Kwnornu nụ hite n'iwu m nwurnu ẹnwu hne iwu zị, ma m ziri m bụdnu nụ rime Chiokike.

²⁰ Be gweru m yisinu Karaịsi kpọgidne aị n'olu ọgba a, m zá m bụdnu ke m, kọvu Karaịsi wu nụ rime m. Bụdnu

ke me zị n'anọ-ẹhni bụ ke me zị n'ọkwnata mkpọma ke Nnwọ Chiokike, nye whnurnu m n'anya gweru bụdnu a nyee kwnornu m.

²¹ M zá m neelewhu oru Chiokike anya, kwnornu nụ ọ bụru nụ ome mma bụ hite n'iwu, ẹnwu Karaisi nwurnu bụ nhne etekne.

3

Iwu mọbu ọkwnata mkpọma

¹ Anụ ele Galasia iwahnirniwhno, nyele kpahieru anụ anya? Nụ ruwhnu anụ bụ hne me gesiri anụ nụ be kpọgburu Jizọsi Karaisi n'ogba.

² M pioru m ọ mahia otu nhne n'aka anụ. Anụ nahiaru Enine Nso hite n'ome nhne iwu kwuru, sọbu hite n'okweru nhne anụ nurnu?

³ Anụ bụ ele iwahnirniwhno kpa? Anụ panizoru n'Enine ke Chiokike, anụ naagbalị o wu bụdnu kịna hite nụ rikne ke aka anụ?

⁴ Kpakara awhnụwhnu anụ taru ọ bụ nhne etekne? N'ezi, ọ bụ kwnornu nụ nhne etekne?

⁵ Chiokike nyernu anụ Enine a, rnụ ẹnụ ndu-ẹhni n'esilawuru anụ. Ọ bụ kwnornu nụ anụ mernu nhne iwu kwuru sọbu nụ anụ kweru nhne anụ nurnu?

⁶ Lele kpa Ebereham “kweruru Chiokike, Chiokike gwnụsinu a nụ ọ bụ nye mee mma.”

⁷ Anụ mahia nụ kpakara ele nwernu ọkwnata mkpọma bụ rụmu Ebereham.

⁸ Ọkwukwo nsọ kwuru nụ hne zị nụ ruwhnu nụ Chiokike jeeme ma ya nụ ele bụo ele Ju ziri n'udno hite n'ọkwnata mkpọma, znirni Ebereham izi ọma, kaa, “Hite nụ rime i, m jọgozi kpakara mba ke ọwa.”

⁹ A whnurnu nụ Chiokike nọgozi kpakara ele ke jeekweru lele kpa Chiokike gọziri Ebereham, nye kweru nụ ya.

¹⁰ Ọvu ọnu zinu kpakara ele neeche nụ Chiokike jọgwnu be lele ele ikpe mána kwnornu nụ be naabita Iwu. Be gbarụ a n'ọkwukwo nsọ, kaa, “Ọvu ọnu zinu kpakara ele zá naabita kpakara nhne be gbarụ n'Iwu, neeme masị be.”

¹¹ O dnornu aị anya nụ ọ zá nye ya nụ Chiokike zị n'udno hite n'Iwu, kwnornu nụ ọkwukwo nsọ kwuru, “Nye mee mma jeehi n'ọkwnata mkpọma a ziri bụdnu.”

¹² Kọvu Iwu knóge aka n'ọkwnata mkpọma, lele kpa ọkwukwo nsọ kwuru, “Nye neeme kpakara nhne ka jaazi bụdnu nụ rime be.”

¹³ Karaisi gbahiaru aị hite n'aka ọvu ọnu ke iwu, ọ ghonu aị ọvu ọnu. Ọkwukwo nsọ kwuru, “Be vuru nye ọbula be kpọkwnusiri n'olu isisi ọnu.”

¹⁴ Karaisi mernu ka ma ngọzi wam Chiokike kweru Ebereham mkwna bụru ke ele bụo ele Ju hite nụ Karaisi Jizọsi, ma a hite n'ọkwnata mkpọma nahoru mkwna Enine Chiokike.

Iwu nụ mkwna

15 Rumu nda m, m jeeji nhne anya nṣowhnu noogbu esni. Ọ zá nye nwernu rikne o lulu njo-ẹhni badnu lawuru gbaru, mṣbu tṣkwasi nhne n'olu a.

16 Kĩta, Chiokike kweru Ebereham nu nnwọ a mkwna wam. Ọkwukwo nsọ kwúge agida rumu, kṣvu "nnwọ i," ke bu otu badnu, nye bu Karaĩsi.

17 Nhne me nookwu bu ka, iwu wam ke be nyernu riwhu awha ẹno nu nri ẹto kpa mkwna Chiokike kweru Ebereham whemernu, nwée rikne lulu mkwna Chiokike kweru mṣbu mee a ọ gharu ọ zị ire.

18 Kwnornu nu ọ buru nu nhne okehia ka kno aka n'iwu, ọ búma mkwna, kṣvu Chiokike kwnornu n'oru a, o nyernu a Ebereham hite nu mkwna.

19 Kĩni bu nhne be kwno nyee iwu? Be nyernu a kwnornu ọdnahie ke badnu tem du nga Nnwọ wam jaava bu nye mkwna wam nṣotu aka. Chiokike nyernu iwu hite n'aka ele enine izi, o nyee a nye ibno.

20 Nye ibno zá mkpa hne otu badnu zị, Chiokike bu otu.

21 Ka o neegesi nu iwu megidnenu mkwna Chiokike? Ọza rĩa rĩa! Kwnornu nu ọ buru nu be nyernu iwu ke jeenye budnu, ome mma jṣoburu hite n'iwu.

22 Kṣvu ọkwukwo nsọ kwuru nu kpakara ọwa bu ọhi mmehie, ma nhne Chiokike kweru mkwna o nyee hite n'okwnata mkpoma nu Jizọsi

Karaĩsi buru ke ele kweru ekwe.

23 Tṣtu sṣ ọkwnata mkpoma varu, a bu ele ikelu ke iwu, be gbagidnenu aị ọnuhna du nga be kpumernu ọkwnata mkpoma.

24 Iwu wam bu nye neelegidne aị anya, kwuru aị vakwnusi Karaĩsi, ma aị nu Chiokike ziri n'udno hite n'okwnata mkpoma.

25 Kpa ọkwnata mkpoma varu, a zima nu mkpururu nye neelegidne aị anya, ke bu iwu.

A bu rumu Chiokike

26 Kpakara anu bu rumu Chiokike hite n'okwnata mkpoma nu Karaĩsi Jizọsi.

27 Kpakara anu ele be wuru mini bna nu Karaĩsi jooworu budnu ikne Karaĩsi lele iwo.

28 Ọ zá nhne zị ichne nu hne nye Ju nu nye Giriki zị, mṣbu hne ọhi nu nye búo ọhi zị, mṣbu hne nyerukna nu nyerinya zị. Kpakara anu bu otu nu rime Karaĩsi Jizọsi.

29 Ọ buru nu anu bu ele Karaĩsi, anu bu rumu Ebereham, ele jeekehia mkwna wam Chiokike kweru Ebereham.

4

1 Nhne me nookwu bu kṣriri ka, nye ọbula ke jeeri mkpe nda a hne ọ bu watakiri, ọ zá nhne zị ichne hne ya nu nye ọhi zị, ọ bu n'ezi nu ya nwe kpakara nhne.

2 Ele berere jaazi neelegidne a anya, neezni a nhne, tem du ige nda a karu.

³ Kpam masi, nga a bu rumu takiri, a bu ohi renwu ojo mati mati ke owa.

⁴ Kovu nga ige duru, Chiokike ziyaru Nnwọ a, nye nyerinya muru nu mkpururu Iwu Mozizi,

⁵ ma o gbahia ele zi nu mkpururu iwu, ma a buru rumu Chiokike.

⁶ Kwnornu nu anu bu rumu a, Chiokike ziyaru Enine Nnwọ a nu rime mkpoma ai, Enine ke naakwna, "Papa, Nda m."

⁷ Kam kpayarụ i búma ohi, kovu nnwọ, hne i bu nnwọ, Chiokike mernu i buru nye jeeri mkpe a.

Nhne meturu Polu nu mkpoma

⁸ Nu mbom, nga anu máa Chiokike, anu bu ohi nhne búo chi.

⁹ Kovu kitna, anu magwu Chiokike, mọbu Chiokike magwu anu. Ndaa kpa anu jaalhnakwnusi renwu ojo mati mati ke nwée rikne, o zá nhne be ji be neeme? Kini kpayarụ anu joburu kwno ohi be berere?

¹⁰ Kini kpayarụ anu naabita obochi zi ichne, ma enwa, ma ige nu awha?

¹¹ Ogwnu anu notu m. O jobu nu ernu m nu risi anu bu nhne etekne sa?

¹² Rumu nda m, m naariasno anu, anu nu lele me, m nu m lele anu ele búo ele Ju. O zá nhne ojo obula anu mernu m nga me znirni anu izi oma nu mbom.

¹³ Anu chenwanya o bu ehni igbugbu mernu me

daziri zni anu izi oma nu mbom.

¹⁴ O bu n'ezi nu ehni igbugbu m bunnu anu nhne ornurna, anu lednage m anya mọbu zusa m. Kovu anu kwubnanyarnu m lele nu m bu m enine izi Chiokike, lele nu m bu m Karaisi Jizosi n'iwihuru a.

¹⁵ Kini mernu ovu oso n'onu ke anu nwernu nu mbom? M jaagbanu anu akebne, o buru nu o kweru o mee, anu znernu ahnahia mkpuru anya anu lawuru chita m be.

¹⁶ M ghola nye irno anu kwnornu nu m kannu m anu ezi oka sa?

¹⁷ Kpakara ele negesi nu nhne gbasiri anu neemetu be nu mkpoma, be zá neeme a kwnornu nhne oma anu. Nhne be noopio bu ma be gweme anu hne a zi, ma anu menu be kpa be neemenu anu.

¹⁸ O buru oma o gweru mkpoma anu neeme nhne buru oma ige obula, o búo nga me nu anu zi kpọi.

¹⁹ Rumu takiri m, ele rime neeme m kwnornu be lele kpa rime neeme nyerinya notu nnwọ. M zi m nu nhne igbugbu ka tem oyiyi Karaisi ziri nu rime anu.

²⁰ O kanu m mma o buru nu me nu anu zi kitna, m znernu m amahia kpa me znernu obita onu kwunu anu oka. Kwnornu nu mkpoma naala m mini hne anu zi.

Haga nu Sera

²¹ Anu kanu m, anu ele noopio o zi nu mkpururu

iwu, anụ máa nhne iwu wam kwuru?

²² Kwnornu nụ be gbarụ a n'okwukwo nsọ, kaa nụ Eberham nwernu rụmu rukna lawuru, nnwerne ọhi mụrnu otu, nnwerne ke bụo ọhi mụrnu ke berere.

²³ Nnwọ ke nnwerne ọhi mụrnu bụ ke ọ mụrnu kpa be mụrnu ele berere. Kọvu nnwọ ke nnwerne ke bụo ọhi mụrnu bụ nnwọ Chiokike kweru mkwna a.

²⁴ Ka bụ nhne ọma atụ, ele rinya lawuru ka bụ ọgba-njọ-ẹhni lawuru. Otu bụ Haga, ke hi nụ rugwu Saina, nye rụmu a bụ ele ọhi.

²⁵ Haga nụ lele rugwu Saina ke zị nụ Arebịa, ọ nụ kwno lele ẹli Jeruselem tna, ke ya nụ kpakara rụmu a bụ ọhi nụ mkpururu iwu.

²⁶ Kọvu Jeruselem ke zị n'olu bụo ọhi, ọ bụ nne aị.

²⁷ Kwnornu nụ be gbarụ a n'okwukwo nsọ, kaa,

“Nwudna, jị nyerinya ke nwée nnwọ,

jị nye mụge nnwọ,

gweru okne nkoli siwama lulo, mkpoma sọ i n'onu,

jị nye rime nnwọ mélele,

kwnornu nụ nyerinya ke be ghasarụ jeenwe agida rụmu,

kakwo nyerinya ke nwernu nzi.”

²⁸ Kịtna, rụmu nda m, lele Aziki, anụ bụ rụmu Chiokike kweru nụ mkwna.

²⁹ N'ige wam, nnwọ wam be mụrnu lele kpa be mụrnu ele berere kpakarnụ nnwọ wam be mụrnu hite nụ rikne

Enine ẹhni. Ọ zị kọriri kparam kịtna.

³⁰ Kọvu kini bụ nhne okwukwo nsọ kwuru? “Chịhala ọhi nyerinya wam nụ nnwọ a, kwnornu nụ nnwọ nnwerne ọhi nụ nnwọ nnwerne ke bụo ọhi jéeri otu mkpe.”

³¹ Ke bụ nụ, rụmu nda m, a bụo rụmu nnwerne ọhi, kọvu a bụ rụmu nnwerne ke bụo ọhi.

5

A nwernu ẹhni aị nụ rime Karaịsi

¹ Karaịsi mernu a nwernu ẹhni aị. Kam kpayarụ, anụ gwuzosi rikne, anụ kwé anụ bụru kwno ọhi berere.

² Anụ bnote nsni, mawa Pọlu naakanụ anụ, anụ kwé be kpa anụ nka, kwnornu nụ anụ mee kparam, ọ zá mbnarna Karaịsi bnannụ anụ rịa rịa.

³ Me kwu kwno a berere, nye ọbula ke kweru be kpa a nka jaabitariri kpakara iwu.

⁴ Anụ ele noopio be nụ Chiokike ziri n'udno hite n'iwu, anụ kewahalaru ẹhni anụ hne Karaịsi zị. Anụ zima n'oru Chiokike.

⁵ Kọvu a neele anya nụ aị nụ Chiokike jaazi n'udno hite n'okwnata ovu. Ka bụ nhne a neese hite n'Enine.

⁶ Kwnornu nụ rime Karaịsi Jizọsi, ọ zá nhne zị ichne nụ ọkpa nka nụ ọkpáge nka, kọvu okwnata ovu aị ke nọornu ẹrnu n'owhnun'anya bụ nhne zị mkpa.

⁷ Anụ neemekwa nkari nụ mbom, nyele kpahieru anụ anya, kaa, anụ bnó nsni nhne ezi ọka nookwu?

8 Nhne nụ kpa híge n'aka nye wam sukwuru anụ.

9 “Nhne whụ brèdi matị neeme kpakara brèdi whụ ọwhu.”

10 M tụtwasiri m Nyenwe aị mkpọma nụ anụ jéekwe anya hie anụ, anụ mee nhne berere. Kọvu nye ọbula ke naakpakna anụ ẹhni jeeri nhne ọ kpasiri, nye ọ masiri a ọ bụru.

11 Rụmu nda m, ọ bụru nụ m zị kọriri m neezni nụ ọkpa nka zị mkpa, kịni kpayarụ be naakpakna m ẹhni? Ọ bụru nụ m zị m nookwu nụ ọkpa nka zị mkpa, izi gbasiri ọgba Karaịsi jọoburu rugwu ọkpobi ọchi.

12 Ọ jaamasị m ọ bụru nụ ele wam naakpakna anụ ẹhni jọwhoga, mee ẹhni be okiri badnụ.

13 Rụmu nda m, Chiokike sukwuru anụ bụru ele nwernu ẹhni be. Kọvu anụ kwékwadia o nwernu ẹhni anụ mee, anụ mee nhne anọ-ẹhni anụ noopio. Kọvu anụ gweru ọwhnun'anya znenu ibne anụ izi.

14 Kpakara nhne be nyernu n'iwu chikotaru risi n'otu nhne ka, “Ị jọwhnu nye agbatibi i n'anya, lele ẹhni ị.”

15 Ọ bụru nụ anụ jaazi naatagbu, nọdoka ibne anụ, anya dụ anụ ẹli ọ zị anụ gbukwo ẹhni anụ.

Anụ kwere Enine nẹechi anụ

16 Nhne me naakaa bụ ka, anụ wuru budnu n'Enine, anụ jéemezu nhne anọ-ẹhni noopio.

17 Kwnornu nụ nhne anọ-ẹhni noopio neemegidne nhne Enine Chiokike noopio. Nhne Enine Chiokike noopio neemegidne nhne anọ-ẹhni noopio. Be neemegidne ibne be, anụ gharụ o mee nhne anụ noopio.

18 Kọvu, ọ bụru nụ Enine noodu anụ, anụ zá nụ mkpururu iwu.

19 Ẹrnu ke anọ-ẹhni whụyaru iwihne, ke bụ, ome ọyi, ọgba ikoro, nhne zịla richna,

20 ọkwa rẹnwu nụ amusu, irno, ọlu ọgwnu, ọkpa ichne ichne, okwno-awụwa, ọnuma, aka-nchni, ọbna otu,

21 ọwho-anya, okne manya, okne otne eri, nụ nhne nụ kpa. Ka bụ nhne me nọdọ anụ aka nụ nsni kịtna, lele kpa me dọru anụ nụ mbom, kaa nụ ele neeme nhne nụ kpa, jéekheja igwe n'ẹli-eze Chiokike.

22 Kọvu mkpuru ke Enine neegweya bụ ọwhnun'anya, snarnima, udno, ndidi, ovu ọma, ọburu ọma, okwesi ọkwnata mkpọma,

23 ọzi wọhnerne, badnụ nwukwaru ẹhni a, ọ zá iwu ke megidnerneru nhne nụ kpa.

24 Ele ke Karaịsi Jizọsi bụ ele gweru anọ-ẹhni be nụ nhne nọogwnu be kpogidne n'olu ọgba.

25 Ọ bụru nụ a zị budnu nụ rime Enine, ngwa ma a zne izne nụ rime Enine.

26 Ngwa ma a gharụ oknomokno, gharụ naakpasu ibne aị ovu owe ẹhni, gharụ enwe ọwho-anya hne ibne aị zị.

6

A vurita ivu ibne aị

1 Rumu nda m, ọ bụru nụ badnụ ọbula mee mmehie, anụ ele gwuzosiri rikne nụ rime enine gweru wọhnerne znikwata a nkari. Anya dụ masị anụ ẹli, ọ zị anụ dnabna n'ornurna.

2 Anụ vurita ivu ibne anụ. Ọ bụru nụ anụ neeme kparam, anụ jeemezu iwu Karaịsi.

3 Ọ bụru nụ badnụ ọbula neeche nụ ọ bụ nhne nga ọ zá nhne ọ bụ, o nooduwhu ẹhni a.

4 Nye ọbula tule ẹrnu a, ige wam, o jeenwe rikne mee oknomokno n'ẹrnu a. Ọ zá nye ji ẹrnu a tụ n'ẹrnu nye berere,

5 kwnornu nụ nye ọbula jọrnu ẹrnu zịnu a.

6 Nye ọbula be znirni izi ọma ke Karaịsi whnụ nụ ya nụ nye znirni a nhne kehjaru nhne bụru ọma.

7 Anụ dúwhu ẹhni anụ. Kwnornu nụ ọ zá nye jọokpoli Chiokike mgbaị. Mkpuru ọbula badnụ kpasiri bụ nhne ọ jọoghoru.

8 Nye ọbula ke kparụ mkpuru n'anọ-ẹhni a, jeehite n'anọ-ẹhni a ghoru ẹnwu, kovu nye kparụ mkpuru n'Enine, jeehi n'Enine a ghoru budson kwó okwo lele mkpuru.

9 Anụ kwéko rikne gwu anụ n'ome nhne bụru ọma, kwnornu nụ ige vawa nga a jọoghoru mkpuru, ọ bụru nụ rikne gwúge aị.

10 Kam kpararu, lele kpa a nwernu oghere, a ziri neemenu kpakara ele badnụ

nhne bụru ọma, ke kakwo, ele zị n'ezi-nụ-oro ke okwnata mkpoma.

Ọdo aka nụ nsni ipne-aznụ

11 Kịtna, m ji m aka m naagba okwukwo izi. Le kpa mkpuru okwukwo me naagba hna ezi.

12 Ele neeme oknomokno n'anọ-ẹhni bụ ele naakaa be kpa anụ nka. Ka bụ ma be gharu ọ kpakna be ẹhni kwnornu ẹnwu n'ogba Karaịsi.

13 Ọ bụbedi be ele be kparu nka zá naabita iwu. Be noopio be kpa anụ nka ma be mee oknomokno nụ nhne zị n'anọ-ẹhni anụ.

14 Chiokike kwéko me mee oknomokno hne ọ búo n'ogba Nyenwe aị Jizosi Karaịsi, nye be kwnornu ẹhni a kpogidne ọwa n'ogba hne me zị, kpogidne masị m n'ogba hne ọwa zị.

15 Kwnornu nụ okpa nka nụ okpáge nka búo nhne. Nhne bụ nhne bụ budson ikne.

16 Udno nụ obirizi zinu kpakara ele noosno iwu ka nụ budson be, be nụ kpakara ele bụ Izireli ke Chiokike.

17 Hite kịtna zne ruwhnu, ọ zá nye kpakna m ẹhni berere, kwnornu nụ m vu m n'ẹhni m ẹnya ke neegesi nụ m bụ m nye izi Jizosi.

18 Rumu nda m, oru ke Nyenwe aị Jizosi Karaịsi dazinu enine anụ. Amim.

**Ọkwukwo izi Pọlu
gbaznenu
Ele Efesọsi
Nhne gbasiri
ọkwukwo izi ka**

Nu Ọkwukwo izi Pọlu gbaznenu ele Efesọsi, o naakanu ọgbako Chiokike nhne gbasiri olile anya be nwernu. Risi ikwu-ọnu Pọlu bu nu Karaịsi nwurnu ẹnwu n'olu ọgba ma o znohia ai hite nu mmehie. Kọvu nu Chiokike mernu o hi n'ẹnwu lizo, o daziri eli n'akarikwnunga Chiokike n'oligwe, hne o zi neechi ọwa. O jeechi masi ọwa ke vazne nu ruwhnu.

Karaịsi mernu ele Ju nu ele buo ele Ju buru otu, kwnornu nu o kwnadnarnu mkpo irno ke kewaru be (2:14). Ka neegesi nu Chiokike jeehite n'Enine a mee mkpoma ele Karaịsi buru otu, mee be ziri n'udno n'esilawuru be, (4:3), ma ele Karaịsi buru otu. Ka bu nhne zi mkpa n'okwukwo izi, ka mernu Pọlu gbaru a k'agida neegesi nu o buru oma ma ele Karaịsi ziri n'otu. A nwernu otu Nyenwe ai, okwnata mkpoma ai bu otu, owuwu mini ai bu otu, ke neeme ele Karaịsi gho otu ano-ehni.

Nhne zi n'okwukwo izi ka

Obekwu ikwu (1:1-2)

Karaịsi nu ọgbako a (1:3--3:21)

Budnu ikne hite nu Karaịsi (4:1--6:20)

Ibekwu ipne-aznu (6:21-24)

Obekwu ikwu

¹ Mawa, Pọlu, nye izi Karaịsi Jizọsi hite n'echiche Chiokike, naagbaznenu ele Chiokike ke zi n'Efesọsi okwukwo, ele kw-nagwu mkpoma nu Karaịsi Jizọsi.

² Oru nu udno ke hi n'aka Chiokike Nda ai nu Nyenwe ai Jizọsi Karaịsi dazinu anu.

Ngozi ke enine

³ A notunu Chiokike nu Nda Nyenwe ai Jizọsi Karaịsi mmamma, nye jiri kpakara ngozi ke oligwe kesi ai n'enine nu rime Karaịsi.

⁴ Chiokike beru osno horukwo ai ma a buru ele ke a kwnornu Karaịsi, su o kpuru ọwa, ma a buru ele zi nsọ, ele nwée oru nu ruwhnu a kwnornu owhnun'anya a.

⁵ O beru osno horu ai, o kwubnanya ai lele rumu a hite nu Jizọsi Karaịsi lele kpa o jiri masi a.

⁶ Ngwa ma a ja Chiokike kwnornu agida oru a ke o nyernu ai etekne hite nu Nnwọ a o whnurnu n'anya.

⁷ Chiokike gbaharu ai hite n'ovnarna Karaịsi wusiri, nu o gbaru mmehie ai kwnornu n'oru a zi agida,

⁸ bu ke o nyernu ai n'okwnamarna, ya nu akoniche nu oghohia a.

⁹ Chiokike mernu a mahia nhne miri emi ke echiche a lele kpa o jiri masi a hite nu Karaịsi. O marnu mmuma

¹⁰ o mezu echiche a ka nga ige a duru. Ka bu ma

o gwebnanya kpakara nhne zì n'oligwe n'owa n'otu nù mkpururu risi Karaisi.

¹¹ Chiokike hōrukwo aì ma a b̄uru ele ke a nù rime Karaisi, hne o beru ōsno kpebi kpakara nhne lele kpa echiche a jiri zì.

¹² Chiokike mernu ka ma a znarnì a kwnornu igwugwu a. A b̄u ele mb̄om neele anya Karaisi.

¹³ Anù b̄u masì ele Karaisi nga anù n̄urnu ezi ōka wam, ke b̄u izi ōma ke ōznohia anù. Anù kweru nhne anù n̄urnu, Chiokike h̄n̄iasiri anù iri Enine Nso nù anù b̄u ke a lele kpa o kweru mkwna.

¹⁴ Enine Nso wam zì nù rime aì, a maam nù Chiokike jeenyeriri aì kpakara nhne b̄uru ōma nga Chiokike jaag-bah̄iakwo ele ke a. N'ige wam, a jaaznarnì Chiokike kwnornu igwugwu a.

Okpukpe Polu

¹⁵ Kam kpayarù, nga me n̄urnu nhne gbasìri ōkwnata mkp̄oma anù nù Nyenwe aì Jiz̄osi, ya nù ōwhn̄un'anya anù nwernu hne r̄umu Chiokike zì,

¹⁶ m gwépūgam aka nù ō t̄unu Chiokike mmamma nù risi anù. M zì m neekpenu anù okpukpe kpakara ige.

¹⁷ M naarīasno Chiokike ke Nyenwe aì Jiz̄osi Karaisi, Nda ke igwugwu, o mee anù nweh̄ia enine ak̄oniche, kpumenu anù ēhni a ma anù mah̄ia a nkarī nkarī.

¹⁸ M n̄orio masì ma Chiokike kpume anya ke ovu anù, ma anù gh̄oh̄ia olile anya

o nyernu ele o sukwuru, nù ēkwnu ngozi zì igwugwu o kweru ele ke a nù mkwna.

¹⁹ M n̄orio masì ma anù mah̄ia iknernema a ke nwéé atù b̄u ke o nyernu aì ele kweru nù Karaisi. O b̄u okne iknernema ka

²⁰ ke Chiokike jiri mee Karaisi hi n'ēnwu liz̄o, mee ō daz̄iri ēli n'akarikwnunga Chiokike n'oligwe,

²¹ hne kakwo kpakara ōchichi nù rikne nù ikn-ernema nù ele nwe. Rēwhna a kakwo kpakara nhne ke nwernu rēwhna, ō b̄uo n'ige ka kpoì, k̄ovu n'ige ke jaava.

²² Chiokike b̄itaru kpakara nhne nù mkpururu ōchi Karaisi, mee a ō b̄uru risi kpakara nhne ma ōgbako Chiokike naah̄ia ngozi.

²³ Ōgbako Chiokike b̄u ēhni Karaisi, Karaisi jih̄iaru n'ogbako Chiokike. Karaisi b̄u nye mezuru kpakara nhne n'apna ōbula.

2

Hite n'ēnwu bna nù b̄udnu

¹ Nù mb̄om, anù nù lele ele nw̄urnu ōnwu, ele be kewamarnù hne Chiokike zì kwnornu nù anù bn̄óne ns̄nì, mee nhne ojo.

² N'ige wam anù wuru b̄udnu ojo lele ele zì n'owa. Anù snornu badnù ojo wam ke n̄echi kpakara r̄enwu ojo n'owa. Setani b̄u r̄enwu ojo wam ke n̄oornu ērnu nù mkp̄oma ele zá noobnonu Chiokike ns̄nì k̄itna.

³ Kpakara aì wuru b̄udnu n'esilaw̄uru be n'ige wheru

ewhe lele kpa nhne nḡogwnu anḡ-ḡhni aḡ. A snornu ele berere mezu nhne echiche ḡḡo aḡ pioru, kam kpayarḡ, a buru ele ke ovu owe ḡhni Chiokike dnakwasḡri.

⁴ Kḡvu Chiokike bu nye obirizi k'agḡda. Ḗwhnun'anya a zḡ agḡda hne a zḡ.

⁵ Ḗ bu n'ezi nu a bu ele nwḡrnu ḡnwu nu rime mmehie, kḡvu Chiokike mernu aḡ nu Karaḡsi zḡri buḡnu nga o mernu Karaḡsi hi n'ḡnwu lizo. Chiokike znḡhiaru anḡ kwnornu nu oru a.

⁶ Chiokike mernu a snornu Karaḡsi hi n'ḡnwu lizo. O mee aḡ nu Karaḡsi Jizḡsi dazḡri ḡli nu hne kakwo n'oligwe.

⁷ Chiokike mernu ka ma kpakara ele badnu mahḡa n'ḡge vazne nu ruwhnu ḡkwnu ke oru a ke nwḡe atḡ ke o jiri ovu ḡma a gesi aḡ nu rime Karaḡsi Jizḡsi.

⁸ Kwnornu nu Chiokike jiri oru a znḡhia anḡ hite n'ḡkwnata mkpḡma nu Karaḡsi. Ḗ buḡo kwnornu nhne ḡbula ke anḡ mernu. Ḗznḡhia anḡ bu nkesi hi n'aka Chiokike.

⁹ Ḗ buḡo ḡrnu ḡma ḡbula anḡ rnḡrnu, ḡ zá nye ji a mee oknomokno.

¹⁰ A bu ḡrnu aka Chiokike. Ḗ kpḡru aḡ ma aḡ nu Karaḡsi Jizḡsi zḡri n'otu rnḡ ḡrnu ḡma Chiokike beru ḡsno kwabḡtanu aḡ.

A bu otu nu Karaḡsi

¹¹ Anḡ chenwanya nu mbḡm anḡ ele buḡo ele Ju hite nu ḡmumu anḡ. Anḡ bu ele ke ele Ju be kparḡ nka neeledna anya, nookwu anḡ ele be

kpḡge nka. Ḗkpa nka bu ke be jiri aka kpa n'anḡ-ḡhni.

¹² N'ḡge wam, be kewamarnḡ anḡ hne Karaḡsi zḡ, anḡ buḡo ele Izireḡli, ke kpayarḡ, anḡ nwḡe ḡgwe nu mkwna Chiokike kweru ḡ znḡhia Izireḡli. Anḡ wuru buḡnu n'ḡwa ka lele ele nwḡe olile anya, anḡ mḡa Chiokike nu mbḡm.

¹³ Anḡ bu ele be kewamarnḡ hne Chiokike zḡ nu mbḡm, kḡvu kḡtna, Chiokike mernu anḡ nu Karaḡsi zḡri n'otu, mee masḡ anḡ va nu ruwhnu a hite n'ḡvnarna Karaḡsi wḡsiri kwnornu anḡ.

¹⁴ Karaḡsi mernu udno zḡri n'esilawḡru ele Ju nu ele buḡo ele Ju nga o mernu ele Ju nu ele buḡo ele Ju otu badnu. O mernu ka nga o jiri anḡ-ḡhni a kwnadna mkpḡ irno ke kewamarnḡ ele Ju nu ele buḡo ele Ju.

¹⁵ Karaḡsi luluru iwu ele Ju hite n'ḡnwu a ma o gweru ele Ju nu ele buḡo Ju ele kweru mee otu badnu ikne, mee ma udno zḡri n'esilawḡru be.

¹⁶ Karaḡsi mernu ele Ju nu ele buḡo ele Ju nu Chiokike zḡri n'udno hite n'ḡnwu ḡ nwḡrnu n'olu ḡgba, mee be buru otu badnu. Ka gwemernu irno n'esilawḡru ele Ju nu ele buḡo ele Ju.

¹⁷ Karaḡsi varḡ zni anḡ izi ḡma udno, anḡ ele buḡo ele Ju nu aḡ ele Ju masḡ.

¹⁸ Hite nu Karaḡsi, kpakara aḡ nwernu oghere o znekwnusi Chiokike Nda aḡ hite n'otu Enine.

¹⁹ Kam kpayarḡ, anḡ ele

būo ele Ju būma ele izne, kovu anụ ghọlam rụmu Chiokike nụ ele ezi-nụ-oro Chiokike.

²⁰ O wukwasiri anụ lele oro n'olu ntụ-eli ele izi nụ ele ọwhnurninya, hne Karaịsi Jizōsi n'iwhuru a bụ risi nsukala oro.

²¹ Ya bụ ngalaba jigwu oro n'otu, oro wam noosopiya bụru Oro Nso be bitaru nso nyee Nyenwe aị.

²² Be wukotarụ anụ n'otu nụ rime Karaịsi, ma anụ bụru Oro Nso hne Enine Chiokike wu.

3

*Pọlu nye ernalu
ele būo ele Ju*

¹ Kam kpayarụ, mawa Pọlu, m bụ m nye ikelu kwnornu Karaịsi Jizōsi nụ kwnornu risi anụ ele būo ele Ju neekpenu Chiokike.

² N'ezi, anụ nurnu nhne gbasiri kpa Chiokike nyernu m ernalu o mee anụ ele būo ele Ju mahia oru a.

³ Chiokike mernu m mahia nhne miri emi ke badnu maanụ mbom, lele kpa me gbaru a n'okwukwo matị nụ mbom.

⁴ Nga anụ gwnurnu ka anụ jowhnu nụ Chiokike mernu m ghohia nhne miri emi gbasiri Karaịsi.

⁵ N'ige wheru ewhe, Chiokike kpumene ele badnu nhne ka, kovu kitna Enine Chiokike kpumennu a ele izi nụ ele ọwhnurninya ele o hohiaru.

⁶ Nhne miri emi wam bụ anụ ele būo ele Ju ele kweru nụ ele Ju ele kweru ghoru otu anọ-ehni. Anụ joosno masi

ele Ju kehia nhne Chiokike kweru be nụ mkwna hite nụ Karaịsi Jizōsi kwnornu nụ izi oma.

⁷ Chiokike nyernu m ernalu ke o zni izi oma ka kwnornu ovu oma a. O mernu ka hite nụ rikne a nornu ernalu nū rime m.

⁸ O bụ n'ezi nụ m kwesile m, kovu Chiokike nyernu m oru a n'esilawuru ele ke a, o zni anụ ele būo ele Ju izi oma ke okne nhne gbasiri Karaịsi ke ele badnu nwée rikne ghohiali.

⁹ O nyee kwono m ernalu o mee kpa ele badnu jaamahia kpa o jeeme nhne miri emi ka. Chiokike nye keru kpakara nhne kpusnirni nhne miri emi ka n'anya ele badnu agida ige wheru ewhe.

¹⁰ Echiche a bụ ma kpakara rikne ke nęechi echi n'oligwe mahia akoniche Chiokike ke hna ezi hite n'ogbako a.

¹¹ Ka bụ nhne Chiokike vū nū mkpoma sū o kpuru owa. Kitna, o mezuru a hite nū Karaịsi Jizōsi Nyenwe aị.

¹² Aị nū Karaịsi bū otu, a kweru nū ya, kam kpayarū, a nweru mkpoma siri rikne o zne nū ruwhnu Chiokike, enwe ogwnu.

¹³ M naariasno anụ, anụ bikno kwé rikne gwu anụ kwnornu awhnwhnu me naatanu anụ, ke jeegweyanu anụ igwugwu.

Karaịsi whnurnu aị n'anya

¹⁴ Kam kpayarū, me gwu mpnerne ochi kpenu Chiokike Nda,

15 nye jiri kpakara ezi-nu-oro ke zi n'oligwe nu owa rewhna be.

16 M nɔorio Chiokike ma o hite n'ekwnu ke ngozi a, nyee anu iknernema hite n'Enine a ma mkpoma anu si rikne,

17 ma Karaɔsi hite n'okwnata ovu wuru nu rime mkpoma anu, ma anu gba egwnugwnu, gwuzoru chim chim n'owhnun'anya a.

18 M nɔorio masi ma anu nu kpakara ele Chiokike mahia owhnun'anya Karaɔsi nwernu hne a zi, kpa o hna nu rude, nu ogologo a, nu kpa o hna n'olu, nu omimi a,

19 ma anu mahia owhnun'anya ka ke kakwo nhne badnu etekne nwernu rikne ghohiali. M nɔorio ma Chiokike mejihia anu nu kpakara nhne Chiokike bu.

20 A ja Chiokike, nye nwernu rikne o mee kakwo kpa a nwernu rikne ri o mɔbu ri hite nu iknernema a ke nɔornu ɛnu nu rime ai.

21 Ngwa ma ai ogbako Chiokike ele o mernu ai nu Karaɔsi Jizosi buru otu, ja Chiokike hite n'otu ebiri du n'ebiri berere, owa kwnurnu owa. Amim.

4

A bu otu nu rime Karaɔsi

1 Mawa, nye ikelu kwnornu Nyenwe ai, naariasno anu, anu wu budnu kwesiri ikwu Chiokike sukwuru anu.

2 Nhne obula anu neeme, anu gweru ovu hieru eli nu ozi wohnernerne nu ndidi naabnanya ibne anu

kwnornu anu whnurnu ehni anu n'anya.

3 Anu gbalɔ o bita ozi n'otu ke Enine hite noowu n'udno n'esilawuru anu.

4 Ele Chiokike bu otu ano-ehni, a nahiaru otu Enine, lele kpa Chiokike sukwuru anu n'otu olile anya.

5 A nwernu otu Nyenwe ai, okwnata mkpoma ai bu otu, owuwu mini ai bu otu.

6 A neekpenu otu Chiokike bu Nda kpakara badnu, nye nechi kpakara badnu, o nɔornu ɛnu hite nu kpakara badnu, nye zi nu rime kpakara badnu.

7 Karaɔsi nyernu nye obula nu rime ai rikne o rnu ɛnu lele kpa o kpebiri a.

8 Lele kpa be gbaru a n'okwukwo nsɔ,

“Nga o laru olu,

o doru agida ele irno a n'ohi, be snornu a n'aznu,

o nyee ele badnu nkesi.”

9 Kini bu n'okwukwo nsɔ kwuru nu o laru n'olu? O bu nu Karaɔsi beru osno hiedna n'owa ka.

10 Nye wam hiednarnu n'owa bu masi nye laru hne kakwo n'olu n'oligwe, ma o jihia kpakara nhne.

11 Karaɔsi bu nye wam, nye nyernu ele badnu rikne o rnu ɛnu, mernu agwna badnu ele izi, ele berere ele owhnurninya, ele berere ele naagaghari nɔokpo okwo izi oma, ele berere ele nɔoznu atnurnu nu ele neezni nhne.

12 O mernu ka ma o jiknurnu ele Chiokike ma be rnu nu

a ɛrnu, ma ogbako Chiokike nooso, gwuzosi rikne,

13 tem a du n'ozu n'otu ke okwnata ovu, nu o mahia Nnwọ Chiokike, ma a buru ele sozuru nu badnu, ele duru nu nhne otutu ke zuru ozu nu rime Karaishi.

14 Ige wam a jobuma rumu takiri. Ele aghigho nu ele nooduwu ele badnu jeeqweru iznizni aghalaghala obula ruwhere noovughari duwu ai, lele kpa abakamini nu ruwhere noovughari ogbo n'olu mini.

15 Tnnuma, a gweru owhnun'anya nookwu ezi oka, ma a nooso lele Karaishi Nyenwe ai nu nhne obula.

16 Karaishi neekneqota ele ke a n'otu, lele kpa ruknani jikotaru kpakara nhne zi n'ehni badnu n'otu. O buru nhne obula zi n'ehni noornu ɛrnu a, kpakara ehni joburu nhne gwuzosiri rikne n'owhnun'anya.

Budnu ikne nu rime Karaishi

17 Kam kpayaru, m ji m rewhna Nyenwe ai noodo anu aka nu nsni, anu wuma budnu lele ele ma Chiokike, hite n'ori oriri ke nwée mbnarna.

18 Ele ka nwée rikne o ghohia nhne gbasiri Chiokike. Be kewamarnu be hne Chiokike zi kwnornu nu be ma Chiokike, be bu ele risi rikne.

19 Iwhnerne o mee nhne buo oma tu be. Be bu ele neeme nhne ojo ke gwnurnu be, ma be neeme nhne so ize

n'anya lele kpa o noogwnusi be rikne.

20 Kovu ki buo nhne anu muhiaru gbasiri Karaishi.

21 N'ezi, anu nurnu nhne gbasiri a, be znirni anu ezi oka zi nu Jizosi.

22 Be znirni anu sigbasi budnu oknani wam anu noowu. Badnu oknani wam neeji kpakara nhne noogwnu anu nooduwu anu, noolulu masi budnu anu.

23 Kitna, anu gharu Chiokike ma o gbanwo echiche anu.

24 Anu wuru budnu ikne ke Chiokike nyernu anu, ma anu buru ele ke Chiokike, ele mee mma, ele zi masi nsọ n'ezi.

25 Kam kpayaru, anu ghama aghalaghala, nye obula kwunu ibne a ezi oka, kwnornu nu a nu lele nhne zi n'otu ehni.

26 O buru nu ovu we anu ehni, anu meko mmehie, anu kweko ovu owe ehni anu daziri tem ehnam dna.

27 Anu nyeko Ekwensu oghere nu budnu anu o rnawhu anu.

28 Nye buznu znuma buznu, o gweru aka a rnu ɛrnu kwe-siri ma o yinu ele zi nu mkpa aka.

29 Anu kwe oka buo oma hi n'onu anu whuya, kovu anu kwu oka buru oma ke jeeme badnu gwuzosi rikne n'okwnata mkpoma a. Ige obula, anu kwu nhne buru oma nu nsni ele badnu ma be wulizo be olu lele oro.

30 Anu mee Enine Nso Chiokike ovu owe ehni, bu ke Chiokike jiri hiasi anu iri nu

anụ bụ ke a tem dị n'ige anụ
jeenwernukwo ẹhni anụ.

³¹ Anụ gweme kpakara
mkpoma nlulu, nụ ọnuma, nụ
ovu owe ẹhni, ya nụ ọlu ọgwunu
nụ ọkaja nụ irno mkpoma.

³² Kọvu anụ nwe ovu ọma,
whnụ ibne anụ n'anya,
naagbarunu ibne anụ lele
kpa Chiokike gbarunu anụ
kwnornu Karaịsi.

5

¹ Lele rụmu Chiokike
whnurnu n'anya, anụ wu
bụdnu lele Chiokike.

² Anụ wuru bụdnu
ọwhnun'anya, lele kpa Karaịsi
whnurnu aị n'anya, gweru
bụdnu a kwanụ Chiokike
arịohna ke nwernu ẹknarna
ọma kwnornu aị.

³ Anụ kwé be whnụ
ewhere, mọbu nhne zịla
rịchna, mọbu anya-kwu
n'esilawuru anụ. Nhne ele ka
kwésile ele Chiokike zị nsọ.

⁴ Anụ kwú ọka tị iwchnerne,
mọbu ọka iwchnirniwhno,
mọbu ọka bnána nụ nhne, ke
kwésile, tñunuma, anụ tñunu
Chiokike mmamma.

⁵ Kwnornu nụ anụ magwụ
nụ ọ zá nye naagba ewhere,
mọbu nye zịla rịchna, mọbu
nye anya-kwu, ke nụ lele
ọkwa rẹnwu, nwernu igwe nụ
nhne ọma ke ẹli-eze Karaịsi nụ
Chiokike.

⁶ Anụ kwéko badnụ ọbula
gweru ọka etekne rnawhu
anụ. Chiokike jaata ele zá
noobnonu a nsni awhnụwhnu
kwnornu nụ nhne nụ kpa.

⁷ Kam kpayarụ, anụ nụ ele
nụ kpa méko nhne.

⁸ Anụ zị n'ọchichiri nụ
mbom, kọvu kịtna anụ bnarnụ
n'iwhne Nyenwe aị, anụ wu
bụdnu kwesiri ele zị n'iwhne.

⁹ Ele zị n'iwhne naami
mkpuru ọma ke ovu ọma, ome
mma nụ ezi ọka.

¹⁰ Anụ piohia, neeme masị
nhne jaakpasu Nyenwe aị
ovu ọso n'ọnu.

¹¹ Anụ snó ẹrnu ọchichiri
ke nwernu mkpuru bnáge nụ
nhne keko nhne, kọvu anụ
bigbo be, ma nhne ojo be
mernu whụya iwhe.

¹² Kwnornu nụ ọ nọtu
iwchnerne o kwu nhne ele
zá noobnonu Chiokike nsni
neeme nụ mgwugwa.

¹³ Kọvu iwhe jeeme
kpakara nhne whụya iwhe.

¹⁴ Kwnornu nhne ọbula
ke iwhe kpumernu buma
nhne zị nụ mgwugwa. Kam
kpayarụ, be karụ,

“Tnanya, jị nye neezni an-
yarna,

jị nye nụ lele nye nwurnu
onwu, lizo,
Karaịsi joomukwasi i
iwhe a.”

¹⁵ Anya dị anụ ẹli kpa
anụ noowu bụdnu anụ. Anụ
wú bụdnu lele ele iwchnirni-
whno, kọvu lele ele nwernu
akoniche.

¹⁶ Anụ gweru oghere ọbula
anụ nwernu rnụ ẹrnu ọma,
kwnornu nụ ele badnụ
nọornu ẹrnu ojo k'agida n'ige
ka.

¹⁷ Anụ bụo ele iwchnirni-
whno, tñunuma, anụ yisi ẹhni
piohia, neeme masị nhne
Nyenwe aị pioru.

¹⁸ Anụ nwó manya ke
naabna n'anya, ke joolulu

budnu anu. Tnūnuma, anu gharu Enine Chiokike ma o mejihia ovu anu.

¹⁹ Anu gweru eri oma, eri oznarni nu eri mkpoma oso n'onu kanu ibne anu oka, gweru kpakara mkpoma anu gwnunu Nyenwe aji eri,

²⁰ nootunu Chiokike bu Nda mmamma ige obula kwnornu kpakara nhne nu rewhna Nyenwe aji Jizosi Karaishi.

²¹ Ele Chiokike bita ehni be nu mkpururu ibne anu kwnornu nu anu nosobisinu Nyenwe aji Karaishi.

Nzi nu nnwerne

²² Ele bu nnwerne anu bita ehni anu nu mkpururu nzi anu lele nu anu bitaru ehni anu nu mkpururu Nyenwe aji.

²³ Kwnornu nu nzi bu risi nnwerne lele kpa Karaishi bu risi ogbako Chiokike. Ogbako Chiokike nu lele anu-ehni Karaishi. Karaishi bu Nye Oznohia ogbako a.

²⁴ Lele kpa ogbako Chiokike zi nu mkpururu Karaishi, kpam masi, nnwerne obula bita ehni a nu mkpururu nzi a nu kpakara nhne.

²⁵ Ele bu nzi, anu whnu nnwerne anu n'anya lele kpa Karaishi whnu nu ogbako a n'anya nwu kwnornu a,

²⁶ ma o mee a o ziri nsu, o gweruru ikwu-onu Chiokike nu mini snu a, mee a, o ziri richna.

²⁷ Karaishi mernu ka ma o chetenu ogbako wam n'ehni a, lele nhne zi igwugwu, nwée rune, mōbu ruwhnu doliri odili, mōbu nhne ojo berere,

tnūnuma, ogbako ke zi nsu, ke nwée otna.

²⁸ Kpam masi, nzi kwesiri o whnu nnwerne a n'anya lele kpa o whnu nu ehni a. Nye obula ke whnu nu nnwerne a n'anya whnu nu ehni a n'anya.

²⁹ O za badnu obula ke snornu ehni a irno, kovu o nooznu, neelekwa ehni a anya nkari. O bu masi kpa Karaishi neelekwa ogbako Chiokike,

³⁰ a bu nhne zi n'ehni Karaishi.

³¹ Kam kpayaru, nyerukna jaagharu nda a nu nne a, takwnusi n'ehni nnwerne a, be lawuru ghō otu badnu.

³² Ka bu nhne miri emi k'agida, kovu m nookwu gbasiri Karaishi nu ogbako Chiokike.

³³ Nyerukna obula n'esilawuru anu, whnu nu o whnu nu nnwerne a n'anya lele kpa o whnu nu ehni a, nnwerne masi, whnu nu o noso nzi a anya.

6

Rumu takiri nu ele muru be

¹ Rumu takiri, anu noobnonu ele muru anu nsu lele kpa Nyenwe aji pioru, kwnornu nu o buru oma o mee kpam.

² Lele kpa be gbaru a n'okwukwo nsu, "Sobisinu nda i nu nne i." Ke bu nhne mbom ke Chiokike nyernu n'iwu ke wneru mkwna.

³ I mee kpam, nhne jaagakwanu i nkari, ma i ziri budnu ogologo n'owa.

⁴ Ele bu nda, anu mee nhne jaakpasu rumu anu oву owe ehi. Tnnuma, anu gweru ikwu-onu Chiokike noznu, neezni be.

Ele ohi nu ele nwe be

⁵ Ele ohi, anu noobnonu ele nwe anu nsni, anu so be anya, notu ogwnu be. Anu gweru mkpoma anu neeme a lele anu neemenu a Karaisi.

⁶ Anu bnonu be nsni, o buo ke anya noowhnu kpoi lele ele neeme nhne naamas badnu, kovu noobnonu be nsni lele ele ohi Karaisi, ele neeme nhne Chiokike piuru hite nu mkpoma anu.

⁷ Anu gweru oву oma noornu ernu lele nu anu bu ohi Nyenwe ai, buo ke badnu.

⁸ Kwnornu nu anu magwu nu Nyenwe ai jookwu nye obula ogwo ernu oma a, ma ohi mabu nye buo ohi.

⁹ Kpam masi, anu ele nwe ohi, anu mee masi ele ohi anu kpam. Anu kpas be ogwnu, hne anu mahjaru nu Nyenwe anu nu be zi n'oligwe. O za neele badnu anya nu ruwhnu.

Mgwna ogwnu Chiokike

¹⁰ Ka bu oka ipne-aznu m, anu gbas rikne nu Nyenwe ai nu okne iknernema ke a.

¹¹ Anu woru kpakara mgwna ogwnu Chiokike nyernu anu, ma anu nwernu rikne o gwuzogidne kpakara nhne ke Ekwensu neeziya.

¹² Kwnornu nu a za noolu ogwnu megidne ele badnu etekne. Kovu a noolu ogwnu megidne kpakara ele ochichi,

megidne kpakara rikne, megidne kpakara ele nwe owa ke ochichiri ka, megidne ele renwu ojo ke zi n'olu.

¹³ Kam kpayaru, anu woru kpakara mgwna ogwnu Chiokike nyernu anu ma anu nwernu rikne o gwuzo n'obochi ojo, nga anu mezuru kpakara nhne, o gwuzoru chim chim.

¹⁴ Anu jiknernu o lu ogwnu, anu suru ezi oka n'ikwnu anu ke nu lele ajni. Anu woru ome mma ke nu lele mbno nu mkpoma anu.

¹⁵ Anu gweru masi ojikn-ernu o kpo okwo izi oma ke udno woru n'ochi lele okoro-ochi.

¹⁶ Tukwasi n'olu ka, anu gweru okwnata mkpoma nu Chiokike ke nu lele ekpeke anu jeeji mesni kpakara mkpakwu bekwnu ke Ekwensu naagba megidne anu.

¹⁷ Anu kpuru oznohia nu risi anu ke nu lele okpu-ogwnu. Anu gweru ama-ogwnu ke Enine neenye, ama-ogwnu wam bu ikwu-onu Chiokike.

¹⁸ Anu neekpe okpukpe lele kpa Enine noodu anu ige obula n'onodi obula. Anu neese nse kpa anu neekpe okpukpe, anu gwuzosi rikne kpa anu neekpenu kpakara ele Chiokike okpukpe.

¹⁹ Anu neekpenu m okpukpe masi ma Chiokike nyee m ikwu-onu ke me kwesiri o kwu ige obula me kpumernu onu m, ma m gweru onu rikne mee ele badnu mahja nhne miri emi ke izi oma,

²⁰ ke me bu nye izi a n'oro ikelu. Anu kpenu m okpukpe ma m kpọ m okwo izi ọma ẹnwe ogwnu lele kpa me kwe-siri.

Obekwu ikwu ipne-aznu

²¹ Taijikosi bu nnwo nda ai a whnurnu n'anya nye be kwesiri o kwnata mkpoma n'ernu Nyenwe ai jaakanu anu kpakara nhne gbasiri m, ma anu mahia kpa me nu, nu nhne me neeme.

²² Ka bu nhne me kwno neeziyanu anu ya, ma anu mahia kpa a nu, ma o kasi anu mkpoma.

²³ Udno ke Chiokike Nda ai nu Nyenwe ai Jizosi Karaisi dazinu ele kweru nu Karaisi, o mee anu whnu ibne anu n'anya kpa anu naakwnata mkpoma nu Karaisi.

²⁴ Oru ke Chiokike dazinu kpakara ele whnurnu Nyenwe ai Jizosi Karaisi n'anya n'ezi.

**Okwukwo izi Pọlu
gbaznenu
Ele Filipai
Nhne gbasiri
okwukwo izi ka**

Pọlu gbarụ okwukwo izi ka nga ọ zị n'ikelu nọtunu ogbako Chiokike ke zị nụ Filipai mmamma kwnornu nkesi nụ okpukpe be. Ogbako Chiokike ke zị nụ Filipai bụ ogbako mbom Pọlu miteru n'eli ele Iropu. O kannu ele Karaisi zị nụ Filipai nụ be kwesiri ọ ta awnụwhnu lele kpa Karaisi taru, nụ kpa Pọlu naata awnụwhnu ige wam. O buru kpm, ele Filipai gweru a lele ngozi be naharu hite n'okwnata mkpoma be nwernu nụ Karaisi.

Agwna ele zị nụ Filipai nookwu nụ ele badnụ kwesiri ọ bita Iwu Mozizi, ọ bụo kpm, nụ be nwée oznohia. Pọlu kanu be neeze ele nụ lele nkita (3:2-11). Snarnima nụ ovu oso n'onu jiharu okwukwo izi ka, kwnornu nụ Pọlu muiaru kpa o gweru onodi obula ọ whnuru ehni a mee nhne buru oma. Ovu sọru a n'onu k'agida kpa o chenwanyaru ovu oma ogbako Chiokike zị nụ Filipai gesiri a. Pọlu kaa nụ ele ke Chiokike kwesiri o wu n'udno, neche echiche lele kpa Karaisi neche.

Nhne zị n'okwukwo izi ka

Obekwu ikwu nụ okpukpe (1:1-11)

Nhne budnu bunu Pọlu (1:12-30)

Nhne atu ke Karaisi (2:1-18)

Nhne gbasiri Timoti nụ Epafroditusi (2:19-30)

Ele Chiokike nabnanyaru (3:1--4:9)

Pọlu nọtnu ele Filipai mmamma (4:10-20)

Obekwu ikwu ipne-aznu (4:21-23)

1 Pọlu nụ Timoti, ele izi Jizosi Karaisi, naagbaznenu kpakara rumu Chiokike ke zị nụ Karaisi Jizosi ele wu nụ Filipai, be nụ ele neelekota be, nụ ele ernalu okwukwo.

2 Oru nụ udno ke hi n'aka Chiokike Nda aị nụ Nyenwe aị Jizosi Karaisi dazinu anu.

Okpukpe nụ otu mmamma

3 M nọtunu Chiokike mmamma ige obula me chenwanyaru anu.

4 M ji m snarnima neekpenu kpakara anu okpukpe ige obula

5 kwnornu nụ me nụ anu bu ele ernalu n'izi oma hite n'obochi mbom tem du kitna.

6 M kwnataru m ovu nụ ka, nụ nye wam ke panizoru ernalu oma nụ rime anu, jounuzu ernalu wam tem du n'obochi Karaisi Jizosi jaava.

7 O kwesiri me vuru nhne ka nụ mkpoma gbasiri anu, hne anu zị nụ ovu m, ma m zị m n'ikelu, ma m zị naagbanu izi oma akebne, mọbu naakwnagidne a, kpakara anu nekehia igwe n'oru Chiokike nyernu m.

8 Chiokike bu nye akebne m, kpa ọ nọogwnu m ọ whnu

anụ anya hite n'òwhnun'anya
Karaịsi Jizọsi.

9 Ka bụ okpukpe m, ma
òwhnun'anya anụ n'èhni ibne
anụ naaba aba, hite nhne
òmuma nụ ọghohia,

10 ma anụ nwernu rikne ọ
mahia nhne ke kakwo mma,
ma anụ ziri snam, nwée ọtna
tem dū n'òbochi Karaịsi jaava.

11 Mkpuru ke ome mma ke
hi nū Jizọsi Karaịsi va jihia
nū rime anụ, ma igwugwu nū
ọznarni bụru ke Chiokike.

*Ikelu Pọlu mernu izi ọma
gbasa*

12 Rụmu nda m, m pioru ma
anụ mahia nū nhne ọbula ke
dnakwasiri m, mernu izi ọma
gbasa.

13 Kpakara ele nse zị n'oro
eze nū kpakara ele berere
mahiaru nū m zị m n'ikelu
kwnornu Karaịsi.

14 Ikelu be tūru m mernu
ele kakwo n'esilawuru rụmu
nda aị nū Nyenwe aị nwe
ọnu rikne o kwu ikwu-ọnu
Chiokike n'ovu siri rikne, be
nwée ogwnu.

15 Ọ bụ n'ezị nū agwna be
nọkpo okwo izi ọma n'òwho-
anya nū omegidne, kọvu ele
berere nọkpo okwo izi ọma
Karaịsi kwnornu ovu ọma.

16 Ele ipne-aznū neeme
kpam n'òwhnun'anya, kwnornu
nū be magwū nū m zị m hna
kwnornu izi ọma.

17 Ele ke mbom nọkpo
okwo Karaịsi kwnornu nhne
be jeerihia nū rime a, ọ bụo
n'ezị ọka, ma be mee nhne
joogbu m igbugbu kpa me zị
n'ikelu.

18 Kini mee? Ma be kọru
okwo izi ọma n'ezị ọka mọbu
n'aghigo, nhne zị mkpa
bụ be nọkpo okwo Karaịsi.
Ka bụ risi nhne me kwno
nọonwudna.

M jaazikoriri nọonwudna.

19 M maam nū kpa anụ
neekpenu m okpukpe,
hite n'oyi aka ke Enine
Jizọsi Karaịsi, kpakara nhne
dnakwasiri m jọoburu nhne
jeeme m whuya n'ikelu.

20 Ka bụ nū olile anya m siri
rikne, nū iwhnerne jọtutu m
n'apna ọbula, kọvu m jeenwe
ovu siri rikne ma kịtna ma ige
ọbula nū be jeegwelizọ Karaịsi
olu n'èhni m, hite nū bụdnu
mọbu n'ènwu.

21 Kwnornu nū kpa me zị
bụdnu, m bụ m ke Karaịsi, me
nwū, ọ bụ mbnarna.

22 Ọ bụru me ziri bụdnu
n'anọ-èhni, ọ jọoburu ọnu ke
jaamị mkpuru. Ndaa ke me
jeegweru? M máam ke ka
mma.

23 Nhne lawuru ka zị
nọdoka m, ọ nọogwnu m me
la ma me nū Karaịsi daziri, bụ
ke kakwo mma.

24 Kọvu ọ zị mkpa me daziri
bụdnu kwnornu anụ.

25 Ka dnornu m anya, m
magwū m nū m jaadaziri, me
nū anụ jaazigidne, ma anụ so
oso, nwe snarnima n'okwnata
ovu anụ.

26 Ka bụ me nū anụ ziri, ovu
oso n'ọnu anụ nū rime Karaịsi
jaazi agida kwnornu m.

27 Nhne nū nhne ọbula
mene, anụ wu bụdnu ke
kwesiri izi ọma Karaịsi. Me va
ọ whnū anụ mọbu m váge m,
mọbu m nurnu m nhne gbasiri

anụ hne me zị, m jaamahia nụ anụ gwuzosiri rikne n'otu enine, nọolu ọgwnu lele otu badnụ kwnornu ọkwnata ovu ke izi ọma.

²⁸ Anụ kwé ele neemegidne anụ kpasị anụ ogwnu n'apna ọbula. Ka jọobu nhne jeegesi be nụ Chiokike joolulu be, kọvu Chiokike jọoznohia anụ.

²⁹ Kwnornu nụ Chiokike nyernu anụ oghere, ọ búo o kweru nụ Karaịsi kpọi, kọvu ọ tanụ a awnụwhnu.

³⁰ Me nụ anụ nọolu otu ọgwnu. Anụ whnurnu kpa me luru ọgwnu wam n'ige wheru ewhe, kịta anụ nọonu nụ m zị kọriri m naagba ọtna.

2

Badnụ ogwedna ẹhni a ẹli

¹ Ọ bụru nụ ọgba inwe zinu aị nụ Karaịsi, ọ bụru nụ ọsnuta mkpọma hite n'ọwhnun'anya a, ọ bụru nụ omekorita zị n'Enine Nso, ọ bụru nụ ovu ọma ọbula nụ obirizi,

² anụ mee ma ovu ọso n'ọnu m zu ozu, anụ nwe otu echiche, otu ọwhnun'anya, anụ ziri n'otu enine nụ echiche.

³ Ọ zá nye ọbula mee nhne kwnornu nhne o jeenwehia mọbu ovu ọjo, kọvu hite nụ badnụ ogwedna ẹhni ẹli, nye ọbula kweru nụ nye berere ka a mma.

⁴ Ọ zá nye ọbula ke lebna anya nụ nhne ke a kpọi, kọvu nụ nhne gbasiri ele berere.

⁵ Nye ọbula nwe ovu ke Karaịsi Jizosi.

⁶ Nye, ọ bụ n'ezi nụ ọ bụ Chiokike

méne a lele nhne anya rikne nụ ya nụ Chiokike hna.

⁷ Ọ sigbasiri kpakara nhne o nwernu, o gweru ọnodi ke nnwo izi,

be mee a lele badnụ etekne.

⁸ Ọ whụya iwhe lele badnụ etekne,

o gwedna ẹhni a ẹli,

o bno nsnị dụ n'ẹnwu, bụ ẹnwu ke olu ọgba.

⁹ Kam kpayarụ, Chiokike jiri gwelizọ a olu kakwo kpakara nhne, nyega a rẹwhna ke kakwo kpakara rẹwhna,

¹⁰ ke bụ nụ rẹwhna Jizosi kpakara mpnerne ọchi joogbu,

nhne ke zị n'oligwe, ma n'ọwa, ma nụ mkpuru ọwa,

¹¹ kpakara riro jookwuhia nụ Jizosi Karaịsi bụ Nyenwe aị,

ma be nyee Chiokike Nda igwugwu.

Noonwu lele mbo

¹² Kam kpayarụ, ele me whnurnu n'anya, anụ noobno nsnị lele kpa anụ neeme, ọ búo nụ ruwhnu m kpọi, ke kakwo, nga me zila ndundu. Anụ gweru ogwnu nụ ọznu biri biri rnhia ọznohia anụ.

¹³ Kwnornu nụ ọ bụ Chiokike nye nọornu ẹrnu nụ rime anụ, nye neeme anụ kweru hite nụ mkpọma anụ, neeme nhne lele kpa echiche a jiri zị.

14 Kpa anụ neeme kpakara nhne, anụ gweme ọtamu nū agirigo,

15 ma anụ bụru ele nwée ọtna, ele zị snam, rụmu Chiokike ele nwée ọru nū rime ebiri ele ọjọ ka hiri aghi, hne anụ noonwu lele mbọ n'owa.

16 Anụ jikwaru ikwu-ọnu ke bụdnu ka aka rikne, ma m gweru m anụ mee oknomokno n'ọbochi Karaisi, ke jeegesi nū m gbáge m ẹso etekne, mọbu ọ dọgbu ẹhni m n'ẹnu bụo nhne etekne.

17 Ọ bụbedi nū be jọowusi ọvnarna bụdnu m lele ariohna manya n'omezu ariohna, lele kpa ẹnu ọkwnata ovu anụ bụ ariohna anụ kwannū Chiokike, ovu nọoso m n'ọnu, m sno m anụ nọonwudna.

18 Anụ n'iwhuru anụ snornu m nwe ovu ọso n'ọnu nū ọnwudna.

Nhne gbasiri Timoti nū Epafroditusi

19 M neele anya nū Nyenwe aị jeekwe me ziyanu anū Timoti ige matị, ma ovu sọ m n'ọnu nga me jọonu izi gbasiri anū.

20 M nwée m nye berere nū lele ya, nye nhne gbasiri anū neemetu nū mkpọma n'ezi.

21 Kwnornu nū nye ọbula neele anya nū nhne ke a, ọ bụo ke Karaisi Jizọsi.

22 Kọvu anū magwu nū Timoti gesiri ẹhni a lele nnwọ nū nda a, o znenu m izi, snornu m rnu ẹnu izi ọma.

23 M neele anya nū m jeeziya a ige matị kpa nhne jaaganū hna me zị.

24 M kwnataru m Chiokike ovu nū me n'iwhuru m jaava whnu anū ige matị.

25 Kọvu m whnurnu m nū ọ bụru ọma me zihnahie Epafroditusi, nnwọ nda m, nū nye ẹnu nū nye ọgwnu ibne m, nye bụ masi nye izi anū, nye anū ziyannu m o lebna anya nū mkpa naakpa m.

26 Ọ nọogwnusi a rikne ọ whnu anū anya, kwnornu nū anū nurnu nū ọ riaru ẹhni igbugbu.

27 N'ezi, ọ riaru ẹhni igbugbu, ọ gwnarnu matị ọ nwu. Kọvu Chiokike dọnnu a obirizi, ọ bụo ya kpoi, kọvu ma me, ọ zị me nwe nhne igbugbu n'olu nhne igbugbu.

28 Kam kpayaru, ovu nọoso m n'ọnu k'agida o ziya a. Nga anū jọowhnu a, ovu jọoso anū n'ọnu, mkpọma jáala m mini berere.

29 Anū gweru okne ovu ọso n'ọnu nabnanya a nū rẹwhna Nyenwe aị, anū sọ ele nū lele ya anya k'agida.

30 Kwnornu nū ọ gwnarnu matị ọ nwu nū ẹnu Karaisi. O gweruru bụdnu a n'aka a nọornu ẹnu kpa anū nwée rikne rnu.

3

Ezi ome mma

1 N'ipne-aznu, rụmu nda m, anū nwudna ọnwudna nū Nyenwe aị. Ọ zá noogbu m igbugbu ọ gbanu anū otu nhne ka berere, ka bụ ma ọ bunu anū ọma.

2 Anū neezeru ẹhni anū kwnornu rụmu nkita, ele

aruru-eli wam, ele noogbuja anọ-ehni.

³ Kwnornu nụ aị ele be kparụ nka n'ezi, bụ ele neekpenu Chiokike hite n'Enine a, ele ji Karaịsi Jizọsi naanya risi, ele zá nọtukwasi anọ-ehni mkpọma.

⁴ O bụ n'ezi nụ m nwernu m nhne nụ lele ka me ji nọtukwasi mkpọma. O bụru nụ badnụ ọbula nwernu nhne o jiri tukwasi mkpọma n'anọ-ehni, m nwernu m karukwo.

⁵ Be kparụ m nka nga me gbarụ n'ọbochi ẹsato, nye Izireli, nye avnurnu Benjamini, m bụ m nye Hiburu n'ezi. Nụ nhne gbasiri iwu, m bụ m nye Farisi,

⁶ nye nwernu bekwu nụ mkpọma, naakpakna ọgbako Chiokike ẹhni. Nụ nhne gbasiri ome mma ke hi n'iwu, m nwée m ọtna.

⁷ Kọvu kpakara nhne ke bnannu m iru, bụ nhne me gwnurnu nụ nhne etekne kwnornu Karaịsi.

⁸ Owe! M gwnurnu m kpakara nhne lele nhne etekne ma m mahia m nhne ke kakwo bụ ọ mahia Karaịsi Jizọsi Nyenwe m, nye me kwnornu nụ a whu mwhu kpakara nhne. M gwnurnu m be lele nhne bnána nụ nhne ma m rihia m Karaịsi nụ iru,

⁹ ma me nụ ya bụru otu, hne me nwée ome mma ke aka m ke hiri n'iwu, kọvu ome mma ke hiri n'okwnata ovu nụ Karaịsi, ka bụ ome mma ke hi n'aka Chiokike hite n'okwnata ovu.

¹⁰ M pioru m ọ mahia Karaịsi nụ iknernema olizọ

n'ẹnwu a, ma m kehia m igwe n'awhnuwhnu a, nụ lele ya n'ẹnwu a,

¹¹ ọ bụru nụ o jeekwe omume, ma m dụ m n'olizọ n'ẹnwu ke ele nwurnu ọnwu.

Ọgbazne nụ ruwhnu

¹² Ka zá neegesi nụ m nwehiala m kpakara nhne ka, mọbu nụ m dula m ozu ozu. Kọvu m naagbalị ma m nwudne m nhne wam, ke bụ nhne Karaịsi kwno nwudne m.

¹³ Rumu nda aị, m zá m nọogwnu ẹhni m nụ m ji m a n'aka. Kọvu ka bụ nhne me neeme, m nechezu kpakara nhne ke zị m n'aznụ, nọodosni aka m nụ nhne ke zị m nụ ruwhnu.

¹⁴ M naagbalị neezne nụ ruwhnu, ma m gbahia m nhne n'eso, ke bụ nhne Chiokike kwno sukwu m zne oligwe kwnornu Karaịsi Jizọsi.

¹⁵ Kam kpararụ, kpakara aị ele sozuru lele ele Karaịsi nwernu mkpọma ka. O bụru nụ nye ọbula n'esilawuru anụ ri nhne zị ichne, Chiokike jeeme a o dno anụ anya nkari nkari.

¹⁶ Ngwa ma a yisi ẹhni jikwaru kpakara nhne a nwernu nkari.

¹⁷ Rumu nda m, anụ snornu ele sno nhne atụ m, anụ hnata ele noowu budnu lele kpa a znirni anụ ama.

¹⁸ Lele kpa me kannu anụ agida ige, kpa me ji anya-mini ẹkwana naakanu anụ kitna, agida ele badnụ noowu budnu lele ele irno ke ọgba Karaịsi.

19 Okwukwo bụdnu be bụ mwhu, chi be bụ ruwho be, nhne iwhnerne bụ igwugwu be. Kpakara mkpoma be tukwasiri nū nhne zị n'owa.

20 Kọvu a bụ rụmu oligwe. A zị neese Nye Ọznohia aị ke jeehi n'oligwe va, nye bụ Karaịsi Jizọsi.

21 O jeegweru iknernema wam o jiri megbu kpakara nhne, bita be nū mkpururu ọchi a, gbanwo anọ-ehni aị ka ke nwée rikne, mee a ọ nū lele ke a n'igwugwu.

4

1 Rụmu nda m, anụ bụ ele me whnurnu n'anya, ele ọ nọogwu m ọ whnụ anya, anụ bụ ovu ọso n'ọnu m nū ọgwo ẹnu m. Anụ gwuzosi rikne nū Nyenwe aị, ele me whnurnu n'anya.

Ezni

2 M naariasno Udia nū Sintike, be ziri n'udno, kwnornu nū anụ ele ke Nyenwe aị.

3 M naariasno masị i, nye ẹnu ibne m, yinu ele rinya ka aka ma be ziri n'udno. Kwnornu nū be sno m dogbu ẹhni be n'ẹnu ọkpo okwo izi ọma, be nū Kilementi nū ele ẹnu ibne m ele berere, ele be gbarụ rẹwhna be n'okwukwo ke bụdnu.

4 Anụ nwudna ọnwudna nū Nyenwe aị ige ọbula. M kwu kwno a berere, anụ nwudna ọnwudna.

5 Anụ mee ma kpakara ele badnụ mahia ovu ọma anụ. Nyenwe aị zị ndundu.

6 Mkpoma lá anụ mini kwnornu nhne ọbula, kọvu

anụ gweru okpukpe nū ọtu mmamma chete kpakara nhne naakpa anụ nū ruwhnu Chiokike.

7 Udno Chiokike ke kakwo kpakara ọghohia chekwata ovu anụ nū echiche anụ nū rime Karaịsi Jizọsi.

8 N'ipne-aznū, rụmu nda aị, anụ naari ọriri nhne bụ ezi ọka, nhne ọbula bụ nhne nwernu igwugwu, nhne ọbula ke bụru ọma, nhne ọbula ke zị rịchna, nhne ọbula ke be whnurnu n'anya, nhne ọbula ke nwernu ọtutnu ọma, ọ bụru nhne ọbula ke ka mma, ke kwesiri ọznarni.

9 Kpakara nhne anụ mụhiaru, ke anụ nahiaru nū ke anụ nurnu n'ọnu m, mọbu ke anụ whnurnu nū rime m, anụ neeme be. Chiokike ke udno jaadazinu anụ.

Polu tūnu ele Filipaj mmamma

10 M nọonwudna ọnwudna nū Nyenwe aị kwnornu nū anụ gwnaknenu ẹnu anụ ke gbasiri m. Nhne gbasiri m neemetu anụ nū mkpoma, kọvu anụ nwée oghere o gesi a.

11 M zá m nookwu ka kwnornu nū mkpa naakpa m, kọvu nū m maam kpa ọ daziri nū ruwho ojiji n'ọnodi ọbula me whnurnu ẹhni m.

12 M magwu m kpa ọ zị nū mkpa, m magwu m kpa ọ zị nū ige me nwejiri nhne. M mụhiaru m nhne tugwaru otugwa ke ruwho ojiji n'ọnodi ọbula, mọbu agwnu wiri mọbu nū ruwho jiri eji, o nwernu agida nhne mọbu lele nye nhne kọgwu.

13 M jeemeli kpakara nhne hite nye wam ke neeme m gbasị rikne.

14 O bụru oma nụ anụ snornu m kehia igwe n'awhnuwhnu m.

15 N'ezi, okwolem anụ ele Filipaj bụ ele yinnu m aka nga me panizoru neezni izi oma. Nga me hi nụ Masi-donia n'owhuya, o zá ogbako Chiokike obula ke snornu m nụ nhne gbasiri okesi nụ onahoru nhne, okwolem anụ.

16 O bụbedi nga me zi nụ Tsalonika, anụ gweyanụ m nkesi ige obula me zi nụ mkpa.

17 Ka zá neegesi nụ m noopio nkesi, kovu m noopio nhne jeeme anụ nwehia nhne bụru oma.

18 M nahiaru m kpakara nhne anụ ziyaru, tukwasi kwno n'olu a. Anụ gweyanụ m kpakara nhne ke zi m mkpa, ke me nahiaru m n'aka Epafroditusi. Kpakara be bụ nhne nwernu eknarna oma, arìohna ke n'oso Chiokike ovu n'onu ke o nahoru.

19 Chiokike m jeenye anụ kpakara nhne ke zi anụ mkpa, hite n'agida ekwnu a ke zi igwugwu nụ Karaịsi Jizosi.

20 Chiokike Nda aị nwe igwugwu dū okwnukokwnu. Amim.

Obekwu ipne-aznu

21 Anụ bekwu kpakara ele ke Chiokike ke zi nụ Karaịsi Jizosi. Rumu nda ele me nụ be zi neebekwu anụ.

22 Kpakara ele Chiokike zi nsọ neebekwu anụ, ke kakwo ele zi n'ezi-nụ-oro Siza.

23 Oru ke Nyenwe aị Jizosi Karaịsi dazinu enine anụ. Amim.

**Ọkwukwo izi Pọlu
gbaznenu
Ele Kọlosi
Nhne gbasiri
ọkwukwo izi ka**

Kọlosi bụ ẹli-ọhna ke zị mkpa nù rime Esia Matì. Pọlu nye gbarù ọkwukwo izi ka znélele Kọlosi, kọvu ọ nurnu nù ele Karaìsi zì pìi gwuzosiri rikne n'ọkwnata ovu be (1:3-7; 2:6,7). Be nurnu izi ọma hite n'ọnu otu nye be kwu Epafarasi nye wu pìi (1:7; 4:12,13), kọvu ya nù Pọlu zì nù ikelu (Faìlemoni 23) n'ìge Pọlu gbarù ọkwukwo izi ka (1:14; 4:3,10,18).

Agìda ele zì nù ọgbako Chiokike ke zì nù Kọlosi bụo ele Ju (1:27), ke kpayarù agìda okpukpe zì ichne ichne nù omen'ẹli noopio o megbu be. Pọlu pioru be mahija nù Karaìsi zì n'oligwe nẹchi kpakara rikne ke zì n'ọwa (3:1). Ka neegesi nù be jeekpenu Karaìsi kpọi.

Karaìsi bụ oyiyi ke Chiokike, nye be whnù anya.

Karaìsi bụ nye risi kpakara nhne Chiokike keru.

Ọ masiri Chiokike o mee kpakara nhne wuru nù rime Karaìsi.

Ọ mernu ka ma ya nù kpakara nhne ziri n'udno (1:15,19,20a).

Nhne zì n'ọkwukwo izi ka

Obekwu ikwu (1:1,2)

Otu mmamma (1:3-14)

Badnù nù ẹrnu Karaìsi (1:15--2:19)

Budnu ikne nù rime Karaìsi (2:20--4:6)

Obekwu ikwu ipne-aznù (4:7-18)

¹ Mawa, Pọlu, nye izi Karaìsi Jizọsi lele kpa echiche Chiokike jiri zì, nù nnwọ nda aì Timoti,

² naagbaznenu rumu Nda aì ele zì nsọ, ele kwesiri ọkwnata mkpọma nù Karaìsi, ele ke zì nù Kọlosi ọkwukwo. Oru nù udno ke Chiokike Nda aì dazinu anù.

Pọlu turu mmamma

³ A nọtunu Chiokike mmamma, Nda Nyenwe aì Jizọsi Karaìsi, neekpenu anù okpukpe ige ọbula.

⁴ Kwnornu nù a nurnu nhne gbasiri ọkwnata mkpọma anù nù Karaìsi Jizọsi nù ọwhnun'anya anù nwernu hne kpakara ele nsọ Chiokike zì.

⁵ Olile anya ke be bitannu anù n'oligwe neenye anù ọkwnata mkpọma nù ọwhnun'anya ka. Anù nurnu nhne gbasiri olile anya ka n'ezi ọka ke izi ọma,

⁶ bụ izi ọma ke vakwnusiri anù. Izi ọma ka naamiya mkpuru, nooso masi nù kpakara ọwa, lele kpa o neeme n'esilawuru anù hite n'ọbochi anù nurnu a, ghọhia masi oru Chiokike n'ezi.

⁷ Anù nurnu izi ọma ka n'ọnu Epafarasi nye izi ibne aì a whnurnu n'anya, nye bụ nye ẹrnu Karaìsi nye kwesiri ọkwnata mkpọma n'ọnodi aì.

⁸ Ọ kannu aì nhne gbasiri ọwhnun'anya anù ke Enine Chiokike nyernu anù.

9 Kam kpayaṛu, hite n'ọbochi a nṛnu nhne gbasiri anu, a zi neekpenu anu okpukpe, nṛorio Chiokike ma anu mahia echiche a nkari nkari hite nu kpakara akoniche nu oghohia ke Enine Chiokike neenye.

10 A nṛorio ma anu wuru budnu ke jeegweyanu Nyenwe ai igwugwu, neeme nhne jaamasị Nyenwe ai n'apna obula, naami mkpuru oma zi odo n'odo. Ka jeeme anu nooso, naamahia Chiokike nkari nkari.

11 Anu buru ele gbasiri rikne hite nu kpakara rikne nu iknernema ke zi igwugwu Nyenwe ai ma anu nwehia osnuta mkpoma nu ndidi. Anu gweru ovu oso n'onu

12 nṛotunu Nda ai mmamma, nye mernu anu nwernu igwe n'esilawuru rumu Chiokike zi nsọ n'eli-eze ke iwhne.

13 Kwnornu nu Chiokike dohiaru ai n'aka nye wam neechi nu rime ochichiri, kwubnanya ai n'eli-eze ke Nnwọ a, nye o whnurnu n'anya.

14 O nyernu ai ogbahia ke bu ogbaru mmehie.

Karaisi kakwo kpakara nhne

15 Karaisi bu oiyi ke Chiokike, nye be whnu anya. Karaisi bu nye risi kpakara nhne Chiokike keru.

16 Chiokike keru kpakara nhne hite n'aka a, kpakara nhne ke zi n'oligwe nu owa, nhne anya nṛowhnu nu nhne anya za nṛowhnu, be bu ele

dazi nu ngadna eze, mṛbu ele nwernu rikne nu ele neechi echiche nu ele nwernu iknernema. Chiokike keru kpakara nhne hite n'aka a, ma kpakara nhne nyee a igwugwu.

17 O zi tutu nhne obula, kpakara nhne jikotaru n'otu nu rime a.

18 Ya bu risi ehni a, ke bu ogbako Chiokike. Ya bu opanizo nu mkpuru mbom ke ele hiri n'enwu lizo, ma o buru nye risi kpakara nhne.

19 Kwnornu nu o masiri Chiokike o mee ma kpakara nhne o bu, wuru nu rime Karaisi.

20 O mernu ka ma ya nu kpakara nhne ziri n'udno, ma nhne ke zi n'owa ma nhne ke zi n'oligwe, ma ya nu be mee udno hite n'ovnarna a ke o wusaru n'olu ogba.

21 Nu mbom, anu bu ele zi ikere hne Chiokike zi nu ele irno n'ovu anu kwnornu n'ernu ojo anu.

22 Kovu kitna, o mernu anu nu ya ziri n'udno hite n'enwu Karaisi nwurnu n'anogehni, ma o gweru anu chete nu ruwhnu a, ele zi nsọ, nwée oru mṛbu nhne be bnornu be,

23 o buru nu anu gwuzosi rikne n'okwnata ovu, ele gwuzo kwem, anu kwé nhne obula gweme anu n'olile anya izi oma ke anu kweru. Ka bu izi oma ke anu nurnu, be kporu okwo a nu kpakara mkpururu oligwe, ke me Polu bu nye izi a.

24 M n̄onwudna ọnwudna k̄itna kwnornu awn̄uw̄hnu me taru n̄u risi an̄u, m̄ ji m̄ an̄o-ẹhni m̄ mezu nhne ke gwnarnu gbasiri awn̄uw̄hnu Karāisi taru, kwnornu ẹhni a, ke bu ọgbako Chiokike.

25 M ḡhoru m̄ nye izi ọgbako Chiokike hite n'ẹrnu Chiokike nyernu m̄ me zni an̄u ikwu-ọnu Chiokike n'ozuzu oke a.

26 Ikwu-ọnu Chiokike ka bu nhne ke tugwaru otugwa aḡida ige n̄u aḡida ebiri, k̄itna, o kpumennu a ele ns̄o a.

27 O masiri Chiokike o mee ele ke a mah̄ia nhne tugwaru otugwa ke bu n̄u ẹkwnu ke z̄i igwugwu bu ke ele buo ele Ju. Ẹkwnu ka bu Karāisi n̄u rime an̄u, bu olile anya n̄u an̄u jeekeh̄ia igwe n'ebube a.

28 A n̄ookpo okwo gbasiri Karāisi, n̄odo ele badnu aka n̄u ns̄i, neezni nye ọbula hite n'ak̄oniche Chiokike nyernu āi, ma a gweru nye ọbula chete n̄u ruwhnu Chiokike n̄u ozu oke kwnornu Karāisi.

29 Kam kpayaru, m̄ ji m̄ kpakara rikne Karāisi nyernu m̄ ke n̄oornusi ẹrnu rikne, m̄ n̄odogbu ẹhni m̄ n'ẹrnu ka.

2

1 M piuru m̄ an̄u mah̄ia kpa me n̄odogbu ẹhni m̄ n'ẹrnu kwnornu an̄u n̄u ele z̄i n̄u Laodisia, n̄u kpakara ele wh̄n̄ulele m̄ anya.

2 Ka bu ma be kwnagidne be n'ovu, z̄iri masi n'otu n'ow̄hnun'anya, ma be nweh̄ia kpakara ẹkwnu ke ọghohia ke zuru ozu, ka jeeme be mah̄ia

nhne tugwaru otugwa ke Chiokike, ke bu Karāisi.

3 Kpakara nhne ke tugwaru otugwa z̄i n̄u rime a, ke bu ak̄oniche n̄u nhne ọmuma.

4 M naakanu an̄u ka, an̄u kwé nye ọbula duwhu an̄u hite n'ikwu-ọnu ke n̄oso n'ọnu.

5 O bu n'ezi n̄u me n̄u an̄u z̄ila n'an̄o-ẹhni, k̄ovu me n̄u an̄u z̄i n̄u enine. O n̄oso m̄ kpa me n̄ow̄hnu n̄u an̄u noowu budnu lele kpa o kwesiri, noogwuzo kwem n'okwnata ovu ke z̄i n̄u Karāisi.

*Karāisi neegweya
budnu n'ezi*

6 Lele kpa an̄u nah̄iaru Karāisi Jiz̄osi lele Nyenwe āi, an̄u daz̄igidne noowu budnu n̄u rime a.

7 An̄u gba ẹgwnugwnu n̄u rime a, an̄u wuliz̄o ẹhni an̄u lele ọro kpa o bu nt̄u-ẹli ọro, gbas̄i rikne n'okwnata ovu lele kpa be znirni an̄u, ọtu mmamma jih̄ia ovu an̄u.

8 An̄u kwé badnu ọbula duwhu an̄u hite n̄u ikwu-ọnu etekne n̄u agh̄igho ikwu-ọnu bn̄ana n̄u nhne, ke knosiri aka n'omen'ẹli ke ele badnu n̄u ren̄wu ojo mat̄i mat̄i ke ọwa ka, buo ke Karāisi.

9 Kwnornu n̄u kpakara nhne Chiokike bu wu n̄u rime Karāisi n'an̄o-ẹhni a.

10 Chiokike mernu an̄u sozu n̄u badnu n̄u rime Karāisi, nye bu risi kpakara ele nwernu rikne n̄u ele ọchichi.

11 Be kparu an̄u nka n̄u rime a, ke bu ogweme mmehie an̄u, o buo nka ke be jiri

aka ele badnu kpa, kovu nka ke Karaṣi n'iwuhuru a kparu.

¹² Hne be likotaru anu nu ya n'owuwu-mini, be gwelizoḱota anu hite n'okwnata ovu anu n'iknerna Chiokike, nye mernu Karaṣi hi n'enwu lizo.

¹³ Anu bu ele nwurnu onwu nu rime mmehie, anu bu ele buo ele Ju be kpala nka. Kovu Chiokike mernu anu snornu Karaṣi ziri budnu, kpa o gbarunu ai kpakara mmehie ai.

¹⁴ O dokaru kpakara okwukwo be gbaru nu kpakara iwu ke megidneru ai, o gweme be, kpoḱidne be n'ogba Jizosi.

¹⁵ Chiokike nahoru kpakara ele ochichi nu ele nwernu rikne iknerna, kpaṣi be iwernerne nu ruwhnu ohna, neegesi nu o megburu be hite n'ogba Jizosi.

¹⁶ Kam kpayaru, anu kwé nye obula gweru nhne anu neeri mọbu nhne anu nonwo, mọbu nu anu za naabita mmemem okpukpe, mọbu enwa ikne, mọbu Obochi Ozukwa Inwe, kpe anu ikpe.

¹⁷ Kpakara nhne ka bu enine nhne ke jaava, kovu risi nhne bu Karaṣi.

¹⁸ Anu kwé nye obula ke o naamaso o gwedna ehni a eli nu okpenu ele enine izi mee anu buru ele kwésile, o bu n'ezi nu nye wam ka nu o whnurnu owhnurninya gbasiri be, ovu ke badnu a mernu a o buru nye nganga n'etekne.

¹⁹ Nye wam bu nye gwemernu ehni a nu Karaṣi, nye bu risi ehni, nye mernu

kpakara ruknani nu reḱpu ochi nu aka kneḱota n'otu. Kpa o nooznu kpakara ehni, o nooso lele kpa Chiokike neeme a nooso.

²⁰ Anu snornu Karaṣi nwu enwu, o mernu anu nwernu ehni anu whoga nu rikne renwu ojo mati mati ke owa ka. Kini mernu anu noowu budnu lele nu anu bu ke owa, naabita iwu be?

²¹ Bu ke karu, "Anu kpa ka aka, anu ratu a riro, anu kpa kiari aka."

²² Kpakara iwu ka gbasiri nhne ke joowhu kpa ele badnu jiri be ru enu mọbu rikwo be, iwu ele ka kno aka nu nhne ele badnu nyernu n'iwu nu iznizni be.

²³ Kpakara iznizni nu kpa nu lele nhne nwernu akoniche, ke bu okpenu Chiokike lele kpa badnu karu be kpenu a, ogwedna ehni be n'eli, nu ome ano-ehni nhne rikne, kovu be nwée rikne bnosni echiche ojo ke ovu.

3

Owu budnu zi nsọ

¹ Hne o bu nu anu nu Karaṣi hiri n'enwu lizo n'otu, anu bita ovu anu nu nhne zi n'olu, hne Karaṣi dazi n'eli n'akarikwnunga Chiokike.

² Anu neeche echiche nu nhne zi n'olu, o buo nu nhne zi n'owa.

³ Kwnornu nu anu nwurnu onwu, budnu anu nu Karaṣi bu nhne tugwaru otugwa nu rime Chiokike.

⁴ Nga Karaṣi nye bu budnu anu joowhuya iwuhne, anu

joosno a whuya iwihne, kehia igwe n'igwugwu a.

5 Anu mee ma kpakara nhne ke bu nhne owa nwu enwu, kpakara ome oyi, ozi richna, egwnurnu nhne ojo, echiche ojo nu anya-kwu, ke nu lele okwa renwu.

6 Kam kpayarū, ovu owe ehni Chiokike naadnakwasị kpakara ele zá noobno nsni.

7 Ka bu kpa anu wuru budnu nga anu bu ele ke owa.

8 Kovu kitna, anu gweme kpakara nhne ka nu rime anu, ovu owe ehni, onuma, irno ovu, okaja, nu ikwu-onu zila richna nu mgbele-onu anu.

9 O zá nye obula ghanu ibne a aghalaghala, hne anu gwemernu badnu oknani wam nu kpakara ernu ojo a.

10 Anu worulem badnu ikne lele iwo. Chiokike neeme anu ziri ikne ma anu mubia nhne gbasiri nye kpuru anu.

11 O zá nhne zi ichne nu hne nye Giriki mobu nye Ju zi, nye be kparu nka nu nye be kpage nka, nye izne, nye nu lele anohia,* ohi mobu nye buo ohi, kovu Karaisi bu kpakara nhne, nye zi masi nu rime kpakara badnu.

12 Kam kpayarū, lele kpa ele Chiokike hohiaru, ele nsọ a, ele o whnurnu n'anya, anu woru obirizi, ovu oma, ogwedna ehni anu eli, ozi wohnernerne nu osnuta ovu lele iwo.

13 Anu naagidne ibne anu, gbarunu ibne anu

nhne obula be mehieru anu. Anu gbarunu ibne anu lele kpa Chiokike n'iwuru a gbarunnu anu.

14 Tukwasi n'olu kpakara nhne ka owhnun'anya, bu nhne ke neeknegidne kpakara be n'otu n'apna ke zuru ozu.

15 Anu kweru ma udno ke Karaisi neechi ovu anu, lele ele bu otu badnu, ele Chiokike sukwuru bna n'udno. Anu notu mmamma.

16 Anu kweru ma ikwu-onu Karaisi kweru ekwnu a wuru nu rime anu, kpa anu ji akoniche neezni ibne anu nhne, neezni be ezni. Anu notogwnu eri oma, eri oznarni, nu eri mkpoma oso n'onu, gweru ovu anu notunu Chiokike mmamma.

17 Nhne obula anu neeme, o bu n'ikwu-onu mobu nhne aka neeme, anu mee kpakara nhne nu rewhna Nyenwe ai Jizosi, notunu Chiokike Nda mmamma hite nu a.

Ezi-nu-oro nye Karaisi

18 Ele bu nnwerne, anu bita ehni anu nu mkpururu nzi anu, kpa o kwesiri ele noosno Nyenwe ai.

19 Ele bu nzi, anu whnu nnwerne anu n'anya, anu mee be nhne rikne.

20 Ele bu rumu, anu noobnonu ele murnu anu nsni nu kpakara nhne, ka bu nhne Nyenwe ai noopio.

21 Ele nda, anu meko rumu anu ovu owe ehni, o zi inwe gwu be.

* 3:11 nye nu lele anohia okwukwo ke mbom kwuru: nye Sikitia

22 Ele ọhi, anụ noobnonu ele nwe anụ n'ọwa nsni nụ kpakara nhne, anụ neeme be, ọ bụo nga be neele anụ anya ma anụ bụru ele ọma be, kọvu ma nga be zá neele anụ anya. Anụ gweru ovu anụ nọoso be anya n'ezi, nọotu ogwnu Nyenwe aị.

23 Nhne ọbula anụ neeme, anụ gweru kpakara ovu anụ mee be lele ele nọornunu Nyenwe aị ẹrnu, ọ bụo lele ele nọornunu ele badnụ ẹrnu.

24 Anụ magwụ nụ anụ jeekehia mkpe n'aka Nyenwe aị lele ọgwo ẹrnu, hne ọ bụ Karaịsi bụ nye anụ nọornunu ẹrnu.

25 Nye ọbula ke nọornu ẹrnu ojo jaanahia ọgwo ẹrnu ojo n'aka Chiokike. Chiokike zá neele badnụ anya nụ ruwhnu.

4

1 Ele nwe ele ọhi, anụ mee ọhi anụ nhne bụru ọma nụ nhne kwesiri, kwnornu nụ anụ nwernu Nyenwe anụ ke zị n'oligwe.

Agida ezni

2 Anụ gwéme aka n'okpe okpukpe, neese nse, nọotu mmamma.

3 Anụ kpenu aị okpukpe masi, ma Chiokike gbamanụ aị ọnuhna o zni izi ọma, ma a kpọ okwo nhne tugwaru otugwa ke Karaịsi. Ka bụ nhne mernu me zị n'ikelu.

4 Anụ kpe okpukpe ma m kpọ m okwo izi ọma ka kpa ele badnụ jọghohia a, ka bụ ẹrnu me kwesiri ọ rnu.

5 Anụ gweru akọ kpa agwa ọma n'esilawuru ele bụo ele

Karaịsi. Anụ gweru oghere ọbula anụ nwernu mee nhne.

6 Anụ mee ma ọtnurita ọtnutnu anụ bụru nhne nwernu ovu ọma, ke nọoso n'ọnu lele arua, ma anụ mahia nhne anụ jaasa nye ọbula.

Obekwu ikwu ipne-aznu

7 Taiikikosi, nnwọ nda a whnurnu n'anya nụ nye ẹrnu Nyenwe aị ke kwesiri ọkwnata ovu, nye izi ibne aị, jaakanụ anụ kpakara nhne gbasiri m.

8 M neeziyanu anụ ya ma anụ mahia kpa a zị, ma o mee ovu si anụ rikne.

9 Ya nụ Onesimosi sno naava, nye bụ nnwọ nda a whnurnu n'anya kwesiri ọkwnata ovu, nye bụ masi otu nụ rime anụ. Be jaakanụ anụ kpakara nhne ke neeme hna.

10 Arisitakosi, nye me nụ a zị n'ikelu neebekwu anụ, ma Maki, nnwọ nwene Banabasi. Anụ nurnu nhne gbasiri a, anụ nabnanya a nga ọ varu.

11 Jizosi, nye be kwu Jositosi neebekwu anụ. Ka kwolem ele Ju ibne m me nụ be sno nọornu ẹrnu ẹli-eze Chiokike, be neeme ovu si m rikne.

12 Epafarasi, nye bụ otu nụ rime anụ nụ nye izi Karaịsi Jizosi neebekwu anụ. Ọ zị naagba ọtna n'okpukpe nụ risi anụ, naariasno Chiokike ma anụ gwuzosi rikne n'ome nhne bụ echiche a, bụru masi ele sozuru nụ badnụ.

13 M naagbanụ a akebne nụ ọ nọornusi ẹrnu rikne kwnornu anụ nụ ele zị nụ Laodisia nụ Hirapolisi.

¹⁴ Enyi aị Lukwu wọdibia a whnuru n'anya, nu Demasi neebekwu anu.

¹⁵ Anu bekwunu m rumu nda ele zi nu Laodisia, nu Nimfa, ma ogbako Chiokike zi n'oro a.

¹⁶ Kpa anu gwnuru okwukwo izi ka, anu whnu nu be gwnuru a n'ogbako Chiokike ke zi nu Laodisia. Anu gwnu masi okwukwo izi me gbannu ele Laodisia.

¹⁷ Anu kanu Akiposi, "Whnu nu i rnuworu eru i naaharu n'aka Nyenwe ai."

¹⁸ Mawa, Polu, ji aka m gba obekwu ikwu ka. Anu chenwanya nu m zi m n'ikelu. Oru Chiokike dazinu anu.

**Okwukwo izi
ke Mbom
Polu gbaznenu
Ele Teshalonika
Nhne gbasiri
okwukwo izi ka**

Polu panizoru ogbako Chiokike ke zi nu Teshalonika (2:13,14) nga o n'oruru ernu o ji nooznu ehni a. Nu rime eli-ohna ka zi mkpa nu rime Giriisi bu hne agida ele naakwa renwu ghoru ele Karaishi (1:9). Be bu ele kwesiri okwnata mkpoma, ke mernu izi oma Nyenwe ai gbasaru nu kpakara eli wam (1:8). Eleghi anya okwukwo izi ka joburu okwukwo izi mbom Polu gbaru, mobu okwukwo mbom be gbaru nu Tesitamenti Ikne.

Nga agida ele badnu lizoru megidne Polu, o gbazne Atensi. Omekwo, o zizne Timoti zne lekwa kpa ele Karaishi nooso (3:6-10). Nga Timoti hiehnarnu, o nyernu Polu otnutnu buru oma gbasiri ele Karaishi zi nu Teshalonika.

Kpa be zi neese ovuva Nyenwe ai, agwna be zima noornu ernu. Mkpoma naala ele berere mini kwnornu nu agwna be nwurnu, kovu Nyenwe ai yavage. Polu gbalu o mee ma be mahia nhne jeeme nga Nyenwe ai jaava (4:13-15), nu kpa be kwesiri o wu budnu be (5:1-11).

Nhne zi n'okwukwo izi ka

Obekwu ikwu (1:1-3)

Nhne atu ke okwnata mkpoma ele Teshalonika (1:4--3:13)

Budnu ke nooso Chiokike ovu n'onu (4:1-12)

Nhne be jeele anya a nga Nyenwe ai jaava (4:13--5:11)

Ezni ipne-aznu nu obekwu ikwu (5:12-28)

1 Mawa, Polu nu Saikasi nu Timoti naagba okwukwo gbaznenu ogbako Chiokike ke zi nu Teshalonika nu rewhna ke Chiokike Nda nu Nyenwe ai Jizosi Karaishi.

Udno nu oru dazinu anu.

2 A nootunu Chiokike mmamma nu risi kpakara anu ige obula, neekpenu anu okpukpe.

3 A neechenwanya ernu anu ige obula nu okwnata ovu anu nu ruwhnu Chiokike Nda ai, nu ernu owhnun'anya anu, nu osuta mkpoma anu ke hi nu olile anya anu nwernu nu Jizosi Karaishi.

Nhne atu ke okwnata ovu

4 Ele me whurnu n'anya, Chiokike whurnu anu n'anya, ka kpyaru o jiri horu anu buru ele ke a.

5 Kwnornu nu izi oma a znirni anu vage n'ikwu-onu etekne, kovu o ji iknernema nu okwnagidne ke Enine Nso mee anu mahia ezi oka. Anu magwu kpa a wuru budnu ai n'esilawuru anu.

6 Anu ghoru ele muhiaru nhne hite n'ole ai nu Nyenwe ai anya. O bu n'ezi nu anu taru agida awhnuwhnu, kovu

anụ jiri ovu ọso n'ọnu nabnanya izi a znirni anụ hite n'Enine Nso.

⁷ Kam kpayarụ, anụ jiri bụru ele be ji gbu atụ n'esilawuru ele kweru ekwe nụ kpakara Masidonia nụ Akaya.

⁸ Ikwu-ọnu Chiokike hiri n'ọnu anụ gazu kpakara ọhna, ọ bụo nụ Masidonia nụ Akaya kpọi. Ọkwnata ovu anụ nụ Chiokike zuru kpakara ọwa, ọ zá nhne berere a jookwu gbasiri a.

⁹ Be nookwu nụ anụ nabnanyarnụ aị nkari, nụ kpa anụ sigbasiri ọ kwanụ renwu neekpenu Chiokike ke zị bụdnu nụ ezi ọka.

¹⁰ Anụ zị neese Nnwọ a ke hi n'oligwe, nye o mernu o hi n'ẹnwu lizo, Jizọsi nye dọhiaru aị n'ovu owe ẹhni Chiokike ke naava.

2

Ernu Polu nụ Tęsalonika

¹ Rụmu nda aị, anụ magwụ nụ ige aị nụ anụ dazikotarụ n'otu bụo nhne etekne.

² Ọ bụ n'ezi nụ a tarụ awhnụwhnu nụ nhne iwhnerne nụ Filipai kpa anụ magwụ, kọvu Chiokike yinu aị aka o zni izi ọma a megidne okne ọkpagbu.

³ Nhne a nọorio anụ bụo hite nụ nhne ojo mọbu echiche ojo, a zá noopio ọ ghọnu anụ aghigho.

⁴ Tnụnuma, a nookwu ọka lele ele Chiokike kwnatarụ ovu yisi izi ọma n'aka aị. A zá noopio o mee nhne jaamasị ele badnụ, kọvu a

neeme nhne jọoso Chiokike ovu n'ọnu, nye magwụ nhne zị n'ovu aị.

⁵ Anụ magwụ nụ a jile ikwu-ọnu ke jeeme badnụ tne eri, a kpúsine ruwhnu aị n'aghigho, ma a rigbu ele badnụ, Chiokike bụ nye akebne aị.

⁶ A zá noopio ele badnụ znarni aị, mọbu anụwa mọbu ele berere.

Ọ bụ n'ezi nụ a bụ ele izi Karaisi, kọvu a kwéle ọ bụru ivu rinya nyee anụ.

⁷ Kọvu a nụ lele nyerinya neechi nnwọ rẹma n'esilawuru anụ, nye anya duru ẹli, ji wọhnerne nọoznu rụmu a.

⁸ Ọwhnun'anya a nwernu hne anụ zị kpayarụ, ọ masiri aị anụ snornu aị kehia igwe, ọ bụo n'izi ọma Chiokike kpọi, kọvu ọ bụru nụ o kwe omume, nụ bụdnu aị masi kwnornu nụ anụ zị aị mkpa.

⁹ Rụmu nda m, m magwụ m nụ anụ jeechenwanya, kpa a jiri aka aị lawuru nụ ẹnu iwhnehnie nụ abali, ma a gharụ ọ bụru ivu rinya hne anụ zị kpa a nọkpo okwo izi ọma Chiokike n'esilawuru anụ.

¹⁰ Chiokike bụ nye akebne aị ma anụwa masi, kpa a wuru bụdnu zị nso, nụ ome mma ke nwée ọru n'esilawuru anụ ele kweru ekwe.

¹¹ Anụ magwụ nụ a mesnornu anụ lele kpa nda neemesno rụmu a.

¹² A zị naakwnagidne anụ, nọosnuta anụ ovu ma anụ noowu bụdnu lele kpa ele

Chiokike sukwuru, ma anu bna n'eli-eze a nu igwugwu a.

¹³ Kam kpayaru, a notunu Chiokike mmamma ige obula kwnornu nu anu nahoru ikwu-onu Chiokike ke anu nurnu n'onu ai. Anu gwerule a lele nu o bu ikwu-onu ke badnu, kovu o bu ikwu-onu Chiokike ke notunu ernu nu rime anu ele kweru ekwe.

¹⁴ Anu buru ele sno ochi ogbako Chiokike ke zi nu Judiya, ele ke Karaisi Jizosi. Anu taru awhnuwhnu n'aka ele eli anu lele kpa ogbako Chiokike taru awhnuwhnu n'aka ele Ju.

¹⁵ Ka bu ele gburu Nyenwe ai Jizosi nu ele owhnurninya, chihala ai. Be mejoru Chiokike mee masi ele badnu nhne rikne.

¹⁶ Ka bu ma a gharu o kwunu ele buo ele Ju ikwu-onu Chiokike, ma Chiokike znohia be. Be zi notukwasi mmehie nu risi be, tem ovu owe ehni Chiokike dnakwasi be.

O noogwnu Polu

o zne Teshalonika

¹⁷ Kovu rumu nda ai, nga a whogaru hne anu zi ige mati n'anog-ehni, o buo nu echiche, o noogwnusi ai rikne o whnu anu anya.

¹⁸ O masiri ai o vakwnusi anu, agida ige, mawa Polu pi-oru o va, kovu Ekwensu bnos-nirni ai.

¹⁹ Anu bu olile anya nu igwugwu nu ovu oso n'onu a nwernu nga Nyenwe ai Jizosi jaava,

²⁰ N'ezi, anu bu igwugwu nu ovu oso n'onu ai.

3

¹ Kpa a nwée rikne naagidne a berere, a kpebi o daziri nu Atensi n'iwhuru ai.

² Kam kpayaru, a ziyaru Timoti nnwo nda ai nu nye sno ai notunu ernu Chiokike naagbasa izi oma Karaisi, ma o kwnagidne anu, mee masi ma okwnata ovu anu si rikne.

³ Anu kwé nhne orurna mee nye obula whoga n'onodi a. Anu magwu nhne orurna jodonu nye Karaisi obula.

⁴ Nga ai nu anu zi, a kannu anu nu be jaakpakna ai ehni. Anu whnurnu nu ka mezuru.

⁵ Kam kpayaru, kpa me nwée rikne gwuzoli nu mkpoma m nu nhne gbasiri anu, m ziya Timoti ma m mahia m kpa anu nu n'okwnata ovu. Ovu laru m mini ma nye orurna wam o kwnamana anu n'okwnata ovu, ma ernu ai nu risi anu buru nhne etekne.

Izi nkasi ovu Timoti gweyaru

⁶ Nga Timoti hi hne anu zi hiehna, gweyannu ai otnutnu oma gbasiri okwnata ovu nu owhnun'anya anu, o kannu ai nu anu neechenwanya nhne buru oma gbasiri ai ige obula, nu o noogwnu anu o whnu ai anya lele kpa o noogwnu masi ai o whnu anu anya.

⁷ Kam kpayaru, rumu nda ai, a nwernu okasi ovu nu rime awhnuwhnu ai kwnornu okwnata ovu anu.

⁸ N'ezi oka, a nwernu budnu ikne kwnornu nu anu gwuzo kwem nu rime Nyenwe ai.

9 A jęenwe rikne tųnu Chiokike mmamma kpa o kwesiri kwnornu nų ovu ọso n'ọnu a nwernu nų ruwhnu Chiokike nų risi anų.

10 A zị neekpe okpukpe iwhnehnie nų abalı ma a nwe rikne whnų anų anya ma a nyee anų nhne ke zị anų mkpa n'ọkwnata ovu.

11 Kịtna, a neekpe Chiokike Nda aị n'iwuhuru a nų Nyenwe aị Jizọsi gbamanų aị apna ma a vakwnusi anų.

12 Nyenwe aị mee ma ọwhnun'anya anų ba aba k'agida nų risi nye ọbula, lele kpa ọwhnun'anya aị zị nų risi anų.

13 Chiokike gba anų inwe ma anų zịri snam, zịri masị nsọ nų ruwhnu Chiokike Nda aị nga Nyenwe aị Jizọsi nų ele nsọ a jaava.

4

Budnu ke jọoso Chiokike ovu n'ọnu

1 Ke ipne-aznų, rųmu nda aị, a riasno anų wuru budnu ke jọoso Chiokike ovu n'ọnu, lele kpa a noowu. Bikno, anų neeme kpam neezne nų ruwhnu kwnornu Nyenwe aị Jizọsi.

2 Anų magwų nhne a znirni anų bu hite nų rẹwhna Nyenwe aị Jizọsi.

3 Ka bu nhne Nyenwe aị noopio ma ọ bita anų nsọ, ma anų whọga nų nhne ọbula ke zila richna lele ome ọyi,

4 ma nye ọbula mųhia kpa o jeejikwaru ẹhni a* nų apna ke zị nsọ nų igwugwu,

5 ọ buo ome nhne tų iwhnerne ke nọogwnu be lele kpa ele máa Chiokike neeme.

6 O zá nye mejọ nwene a nų nhne nų kpa mọbu ghọgbu a. Nyenwe aị jaata kpakara ele neeme nhne ojo ka awhnųwhnu lele kpa a kannų anų, do masị anų aka nų nsni.

7 Anų magwų nų Chiokike súkwule aị ma a buru ele zila richna, kọvu ma a wuru budnu zị nsọ.

8 Kam kpayaru, nye ọbula ke juru ọdo aka nų nsni ka jula badnų, kọvu Chiokike nye nyernu anų Enine Nsọ a.

9 Nų nhne gbasiri ọwhnun'anya ke rųmu nda, ọ zila mkpa a gbanų anų ọkwukwo, kwnornu nų anų magwų nų Chiokike znirni anų whnų ibne anų n'anya.

10 N'ezi, anų whnųrnu kpakara rųmu nda ele zị nų Masidonia n'anya. A naariasno anų neemekọ kpam neezne nų ruwhnu.

11 Anų gbalị noowu budnu zị wọhnernerne, neeme nhne ke gbasiri anų, anų rnusi ẹrnu rikne lele kpa a znirni anų,

12 ma ele buo ele ke Chiokike nọoso anų anya, anų gharų ọ dnakwarų n'ẹhni nye ọbula.

Nyenwe aị vawa

13 Rųmu nda aị, ọ buo ọma anų zịri nų ọma ama nų nhne gbasiri ele nwųrnu ọnwu, ma

* 4:4 kpa o jeejikwaru ẹhni a mọbu, kpa ya nų nnwerne a joowu

o gharu gbu anu igbugbu lele ele nwęe olile anya.

¹⁴A kweru nu Jizosi nwuru enwu, hi masi n'enwu lizo, kpa masi, a kweru nu Chiokike jeeme ele nwuru onwu nu rime Jizosi joosno a va.

¹⁵Lele kpa ikwu-onu Nyenwe ai kwuru, nu ai ele zi budnu, tem du ige Nyenwe ai jaava, jęenwe rikne beru ele nwuru onwu osno.

¹⁶Kwnornu nu Nyenwe ai n'iwuru a jeegweru okne nkoli hi n'oligwe hiedna, nu nkoli nye risi enine izi, nu odidna okwodu Chiokike. Ele nwuru nu rime Karaisi jeebe oso lizo.

¹⁷Omekwo, be jeegwelizo ai ele zi budnu neese a nu be nu rime erumeru zekwnusi Nyenwe ai n'olu. Ai nu Nyenwe ai jaazi kpa okwnukokwnu.

¹⁸Kam kpararu, anu gweru ikwu-onu ka naakasitaru ibne anu mkpoma.

5

Jikneru kwnornu obochi Nyenwe ai

¹Kitna, rumu nda ai, o zila mkpa o gbanu anu okwukwo gbasiri ige nu obochi nga nhne ele ka jeeme,

²kwnornu nu anu magwu nkari nkari nu obochi Nyenwe ai jaava lele nye buznu n'abali.

³Nga ele badnu neche "Udno nu eli-oji-iyi," aghom jaavakwnusi be n'ibiri, lele kpa rime neeme nnwerne

zi rime, be jęenwe rikne gbanahoru a.

⁴Kovu anu zila nu rime ochichiri rumu nda ai, ke jeeme obochi wam vakwnusi anu n'ibiri lele nye buznu.

⁵Hne anu bu rumu ke iwhne nu rumu ke obochi, a wu budnu ke abali mọbu ke ochichiri.

⁶Kam kpararu, a nu lele ele berere, ele neezni anyarna, kovu a bu ele tnegwu etne nu ele anya duru eli.

⁷Kwnornu nu ele anyarna neezni anyarna n'abali, ele manya, manya noogbu be n'abali.

⁸Kpa a bu rumu ke iwhne, a buru ele anya duru eli, ele wogwu okwnata ovu nu owhnun'anya lele mbno mkpoma, a gweru olile anya oznohia kpuru nu risi lele okpu-ogwnu.

⁹Kwnornu Chiokike sukwule ai ma a ta awhnuwhnu ke ovu owe ehni a, kovu ma a nwehia oznohia hite Nyenwe ai Jizosi Karaisi.

¹⁰Jizosi Karaisi nwuru enwu nu risi ai, ma a snornu a ziri budnu, a tne etne mọbu a zi n'anyarna.

¹¹Kam kpararu, anu naakasi ibne anu ovu, noowu ibne anu lele oro lele kpa anu neeme n'ezi.

Ezni ipne-aznu ke Polu

¹²Kitna rumu nda ai, a naariasno anu, anu sobisinu kpakara ele nornu ernu n'esilawuru anu, bu ele nooznu anu nu rime Nyenwe ai.

13 Anụ nyee be igwugwu ke agịda, anụ whnụ be n'anya kwnornu ernalu be. Anụ wuru n'udno n'esilawuru ernalu anụ.

14 Rumu nda aị, anụ gbalị dọ ele ime mgwu aka nụ nsni, anụ kwnagidne ele nọtulu iwhnerne, anụ yinu ele nwée rikne aka, anụ gweru enwerne ovu mesno kpakara badnụ nhne.

15 O zá nye ji nhne ojo kwuhnata nhne ojo. Kọvu anụ gbalị ma anụ nwe mkpoma oma n'ernalu ibne anụ ma kpakara ele badnụ ige obula.

16 Anụ nwudna ige obula.

17 Anụ kpe okpukpe ige obula.

18 Anụ nọtulu mmamma n'onodi obula, kwnornu nụ ka bụ nhne Chiokike noopio n'aka anụ nụ rime Karaịsi Jizosi.

19 Anụ mėsni bekwnu ke Enine Nso.

20 Anụ ledna izi owhnurninya anya.

21 Anụ tule kpakara nhne, anụ nwukwaru nhne ke buru oma aka rikne,

22 kọvu zeru kpakara nhne ke buo oma.

23 Chiokike ke udno n'iwhuru a jaabita anụ nsọ n'apna ke zuru ozu. Chiokike bita enine anụ, nụ mkpuru ovu nụ anọ-ernalu anụ n'apna nwée oru tem dọ ige Nyenwe aị Jizosi Karaịsi jaava.

24 Nye wam sukwuru anụ bụ nye kwesiri okwnata ovu, o jeeme nhne ka.

25 Rumu nda aị, anụ bikno, kpenu aị okpukpe.

26 Anụ bekwutaru ernalu anụ lele ele sno Karaịsi.

27 M ji m rewhna Nyenwe aị naakaa anụ gwnu okwukwo izi ka nụ nsni kpakara rumu nda.

28 Oru ke Nyenwe aị Jizosi Karaịsi dazigidnenu anụ.

**Okwukwo izi
ke Ebo
Pölu gbazennu
Ele Teşalonika
Nhne gbasiri
okwukwo izi ka**

Pölu panizoru nọtunu Chiokike mmamma kwnornu okwnata mkpöma nù ọwhnun'anya ele Teşalonika ke nooso oso ige ọbula (1:3). Ọ bụ n'ezi nù be naagawhe agida mmekpehni, Pölu naakanù be nù Chiokike nọtule okwnata mkpöma be nwernu nù hne ọ zị, ọ zá naata be awhnụwhnu (1:4,5).

Be whnurnu okwukwo izi ke otu badnù karù nù Pölu gbarù, ke nookwu nù Nyenwe aị valẹm (2:2). Kọvu Pölu nọodo be aka nù nsni be kwékọ nye ọbula duwhu be, kwnornu nù Nyenwe aị jáava tem “nye ojo wam” whụya iwhe (2:3).

Pölu jiri okpukpe mesni okwukwo izi ka (3:16).

Nhne zị n'okwukwo izi ka

Obekwu ikwu (1:1,2)

Otu mmamma nù okpukpe (1:3-12)

Nyenwe aị yáavage (2:1-12)

Buru nye be kwesiri okwnata mkpöma (2:13-17)

Kpe okpukpe, rnù masị ẹrnu (3:1-15)

Okpukpe ipne-aznù (3:16-18)

¹ Mawa, Pölu, nù Saịlasi nù Timoti naagba okwukwo gbaz-

nenu ọgbako Chiokike ke zị nù Teşalonika, anù ele Chiokike Nda aị nù Nyenwe aị Jizọsi Karaịsi.

² Oru nù udno ke hi n'aka Chiokike Nda aị nù Nyenwe aị Jizọsi Karaịsi dazịgidnenu anù.

Otu mmamma nù okpukpe

³ A kwesiri nọtunu Chiokike mmamma nù risi anù ige ọbula, ke kakwo kwnornu nù okwnata ovu anù nooso oso kpakara ọbochi lele kpa ọwhnun'anya anù nooso masị oso n'ẹhni ibne anù.

⁴ A ji anù noolu ọnu n'esilawuru ọgbako Chiokike kwnornu nù okwnata ovu anù gwuzo kwem nù ruwhnu ọkpakna ẹhni nù nhne ọrnurna anù naagawhe.

⁵ Ka neegesi nù ikpe Chiokike zị snam, ke kpa-yarù, be jọogwnusi anù nù ele kwesiri ọ bna ẹli-eze Chiokike ke anù kwno naata awhnụwhnu.

⁶ Chiokike bụ nye zị snam. O jaakpakna ele naakpakna anù ẹhni.

⁷ O jeeme anù ele be naakpakna ẹhni zukwaru inwe, ma aịla masị. Ka jọobu nga Nyenwe aị Jizọsi jaava hite n'oligwe, ya nù ele enine izi a zị rikne nù lele bẹkwnu noowu va-a-a.

⁸ Ọ jaata kpakara ele máa Chiokike awhnụwhnu nù ele zá noobno nsni izi ọma gbasiri Nyenwe aị Jizọsi.

⁹ Ọ jaata be awhnụwhnu okwnukokwnu, chịma be nù ruwhnu Nyenwe aị nù igwugwu ke iknernema a.

¹⁰ N'ọbochi ọ jaava, ele ke a zị nsọ nụ kpakara ele kweru nụ ya jeenye a igwugwu, jaa a mma. Anụ joosno ele kweru ekwe kwnornu nụ anụ kweru izi ọma a znirni anụ.

¹¹ Ka bụ nhne a vu n'ovu neekpenu anụ okpukpe ige ọbula, ma Chiokike aị gwnụsi anụ ele kwesiri osukwu ikwu a, hite n'iknerna a mee kpakara nhne ọma anụ vu n'echiche mezu nụ kpakara nhne anụ neeme bụru nhne hi n'ọkwnata ovu.

¹² Ka bụ ma be znarni rẹwhna Nyenwe aị Jizọsi kwnornu nụ anụ, ma anụ kwnornu ya, hite n'oru Chiokike aị nụ Nyenwe aị Jizọsi Karaịsi.

2

Badnu wam ke noolulu Iwu

¹ Nhne gbasiri ọvuva ke Nyenwe aị Jizọsi Karaịsi nụ kpa a jeeznkwnusi a, a naariasno anụ rụmu nda aị,

² mkpọma lákọ anụ mini, ogwnu tũko anụ kwnornu agwna izi ọwhnurninya, mọbu izi berere, mọbu ọkwukwo izi be naakaa nụ a gbarụ, ke naakaa n'ọbochi Nyenwe aị jeehieha whelem.

³ Anụ kwé nye ọbula duwhu anụ n'apna ọbula, kwnornu nụ ọbochi Nyenwe aị jeehieha jáava tem okne olulu wam nụ nye wam noolulu iwu va. Nye wam bụ nye Chiokike jaata awnụwhnu ọkwnukokwnu,

⁴ O joovulizọ ẹhni a olu megidne kpakara chi ele badnu neekpenu. O joogwu-zote ẹhni a n'Oro Nsọ Chiokike kaa nụ ọ bụ Chiokike.

⁵ Anụ chenwanya nụ m kannu m anụ nhne ka nga me nụ anụ zị.

⁶ Anụ magwu nhne noobnosni a ma ọ gharu ọ whụya iwhne kịtna, kọvu be jeegesi nye ojo wam n'ige kwesiri.

⁷ Kwnornu nụ rikne nye wam noolulu iwu nọornu ẹrnu nụ mgwugwa kịtna, kọvu nye wam ke noobnosni a jaazi kọriri noobnosni a tem be gweme a n'apna.

⁸ Ige wam be jookpume nye wam noolulu iwu, nye Nyenwe aị Jizọsi jeeji inwe ke ọnu a gbu nụ hite n'onwu va-a ke ọvuva a.

⁹ Nga nye wam noolulu iwu jaava, Ekwensu jeegesi ẹrnu ndu-ẹhni ọ kpahie anya zị ọdo n'odo nụ nhne elekema nụ ẹrnu tũ n'anya,

¹⁰ nụ kpakara ẹrnu ojo o jeeji nooduwhu ele nọonwu ọnwu. Be whu etekne kwnornu nụ be kwéle o kweru ezi ọka ma Chiokike znọhia be.

¹¹ Kam kpayarụ, Chiokike ziznenu be rikne o mee nhne bụo ọma ma be kweru aghalaghal,

¹² ka bụ ma kpakara ele kwéle o kweru ezi ọka, ele whnurnu aruru-ẹli n'anya bụru ele ikpe Chiokike marnu.

Gwuzosi rikne

¹³ Kọvu a nọtunu Chiokike mmamma ige ọbula kwnornu

anụ rụmu nda aị, ele Nyenwe aị whnụrnu n'anya. Hite n'ọpanizo, Chiokike hōhiaru anụ ma ọ znōhia anụ hite n'ernu Enine Nsọ ke neeme anụ ziri nsọ, kwnornu nụ anụ kweruru ezi ọka.

¹⁴ Kam kpayarụ, o suk-wuru anụ hite n'izi ọma aị, ma anụ kehia igwe n'igwugwu Nyenwe aị Jizọsi Karaịsi.

¹⁵ Rụmu nda aị, anụ gwuzoru kwem, anụ jikwasi nhne a znirni anụ rikne, hite n'ikwu-ọnu mọbu ọkwukwo izi a gbarụ.

¹⁶ Kịtna, Nyenwe aị Jizọsi Karaịsi n'iwhuru a nụ Chiokike Nda aị, nye whnụrnu aị n'anya, hite n'oru o nyernu aị nụ olile anya bụru ọma, mee a gwuzosi rikne,

¹⁷ gba anụ inwe, mee anụ gbasị rikne nụ kpakara ernalu ọma nụ ikwu-ọnu.

3

Anụ kpenu aị okpukpe

¹ Ke ipne-aznụ, rụmu nda aị, anụ kpenu aị okpukpe ma izi Nyenwe aị gbasia k'agida, nwernu masị igwugwu a lele kpa ọ zị n'esilawuru anụ.

² Kpe masị ma Chiokike dōhia aị n'aka ele ojo nụ ele aruru-eli, kwnornu nụ ọ bụo kpakara badnụ nwernu ọkwnata ovu.

³ Kọvu Chiokike bụ nye kwesiri ọkwnata ovu, o jeenye anụ rikne, kpusni anụ hite n'aka nye ojo wam.

⁴ A tükwasiri Nyenwe aị mkpoma nụ anụ zị kọriri neeme neezne nụ ruwhnu

kpakara nhne a nyernu anụ n'iwu.

⁵ Nyenwe aị duru mkpoma anụ dū n'owhnnun'anya Chiokike nū ọsnuta mkpoma ke zị nū rime Karaịsi.

Ọ dọ aka nū nsnị gbasiri ime mgwu

⁶ Rụmu nda aị, a ji rēwhna Nyenwe aị Jizọsi Karaịsi neenye anụ iwu, anụ zeru nnwọ nda ọbula ke bụ nye ime-mgwu, nye zá noowu bụdnu lele kpa nhne a znirni anụ.

⁷ Kwnornu nū anū magwu kpa anū kwesiri o snornu nhne atụ aị. A bụo ele ime-mgwu nga aị nū anū zị.

⁸ A rige wiri nye ọbula ke a kwula ọgwo. Tnụnuma, a dọgburu ẹhni aị n'ernalu iwhehnie nū abali, nọornu ernalu ma a gharu ọ bụru ivu rinya nyee anū.

⁹ Ka bụo nū a nwée rikne nahoru anū nhne, kọvu ma a bụru ele anū ọomuhia nhne n'aka be.

¹⁰ Nga aị nū anū zị, a znirni anū nhne ka, "Ọ bụru nū nye ọbula ọjornu ernalu, o rí wiri."

¹¹ A nọonu nū agwna ele badnụ dazị etekne, be mée nhne ọbula, ele nookwu ọka gbásila be.

¹² A ji rēwhna Nyenwe aị Jizọsi Karaịsi neenye be iwu, be gbasị rikne, rñuhia nhne be jeeri.

¹³ Rikne gwu anū rụmu nda aị n'ome nhne bụru ọma.

¹⁴ Nye ọbula ke zá naabita nhne a gbaru n'okwukwo izi ka, anū hnata nye wam ama.

Anụ nụ nye wam mékọ nhne
 ọbula, ma iwhnerne tų a.

¹⁵ Kọvu anụ méé be ele irno
 anụ, anụ zni be ezni lele rụmu
 nda.

Obekwu ikwu ipne-aznụ

¹⁶ Kịtna, Nyenwe aị ke
 udno n'iwhuru a nyee
 anụ udno ige ọbula n'apna
 ọbula. Nyenwe aị dazigidnenu
 kpakara anụ.

¹⁷ Mawa, Pọlu, ji aka m
 gba obekwu ikwu ipne-aznụ
 ka. Ka bụ nhne neegesi nụ
 mawa gbarụ obekwu ikwu
 ipne-aznụ ke me gbarụ.

¹⁸ Oru Nyenwe aị Jizọsi
 Karaịsi dazigidnenu kpakara
 anụ.

**Okwukwo izi
ke Mbom
Polu gbaznenu
Timoti
Nhne gbasiri
okwukwo izi ka**

Timoti snornu Polu zne izne, rnu masi ɛrnu izi ɔma Karaɛsi. Timoti nu Polu nwernu otu okwnata mkpoma, kam kpa-yaru, Timoti nu lele nnwo ke Polu muru (1:2). Timoti bu nye ɛrnu ke Polu kwnataru mkpoma k'agida.

O bu n'ezi nu Polu gbaz-nenu Timoti okwukwo izi ka, kovu o kwuru agida nhne ke gbasiri kpakara ogbako Chiokike. Polu kahiaru kpa be jeeji nohoru ele risi ogbako Chiokike. O kaa nu ele Karaɛsi kwesiri neekpenu ibne be okpukpe. A nwernu otu Chiokike nu Karaɛsi Jizosi, nye nwernu rikne o kwuru aɛ zneknusi Chiokike.

Nhne zi n'okwukwo izi ka

Obekwu ikwu (1:1,2)

Budnu ogbako Chiokike (1:3--3:13)

Nhne tugwaru otugwa ke okpukpe aɛ (3:14-16)

Polu znirni Timoti ezni (4:1--6:21)

¹ Mawa, Polu, nye izi Karaɛsi Jizosi lele kpa Chiokike Nye Oznohia aɛ nyernu n'iwu nu ke Jizosi Karaɛsi nye bu olile anya aɛ.

² M naagbaznenu Timoti nnwo m n'ezi n'okwnata ovu okwukwo.

Chiokike Nda aɛ, nu Nyenwe aɛ Jizosi Karaɛsi nyee i oru, obirizi nu udno.

*Anu zeru iznizni
aghalaghala*

³ Lele kpa me kannu i nga me neezne Masidonia, daziri n'Efesosi ma i bnosni ele zni iwu aghalaghala ma be kwusi o zni nhne nu kpam.

⁴ Be tuwhuma ige o zni otnutnu ruwhere nu osnusno omumu kwó okwo. Kpakara nhne ka, tnunuma be jeeme ɛrnu Chiokike ke hi n'okwnata ovu neezne nu ruwhnu, be noovuya okewa.

⁵ Ka bu ma i zni ele badnu be whnurita n'anya hite nu mkpoma zi snam nu ovu buru ɔma nu ezi okwnata ovu.

⁶ Agwna ele badnu kpawhulem, snornu ikwu-onu etekne.

⁷ Be noopio o buru ele zni iwu, kovu be máa nhne be nookwu, o bu n'ezi be nookwusi a rikne.

⁸ A magwu nu iwu buru ɔma, o buru badnu mekwa a nkari.

⁹ A magwu nu be kwnóge ele mee mma bita iwu, kovu ele noolulu iwu nu ele risi rikne, ma ele máa Chiokike, nu ele mmehie, ele zila richna, ele tu ogwnu Chiokike, ma ele noogbu badnu, ele noogbu nne nu nda be,

¹⁰ ele neeme oyi, nu omekorita nyerukna nu ibne a, nu omekorita nyerinya nu ibne a, ele neerne ohi, ele aghalaghala, ele kwú ezi oka n'ikpe, nu kpakara nhne

ọbula ke neemegidne iznizni ka zị snam.

11 Iznizni ka bụ izi ọma wam ke zị igwugwu ke hi n'aka Chiokike nye nwe ngọzi. Chiokike nyernu m izi ọma ka n'aka me bịta.

Oru Nyenwe aị nyernu Pọlu

12 M nọotunu Karaịsi Jizọsi Nyenwe aị mmamma nye nyernu m rikne, nye gwnụsiri m nye kwesiri ọkwnata ovu, mee m bụru nye nọornu a ẹrnu.

13 Ọ bụ n'ezi nụ m bụ m nye nookwulu a nụ mbọm nụ nye kpaknarnụ ele ke a ẹhni, nụ nye mee nhne rikne, kọvu ọ dọnu m obirizi kwnornu nụ m mernu m kpakara nhne ka nụ ọma ama nụ ọkwe ekwe.

14 Nyenwe aị wụkwasiri m oru a zị agịda nụ ọkwnata ovu nụ ọwhnun'anya a ke zị nụ rime Karaịsi Jizọsi.

15 Ka bụ ikwu-ọnu ke kwesiri ọkwnata ovu, ke nye ọbula kwesiri o kweru, Karaịsi Jizọsi varụ n'ọwa ọ znohia ele mmehie, me bụ nye risi ele mmehie.

16 Ka bụ nhne kpahiaru Chiokike jiri dọnu m obirizi, me nye risi ele mmehie ma Karaịsi Jizọsi gesi ọsnuta ovu a zị ogologo ma m bụru m nhne atụ nyee ele jeekweru nụ ya ma be nwehia bụdnu kwó okwo.

17 Kịtna, eze ke zị ọkwnukokwnu, nye nwú ọnuwu, nye be whnụ anya, nye ya nụ nsnunu a bụ Chiokike, ya nụ nsnunu a nwe igwugwu nụ ọson'anya tim tọm. Amim.

18 Timoti nnwọ m, m neenye i iwu ka lele kpa ọwhnurninya be whnurnu gbasiri i n'ige wheru ewhe, snornu nhne be kwuru gbasiri i, ma i nwernu rikne lụ ọgwnu ọma lele nye Karaịsi.

19 Jikwasi ọkwnata ovu i rikne nụ ovu zị snam. Agwna ele badnụ ghasarụ be, ke kpahiaru ọgbo ọkwnata ovu be kpuru.

20 N'esilawuru be bụ Haiemenousi nụ Alẹkizanda ele me sịgbasiri n'aka Setani ma be mụhia gharụ o kwulu Chiokike.

2

Kpa be kpe okpukpe

1 Ke mbọm, m naakaa, anụ kpe okpukpe nụ risi kpakara ele badnụ, nọorio aririo, nọotunu Chiokike mmamma.

2 Anụ kpenu ele eze nụ kpakara ele zị n'ọchichi okpukpe, ma a wuru bụdnu udno nụ bụdnu bụru ọma, nọotu ogwnu Chiokike.

3 Ka bụ nhne bụru ọma, ke nọoso Chiokike Nye Ọznohia aị mkpọma n'ọnu,

4 kwnornu nụ Chiokike noopio ma ọ znohia kpakara ele badnụ, ma be mahia ezi ọka.

5 Otu Chiokike zị, otu nye ibno zị n'esilawuru Chiokike nụ badnụ. Nye ibno wam bụ Karaịsi Jizọsi,

6 nye gweru ẹhni a nyega ma ọ bụru nhne ọgbahia ke kpakara badnụ. Chiokike gesiri aị ka n'ige kwesiri.

7 Ka bụ nhne mernu Chiokike hōhiaru m ma m

buru nye nọokpo okwo nū nye izi. Ka bụ ezi ọka, ọ bụo aghalaghala, Chiokike hōhiaru m ma m buru m nye znī nhne ke ezi ọka ọkwnata ovu ke ele bụo ele Ju.

⁸ M noopio nū rime ọgbako ọbula ele rukna chīlizo aka lawuru zī nsọ n'okpukpe énwē ovu owe ẹhni nū agigo.

⁹ M noopio ele rinya masị yiri ẹyi lele kpa o kwesiri, ke buru ọma n'anya. Ele rinya kpá risi gburu okne ọnu, mọbu tūru golu mọbu palị, mọbu woru iwo gburu okne ọnu,

¹⁰ kọvu nū ẹrnu ọma, bụ ke kwesiri ele rinya ele ka nū be neekpenu Chiokike.

¹¹ Ele rinya kwesiri ọ daziri bii, mụhia nhne hite n'orube risi.

¹² M kwéle m nyerinya znī nhne mọbu ziri nū risi nyerukna, o kwesiri ọ daziri bii.

¹³ Kwnornu nū Chiokike beru ọsno kpụ Adam, omekwo, ọ kpụ Ivu.

¹⁴ Setani dúhiele Adam, kọvu o duhieru nyerinya wam, ọ ghọ nye mmehie.

¹⁵ Kọvu Chiokike jọoznohia ele rinya hite n'omumu nnwọ* ọ buru nū be jeenwe ọkwnata ovu, nū ọwhnun'anya, nū ọzi nsọ nū anya udno.

3

Ele risi ọgbako Chiokike

¹ Ka bụ ikwu-ọnu ke kwesiri be kwnata ovu. Ọ buru nū nye ọbula ke pioru ọ buru nye

risi ọgbako Chiokike, o noopio nhne buru ọma.

² Kịtna, nye risi ọgbako Chiokike jọoburu nye nwée ọtna, nye nwernu otu nnwerne, nye anya udno, nye mkpọma dūru ẹli, nye be nọosonu anya, nye nookwubna ele izne, nye nwernu rikne o znī nhne,

³ nye nwọ okne manya, nye méé nhne rikne, enwerne badnū, nye zá nookno ọka, nye whnúge iwai n'anya.

⁴ Nye risi ọgbako Chiokike jọoburiri nye nwernu rikne chikwa ezi-nū-oro a nkari, rumu a jọoburu ele noobnonu a nsni, nọoso a anya.

⁵ (Ọ buru nū nye ọbula nwée rikne chikwa ọro a nkari, ndaa kpa o jeenwe rikne legidne ọgbako Chiokike anya?)

⁶ Ọ jọoburu nye varu ikne n'ọgbako Chiokike, ọ zī o mee oknomokno, dnabna n'otu ikpe ọmuma wam lele Ekwensu.

⁷ Ọ jọoburu nye nwernu rẹwhna ọma n'ederezi, ọ zī ọ dnabna nū nhne iwhnerne nū mbita Ekwensu.

⁸ Ele dikneni masị jọoburu ele be nọosonu anya, ele ezi ọka, ele nwọ okne manya, ele zá noopio iru zīle ezi.

⁹ Be jeeji mkpọma buru ọma jidnesi ezi ọka ke Chiokike nyernu aị rikne gbasiri ọkwnata ovu.

¹⁰ Be jeebe ọsno kpa be iru, ọ buru nū ọ zá nhne ke megidnerne be, be buru dikneni ọgbako Chiokike.

* 2:15 hite n'omumu nnwọ mọbu nū omumu nnwọ

11 Ele nnwerne be masi j̄oburu ele nwernu ọson'anya, ele zá nookwu ọka etekne, k̄ovu ele ovu ọma, ele be kwe-siri ọ t̄ukwasi ovu n̄u kpakara nhne.

12 Nye dikneni j̄oburiri nye nwernu otu nnwerne, nye n̄echikwa r̄umu a n̄u ezi-n̄u-oro a nkari.

13 Ele n̄ornu ẹrnu be nkari jeenwehia ovulizo n'olu buru ọma, be joogwuzosi rikne n'okwnata ovu ke zi n̄u rime Karaisi Jizosi.

Nhne tugwaru otugwa ke okpukpe ai

14 M naagbanu i ọkwukwo ka, ọ bu n'ezi n̄u m neele anya n̄u m jaava wara wara.

15 K̄ovu ọ buru me gbu ọkwnu, m naagba ma i mahia kpa ele badnu jaabiata ẹhni be n̄u ezi-n̄u-oro Chiokike ke bu ọgbako Chiokike ke zi budnu, ke bu nsn̄usnu oro n̄u nt̄u-eli ezi ọka.

16 A zá neesigha ọka, nhne tugwaru otugwa ke okpenu Chiokike zi agida,

Jizosi whuyaru iwhne n'anọ-ẹhni,

Enine Nso gbaru akebne a,

ele enine izi whn̄urnu a,
be kporu okwo a
n'esilawuru kpakara mba,

ele badnu kweru a n'owa,
Chiokike kwuru a la
n'oligwe n'igwugwu.

4

Polu znirni Timoti ezni

1 Enine Nso kwuru kpa o dnornu anya n̄u ige ipne-aznu n̄u ele badnu j̄owohoga n'okwnata ovu snornu enine ke nooduwu n̄u nhne ele renwu ọjo neezni.

2 Ka bu iznizni ke ele ruwhnu lawuru neezni n'aghalaghala, ele jiri rugwe bekwnu da akoniche be.

3 Be kwéle ele badnu lu nnwerne m̄obu gb̄o nzi, be kanu ele badnu be ri agwna wiri, ke Chiokike keru ma ele kweru ekwe gweru ọtu mmamma ri, bu ele mahiaru ezi ọka.

4 Kwnornu n̄u kpakara nhne Chiokike keru buru ọma, ọ zá ke badnu j̄eri, ọ buru n̄u o gweru a, tu mmamma.

5 Be ji ikwu-onu n̄u okpukpe Chiokike biata wiri ns̄o.

6 Ọ buru n̄u i kanu r̄umu nda kpakara nhne ka, i j̄oburu nye izi Karaisi Jizosi ọma, nye be jiri ezi ọka ke okwnata ovu n̄u iznizni ọma ke i snornu znu.

7 Ọ zá nhne i ji ọtnutnu ruwhere etekne n̄u ọka ele nnwerne okno badnu mee, zn̄uhia ẹhni i ma i buru nye n̄otu ogwnu Chiokike.

8 Kwnornu n̄u ọznuznu ke anọ-ẹhni nwernu iru maṭi, k̄ovu ọmahia Chiokike bnarnu iru n̄u kpakara nhne, o vugwu mkwna ke budnu ka n̄u budnu ke jaava.

9 Ka bu ikwu-onu ke be kwesiri ọ t̄ukwasi ovu, ke badnu kwesiri o kweru.

10 Ka bu risi nhne a kwno n̄odoli n'ernu, naagba ọtna, n̄u olile anya ai zi n̄u Chiokike

ke zị bụdnu, Nye Ọznohia ke kpakara badnu, ke kakwo ke ele kweru ekwe.

¹¹ Zni kpakara nhne ka, nyee iwu ma ele badnu mee nhne i neezni.

¹² I kwé nye ọbula ledna i anya kwnornu nụ i bụ nnwọ ikoro. Kọvu bụru nhne atụ ke ele kweru ekwe, ma n'ikwu-ọnu, nụ bụdnu, nụ ọwhnun'anya, nụ ọkwnata ovu, nụ ọzi snam.

¹³ Tem m va, gweru ẹhni i yisi nụ ọgwu nhne be gbarụ n'ọkwukwo nsọ nụ rime ọgbako Chiokike, nọokpo okwo, neezni nhne.

¹⁴ I léwhu nkesi i anya, ke be nyernu hite n'izi ọwhnurninya wam nga ele okno badnu tükwasiri i aka nụ risi.

¹⁵ Anya dụ i ẹli gbasiri kpakara nhne ka, gweru ẹhni i yisi neeme be ma kpakara ele badnu whnụ nụ i nooso oso.

¹⁶ Ledu anya nụ bụdnu i nụ kpakara nhne i neezni. Gbalị neeme kpakara nhne ka, kwnornu nụ i mee kpm, i jọoznohia ẹhni i ma ele nọonu nhne i neezni.

5

Kpa a jeemesno ele badnu

¹ I bígbo nye okno badnu rikne rikne, kọvu kwunu a ọka lele nụ ọ bụ nda i. Mesno rụmu ikoro lele rụmu nwene.

² Mesno ele rinya okno badnu lele nụ be bụ nne i, gweru ọzi rịchna sọ rụmu oknornokno anya lele rụmu nwene i rinya.

³ Lekọta ele rinya nzi be nwurnu ele zị nụ mkpa anya nkari.

⁴ Kọvu ọ bụru nụ nyerinya nzi a nwurnu nwernu rụmu mọbu rụmu rụmu a, rụmu be beru ọsno mụhia kpa be kpenu Chiokike, hite n'olekasi ele murnu be anya, lele kpa ele murnu be jiri lekasi be. Ka bụ nhne nọoso Chiokike ovu n'ọnu.

⁵ Nyerinya nzi a nwurnu ke nwée badnu ọbula neelek-wasi Chiokike anya, neekpe okpukpe iwhnehnie nụ abalị ma Chiokike yisinu a aka.

⁶ Kọvu nyerinya nzi a nwurnu ke noowu bụdnu ke nọoso a n'ọnu nwurnu ọnwu kpa ọ zị bụdnu.

⁷ Kanụ be mee kpakara nhne ka, ma be mee nhne bụru ọma.

⁸ Ọ bụru nụ nye ọbula nwée rikne legidne ele ọro a, ke kakwo ele ezi-nụ-ọro a, nye wam gọnahorulam ọkwnata ovu, nye máa Chiokike ka nye wam mma.

⁹ Nyerinya ke nzi a nwurnu ke gbarụ nri awha isunu, be gwnụsi a n'esilawuru ele nzi be nwurnu, nye kwesiri nzi a kwnata a ovu.*

¹⁰ nye be jiri ẹnu ọma a mahia, nye nọoznu rụmu a nkari, neelekọta ele izne nkari, snornu ele nsọ snụ ọchi be, nye neeyinu ele zị nụ mkpa aka, nọornu agida ẹnu ọma.

¹¹ Kọvu i gbási rẹwhna oknornokno nye nzi a nwurnu n'ọkwukwo. Kwnornu nụ nga anọ-ẹhni kpalizọru

* 5:9 mọbu nye nwernu otu nzi

be, be jéenwe rikne gwuzonu Karaïsi, be pio ọ gbọru nzi berere.

¹² Be bụru ele ikpe marnụ, kwnornu nụ be luluru mkwna be kweru nụ mbọm.

¹³ Tụkwasi n'olu ka, be bụru ele nwée nhne be mee, be neezne n'oro n'oro noozno izno, nookwu nhne gbásìla be, nookwu nhne be kwésile o kwu.

¹⁴ Kam kpayaru, m neeznikwa ele oknornokno ele nzi be nwurnu, be gbọru nzi berere, mụhia rụmu, legidne ọro be anya ọ zì be nyee nye irno wam oghere ọ kaja be nụ ọgbako Chiokike.

¹⁵ Agwna ele rinya wam snornulem Setani.

¹⁶ Ọ bụru nụ nyerinya ọbula nwernu nnwerne nzi a nwurnu n'oro a, o yinu be aka, o kwé ọgbako Chiokike vuru ivu nye wam, kọvu ma ọgbako Chiokike lebna anya n'oyinu ele rinya nzi be nwurnu ele zì nụ mkpa aka.

¹⁷ Ele okno badnụ, ele neelegidne ọgbako Chiokike anya kwesiri be sọnu be anya okpukpu lawuru, ke kakwo ele nọokpo okwo izi ọma, neezni nhne.

¹⁸ Kwnornu nụ ọkwukwo nsọ kwuru kpa, “Ị knésni ọnu ehni ke nọzosna ikpa,” nụ “Nye ọnu kwesiri ọgwo ọnu a.”

¹⁹ Ị kwéko nhne ọbula be bnornu nye okno badnụ, okwolem ma be nwernu ele akebne lawuru mọbu ọto.

²⁰ Bigbo nye okno badnụ ọbula mernu mmehie nụ ruwhnu ọhna, ma ele berere mụhia nhne.

²¹ M noogwuzo nụ ruwhnu Chiokike nụ Karaïsi Jizọsi nụ ele enine izi Chiokike hōhiaru neenye i iwu ka, bīta kpakara nhne ka me nyernu ị, i lé badnụ anya nụ ruwhnu kpa ị neeme be.

²² Ị mée wara wara nọotukwasi ele badnụ aka, i snó ele berere nụ mmehie be. Kọvu bīta ẹhni ị nsọ.

²³ Ị nwọma mini kpoi, kọvu nwọ manya matị kwnornu nụ ruwho i nụ ẹhni igbugbu ị naaria ige ọbula.

²⁴ Mmehie agwna ele badnụ kpumernu, beru be ọsno neezne n'ikpe, kọvu mmehie agwna ele berere sno be n'aznụ.

²⁵ Kpam masị, ọnu ọma whuyaru iwihne, ọ bụru nụ be whóge iwihne, be nwée rikne kpusni be.

6

¹ Nye ọbula ke bụ ọhi whnụ nụ ọ nọoso nye nwe a anya lele kpa o kwesiri, ma be gharu ọ kaja rẹwhna Chiokike nụ iznizni a.

² Ele ọhi ke ele nwe be kweru nụ Chiokike lédna be anya, kwnornu nụ be bụ rụmu nda. Tnụnuma, be rñunu be ọnu ka mma kwnornu nụ ele neerihia mbnarna n'ọnu be bụ ele kweru ekwe, ele be whnurnu n'anya. Ka bụ nhne i kwesiri neezni, ma be neeme masị be.

Ọwhnu iwai n'anya

³ Ọ bụru nụ nye ọbula neezni iznizni aghalaghala, ke kwéle nụ n'iznizni ke nọotu ogwnu Chiokike nụ iznizni ke

zị snam ke Nyenwe aị Jizọsi Karaisi,

⁴ nye wam bụ nye oknomokno. Kọvu ọ máa nhne ọbula. Echiche a búo ọma, ka noodubna nụ okno ọka, nụ ọwho-anya, ọlu ọgwnu, ọka ọjo, anya ọjo,

⁵ ọdogbuta zị n'esilawuru ele ovu ọjo, ele tuwhuru ezi ọka. Be neeche nụ okpenu Chiokike bụ apna be jeeji neenwehia iru ke be.

⁶ Kọvu okpenu Chiokike nụ ruwho ojiji bnarnụ mbnarna k'agida.

⁷ Kwnornu nụ ọ zá nhne a vuru va n'owa, a nwée masi rikne vuru nhne ọbula whoga nụ rime a.

⁸ Kọvu ọ bụru nụ a nwernu wiri oriri nụ iwo o kpusni ẹto aị, ka kwesiri o ji aị ruwho.

⁹ Ele noopio ọ bụru ele eze naadnabna nụ rime ọrnurna nụ mbita, nụ agida nhne iwhnirniwhno ke naakpakna be ẹhni, ke noodubna ele badnụ nụ mwhu.

¹⁰ Kwnornu nụ ọwhnun'anya iwai bụ mgbarẹgwngwnu kpakara nhne ọjo zị ọdo nụ ọdo. Agwna ele noopio iwai k'agida kpawhuru n'okwnata ovu, gweru agida nhne igbugbu mekasi ẹhni be ẹhni.

Lụ ọgwnu ọma ke ọkwnata ovu

¹¹ Kọvu, jị badnụ ke Chiokike, gbanahoru kpakara nhne ka. Tnụnuma, snornu ome mma, ọtu ọgwnu Chiokike, ọkwnata ovu, ọwhnun'anya, ndidi nụ ọzi wọhnernerne.

¹² Lụ ọgwnu ọma ke ọkwnata ovu. Jikwasi bụdnu kwó okwo aka ke Chiokike nyernu i nga i kwuharu ọkwnata ovu i nkari nụ ruwhnu agida ele akebne.

¹³ Nụ ruwhnu Chiokike nye neenye kpakara nhne bụdnu, nụ Karaisi Jizọsi, nye gbaru akebne ọma nụ ruwhnu Pọtiosi Pailetị, m neenye i iwu,

¹⁴ bita nhne ka ma i gharu o nwe ntupo nụ ọtna tem Nyenwe aị Jizọsi Karaisi va,

¹⁵ nye Chiokike jeegweya n'ige ke a, nye nwe ngozi, nye neechi kpọi, Eze kakwo ele eze, nụ Nyenwe kakwo ele nwe.

¹⁶ Chiokike ke zị bụdnu ọkwnukokwnu, nye wu n'iwhe ke ọ zá nye nwernu rikne vadu ndundu, nye ọ zá nye whnuleru anya, mọbu whnuli a anya, ọson'anya nụ rikne bụru ke a tim tọm. Amim.

¹⁷ Dọ ele eze ke ọwa ka aka nụ nsni be búo ele oknomokno, be tükwasi ẹkwnu be ovu, ke jáazi tim tọm, kọvu be tükwasi Chiokike ovu nye naasama aka a neenye aị kpakara nhne bụru ọma ke a neeri.

¹⁸ Dọ be aka nụ nsni, be mee nhne bụru ọma, be bụru ele baru aba n'ome nhne bụru ọma, ele ovu ọma ke neekesi ele badnụ nhne be nwernu.

¹⁹ Be mee kpam, be nọtu ntụ-eli bụru ọma ke zị kwem n'ige naava, ma be nwehia bụdnu ke bụ ezi.

²⁰ Timoti, legidne nhne be yisiri i n'aka anya nkari.

Whọga nụ nhne ọbula ke
 neegweya ikwu-ọnu ke
 neemegidne ogwnu Chiokike
 nụ ọka iwahnirniwhno ke nụ
 lele nụ o nwernu akọniche,
 kọvu o nwée.

²¹ Agwna ele badnụ snornu
 a kpawhu n'ọkwnata ovu.

Oru Chiokike dazịnu anụ.

**Okwukwo izi
ke Ebo
Polu gbaznenu
Timoti
Nhne gbasiri
okwukwo izi ka**

Nu Okwukwo izi ke Ebo ka ke Polu gbaznenu Timoti, bu ke o gbaru lele okwukwo izi nda naagbanu nnwo o whuru n'anya (1:2,3), Polu pioru ma Timoti buru nye ogwu oma ke Karaisi, o nwe ndidi nga o naata awnuruwhu lele nye Karaisi (2:1,3). Polu gbadiyaru nne Timoti nu nne nne a, ele nwenu okwnata mkpoma nu Karaisi. Polu karu Timoti chenwanya nu ya Polu tukwasiri a aka a lawuru nu risi, ke neegesi nu Enine Chiokike noodu a nu eru a.

Agwina ele kweru nu Nyenwe ai dnabarnu nu mbita nye irno, kovu Polu doru Timoti aka nu nsu o gbanahoru kpakara onurna ke nooduwhu rumu ikoro (2:20-26; 3:1-9). O kanu Timoti o ziri kwem neezni izi oma, o bu n'ezi nu agida ele badnu jekweru (4:2).

Polu magwu nu ige mati o jonwu enwu kwnornu okwnata ovu a, kovu o nwenu ogwo eru (4:6-8). O buru nu a sno Karaisi nwu enwu, a joosno a ziri budnu, o buru nu a nwe ndidi, a joosno a chi lele eze (2:11,12a).

Nhne zi n'okwukwo ka

Obekwu ikwu nu okpukpe o kpenu Timoti (1:1,2)

Iwhnerne Nyenwe ai tuko i (1:3-18)

Buru nye ogwu oma Karaisi (2:1-26)

Kpa ele badnu joowu budnu be n'ige ipne-aznu (3:1-9)

Buru nye be kwesiri okwnata mkpoma (3:10--4:8)

Ezni ke aka Polu nu obekwu ikwu ipne-aznu (4:9-22)

¹ Mawa, Polu, nye izi Karaisi Jizosi hite n'echiche Chiokike, o ziyaru m me zni ele badnu gbasiri mkwna budnu ke zi nu Karaisi Jizosi.

² M naagbaznenu Timoti nnwo m me whuru n'anya okwukwo.

Oru, obirizi nu udno ke hi n'aka Chiokike Nda ai nu Nyenwe ai nu Jizosi Karaisi dazinu i.

Iwhnerne Nyenwe ai tuko i

³ M notunu Chiokike mmamma, nye me neekpenu hite n'ovu zi snam lele kpa ele nda m kpennu a, neekpe okpukpe iwhnehnue nu abali, neechenwanya i n'okpukpe m.

⁴ Me chenwanya anya-mini ekwna i, o notogwu m o whuru i anya ma ovu so m nonu.

⁵ M neechenwanya okwnata ovu i n'ezi, ke beru osno ziri nu rime nne nne i, Losisi, nu nne i Unisi, m kweru m nu o zi masi kpam nu rime i.

⁶ Kam kpararu, gwakne bekwnu ke nkesi Chiokike, ke

o nyernu i nga me tukwasiri i aka m nu risi.

⁷ Kwnornu nu Chiokike nyége ai enine ke ogwnu, kovu enine ke iknerna nu owhnun'anya nu anya udno.

⁸ Bikno, iwhnerne okpo okwo nhne gbasiri Nyenwe ai tuko i, mōbu iwhnerne me nye ikelu a. Kovu snornu m ta awnūwhnu n'izi oma hite n'iknerna Chiokike nyernu i.

⁹ Chiokike znōhiaru ai, sukwu ai ma a wuru budnu zi nsō. Ka buo hite nu nhne obula ke a mernu, kovu o bu mmuma a hite n'oru a. Ka bu oru ke o nyernu ai nu Karaisi Jizosi su owa panizoru.

¹⁰ Kītna, o mernu ka whuya iwhne nga Nye Oznohia ai Karaisi Jizosi whuyaru iwhne, nye megburu enwu gweyanu ai budnu ke kwó okwo, ke noonwu n'iwhne ke izi oma.

¹¹ Me jiri buru nye nōokpo okwo izi oma ka, nu nye izi nu nye znī nhne.

¹² Kam kpayaru, me naata awnūwhnu nu rime ikelu. Kovu iwhnerne zá nōotu m, kwnornu nu m magwu m nye me kweru nu ya, m magwu m masi nu o nweru rikne o bīta nhne me yisiri a n'aka* du obochi wam.

¹³ Hite n'okwnata ovu nu owhnun'anya Karaisi Jizosi, bīta kpakara nhne i nurnu n'onu m, ma be buru nhne atu ke iznizni zi snam.

¹⁴ Enine Nsō yinu i aka bīta nhne oma wam be yisiri i n'aka.

¹⁵ I magwu nu kpakara ele zi nu Esia ghasaru m, ma Figelusi nu Hamogenisi.

¹⁶ Nyenwe ai donu ezinū-oro Onesiforosi obirizi kwnornu nu o mesiri m ovu rikne, ijigba be turu m zá nōotu a iwhnerne.

¹⁷ Nga o zi nu Rom, o piosiri m rikne tem o piohia m.

¹⁸ Nyenwe ai donu a obirizi n'obochi ikpe. I magwu nkari nkari kpa o yinu m aka n'apna zi odo n'odo n'Efesosi.

2

Nye ogwnu oma ke Jizosi

¹ Timoti nnwō m, gbasiri rikne n'oru ke Karaisi Jizosi.

² Kpakara nhne i nurnu me kwuru nu ruwhnu agida ele akebne, znī ele kwesiri be kwnata be ovu, ele jeenwe rikne znī masi ele berere.

³ Nwe okasi ovu n'awnūwhnu lele nye ogwnu oma ke Karaisi Jizosi.

⁴ O zá nye obula ke bu nye ogwnu ke neeme nhne nye buo nye ogwnu neeme, ma o mee nhne jōosno nye risi a ovu n'onu.

⁵ Kpam masi, o zá nye naagba eso ke jeenwe rikne kpuru okpu mmeri o buru nu o gbáge eso lele kpa iwu eso kwuru.

⁶ Nye ernu ekwnu ke nōornu ernu nkari kwesiri o beru oso ri mkpuru mbom ke hi n'ekwnu a whuya.

⁷ Tule nhne me nookwu, Nyenwe aijeenyē i oghohia nu kpakara nhne.

* 1:12 nhne me yisiri a n'aka mōbu nhne Chiokike yisiri n'aka m

⁸ Chenwanya nū ka bụ izi ọma m, Jizọsi Karaịsi nye hiri n'avnurnu Devidi, hiri n'ẹnwu lizọ.

⁹ Kwnornu nū izi ọma ka, m naata awnūwhnu dū kpa be tūru m ijigba lele nye noolulu iwu, kọvu be tūge ikwu-ọnu Chiokike ijigba.

¹⁰ Ka bụ nhne mernu me neenwe nkasi ovu kwnornu ele wam Chiokike hōhiaru, ma be nwehja ọznohia ke zị nū Jizọsi Karaịsi nū igwugwu kwó okwo.

¹¹ Ka bụ ikwu-ọnu ke kwe-siri ọkwnata ovu,

Ọ bụru nū a snornu a nwū,
a joosno a ziri bụdnu.

¹² Ọ bụru nū a nwe ndidi,
a joosno a chī lele eze.

Ọ bụru nū a gōnahoru a,
ọ jōgonahoru aị.

¹³ Ọ bụru nū a nwée ọkwnata ovu,
o jeekwesi kōriri ọkwnata ovu,

kwnornu nū ọ jōgonahoru ẹhni a.

*Nye ẹnu ke Chiokike
naakweru*

¹⁴ Chenwanyanū be kpakara nhne ka. Dọ be aka nū nsñi nū ruwhnu Chiokike gbasiri ọdogbuta n'ikwu-ọnu, ọ zá mbnarna ọbula zị a, o noolulu ele noobno nsñi.

¹⁵ Gbalị gweru ẹhni i gesi nū ruwhnu Chiokike lele nye ẹnu Chiokike nakweru, nye iwhnerne zá nọtụ, nye nwernu rikne zni ikwu-ọnu ke ezi ọka nkari.

¹⁶ Zeru ọka iwhnirniwhno nū ọka etekne, kwnornu nū

ele nookwu a neegweme ẹhni be hne Chiokike zị.

¹⁷ Iznizni be naagbasa lele bẹkwnu ọkochi, * ke Haiemenousi nū Filetusi zị n'esilawuru ele neezni a.

¹⁸ Ka bụ ele kpawhuru n'ezi ọka. Be nookwu nū olizọ n'ẹnwu ele nwurnu ọnwu whelem, be naakwnadna ọkwnata ovu agwna ele badnū.

¹⁹ Kpa ọ zị, ntụ-ẹli Chiokike gwuzo kwem, ke nwernu akara ka, “Chiokike magwū ele ke a,” nū “Nye ọbula ke noosukwu rẹwhna Nyenwe aị, hi nū nhne ojo whūya.”

²⁰ N'oro hna okpotokpo, ọ bụo agbūgba wiri golu nū agbūgba wiri siliva bụ nhne zị a kpọi, kọvu okiko isisi nū rịzna, agwna be ji nọornu ẹnu zị mkpa, agwna be ji nọornu ẹnu zila okne mkpa.

²¹ Kọvu ọ bụru nū badnū ọbula snūsnama ẹhni a nkari, be jeeji a nọornu ẹnu zị mkpa, ke zị nsọ, be jiknernu a, Nyenwe a jeeji nọornu ẹnu ọma ọbula.

²² Gbanahoru kpakara nhne ojo ke nọogwnu ele ikoro. Gbasnornu ome mma, nū ọkwnata ovu, nū ọwhnun'anya nū udno, jị nū kpakara ele neekpenu Nyenwe aị nū mkpoma zị rịchna.

²³ I kwū ọka ọbula ke iwh-nirniwhno nū agirigo nwée risi, kwnornu nū be noovuya okno ọka.

²⁴ Nye izi Nyenwe aị jọoburu nye nookno ọka,

* 2:17 mọbu lele mbam mbam

tnūnuma, ọ jọburiri nye neegesi nye ọbula ovu ọma, nye nwernu rikne zni nhne, nye nwernu ndidi.

²⁵ O jeegweru wọhnerne neezni ele neemegidne a nhne, neele anya nọ Chiokike jeeme be tūhnasna, o dubna be n'ezi ọka,

²⁶ ma be mahia nhne, gbanahoru mbita Ekwensu sninu be, kpa o gidnenu be ma be mee nhne o pioru be mee.

3

Ọbochi ipne-aznu

¹ Kọvu hnata ka ama, ige tọ ogwnu k'agida vawa n'ọbochi ipne-aznu.

² Ele badnu jọburu ele whnuru ẹni be n'anya, ele whnuru iwai n'anya, ele oknomokno, ele nganga, ele noolulu ele badnu, ele zá noobnonu ele muru be nsni, ele nwée ovu ọtu mmamma, ele zá nsọ,

³ ele nwée ọwhnun'anya, ele zá naagbarunu ele badnu nhne be mernu be, ele nookwulu, ele nwée rikne jikwaru ẹni be, ele nọ lele anọhia, ele nhne buru ọma zá naamasị,

⁴ ele neere ele badnu, ele risi rikne, ele nọowhu nọ nganga, ele whnuru nhne sọ n'onu n'anya karu ọ whnu Chiokike n'anya,

⁵ ele nwernu ọdi ogwnu Chiokike kọvu be gọnahoru rikne a. Ji nọ be nwékọ nhne ọbula.

⁶ Be bu ele ji aghigho nooduwu ezi-nu-oro,

duwhu ele rinya nwée rikne, ele rinya mmehie noovughari lele ele nwornu manya nọ ẹgwnuru nhne ọjo.

⁷ Ele rinya nọ kpa zị nọomu nhne, kọvu be nwée rikne muhia ezi ọka.

⁸ Lele kpa Janisi nọ Jambirisi gwuzogidnenu Mozizi, ele ka neemegidne ezi ọka, ele mkpoma be nwuru onwu, ele okwnata ovu be bu nhne etekne.

⁹ Kọvu be jéenwe rikne zne nọ ruwhnu, lele kpa iwhnirniwhno ele wam whuyaru iwhne, ọ bu masi kpa iwhnirniwhno ele ka jọowhuya iwhne.

Pọlu znirni Timoti ezi ipne-aznu

¹⁰ Kiti, Timoti, i magwu kpakara nhne me znirni nọ kpa me wuru budnu m. I magwu nhne me neeme nọ nhne me kweru nọ ya, nkasi ovu m, nọ ọwhnun'anya m, nọ ndidi,

¹¹ nọ kpa me nagidnenu ọkpagbu, nọ awhnuwhnu. I magwu kpakara nhne me whnuru n'Antioku, nọ Aikoniom, nọ Lisitira, kpa me nagidnenu ọkpagbu. Kọvu Nyenwe a jọhiaru m nọ rime kpakara be.

¹² Me kanu i ezi ọka, nye ọbula ke joowu budnu ke nọotu ogwnu Chiokike nọ rime Karasi Jizosi jaata awhnuwhnu.

¹³ Kọvu ele ọjo nọ ele ka nọ be bu nhne be bula, jaazi nọjokari bujo, nooduwu ele badnu, be nooduwu masi be.

14 Kòvu dazìgidne nù nhne me znìrni ì nù nhne i kweru, hne ì magwù nye ì m̀hiaru nhne n'aka a.

15 Hite n'ìge ì b̀ ǹwò matì, ì magwù nhne òkwukwo nsò kwuru, ke nwernu rikne mee ì ì b̀ru nye nwernu akòniche. Ka joodubna ì n'òznohia hite n'òkwnata ovu ke zì nù Karaìsi Jizòsi.

16 Kpakara nhne be gbaru n'òkwukwo nsò hi n'echiche Chiokike wh̀ya, be b̀ru òma n'ogweru znì nhne, bigbò, d̀ aka nù nsnì nù òznuznu ke ome mma,

17 ma badnù ke Chiokike b̀ru nye zuru ozu, nye be jìkneru nòornu kpakara ẹ̀nu òma.

4

1 M gwuzo m nù ruwhnu Chiokike nù Karaìsi Jizòsi nye jeekpe ele zì b̀dnu nù ele nẁrnu ònwu ikpe nga ò jaava lele eze, neenye ì iwu ka.

2 Kpò okwo izi òma, zìri gnarnagnarna n'ìge kwesiri nù ìge kwésìge, bna mbna, bigbò, kwnalìzò mkpòma, gweru agìda ndidi nù anya d̀ru ẹ̀li neezni nhne.

3 Kwnornu nù ìge jaava nga ele badnù jéekweru iznizni b̀ru òma. Tǹnuma, be jaachìkota ele neezni nhne, ele jeezni be nhne ke nsnì nòoko be ẹ̀ko noopio.

4 Be jéekwe o bno nsnì n'ezì òka, kòvu snornu òtnutnu ruwhere.

5 Kòvu b̀ru nye anya d̀ru ẹ̀li ìge òbula, naagidne awnh̀whnu, rnù ẹ̀nu nye nòokpo okwo izi òma, rnù

kpakara ẹ̀nu ke kwesiri nye izi Chiokike.

6 Kìtna, ìge be jòowusi b̀dnu m lele arìohna manya d̀lam, ìge me jòonwu ẹ̀nwu valẹm.

7 M l̀kwolem ògwnu òma wam, m gbazulem ẹ̀so wam, m b̀tala m òkwnata ovu wam.

8 Kìtna, Nyenwe aì b̀tannu m okpu-eze ke ome mma, ke nye ikpe ziri ezi jeenye m n'òbochi wam, o jéenye me nù nsǹnu m, kòvu o jeenye kpakara ele noopio ò wh̀nù a anya nga ò jòowhuya ìwhne.

Iznuznu Pòlu nù Timoti

9 Me wara wara va.

10 Demasì wh̀rnu nhne òwa n'anya, ò ghasa m zne Tẹsalonika. Kìrẹskensi znernu Galasia, Taìtosi zne Dalimatia.

11 Me nù Lukwu kpò zì. Nga ì jaava kwuru Makì va, kwnornu nù o jeenyinu m aka n'ẹ̀nu me nòornu.

12 M zìzneru m Taìkìkosi Efesòsi.

13 Nga ì jaava ch̀yanu m iwo me ch̀saru n'òro Kapòsi nù Torasi, nù òkwukwo, ke kakwo mkpa òkwukwo.

14 Alẹkizanda nye ẹ̀nu rugwe mernu m nhne òjo k'agida. Nyenwe aì jòokwu a ògwò ẹ̀nu a.

15 Anya d̀ru ẹ̀li hne ò zì, kwnornu nù ò b̀ru nye neemegidne izi aì.

16 Nga me gwuzo n'ìkpe n'òziri nòogoru ònu m, ò zá nye òbula ke sno m, kpakara ele badnù gbanhòru m. Chiokike bikno, gwǹko nhne ka megidne be.

17 Kọvu Nyenwe aị dagwunu m, nyee masị m rikne, me jiri kpọ okwo izi ọma nụ nsị kpakara ele bụo ele Ju. Be dọhiaru m n'ọnu odum.

18 Nyenwe aị jọdohia m nụ kpakara nhne ọjọ, duru m n'udno bna n'ọchichi ẹlize oligwe. Ya nwe igwugwu ọkwnukokwnu. Amịm.

Obekwu ipne-aznụ ke Pọlu

19 Bekwu Prisila nụ Akwila nụ ezi-nụ-oro Onesiforosi.

20 Erasitosi daziri nụ Kọrinti, Tirofimosi naaria ẹhni igbugbu, m ghasa a nụ Miletosi.

21 Gbalị va sụ okirika dụ. Ebulusi neebekwu i, ma Pudesi, Lainosi, nụ Kalaudia nụ kpakara rumu nda.

22 Nyenwe aị dazinu i. Oru Chiokike dazinu anụ.

**Okwukwo izi
Polu gbaznenu
Tajitosi
Nhne gbasiri
okwukwo izi ka**

Polu kwuru nhne gbasiri Tajitosi nu hne zi ichne ichne nu rime okwukwo izi o gbaru. O karu nu ya nu Tajitosi sno rnu ernu izi oma nu Esia Mati nu Girisi (2 Korinti 2; Galasia 2:3). Polu kannu a, o hohia ele risi nu ele jeelekota ogbako Chiokike anya nu Kiriti.

Polu kannu Tajitosi o whnu ele risi nu ele neelekota ogbako Chiokike bu ele, ele badnu nookwu oka oma (1:5-9). Kpakara ele sno Nyenwe ai jobu ele bitaru ehni be snam, ele za neesigha oka (1:10-2:9).

Polu kwuru oka gbasiri ele zi ichne ichne nu rime ogbako Chiokike ke zi nu Kiriti. O karu nu a nwernu rikne o wu budnu ikne kwnornu nu Chiokike ziyaru Jizosi Karaisi, Chiokike zohiaru ai, snuma ai hite nu rikne Enine Nso, mee ai a panizo budnu ikne ke nwernu olile anya budnu kwó okwo. Chiokike zohiaru ai kwnornu nu o bu nye obirizi, o buo kwnornu nhne oma obula a mernu.

Nhne zi n'okwukwo izi ka

Obekwu ikwu nu okpukpe

Polu kpenu Tajitosi (1:1-4)

Ezni ele risi ogbako Chiokike (1:5-16)

Ezni ke Ogbako Chiokike (2:1--3:11)

Ezni ke o znirni Tajitosi nu obekwu ikwu ipne-aznu (3:12-15)

¹ Mawa, Polu nye izi ke Chiokike nu nye izi Jizosi Karaisi. Ernu m bu o mee ele Chiokike hohiaru nwe okwnata ovu, ma be mahia ezi oka ke noodubna n'otu ogwnu Chiokike,

² ma be nwehia olile anya budnu kwó okwo, hne Chiokike za naagha aghalaghala, bu ke o kweru mkwna su owa panizoru.

³ O mernu ikwu-onu a whuya iwhne n'ige ke a hite nu ogbasa izi oma, bu ke o yisiri n'aka m lele nhne Chiokike Nye Oznohia ai nyernu n'iwu.

⁴ M naagbanu i Tajitosi nnwo m n'ezi n'okwnata ovu ke a kwekotaru okwukwo.

Oru, nu udno ke hi n'aka Chiokike Nda ai nu Jizosi Karaisi, Nye Oznohia ai.

*Ernu Tajitosi nu rime
Kiriti*

⁵ Nhne mernu me gharuru i nu Kiriti bu ma i bikwata nhne ke kwesiri obikwa, hohia ele okno badnu nu rime eli-ohna obula, lele kpa me kannu i.

⁶ Nye okno badnu kwesiri o bu nye nwée otna, nye lu otu nnwerne, nye nwernu rumu be tukwasiri mkpoma, nye kpahie agwa, ele mee risi rikne.

⁷ Kwnornu nu nye risi jobu nye nwée otna lele nye izi Chiokike, nye mee n'iche ovu a, we ovu ehni wara wara, nye za nonwo manya gbu

ogbu, nye mée nhne rikne, nye nwée ọwho-anya.

⁸ Ọ jọbu nye neelekọta ele izne, nye whnurnu nhne ọma n'anya, nye zá neemewhe nhne ike, nye zì snam, zìri nsọ, nye neejikwaru ẹhni a.

⁹ O jikwaru ọka wam ke kwesiri ọkwnata ovu rikne lele kpa be znirni a, ma o mesi ele berere ovu rikne hite n'iznizni a zì snam, gesi masì ele neemegidne a nhne ojo be.

¹⁰ Agìda ele kwé ekwe nooduwhu ele berere hite nù ikwu-ọnu etekne, ke kakwo ele knesnigwù omen'ẹli ele Ju aka rikne.

¹¹ Be kwesiri o mee be kpusni ọnu be, ele noolulu agwna ezi-nù-oro, ele neezni nhne be kwésile o zni, kwnornu iwai.

¹² Otu nye ọwhnurninya be, nye Kiriti, karù kpa, "Ele Kiriti bụ ele aghalaghala, ele ovu ojo lele anọhia, ele ime-mgwù, nù ele okne nkọli."

¹³ Nhne o kwuru bụ ezi ọka, ka kpayarù bigbọsi be rikne, ma be gwuzosi rikne n'ọkwnata ovu,

¹⁴ ma be gharù iznizni aghalaghala ele Ju nù iwu ele badnù ke hi n'aka ele whọgaru n'ezi ọka.

¹⁵ Kpakara nhne zì rìchna n'anya ele zì rìchna, kọvu nye rùru ọru nù nye kwé ekwe, ọ zá nhne zì rìchna, kwnornu nù akọnìche be nù echiche be rùru ọru.

¹⁶ Be karù nù be magwù Chiokike, kọvu ẹrnu be nee-gesi nù be nọgonahoru a. Ele

sọ ize, ele risi rikne, ele nwée rikne mee nhne ọma ọbula.

2

Iznizni zì snam

¹ Gbalì zni iznizni zì snam.

² Ele okno badnù nwernu anya udno, ele nwernu ọso n'anya, ele zá neemewhe nhne ike, ele zì kwem n'ọkwnata ovu be, nù ọwhnurn'anya nù ndidi.

³ Ele okno badnù ele rinya masì wuru bụdnù lele ele zì nsọ, ele zá noobno ele berere nhne, ele zá nọonwo manya gbu ogbu, ele neezni nhne bụru ọma,

⁴ ma be zni ele nnwerne ikne anya udno, whnù nzi be nù rùmu be n'anya.

⁵ Be kwesiri ọ bụru ele zá neemewhe nhne ike, ele zì rìchna, ele rinya neelegidne ọro be anya nkari, ele noobnonu nzi be nsni, ma ele badnù gharù ọ kaja ikwu-ọnu Chiokike.

⁶ Kpam masì, neezni rùmu ikoro ma be bụru ele zá neemewhe nhne ike.

⁷ Nù kpakara nhne i neeme, gesi ẹhni i nye ọma atù n'ẹrnu ọma. Nù nhne i neezni gwuzosi rikne nù rime a, nye anya dũru ẹli.

⁸ Ikwu-ọnu bụru ọma ma nye ọbula ke neemegidne i tũ iwħnerne hne be nwée nhne ojo be jeeji nookwugidne aì.

⁹ Zni ele ọhi be bnonu ele nwe be nsni nù kpakara nhne, neeme nhne jọoso be n'ọnu, be sá ọka nga be nookwunu be ọka.

¹⁰ Be znù nhne ele nwe be, kọvu be gesi nù be jọotukwasi

be mkpoma, neegesi nhne oma ke zi nu iznizni Chiokike Nye Oznohia ai nu kpakara nhne.

¹¹ Oru Chiokike ke neegweya oznohia whuyaru iwihne hne kpakara ele badnu zi,

¹² neezni ai a sigbasi nhne noogwnu ano-ehni ai n'owa, nu budnu ke za notu ogwnu Chiokike, a wuru budnu ele za neemewhe nhne ike, ome mma, notu ogwnu Chiokike nu rime owa ka.

¹³ A nwernu olile anya zi ngozi, bu o whuya iwihne igwugwu ke Chiokike hna ezi nu Nye Oznohia ai Jizosi Karaishi.

¹⁴ O bu nye gweru ehni a nyee n'onodi ai ma o gbahia ai nu rime nhne ojo, bitannu ehni a ele ke a, ele zi richna, ele ovu neerne bekwnu n'ernu oma.

¹⁵ Zni kpakara nhne ka, naakwnagidne, bna mbna nu kpakara rikne i nwernu. I kwé badnu obula ledna i anya.

3

Budnu nye Karaishi

¹ Chenwyanu ele badnu be bita ehni be nu mkipururu ele risi nu ele nechi echi, noobno nsni, jikneru o rnu ernu oma,

² be kwúko oka ojo megidne badnu obula, be buru ele udno, ele agwa oma, ele ovu hieru eli hne kpakara ele badnu zi.

³ N'ige mbom, a bu ele iwih-nirniwhno, ele za noobno nsni, ele be duwhuru, noosno agida nhne ojo zi odo nu odo

ke noogwnu ai, a wuru budnu ojo, kwno awuwa, be snornu ai irno, aila sno masi be irno.

⁴ Kovu nga ovu oma nu owhnun'anya Chiokike Nye Oznohia ai whuyaru iwihne,

⁵ o znohia ai, o buo kwnornu ernu oma a rnurnu, kovu kwnornu obirizi a. Hite n'osnusnu ke omu berere, Enine Nso nyernu ai budnu ikne.

⁶ Chiokike wukwasiri ai Enine Nso k'agida hite nu Jizosi Karaishi Nye Oznohia ai.

⁷ Hne o gwnurnu ai lele ele mee mma hite n'oru, a buru ele neekhia olile anya budnu kwó okwo.

⁸ Ka bu oka kwesiri okwnata ovu. M naakaa, ji kwusi a rikne ma ele kweru nu Chiokike buru ele anya duru eli, neeme nhne buru oma. Kpakara nhne ka buru oma naabna iru hne ele badnu zi.

⁹ Kovu zeru ajiji iwih-nirni-whno, nu ogwnu rewhna eburnu, oknorno, olu ogwnu kwnornu iwu, be bnána iru, be bu nhne etekne.

¹⁰ Do nye obula ke neegweya okewa aka nu nsni mgba lawuru, i mekwo, gharu a.

¹¹ I magwu nu badnu ki bu nye aghorome, nye mmehie, o bu nye naama ehni a ikpe.

Ezni ipne-aznu

¹² Nga me jeeziya Atemasi nu Taikikosi, hna anu zi, gbalị vakwnusi m nu Nikopolisi, kwnornu nu m jaadazi pi n'ige okirika.

¹³ Gbalị yisinu Zenasi nye ogwnu iwu nu Apolosi

aka n'izne be, whnu nu
 be nwehjaru nhne obula be
 pioru.

¹⁴ Ele ke aị mụhia kpa be
 jeeji ige be rnu ernaloma,
 rnhia nhne zi mkpa, be
 wuko badnu bnana nu nhne.

¹⁵ Kpakara ele me nu be zi
 neebekwu i. Bekwu kpakara
 ele whnurnu aị n'anya nu
 rime okwnata ovu. Oru
 Chiokike dazinu kpakara
 anu.

**Ọkwukwo izi
Pọlu gbaznenu
Filemōni
Nhne gbasiri
ọkwukwo izi ka**

Filemōni bụ otu nye zị mkpa n'ogbako Chiokike ke zị nụ Kọlosi, nye nwe ọhi ke rẹwhna a bụ Ọnesimosi. Ọhi ka hiri n'oro nye nwe a gbawhu. Kpa ọ kpawhuru, ya nụ Pọlu nye zị n'ikelu whnataru. Hite n'aka Pọlu, Ọnesimosi ghọ nye Karaịsi. Pọlu gbaznenu Filemōni ọkwukwo izi ka naariasno a, ọ kwubnahnarnu ọhi a, nye Pọlu neezihnahienu a. Pọlu naariasno a, ọ naabnarnu a lele nnwọ nda nụ rime Karaịsi, ọ bụo lele ọhi.

Nhne zị n'ọkwukwo izi ka

Ọpanizo (1-3)

Ọwhnun'anya Filemōni nụ ọkwunata ovu a (4-7)

Ọriasno nụ risi Ọnesimosi (8-22)

Ọkwukwo (23-25)

¹ Mawa, Pọlu, nye ikelu kwnornu Karaịsi Jizọsi, nụ nwene aị rukna Timoti, naagbaznenu enyi aị nụ nye ẹrnu ibne aị, Filemōni, ọkwukwo izi.

² A naagbaznenu masi nụ nwene aị rinya Afia nụ nye ọgwun ibne aị Akiposi nụ ọgbako ke zị n'oro i.

³ Oru nụ udno ke Chiokike Nda aị nụ Nyenwe aị Jizọsi Karaịsi dazinu anụ.

Pọlu nọtunu Chiokike mmamma

⁴ M nọtunu Chiokike mmamma ige ọbula me neechenwanya i n'okpukpe m,

⁵ kwnornu nụ m nọnu nhne gbasiri ọwhnun'anya i hne kpakara rumu Chiokike zị nụ ọkwunata ovu i nụ Nyenwe aị Jizọsi Karaịsi.

⁶ M neekpe ma ọkwunata ovu i nọornusi ẹrnu rikne n'esilawuru rumu nda ma i mahia kpakara nhne ọma ke a nwernu a ji nọornu ẹrnu nụ rime Karaịsi.

⁷ Ọwhnun'anya i nyernu m mkpoma ọso n'ọnu k'agida sụ nwene m rukna, bụ ke mernu ovu ele nsọ ziri bụdnu ikne, gbata kwno m inwe.

*Pọlu riasnornu
nụ risi Ọnesimosi*

⁸ M nwernu m anya rikne nụ rime Karaịsi ọ kanu i mee nhne ke kwesiri.

⁹ Kọvu ọwhnun'anya mernu me riasno i, lele ọkpa badnu me bụ, Pọlu nye okno badnu, kọvu kịtna, nye ikelu kwnornu Jizọsi Karaịsi.

¹⁰ M nọorio i kwnornu Ọnesimosi nnwọ m rukna nụ rime Karaịsi, nye ghọru nnwọ m kpa me zị n'ikelu.

¹¹ Nụ mbom, ọ bnáge nụ nhne ọbula nyee i, kọvu kịtna ọ bnarnu iru nyee i, ma mawa masi.

¹² M neeziyanu i ya hite n'ovu m, lele nye zị m okne mkpa.

¹³ O znernu amasi m ọ bita a hna me zị ma ọ yinu m aka n'onodi i kpa me zị n'ikelu kwnornu izi ọma.

14 Kọvu m jéeme nhne ovu i kwéle, kpa nhne ọma ọbula i jeeme jeehi n'ovu i whụya, ọ búo nhne be kwnagidnenu i mee.

15 Ọ jọobu nụ Ọnesimosi whọgaru ige matị, ma i kwubnanya a n'ẹhni i ọkwnukokwnu.

16 Ọ búma lele ọhi, o kakwo ọhi, kọvu lele nnwọ nda be whnurnu n'anya. Ọ zị m mkpa k'ezi, kọvu ọ zị i mkpa kakwo lele badnụ nụ lele nnwọ nda nụ rime Nyenwe aị.

17 Ọ búru nụ i kwuru m nye ẹrnu ibne i, kwubnanya a lele kpa i jeegweru m.

18 Ọ búru nụ o nwernu nhne ọjọ ọbula mọbu ọgwo ke o ji i, gwnụsi a nụ risi m.

19 Mawa Pọlu, ji aka m naagba nhne ka, m jọokwu i be. I magwụ nụ jị n'iwuhuru i jigwu m ọgwo búdnu i.

20 Bikno, nwene m rukna, menu m nhne ka kwnornu nụ Nyenwe aị, mee ovu sọ m n'ọnu lele nwene rukna nụ Karaịsi.

21 M tụtwasiri m mkpọma nụ i jọobno nsnị kpa me naagba ọkwukwo ka nụ i jeeme kakwo nhne me nọorio i.

22 Kpam masị, bitanu m otu ọnu ọro, kwnornu m neele anya nụ Chiokike jaaza kpakara okpukpe anụ mee m hiehnakwnusi anụ berere.

Obekwu ikwu ipne-aznụ

23 Epafarasị nye me nụ a zị n'ikelu kwnornu Karaịsi Jizọsi neebekwu i,

24 ma ele ẹrnu ibne m Makị, Arịsitakosi, Demasị nụ Lukwu.

25 Oru ke Nyenwe aị Jizọsi Karaịsi dazinu enine anụ.

**Okwukwo izi
Ele Hiburu
Nhne gbasiri
okwukwo izi ka**

Okwukwo izi Ele Hiburu bu ke be gbaznennu ele Karaïsi ele be neemegidne, ele zi nu ogwnu nu be jaaghasa okwnata mkpoma nu Karaïsi. Nye gbaru okwukwo ka naakanu be nu Jizosi Karaïsi bu ezi oiyi Chiokike n'iwuru a. O neegesi nhne ka, ke mbom, Jizosi bu Nnwọ Chiokike ke zi okwnukokwnu, nye muhiaru obno nsni hite n'awhnuwhnu o gawheru. Lele Nnwọ Chiokike, Jizosi kakwo kpakara ele owhnurninya ke Tesitamenti Oknani, ma ele enine izi, ma Mozizi n'iwuru a. Ke ebo, Chiokike karu nu Jizosi bu nye ariohna, nye obula ke kweru nu ya, jeenwehia oznohia nu mmehie.

Nye gbaru okwukwo izi ka kwuru oka gbasiri ele dikne ke okwnata ovu, ele gwuzoru kwem du n'enu. Be lekwasiri Jizosi anya, nu ruwhnu awhnuwhnu nu okpagbu be kpagburu be. O jiri odo aka nu nsni nu ezni mesni okwukwo izi a.

Nhne zi n'okwukwo izi ka

Karaïsi bu oiyi Chiokike zuru ozu (1:1-3)

Karaïsi kakwo ele enine izi (1:4--2:18)

Karaïsi kakwo Mozizi nu Josua (3:1--4:13)

Karaïsi bu nye risi ariohna kakwo (4:14--7:28)

Ogba-njo-ehni Karaïsi kakwo (8:1--9:22)

Ariohna Karaïsi kakwo (9:23--10:39)

Okwnata mkpoma bu risi nhne (11:1--12:29)

Mee nhne joso Chiokike n'onu (13:1-17)

Okpukpe nu oka ipne-aznu (13:18-25)

*Nnwọ a kakwo
ele owhnurninya*

1 N'ige wheru ewhe, Chiokike kwunnu ele nda ai oknani oka agida ige hite n'onu ele owhnurninya n'apna zi ichne ichne.

2 Kovu kitna, n'obochi ipne-aznu ka, o kwunnu ai oka hite n'onu Nnwọ a Jizosi, bu nye o hohiaru ma o buru nye jeeri kpakara mkpe, nye o hiri n'aka a kpu owa.

3 O nwernu igwugwu Nda a. Nnwọ wam bu nhne Nda a bu. O ji ikwu-onu a ke nwernu iknernema jigidne kpakara nhne. O jiri aka a snusnama mmehie owa. Nga o mekworu ka, o daziri eli n'akarikwnunga Chiokike n'oligwe, nye kakwo kpakara nhne n'olu.

*Nnwọ Chiokike kakwo
ele enine izi*

4 Nnwọ wam kakwo ele enine izi lele kpa rehna a "Nnwọ," ke Chiokike nyernu a kakwo rehna be.

5 Kwnornu nu o za enine izi obula ke Chiokike kanu, "Ji bu Nnwọ m.

M ghulam Nda i tna." Mbu, o zi masi enine izi ke Chiokike kanu, "M joburunu i Nda,

ì j̄ooburu Nnwọ m.”

6 Nga Chiokike neeziya
Nnwọ a n̄ rime ọwa, ọ kaa,
“Kpakara ele enine izi
Chiokike kp̄onu a risi
ẹ̀lì.”

7 Ka b̄u nhne Chiokike
kwuru gbas̄iri ele enine izi,
“Chiokike mernu ele enine izi
a lele ruwhere,
ele izi a lele b̄ekwnu
neerne erne.”

8 K̄ovu nhne gbas̄iri Nnwọ
wam, Chiokike kar̄u,
“Chiokike, ngadna eze i jaazi
tim t̄om,
Mkpara ẹ̀lì-eze i b̄u ikpe
z̄i snam.

9 Ì whn̄urnu nhne ọma n'anya,
sno nhne ọjo irno,
kam kpayar̄u, Chiokike,
b̄u Chiokike i teru i
m̄ono ovu ọso n'onu,
b̄ita ì n̄u hne kakwo
kpakara ele ibne i.”

10 Ọ kaa,
“J̄i Jihova, ì t̄uru nt̄u-ẹ̀lì ọwa
hite n̄u mb̄om.
I j̄i aka ì law̄uru kp̄u
oligwe.

11 Kpakara be joowhu, k̄ovu ì
jaazi ọkw̄nukokw̄nu.
Be jaaka b̄uka lele iwo.

12 Ì jaapiakota be lele iwo olu,
be jaagbanwo be lele
ikpe,

k̄ovu ì z̄i kpa ì z̄i n̄u mb̄om,
onu ọgw̄nugw̄nu aw̄ha ì
j̄eebi ebi.”

13 Ọ zá enine izi ọbula ke
Chiokike kann̄u,
“Daz̄iri ẹ̀lì n'akarikwnunga m
tem d̄u nga me jaab̄ita ele
irno ì
lele nhne ì j̄ootukwasi ọchi ì
law̄uru.”

14 Ele enine izi, k̄pakara be
b̄uọ ele o ziyaru o yinu ele
jeekeh̄ia ọznohia aka sa?

2

Okne ọznohia wam

1 Kam kpayar̄u, a jigidne
ezi ọka wam a n̄urnu aka
rikne, ọ z̄i be vume āi lele kpa
mini noovume ọgbo.

2 Ọ b̄uru n̄u ikwu-onu ele
enine izi kwuru gwuzosiri
rikne, k̄pakara mmehie n̄u
risi rikne nah̄iaru ọgwo ẹ̀rn̄u
awhn̄uwhnu kwesiri be,

3 ndaa kpa a jaagbanah̄oru,
ọ b̄uru n̄u a lewhuru okne
ọznohia hna kpa anya? Ọ
b̄u ke Nyenwe āi n'iw̄huru
a beru ọsno z̄ni, ele n̄urnu a
kann̄u āi n̄u ọ b̄u ezi ọka.

4 Chiokike gbann̄u be
akebne hite n̄u ẹ̀rn̄u elekema
z̄i ichne ichne ke rikne, n̄u
ẹ̀rn̄u ndu-ẹ̀hni, n̄u ẹ̀rn̄u rikne
z̄i ichne ichne. Ọ gba mas̄iri
akebne nga o nyernu ele
badn̄u nkesi ke Enine Ns̄o lele
kpa ọ mas̄iri a.

Jiz̄osi n̄u lele r̄umu nne a

5 Berere kwno, Chiokike
b̄it̄age ele enine izi ele jaachi
ọwa ke jaava, b̄u ọwa ke a
nookwu ọka a.

6 K̄ovu be kwuru n'otu
hnenum n'ok̄wukwo ns̄o,
“K̄ini b̄u nhne badn̄u etekne
b̄u, ke ì naari ọriri
gbas̄iri a,
n̄u nnwọ ke badn̄u ke ì
neelek̄ota a?

7 I mernu a o hietu ẹ̀lì mat̄i
kar̄u ele enine izi.

I jiri igwugwu n̄u ọson'anya
kp̄usi a n̄u risi lele
okpu-eze.

8 I mernu a nye risi
kpakara nhne.”

Ka neegesi nū ọ zá nhne ọ
sịgbasiri ọ bīta nū mkpururu
ọchi a. Kọvu kītna, a whnūge
nū kpakara nhne ka zị nū
mkpururu ọchi a.

9 Kọvu a whnūrnū Jizōsi, nye
o mernu hietu ẹli matị karū
ele enine izi. O jiri igwugwu
nū ọson'anya kpusi a nū risi
lele okpu-eze kwnornu nū
ọ nwūrnū ẹnwu. Hite n'oru
Chiokike, o raturu ẹnwu riro
kwnornu kpakara badnū.

10 Chiokike nwe kpakara
nhne, ya ke masiri kpakara
nhne hite n'iknernema a.
O mernu nhne kwesiri nga
o mernu Jizōsi zu ozu hite
n'awhnūwhnu, ma ọ znọhia
agịda rūmu Chiokike, mee
be snornu a kehia igwe
n'igwugwu a.

11 Kwnornu nū nye bītaru
be nsọ nū ele be bītaru nsọ
bū otu ọro. Kam kpayarū,
o sukwu be rūmu nda a zá
nọtutu a iwchnerne.

12 Ọ karū,

“M jookwupiya rēwhna i
n'esilawūru rūmu nda
m,
mjaaznarni i n'esilawūru
ogbako Chiokike.”

13 Berere kwno,

“M jọtukwasi a ovu,”
o kwu kwno,

“Le me nū rūmu Chiokike
nyernu m.”

14 Lele rūmu o sukwuru
vugwu anọ-ẹhni nū ọvnarna,
Jizōsi ghọru badnū ke vugwu
anọ-ẹhni nū ọvnarna ke
nwernu rikne nwū ẹnwu, ma
hite n'ẹnwu a, o megbu nye

wam bū Ekwensu ke nwernu
rikne ẹnwu,

15 ma ọ dọhia ele zị n'ọhi
kpakara būdnu be n'ogwnu
ẹnwu.

16 Kwnornu n'ezi, Jizōsi
väge o yinu ele enine izi
aka, kọvu rūmu avnūrnū
Ebereham.

17 Kam kpayarū, ọ zị mkpa
Jizōsi nū lele rūmu nda a nū
apna ọbula, ma ọ būru nye risi
ariọhna ke nwernu mkpoma
obirizi kwesiri ọkwnata ovu
nū ruwhnu Chiokike, ọ būru
masi nye mernu badnū nū
Chiokike ziri n'udno hite nū
ogbaru mmehie.

18 Kwnornu nū o tarū
awhnūwhnu nga be rnarnū
a ọrnurna, o nwernu rikne
yisinu ele be naarna ọrnurna
aka.

3

Jizōsi kakwo Mozizi

1 Kam kpayarū, rūmu nda
m, ele zị nsọ, ele vu osukwu
ikwu oligwe, anū rị ọriri nhne
gbasiri Jizōsi, nye izi, nū nye
risi ariọhna ke ọkwnata ovu a.

2 Ọ bū nye kwesiri ọkwnata
ovu nyee nye hōhiaru a,
lele kpa Mozizi buri nye be
tūkwasi ovu nū kpakara ẹnū
a n'ọro Chiokike.

3 Jizōsi kwesiri o nwe ig-
wugwu ke kakwo igwugwu
Mozizi lele kpa nye wuru ọro
nwernu igwugwu karū ọro o
wuru.

4 Kwnornu nū kpakara
ọro nwernu nye wuru a,
kọvu Chiokike wuru kpakara
nhne.

5 Mozizi, lele nnwọ izi be
kwesiri ọ tūkwasi ovu nū

kpakara ọro a, gbarụ akebne
nhne be jookwu nụ ruwhnu.

6 Kọvu Karaịsi kwesiri
ọkwnata ovu lele nnwọ n'oro
Nda a. A bụ ọro a, ọ bụru
a b̄ita mkpọma siri rikne aị,
gwuzosi masi rikne nụ nhne
a neele anya a.

Ozukwa inwe ke rumu
Chiokike

7 Lele kpa Enine Nso karụ,
“Tna, ọ bụru nụ anụ nurnu
nkoli a,

8 anụ méé ovu anụ si
rikne,
lele kpa ele Izireli mernu nga
be gwuzogidnernu
Chiokike,
ige ọrnurna n'eli-ikpa.

9 Nga ele nda anụ ọknani
kparụ m iru, kpahia m,
be whnurnu ọrnuru m nri
awha ẹno.

10 Ovu weru m ẹhni kwnornu
ebiri kam,
m kaa, ‘Mkpoma be
noowhu apna,
be kwége ọ b̄ita iwu m.’

11 Kam kpararụ, m ji m ovu
owe ẹhni dụ risi, kaa,
‘Be jáabna hne me jeenye
be ozukwa inwe.’ ”

12 Rumu nda m, anya
dụ anụ ẹli, ọ zá nye ọbula
n'esilawuru anụ ke jeenwe
ovu mmehie ke kwé ekwe
ke jeeme a ọ whoga nụ hne
Chiokike ke zị b̄udnu zị.

13 Kọvu anụ kwnagidne
ibne anụ hnebuko ọbochi be
kwuru “Tna.” Ọ zá nye kwe
aghigo ke mmehie mee ovu
a si rikne megidne Chiokike.

14 Kwnornu nụ ọ b̄uru
a jidne ọkwnata mkpoma a

nwernu nụ mbom dụ ok-
wukwo, aị nụ Karaịsi jeekeko
nhne.

15 Lele kpa be gbarụ
n'okwukwo nso,
“Tna, ọ bụ nụ anụ nurnu nkoli
a,
anụ mékọ ovu anụ si
rikne
lele kpa ele Izireli mernu nga
be gwuzogidnernu
Chiokike.”

16 Ndaa ele nurnu nkoli
Chiokike mee risi rikne? Ọ
b̄uo ele Mozizi hiri n'eli Ijipiti
duhia sa?

17 Ndaa ele Chiokike we-
sanụ ovu ẹhni nri awha ẹno?
Ọ b̄uo ele mehieru, bụ ele
iznu be dnarnu n'eli-ikpa?

18 Ndaa ele Chiokike dụru
risi nụ be jáabna nụ hne o
jeenye be ozukwa inwe? Ọ
b̄uo ele bnóge nsni?

19 A whnurnu nụ be bnáge
hne o jeenye be ozukwa inwe
kwnornu nụ ókwe ekwe be.

4

1 Chiokike kweru aị mk-
wna ọ bna n'ozukwa inwe
a, mkwna wam noogwuzo
kwem, anụ ngwa ma a tū
ogwnu, ọ zị otu nyenum
n'esilawuru anụ ba adna nū
ọ bna nū rime a.

2 Kwnornu nū be znirni aị
izi ọma lele kpa be znirni be.
Kọvu izi be znirni be bnágene
be nū nhne, kwnornu nū
ele nurnu a jile ọkwnata ovu
naahoru a.

3 K̄itna aị ele kweru bnarnu
n'ozukwa inwe a lele kpa
Chiokike kwuru,
“M ji m ovu owe ẹhni dụ risi,
be jáabna hne me jeenye
be ozukwa inwe.”

O kwuru ka, o bu n'ezi nu ɛnu wam kwolem kpa o turu ntu-eli owa.

4 O kwuru oka gbasiri obochi ke esau n'otu hnanum, "Chiokike zukwaru inwe n'obochi ke esau nu kpakara ɛnu a."

5 Nu hnam kwno, o kaa, "Be jaabna n'ozukwa inwe m."

6 A whnurnu nu ozukwa inwe zinu ele ke Chiokike. Kovu, ele nurnu izi oma wam nu mbom bnage n'ozukwa inwe wam kwnornu n'okwe ekwe be.

7 Chiokike bitaru obochi berere ele badnu ji naabna n'ozukwa inwe a, kwu a "Tna." Nga agida awha whemernu, o hi n'onu Devidi kwu lele kpa o kwuru nu mbom,

"Tna, o buru nu anu nurnu nkoli a,
anu mee ovu anu si rikne."

8 Kwnornu nu o buru nu Josua duru be bna n'ozukwa inwe, Chiokike bo kwule oka gbasiri obochi ozukwa inwe berere.

9 Ka neegesi nu ozukwa inwe berere zinu rumu Chiokike lele kpa Chiokike zukwaru inwe kpa o kekworu owa n'obochi ke esau.

10 Nye obula ke bnarnu n'ozukwa inwe ke Chiokike, noozukwa inwe nu kpakara ɛnu a lele kpa Chiokike zukwaru inwe n'ɛnu a.

11 A yisi ehni ma a bnazne n'ozukwa inwe a, o zi nye obula ba adna kwnornu nu okwe ekwe lele kpa rumu Izireli dnarnu.

12 Ikwu-onu Chiokike zi budnu nɔornusi ɛnu rikne. O zi buko kakwo ama-ogwnu ruwhnu lawuru. O nɔodubna, neekewa mkpuru ovu nu enine, ma okpukpu nu omio. O nɔotupiya echiche ovu nu agwa ke badnu.

13 O za nhne be keru eke ke tugwaru otugwa n'anya Chiokike, kpakara nhne gbe anya n'anya nye wam a jaasa ajji gbasiri ehni ai.

Jizosi bu nye risi ariohna

14 Hne a nwernu nye risi ariohna hna ezi kpa, nye beru osno zne nu ruwhnu Chiokike n'oligwe, Jizosi Karaisi Nnwɔ Chiokike, a jidnesi okwuhia ke otukwasi ovu ai aka rikne.

15 Kwnornu nu a nwée nye risi ariohna ke nhne gbasiri ai za neemetu n'ovu, kovu a nwernu nye risi ariohna nye be kparu iru n'apna obula lele ai, kovu o méne mmehie.

16 Ngwa ma a gweru ovu siri rikne vadu ngadna oru ke Chiokike ma a nahia obirizi nu oru jeeyinu ai aka n'ige mkpa.

5

1 Nye risi ariohna obula bu nye be hohiaru n'esilawuru ele badnu, be bita a ichne ma o dnasni anya badnu nu ruwhnu Chiokike, naakwanu be ariohna nu nkesi kwnornu mmehie.

2 O nwernu rikne gweru ovu oma mesno ele nwée rikne nu ele máa nhne n'apna obula, kwnornu nu ya n'iwhuru a za rikne.

³ Kam kpayarụ, ọ naakwa ariohna kwnornu mmehie ke a, nụ ke ele berere.

⁴ Ọ zá nye gweru igwugwu o chni ẹhni a nye risi ariohna, kovu nye Chiokike sukwuru lele kpa o sukwuru Erọni.

⁵ Kpam masị, Karaịsi nyége ẹhni a igwugwu ke nye risi ariohna. Kovu Chiokike kwuru nhne gbasiri a,

“Jị bụ Nnwọ m,

M gholam Nda i tna.”

⁶ Chiokike kwu kwno nụ hne berere,

“Ị bụ nye ariohna okwnukokwnu, n'ahiri ke Mekizedeki.”

⁷ Nga Karaịsi zị budnu n'owa, o ji okne ẹkwana nụ anya-mini rjo aririo a n'okpukpe nyee Chiokike, bụ nye nwernu rikne ọ dọhia a n'ẹnwu. Ọ nurnu okpukpe a, kwnornu nụ o gwednarnu ẹhni a ẹli.

⁸ Ọ bụ n'ezi nụ Jizọsi bụ Nnwọ Chiokike, kovu, ọ muhiaru obno nsni hite n'awhnuwhnu ọ taru.

⁹ Nga be mernu a ọ ziri snam, ọ ghoru nye risi ọznohia okwnukokwnu ke kpakara ele joobno nsni.

¹⁰ Chiokike mernu a ọ bụru nye risi ariohna n'ahiri Mekizedeki.

Odnahala aznu

¹¹ A nwernu agida nhne a jookwu gbasiri Karaịsi nye risi ariohna n'ahiri Mekizedeki, kovu a jóokwu a kwnornu nụ anụ jéenwe rikne ghoia be.

¹² Kịtna, anụ kwesiri ọ bụru ele jeezni nhne, kovu ọ zị koriri mkpa be neezni anụ nhne mbom ke ikwu-ọnu

Chiokike. Ọ bụru nụ mini-remā bụ nhne anụ zị koriri nnonwo, ọ bụo wiri siri rikne.

¹³ Kwnornu nụ nye ọbula ke nnonwo mini-remā bụ watakiri, o nwée rikne mahia nhne ọma nụ nhne bụo ọma.

¹⁴ Wiri siri rikne bụ ke ele soru oso, bụ ele be znurnu ọ mahia nhne zị ichne nụ hne nhne ọma nụ nhne ọjo zị.

6

¹ Ngwa ma a zne ruwhnu, a sigbasi iznizni mbom ke Karaịsi zne nụ ozu ozu, a zoma ọ tu ntụ-ẹli ọtuhnasna nụ mmehie berere hite n'ome nhne ke neegweya ẹnwu, kweru nụ Chiokike.

² Ka bụ iznizni ke ọwu mini nụ ke ọbniakwasi aka nụ risi, nụ ke ohi n'ẹnwu lizo, nụ ke ikpe zị okwnukokwnu.

³ Chiokike kwe, a jeeme nhne ka.

⁴ Ọ bụ nhne kwé omume nụ ele mahiaru iwhne ke Chiokike dnahnala, jeehiehna, bụ ele raturu nkesi oligwe riro, bụ ele kehjaru igwe nụ rime Enine Nso.

⁵ Ele ka bụ ke raturu nhne ọma ke ikwu-ọnu Chiokike riro ya nụ iknernema ke ọwa ke jaava,

⁶ be hi nụ ya dnahnala. Ọ bụ nhne jéekwe omume o kwuhnaya be, ọ nụ lele be ọokpogidne Nnwọ Chiokike n'olu ọgba berere, naakpasị a iwhnerne nụ ruwhnu ọhna.

⁷ Ẹli ke nwornu mini ke noozokwasi a, naamipiya mkpuru ke bnannu ele ẹkwu iru, ọ nahia ọgozi Chiokike.

⁸ Kọvu ẹli ke nooru igwnu nọ akikara bnáge iru ọbula. Be ọjovu a ọnu, n'ipne-aznọ, bẹkwnu jeerne a.

⁹ Kọvu ele me whnurnu n'anya, ọ bọ n'ezi a nookwu kpa, a tükwasiri ovu nọ nhne kakwo mma gbasiri anọ, bọ ngozi ke ọznohia nọ mmehie.

¹⁰ Chiokike zá neeme nhne ọjo. O jéechezu ẹrnu anọ ya nọ ọwhnun'anya anọ gesiri rẹwhna a, zị kọriri neegesi hne ele ke Chiokike zị.

¹¹ A noopio ma nye ọbula mee kọriri kpam dọ okwukwo, ma olile anya anọ ziri kwem.

¹² A píole anọ bọru ele ime-mgwọ, kọvu anọ nọ lele ele kweru ekwe nwe masi ndidi tem dọ ọ nahia mkwna Chiokike kweru.

Mkwna Chiokike zị kwem

¹³ Nga Chiokike kweru Ebereham mkwna, o jiri ẹhni a dọ risi kwnornu nọ ọ zá nye berere kakwo a.

¹⁴ Ọ kaa, "N'ezi ọka, m ọgozi i, nyee i ọbuba masi."

¹⁵ Ebereham jiri ogologo nkasi ovu nwehia mkwna wam Chiokike kweru a.

¹⁶ Ele badnọ neji nye kakwo be dọ risi, neemesi ọka be rikne, kam bọru mbimambi ọka nọ ọdogbuta.

¹⁷ Chiokike, ma o gesi ele jeekehia mkwna, nọ ọ jáagbanwo mkwna wam, jiri rẹwhna a dọ risi.

¹⁸ Chiokike nyernu aị mkwna a nọ ọ dọ risi a, nhne lawuru ka gbánwo agbanwo kwnornu nọ Chiokike jáagha

aghalaghala, aị ele gbazn-ernu jigidne olile anya ke zị nọ ruwhnu aị aka ọ zị inwe gwọ aị.

¹⁹ A nwernu olile anya ka lele nkno ke mkpuru ovu, ke zị jị nọ kwem, ke dubnarnọ aị n'aznọ ikpe obnosni nọ rime hne zị nsọ,

²⁰ hne Jizọsi beru aị ọsno bnazne, bọru nye risi ariohna ọkwnukokwnu n'ahiri Mẹkizedeki.

7

Mẹkizedeki, nye ariohna

¹ Mẹkizedeki ka bọ eze Salẹm, nye ariohna ke Chiokike ke Kakwo Nhne Dum Olu. O zuteru Ebereham nga o hiri ọgwnu ke o gburu ele eze neehiehna, ọ gozi Ebereham.

² Ebereham nyee a otu nga nọ nri nga kpakara nhne o gweyarọ. Rẹwhna a ke mbọm bọ "Eze Ome Mma," ke ẹbo bọ "Eze Salẹm," ke bọ "Eze Udno."

³ Ọ zá ọtnutnu gbaka gbasiri nda a mọbu nne a, mọbu avnurnu a, ọmumu a, mọbu ẹnwu a, lele Nnwọ Chiokike, ọ bọ nye ariohna ọkwnukokwnu.

⁴ Le nye kwu ka, ke nda aị Ebereham nyegarọ a otu nga nọ nri nga kpakara nhne ọ luhiaru n'ọgwnu.

⁵ N'ezi ọka, iwu karu rọmu Livai ele ariohna nahọru rọmu nda be otu nga nọ nri nga. Ọ bọ n'ezi nọ be bọ rọmu Ebereham.

⁶ Kọvu Mẹkizedeki híge nọ avnurnu Livai, kọvu ọ nahọru Ebereham otu nga nọ nri

nga, gozi masi nye wam nahiaru mkwna Chiokike.

⁷ N'ezi, nye wam ke goziri kakwo nye wam o goziri.

⁸ Hna, badnu etekne ke joonwu onwu nanarnu otu nga nu nri nga. Kovu hne berere, Mekizedeki nye be gbaru akebe nu o jaazi tem nanarnu otu nga nu nri nga.

⁹ A jaaka nu nga Eberham kwuru otu nga nu nri nga, nu Livai nye nanahoru otu nga nu nri nga kwuru ke a masi nu rime Eberham,

¹⁰ kwnornu nu Livai zi nu ruwho Eberham nda a nga Mekizedeki zuteru Eberham.

*Jizosi bu nye ariohna
lele Mekizedeki*

¹¹ Be nyernu ele Izireli iwu hite n'ele ariohna Livai. O buru nu iwu ke mernu rumu Livai buru ele ariohna mernu badnu zu ozu, o za mkpa nu nye ariohna berere jaava n'ahiri Mekizedeki, buo n'ahiri Eroni.

¹² Kwnornu nu kpa be gbanwornu ele ariohna, kpm masi bu kpa be jiri gbanwo iwu kam.

¹³ Nye a nookwu oka bu Nyenwe ai, nye hiri n'avnurnu berere, o za nye obula ke hiri n'avnurnu kam bu nye okwa ariohna.

¹⁴ A magwu nu Nyenwe ai hiri nu avnurnu Juda whuya, bu ele Mozizi kwuge nhne okwa ariohna gbasiri be.

¹⁵ Ka dnornu ai anya nkari nkari, kwnornu nu nye ariohna berere whuyaru lele Mekizedeki.

¹⁶ O buo nye ariohna hite n'iwu ke osnusno omumu ke badnu, kovu o bu nye ariohna hite nu iknernema budnu ke kwoko.

¹⁷ Kwnornu nu okwukwo nsokaru kpa, "I bu nye ariohna okwnukokwnu, n'ahiri Mekizedeki."

¹⁸ Be sigbasiri iwu oknani kwnornu nu o za rikne, o bnage iru obula,

¹⁹ kwnornu nu o za nhne ke iwu mernu ozu ozu. Kovu a nwernu olile anya ke ka mma ke a jeeji vadu Chiokike ndundu.

²⁰ Chiokike duru risi gbasiri a, ele berere buru ele ariohna hne be duge risi.

²¹ Jizosi bu nye ariohna Chiokike dunnu risi, kwu masi nhne gbasiri a, "Jihova duru risi, o jalahna aznu,

'I bu nye ariohna okwnukokwnu.'

²² Kwnornu odu risi ka, Jizosi bu mbimambi ke ogbanjo-ehni ke kakwo mma.

²³ Ele ariohna wam zi agida kwnornu nu be nwurnu onwu ke mernu be nwe rikne dazigidne lele ele ariohna.

²⁴ Kovu Jizosi zi budnu okwnukokwnu, ernu ke nye ariohna a za naagbanwo agbanwo.

²⁵ Kam kpayaru, o nwernu rikne o znohia kpm kpm bu ele hiri n'aka a vakwnusi Chiokike, kwnornu nu o zi budnu okwnukokwnu norionu be ariri nu ruwhnu Chiokike.

²⁶ A nwernu nye risi ariohna nu kpa, nye zi nsokaru,

nwée ntùbo, nye mmehie zìla nù rime, nye zì ichne hne ele badnù ele mmehie zì, nye be gwelizòru olu kakwo kpakara oligwe.

²⁷ Jizòsi nùna lele ele risi ariòhna ele berere, ò zà naakwa ariòhna kpakara òbochi kwnornu mmehie ke a nù ke ele Izireli. Kòvu ò kwarnù otu ariòhna kpòì ke zuru òhna nga o gweru èhni a kwa ariòhna.

²⁸ Kwnornu nù iwu mernu ele badnù ele zúge ozu ele risi ariòhna, kòvu ikwu-ònu wam Chiokike jiri dù risi ke sno iwu wam n'aznù mernu Nnwò wam nye zuru ozu òkwnukokwnu.

8

*Jizòsi bù nye risi
ògba-njò-èhni ikne*

¹ Ka bù risi kpakara nhne a nookwu, a nwernu nye risi ariòhna nù kpa, nye dazì n'akarikwnunga ngadna eze Chiokike n'oligwe.

² Nye ariòhna nù kpa zì nòornu èrnu nye ariòhna nù Hne Kakwo Nsò n'oligwe, bù ezi Oro-Èka Nsò ke Nyenwe àì wuru, ò búla badnù.

³ Nye risi ariòhna òbula jaakwa ariòhna nù nkesi nù ruwhnu Chiokike, ò zì mkpa nù nye ka jeenwerìri nhne o jeeji kwa ariòhna.

⁴ Ò búru nù ò zì n'òwa, ò jòobu nye ariòhna rìà rìà, kwnornu nù agida ele ariòhna zì ele naakwa ariòhna lele kpa Iwu Mozizi kwuru.

⁵ Be neezne izi n'Oro Nsò ke nhne atù lele ke zì n'oligwe.

Lele kpa Chiokike kannù Mozizi nga o noowu Oro-Èka Nsò, “Whnù nù i mernu kpakara nhne lele kpa be gesiri ì be n'olu rugwu.”

⁶ Kòvu èrnu òkwa ariòhna ke Jizòsi kakpa ke ele rnurnu èrnu nù mkpururu iwu òknani. Ògba-njò-èhni ke ò gbarù n'esilawùru Chiokike nù ele badnù kakwo mma, kwnornu nù o gwuzogwu n'olu mkwna ke kakwo mma.

⁷ Ò búru nù ògba-njò-èhni ke mbòm zuru ozu, mkpa ke èbo be znéne akpa àì.

⁸ Kòvu Chiokike whnurnu nù ele badnù zúge ozu, ò kaa, “Òbochi vawa, bù nhne Jihova kwuru,

nga me nù òro Izireli nù òro Juda,

jaagba njò-èhni ikne.

⁹ Ò jòonu lele njò-èhni, me nù ele nda be gbarù,

n'òbochi me jiri be n'aka m òhia be n'èli Ijipiti,

be kwnátala ovu nù njò-èhni wam me nù be gbarù,

m lemernu m be anya, bù nhne Jihova kwuru.

¹⁰ Kìtna, ka bù njò-èhni me nù ele Izireli jaagba

nù òbochi ke jaava, bù nhne Jihova kwuru.

M jeeyisi iwu m nù rime echiche be,

m jaagbakwasì be n'olu mkpòma be,

m jòoburu Chiokike be, be jòoburu ele ke m.

¹¹ Ò zà nye n'esilawùru be ke jeezni ibne a,

mòbu kanù nwene a, 'Mahìa Jihova,'

kwnornu nū kpakara be
jaamahia m,
hite nū nye zī matī du
nye ezi.

12 M jaagbaru nū be ọgahie be,
m jeechenwanya mmehie
be berere.”

13 Hne o nookwu ọka
ọgba-njọ-ẹhni ikne, Chiokike
mernu ma ke mbọm zīri
ọknani, nhne ọbula mernu
ọknani jọdoka ọdoka, whume
masi.

9

Okpenu Chiokike n'owa

1 Ọgba-njọ-ẹhni ke mbọm
ke Chiokike nū rumu Izireli
gbaru nwernu iwu osnusno
okpukpe n'oro nsọ ke ọwa.

2 Be wuru ọro okpukpe ke
mbọm ke bu hne zī nsọ. Nū
rime ọnu ọro ke mbọm, nhne
zī nū rime a bu nhne be
bita tọnji nū ikpechi nū bredi
ariohna Chiokike.

3 N'aznū ikpe obnosni ke
ẹbo bu hne be kwu Hne
Kakwo Nso.

4 Nhne zī nū rime a bu ojo
golu ke isensi, nū Igbe Ọgba-
Njọ-ẹhni be wọru golu. Nū
rime igbe wam, nhne zī a bu
otu ite golu mana, nū mk-
para Eroni ke waru ọkwukwo
nū mbadamba akaworugwu
lawuru ke be gbakwasiri iwu
wam n'olu be.

5 N'olu igbe, ele enine izi be
wuru ọwu zī igwugwu be kwu
Cherubim gbasaru akankwu
be kpusnirni ikpechi oru.
A jeeuwe rikne kowa kpa be
kitna.

6 Nga be bita kworu
kpakara nhne, ele ariohna

naabna nū hne zī nsọ
kpakara ọbochi nọornu ẹrnu
be.

7 Kọvu okwolem nye risi
ariohna naabna nū Hne
Kakwo Nso n'aznū ikpe
obnosni wam otu mgba
n'awha. O jeeji ọvnarna ke o
jeeji kpusni mmehie ke a nū
mmehie ele Izireli mernu nū
ọma ama.

8 Enine Nso neegesi kpa
Oro-ẹka Nso ke mbọm nū
omen'eli a gwuzo koriri, apna
be jeeji naabna nū rime Hne
Kakwo Nso mesnirni emesni.

9 Ka bu nhne neegesi n'ige
ka, nū nkesi nū ariohna be
jiri kwanu Chiokike ariohna
jeeuwe rikne mee ele neeg-
weya nkesi ariohna zu ozu.

10 Ka bu wiri nū manya
nū mmemem ke ọsnusna,
kpakara omen'eli ele ka bu
nhne anya nọowhnu joog-
wuzo tem du ige Chiokike
jaagbanwo be.

Ọvnarna Karaisi

11 Kọvu Karaisi varu lele
nye risi ariohna nhne ke ka
mma ke zī hna, Oro-ẹka Nso
ke o nọornu ẹrnu nū rime a
kakpa, zu masi ozu. O buo
ke be jiri aka wu, o buo ke be
keru eke n'owa ka.

12 Nga Karaisi bnaznenu
nū rime Hne Kakwo Nso, o
bnarnu otu mgba kpoi. O jile
ọvnarna owu mọbu ke nnwo
ehni kwa ariohna, kọvu o ji
ọvnarna ke a gbahia kpakara
ai ọkwnukokwnu.

13 Ọvnarna owu nū ehni
nū nnwo ehni nū retnu ke
be wekwasiri ele zila richna

mernu be ziri richna n'olu ẹhni.

14 O ko buru ọvna Karaṣi, nye hiri n'Enine Nso ọkwnukokwnu gweru ẹhni a kwa ariohna nwée ọru nu ruwhnu Chiokike, jọosnusnama akoniche ai whoga n'ernu ojo ke jaakpaya ẹnwu, ma a kpenu Chiokike ke zi budnu.

15 Kam kpayaru, Karaṣi jiri buru nye agbata ke ọgba-njo-ẹhni ikne, ma ele Chiokike sukwuru nwehia mkwna o kehia nhne kwó okwo. Kwnornu nu o nwurnu ẹnwu ma o zi kpa o gbahia be nu rime awhnuwhnu ke mmehie be mernu nu mkpururu ọgba-njo-ẹhni ke mbom.

16 Hne iwu oke mkpe zi, be jeegesiri nu nye wam gbaru a nwurnu ẹnwu.

17 Kwnornu nu iwu oke mkpe bu nhne etekne hne nye gbaru a zi budnu, kovu o jaabna n'ernu nga nye gbaru a nwurnu ẹnwu.

18 Ka bu nhne kpayaru nu ọgba-njo-ẹhni ke mbom jiri ọwusi ọvna gwuzosiri rikne.

19 Kwnornu nu nga Mozizi kannu ele Izireli kpakara nhne iwu wam kwuru, o gweru ọvna nnwo ehni gwagidne a mini, gweru hisopu nu wuulu ihie whesi n'okwukwo iwu wam nu kpakara ele badnu.

20 O kaa, "Anu bno nsni, ka bu ọvna ọgba-njo-ẹhni ke anu nu Chiokike gbaru, anu bita a."

21 Kpam masi, o whesiri Oro-Eka Nso ọvna nu

kpakara agbugba nu nhne be ji zne izi.

22 N'ezi oka, o gwnarnu mati ọvna mee kpakara nhne ziri snam n'iwu, kwnornu nu hne be wusage ọvna, ọgbaru mmehie zila.

Ariohna Karaṣi noovume mmehie

23 Kam kpayaru, Oro-Eka Nso ke owa ka nu kpakara nhne zi nu rime a, bu oiyi nhne zi n'oligwe, bu nhne be jeeji ọvna nọosnu, kovu nhne ke oligwe n'iwuru a piuru ariohna ke kakwo mma karu ọvna anohia.

24 Kwnornu nu Karaṣi bnage nhne zi nso be jiri aka wu, ke bu oiyi ke ọkwnamarna nhne. Kovu o bnaznenu oligwe hne o gwuzo nu ruwhnu Chiokike nu risi ai.

25 Nye risi ariohna ele Ju naabna Hne Kakwo Nso otu mgba n'awha gweru ọvna anohia. Kovu Karaṣi znege o ji ẹhni a kwa ariohna agida ige.

26 O buru kpam, Karaṣi znernu ata awhnuwhnu agida ige hite n'opanizo okike owa. Kovu o whuyaru otu mgba kpo kwnornu ai n'okwukwo ige ka, gweru ẹhni a kwa ariohna ma o vume mmehie.

27 Ka bu ezi oka, badnu jonwuriri otu mgba, omekwo, ikpe Chiokike sno a.

28 Kpam masi, be jiri Karaṣi kwa ariohna otu mgba o vume mmehie agida ele badnu, o jaava ke mgba lawuru znohia ele neele anya a hne mmehie zila a.

10

Karaïsi kwaru ariohna zuru ohna otu mgba

¹ Iwu wam bu enine nhne oma ke jaava, o buo nhne wam, kam kpayaru, o nwée rikne hite nu ariohna ke be naakwa ige obula mee ele naava o kpo risi eli zu ozu.

² O buru nu ele neekpenu Chiokike zi richna nu rime ovu, ikpe mmehie ba mana be. Kpakara okwa ariohna zn-ernu okwome.

³ Kovu kpakara ariohna wam bu nhne ke neechen-wyanu be mmehie be hite n'awha du n'awha.

⁴ Kwnornu nu ovnarna ehni nu owu nwée rikne vume mmehie.

⁵ Kam kpayaru nga Karaïsi varu n'owa, o karu,

“Ariohna nu nkesi ruwhnu oma masige i,
kovu i bitannu man o-ehni
o bnonu i nsni.

⁶ Ovu za noso i n'onu
kwnornu ariohna okporne
bekwnu mobu ariohna
mmehie.

⁷ Mkaa, ‘Chiokike, le, m valəm
o mee nhne i pioru me
mee,
lele kpa be gbaru nhne
gbasiri m n'okwukwo
nsq.’”

⁸ Ke mbom, o karu, i piole ariohna nu nkesi ruwhnu oma, mobu ariohna okporne bekwnu mobu ariohna mmehie, o bu n'ezi nu iwu wam karu be mee kpa.

⁹ O kaa, “Chiokike, le, m valəm o mee nhne i pioru me mee.” O gwemernu nhne ke

mbom ma o zi kpa o gwuzote nhne ke ebo.

¹⁰ Kwnornu nu Jizosi Karaïsi mernu nhne Chiokike pioru o mee, o snusnamarnu mmehie ai hite n'ariohna ke o jiri ehni a kwa otu mgba ke zuru ohna.

¹¹ Nye okwa ariohna obula noogwuzo kpakara obochi noru ernu a, naakwa otu ariohna agida ige. Kovu kpakara ariohna ka nwée rikne noovume mmehie.

¹² Kovu nga nye ariohna ka kwaru ariohna ke zi okwnukokwnu kwnornu mmehie, o daziri eli n'akarikwnunga Chiokike.

¹³ Hite n'ige wam, o zi neese ige Chiokike jaabita ele irno a lele nhne ogbakwasi ochi a.

¹⁴ Hite nu otu ariohna, o mernu ele zi snam hite nu mmehie zu ozu okwnukokwnu.

¹⁵ Enine Nso naagbanu ai akebne ka hite nu nhne o kwuru nu mbom,

¹⁶ “Ka bu njo-ehni ke me nu be
jaagba,
n'obochi ke jaava, bu
nhne Jihova kwuru,
m jeeyisi iwu m nu rime ovu
be,

m jaagbakwasi be
n'echiche be.”

¹⁷ O kaa kwno berere,
“M jeechenwanya aruru-eli be,
nu mmehie be berere.”

¹⁸ Kitna, o gbarunnu be kpakara mmehie be, ariohna berere za kwnornu mmehie.

¹⁹ Kam kpayaru, rumu nda m, a nwernu ovu siri rikne o bnazne nu Hne Kakwo Nso hite n'ovnarna Jizosi.

20 O gbamannu aị apna ikne ke zị budnu hite n'ikpe obnosni wam ke bu anọ-ehni a.

21 A nwernu nye risi ariohna ke kakwo, nye neelegidne ọro Chiokike anya.

22 Ngwa ma a gweru mkpoma zị richna nụ ezi okwnata ọvu, nụ ovu ikpe mana vakwnusi Chiokike, ya nụ ehni be jiri mini zị richna snusnama.

23 Ngwa ma a knetasi olile anya ke okwnata ovu aị aka rikne, kwnornu nụ nye kweru aị mkwna jaabita mkwna o kweru.

24 A gbalị mee nhne joovulizo ọwhnun'anya n'ovu ibne aị hite n'ornu ẹrnu oma.

25 A ghása ọgbako rumu nda n'otu lele kpa agwna ele badnu neeme. Kọvu a kwnagidne ibne aị ke kakwo kpa ọbochi wam naava ndundu.

26 O buru nụ a jaazi koriri neeme mmehie hne a nurnu ezi oka wam, ọ zá ariohna berere be jaakwa kwnornu aị.

27 Kọvu nhne ke gwnarnu bu olile anya ke tu ogwnu ke ikpe, ya nụ ke okne bekwnu ke jeerne ele neemegidne Chiokike.

28 Nye ọbula ke dnarnu Iwu Mozizi nwurnu ẹnwu hne badnu lawuru mọbu ẹto gbagidnernu a akebne, be donnu a obirizi.

29 Anụ le kpa ikpe wam jaazi rikne bu awhnuwhnu nye wam jaata bu nye lednarnu Nnwọ Chiokike anya,

nye kpoge ọvnarna ọgba-njọ-ehni ke Chiokike nhne, ke snusnamarnu mmehie a, nye lednarnu Enine Nso ke oru anya.

30 Kwnornu nụ a magwu nye karu, "Mawa nwe mmegwnahia, m jeemegwnarnu." Jihova kwuru berere, "Jihova jeekpe ele ke a ikpe."

31 O bu nhne tu ogwnu o dnabna n'aka Chiokike ke zị budnu.

32 Anụ chenwanya ọbochi ele ke wheru ewhe kpa anụ snurnu ovu kpa iwhne Karaisi mukwasiri anụ nụ rime kpakara awhnuwhnu.

33 Agwna ige anụ buru ele be kpasiri iwhnerne n'ohna, ige berere anụ dasiri ele berere be neemegbu emegbu n'ikwnu.

34 Anụ donnu ele zị n'ikelu obirizi. Nga be nahuru anụ nhne anụ nwernu, ovu sọru anụ n'onu kwnornu nụ anụ magwu nụ anụ nwernu ẹkwu ke jaazi okwnukokwnu n'oligwe.

35 Anụ tūwhu ovu osi rikne anụ, o jeenwe ọgwo ẹrnu zị agida.

36 Anụ snuta ovu ma anụ nwernu rikne mee nhne Chiokike pioru, nahia masi nhne o kweru nụ mkwna.

37 Kwnornu,

"Ige matị,

nye wam jaava bu nye jaava, o jooḡbu okwnu.

38 Kọvu, nye mee mma ke m jeehi n'okwnata ovu ziri budnu,

o buru nụ nye ọbula lahna aznụ,

nhne gbasiri a joso m ovu n'onu."

³⁹ Kovu a buo ele naalahna aznu, whu etekne, a bu ele kweru du n'oznohia mkpuru ovu.

11

Ele dikne ke okwnata ovu

¹ Okwnata ovu bu odnabnenu nu nhne a neele anya, nu otukwasi ovu nu nhne ke a whnuga anya zi.

² Hite n'okwnata ovu, ele gbaka naharu ruwhnu oma n'aka Chiokike.

³ Hite n'okwnata ovu, a ghohiaru nu Chiokike jiri ikwu-onu a ke owa, ke kpararu, nhne a nowhnu anya hi nu nhne a whnuga anya whuya.

⁴ Ebeli jiri okwnata ovu kwanu Chiokike ariohna ke ka ariohna Keni nwene a mma. Hite n'okwnata n'ovu a, Chiokike gbaru akebne nu o bu nye mee mma kwnornu nu Chiokike nahoru nkesi a. Hite n'okwnata n'ovu a, o zi koriri nookwu oka o bu n'ezi nu o nwurnu onwu.

⁵ Hite n'okwnata ovu, Inoku nwuna onwu, kovu Chiokike kwururu a nu budnu, be whnuna a, kwnornu nu Chiokike kwururu a. Kovu su Chiokike kwururu a, be gbaru akebne a nu o mernu nhne soru Chiokike ovu n'onu.

⁶ Hne okwnata ovu zila, be nwee rikne mee nhne joso Chiokike ovu n'onu. Kwnornu nu nye jaavakwnusi Chiokike jeekweriri

nu Chiokike zi, nu o bu nye nookwu ele noopiosi a rikne ogwo ennu.

⁷ Hite n'okwnata ovu, Noa turu ogbo nga Chiokike doru a aka nu nsni nhne ke zi nu ruwhnu, o whnuna anya, o tu ogbo o jiri znohia ele ora. O marnu owa ikpe, kehia ome mma hite n'okwnata ovu.

⁸ Hite n'okwnata ovu, Eberham bnornu nsni nga Chiokike sukwuru a zne eli ke o jeekehia nu mkwna, o whoga neezne hne o ma.

⁹ Hite n'okwnata ovu, o wuru n'eli Chiokike kweru a mkwna lele nye izne. O wuru n'oro-eka, ya nu Aziki nu Jekopu, ele ya nu be kehiaru otu mkwna wam.

¹⁰ Kwnornu nu Eberham neele anya eli ke nwernu ntueli, ke Chiokike bu nye nka nu nye wuru a.

¹¹ Hite n'okwnata ovu, Sera naharu rikne o tu rime nga o wheru ige, o bu n'ezi nu o nwee nnwo* kwnornu o karu nu o bu nye kwesiri okwnata ovu bu nye kweru mkwna.

¹² Hite n'otu badnu ka, Eberham, o bu n'ezi o nu lele nye nwurnu onwu, hne avnurnu a hna lele mbu ke oligwe nu lele rizna ke zi nu ngeri osimini hna ke nwee onu ogwnugwnu.

¹³ Kpakara ele ka nwurnu nu rime okwnata ovu. Be nahiage nhne Chiokike kweru mkwna, kovu be whnurnu be hite nu hne zi ikere, gweru be, kwuhia nu be bu ele izne nu ele neewhe ewhe n'owa.

* **11:11** mabu hite n'okwnata ovu, Eberham ghuru nda, o bu n'ezi o mernu okno badnu, Sera n'iwuru a nwee nnwo

14 Nga ele badnu nookwu kpa, ka neegesi nu be neele anya eli ke aka be.

15 N'ezi oka, o buru nu be naari oriri gbasiri eli ke be hiri whuya, be zneru alahna aznu.

16 Kitna, be neele anya eli ke ka mma, eli ke oligwe. Kam kpayaru, iwhnerne za neeme Chiokike ma be sukwu a Chiokike be, kwnornu nu o bitannu be otu eli.

17 Hite n'okwnata ovu, Eberham gweru Aziki kwa ariohna nga Chiokike kparu a iru. Nye wam nahiaru mkwna wam jiri otu nnwo kpoi o nwernu kwa ariohna.

18 O bu n'ezi nu Chiokike karu, "Hite nu Aziki, i jeenwe agida rumu."

19 Eberham kweru nu Chiokike nwernu rikne mee Aziki hi n'enwu lizo, n'ezi oka, o nahoru nnwo a lele nye hi n'enwu lizo.

20 Hite n'okwnata ovu, Aziki goziri Jekopu nu Iso, nookwu oka gbasiri ngozi ke zi nu ruwhnu.

21 Hite n'okwnata ovu, Jekopu goziri rumu Josefu lawuru nga o nonwu enwu. O dnabnenu nu mkpara a kpoi risi eli nyee Chiokike.

22 Hite n'okwnata ovu, Josefu nga o nonwu enwu kwuru nhne gbasiri okwnehala ke rumu Izireli n'eli Ijipiti, nyee be iwu gbasiri okpukpu a.

23 Hite n'okwnata ovu, ele muru Mozizi tugwaru a enwa eto kwnornu nu o bu nnwo zi ichne, ogwnu iwu eze tula be.

24 Hite n'okwnata ovu, Mozizi, nga o sopiyaru nu badnu, kwele be sukwu a nnwo adna Fero.

25 O snornu rumu Chiokike ta awhnuwhnu kanu a mma kakwo o nwe ovu oso n'onu ke mmehie ige mati.

26 O gwnurnu nhne iwhnerne ke Karaisi nhne zi okne onu ahia kakwo kpakara ekwnu ke Ijipiti, kwnornu nu o neele anya ogwo ernu ke zi nu ruwhnu.

27 Hite n'okwnata ovu, o sigbasiri eli Ijipiti, o tula ogwnu ovu owe ehni ke eze, kwnornu nu o gwuzoru kwem lele nye whurnu Chiokike wam be whnu anya, anya.

28 Hite n'okwnata ovu, o miteru Iriri Ogawhe nu onarna be wesaru ma enine izi enwu wam ke gburu kpakara nnwo mbom be muru gharu o gbu nnwo mbom ele Izireli.

29 Hite n'okwnata ovu, rumu Izireli wheru Osimini Ihie lele eli etekne, nga ele Ijipiti pioru ma be whe, mini riri be.

30 Hite n'okwnata ovu, oghiri mkpo Jeriko dnarnu, nga ele Izireli gbaru a gburugburu obochi esau.

31 Hite n'okwnata ovu, nwerinya ewhere Rehabu ziri budnu, be gbukotala ya nu ele irno Chiokike, kwnornu nu o tugwaru ele zneru o nyokahia eli wam.

32 Ndaa nhne me jookwu, kwnornu nu ige zila me jookwu nhne gbasiri Gidioni, nu Baraki, nu Samsini, nu

Jefita, nū Devidi nū Sameli, nū kpakara ele owhnurninya.

³³ Ele hiri n'okwnata ovu lugbu eli-eze, rñu ɛnu oma, nahia mkwna, kpusni onu odum,

³⁴ Kpachni bekwnu noonwu onwu, gbanahoru ama-ogwnu, be nwée rikne, kovu be ghoru ele dikne, ele dikne n'ogwnu, chihala ele ogwnu eli berere.

³⁵ Ele rinya nahiaru ele ke be hiri n'enwu lizo. Be taru ele berere awhnuwhnu, kovu be kwéle be dōhia be, ma be lizo n'enwu ke ka mma.

³⁶ Be mernu ele berere nhne rumu, pñia be hna, owe, be knernu ele berere eriri, yisi be n'ikelu.

³⁷ Be turu be akaworugwu, be kwobiri be ebo, be jiri ama-ogwnu gbu be, be woru akpukpo owu nu aturnu gbaghari, be ghō ele mboni, be kpakna be ehni, megidne be.

³⁸ Ele owa kwésile ele ka. Be gaghari lele ele nwée oro n'eli-ikpa nu rugwu matī, be wuru nu rime mkpewu nu onunu eli.

³⁹ Kpakara ele ka nwernu otnutnu oma kwnornu n'okwnata ovu be, kovu be nahiage mkwna wam.

⁴⁰ Chiokike bitannu ai nhne ka mma. Chiokike mernu ma ai nu be zukota, ma a buru ele zuru ozu n'otu.

12

Chiokike naapnia rumu a nhne

¹ Kam kpayaru, hne a nwernu agida ele akebne

gbaru ai gburugburu, a tuwhu kpakara nhne ke noobnosni ai nu mmehie ke naatakwnusi n'ehni ai, ma a gweru okasi mkpoma gba eso ke zi ai nu ruwhnu.

² A neelegidne Jizosi anya, nye turu ntū-eli nu nye mekwakworu okwnata ovu ai. Nye kwnornu ovu oso n'onu ke zi a nu ruwhnu li nhne igbugbu ke ogba, gweme iwhnerne, o daziri eli kitna n'akarikwnunga ngadna eze Chiokike.

³ Anu tule nhne gbasiri nye wam ke liri nhne igbugbu ke ogba nu omegidne ke ele mmehie, rikne bo gwu anu, anu dna n'apna.

⁴ Nu rime ogwnu anu nolu megidne mmehie, anu yooluge ogwnu du n'owusa qvnarna anu n'enwu.

⁵ Anu chezuru ikwu-onu okasi ovu wam ke Chiokike nookwu anu lele rumu, "Nnwō m, i lédna odo aka nu nsni ke Jihova anya, ovu lakwadia anu mini nga o bigboru anu.

⁶ Kwnornu nu Jihova naata ele o whnurnu n'anya awhnuwhnu, naapnia nye obula o kwuru nnwō a nhne."

⁷ Anu nabnarnu awhnuwhnu anu naata lele odo aka nu nsni ke nda nodo rumu a. Anu whnulele nnwō ke nda a za nodo aka nu nsni sa?

⁸ O buru nu Chiokike za nodo anu aka nu nsni lele ele berere, anu buo rumu a, kovu anu bu rumu oyi.

⁹ Nda ai k'owa nodo ai aka nu nsni, a noobnonu be nsni.

A kwesiri o bnonu Nda aị ke enine aị nsni karukwo ma a ziri budnu.

10 Nda aị k'owa naapnia aị nhne ige matị n'ovu oso n'onu be, kovu Chiokike naapnia aị nhne kwnornu mbnarna ke aị, ma a snornu a kehia ozi nso a.

11 O zá odo aka nu nsni obula ke noso oso n'ige wam, kovu o zi igbugbu. Omekwo, o mipiya ezi mkpuru ke ome mma nu udno nu rime ele gawheru nu rime a.

12 Kam kpayarụ, anụ mee aka ke dnarnu adna lizo nu mkpnerne ochi ke nwée rikne gwuzoru kwem.

13 Anụ zne izne n'apna ke snirni asni o zi ele nwée ochi ba dna n'apna, tñunuma, be gwọ be.

O do aka nu nsni

14 Gbali ma ji nu kpakara ele badnu ziri n'udno, ziri masi nso, kwnornu nu o zá nye joowhnu Chiokike anya su o zila nso.

15 Anụ whnu nu o zá nye dnahalaru n'oru ke Chiokike. O zi nye nu lele egwnugwnu luga nlulu n'esilawuru anụ ke joovuyanụ anụ mkpa, hite nu a mejo agida badnu.

16 Anụ whnu nu o zá nye neeme oyi mọbu nye zá nsoonu Chiokike anya lele Iso, nye kwnornu otu mgba wiri re onodi onarna a.

17 Anụ mahiaru, omekwo, o pioru o nahoru ngozi nda a, oghere zila kwnornu nu o nwée rikne gbanwo nhne o mernu, o bu n'ezi nu o jiri

anya-mini ekwna piosi ngozi wam rikne.

18 Anụ vāduge nu rugwu ke anụ jeemetu aka, lele rugwu Saina ke neerne bekwnu, nu ochichiri, okne ogwnu nu okne ruwhere,

19 nu odidna ke okwodu nu odidna nkoli ke ele nurnu a, riasno nkoli wam kwuma berere.

20 Kwnornu nu be gwuzolige iwu wam ke karu, "O bubedi anohia vadu rugwu wam metu a aka, be gweru ara tugbu a."

21 Nhne Mozizi whnurnu zi okne ogwnu, o kaa, "Ogwnu turu m, ehni nooznu m biri biri."

22 Kovu anụ vaduru rugwu Zayoni, bu Jeruselem ke oligwe, eli-ohna ke Chiokike ke zi budnu, nu ele enine izi, o zá nye noogwnuli onu, ele neetne eri onwudna.

23 Anụ vadulem ogbako Chiokike ke rumu be beru osno mu, ele be gbaru rewhna be n'oligwe, vakwnusi masi Chiokike, nye neekpe kpakara ele badnu ikpe, nu enine ke ele ome mma zuru ozu.

24 Anụ vakwnusiri Jizosi, nye ibno ke ogba-njo-ehni ikne, nu onarna ke owhesa, ke nookwu nhne ke ka mma kakwo onarna Ebeli.

25 Anya du anụ eli, anụ whnu nu anụ gháruła o nurnu nhne nye wam nookwu. O buru nu ikpe marnu ele wam bnóne nsni nhne nye wam zi nodo be aka nu nsni n'owa kwuru, ndaa kpa a jaagbanahoru, o buru nu a

bnóne nsni nhne nye wam zi n'oligwe nòodo aì aka nù nsni nookwu?

²⁶ Nkòli a mernu ọwa zñụ biri biri n'ige wam, kọvu kịtna, o kweru mkwna kaa, “Berere kwno, m jeeme ọ búo ọwa kpọi zñụ biri biri, kọvu oligwe masi.”

²⁷ “Berere kwno” neegesi nù o jeegweme kpakara nhne nọoznu biri biri bú nhne be keru eke, ma nhne ke zá nọoznu biri biri gwuzosi rikne.

²⁸ Hne a nanahọru ẹli-eze ke zá nọoznu biri biri, a tñnu Chiokike mmamma, kwnakwu a kpa ọ jọoso a n'ọnu, nù ogwnu nù ọso anya.

²⁹ Kwnornu nù Chiokike bú bẹkwnu neerne erne.

13

Kpa be wu búndu jaamasì Chiokike

¹ Anù nọowhnu ẹhni anù n'anya lele rùmu nda.

² Anù chézu elekọta ele izne, kwnornu nù agwna badnù lekọtaru enine izi hne be máa.

³ Anù chenwanya ele zì n'ikelu lele nù anù nù be zì n'ikelu. Anù chenwanya ele naata awhnùwhnu lele nù anù nù be sno naata awhnùwhnu.

⁴ Anù sọbisinu ọlulu nzi nù nnwerne. Anù méru ọkpata nzi nù nnwerne kwnornu nù Chiokike jeekpe ele neeme ọyi nù ele ewhere ikpe.

⁵ Anù kwé ọwhnun'anya iwai nẹechi mkpọma anù, nhne anù nwernu jì anù rùwho, kwnornu nù Chiokike karù,

“M jáaghasa anù rịa rịa, m jáasa anù aka rịa rịa.”

⁶ Kam kpayarù, a jì ovu siri rikne kaa,

“Jihova bú nye neenyinu m aka,

ogwnu zá nọotu m nhne badnù jeeme m.”

⁷ Anù chenwanya ele risi anù wheru ewhe, ele kwunnu anù ikwu-ọnu Chiokike, kpa be wuru búndu be, kpa be nwurnu ẹnwu, anù snornu ọkwnata ovu be.

⁸ Jizọsi Karaìsi zì kpa ọ zì, ekile, tna, dù ọkwnukokwnu.

⁹ Anù kwékwadia iznizni ikne ọbula zì ichne ichne kwnapù anù n'apna. Ọ ka mma mkpọma aì gwuzosi rikne n'oru Chiokike, ọ búo nù omen'ẹli wiri zì ichne ichne ke zá naabnanù ele neeri a mbnarna ọbula.

¹⁰ A nwernu ojo ke ele naakwa ariọhna n'Ọro-Ẹka Nsọ nwée rikne ri nhne zì nù olu a.

¹¹ Kwnornu nù nye risi ariọhna neegwebna ọvnarna anọhia be gburu lele ariọhna mmehie nù rime Hne Kakwo Nsọ, kọvu be nọokporne ọkpna anọhia wam bẹkwnu n'aznù ẹli-ọhna.

¹² Kam kpayarù, Jizọsi tarù awhnùwhnu n'aznù ẹli-ọhna ma o gweru ọvnarna a bíta ele badnù nsọ.

¹³ Ngwa ma a znekwnusi a n'aznù ẹli-ọhna vuru masì iwħnerne a.

¹⁴ Kwnornu nù a nwée ẹli-ọhna ke jaadazìgidne hna, kọvu a neele anya ẹli ke naava nù ruwhnu.

15 Ngwa ma a znarni Chiokike ige obula, ma o buru ariohna hite nu Jizosi, ka bu nhne nkesi ke hi ai n'ovu, hite n'onu nookwuhia nu o bu Nyenwe ai.

16 Anu chenwanya, neeme nhne oma ya nu neekesi ele badnu nhne anu nwernu, kam bu ariohna ke noso Chiokike ovu n'onu.

17 Anu bno nsni, anu bita ehni anu nu mkpururu ele risi anu, kwnornu nu be neelegidne anu anya lele ele jaasa ajji nu ruwhnu Chiokike, ma be rnu ernu be n'ovu oma, o buo nu ovu owe ehni, ke za bnanu anu mbnarna obula.

Obekwu ikwu ipne-aznu

18 Anu kpenu ai okpukpe. A magwu nu ovu ai zi richna kwnornu nu a pioru o mee nhne buru oma ige obula.

19 M naariasno anu kpenu m okpukpe ma m vakwnusi m anu wara wara.

20 Kitna, Chiokike udno nye mernu Nyenwe ai Jizosi hi n'enwu lizo, nye bu Okne Nye Znu Atnurnu wam, hite n'ovnarna ogba-njo-ehni kwó okwo,

21 nyee anu kpakara nhne buru oma o mee echiche a. O gweru masi ai mee nhne masiri a, hite nu Jizosi Karaisi nye nwe igwugwu okwnukokwnu. Amim.

22 Rumu nda m, anu bno nsni n'ikwu-onu ezni ke me kwuru, kwnornu nu okwukwo me gbaru za ogologo.

23 Anu mahia nu nnwo nda ai Timoti whuyalam n'ikelu. O

buru o va ngwa ngwa, me nu a joosno va lekasi anu.

24 Anu bekwu kpakara ele risi anu nu kpakara rumu Chiokike. Ele Itali neebekwu anu.

25 Oru Chiokike dazinu kpakara anu.

Ọkwukwo izi Jemisi Nhne gbasiri ọkwukwo izi ka

Ọkwukwo izi Jemisi jihjaru n'agida ezni o nyernu kpakara rumu Chiokike gbasaru nu "rime kpakara ọwa." Jemisi ji agida nhne anya n'owhnu n'obochi neezni nhne ke enine, neegesi kpa nye Karaisi kwesiri o ji akoniche wu budnu n'owa. Jemisi kwuru oka gbasiri o ba eze, ọwa, ọrnurna, agwa oma, okewa, ọkwnata mkpoma, riro, akoniche, okno oka, oknomokno, ọzi wohnernerne, okpe ele berere ikpe, nganga, ndidi nu okpukpe.

Ọkwukwo izi ka nookwu mkpa o zi nu badnu nwernu ọkwnata mkpoma nu nhne obula o neeme, lele kpa o kwesiri nye neekpenu Chiokike.

Nhne zi n'ọkwukwo izi ka

Ọpanizo (1:1)

Ọkwnata mkpoma nu akoniche (1:2-8)

Ọdna ọwa nu eze (1:9-11)

Ọrnurna (1:12-18)

Ọnurnu nu omume (1:19-27)

Ọdo aka nu nsni gbasiri okewa (2:1-13)

Ọkwnata mkpoma nu ẹrnu (2:14-26)

Nye Karaisi nu riro a (3:1-18)

Nye Karaisi nu ọwa (4:1--5:6)

Ezni zi odo nu odo (5:7-20)

¹ Mawa, Jemisi, nye izi ke Chiokike nu ke Nyenwe ai Jizosi Karaisi, neebekwu kpakara ele ke Chiokike, ke bu avnurnu nri nu ebo ele Chiokike zi nu rime kpakara ọwa.

Ọkwnata ovu n'ige ọrnurna

² Rumu nda m, o buru nhne snarnima ige obula anu dnabnarnu nu nhne ọrnurna zi odo n'odo.

³ Kwnornu nu o bu okpa ọkwnata ovu iru jeegweya ndidi.

⁴ Ndidi rnuzu ẹrnu a, ma anu buru ele zuru ozu, o za nhne kogwu.

⁵ O buru nu o zi nye nwée akoniche, nye wam rio n'aka Chiokike, nye neenye kpakara badnu hite nu mkpoma oma a, o za naakpasi iwhternerne. O jeenye a.

⁶ Nye wam jeeji ọkwnata ovu n'orio, o nweko mkpoma lawuru. Nye nwernu mkpoma lawuru nu lele abaka-mini osimini, nga ruwhere neewhe, o notulizo a olu.

⁷ Nye ki cheko nu o jeenwehia nhne obula n'aka Nyenwe ai.

⁸ O bu nye mkpoma lawuru, o gwuzole kwem nu kpakara apna a.

Ọdna ọwa nu eze

⁹ Nnwọ nda ke bu nye mboni nwudna nga Chiokike gwelizoru a olu.

¹⁰ Nnwọ nda ke bu nye kwu nwudna nga Chiokike gwednarnu a eli. Kwnornu nu nye kwu jaagawhe lele igwugwere oha.

11 Nga ẹhnam wasiri n'orne bẹkwnu a, ọ chnagbu achara, igwugwere a dnahnala, mma a kwome masi. Kpam masi, nye eze jaagawhe nẹ kpakara ẹrnu a.

Ornurna

12 Ngozi jaazinu nye wam ovu a siri rikne nẹ ige ọrnurna, kwnornu nẹ o megbu ọrnurna, o jeenwehia budnu kwó okwo ke Chiokike kweru ele whnurnu a n'anya mkwna.

13 Nga be naarna anụ ọrnurna, nye wam kákwadia, "Chiokike naarna m ọrnurna," kwnornu nẹ ọ zá nye nwernu rikne rna Chiokike ọrnurna, Chiokike rna badnu ọrnurna.

14 Kọvu be naarna badnu ọrnurna nga nhne ojo ke mkpọma nọto a, ma o duwhu a.

15 Nga nhne ojo ke mkpọma wam turu rime, ọ mụhia mmehie, mmehie masi sopiya, ọ mụhia ẹnwu.

16 Rụmu nda m me whnurnu n'anya, anụ kwé be duwhu anụ.

17 Kpakara nkesi ọma nẹ nhne buru ọma neehi n'oligwe naava, n'aka Nda ke keru iwhne, nye zá naagbanwo lele kpa enine naagbanwo.

18 Chiokike pioru o gweru ikwu-ọnu ke ezi ọka a mụhia aị, ma a buru mkpuru mbom ke kpakara nhne o keru eke.

Onurnu nụ omume

19 Rụmu nda m me whnurnu n'anya, anụ mahia ka, kpakara badnu ziri gnarnag-narna n'ọnurnu, kọvu ọ búo

n'okwu ọka. O wé masi ẹhni wara wara.

20 Nye ovu owe ẹhni nwée rikne mee nhne jaamasị Chiokike.

21 Kwnornu nẹ ka, anụ gweme kpakara rune nẹ kpakara agwa ojo ke jipiharu mkpọma anụ. Anụ gweru ẹhni anụ bita nẹ mkpururu Chiokike, nahọru ọka wam ke nwernu rikne ọ znọhia mkpuru mkpọma anụ.

22 Anụ buru ele neeme nhne ọka wam kwuru, anụ búko ele nọnu ọnu kpọi, needuwhu ẹhni anụ.

23 Nye ọbula ke nọnu ikwu-ọnu wam kpọi, kọvu ọ zá neeme eme, nẹ lele badnu ke neelekiri ruwhnu a nẹ nyno, whnụ ruwhnu a kpa ọ nẹ,

24 o lekirikwo ẹhni a, ngangam, ọ whọga, chezume ọkpa badnu ọ bú.

25 Kọvu nye ọbula ke neelegidne anya n'iwu wam zuru ozu ke neeme badnu nwernu ẹhni a, ke naadazigidne nẹ rime a, ọ búo nye nọnu ọnu nechezu masi, kọvu nye neeme nhne iwu wam kwuru, Chiokike jọgozi nye wam n'ẹrnu a.

26 Ọ buru nẹ nye ọbula bú nye neekpenu Chiokike, kọvu o knésige riro a eriri, ọ nọghonu mkpọma a aghigho, okpenu Chiokike a bú nhne etekne.

27 Okpenu Chiokike ke zị snam, ke be mérula emeru nẹ ruwhnu Chiokike bú Nda aị, bú ka, o chenwanya rụmu nwée nda nẹ nne, nẹ ele rinya nzi be nwurnu nẹ mmekpehni be, nẹ badnu ọ

bīta ẹhni a rīchna hite nū nhne ojo k'owa ka.

2

Ole badnu anya nu ruwhnu

¹ Rūmu nda m, lele ele kweru nū Nyenwe aī Jizōsi Karaīsi, nyenwe igwugwu, anū lékọ badnu anya nū ruwhnu hite nū ya naakpa ike.

² Ọ bụru nū nye kwu ke gbagwu aī mkpaka golu, woru iwo marnū mma va n'ogbako anū, nye mboni ke wogwu nkukara iwo va masi,

³ ọ bụru nū anū sọbisinu nye wam wogwu iwo marnū mma, kanū a, “Daziri nū ngadna ka,” kọvu kanū wọmboni wam, “Gwuzoru hna, mọbu daziri n'ẹli etekne n'ochi m,”

⁴ anū kpála ike, bụru masi ele ikpe ọriri ojo marnū?

⁵ Anū bnote nsni, rūmu nda m me whnurnu n'anya, Chiokike hōrulam ele mboni ke ọwa ka, mee be bụru ele kwu n'okwnata ovu be, be bụru masi ele o jeenye ẹli-eze wam o kweru ele whnurnu a n'anya mkwna.

⁶ Kọvu anū lednarnū wọmboni anya. Ọ búo ele kwu wam neemgbu anū? Ọ búo be nọopnurnu anū zne ọro ikpe?

⁷ Ọ búo ele kwu noolulu rẹwhna ọma nye wam nwe anū?

⁸ Ọ bụru anū bīta iwu Eze aī ke oligwe ke be gbarū n'okwukwo nsọ, “Whnū nye agbatibi i n'anya lele ẹhni i,” anū mekwarū nkari.

⁹ Kọvu ọ bụru nū anū le badnu anya nū ruwhnu, anū mehielem. Iwu jeegesi nū anū dnarnū iwu.

¹⁰ Nye ọbula ke jaabita kpakara iwu, kọvu dna otu kpọi, ọ dnanam kpakara iwu wam.

¹¹ Kwnornu nū nye wam karū, “I mékọ ọyi,” kamasiri, “I gbúkọ badnu.” Ọ bụru nū i méne ọyi, kọvu i gburu badnu, i bụ nye dnarnū iwu.

¹² Anū kwu, mee masi lele ele Chiokike jeeji iwu ke neeme badnu nwernu ẹhni a kpe ikpe.

¹³ Kwnornu nū nye nwée mkpọma obirizi, Chiokike jọdonu a obirizi nga o jeekpe a ikpe. Obirizi nọonwudna n'ikpe ọmuma.

Okwnata ovu nwée ẹnu bu nhne etekne

¹⁴ Rūmu nda m, ndaa mbnarna ọbnarnu ọ bụru nū nye ọbula kaa, “M nwernu m okwnata ovu,” kọvu ẹnu a gésile a? Ọkwnata ovu kpọi ọ jọoznohia a?

¹⁵ Ọ bụru nū rūmu nne rukna mọbu rūmu nne rinya nwée iwo, mọbu wiri oriri,

¹⁶ mbnarna kīni bụ nhne ọ bnarnū, ọ bụru nū otu badnu n'esilawuru anū kanū a, “Lekwarū anya, o nyee i iwo i joowo, chí i iyi, nū wiri i jeeji riji rụwho,” kọvu o nyéne a nhne ke zī anọ-ẹhni mkpa.

¹⁷ Ọ bụ masi kpa okwnata ovu ke nwée ẹnu bụ nhne nwurnu ọnwu.

¹⁸ Kọvu otu nyenum jaakaa, “Otu badnu nwernu okwnata ovu, nye berere nwernu ẹnu

oma.” Gesi m ọkwnata ovu i ke nwée ẹrnu, m jeegesi i ẹrnu oma m hite nọ ọkwnata ovu m.

¹⁹ I kweru nọ otu Chiokike, ọ bọru oma. Ele ẹrnuwọ ojo kwe masiri, be naama rưruru tu ogwu.

²⁰ Ji nye iwhnirniwhno! I pioru ọ mahia nọ ọkwnata ovu ke nwée ẹrnu bọ nhne etekne?

²¹ Gweru Ebereham nda ai nọ nhne atọ. Be gwnusiri a nọ nye mee mma hite n'ẹrnu oma a, nga o jiri Aziki nnwọ a rukna kwa arịohna n'olu ojo arịohna.

²² I whnurnu nọ ọkwnata ovu a nọ ẹrnu a rnukotaru ẹrnu. Ọkwnata ovu a zuru ozu hite n'ẹrnu oma a.

²³ Nhne be gbaru n'ọkwukwo nsọ mezuru ke kwuru, “Ebereham kweruru Chiokike, Chiokike gwnusinu a nọ ọ bọ nye mee mma.” Be sukwu a enyi ke Chiokike.

²⁴ Anọ whnurnu nọ be gwnurnu badnọ nọ nye mee mma hite n'ẹrnu oma a, ọ bọ hite nọ ọkwnata ovu kpọi.

²⁵ Kpam masi, gweru Rehabu nwerinya ewhere nọ nhne atọ. Be gwnurnu a nọ nye mee mma hite n'ẹrnu oma, nga o kwubnanyarnu ele varu ọ dna ndidna hi n'ẹli Izireli, zihala be n'apna berere.

²⁶ Lele kpa anọ-ẹhni bọ nhne nwurnu ọnwu hne enine zila, kpam masi, ọkwnata ovu bọ nhne nwurnu ọnwu hne ẹrnu zila.

¹ Rọmu nda m, kpakara anọ bọko ele zni nhne. Kwnornu nọ anọ magwu nọ ele zni nhne jeenwe agida ikpe kakwo ele berere.

² Kpakara ai naadnahie n'agida nhne. Nye za naadnahie nọ ikwu-ọnu bọ nye zuru ozu, nwe masiri rikne ọ chikota kpakara ẹhni a.

³ A neekne ọnu iyinya eriri ma be mee nhne a pioru be mee, zne masi hne a pioru be zne.

⁴ A gweru ọgbo mini lele nhne atọ, ọ bọ n'ezi nọ o zi okpotokpo, okne ruwhere noovughari a, kọvu nọ nye risi ọgbo ji amarna mati nọtughari ọgbo penupe ọbula nye risi ọgbo pioru.

⁵ Kpam masi, riro bọ nhne mati zi n'ẹhni ai, ọ nọtu ọka k'agida. Le kpa igbogo hna ezi bọ ke bẹkwu mati mernu o nwuzọ bẹkwu.

⁶ Riro bọ bẹkwu. O jiharu nọ agida nhne ojo n'esilawuru nhne zi ai n'ẹhni. Riro bọ nhne neemeru badnọ, nọomusi bọdnọ bẹkwu hite nọ bẹkwu ẹli ẹrnuwọ.

⁷ Badnọ nwernu rikne znọ, znọ masilam kpakara nhne be keru eke, mọbu anọhia ke zi ogwnu zi ichne ichne, nọ ọnnu ọbula, mọbu aznọ zi nọ mini, nhne ọbula nọopnu ọpnu.

⁸ Kọvu nọ ọ za nye nwernu rikne znọ riro. Ọ bọ nhne ojo ke za naadazi bidim. Nhne gbu badnọ zi nọ rime a.

⁹ A ji riro naaznarni Nyenwe ai nọ Nda ai Chiokike. A ji masi a nọovu badnọ ọnu bọ nye be kpuru n'oyiyi ke Chiokike.

3

Ledu riro i anya

10 Otu mmamma nū ovu onu neehi nū otu onu wam nṵowhuya. Rumu nda m, o bũo ọma ọ zị kpam.

11 Be tũhia mini sọ n'onu nū mini lu nlulu n'otu ọmi?

12 Rumu nda m, isisi figi o nwernu rikne mĩnya mkpũru isisi olivu? Mọbu isisi vaĩni o nwernu rikne mĩnya mkpũru isisi figi? Mini arũa, o nwernu rikne gbahĩa mini so n'onu?

Akọniche zị ichne ichne

13 O bũru nū o nwernu nye zị n'esilawũru anũ ke nwernu akọniche nū ọghohia, o gesi a hite nū bũdnu a, hite masị nū agwa ọma nū ogwedna ẹhni a ẹli ke hi n'akọniche.

14 Kọvu ọ bũru nū mkpọma anũ jihĩaru nū okwno-awũwa, nū ovu nlulu, nū aka-nchnị, anũ kpá nganga. Anũ mée ezi ọka ghọ aghalaghala.

15 Akọniche ke nū kpam híge n'oligwe va, ọ bũ ke ọwa. Enine Chiokike zịla nū rime a. O bũ nhne ke renwu ojo neezni.

16 Hne okwno-awũwa nū okewa zị, ọgba aghara ghara jaaziri.

17 Kọvu akọniche ke hi n'oligwe va, beru ọsno zịri rịchna, omekwo, o nwe udno, o nwernu mkpọma ọma, naadnakọta n'otu, o nwernu obirizi nū ẹrnu ọma, o nwée aghigho, ọ kwu ezi ọka.

18 Ele neeme udno naakpa mkpũru udno. Be jọoghohia mkpũru ke imerne ọma.

4

Enyi ke ọwa

1 O bũ kịni noovuya ọlu ogwnu nū ọdogbuta n'esilawũru anũ? Be hi nū nhne ojo ke nṵogwnu mkpọma anũ, ke nṵolu ọgwnu nū rime anũ.

2 Anũ pioru nhne, kọvu anũ nwéhĩala a, anũ jiknernu o gbu badnũ. Anũ piosi nhne rikne, anũ nwée rikne nwehĩa be, anũ jiknernu nṵodogbuta, nṵolu ọgwnu. Anũ nwée nhne anũ pioga kwnornu nū anũ rịola n'aka Chiokike.

3 Anũ nṵorio, kọvu anũ zá nanahĩa kwnornu n'oriri ojo ke mkpọma anũ, ma anũ gweru a mee kpa o jiri masị anũ.

4 Anũ ele kwé be tũkwasi anũ ovu! Anũ máa nū nye ọbula ke whnũrnu nhne ọwa n'anya k'agida nye wam bũ nye irno ke Chiokike? Nye ọbula ke pioru ọ bũ enyi ke ọwa neeme ẹhni a nye irno ke Chiokike.

5 Anũ chéko nū nhne be gbarũ n'ọkwukwo nsọ bũ etekne, “Chiokike neelegidne Enine Nsọ a o yisiri nū rime anũ anya k'agida.”

6 Kọvu Chiokike neenye aị oru k'agida. Lele kpa be gbarũ a n'ọkwukwo nsọ, “Chiokike noogwuzogidne ele oknomokno, kọvu o neenye rumu mboni oru.”

7 Anũ bĩa ẹhni anũ nū mkpururu Chiokike. Anũ nyigidne Ekwensu, ọ jaagbawhu hne anũ zị.

8 Anũ kpayabetũ Chiokike ndũdu, ọ jaakpayabetũ anũ ndũdu. Anũ kwnosnama aka anũ, anũ ele arũru-ẹli.

Anụ snụsnama mkpọma anụ, anụ ele mkpọma lawuru.

⁹ O gbu anụ igbugbu, anụ ru ọwa, anụ gba mkpe! Rumu anụ gho ẹkwna. Snarnima anụ gho ọ gbarụ ruwgnu.

¹⁰ Anụ gwedna ẹhni anụ nụ ruwgnu Chiokike, o jeegwelizo anụ olu.

Anụ kpéko ibne anụ ikpe

¹¹ Rumu nda m, anụ kája ibne anụ. Nye ọbula ke naakaja nnwọ nda a, mọbu neekpe a ikpe, ọ naakaja iwu, neekpe masi iwu ikpe. Ọ buru nụ i bu nye neekpe iwu ikpe, ngam, i buo nye naabita iwu, kovu nye ikpe iwu.

¹² Chiokike kpọi bu nye neenye iwu nụ nye ikpe. Ya nụ nsnunu a nwernu rikne znọhia aị mọbu gbumekwo aị. I bu nyele ke neekpe badnu ibne i ikpe?

Anụ lúu ọnu nhne ekile jọbu

¹³ Anụ bnote nsni, anụ ele naakaa, “Tna mọbu ekile, a jeezne mba ka mọbu mba kiyari daziri pi otu awha, gba mgbama ahia, kpa agida iwai.”

¹⁴ Anụ máa nhne jeeme ekile. Ndaa nhne budnu anụ bu? Budnu anụ nụ lele iknorno-mini ke whuyaru, dazi ige mati, omekwo, o whume n'anya.

¹⁵ Ka bu nhne anụ znernu okwu, “Ọ buru ọ masi Nyenwe aị, a jaazi budnu mee ka mọbu mee kiyari.”

¹⁶ Kovu kitna, anụ noolu ọnu, neeme oknomokno. Kpakara o luu ọnu ka buo ọma.

¹⁷ Nye mahjaru nhne buru ọma o mee a, o méne a, ọ bunnu a mmehie.

5

Be dọru ele eze aka nụ nsni

¹ Anụ bnote nsni, anụ ele eze. Anụ kwna ẹkwna, si okokoba kwnornu nụ nhne igbugbu ke jaadnakwasị anụ.

² Ẹkwnu anụ roru oro, akika takwolem iwo anụ.

³ Kpakara golu nụ siliva anụ tulam ajari, ajari a jọbu nhne akebe megidne anụ. O jeerne anọ-ẹhni anụ lele bekwnu, anụ ele kpabitaru ẹkwnu n'ọbochi ipne-aznu ka.

⁴ Anụ bno nsni, anụ kwula ele anụ gnornu ẹnu n'ẹkwu anụ ọgwo ẹnu be. Ọgwo ẹnu be naakwna, nhne ọ nọokpokwu anụ dulam nsni Nyenwe aị Chiokike ke Meli Nhne Dum.

⁵ Anụ wuru budnu oriri nụ ọnwunwo n'ọwa, anụ mee lele kpa ọ masiri anụ. Kitna, ẹhni anụ ke gbarụ ọto jikn-ernunem, neese ikpe naava ava.

⁶ Ele aka be zi richna bu ele anụ marnu ikpe, anụ gbu be. Be méne anụ risi rikne.

Ọsnuta mkpọma nụ mmekpehni

⁷ Rumu nda m, anụ knata mkpọma tem Nyenwe aị va. Nye ẹnu ẹkwu ji naaknata mkpọma nụ mkpuru zi okne ọnu ahia ke ẹkwu a mịi, tem mini ozuzo mbom nụ ke ipne-aznu zo.

⁸ Anụwa masi, anụ knata mkpọma, dazisi rikne,

kwnornu nū ọvua ke Nyenwe aị zị ndūndu.

⁹ Rūmu nda m, anū nwéma mkpọma ojo n'ẹhni ibne anū, ma Chiokike gharū o kpe anū ikpe. Nye ikpe gwuzogwu n'ọnu-mgbo jiknernu ọ va.

¹⁰ Rūmu nda m, anū chenwanya nhne ele ọwhnurninya kwuru nū rẹwhna Nyenwe aị. Anū gweru be lele nhne atū nū ọknata mkpọma nū rime mmekpẹhni.

¹¹ Anū maam nū a nookwu ele wam ele ọwa ọma kwnornu nū be knatarū mkpọma. Anū nūrnū ọknata mkpọma Jobu, anū maam nū Nyenwe aị dọnnu a obirizi n'ipne-aznū, kwnornu nū Nyenwe aị bụ nye obirizi nū nye imerne ọma.

¹² Rūmu nda m, anū jí oligwe mọbu ọwa mọbu nhne berere dū risi. Oka anū bụru owe, owe, mọbu ọza, ọza, ọ zị Chiokike kpe anū ikpe.

*Okpukpe be kperu
n'okwnata ovu*

¹³ Ọ zị nye ọbula n'esilawūru anū ke zị nū mmekpẹhni? O kpe okpukpe. Ọ zị nye ovu nọoso n'ọnu? Ọ gwnū eri ọznarni.

¹⁴ Ọ zị nye ọbula ke naarija ẹhni igbugbu? O sukwu ele okno badnū ọgbako Chiokike, be kpenu a okpukpe, te a mọno olivu nū rẹwhna Nyenwe aị.

¹⁵ Okpukpe be jiri ọkwnata mkpọma kpe jọgwo nye nrịria wam. Nyenwe aị jeeme ẹhni si a rikne. Ọ bụru nū o mehieru, Chiokike jaagbarūnu a.

¹⁶ Kam kpayarū, anū kwuhjanu ibne anū mmehie anū, anū kpenu ibne anū okpukpe ma be gwọ anū ẹhni igbugbu anū. Okpukpe nye mee ọma nọornusi ẹrnu rikne.

¹⁷ Ẹlajia bụ badnū etekne lele aịwa. O kpesiri okpukpe rikne ma mini gharū o zo, mini zóle dū awha ẹto nū ẹnwa isunu.

¹⁸ O kpe kwno okpukpe, oligwe gweya mini ozuzo, ẹli mīnya mkpūru.

¹⁹ Rūmu nda m, ọ bụru nū otu badnū n'esilawūru anū kpahalarū n'apna ezi ọka, nye berere kwuhnahie a,

²⁰ anū mahija nū nye mernu nye ojo tūhnasna n'apna ojo a, znọhiaru mkpọma a n'ẹnwu. Nye wam kpusnirni agịda mmehie.

**Okwukwo izi
ke Mbom
Pita
gbaru**

**Nhne gbasiri
okwukwo izi ka**

Okwukwo izi ke Mbom Pita gbaru bu ke Pita gbaznennu ele Karaïsi naata awhnūwhnu kwnornu be neekpenu Nyenwe aï. Pita kannu be nu agida ele ke Karaïsi nõowhnusni anya n'aka ele Rom ele kwége nu Jizosi Karaïsi. Be jaazi koriri naata awhnūwhnu ke kakwo. Kõvu, Pita naakanu be nu be nwe ndidi kwnornu nu kpakara ele sno Nyenwe aï jaata awhnūwhnu kwnornu okwnata ovu be. O kaa nu ka jeeme okwnata ovu be si rikne, ke jeenye Nyenwe aï igwugwu n'õbochi Jizosi jaava.

Kõvu kwnornu nhne Chiokike mernu hite n'ome Karaïsi hi n'enuw lizo, kpakara ele Karaïsi nwernu olile anya. Lele kpa Karaïsi beru osno ta awhnūwhnu, omekwo, be nyee a igwugwu, o bu masi kpa nye Karaïsi obula jeenwe igwugwu nga Jizosi jaava.

Nhne zi n'okwukwo izi ka

Obekwu ikwu nu okpukpe (1:1,2)

Risi olile anya aï (1:3-12)

Owu budnu zi nsõ lele ele ke Chiokike (1:13--2:17)

Nhne atũ awhnūwhnu Karaïsi (2:18-25)

Awhnūwhnu nye Karaïsi (3:1--4:19)

Ezni ele risi õgbako Chiokike (5:1-11)

Obekwu ikwu ipne-aznu (5:12-14)

¹ Mawa, Pita, nye izi Jizosi Karaïsi, naagbaznenu ele Chiokike hõhiaru ke gbasaru kpakara eli Põntosi, Galasia, Kapadosia, Esia nu Bitinia okwukwo izi ka.

² Chiokike Nda mahiaru anũ, gweru aka a hõru anũ, bita anũ nsõ hite n'Enine Nsõ, ma anũ noobnonu Jizosi Karaïsi nsni, ma õvnarna a snusnama anũ.

Oru nu udno banũ anũ aba.

Olile anya ke zi budnu

³ Oznarni zĩnu Chiokike nu Nda Nyenwe aï Jizosi Karaïsi, nye hiri nu obirizi a muhia aï nu budnu ikne. O mernu Jizosi Karaïsi hi n'enuw lizo, ke nyernu aï okwnata ovu zi budnu.

⁴ A bna n'okehia mkpe ke za noolulu olulu, nu ke be merala emeru, nu ke za nõobo õbo, ke Chiokike bitannu anũ n'oligwe.

⁵ Chiokike jeeji iknernema a bita anũ tem anũ nahia õznohia, kwnornu nu anũ tukwasiri a ovu. O jeeme ka whũya iwhne n'ige ipne-aznu.

⁶ Anũ nõonwudna õnwudna kitna kwnornu ka, o bu n'ezĩ nu anũ naata awhnūwhnu zi õdo n'õdo n'ige mati ka.

⁷ Kpakara õrnarna ka varũ ma be tule okwnata ovu anũ ma anũ zi snam lele kpa be neeji bekwnu naagba golu ke

noolu olulu. O bu kpa be neeji bekwu nootule okwnata ovu anu, ma anu nwehia oznarni nu igwugwu n'obochi be jookpume Jizosi Kara isi.

8 Nye anu whnuru n'anya, o bu n'ezini nu anu jile anya anu lawuru whnu a, anu kweru nu ya, o bu n'ezini nu anu jile anya anu lawuru whnu a kitna. Kam kpayaru anu nwernu snarni ma k'agida ke onu jokowali.

9 Anu nahiaru nhne anu kwnataru ovu ke bu oznohia ke mkpuru ovu anu.

10 Ka bu oznohia wam ele owhnurninya piosiri rikne, nyosna nhne gbasiri a, be whnuru owhnurninya gbasiri nkesi wam Chiokike jeenye anu.

11 Be pioru o mahia ige wam nu kpa o joburu bu nhne Enine Kara isi ke zi nu rime be kwuru, nhne gbasiri awhnu whnu Kara isi jaata nu igwugwu ke joosno a.

12 Chiokike kpumennu ele owhnurninya ka nu eru be buo ke be, kovu ke jaabnanu anu iru, bu ke be kwuru hite n'onu ele znirni anu izi oma, hite nu rikne ke Enine Nso ke hiri n'oligwe va. Ka bu nhne ke ele enine izi pioru o lebna anya nu rime a.

Anu ziri nso

13 Kam kpayaru, anu suru ajini n'ovu anu, anya du anu eli, anu neele oru ke Jizosi Kara isi jeenye anu anya nga be kpumernu a.

14 Lele rumu ke noobnonu Chiokike nsni, anu lagna nu rime nhne ojo ke noogwunu

anu nu mbom nga anu zi lele ele ma nhne.

15 Tnnuma, lele kpa nye wam sukwuru anu zi nso, anu ziri nso nu kpakara nhne anu neeme.

16 Kwnornu nu be gbaru a n'okwukwo nso, kaa, "Anu ziri nso, lele kpa me zi nso."

17 O buru nu anu noosukwu Nda ke za neele badnu anya n'ikpe, bu nye neekpe badnu obula lele kpa eru be jiri zi, anu ziri budnu lele ele izne nootu ogwunu n'owa ka.

18 Anu magwu nu o buo golu mabu siliva ke noolulu olulu bu nhne be jiri gbahia anu hite n'aka nhne ojo ke anu nahiaru n'aka ele nda anu oknani,

19 Kovu o bu onarna Kara isi ke zi okne onu ahia, lele nnwo aturu ke nwee oru mabu ntupo.

20 Chiokike hohiaru a tutu su o turu ntueli owa. Kovu o mernu a o whuya iwhe n'obochi ipne-aznu ka kwnornu anu.

21 Anu kweru nu Chiokike hite nu ya, nye o mernu ma o hi n'enwu lizo, nyee a igwugwu, ma olile anya anu nu okwnata ovu ziri nu Chiokike.

22 Hne anu bitaru ehni anu snam hite n'obno nsni n'ezini oka, noowhnu ele kweru ekwe n'anya, anu gweru owhnun'anya ke hi n'ovu anu whuya whnu ibne anu n'anya.

23 Be muru anu berere, o buo hite nu mkpuru ke nooro oro, kovu hite nu mkpuru ke za nooro oro, ke bu ikwu-onu Chiokike ke zi okwnukokwunu.

²⁴ Okwukwo nsọ kwuru,
 “Kpakara badnụ nụ lele
 achara,
 igwugwu badnụ nụ lele
 okoko achara,
 achara chanwụ, okoko a dna-
 hala,

²⁵ Kọvu ikwu-ọnu ke
 Nyenwe aị jaazi
 ọkwukokwunu.”

Ka bụ ikwu-ọnu ke izi ọma
 wam be znirni anụ.

2

¹ Kam kpayarụ, anụ gweme
 kpakara nhne ojo n'ehni anụ,
 irno, nụ kpakara aghigho, nụ
 ruwhnu lawuru, nụ okwno-
 awụwa nụ ọkaja.

² Lele rumu be mụrnu
 ikne, akpiri ke mini-rẹma
 ke zị snam ke enine, ke bụ
 ikwu-ọnu Chiokike nọokpo
 anụ bẹkwnu, ma anụ nwọ a,
 sopiya nụ badnụ dụ ọznohia.

³ Kịtna, anụ raturu a riro
 whnụ nụ Nyenwe aị bụru
 ọma.

Akaworugwu zị budnu

⁴ Anụ vakwnusi Nyenwe
 aị lele rugwu ke zị budnu
 ke ele badnụ juru, kọvu ke
 Chiokike hōhiaru, zị okne ọnu
 ahia n'anya a.

⁵ Anụwa masi, lele aka-
 worugwu ke zị budnu, be jiri
 anụ wu Ọro Nsọ ke enine, ma
 anụ bụru ele ọkwa ariohna zị
 nsọ, ele jaakwa ariohna enine
 ke Chiokike jaanarnụ hite nụ
 Jizọsi Karaisi.

⁶ Be gbarụ a n'okwukwo nsọ,
 kaa,
 “Le, m bitaru m nụ rime
 Zayoni,

akaworugwu nsukala ọro
 me hōhiaru ke zị okne
 ọnu ahia,
 nye ọbula ke tūkwasiri a ovu,
 iwhnerne jọtou a.”

⁷ Nụ hne anụ ele kweru
 ekwe zị, akaworugwu ka
 zị okne ọnu, kọvu hne ele
 kwé ekwe zị, be gbarụ a
 n'okwukwo nsọ, kaa,
 “Akaworugwu ke ele noowu
 ọro juru,
 kiyam ghọlam risi nsukala
 ọro.”

⁸ Be gba kwno,
 “Akaworugwu ke jeeme
 badnụ kpọbi ọchi,
 nụ rugwu ke jeeme be
 dna.”

Be dnarnụ kwnornu nụ be
 kwége ikwu-ọnu Chiokike,
 lele kpa echiche Chiokike
 zịnu be.

⁹ Kọvu anụ bụ ele Chiokike
 jiri aka a hōhia, ele ariohna ke
 eze, mbam ke zị nsọ, ele ke
 Chiokike, ma anụ gesi ọznarni
 nye wam sukwuru anụ hite
 nụ rime ọchichiri bna nụ rime
 iwhne a zị igwugwu.

¹⁰ Nụ mbom anụ bụo ele ke
 Chiokike, kọvu kịtna, anụ bụ
 ele ke a, ele nwéé obirizi nụ
 mbom, kọvu kịtna, Chiokike
 donnu anụ obirizi.

¹¹ Ele me whnurnu n'anya,
 m naariasno anụ, lele ele izne
 nụ ele neewhe ewhe n'owa
 ka, anụ nyéé nhne ojo ke
 nọgwnu anụ, ke nọolu masi
 ọgwnu megidne mkpuru ovu
 anụ oghere.

¹² Anụ wu budnu ke bụru
 ọma n'esilawuru ele máa
 Chiokike, ọ bụ n'ezi nụ be
 noobno anụ nhne ojo, kọvu
 be whnụ ọrnu ọma anụ, ma

be znarni Chiokike n'obochi o jeelekasi ai.

Bita ehni anu nu mkpururu ele ochichi

13 Kwnornu nu Nyenwe ai, anu bita ehni anu nu mkpururu ochichi ke badnu, mōbu eze, lele nye risi,

14 mōbu ele ochi eli ele o ziyaru o ta ele ojo awnūwhnu, nu o znarni nye neemē nhne oma.

15 Ka bu nhne Chiokike noopio, ma anu hite n'ernu oma anu kpusni onu ele iwhnirniwhno.

16 Anu wu budnu lele ele nwernu ehni be. Anu ji onodi wam kpusni nhne ojo, kovu anu ziri budnu lele ele izi Chiokike.

17 Anu so kpakara badnu anya, anu whnu rumu Nda n'anya, anu tu ogwnu Chiokike, anu sobisinu eze.

Awnūwhnu Karaṣi

18 Ele ohi, anu gweru oso anya bita ehni anu nu mkpururu ele nwe anu. Anu menu nye ovu oma nu nye udno kpōi, ma nye aka rikne masi.

19 Kwnornu nu Chiokike jōgozi anu o buru nu anu taru awnūwhnu hne o za nhne ojo anu mernu, kovu kwnornu nu anu turu ogwnu Chiokike.

20 Ndaa igwugwu ke anu jeenwe, o buru nu anu taru awnūwhnu kwnornu nu nhne ojo anu mernu? Kovu anu gwuzogidne n'awnūwhnu hne anu mernu nhne oma, Chiokike jōgozi anu.

21 O bu nhne be sukwuru anu, Karaṣi taru awnūwhnu nu risi anu, ghasanu anu nhne atu, ma anu snornu renu ochi a.

22 "O za mmehie o mernu, o za aghigho be piohjaru n'onu a."

23 Nga be mernu a nhne iwhnerne, o megwnarnuge, nga o taru awnūwhnu, o kpala rikne, kovu o gweru ehni a yisi n'aka nye wam neekpe ikpe buru oma.

24 Ya n'iwuhuru a jiri ehni a vuru kpakara mmehie ai n'olu oḡba, ma a buru ele nwurnu onwu ghasa mmehie, ziri budnu ele mee mma. O jiri enya a gwō kpakara ehni igbugbu ai.

25 Anu nu lele atnurnu ke whuru apna, kovu ke hiehnarnu hne Nye Ozuznu nu Nye Risi mkpuru ovu anu zi.

3

Ele nzi nu nnwerne

1 Kpam masi, anu ele bu nnwerne, anu bita ehni anu nu mkpururu nzi anu. O burubedi nu be bu ele kwéle ikwu-onu Chiokike, be jeenwe rikne hiri nu agwa oma anu kweru hne anu kwúle oka,

2 kpa be jōowhnu anu noowu budnu buru oma ke zi masi snam n'oso n'anya.

3 Anu kwé mma anu buru nhne ke anya nōowhnu kpōi, o buo kpa anu kparu risi anu, mōbu golu anu tu n'ehni, mōbu iwo marnu mma anu wogwu.

4 Kọvu mma anụ bụru agwa ọma wam tugwaru otugwa ke zị nụ rime ovu, ke bụ nhne ẹyi ke zá nooro oro, ke bụ ọzi wọhnerne nụ enine ke udno, ke zị okne ọnu ahia n'anya Chiokike.

5 Ọ bụ kpa ele rinya gbaka zị nsọ ele tųwasiri Chiokike ovu mernu ẹhni be mma, be bítaru ẹhni be nụ mkpururu nzi be.

6 Sera nụ kпам, o bnonnu Ebereham nsni, noosukwu a, “Nyenwe m.” Anụ bụ rụmu a rinya, ọ bụru nụ anụ jeeme nhne ọma gharu ọ tų ogwnu nhne ọbula.

7 Kпам masi, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwu nụ be bụ ele nwée rikne. Anụ nụ be jeekehia nkesi bụdnu kwó okwo Chiokike neekesi anụ n'etekne. Anụ mee kпам, ọ zị nhne ọbula bnosni okpukpe anụ.

Awhnụwhnu kwnornu ome nhne bụru ọma

8 N'ipne-aznụ, kpakara anụ nwe otu ovu, anụ donu ibne anụ obirizi, anụ whnụ ibne anụ n'anya lele rụmu nda, anụ nwe obirizi n'ẹhni ibne anụ, anụ bụru ele be gwednarnụ ẹli.

9 Anụ jí nhne ọjo kwụhnata nhne ọjo, anụ gógwna ngugo, kọvu anụ nọgozi ọgozi, kpa Chiokike sukwuru anụ ma anụ kehia ngọzi masi.

10 Kwnornu nụ ọkwukwo nsọ kwuru, “Nye ọbula ke whnurnu bụdnu n'anya, ke noopio ọbochi ọma,

ọ bíta ọnu a ma ọ gharu o kwu ọka ọjo, bíta masi mgbele-ọnu a n'aghalaghala.

11 Ọ gharu nhne ọjo, mee nhne bụru ọma, pio udno, gbasno a.

12 Kwnornu nụ anya lawuru Nyenwe aị zị n'ẹhni ele mee mma, nsni a nọonu okpukpe be, kọvu ruwhnu Nyenwe aị neemegidne ele neeme nhne ọjo.”

13 Nyele jeemejọ anụ, ọ bụru nụ anụ gwuzosi rikne nụ nhne ọma?

14 Ọ bụru nụ anụ ta awhnụwhnu kwnornu nụ anụ mernu nhne ọma, ovu sọ anụ n'ọnu, ogwnu tų anụ kwnornu be, ovu lákwadia anụ mini.

15 Anụ sọbisinu Karaisi lele Nyenwe aị nụ rime ovu anụ. Anụ jiknernu ọ sa ajiji nye ọbula jaasikwa anụ nhne gbasiri olile anya wam zị n'ovu anụ hite n'ọso anya nụ ovu zị wọhnerne.

16 Anụ bíta ovu anụ snam, ma ele nookwu nhne ọjo kwnornu agwa ọma anụ kweru nụ Karaisi, iwhnerne jọotu be nụ nhne ọjo be nookwu.

17 Ọ ka mma, ọ bụru nụ ọ bụ echiche Chiokike nụ anụ taru awhnụwhnu kwnornu nụ anụ mernu nhne ọma karu kwnornu nụ anụ mernu nhne ọjo.

18 Karaisi nwurnu otu mgba kwnornu mmehie aị, nye ikpe mána nwurnu kwnornu ele ikpe marnu. Karaisi mernu ka ma o duru anụ du

hne Chiokike zì. Ọ nwụrnu ẹnwu n'ano-ẹhni, kọvu ọ zì bụdnu n'Enine,

¹⁹ nụ rime enine zì bụdnu,* o zneru zni ele enine ke zì n'oro ikelu izi ọma.

²⁰ Ka bụ ele zá noobno nsni, kpa Chiokike ji nkasi ovu neese nga Noa nọtụ ọgbo ke be jiri znọhia badnụ ele nụ ele, badnụ ẹsato kpọi hite nụ mini.

²¹ Ka neegesi nụ ọwu mini znọhiaru anụ, ke bụ nọorio Chiokike ovu zì snam hite n'olizọ n'ẹnwu ke Jizọsi Karaịsi. Ọ bụo ọsnuma rune ke ẹhni.

²² Karaịsi bụ nye larụ oligwe daziri ẹli n'akarikwnnunga, Chiokike, hne kpakara ele enine izi nụ ọchi risi nụ rikne zì nụ mkpururu a.

4

Owunu Chiokike bụdnu

¹ Kpam masi, Karaịsi tarụ awhnụwhnu n'ano-ẹhni a, anụ jikneru o mee kpam masi, kwnornu nye tarụ awhnụwhnu n'ano-ẹhni a zima neeme mmehie.

² Kam kpayarụ, ọ zá noowu bụdnu a n'owa ka lele kpa agwnụrnu nhne ojo ke badnụ, kọvu lele echiche Chiokike.

³ Kwnornu nụ ige anụ tuwhuru n'ige wheru ewhe noowu bụdnu lele ele máa Chiokike zulem. Ige wam anụ noowu bụdnu ke zila richna, agwnụrnu nhne ojo, ọnwọ manya, okne otne eri, nụ ọkwa rẹnwu.

⁴ Kịtna, o jiri be anya nụ anụ zá noosno be neeme nhne ojo berere, ke kpayarụ be nọovu anụ ọnu.

⁵ Kọvu be jaasa ajiji gbasiri ẹhni be nụ ruwhnu nye wam jeekpe ele zì bụdnu nụ ele nwụrnu ọnwu ikpe.

⁶ Kam kpayarụ, be jiri zni ele nwụrnu ọnwu izi ọma nga be zì, ma be kpe ikpe be hite nụ nhne be mernu nga be zì bụdnu lele badnụ, ma be ziri bụdnu n'enine lele Chiokike.

⁷ Mbimambi kpakara nhne zì ndundu. Anụ nwe anya udno, anya dụ anụ ẹli, anụ neekpe okpukpe.

⁸ Ke kakwo, anụ nwe ọwhnun'anya zì omimi n'esilawuru anụ, kwnornu nụ ọwhnun'anya nookpusni agida mmehie.

⁹ Anụ jí ntamu nabnanya ibne anụ.

¹⁰ Nye ọbula gweru nkesi ọ nahiaru n'aka Chiokike znenu ibne a izi, gweru okwesi ọkwnata ovu neekesi oru Chiokike zì ọdo n'ọdo.

¹¹ Nye neezni izi ọma, ọ zni a lele nụ ọ bụ ikwu-ọnu ke hi n'ọnu Chiokike whuya. Nye neezne izi, o mee a lele Chiokike nyernu a iknernema, ma be znarni Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim tọm. Amim.

Awhnụwhnu lele nye Karaịsi

¹² Ele me whnụrnu n'anya, ọ gbagwoji anụ anya kwnornu ọrnurna zì igbugbu

* 3:19 hite nụ Enine Nso

ke naarna anụ lele nụ ọ bu
nhne ikne neeme anụ.

13 Kọvu anụ nwụdna,
kwnornu nụ anụ sno Karaisi
takọ awnụwhnu, ma anụ
nwe ovu ọso n'ọnu zị agịda nga
be jookpume igwugwu a.

14 Ọ bụru nụ be mernu anụ
nhne iwhnerne kwnornu nụ
rẹwhna Karaisi, ovu sọ anụ
n'ọnu, ka neegesi nụ Enine ig-
wugwu, ke bụ Enine Chiokike
wu nụ rime anụ.

15 Ọ zá nye ta awnụwhnu
n'esilawuru anụ lele nye
gburu badnụ, mọbu nye
buznu, mọbu nye mernu
nhne ojo berere, mọbu nye
neelebna anya nụ nhne
gbásịla a.

16 Kọvu, ọ bụru nụ nye
ọbula ta awnụwhnu lele nye
Karaisi, iwhnerne tuko nye
wam, kọvu o nyee Chiokike
ọznarni kwnornu nụ be
nookwu a nye Karaisi.

17 Ige valẹm nga be jaa-
panizo ikpe n'ezi-nụ-oro
Chiokike. Ọ bụru be panizo
ikpe nụ hne a zị, ndaa kpa
ọ jaazinu ele kwéle izi ọma
Chiokike?

18 Ọ bụru nụ ọ jaara ẹhni ọ
znọhia ele mee mma,
ndaa hne ele máa
Chiokike nụ ele mme-
hie jaazi?

19 Kam kpayarụ, nye ọbula
ke naata awnụwhnu lele
kpa echiche Chiokike jiri zị,
gweru ovu ọma yisi ẹhni a
kpa kpa n'aka Nye Okike
nye kwesiri ọkwnata ovu. Nye
wam zne nụ ruwhnu neeme
nhne ọma.

5

*Ele okno badnụ nụ
ele ikoro*

1 M naariasno ele okno
badnụ zị n'esilawuru anụ hne
me bụ masị nye okno badnụ,
m whnurnu m awnụwhnu
Karaisi tarụ, m jeekehia masị
igwugwu a nga be jookpume
a.

2 Anụ znụ atnurnu Chiokike
ke zị nụ mkpururu anụ,
neelegidne be anya nụ
kpakara ovu anụ kpa
Chiokike pioru a, ọ bụo nụ
mkpa kpagwụ anụ, kọvu
kwnornu nụ ọ bụ nhne
kwesiri omume. Anụ rnụ
ẹrnu anụ, ọ bụo kwnornu
iru anụ jeenwehia, kọvu nụ ọ
nhne zị n'ovu anụ n'omume.

3 Anụ mée be lele nụ be bụ
nhne ke aka anụ, kọvu anụ
bụru nhne atụ be joosno.

4 Nga Nye Risi Ọznuznu
Atnurnu varụ, anụ jaanahia
okpu-eze zị igwugwu ke jaazi
noonwu va-a-a tem.

5 Kpa masị, rụmu
ikoro, anụ bita ẹhni anụ
nụ mkpururu ele okno
badnụ. Kpakara anụ woru
ọzi wọhnerne n'ovu lele
iwo, neeznenu ibne anụ izi.
Kwnornu nụ ọkwukwo nsọ
kwuru,

“Chiokike noogwuzogidne
ele oknomokno,
kọvu o neenye ele zị
wọhnerne n'ovu
oru.”

6 Kam kpayarụ, anụ gwedna
ẹhni anụ nụ mkpururu
aka dikne ke Chiokike, o
joovulizo anụ olu n'ige ke a.

⁷ Anụ vukwnusi a kpakara mkpa anụ, kwnornu nụ nhne gbasiri anụ neemetụ a n'ovu.

⁸ Anya dụ anụ ẹli, anụ neese nse, nye irno anụ bụ Ekwensu, naagbaghari lele odum nọogbo oğbugbo noopio nye o jeeri.

⁹ Anụ ziri kwem nụ okwonata ovu anụ, anụ gwuzogidne a, kwnornu nụ rumu Nda anụ nụ kpakara owa naagawhe otu awnụwhnu wam.

¹⁰ Nga anụ taru awnụwhnu ige matị, Chiokike ke oru nye sukwuru anụ bna n'igwugwu a kwó okwo nụ Karaisi, joogwuzote anụ, nyee anụ rikne, gba anụ inwe.

¹¹ Kpakara rikne oħichi bụ ke a okwnukokwnu. Amim.

Obekwu ipne-aznu

¹² Saĩlasi nwene aĩ rukna ke kwesiri okwnata ovu yinnu m aka gba okwukwo izi matị ka, m naariasno anụ naagba akebne nụ ka bụ ezi oru Chiokike n'olu hne anụ gwuzo.

¹³ Ogbako Chiokike ke zị nụ Babiloni,* ke be hohiakoru anụ nụ ya neebekwu anụ, ma Makị nnwọ m.

¹⁴ Anụ gweru owhnun'anya Karaisi neebekwu ibne anụ.

Udno dazinu kpakara anụ ele zị nụ rime Karaisi.

* 5:13 Ka bụ Rom

**Ọkwukwo izi
ke Ẹbo
Pita
gbarụ
Nhne gbasiri
ọkwukwo izi ka**

Nye gbarụ ọkwukwo ka mernu ele noobno a nsni mahia nū nye Karaṣi ọbula kwesiri o wu bṛḁnu ke nṛotu ogwnu Chiokike (1:3). Be kwesiri o jikwasi ezi ọka be nyernu be rikne (1:12).

Ọ dṛu be aka nū nsni gbasiri ele ọwhnurninya aghalaghala, nū ele ọjo ka bnanam ọgbako Chiokike nooduwhu ele kweru n'ezi ọka. N'anya Chiokike, otu ọbochi nū lele otu pokwu awha, otu pokwu awha nū lele otu ọbochi. Chiokike zá noogbu ọkwu nū ọbita mkwna a lele kpa ele badnū neeche. Kṛvu Chiokike nwernu ndidi k'agida kwnornu nū ọ māsila a nū otu nye mmehie ọbula joowhu etekne.

Nhne zi n'ọkwukwo izi ka

Obekwu ikwu nū okpukpe (1:1,2)

Kpa ele sno Nyenwe ai kwesiri o wu bṛḁnu be (1:3-15)

Igwugwu Karaṣi (1:16-21)

Ele ọwhnurninya aghalaghala (2:1-22)

Nyenwe ai jaavariri berere (3:1-18)

¹ Mawa, Saṣmoni Pita, nye izi nū nye dazṣni anya Jizṣi Karaṣi, naagbaznenu anū

ọkwukwo izi ka, anū ele hiteru n'ome mma Chiokike nū Nye Ọznohia ai Jizṣi Karaṣi kehia ọkwnata ovu zi okne ọnu ahia lele ke ai.

² Oru nū udno banū anū aba kpa anū neezne nū ruwhnu naamahia Chiokike nū Jizṣi Nyenwe ai.

Osukwu ikwu Chiokike

³ Chiokike jiri iknernema a nyee ai kpakara nhne a pioru a jeeji wuru bṛḁnu nṛotu ogwnu Chiokike, kpa a zi neezne nū ruwhnu naamahia nye wam sukwuru ai bna n'igwugwu a nū ọma mma a.

⁴ Hite n'igwugwu a nū ọma mma a, o nyernu ai agida mkwna zi okne ọnu ahia, ma hite nū nhne ele ka, anū kehia igwe n'oyiyi ke Chiokike, ma anū gbanahṛu nhne ọjo ke ọwa ka noovuya a.

⁵ Kwnornu nū otu nhne ka, anū gbalṣ nṛotukwasi n'olu ọkwnata mkpṛma anū, ọma mma, n'olu ọma mma, anū tṛkwasi ọmahia nhne,

⁶ n'olu ọmahia nhne, anū tṛkwasi badnū knernū ẹhni a, n'olu badnū knernū ẹhni a, anū tṛkwasi ọsnuta ovu, n'olu ọsnuta ovu, anū tṛkwasi ọtu ogwnu Chiokike.

⁷ N'olu ọtu ogwnu Chiokike, anū tṛkwasi ọwhnun'anya rṛmu nda, n'olu ọwhnun'anya rṛmu nda, anū tṛkwasi ọwhnun'anya.

⁸ Kwnornu nū ọ bṛu nū anū nwernu kpakara nhne ka k'agida, be jeeme anū bṛu ele nṛornu ẹrnu ọma, naami mkpṛu dṛ ọmahia Nyenwe ai Jizṣi Karaṣi.

⁹ Kọvu nye nwée nhne ka kpuru isni, ọ whnú nhne zị ikere, o chezume nụ be snụsnamarnu a nụ mmehie ọknani a.

¹⁰ Kam kpayarụ, rụmu nda m, anụ ziri gnarnagnarna n'ome ikwu Chiokike suk-wuru anụ, hohia anụ bụru nhne gwuzosiri rikne. Ọ bụru anụ mee kpam, anụ jáadna rịa rịa.

¹¹ Kpam, be jeenye anụ rikne anụ jeeji bna nụ rime ẹli-eze ke zị ọkwnukokwnu ke Nyenwe aị nụ Nye Ọznohia aị Jizọsi Karaịsi.

¹² Kam kpayarụ, me chenwanyannụ anụ kpakara nhne ka ige ọbula, ọ bụ n'ezị nụ anụ magwụ be, anụ gwuzosi rikne n'ezị ọka wam anụ nahiaru.

¹³ M che m nụ o kwesiri ekwesi o chenwanyanụ anụ be kpa me zị kọriri bụdnu.

¹⁴ M magwụ m nụ ige matị m joowopu anọ-ẹhni ka, lele kpa Nyenwe aị Jizọsi Karaịsi kannụ m.

¹⁵ M jaagbalị rikne m, whnụ nụ nga me nwurnu nụ anụ jaazi neechenwanya be.

Igwugwu Karaịsi

¹⁶ Ọ bụo ọnutnu ruwhere be jiri akoniche tñu, nga a mernu anụ mahia ọvuva Nyenwe aị Jizọsi Karaịsi, anya aị lawuru whnurnu dudugna a.

¹⁷ Ọ nahiaru ọson'anya nụ igwugwu n'aka Chiokike Nda, nga akpịri Chiokike jiri okne igwugwu dna, kaa, "Ka bụ Nnwọ m me whnurnu n'anya, nye nhne a masiri m."

¹⁸ A nurnu akpịri ka hi n'oligwe dna, nga aị nụ ya zị n'olu rugwu wam zị nsọ.

¹⁹ Be mernu ikwu-ọnu ele ọwhnurninya wam gwuzosi rikne k'agida, anụ bno nsni nhne be gbarụ, kwnornu nụ ikwu-ọnu be nụ lele tọnji noonwu nụ hne gbarụ ọchichiri. Ọ jaazi kọriri noonwu tem dū n'ọbochi Jizọsi jaava, iwhne a joonwu nụ rime mkpoma anụ.

²⁰ Ke kakwo kpakara nhne, anụ mahia nụ ọ zá nhne ọwhnurninya ọbula be gbarụ n'okwukwo nsọ ke badnụ nwernu rikne kowa risi a hite nụ nhne zị n'echiche a.

²¹ Kwnornu nụ ọ zá ọwhnurninya ọbula be jiri echiche badnụ vu, kọvu ele badnụ kwuru ikwu-ọnu Chiokike kpa Enine Nsọ noodu be kwu.

2

Ele zni nhne aghalaghala

¹ Ele ọwhnurninya aghalaghala whuyaru iwhne n'esilawuru ele Izireli, lele kpa ele zni nhne aghalaghala jọowhuya iwhne n'esilawuru anụ. Ele ka jeeji aghigho gwebnanya iznizni ọgha zị ọdo n'ọdo ke noovuya ẹnwu, be gọnahoru Nyenwe be bụ nye gbahiaru be, ele neegweya ọla n'iyi zị ngwa ngwa nụ risi be.

² Agida ele badnụ joosno apna ome ọyi be. Kwnornu nụ nhne be neeme, ele badnụ jookwulu apna ezi ọka.

³ Ele zni nhne ka jeeji ọwho-anya kwu nhne be chehjaru

nụ mkpọma be, gweru anụ zụ ahịa. Ele ikpe ọmuma be neese be, ọla n'iyi be zá neere anyarna.

4 Chiokike sígbasila ele enine izi ele mernu mmehie, kọvu túbna be nụ rime bẹkwnu rẹnwu, hne be tũru be ijigba nụ rime ọchichiri neese ọbochi ikpe.

5 Chiokike sígbasila ọwa ọknani, kọvu dọhia Noa, nye mernu be badnụ ẹsato, nye neezni izi ọma ome mma, nga o gweyarụ mgba-mini ẹli n'ọwa ele máa Chiokike.

6 Ọ marnụ ẹli Sodom nụ Gọmora ikpe, gweru bẹkwnu rne be lele rẹtnu, mee be bũru nhne atụ nyee ele joowu bũdnu máa Chiokike.

7 Ọ dọhiaru Lotu nye mee mma, nye bũdnu zịla rịchna ke ele noolulu iwu ẹli wam mekparụ ẹhni.

8 Nye mee mma wam wuru n'esilawũru be, whnũ, nụ masị ọka ojo ke gburu a igbugbu nụ mkpọma.

9 Ọ bũru kpm, Nyenwe aị magwũ kpa o jọdohia ele mee mma nụ rime ọrnurna, nụ kpa ọ jaabita ele ojo nụ rime awhnũwhnu dũ n'ọbochi ikpe,

10 ke kakwo, ele noosno nhne rũru ọru ke anọ-ẹhni be, neeledna ele nẹchi ẹchi anya.

Be neezni nhne aghalaghala n'anya rikne, ele oknomokno, ele zá nọotu ogwnu nụ ọkaja ele oligwe.

11 Ọ bũbedi ele enine izi ele gbasiri rikne nụ ele nwernu iknernema karũ ele zni nhne aghalaghala ka, nwée rikne

gweru kpari bno ele oligwe nhne nụ ruwhnu Nyenwe aị.

12 Kọvu ele badnũ ka nookwulu nhne be ghóhiage, be nũ lele anọhia nsni inyo, nhne be keru eke neeme kpa ọ masiri be, be jọonwudne be, gbu be lele anọhia, be la n'iyi.

13 Be jaanahia ọgwo ẹrnu nhne ojo be mernu, ọ nọoso be o mee nhne ojo n'iwhehnie. Be bũ nhne iwhehnerne n'esilawũru anũ. Nhne zị nũ mkpọma be bũ nhne ojo kpa be sno anũ neeri wiri nọonwo.

14 Ome ọyi jiri be n'anya, inwe zá nọogwu be nũ mmehie, be nooduwhu mkpọma zá rikne, ele mkpọma be jihiaru n'ọwho-anya nũ ẹrnu ojo, ele be vũru ọnu.

15 Be ghahieru apna, gharũ apna ziri ezi, snornu apna Balam nnwọ Boso, nye whnũrnu ọgwo ẹrnu nhne ojo n'anya.

16 Kọvu iyinya a bigbọru a nũ mmehie a, anọhia kwú ọka, kwuru ọka n'ibiri n'nkọli ke badnũ, chĩma ẹra nye ọwhnurninya wam.

17 Ele badnũ ka nũ lele ọmi nwée mini, lele erumeru ruwhere mini noovughari, be bitannu be okne ọchichiri ọkwnuokwnu.

18 Kwnornu nũ ọnu be nookwu okne ọka mpako iwhehnerne, be naarnabnahna nũ rime mmehie ele naagbanahọru bũdnu ojo.

19 Be neekwe be mkwna o nwernu ẹhni be, kọvu be n'iwhehuru be bũ ọhi agwa ojo noovuya ẹnwu. Kwnornu

nụ nhne ọbula ke megburu badnụ, nye wam bụ ọhi a.

²⁰ Ọ bụru nụ be gbanahọru nhne noolulu ke ọwa nga be mahiari Nyenwe aị nụ Nye Ọznohia aị Jizọsi Karaịsi, be knegidne kwno be nụ rime a, o nwegidne be, ọnodi be n'ipne-aznụ jọjọbujo karu nụ ọpanizo.

²¹ Ọ ka mma nụ be máa apna ome mma karu nụ be mahiari a, be dnasnịnu iwu nsọ wam be nyernu be aznụ.

²² Nhne mernu be gesiri nụ elulu wam bụ ezi ọka, “Nkita nwarnu rugburu gburu lahna nụ nhne ọ nwarnu,” nụ “Ezni be hniarnu ẹhni lahnarnu nụ rime ọroto.”

3

Ọbochi Nyenwe aị

¹ Ele me whnurnu n'anya, ka bụ ọkwukwo izi ke ẹbo me naagbanu anu, m naakpali echiche oma nụ rime anu.

² Anu chenwanya ikwu-onu ele ọwhnurninya zi nsọ kwuru, ya nụ iwu Nyenwe aị nụ Nye Ọznohia aị nyernu anu hite n'aka ele izi a.

³ Anu mahia nụ mbom nụ ele ọkwa emo jaava n'ọbochi ipne-aznụ, neezne izne n'anọ-ẹhni be.

⁴ Be jaakaa, “Ndaa omezu mkwna ọvuvu a? Hite nga ele nda aị nwurnu ẹnwu, kpakara nhne zi koriri kpa ọ zi hite nụ okike ọwa.”

⁵ Be ma ama lewhuru anya n'ige wheru ewhe nụ Chiokike kwuru ọka, oligwe

nụ ọwa ziri. O hiri nụ rime mini kehia ọwa hite nụ mini.

⁶ Ọ bụ masi hite nụ mini, ke okne mgba-mini ẹli, be jiri lulu ọwa ọknani.

⁷ Kọvu oligwe nụ ọwa ke zi kitna bụ ke ọ bitaru hite n'ikwu-onu Chiokike wam, o jeeji bekwu lulu. Ọ bitaru be kwnornu ọbochi o jeekpe ele máa Chiokike ikpe, lulu be.

⁸ Kọvu ele me whnurnu n'anya, anu chizu otu nhne ka, otu ọbochi nụ hne Nyenwe aị zi nụ lele otu pokwu awaha, otu pokwu awaha nụ lele otu ọbochi.

⁹ Nyenwe aị zá naakpa nd-narna n'omezu mkwna a, lele kpa ele badnụ neechi, kọvu o nwernu ogologo ọsnuta ovu hne anu zi, kwnornu nụ o pirole nye ọbula whu etekne, kọvu ma kpakara badnụ hi nụ mmehie be whuya.

¹⁰ Kọvu ọbochi Nyenwe aị jaava, ọ jonu lele nye buznu, ele badnụ jáazi neele anya a. Oligwe jeeji okne mkpakpo gawhe, kpakara nhne zi n'olu jeeji okne bekwu gbaza. Ọwa nụ kpakara ẹnu be rnurnu nụ rime a jowho iwhe.

¹¹ Kpa a mahiari nụ kpakara nhne jaagbaza, ndaa kpa a kwesiri o wu budnu? A kwesiri o wu budnu zi nsọ, ya nụ ọ tu ogwnu Chiokike.

¹² Kpa anu neele anya ọvuvu ọbochi Chiokike,* anu mee ma ọ va ngwa ngwa, oligwe jaagba bekwu, kpakara nhne zi n'olu jeeji okne okpe bekwu gbaza.

* 3:12 Mọbu ọbochi Nyenwe aị jeekpe ọwa nụ oligwe ikpe

¹³ Kọvu a neele anya oligwe ikne nụ ọwa ikne, lele kpa o kweru mkwna, ọro ome mma.

¹⁴ Kam kpayarụ, ele me whnụrnu n'anya, hne anụ neele anya nhne ka, anụ gbalị ma anụ ziri snam, ele nwée ọtna ọtna, anụ nụ Chiokike ziri n'udno.

¹⁵ Anụ vuru nụ mkpọma nụ ogologo ọsnuta ovu Chiokike bụ ọznohia anụ, lele kpa nnwọ nda aị Pọlu, nye a whnụrnu n'anya gbannụ anụ n'ọkwukwo hite n'akọniche Chiokike nyernu a.

¹⁶ Ka bụ nhne o nookwu nụ kpakara ọkwukwo izi a, nga ọ naagba nhne gbasiri nhne ka, o nookwu agida nhne siri rikne n'oghohia, ke ele máa nhne nụ ele ovu be zá kwem nọkowahie, lele kpa be neeme nụ nhne berere zi n'ọkwukwo nsọ, ka bụ ma be la n'iyi.

¹⁷ Kọvu anụ, ele me whnụrnu n'anya, anụ magwu nhne ka, anya dụ anụ ẹli, ma nhne ọjọ ke ele noolulu iwu ẹli neezni gharụ o duhie anụ, mee anụ dnahnala n'ogwuzosi rikne anụ.

¹⁸ Kọvu anụ ziri nooso oso nụ oru nụ nhne ọmuma ke Nyenwe aị nụ Nye Ọznohia aị Jizọsi Karaịsi. Kpakara igwugwu zinu a, kịtna, dụ ọkwukokwunu. Amịm.

**Okwukwo izi
ke Mbòm
Jóni
gbarụ
Nhne gbasiri
okwukwo izi ka**

Jóni mernu ma ele Karaịsi mahia nù ọ bụru a kwuhia mmehie aị, Chiokike jaagbarunu aị, vume mmehie aị.

Nhne neegesi nù ele Karaịsi nwernu okwnata mkpoma bụ ọwhnun'anya be nwernu n'ehni badnụ ibne be (3:11-24). Chiokike bụ ọwhnun'anya n'iwihuru a, ele ke a kwesiri ọ nù lele ya masị (4:1-21). Nhne neegesi nù a nwernu omegbu mmehie bụ ọwhnun'anya a nwernu n'ehni ele berere, a kweru nù Jizọsi bụ Nnwọ Chiokike, nù ọ bụ Karaịsi wam n'ezi, nù ẹnwu a kwnornu aị bụ ezi ọka (5:1-12).

Nhne zị n'okwukwo izi ka

Ikwu-ọnu ke neenye budnu (1:1-4)

Chiokike bụ iwhne aị,
Karaịsi bụ nhne atụ aị
(1:5---2:6)

Iwu ikne (2:7-17)

Ele irno Karaịsi nù ele ke
Chiokike (2:18---3:10)

Ọwhnun'anya Chiokike nù
ọwhnun'anya aị (3:11---
4:21)

Omegbu ọwa (5:1-21)

Ikwu-ọnu ke neenye budnu

¹ Ikwu-ọnu Chiokike wam ke panizoru nù mbòm, bụ ke a nurnu, ke anya aị whnurnu, ke

a leru anya, bụ ke a kpaturu aka masị, bụ nhne a nọkpo okwo a, bụ ikwu-ọnu ke neenye budnu.

² Budnu wam whuyaru iwhne, a whnurnu a, gba masị akebne a, a kpọ okwo budnu kwó okwo ke zị n'aka Nda, omekwo dụ aị.

³ A nọkpo okwo nhne a whnurnu, nurnu masị, ma anụ snornu aị mekọ nhne. Omekorita aị bụ ke aị nù Chiokike nù Nnwọ a Jizọsi Karaịsi.

⁴ A gbarụ nhne ka n'okwukwo ma ovu ọso n'ọnu aị zu ozu.

Chiokike bụ iwhne

⁵ Ka bụ izi a nurnu n'ọnu a bụ masị ke a znirni anụ. Chiokike bụ iwhne, o zá ọchichiri zị nù rime a rịa rịa.

⁶ Ọ bụru nù a kaa nù aị nù ya neemekọ nhne, kọvu a neezne izne n'ọchichiri, a bụ ele aghalaghala, ezi ọka zila aị n'ọnu.

⁷ Kọvu, ọ bụru nù a zne izne n'iwihne, lele kpa o neezne izne n'iwihne, a neenwe mekorita n'esilawuru aị, ọvnarna Jizọsi Nnwọ a, nọosnusnama kpakara mmehie aị.

⁸ Ọ bụru nù a kaa nù a nwée mmehie, a nooduhie ẹhni aị, ezi ọka zila aị n'ọnu.

⁹ Kọvu, a kwuhia mmehie aị, Chiokike bụ nye kwesiri okwnata ovu nù nye mee mma, ọ jaagbarunu aị mmehie aị, ọ snumakwo kpakara aruru-ẹli aị.

¹⁰ Kõvu, a kaa nõ a mène mmehie, a neeme a nye aghalaghala, ikwu-õnu a zila nõ rime aì rìa rìa.

2

¹ Rõmu takiri m, m naagbanõ anõ õkwukwo ma anõ gharõ o mee mmehie. Kõvu, õ buru nõ nye õbula mehieru, a nwernu nye nookwunu aì õnu nõ ruwhnu Nda aì, rewhna a bu Jizõsi Karaìsi, nye mee mma.

² Jizõsi bu nye ji õvnarna a naawahajì-eli kwnornu mmehie aì, õ búo mmehie ke aì kpõì, kõvu mmehie kpakara ele badnõ.

³ Ka bu nhne neegesi nõ a magwõ nye õ bu, õ buru nõ a bita kpakara nhne o nyernu n'iwu.

⁴ O buru nõ a kaa nõ a magwõ nye õ bu, kõvu a zá naabitã iwu a, a bu ele aghalaghala, ezi oka zila aì n'õnu.

⁵ Ka bu nhne neegesi nõ a magwõ Chiokike, õ buru nõ a bitã iwu a, õwhnun'anya Chiokike zuru ozu n'ovu aì.

⁶ Nye õbula ke kaa nõ õ zì nõ rime a, joowu budnu lele kpa Jizõsi wuru.

Iwu ikne

⁷ Ele me whnõrnunõ n'anya, m zá m naagbanõ anõ õkwukwo iwu ikne, kõvu iwu õknani. Iwu õknani ka bu ke anõ nõrnunõ hite nõ õpanizo.

⁸ Kõvu m naagbanõ anõ iwu ikne, ezi oka wam zì nõ rime Jizõsi, nõ rime anõ, kwnornu nõ õchichiri naagawhe, ezi iwhne wam nõomukwasi aì.

⁹ Nye õbula ke kaa nõ õ zì n'iwhne, kõvu, sno nwene a irno, zì kõriri n'õchichiri.

¹⁰ Nye õbula ke whnõrnunõ nwene a n'anya zì n'iwhne wam, õ zá nhne jeeme a õ kpõbi õchi.

¹¹ Nye õbula ke snornu nwene a irno zì n'õchichiri, neezne izne n'õchichiri, õ máa hne o neezne kwnornu nõ õchichiri mernu a okpu isni.

¹² Rõmu takiri m, m naagbanõ anõ õkwukwo, kwnornu nõ Chiokike gbarõnu anõ mmehie kwnornu rewhna Karaìsi.

¹³ Ele nda, m naagbanõ anõ õkwukwo, kwnornu nõ anõ magwõ Karaìsi, nye zì hite n'õpanizo.

M naagbanõ anõ õkwukwo, rõmu ikoro, kwnornu nõ anõ megburu nye ojo wam.

Rõmu takiri m, m naagbanõ anõ õkwukwo, kwnornu nõ anõ magwõ Nda wam.

¹⁴ Ele nda, m naagbanõ anõ õkwukwo, kwnornu nõ anõ magwõ Karaìsi, nye zì hite n'õpanizo.

M naagbanõ anõ õkwukwo, rõmu ikoro, kwnornu nõ anõ gbasiri rikne, ikwu-õnu Chiokike zì nõ rime anõ, kwnornu nõ anõ megbulem nye ojo wam.

Anõ whnõ nhne õwa n'anya

15 Anu whnú ọwa n'anya, mọbu nhne zị n'ọwa. Ọ bụru nụ nye ọbula whnú ọwa n'anya, ọwhnun'anya ke Nda zịla nụ rime a.

16 Kpakara nhne zị n'ọwa bụ ẹgwnurnu nhne ojo ke badnụ, nụ ẹgwnurnu nhne ojo ke anya, nụ oknomokno ke mkpọma ke badnụ. Nhne ka híge n'aka Nda aị va, o hi n'ọwa va.

17 Ọwa nụ kpakara ẹgwnurnu nhne ojo ke zị nụ rime a jaagawhe, kọvu nye ọbula ke neeme echiche Chiokike jaazị bụdnu ọkwnukokwnu.

Nye neemegidne Karaịsi

18 Rụmu takiri m, ka bụ ige ipne-aznụ, anụ nurnu nụ nye wam neemegidne Karaịsi wawa, me kanụ anụ, agida ele neemegidne Karaịsi valẹm. Ka neegesi nụ ige wam zị ndundu.

19 Be hiri nụ hne a zị whọga, kwnornu nụ be nụ aị zịla n'otu n'ezi. Ọ bụru nụ aị nụ be zị n'otu, be znernu adazigidnenu aị. Ọwhoga be neegesi nụ aị nụ be zịla n'otu.

20 Kọvu, Nye Nsọ wam teru anụ mọno, ka neegesi nụ kpakara anụ mahjaru ezi ọka.

21 M zá m naagbanụ anụ ọkwukwo ka kwnornu nụ anụ máa ezi ọka, kọvu kwnornu nụ anụ mahjaru ezi ọka. Aghalaghala zịla n'ezi ọka.

22 Nyele bụ nye aghalaghala? Ọ bụ nye wam ke gọnahoru nụ Jizọsi bụ Karaịsi. Nye wam bụ nye neemegidne Karaịsi. Ọ gọnahoru Nda nụ Nnwọ a.

23 Nye ọbula ke gọnahoru Nnwọ máa nye Nda wam bụ, nye ọbula ke magwụ Nnwọ magwụ Nda wam masi.

24 Anụ ledu anya nụ nhne anụ nurnu hite nụ mbọm dazigidnenu nụ rime anụ. Ọ bụru kpam, anụ jaadazigidne nụ rime Nnwọ nụ rime Nda.

25 Bụdnu kwó okwo bụ nhne o kweru aị nụ mkwna.

26 M naagba ka n'ọkwukwo kwnornu ele pioru o duwhu anụ.

27 Kọvu Karaịsi teru anụ mọno Enine Nsọ. O kwésile nye ọbula zni anụ nhne, mọno o teru anụ zị nụ rime anụ neezni anụ kpakara nhne lele kpa otute mọno wam zị ire, ma anụ dazigidne nụ rime Karaịsi.

28 Kịtna, rụmu takiri m, anụ dazigidne nụ rime a, ma nga ọ jọwhuya iwhe, ovu si aị rikne o gwuzoru nụ ruwhnu a, iwheerne jọtu aị.

29 Anụ magwụ nụ Karaịsi bụ nye mee mma, nye ọbula ke neeme mma bụ nnwọ Chiokike.

3

Rụmu Chiokike

1 Le, kpa Chiokike jiri whnú aị n'anya, o sukwu aị rụmu a. Ka bụ nhne a bụ n'ezi. Kam kpayarụ, ele zị n'ọwa máa ele a bụ, lele kpa be máa nye ọ bụ.

2 Ele me whnurnu n'anya, a bụ rụmu Chiokike kịtna, nhne a jọbu whóge iwhe kịtna. Kọvu a magwụ nga ọ jaava, a jọnu lele kpa ọ nụ, kwnornu nụ a jọwhnu a kpa ọ nụ.

³ Nye ọbula ke nwernu olile anya ka neeme ẹhni a ziri snam, lele kpa o zi snam.

⁴ Nye ọbula ke neeme mmehie, noolulu iwu, kwnornu nu mmehie bu olulu iwu.

⁵ Kọvu anu magwu nu o whuyaru iwihne ma o gweme kpakara mmehie ai. Ya niwhuru a nwée mmehie.

⁶ Nye ọbula ke zi budnu nu rime Karaisi, za neemezne mmehie. Nye neeme mmehie ma nye Karaisi bu, nye wam whnulele a anya.

⁷ Rumu takiri, anu kwé nye ọbula duwhu anu. Nye ọbula ke neeme nhne buru oma bu nye mee mma, lele kpa Karaisi bu nye mee mma.

⁸ Nye ọbula ke neemezne mmehie bu nye Ekwensu, kwnornu nu Ekwensu bu nye neeme mmehie hite n'opanizo. Kam kpayaru Nnwọ Chiokike jiri whuya iwihne, ma o lulu kpakara ẹrnu ke Ekwensu.

⁹ Nye ọbula ke Chiokike muru za neemezne mmehie, kwnornu nu mkpuru Chiokike zi nu rime a, o jéenwe rikne mee mmehie, kwnornu nu Chiokike bu Nda a.

¹⁰ Ka bu nhne rumu Chiokike jiri ziri ichne nu hne rumu Ekwensu zi. Nye ọbula ke za neeme nhne buru oma buo nnwọ Chiokike, ma nye ọbula ke whnuge nwene a n'anya.

Anu whnu ibne anu n'anya

¹¹ Ka bu izi anu nuru hite n'opanizo, anu whnurita ibne anu n'anya.

¹² O za nye nu lele Keni, nye Ekwensu neechi o gbu nwene a. Kini kpayaru o jiri gbu a? Kwnornu nu ẹrnu a buo oma, kovu ẹrnu nwene a buru oma.

¹³ Rumu nda m, o gbagwoji anu anya, o buru nu ele zi n'owa snornu anu irno.

¹⁴ A magwu nu a hiri n'enwu bna nu budnu, kwnornu nu a whnurru rumu nda ai n'anya. Nye ọbula ke za n'owhnu n'anya bu nye nwurru onwu.

¹⁵ Nye ọbula ke snornu nwene a irno bu nye noogbu badnu. Anu magwu nye ọbula ke noogbu badnu nwée budnu kwó okwo nu rime a.

¹⁶ Ka bu nhne neegesi owhnun'anya, Jizosi Karaisi gweru budnu a nyee kwnornu ai. A kwesiri o nyee budnu ai kwnornu rumu nwene ai masi.

¹⁷ O buru nu nye ọbula nwernu ekwnu k'owa ka, whnu nwene a zi nu mkpa, o dola obirizi, nye wam nwée owhnun'anya Chiokike nu rime a.

¹⁸ Rumu takiri m, a whnu n'anya n'onu etekne mọbu n'ikwu-onu kpọi, kovu n'ẹrnu n'ezi oka.

¹⁹ Ka bu nhne neegesi nu a magwu ezi oka, ke neeme mkpoma ai si rikne nu ruwhnu Chiokike,

²⁰ o bubedi ovu ai naama ai ikpe, Chiokike kakwo ovu ai, o magwu kpakara nhne.

²¹ Ele me whnurru n'anya, o buru nu ovu ai mana ikpe, ovu jeesi ai rikne o gwuzo nu ruwhnu a.

22 A jaanahoru a nhne obula a nōorio a, kwnornu nu a naabita iwu a neeme masi nhne nōoso a ovu n'ōnu.

23 Ka bu nhne o nyernu n'iwu, a kweru nu rewhna Nnwō a Jizōsi Karaisi, a whnūrita ibne ai n'anya lele kpa o nyernu ai n'iwu.

24 Ele naabita iwu a zi budnu nu rime a, ya nu rime be. Enine Nso wam o nyernu ai bu nhne neegesi nu o zi nu rime ai.

4

Anu tule kpakara enine

1 Ele me whnurnu n'anya, anu kwéko kpakara enine, anu tule kpakara enine ma be hi n'aka Chiokike, kwnornu nu agida ele owhnurninya aghalaghala bnarnu nu rime owa.

2 Ka bu nhne anu jeeji mahia Enine Chiokike, enine obula ke kwuharu nu Jizōsi Karaisi varu n'anō-ehni hi nu Chiokike va.

3 Kovu enine obula ke kwéle nu Jizōsi hiri nu Chiokike va, enine ka híge nu Chiokike. Ka bu enine nye neemegidne Karaisi, nye anu nurnu o jaava, o zi n'owa kitna.

4 Rumu takiri m, anu bu rumu Chiokike, anu megbulem ele irno wam, kwnornu nu nye wam zi nu rime anu kakwo nye wam ke zi n'owa.

5 Ele ka hi n'owa, be nookwu hite nu nhne be magwu n'owa, ele zi n'owa noobnonu be nsni.

6 A hi hne Chiokike zi va, nye obula ke magwu Chiokike

nōonu nhne a nookwu. Kovu nye ke máa Chiokike zá nōonu nhne a nookwu. Ka bu nhne a jiri mahia enine ezi oka nu enine aghalaghala.

Chiokike bu owhnun'anya

7 Ele me whnurnu n'anya, a whnūrita ibne ai n'anya, kwnornu nu owhnun'anya hi nu Chiokike va. Nye obula ke nōowhnu n'anya bu nye Chiokike murnu, nye wam magwu Chiokike.

8 Nye obula ke whnú n'anya máa Chiokike, kwnornu nu Chiokike bu owhnun'anya.

9 Chiokike gesiri ai owhnun'anya n'esilawuru ai, kpa o ziyaru Nnwō o murnu kpōi n'owa, ma a nwernu budnu hite nu rime a.

10 Ka bu owhnun'anya, o budo nu a whnurnu Chiokike n'anya, kovu o whnurnu ai n'anya ziya Nnwō ma o buru nhne ariohna be jeeji gbaru mmehie ai.

11 Ele me whnurnu n'anya, lele kpa Chiokike whnurnu ai n'anya, a kwesiri o whnūrita ibne ai n'anya.

12 O zá nye obula ke whnūleru Chiokike anya, kovu o buru nu a whnūrita ibne ai n'anya, Chiokike wu nu rime ai, owhnun'anya a zuru ozu nu rime ai.

13 A magwu nu a wu nu rime Chiokike, nu Chiokike wumako nu rime ai, kwnornu nu o nyernu ai Enine a.

14 A whnurnu, gba akebne nu Nda ziyaru Nnwō a ma o buru Nye Oznohia ke owa.

¹⁵ Nye ọbula ke kweru nù Jizọsi bụ Nnwọ Chiokike, Chiokike wu nù rime nye wam, nye wam masị wu nù rime Chiokike.

¹⁶ Kam kpayarụ, a magwụ, kweru masị nù ọwhnun'anya Chiokike bụ n'ezi.

Chiokike bụ ọwhnun'anya. Nye ọbula ke nọwhnun'anya wu nù rime Chiokike, Chiokike wu masị nù rime a.

¹⁷ Chiokike mernu ọwhnun'anya a zu ozu n'esilawuru aị, ma a nwernu mkpọma siri rikne n'ọbochi ikpe, kwnornu nù a nù lele ya n'owa ka.

¹⁸ Ogwnu zịla n'ọwhnun'anya. Ọwhnun'anya ke zuru ozu n'echihala ogwnu, kwnornu nù ogwnu nù awhnụwhnu nookno aka. Nye ọbula ke nọtụ ogwnu zúge ozu n'ọwhnun'anya.

¹⁹ A nọowhnu n'anya kwnornu nù Chiokike beru ọsno whnụ aị n'anya.

²⁰ Nye ọbula ke karụ nù ọ whnụru Chiokike n'anya, kọvu sno nwene a irno bụ nye aghalaghala. Nye ọbula ke whnụge nwene a n'anya, bụ nye ọ nọowhnu anya, nwée rikne whnụ Chiokike nye ọ zà nọowhnu anya n'anya.

²¹ Ka bụ nhne o nyernu n'iwu, nye ọbula ke whnụru Chiokike n'anya, jọwhnuriri nwene a n'anya.

5

Ọkwnata ovu nù Nnwọ

Chiokike

¹ Nye ọbula ke kweru nù Jizọsi bụ Karaịsi hi nù Chiokike va. Nye ọbula ke whnụru Nda n'anya whnụru Nnwọ a n'anya masi.

² Ka bụ nhne neegesi nù a whnụru rụmu Chiokike n'anya, ọ bụ ọ whnụ Chiokike n'anya, neeme nhne o nyernu n'iwu.

³ Ka bụ nhne neegesi nù a whnụru Chiokike n'anya, ọ bụru a bita nhne o nyernu n'iwu, iwu Chiokike zịla rịnya.

⁴ Kwnornu nù nye ọbula ke bụ nnwọ Chiokike neemegbu ọwa. Ọkwnata ovu aị nù Chiokike bụ nhne neemegbu ọwa.

⁵ Ndaa nye neemegbu ọwa? Ọ bụ nye wam ke kweru nù Jizọsi bụ Nnwọ Chiokike.

⁶ Jizọsi Karaịsi bụ nye wam jiri ọvnarna nù mini va. Ọ búo mini kpọ, kọvu ọ varụ hite n'ọvnarna nù mini. Enine Nso naagba akebne a, a magwụ nù akebne a bụ ezi ọka.

⁷ Kwnornu nù nhne akebne ẹto zị,

⁸ Enine, mini nù ọvnarna.* Nhne ẹto ka kwerikọtaru otu nhne.

⁹ Ọ bụru a kweru nù nhne badnụ kwuru, nhne Chiokike kwuru kakwo, kwnornu nù ọ bụ akebne Chiokike gbarụ gbasiri Nnwọ a.

¹⁰ Nye ọbula ke kweru nù Nnwọ Chiokike nwernu nhne akebne ka nù mkpọma

* 5:8 Agwna ọkwukwo ke be gbarụ kpa agịda awaha whemernu kwu kwno, n'oligwe Nda, Ikwu-ọnu nù Enine Nso. Nhne ẹto ka nookwu otu ọnu. 8 Nhne akebne ẹto zị n'owa, Enine, mini nù ọvnarna.

a. Nye ọbula ke kwéle nù Chiokike neeme a nye aghalaghala, kwnornu nù o kwéle n'akebne Chiokike gbarù gbasiri Nnwọ a.

¹¹ Ka bụ akebne wam, Chiokike nyernu aị bụdnu kwó okwo, bụdnu wam zị nù rime Nnwọ a.

¹² Ka neegesi nù nye ọbula ke nwernu Nnwọ Chiokike nwernu bụdnu kwó okwo, nye ọbula ke nwée Nnwọ Chiokike nwée bụdnu.

Ọka ipne-aznụ

¹³ M naagbanụ anụ ele kweru nù rẹwhna Nnwọ Chiokike, ma anụ mahia nù anụ nwernu bụdnu kwó okwo.

¹⁴ Ka bụ nhne neemesi aị ovu rikne ọ vakwnusi Chiokike. A magwụ nù a rịo nhne ọbula lele kpa echiche ovu a jiri zị, ọ jọonu aị.

¹⁵ Ọ bụru nù a magwụ nù ọ nọonu nhne a nọorio a, ovu siri aị rikne nù a jeenwehia nhne nọorio a.

¹⁶ Ọ bụru nù nye ọbula whnurnu nwene a mernu mmehie ke zá noodubna n'ẹnwu, o kpe okpukpe ma Chiokike nyee a bụdnu. M nookwu nhne gbasiri ele neeme mmehie ke zá noodubna n'ẹnwu. Mmehie ke noodubna n'ẹnwu zị. M zá naakaa badnụ kpe okpukpe gbasiri a.

¹⁷ Kpakara nhne bụo ọma bụ mmehie, kọvu agwina mmehie zá noodubna n'ẹnwu.

¹⁸ A magwụ nù nye ọbula Chiokike murnu zá neemezne mmehie. Nnwọ Chiokike

naabita nye ọbula ke Chiokike murnu, nye ọjọ wam nwée rikne mekasi a nhne.

¹⁹ A magwụ nù a bụ rụmu Chiokike, kọvu kpakara ọwa zị nù mkpururu nye ọjọ wam.

²⁰ A magwụ nù Jizọsi Karaisi Nnwọ Chiokike varụ, ma a mahia nye wam bụ ezi ọka. A zị masị nù rime nye wam ke bụ ezi ọka, Jizọsi Karaisi Nnwọ a. Ya n'iwuhuru a bụ Chiokike n'ezị nù bụdnu kwó okwo.

²¹ Rụmu takiri m, anụ gweme ẹnhi anụ n'ọkwa rẹnwu.

**Okwukwo izi
ke Ebo
Jóni
gbaru
Nhne gbasiri
okwukwo izi ka**

Nga Jóni gbaru Okwukwo izi Jóni ke ebo, o gholam nye okno badnu. O gweznenu a “Ny-erinya oma nu rumu a,” ke bu ogbako Chiokike. Okwukwo izi matj ka nookwu oka gbasiri owhnun'anya n'ehni ibne be, nodo be aka nu nsni gbasiri ele neezni nhne aghalaghala.

Nhne zi n'okwukwo izi ka

Opanizo (1-3)

Ezi oka nu Owhnun'anya (4-11)

Okwukwo (12-13)

Obekwu ikwu nu okpukpe

1 Mawa, Jóni, nye okno badnu, naagbaznenu nwerinya Chiokike hohiaru nu rumu a okwukwo, ele me whnurnu n'anya n'ezi, o buo me nu nsnu m, kovu kpakara ele magwu ezi oka.

2 Kwnornu nu ezi oka ke zi nu rime ai, ke jaazigidne ai tim tom.

3 Oru nu obirizi nu udno ke hi n'aka Chiokike Nda nu Jizosi Karaisi Nnwọ Nda ai va, jaadazinu ai nu ezi oka nu owhnun'anya.

Ezi oka nu owhnun'anya

4 O neenye m ovu oso n'onu kpa me nowhnu rumu i neezne izne n'ezi oka lele kpa Nda ai nyernu ai n'iwu.

5 Kĩtna, nwerinya oma, m za m naagbanu i iwu ikne, kovu o bu koriri ke a ji hite nu mbom. M naariasno ma a whnurita ehni ai n'anya.

6 Ka bu owhnun'anya wam, a zne izne noobno nsni nu nhne Chiokike nyernu n'iwu. Lele kpa anu nurnu n'opanizo, iwu a bu ma anu zne izne n'owhnun'anya.

7 Agida ele nooduwu ele badnu, ele za neekweru nu Jizosi Karaisi varu n'anogehni, bnarnu nu rime owa. Nye nu kpam bu nye nooduwu nu nye neemegidne Karaisi.

8 Anu ledu anya, o zi anu tuwhu nhne anu dogburu ehni anu n'ernu, kovu ma anu nwehia ogwo ernu zuru ozu.

9 Nye obula ke neezne nu ruwhnu gharu nhne Karaisi znirni ma Chiokike. Kovu nye obula ke zi neeme iznizni a magwu Nda nu Nnwọ a.

10 Nye obula ke vakwnusiri anu ke gweyala iznizni ka, anu kwubnana oro anu, mọbu kanu a, “I vale.”

11 Nye obula ke kannu a, “I vale” jeekehia igwe n'ernu ojo a.

12 M nwernu m agida nhne me jaagbanu anu, kovu m jeeme kpam n'okwukwo nu nki. Tnunuma, m neele anya nu m jaava me nu anu kwu oka ruwhnu nu ruwhnu, kpam, ovu oso n'onu ai joozu ozu.

13 Rumu nwene i rinya kam Chiokike hohiaru neebkwu i.

**Okwukwo izi
ke Eto
Jóni
gbarụ
Nhne gbasiri
okwukwo izi ka**

Nga Jóni gbarụ *Okwukwo izi Jóni ke eto*, ọ ghọlam nye okno badụ. O gwenzenu nye risi ọgbako Chiokike, nye rẹwhna a bụ Gayọsi. Okwukwo izi ka, naaznarni Gayọsi kwnornu ẹrnu ọma a hne rụmu Chiokike berere zi, nọodo masi a aka nụ nsni gbasiri otu nyerukna be kwu Diotirifesi.

Nhne zi n'okwukwo izi ka

Opanizo (1-4)

Gayọsi kwesiri okwnata ovu (5-8)

Diotirifesi mékwala nkari (9-10)

Demetirisi mekwaru nkari (11-12)

Okwukwo (13-15)

1 Mawa, nye okno badụ, naagbaznenu Gayọsi enyi m me whnurnu n'anya nụ ezi ọka.

2 Enyi m me whnurnu n'anya, okpukpe m bụ ma ẹhni i si rikne, ma kpakara nhne i neeme gakwanu i nkari lele kpa mkpuru ovu i naagakwa nkari.

3 O nyernu m mkpoma oso n'onu k'agida nga agwna rụmu nda varu kanu m nhne gbasiri okwnata ovu i n'ezi ọka nụ kpa i neezne izne n'ezi ọka wam.

4 O zá nhne nọoso m ovu n'onu kakwo nga me nurnu nụ rụmu m neezne izne n'ezi ọka.

Gayọsi kwesiri

okwnata ovu

5 Ezi enyi m me whnurnu n'anya, i kwesiri okwnata ovu nụ kpakara nhne i neemenu rụmu nda, ọ bụ n'ezi nụ be bụ ele izne n'ehni i.

6 Be kannu ọgbako Chiokike ọwhnun'anya i, ọ jọoburu ọma ma i zihala be kpa o kwesiri n'anya Chiokike.

7 Be kwnornu rẹwhna Karaisi whoga zni izi ọma, be kwéle ọ nahoru oyi aka hite n'aka ele kwé ekwe.

8 A kwesiri ọ nabnanya ele ka nkari ma ai nụ be snornu nrụkota ẹrnu ezi ọka n'otu.

Diotirifesi mékwala nkari

9 M gbaznenu m ọgbako Chiokike okwukwo, kovu Diotirifesi nye noopio ọ buru nye risi kwéle obno nsni nụ nhne me nookwu.

10 Nga me varu, m jeeme ele badụ mahia nhne o neeme, kpakara nhne o nookwu gbasiri ai nụ kpakara aghalaghala a. Tụkwasi n'olu nhne ka, o kwéle ọ nabnanya rụmu nda ai. Ele pioru o kwubnanya rụmu nda ai, o kwéle be, kovu ọ chihala be n'ọgbako Chiokike.

Demetirisi mekwaru nkari

11 Enyi m me whnurnu n'anya, i snó nhne bụo ọma, kovu snornu nhne buru ọma. Nye ọbula ke neeme nhne buru ọma hi hne Chiokike

zị va. Nye neeme nhne ojo
whnúge Chiokike anya rịa rịa.

¹² Kpakara ele badnu
nookwu Demetirisi oka oma
hite n'ezi oka. Aila masi
nookwu a oka oma, anu
magwu nu akebne aị bu ezi.

Obekwu ikwu ipne-aznu

¹³ M nwernu m agida
nhne me kwesiri o gbanu
i n'okwukwo, kovu m jejeji
mkpisi okwukwo nu nki
naagba a.

¹⁴ M neele anya nu m jaava
whnu i anya ige matị, me nu ji
kwu oka ruwhnu nu ruwhnu.

¹⁵ M neekpe ma Chiokike
nyee i udno. Kpakara ele
enyi i neebekwu i. Bekwu
kpakara ele enyi aị n'otu
n'otu.

**Okwukwo izi
Judu
gbaru
Nhne gbasiri
okwukwo izi ka**

Judu gbaru *Okwukwo izi Judu*, nọodo ele badnu aka nu nsni gbasiri ele neezni nhne aghalaghala, ele karu nu be bu ele kweru ekwe. Lele 2 *Pita*, Judu, n'okwukwo matika, naakwnagidne nye nọogwnu a, o naakaa be gba otna kwnornu okwnata mkpoma ke Chiokike nyernu ele ke a otu mgbabe bita.

Nhne zi n'okwukwo izi ka

Opanizo (1-2)

Ele neezni nhne aghalaghala (3-16)

Ezni o bita okwnata mkpoma (17-23)

Ojija zinu Chiokike (24-25)

1 Mawa, Judu, nye izi ke Jizosi Karaishi, nye bu kwno nwene rukna Jemisi, naagbaznenu kpakara ele Chiokike sukwuru okwukwo, ele wu nu rime owhnun'anya Chiokike Nda, ele Jizosi bitaru.

2 Obirizi nu udno nu owhnun'anya banu anu oba.

Ele neezni nhne aghalaghala

3 Ele me whnurnu n'anya, m neeyisi rikne naagbanu anu okwukwo gbasiri oznohia ke a nwernu igwe nu rime a, o zi mkpa me gbanu anu ma anu yisi ehni naagba otna kwnornu nu okwnata ovu ke

Chiokike nyernu ele ke a otu mgbabe bita.

4 Kwnornu nu agwna ele za notu ogwnu Chiokike ribnanyarnu hne a ma n'esilawuru ai, ele naagbanwo izi oma ke oru Chiokike, ma be nwe oghere rnu ernu ojo be, be gonahoru Jizosi Karaishi Nyenwe ai nu eze ai. Okwukwo nsokwuru nhne gbasiri be agida ige wheru ewhe nu be jaanahia omuma ikpe.

5 M neechenwanyanu anu nhne ka, o bu n'ezi nu anu magwu kpakara nhne ka, nu Nyenwe ai dhiaru ele Izireli n'eli Ijipiti, kovu omekwo, gbu kpakara ele kwe ekwe.

6 Anu chenwanya ele enine izi ele bitala onodi be nu mbom, kovu gharu onodi be, Chiokike turu be ijigba tim tom nu ochichiri, bita be du n'okne obochi ikpe wam o jaama be ikpe.

7 Lele kpa Sodom nu Gomora nu kpakara eli gbaru be gburugburu, ele wu nu rime be ruru aruru-eli ke ome oyi nu nhne zila richna, be taru be awnhunwhnu bekwu noonwu tim tom, ma be buru nhne odo aka nu nsni nyee kpakara ele badnu.

8 Kpam masi, ele noro mboro ojo ka mehieru megidne ano-ehni be, be ledna ochi risi Chiokike anya, ele kajaruru ele wu n'oligwe.

9 O bubedi nye risi ele enine izi Maikeli, nga ya nu Ekwensu nọdogbuta iznu Mozizi, nwee rikne kwu oka

ojo megidne Ekwensu, kovu o karu, "Nyenwe aị bigbo i."

¹⁰ Kovu ele ka naakaja nhne be máa, be nụ lele rumu anohia ojo, neeme nhne n'ogwunu be, kpakara nhne ka joodoka be.

¹¹ Awhnuwhnu jaazinu be. Be snornu apna Keni. Be kwnornu iwai dnabna nụ mmehie Balam, be bu ele risi rikne lele Kora, be joowhu etekne lele kpa Kora whuru.

¹² Ele ka nụ lele rune nụ iriri omekorita anụ, iwhnerne zá n'otu be o mee nhne ojo. Be n'oznu ehi be kpoi. Be nụ lele erumeru oligwe ruwhere neewhesa, be nwée rikne gweya mini ozuzo. Be nụ lele isisi mla mkpuru, o bubedi n'okochi, isisi be vnurnu hite nụ egwnugwunu a, ke nwurnu onwu n'ezi.

¹³ Be nụ lele okne abakamini ke osimini, be nụ ernu iwhnerne be n'ogbo okoto. Be nụ lele mboghieru apna, ele Chiokike bitannu oghere n'okne ochichiri okwnukokwunu.

¹⁴ O bu Inoku, nye esau hite n'Adam, nye kwuru n'agida ige wheru ewhe, "Le, Nyenwe aị jaava, ya nụ agida ele nsọ a be j'ogwnuli onu,

¹⁵ o jeekpe kpakara ele badnu ikpe, o jaama kpakara ele máa Chiokike ikpe, kwnornu kpakara aruru-eli be ruru, nụ kpakara oka ele mmehie ka máa Chiokike kwuru kwugidne a."

¹⁶ Ka bu ele zi naatakpo ntakpo, noobno ele berere nhne, be noosno nhne ojo ke n'ogwunu mkpoma be,

be noovugnadna ehi be, naaznarni ele badnu ma be nwehia nhne be pioru.

Odo aka nụ nsni nụ ezni

¹⁷ Ele me whurnu n'anya, anụ chenwanya nhne ele izi Nyenwe aị Jizosi Karaịsi kwuru.

¹⁸ Be kannu anụ, "N'ige ipne-aznu, ele jomu anụ rumu jaava, ele noosno nhne ojo ke n'ogwunu mkpoma máa Chiokike be."

¹⁹ Ka bu ele neegweya okewa, ele ano-ehi neechi, ele nwée Enine Chiokike.

²⁰ Kovu anụ, ele me whurnu n'anya, anụ wulizo ehi anụ lele oro hite nụ ntuli okwnata ovu anụ ke zi nsọ. Anụ kpe okpukpe nụ rikne Enine Nso.

²¹ Anụ bita ehi anụ n'owhunn'anya ke Chiokike, kpa anụ noosno, neele anya obirizi ke Nyenwe aị Jizosi Karaịsi jeenye anụ nụ budnu kwó okwo.

²² Anụ donu ele nwernu mkpoma lawuru obirizi.

²³ Anụ znohia ele berere, d'ohia be lele ele hi nụ rime bekwnu. Anụ gweru ogwunu donu ele berere obirizi. Kovu anụ sno o bubedi iwo ke mmehie be gburu hite n'ernu ano-ehi irno.

Ojja zinu Chiokike

²⁴ Chiokike bu nye ke nwernu rikne o bita anụ ma anụ gharu o dna, mee ma anụ gwuzoru nwée oru, nụ mkpoma oso n'onu nụ ruwhnu a zi igwugwu.

²⁵ Ya bu Chiokike kpoi, Nye Oznohia aị, hite nụ Jizosi

Karaịsi Nyenwe aị, kpakara
igwugwu, nụ dudugna, nụ
rikne nụ ọchi risi zịnu a,
hite nụ mbọm dụ kịtna,
ọkwonukokwnu. Amịm.

**Okpume
Chiokike
kpumennu
Jōni
Nhne gbasiri
okwukwo ka**

Okwukwo ka neegesi nhne Jōni whnurnu gbasiri izi Chiokike nū nhne Jizōsi Karaīsi mernu (1:2). Izi ka warū ngalaba ẹto. (1) Rikne ojo n̄ornu ẹrnu n'owa, nye Karaīsi jaata awhnūwhnu, nwū masi. (2) Jizōsi bụ Nyenwe aị, o jeemegbu kpakara ele badnū nū kpakara rikne ke neemegidne Chiokike. (3) Chiokike nwernu ogwo ẹrnu ke ọ bitannu kpakara ele ke a, ele kwesiri be kwnata be mkpoma, ele dazigidnenu n'okwnata ovu be, ke kakwo ele nwurnu n'ẹrnu Nyenwe aị.

Ka bụ izi ke nwernu olile anya nyee ele Karaīsi, ele tarū awhnūwhnu, nwū kwnornu okwnata mkpoma be nū Karaīsi. Okwukwo izi ka nookwu nū ọ bụ n'ezi nū ọchichi aka rikne ele Rom zị naakpa rikne, kovu Nnwọ Atnurnu Chiokike nwe omegbu n'ipne-aznū. Ka mernu be buru ele kwesiri okwnata ovu dū n'ẹrnu.

Nhne zị n'okwukwo ka

Okwukwo Jōni (1:1-8)

Nyenwe aị zị budnu (1:9-20)

Okwukwo izi okgbako

Chiokike ẹsau (2:1--3:22)

Okpukpe n'oligwe (4:1-11)

Okwukwo ke nwernu akara ẹsau (5:1--6:17)

Okpukpe nū ruwhnu ngadna eze Chiokike (7:1-17)

Okwodu ẹsau (8:1--11:19)

Agwọ nū anohia lawuru wam (12:1--13:18)

Ikpe Chiokike nū ochekwa a (14:1--15:8)

Okiko ovu owe ẹhni Chiokike (16:1-21)

Be megburu ele irno Chiokike (17:1--20:10)

Ikpe ipne-aznū (20:11-15)

Oligwe ikne nū ọwa ikne (21:1-8)

Jeruselem ikne (21:9--22:6)

Karaīsi jaava wara wara (22:7-21)

1 Okpume Jizōsi Karaīsi, ke Chiokike nyernu a, ma o gesi ele izi a nhne jeeme n'ige matị ke vazne, o zizne enine izi a o gesi nye izi a Jōni.

2 Jōni gbarū akebbe ikwu-ọnu Chiokike nū akebbe Jizōsi Karaīsi, o kwuru kpakara nhne ọ whnurnu.

3 Nye ọwa ọma bụ nye n̄ogwnu kpakara ikwu-ọnu ke okwukwo ọwhnurninya ka, nū ele nurnu be, bita masi be, kwnornu nū ige zị ndundu.

Obekwu ikwu

4 Mawa, Jōni naagbaznenu okgbako Chiokike ẹsau ke zị n'Esia okwukwo.

Oru nū udno ke Chiokike nye zị, nye zị nū mbom, nū nye ke jaava dazinu anū, hite n'aka enine ẹsau ke zị nū ruwhnu ngadna eze a,

5 ma n'aka Jizōsi Karaīsi, nye akebbe kwesiri be kwnata a mkpoma, nye mbom ke

hi n'ẹnwu lizọ, nye ke nẹchi
ele eze k'ọwa.

Nye whnuru ai n'anya,
gweru ọvna a snusnama
kpakara mmehie ai,

⁶ o mee ai a buru mbam
ele ọkwa arịohna Chiokike a,
nụ Nda a, igwugwu nụ rikne
zịnu a hite kịta dụ n'ige kwó
okwo. Amim.

⁷ Le, ọ vawa nụ rime erumeru
oligwe,

kpakara anya jọowhnu a,
ma ele duru a ara,
kpakara ele zị n'ọwa jaag-
banu a mkpe.

Owe! Amim.

⁸ “Mawa bu Alifa nụ
Omega,” bu nhne Nyenwe ai
kwuru. “Mawa bu Ọpanizo
nụ Okwukwo, nye zị, nye zị
nụ mbom, nụ nye jaava, Nye
Meli Nhne Dum.”

Nye nụ lele Nnwọ ke Badnu

⁹ Mawa bu Joni, nye bu
nnwọ nda anụ, nye sno
anụ nụ rime awhnwhnu, a
bu ele ẹli-eze a, a naagidne
awhnwhnu. Be kwuznenu
m nụ rime ẹli ọhia esi-
lawuru osimini ke Patimosi,
kwnornu nụ m kpọru m okwo
ikwu-ọnu Chiokike nụ nhne
Jizosi gbarụ ama a.

¹⁰ M zị m nụ rime Enine
n'ọbochi Nyenwe ai, m nuru
m okne nkoli n'aznu m ke
dnaru lele ọkwodu.

¹¹ Nkoli ka kaa, “Gbaị
nhne i whnuru n'okwukwo,
ziznenu a ọgbako Chiokike
esau ka, ziznenu Efesosi, nụ
Sịmaina, ziznenu Pegamosi,
nụ Taịtira, ziznenu Sadisi,

nụ Filadefia, zizne masinu
Laodisia.”

¹² M tuhna ma m
whnuru m nye nookwunu
m ọka. M whnuru m nhne
be tukwasi tonji esau be wuru
golu.

¹³ N'esilawuru nhne be
tukwasi tonji esau wam gwuzo
otu nye nụ lele Nnwọ ke
Badnu. O wogwu iwo awura
duru a ẹli ọchi, o ji ajni sụ nụ
mkpoma a.

¹⁴ Risi a nụ rukeri-ize a
noonwu va-a-a lele wulu,
naachna va-a-a lele mkpuru-
mini, anya a nụ lele riro
bekwnu.

¹⁵ Ochi a lawuru nụ lele ọla
be gbarụ bekwnu nụ rime ite
bekwnu, nkoli a naadna lele
agida mini.

¹⁶ O ji mbo esau n'akarikwnunga
a, ama-ogwnu nwernu
ruwhnu lawuru tuga buko
nehi n'onu a nọowhuya,
ruwhnu a noonwu lele ennam
n'esilawuru iwhnehnie.

¹⁷ Nga me whnuru a,
m dna n'eli n'ochi a lele
nye nwuru ọnu. Kọvu ọ
tukwasiri m akarikwnunga a,
kaa, “Ogwnu tuko i, mawa bu
Nye Mbom nụ Nye Ipne-aznu.

¹⁸ M zị m budnu. M nwuru
m enwu, kọvu le, m zị m budnu
tim tom. M ji m snambi enwu
nụ ẹli renwu.

¹⁹ “Gbaị nhne i whnuru
n'okwu-kwo, nhne zị kịta, nụ
nhne jeeme nụ ruwhnu.

²⁰ Ka bu nhne miri emi ke
mbo esau wam i whnuru
n'akarikwnunga m, nụ nhne
be tukwasi tonji esau wam be
wuru golu. Mbo esau wam
bu enine izi ọgbako Chiokike

ɛsau, nhne be tɔkwasi tɔnji ɛsau wam i whnurnu bu ɔgbako ɛsau.”

2

Izi ele Efesosi

¹ Gbaznenu enine izi ke ɔgbako Chiokike ke zi n'Efesosi ɔkwukwo: Hite n'ɔnu nye wam ji mbɔ ɛsau wam n'akarikwnunga a, nye neezne izne n'esilawuru nhne be tɔkwasi tɔnji ɛsau wam.

² M magwu m nhne anu neeme. Anu nɔdogbu ɛhni anu n'ɛnu nu ɔsnuta mkpoma anu. Anu kwɛle o kwubnanya ele aruru-eli, anu kparu ele kwuru ɛhni be ele izi iru, kovu be buo, anu whnu nu be bu ele aghalaghala.

³ Anu jiri ɔsuta mkpoma nagidne awhnwhnu anu taru kwnornu rɛwhna m, anu kwɛle rikne gwu anu.

⁴ Kovu m nwernu m otu nhne megidne anu, anu zima n'ɔwhnun'anya lele kpa anu neeme nu mbom.

⁵ Anu chenwanya hne anu dnarnu. Anu hi nu mmehie anu tuhna, rnu ɛnu mbom anu nrurnu. O buru nu anu jɔtuhna hite nu mmehie anu, m jaavakwnusi anu wara wara, gweme nhne be tɔkwasi tɔnji anu nu hne o zi, okwolem ma anu tuhna.

⁶ Kovu anu nwernu otu nhne buru oma, anu sno ɛnu ele Nikolata irno lele kpa me snornu a irno.

⁷ Nye nwernu nsni, o nrurnu nhne Enine Nso naakanu

kpakara ɔgbako Chiokike. Nye megburu, m jeenye a rikne o ri mkpuru isisi ke budnu ke zi n'obna Chiokike.

Izi ele Simaina

⁸ Gbaznenu enine izi ke ɔgbako Chiokike ke zi nu Simaina ɔkwukwo: Hite n'ɔnu nye wam bu Nye Mbom nu Nye Ipne-aznu, nye nrurnu, ziri kwno budnu.

⁹ M magwu m awhnwhnu anu naata. M magwu m nu anu bu ele mboni, kovu anu bu ele nwernu ɛkwnu k'agida. M magwu m oka ojo ele ka nu be bu ele Ju nookwugidne anu, kovu be buo, be bu ele oro ɔgbako Setani.

¹⁰ Ogwnu tuko anu kwnornu awhnwhnu anu jaata. Le Setani jeeyisi agwna anu n'ikelu ma be kpa anu iru. Anu jeenwe ɔkpagbu nri ɔbochi. Anu buru ele kwesiri ɔkwnata mkpoma du n'ɛnu, m jeenye anu okpu-eze ke bu budnu.

¹¹ Nye nwernu nsni, o nrurnu nhne Enine Nso naakanu kpakara ɔgbako Chiokike. Nye megburu, ɛnu ke ɛbo jɔogbu a.

Izi ele Pegamosi

¹² Gbaznenu enine izi ke ɔgbako Chiokike ke zi nu Pegamosi ɔkwukwo:

Hite n'ɔnu nye wam nwernu ama-ogwnu ke nwernu ruwhnu lawuru zi buko.

¹³ M magwu m hne anu wu bu hne ngadna Setani zi. Anu jidnesiri rɛwhna m rikne, anu tuwhule ɔkwnata mkpoma anu nu hne me zi, o bubedi nga be

gburu Antipasi nye akebne m nye kwesiri okwnata mkpoma n'esilawuru anu hne Setani wu.

¹⁴ Kovu m nwernu m nhne ele nu ele megidne anu. Agwna ele noosno iznizni Balam nye znirni Balaki kpa o jeeme rumu Izireli mmehie hite n'ori nhne be jiri kwanu renwu ariohna nu hite n'ome oyi.

¹⁵ Agwna ele noosno iznizni ele Nikolata zi masi n'esilawuru anu.

¹⁶ Anu hi nu mmehie tuhnsa, o buo kpm, m jaavakwnusi anu wara wara, gweru ama-ogwnu hi n'onu m whya lusi ele ka ogwnu.

¹⁷ Nye nwernu nsni, o nuru nhne Enine Nso naakanu kpakara ogbako Chiokike. Nye megburu, m jeenye a agwna mana ke tugwaru otugwa. M jeenye masi a otu akaworugwu abochna ke be gbakwasiri rewhna ikne n'olu a, o za nye berere marnu a, okwolem nye wam nahiaru a.

Izi ele Taıtira

¹⁸ Gbaznenu enine izi ke ogbako Chiokike ke zi nu Taıtira okwukwo: Ka bu nhne Nnwọ Chiokike kwuru, nye wam anya a lawuru nu lele bekwnu, nye ochi a lawuru noonwu lele ola chnarnu achna.

¹⁹ M magwu m nhne anu neeme. M magwu m owhnun'anya anu, nu okwnata mkpoma anu, nu izi anu, nu osnuta mkpoma anu. M

magwu m masi nu ernu anu kitna kakwo ke mbom.

²⁰ Kovu m nwernu otu nhne megidne anu. Anu gharuru nwerinya wam bu Jezibeli n'esilawuru anu. Nwerinya ka kwuru ehni a nye owhnurninya Chiokike, neezni ele izi m kpa be mee oyi, nu o ri nhne be jiri kwa renwu, nooduhie ele badnu.

²¹ M nyernu m a ige ma o tuhnsa nu mmehie ome oyi, o kwéle.

²² Le, m jootubna n'okpata ya nu ele oyi a, be jaata awhnuwhnu k'agida, okwolem ma be tuhnsarnu hite nu nhne ojo be muiaru n'aka a.

²³ M joogbu rumu a, ma kpakara ogbako Chiokike mahia nu mawa bu nye wam noonyosna mkpoma nu echiche ke rumu badnu. M jookwuhnasi nye obula lele kpa ernu a jiri ziri.

²⁴ Kovu agwna anu gw-narnu nu Taıtira, ele snoge iznizni ojo ka, ele ma nhne be nookwu nhne tugwaru otugwa ke Setani, m jeenye anu ivu runa berere.

²⁵ Kovu anu jidnesi rikne nhne anu ji tem m va.

²⁶ Nye megburu, bita ikwu-onu m du okwukwo, m jeenye a rikne hne kpakara mba zi.

²⁷ O jeeji mkpara rugwe neechi be,

o jeeliwa be lele kpa be liwa itechi,

²⁸ lele kpa me nahiaru ikn-ernema n'aka Nda m. M jeenye a mbọ osisi.

29 Nye nwernu nsni, o nurnu nhne Enine Nso naakanu kpakara ogbako Chiokike.

3

Izi ele Sadisi

¹ Gbaznenu enine izi ke ogbako Chiokike ke zi Sadisi okwukwo: Ka bu nhne nye wam ji enine esau Chiokike n'aka a, nu mbo esau. M magwu m nhne anu neeme. M magwu m nu anu nwernu rewhna nu anu zi budnu, kovu anu nwurnu onwu.

² Anu tnenya, jikwasi nhne ke gwnarnu mati o nwu rikne, kwnornu nu m whnuge m ernu anu ke zuru ozu nu ruwhnu Chiokike m.

³ Anu chenwanya nhne anu naharu, ke anu nurnu, anu mee be. Anu hi nu mmehie anu tuhna. O buru nu anu jee tenya, m jaavakwnusi anu lele nye buznu, anu jaamahia ige me jaava.

⁴ Kovu anu nwernu badnu ele nu ele nu Sadisi ele merula awura be. Be joowo awura abochna snornu m zne izne kwnornu nu be kwesiri.

⁵ Nye megburu kpa, be joowote a awura abochna, m jookwnome rewhna a n'okwukwo ke budnu. M jookwuhia rewhna a nu ruwhnu Nda m ya nu ruwhnu ele enine izi a.

⁶ Nye nwernu nsni, o nurnu nhne Enine Nso naakanu kpakara ogbako Chiokike.

Izi ele Filadefia

⁷ Gbaznenu enine izi ke ogbako Chiokike ke zi nu

Filadefia okwukwo: Ka bu nhne nye wam zi nso nu nye ezi oka kwuru, nye jigwu snambi Devidi, nye o buru nu o gbama onuhna, o za nye nwernu rikne o gbasni a, nye gbasni onuhna, o za nye nwernu rikne o gbama a.

⁸ M magwu m nhne anu neeme. Le, m gbamannu m anu onuhna ke o za nye nwernu rikne gbasni, kwnornu nu anu nwernu iknernema mati, kovu anu bitaru ikwu-onu m, anu gonahorula rewhna m.

⁹ Anu jowhnu nhne me jeeme ele oro ogbako Setani, ele ka nu be bu ele Ju, kovu be buo, be bu ele aghalaghala, m jeeme be va dna n'eli n'ochi anu, be jaamahia nu m whnurnu m anu n'anya.

¹⁰ Kwnornu nu anu bitaru ikwu-onu m, snuta ovu, m jaabita masi anu n'ige ornurna ke jaadnakwasi kpakara owa, o rna ele wu n'owa ornurna.

¹¹ Le, m wawa wara wara, anu jidnesi nhne anu ji rikne, o zi nye berere nahoru anu okpu-eze anu.

¹² Nye megburu, m jeeme a nsnsnu Oro Nso Chiokike m. O jeehi nu rime a whoga berere. M jaagbakwasi rewhna Chiokike m n'olu a, ya nu rewhna ohna ikne Chiokike m, ke bu Jeruselem ikne, ke hi n'oligwe n'aka Chiokike m hiedna. M jaagbakwasi a rewhna ikne m n'olu a.

¹³ Nye nwernu nsni, o nurnu nhne Enine Nso naakanu kpakara ogbako Chiokike.

Izi ele Laodisia

14 Gbaznenu enine izi ke ọgbako Chiokike ke zi nu Laodisia okwukwo: Ka bu nhne Amim kwuru, nye akebe kwesiri be kwnata a mkpoma nu nye ezi oka, nye nęechi kpakara nhne Chiokike keru.

15 M magwu m nhne anu neeme. Anu kpele bekwnu, anu jila iyi. O jọoburu oma nu anu kperu bekwnu mọbu nu anu jiri iyi.

16 Kọvu kwnornu nu anu zi marna marna, anu kpele bekwnu, anu jila iyi, m jọogbohala anu n'onu m.

17 Anu kwuru, "M baru m eze, m nwernu m ekwnu, o za nhne naara m," kọvu nu anu ma nu anu bu ele nọowhnuji anya, nu ele be kwesiri o donu obirizi, ele mboni, ele isni nu ele gba eto.

18 Me zni anu ezni, anu zunahoru m golu be snurnu, ma anu nwernu ekwnu, nu awura abochna, ma anu kpusni eto anu gbagwu, tna egwnumisi n'anya anu ma anu whurnu osno.

19 M neebigbo kpakara ele me whurnu n'anya, naapnja masi be nhne. Anu gbalị tuhnasna, hi nu mmehie whuya.

20 Le, m gwuzogwu m n'onuhna, nooznu aka. Nye obula ke nurnu nkoli m, gbama onuhna, m jaabnazne n'oro a, snornu a ri wiri, ya snornu m masi ri wiri.

21 Nye megburu, m jeenye a rikne o snornu m daziri eli nu ngadna eze m, lele kpa me

megburu, m snornu Nda m daziri eli nu ngadna eze a.

22 Nye nwernu nsni, o nurnu nhne Enine Nso naakanu kpakara ọgbako Chiokike.

4*Ngadna eze ke zi n'oligwe*

1 Nga nhne ka mekworu, m whurnu m, le, otu onuhna gbamarnu n'oligwe. Nkoli wam me nurnu nu mbom ke dnarnu lele okwodu karu, "Vaa hna, m jeegesi i nhne jeemeriri nu ruwhnu."

2 Ngangam, m zi m n'Enine, m whurnu m nu rime oligwe otu ngadna eze nu nye dazi n'olu a.

3 Nye wam dazi nu ngadna eze wam, ruwhnu a noogbu marna marna lele akaworugwu jasipa nu sadisi, eke nu egwurugwu hnirni ngadna eze wam gburugburu ke naachna lele emiradi.

4 Nri ngadna eze lawuru nu eno berere gbaru ngadna eze wam gburugburu, ele okno badnu nri lawuru nu eno dazi n'olu ngadna eze berere wam woru awura abochna, kpuru okpu-eze golu nu risi be.

5 Amuma nu egbe oligwe nu odidna hi nu ngadna eze wam naadna. Tonji esau zi nu ruwhnu ngadna eze wam noonwu bekwnu, ke bu enine esau wam Chiokike.

6 Osimini nu lele nyno nọowhnu osno zi nu ruwhnu ngadna eze wam.

N'esilawuru ngadna eze wam ya nu gburugburu a bu

nhne ẹno zị bụdnu bụ anya
anya ruwhnu nụ aznụ zị.

⁷ Nhne ke mbom nụ lele
odum, ke ẹbo nụ lele nnwọ
ehni, ke ẹto nwernu ruwhnu
lele ruwhnu badnụ, ke ẹno nụ
lele igno neewhe ewhe.

⁸ Nhne zị bụdnu ẹno wam,
ke ọbula nwernu aka-nkwu
isunu, kpakara ẹhni be bụ
anya anya. Be kpúsnì ọnu
be iwhnehnìe nụ abalì, be
nọogwnu eri naakaa,
“Nsọ, nsọ, nsọ

bụ Nyenwe aì Chiokike
ke Meli Nhne Dum,
Nye zì nụ mbom, nye zì kịtna,
nye jaava.”

⁹ Kpa nhne wam zì bụdnu
zì neenye a igwugwu nụ
ọson'anya, nọotunu nye wam
dazìgwu nụ ngadna eze wam
mmamma, nye zì bụdnu
ọkwukokwnu,

¹⁰ ele okno badnụ nri
lawuru nụ ẹno wam dna n'ẹlì
nụ ruwhnu nye wam dazìgwu
nụ ngadna eze, kpọ risi ẹlì nụ
ruwhnu nye wam zì bụdnu
ọkwukokwnu. Be túbìta okpu-
eze be nụ ruwhnu ngadna
eze wam, kaa,

¹¹ “Ì bụ nye kwesiri, Nyenwe
aì Chiokike,
ọ nahọru igwugwu nụ
ọson'anya, nụ ikn-
ernemà,
kwnornu nụ ọ bụ jìwa keru
kpakara nhne hite nụ
echiche ì,
jì nyernu be bụdnu.”

5

*Okwukwo nụ Nnwọ Atnurnu
wam*

¹ M whnurnu m otu
okwukwo n'akarikwnunga
nye wam dazì nụ ngadna
eze wam, be gbarụ a nhne
ruwhnu nụ aznụ, be kasìri a
akara ẹsau.

² M whnurnu m otu enine
izi nwernu rikne jì okno
nkọlì neesi okokoba, naakaa,
“Ndaa nye kwesiri ọ gbajì
akara ẹsau wam nụ o kpume
okwukwo wam?”

³ Kọvu ọ zá nye be whnurnu
n'oligwe nụ ọwa mọbu nụ
mkpururu ọwa, bụ nye
kwesiri o kpume okwukwo
wam mọbu lebna anya nụ
rime a.

⁴ M kwna ẹkwna k'agìda
kwnornu nụ ọ zá nye be
whnurnu kwesiri o kpume
okwukwo wam mọbu lebna
anya nụ rime a.

⁵ Otu nụ rime ele okno
badnụ wam kanụ m, “Ì
kwnáma ẹkwna, le, Odum
ke ẹbnurnu Juda,* Mg-
baregwnugwnu Devidi,† o
megbulem, o nwernu rikne
o kpume okwukwo wam, nụ ọ
tọma akara ẹsau wam.”

⁶ Ige wam m whnurnu m
otu Nnwọ Atnurnu gwuzo
n'esilawuru ngadna eze wam,
ma nụ esilawuru nhne ẹno
wam zì bụdnu ya nụ ele okno
badnụ wam, lele nụ be gburu
a ogbu. O nwernu mfu ẹsau,
nụ anya ẹsau ke bụ enine ẹsau
wam Chiokike, ke o zihalaru
nụ rime kpakara ọwa.

⁷ Nnwọ Atnurnu wam zne
nahọru nye wam dazì nụ
ngadna eze wam okwukwo

* 5:5 Odum ke ẹbnurnu Juda Jenesisi 49:9
11:1, 10

† 5:5 Mgbaregwnugwnu Devidi Azaya

n'akarikwnunga a.

⁸ Nga ọ nahọruru a ọkwukwo wam, nhne ẹno wam zi bụdnu nụ ele okno badnụ nri lawuru nụ ẹno wam dna n'ẹli nụ ruwhnu Nnwọ Atnuru wam, kpakara be ji ọbo be n'aka, ya nụ obele golu ke isensi jihiaru, ke bụ okpukpe ele nsọ.

⁹ Be gwnụ eri ikne, "I kwesiri ọ nahọru ọkwukwo wam,

nụ ọ tọma akara a, kwnornu nụ be gburu i, i gweru ọvnarna i gbahia ele ke Chiokike hite nụ kpakara ẹbnurnu, nụ ikwu-ọnu, hite nụ mba nụ ele badnụ.

¹⁰ I mernu be bụru mbam ele ọkwa ariohna, ke jeekpenu Chiokike, be jọobu ele eze nẹchi ọwa."

¹¹ M le anya, m nurnu m nkọli agida enine izi gbaru ngadna eze wam gburugburu, nụ nhne ẹno wam zi bụdnu nụ ele okno badnụ, pokwu nụ pokwu nụ pokwu ndasi, nụ pokwu ndasi nụ ndasi.

¹² Be nọogwnu eri nụ okno nkọli, naakaa,

"Nnwọ Atnuru wam be gburu kwesiri

ọ nahọru rikne, nụ ẹkwnu nụ akoniche, nụ ikn-ernema

nụ ọson'anya nụ igwugwu, nụ ọznarni."

¹³ M nurnu m hne kpakara nhne zi bụdnu zi n'oligwe, n'owa, nụ mkpururu ọwa, kpakara nhne zi bụdnu ke zi n'okno osimini nụ kpakara nhne zi nụ rime be, naakaa,

"Ọznarni nụ ọson'anya nụ igwugwu nụ rikne zinu nye wam dazi nụ ngadna eze, ya nụ Nnwọ Atnuru wam tim tọm."

¹⁴ Nhne ẹno wam zi bụdnu, kaa, "Amim." Ele okno badnụ wam dna n'ẹli, kponu Chiokike nụ Nnwọ Atnuru risi ẹli.

6

Akara esau wam

¹ M whnuru m nga Nnwọ Atnuru wam tọmarnu akara ke mbom. Otu nhne zi bụdnu ẹno wam ji nkọli dnarnu lele egbe oligwe kaa, "Vaa."

² M le anya, le otu iyinya richna, nye gbagwu a ji otu mgbata, be nyee a okpu-eze, ọ whoga nọolugbu, neemegbu.

³ Nnwọ Atnuru wam tọma akara ke ẹbo, m nurnu m nhne ẹno wam zi bụdnu ke ẹbo, naakaa, "Vaa."

⁴ Le, iyinya berere naachna ihie ihie, be nyernu nye gbagwu a rikne o gweme udno n'owa, mee ele badnụ noogbu ibne be, be nyernu a ama-ogwnu hna ezi.

⁵ Nga Nnwọ Atnuru wam tọmarnu akara ke ẹto, m nurnu m hne nhne ẹno wam zi bụdnu ẹto karu, "Vaa." M le anya whnụ iyinya neeji riji, nye gbagwu a ji nhne be nọotu nhne n'aka a.

⁶ M nurnu m nkọli n'esilawuru nhne ẹno wam zi bụdnu, naakaa, "Otu ntutu ikpa wheti bụ ogwo ẹnu otu ọbochi, ntutu ikpa balị ẹto ogwo ẹnu otu ọbochi. Kọvu anụ lulu mọno olivu nụ manya vaiñi."

⁷ Nnwọ Atnurnu wam tọma akara k'eno, m nurnu m nkọli nhne zị bụdnu k'eno karu, "Vaa."

⁸ M le anya, otu iyinya ogbunụ-orio, rẹwhna nye dazị n'olu a bụ Enwu, Eli Renuwọ sno a n'aznụ. Be nyernu a rikne hne otu nga nụ nga ẹno ke ọwa zị, ma o gweru ama-ogwnu nụ ọkwnunyo gbu be, ma nrịria ojo nụ ojo anọhia ke ọwa.

⁹ Nnwọ Atnurnu wam tọmarnu akara ke isne, m whnurnu m mkpuru ovu kpakara ele be gburu kwnornu ikwu-ọnu Chiokike nụ ama be gbaru nụ mkpururu ojo arịohna.

¹⁰ Be ji okne nkọli neesi okokoba, naakaa, "Nyenwe aị zị nsọ, i bụ ezi, dū ngele, hne i jeekpe ele zị n'owa ikpe, megwnahia ọvna n'aka a?"

¹¹ Be nyernu nye ọbula nū rime be iwo awura abọchna, be kanu be, be zukwaru inwe ige matị, tem ọnu ogwnugwnu ele izi ibne be nū rumu nda be, ele be joogbu zute.

¹² Nnwọ Atnurnu wam tọmarnu akara ke isunu, okne ẹli otne enye dnarnu, ẹnam ji riji lele ikpe mkpe, ẹnwa chna ihie ihie lele ọvna n'aka.

¹³ Mbọ hi n'oligwe naadna n'owa lele ike isisi be kwu figi chná achna naadna nga ruwhere neewhe.

¹⁴ Be pịakota oligwe lele ọkwukwo, rugwu nū ẹli ọhia esilawuru whoga n'ọnodi be.

¹⁵ Ele eze ke ọwa nū ele dikne, ele nẹchi ele ọgwnu ele baru eze, ele dimkpa, nye ọbula, ma ọhi ma nye nwernu

ẹhni a, tugwa nū rime ọgba nū iketa rugwu.

¹⁶ Be kanu rugwu kwu nū rugwu matị, "Dnagidne aị, kpusni aị n'anya nye wam dazị nū ngadna eze, ya nū ovu owe ẹhni Nnwọ Atnurnu wam.

¹⁷ Kwnornu nū okne ọbochi ovu owe ẹhni be valẹm. Nyele joogwuzoli?"

7

Be karu 144,000 ele badnu akara

¹ Nga nhne ka whemernu, m whnurnu m enine izi ẹno gwuzo nū ngeri ẹno ke ọwa, knernu ruwhere k'owa n'aka, ma ruwhere gharu o whe n'owa, ma n'osimini mọbu n'olu isisi ọbula.

² M whnurnu m enine izi berere hi n'obosi ẹnam nọowhuya, o ji akara Chiokike ke zị bụdnu n'aka a, o ji okne nkọli naakanu ele enine izi ẹno wam Chiokike nyernu rikne o lulu ọwa nū osimini,

³ kaa, "Anu lulu ọwa, mọbu osimini, mọbu isisi, tem a ka ele izi Chiokike akara n'egedege ruwhnu be."

⁴ M nurnu m ọnu ogwnugwnu ele be karu akara n'egedege ruwhnu be, be bu otu riwhu nū nri ẹno nū pokwu ẹno, hite nū kpakara ẹbnurnu Izireli.

⁵ Be bu hite nū ẹbnurnu Juda, nri nū pokwu lawuru, ẹbnurnu Rubeni, nri nū pokwu lawuru, ẹbnurnu Gadị, nri nū pokwu lawuru,

⁶ hite nū ẹbnurnu Asa, nri nū pokwu lawuru, ẹbnurnu Nafitali, nri nū pokwu

lawuru, ẹbnurnu Manase, nri nọ pokwu lawuru,

⁷ hite nọ ẹbnurnu Simiọni, nri nọ pokwu lawuru, ẹbnurnu Livaị, nri nọ pokwu lawuru, ẹbnurnu Isaka, nri nọ pokwu lawuru,

⁸ hite nọ ẹbnurnu Zebuloni, nri nọ pokwu lawuru, ẹbnurnu Josefu, nri nọ pokwu lawuru, ẹbnurnu Benjamini, nri nọ pokwu lawuru.

Igbudu ele badnọ wam

⁹ Nga nhne ka mekworu, m le anya whnọ igbudu badnọ ọ zá nye nwernu rikne gwnọli ọnu. Be hi nọ kpakara mba nọ ẹbnurnu, nọ ẹli, nọ ikwu-ọnu va, be gwuzoru nọ ruwhnu ngadna eze nọ nọ ruwhnu Nnwọ Atnurnu wam, be wo awura abọchna, be ji masị igwugwu bukwa n'aka be.

¹⁰ Be ji okne nkọli naakaa, “Ọznohia aị hi n'aka Chiokike, nye dazị nọ ngadna eze, ya nọ Nnwọ Atnurnu.”

¹¹ Kpakara ele enine izi gwuzo gba ngadna eze wam gburugburu nọ ele okno badnọ wam nọ nhne ẹno wam zị budnu, dna kpute ruwhnu n'ẹli nọ ruwhnu ngadna eze wam, kpọnu Chiokike risi ẹli.

¹² Be kaa, “Amim! Ngozi nọ igwugwu nọ akọniche, nọ ọtu mmamma nọ ọson'anya nọ rikne nọ iknernema zinu Chiokike du ọkwnukokwnu. Amim.”

¹³ Otu nye okno badnọ sịkwa m, “Ele ka wogwu iwo

awura abọchna be bu ele ke ele? Ndaa hne be hi va?”

¹⁴ M sa a, “Nda-aị-kwu, m máam, jị magwu.”

Ọ kanu m, “Ele ka bu ele hiri n'okne mmekpẹhni wam whuya, be snurnu iwo be, mee be ziri richna nọ rime ọvnarna Nnwọ Atnurnu wam.

¹⁵ Kam kpayaru, be jiri gwuzoru nọ ruwhnu ngadna eze Chiokike, be jeekpenu a iwhnehnne nọ abalı nọ rime Ọro Nso a.

Nye wam dazị nọ ngadna eze jaagbasa ọro-ẹka a, be wuru nọ rime a.

¹⁶ Wiri jọogwnu be berere, akpiri jọokpo be bẹkwnu berere, ẹhnam jọomu kwno be berere, whurwhuru ẹhni jéeme kwno be berere.

¹⁷ Kwnornu nọ Nnwọ Atnurnu nye ke zị n'esilawuru ngadna eze wam jọobu nye nọoznu be lele atnurnu. O joodu be zne nọ risi mini ke budnu, Chiokike jookwnos-nama anya-mini ẹkwna n'anya be.”

8

Akara ke ẹsau

¹ Nga Nnwọ Atnurnu wam kpumernu akara ke ẹsau, oligwe dnarnu bii du ichichi awa.

² M whnurnu m enine izi ẹsau ele gwuzo nọ ruwhnu Chiokike, be nyernu be ọkwodu ẹsau.

³ Enine izi berere ke jigwu nhne isensi golu varu gwuzoru nu ruwhnu ojo ariohna, be nyernu a agida isensi, o gweru a yikota nu okpukpe ele nsọ Chiokike, gweru a kwa ariohna n'olu ojo ariohna golu ke zi nu ruwhnu ngadna eze wam.

⁴ Runwurnu isensi wam nu okpukpe ele nsọ Chiokike lizo nu ruwhnu Chiokike hite n'aka enine izi wam.

⁵ Enine izi wam gweru nhne isensi wam gharu bekwnu n'oyo ariohna, ghasa a nu rime owa. Agida egbe oligwe nu odidna nu amuma nu eli otne enye dnarnu.

Okwodu esau wam

⁶ Enine izi esau wam ji okwodu esau jiknernu o gbube.

⁷ Enine izi ke mbom gbube okwodu a, mkpuru mini nu bekwnu gwaru onarna wusa n'owa, otu-ibewa nu nga eto ke owa rne bekwnu, otu-ibewa nu nga eto ke isisi nu kpakara achara budnu rnernu bekwnu.

⁸ Enine izi ke ebo gbube okwodu a, be tubna nhne nu lele rugwu okpotokpo neerne bekwnu nu rime osimini, otu-ibewa nu nga eto ke osimini gho onarna.

⁹ Otu-ibewa nu nga eto ke nhne zi budnu nu rime osimini nwuma, otu-ibewa nu nga eto ke ogo mini kpu.

¹⁰ Enine izi ke eto gbube okwodu a. Otu okne mbu hi n'oligwe dna, noonwu lele tonji dnakwasị otu-ibewa nu nga eto mini, ma nu risi mini.

¹¹ Rewhna mbu wam bu Nlulu. Otu-ibewa nu nga eto mini noolu nlulu, agida ele badnu nwurnu kwnornu nu be nwornu mini wam.

¹² Enine izi ke eno gbube okwodu a. Be lulu otu-ibewa nu nga eto ennam, nu otu-ibewa nu nga eto enwa, nu otu-ibewa nu nga eto mbu, ke kpararu otu-ibewa nu nga eto iwhne be zima noonwu, otu-ibewa nu nga eto ke obochi nwée iwhne ya nu otu-ibewa nu nga eto ke abali.

¹³ M leru m anya, m nurnu m otu igno neewhe n'esilawuru oligwe, gweru okne nkoli neesi okokoba, "Awhnuwhnu! Awhnuwhnu! Awhnuwhnu zinu kpakara ele wu n'owa nga be jonu odidna okwodu ke ele enine izi eto ke gwnarnu jogbu."

9

¹ Enine izi ke isne gbube okwodu a. M whnurnu m otu mbu hiri n'oligwe dna n'owa, be nyee a snambi onuhna olulu awhnuwhnu.

² Mbu wam tuma onuhna olulu awhnuwhnu, runwurnu hi nu rime a whuya nu lele runwurnu hi n'okne ite bekwnu, iwhne ennam nu ruwhere gbaru ochichiri kwnornu runwurnu hi n'olulu awhnuwhnu wam whuya.

³ Igwurube hi nu runwurnu wam whuya n'olu owa, be nyernu be rikne lele akpi ke owa.

⁴ Be kanu be, be lulu achara mbu isisi, mbu achara budnu berere, kovu be gba nye obula ke nwée akara

Chiokike n'egedege ruwhnu a.

⁵ Igwurube wam nwée rikne o gbu be, kovu be ta be awnhnuwhnu enwa isne. Nhne igbugbu be nu lele nye akpi gbaru.

⁶ N'enwa isne ka, ele badnu ka joopio enwu joogbu be, kovu be jowhnu enwu, enwu joogwnu be, kovu enwu jaagba eso.

⁷ Igwurube wam nu lele iyinya jiknernu o zne ogwnu, be kpu nhne nu lele okpu-eze golu nu risi be, ruwhnu be nu lele ruwhnu badnu.

⁸ Rukeru-ize risi be nu lele rukeri-ize nyerinya, ize be nu lele ize odum.

⁹ Mbno mkpoma be nu lele mbno rugwe, odidna akankwu be naadna lele ogbo-eli agida iyinya nodopnu neezne ogwnu.

¹⁰ Odnun be nu lele akpi, be nwernu nhne ogbugba n'odnu be, nwe masiri rikne n'odnu o kpakna ele badnu ehni enwa isne.

¹¹ Be nwernu eze nechi be, nye bu enine izi olulu awnhnuwhnu. Nye rewhna a n'onu Hiburu bu Abadoni, n'onu Giriki, Apoloni, ke bu nye noolulu nhne.

¹² Nhne awnhnuwhnu ke mbom kwolem, nhne awnhnuwhnu lawuru berere wawa.

¹³ Enine izi ke isunu gbu okwodu a, m nurnu m otu nkoli hi n'ahnio nu ngeri eno ke ojo ariohna golu wam bu ke gwuzo nu ruwhnu Chiokike whuya.

¹⁴ Nkoli wam kanu enine izi ke isunu wam ke gburu okwodu, "Sigbasi enine izi eno wam ke be knernu eriri n'okne Osimini Uferetisi."

¹⁵ Be sigbasi enine izi eno wam, ke be jiknernernu n'otnu-ige ka n'obochi ka, nu enwa ka, n'awha ka o gbu otu-ibewa nu nga eto ke kpakara ele badnu.

¹⁶ M nurnu m onu ogwnugwnu ele ogwnu gba iyinya bu riwhu pokwu ndasi lawuru.

¹⁷ Nu rime owhnurninya wam, m whnurnu m iyinya nu ele naagba be, be nwernu mbno mkpoma naachna ihie ihie lele bekwnu, lele jasinti, nu rugwu bekwnu, risi iyinya wam nu lele risi odum, bekwnu nu runwurnu nu rugwu bekwnu neehi n'onu be nowhuya.

¹⁸ Bekwnu nu runwurnu nu rugwu bekwnu ke hi n'onu iyinya wam nowhuya gburu otu-ibewa nu nga eto ke ele badnu.

¹⁹ Kwnornu nu iknernema be hi n'onu be ya nu odnu be. Odnun be nu lele agwo, ke be ji risi be neemeru ele badnu ehni.

²⁰ Ele badnu gwnarnu ke nhne igbugbu ka gbule, kwéle o sigbasi nhne aka be turu, be kwéle o sigbasi o kpenu rumu renwu ojo, nu renwu golu nu ke siliva, nu ola nu akaworugwu nu ke isisi, ke za nowhnu osno, za nonu nhne, za neezne izne.

²¹ Ele badnu wam tuhnasnana hite nu ogbu

badnu be, nu amusu be neeri,
nu ome oyi be, mōbu nu
buznu be nooznu.

10

*Enine izi nu
okwukwo matị*

¹ Omekwo, m whnuru m enine izi berere ke nwernu rikne hi n'oligwe hiedna. O wogwu erumeru oligwe, eke nu egwurugwu zi n'olu risi a, ruwhnu a noonwu lele ehnam, ochi a lawuru nu lele nsusu oro bekwu.

² O ji otu okwukwo matị be kpumernu okpume n'aka a. O bita ochikwunga a n'osimini, ochirita a n'olu eli.

³ O ji okne nkoli si lulo lele hne odum neebigbo, nga o sikworu okokoba, egbe oligwe esau wam gba n'osisa.

⁴ Nga egbe oligwe esau wam gbakworu, m pioru m o gba n'okwukwo, m nuru m otu nkoli hiri n'oligwe naakanu m, "Kpusnime nhne egbe oligwe esau wam kwuru, i gba be n'okwukwo."

⁵ Enine izi wam me whnuru gwuzo n'osimini nu n'olu eli, gwelizo akarikwunga a olu.

⁶ O gweru nye wam zi okwnukokwunu du risi, bu nye keru oligwe nu kpakara nhne zi nu rime a, nu owa nu kpakara nhne zi nu rime a, nu osimini nu kpakara nhne zi nu rime a. Enine izi wam karu, "Ige kwolem."

⁷ Kovu nga enine izi ke esau jogbu okwodu a, nhne tugwaru otugwa ke Chiokike jeemezu, lele kpa o kwuru

hite n'onu ele izi a, bu ele owhnurninya."

⁸ Nkoli wam me nuru hi n'oligwe nookwunu m oka, kwukwnonu m oka berere, o kaa, "Zne, gweru okwukwo matị wam be kpumernu okpume ke zi n'aka enine izi wam gwuzo n'osimini n'olu eli."

⁹ M znekwnusi enine izi wam, kanu a o nyee m okwukwo matị wam. O kaa, "Gweru a, ri a, o joolu nlulu nu ruwho i, kovu o joso n'onu i lele mono ebeka."

¹⁰ M gweru okwukwo wam n'aka a, ri a, o nu lele mono ebeka n'onu m, kovu kpa me rikworu a, o mernu ruwho m lu nlulu.

¹¹ O kanu m, "I jokpo okwo ikwu-onu Chiokike ka berere nu ruwhnu agida ele badnu, nu mba zi odo n'odo, n'ikwu-onu zi odo n'odo, ma nu ruwhnu ele eze."

11

Ele akebbe lawuru

¹ Be nyernu m otu isisi lele nhne be ji notu nhne, be kanu m, "Lizo, tu Oro Nso Chiokike, nu ojo arihna, gwnu ele nokpo risi eli nu rime a.

² Kovu i tu n'ederezi, kwnonu nu be nyernu a ele buo ele Ju, ele jozodna elihna nso wam nri enwa eno nu enwa lawuru.

³ M jeezizne ele akebbe m lawuru, be joowo iwo mkpe zni izi oma otu pokwu obochi nu riwhu obochi lawuru nu nri isunu."

4 Ka bu isisi olivu lawuru wam nu nhne be bita tonji lawuru wam gwuzo nu ruwhnu Nyenwe owa.

5 Nye irno obula ke pioru o kpakna be ehni, bekwu hi n'onu be jeernegbu be. Nye obula ke kpaknarnu be ehni joonwuriri kpm.

6 Ele ka nwernu rikne o knesni oligwe, ke mernu mini ozuzo zole kpakara ige be nokpo okwo ikwu-onu Chiokike, be nwernu rikne o mee kpakara mini ghogvna, nu rikne o mee ele zi n'owa rja ehni igbugbu obula lele kpa be pioru.

7 Nga be gbasakworu ikwu-onu Chiokike, anohia wam hi nu olulu awnwhnu, lusi be ogwnu, megbu be, gbu be.

8 Iznu be joovubi n'esilawuru apna okne elihna wam be nookwu n'elulu Sodom nu Ijipiti, hne be kpoqburu Nyenwe be n'olu ogba.

9 Kpakara ele badnu, nu eburnu, nu ikwu-onu, nu mba zi odo n'odo, jeelekiri iznu be obochi eto n'ichichi, be jeekwe be li be.

10 Kpakara ele zi n'owa joonwudna, mkpoma so be n'onu kwnornu nu be nwurnu, be neeziznenu ibne be nkesi kwnornu ele owhnurninya lawuru ka nwurnu onwu bu ele mernu ele zi n'owa ta awnwhnu k'agida.

11 Nga obochi eto n'ichichi whemernu, enine budnu hiri nu Chiokike bnazne nu rime be, be gwuzoru, okne ogwnu

turu kpakara ele whnurnu be.

12 Ele owhnurninya lawuru wam nurnu otu nkoli hiri n'oligwe noosukwu be, "Anu va n'olu hna." Be lizo, la n'olu n'erumeru oligwe, kpa ele irno be neelekiri be.

13 N'ige wam, okne eli otne enye dnarnu n'owa, ke mernu otu nga nu nri nga elihna wam lulu, eli otne enye wam gburu pokwu badnu esau, ogwnu turu ele ke gwnarnu, be znarni Chiokike ke oligwe.

14 Nhne awnwhnu ke ebo whemernu, kovu le, nhne awnwhnu ke eto vawa wara wara.

Okwodu ke esau

15 Enine izi ke esau gbu okwodu a, agida nkoli dnarnu n'oligwe, naakaa,

"Eli-eze k'owa ka gholam elieze ke Nyenwe ai nu ke Karaisi,
o jaachi hite n'ige kwokwo du n'ige kwokwo."

16 Nri ele okno badnu lawuru wam nu eno ele dazi nu ngadna eze be nu ruwhnu Chiokike, dna kpu ruwhnu n'eli, kponu Chiokike risi eli.

17 Be kaa,
"A notunu i mmamma,
Nyenwe ai Chiokike ke Meli Nhne Dum,
nye zi, nye zi nu mbom,
kwnornu nu i ji okne iknernema i nechi.

18 Ovu neewe ele zi n'owa ehni, kwnornu nu onuma i valem,
ige i jeekpe ele nwurnu onwu ikpe valem,
nu ige i jookwu ele izi i, ele owhnurninya i ogwo ernu

nụ kpakara ele ke i, nụ
ele nọtụ ogwnu i
ma nye kwu nụ nye matị,
nụ ige o lulu ele luluru
owa.”

¹⁹ Be gbamarnu Oro
Nsọ Chiokike n'oligwe, be
whnurnu Igbe Ogba-Njọ-Ehni
Chiokike nụ rime a, agida
amuma, nụ odidna, nụ egbe
oligwe, nụ ẹli otne enye, nụ
okne mkpuru mini dnarnu.

12

*Nwerinya wam nụ
okne agwo wam*

¹ Otu okne nhne ndu-
ehni mernu n'oligwe. Otu
nwerinya wogwu iwo ehnam,
nye enwa zị nụ mkpururu ochi
a, o kpu okpu-eze nwernu nri
nụ mbọ lawuru nụ risi.

² Nwerinya wam zị rime,
rime omumu nnwo neeme a,
o kwna ekwna kpa o nọomu
nnwo.

³ Nhne ndu-ehni berere
whuya kwno n'oligwe, otu
agwo okpotokpo ihie ke
nwernu risi esau nụ nri mfu,
kpu okpu-eze esau nụ risi esau
a.

⁴ O ji odnu a dọru otu-ibewa
nga ẹto mbọ ke oligwe dọdna
be n'owa, o zne gwuzoru
nụ ruwhnu nwerinya wam
nọomu nnwo ma o ri nnwo
wam wara wara o mụhiaru a.

⁵ Nwerinya wam mụhia
nnwo rukna, nye jeeji mk-
para rugwe neechi kpakara
mba, kovu be kwumernu
nnwo wam, kwuznenu a
Chiokike nụ ngadna eze a.

⁶ Nwerinya wam gbawhu,
gbabna nụ rime ẹli-ikpa, hne
Chiokike bitannu a, ma be

lekasi a anya pokwu obochi
nụ riwhu obochi lawuru nụ
nri isunu.

⁷ Ogwnu dna n'oligwe,
Maikeli nụ ele enine izi a lụ
ogwnu megidne agwo wam,
agwo wam nụ ele enine izi a
lụ ogwnu megidne be.

⁸ Kovu Maikeli nụ ele enine
izi a megburu agwo wam,
oghere zimana agwo wam
nụ ele enine izi a n'oligwe
berere.

⁹ Be chidna agwo okpo-
tokpo wam, ke bu agwo
oknani wam bu Ekwensu
mọbu Setani n'owa, nye
nooduwu kpakara ele zị
n'owa. Be chidnarnu ya nụ
kpakara ele izi a.

¹⁰ Ige wam, m nurnu m otu
okne nkoli n'oligwe, kaa,
“Oznohia valem, nụ rikne nụ
ẹli-eze Chiokike aị,

nụ iknernema Karaisi a,
kwnornu nụ be chidnarnu nye
noobno rumu nda aị
nhne,

bụ nye noobno be nhne
nụ ruwhnu Chiokike
iwnehnie nụ abali.

¹¹ Be jiri onarna Nnwọ
Atnurnu wam
nụ akebe be gbaru
megbu a,

be whnuna budnu be n'anya
du n'enwu.

¹² Kam kpayaru, oligwe
nwudnahoru,
ovu oso anu onu ele wu
nụ rime a.

Kovu awnwhnu zinu owa nụ
osimini,

kwnornu nụ Ekwensu
vakwnusilem anu,
onuma jiri a mkpoma,

kwnornu nū ọ magwu
nū ige a zị ichichi.”

¹³ Nga agwọ wam whnurnu
nū be chidnarnu a n'owa, o
bete ọ chị nwerinya wam ẹso
bụ nye murnu nnwọ rukna
wam.

¹⁴ Be nyee nwerinya wam
aka-nkwu lawuru ke okne
igno ma o wheru iwhe zne
hne o wu n'eli-ikpa, hne be
jeelekasi a anya awha ẹto nū
enwa isunu hne agwọ wam bọ
ọ whnuna a.

¹⁵ Agwọ wam gbuhia agida
onu-mini a gbasno nwerinya
wam, ma o vuru nwerinya
wam.

¹⁶ Kọvu ẹli yinnu nwerinya
wam aka, kpumernu onu
a, nwokwo mini agwọ wam
gbuhiaru n'onu a.

¹⁷ Agwọ wam we ovu ẹhni
k'agida megidne nwerinya
wam, o zne nọolusi agwna
rumu nwerinya wam ke
gwnarnu ogwnu, bụ ele bitaru
nhne Chiokike nyernu n'iwu,
nū ele kwesiri okwnata ovu
n'ezi ọka Jizọsi gesiri.

¹⁸ Agwọ wam gwuzoru
n'olu rịzna ke osimini.

13

Anohia lawuru

¹ M whnurnu m otu anohia
hi nū rime osimini nọowhuya,
o nwernu nri mfu nū risi ẹsau,
o kpu okpu-eze n'olu mfu a,
be gbakwasiri n'olu kpakara
risi a rẹwhna ojo nookwulu
Chiokike.

² Anohia me whnurnu nū
lele agwnu, ọchi a lawuru nū
lele anohia bea, onu a nū lele
onu odum. Agwọ wam nyee

anohia wam rikne a, ngadna
eze a nū okne iknernema.

³ Ọ nū lele nū be gburu otu
risi anohia wam, kọvu nhne
omernu ẹhni wam ke nwernu
rikne o vuya enwu gwọru, ọ tu
kpakara ọwa n'anya, be gbas-
nornu anohia wam.

⁴ Be kpọnu agwọ wam risi
ẹli ke nyernu anohia wam
iknernema a, be kpọ masinu
anohia wam risi ẹli, naakaa,
“Nyele nū lele anohia ka?
Nyele nwernu rikne ọ lusi a
ogwnu?”

⁵ Be nyernu anohia wam
rikne o ji nookwu agida nhne
zị ogwnu nū ọka ojo nook-
wulu Chiokike, o nwernu
rikne nri enwa eno nū enwa
lawuru.

⁶ Anohia wam kpume onu
a nookwulu Chiokike, nū
rẹwhna a, nū Oro Nso a, nū
kpakara ele wu n'oligwe.

⁷ Be nyernu a rikne ọ lusi
ele nsọ ogwnu nū o megbu
be, be nyee kwno a rikne
megidne kpakara avnurnu nū
ele badnū nū ikwu-onu nū
mba.

⁸ Kpakara ele wu n'owa
jọokponu a risi ẹli, ele be gbála
rẹwhna be nū rime okwukwo
budnu ke Nnwọ Atnurnu nye
be gburu hite n'okike ọwa.

⁹ Nye nwernu nsni, ọ nurnu.

¹⁰ Nye ọbula be jọodoru
n'ogwnu

be jọodoru a n'ogwnu.

Nye ọbula be jeeji ama-ogwnu
gbu,

be jeeji ama-ogwnu gbu a.
Ele nsọ jeenwe okwnata ovu
nū ndidi.

11 M whnụ anọhia berere hi n'eli nọowhuya. O nwernu mfu lawuru lele mfu nnwọ atnuru, o nookwu ọka lele agwọ.

12 O ji rikne anọhia mbom wam nụ ruwhnu a. O mernu kpakara ọwa nụ ele zị nụ rime a kpọnu anọhia mbom wam risi ẹli, nye be gwọru nhne omernu ẹhni wam ke noovuya ẹnwu.

13 Anọhia ke ẹbo ka rnụ ẹrnu rikne, o mernu bẹkwnu hi n'oligwe dna n'ọwa n'anya ele badnụ.

14 O duhie kpakara ele wu n'ọwa kwnornu ẹrnu ndu-ẹhni ka ke be nyernu a rikne ọ rnụ nụ ruwhnu anọhia ke mbom. O kanụ ele zị n'ọwa be kpụ igbudu anọhia wam ke be jiri ama-ogwnu mernu ẹhni, kọvu ọ zị bụdnu.

15 Be nyernu anọhia ke ẹbo wam rikne o nyesi inwe bụdnu nụ rime igbudu anọhia mbom wam, ke kpayarụ igbudu wam nookwu ọka, kaa be noogbu kpakara ele kwéle ọ kpọnu igbudu wam risi ẹli.

16 O mee kpakara ele badnụ ma nye matị ma nye kwu, nye baru eze nụ nye mboni, ọhi nụ nye bụo ọhi, be narnụ akara nụ akarikwnunga be mọbu n'egedege ruwhnu be.

17 Ọ zá nye nwernu rikne zụ nhne mọbu re nhne, okwolem nye nwernu akara anọhia wam ke bụ rẹwhna anọhia wam, mọbu ọgwnugwnu rẹwhna a.

18 Nye ọbula nwehia akoniche, nye ọbula ke nwernu ọgwnugwnu risi, ọ

mahia ọgwnugwnu anọhia wam, kwnornu nụ ọ bụ ọgwnugwnu badnụ, ọgwnugwnu a bụ riwhu isunu nụ nri isunu nụ isunu [666].

14

Nnwọ Atnuru nụ ele ke a

1 M leru m anya, whnụ Nnwọ Atnuru gwuzo n'olu rugwu Zayoni, ya nụ otu riwhu nụ nri ẹno nụ pokwu ẹno ele badnụ, be vu rẹwhna a nụ rẹwhna Nda a n'egedege ruwhnu be.

2 M nurnu m otu nkọli hi n'oligwe dna lele agida mini, nụ okne nkọli egbe oligwe, m nurnu m ele naagba ọbo ji ọbo be naagba.

3 Be gwnụ eri ikne nụ ruwhnu ngadna eze wam, ma nụ ruwhnu nhne ẹno wam zị bụdnu, nụ ele okno badnụ wam. Ọ zá nye nwernu rikne sno be gwnụ eri wam, okwolem otu riwhu nụ nri ẹno nụ pokwu ẹno wam ele be gbaharu n'ọwa.

4 Ka bụ ele mérula ẹhni be n'ẹhni nyerinya kwnornu nụ be bitaru ẹhni be snam. Be joosno Nnwọ Atnuru wam penupe ọbula o neezne, be gbaharu be n'esilawuru ele badnụ lele mkpuru mbom be kesiri Chiokike nụ Nnwọ Atnuru a.

5 Ọ zá aghalaghala be whnuru n'ọnu be, be zị snam.

Ele enine izi ẹto

6 M whnuru m enine izi berere neewhe n'oligwe, nọkpo okwo izi ọma ke zị ọkwnukokwnu n'ọwa, ma

kpakara ele mba, nụ avnuru nụ ikwu-onu nụ ele badnu nuru a.

⁷ O ji okne nkoli naakaa, “Anụ tū ogwnu Chiokike, anụ znarni ebube a, kwnornu nū ige valēm o jeekpe kpakara badnu ikpe, anụ kpōnu nye keru oligwe, nū ọwa, nū osimini, nū kpakara risi mini risi ẹli.”

⁸ Enine izi ke ẹbo snornu ke mbom kaa, “Ọ dnanam, Babiloni dnanam, okne mba ke mernu kpakara ẹli nwọ manya okne ome ọyi a.”

⁹ Enine izi ke ẹto snornu be gweru okne nkoli kaa, “Nye ọbula ke kpōnnu anọhia wam nū igbudu a risi ẹli, nahoru masi akara a n'egedege ruwhnu a, mọbu n'aka a,

¹⁰ ọ jōonwo manya okne ovu owe ẹhni Chiokike, ke ọ wusaru nū rikne, ke be gwala agwa nū rime okiko ọnuma a, be jeeji bẹkwnu nū rugwu bẹkwnu ta a awnūwhnu nū ruwhnu ele enine izi nsọ nū ruwhnu Nnwọ Atnuru wam.

¹¹ Rūnwurnu awnūwhnu be zị naala olu ọkwnukokwnu, be zá noozukwa inwe iwh-nehnie nū abali, bụ ele wam kpōnnu anọhia wam nū igbudu a risi ẹli, nū nye ọbula ke nahiaru akara rẹwhna a.”

¹² Ele nsọ jeenwe ndidi, ele naabita nhne Chiokike ny-ernu n'iwu nū ele kwnataru Jizosi mkpoma.

¹³ Nga wam m nuru m nkoli hiri n'oligwe kaa, “Gba n'okwukwo, ọwa oma zinu ele nwuru nū rime Chiokike hite nū kitna.”

Enine Nso kaa, “Owe, be joozukwa inwe n'ernu be, kwnornu nū ẹnu be jooosno be n'aznu.”

Ogwe nhne n'ekwu ke ọwa

¹⁴ M le anya, whnu, otu erumeru abochna, otu nye nū lele Nnwọ ke Badnu dazi n'olu erumeru wam, o kpu okpu-eze golu nū risi a, o ji ama ẹkwu zị bụko n'aka a.

¹⁵ Enine izi berere hi nū rime Oro Nso whuya, gweru okne nkoli kanu nye wam dazi n'erumeru, “Gweru ama i, gweru nhne n'ekwu, kwnornu nū ige o gwe nhne n'ekwu k'owa valēm, mkpuru k'owa chnanam.”

¹⁶ Nye wam dazi n'erumeru gweru ama a yisi nū rime ọwa, gweru nhne ẹkwu k'owa.

¹⁷ M whnuru m enine izi berere hi n'Oro Nso n'oligwe, o ji masi ama zị bụko.

¹⁸ Enine izi berere ke nwernu rikne megidne bẹkwnu, hi n'ọjo ariohna whuya. O gweru okne nkoli kanu enine izi wam ji ama zị bụko, “Gweru ama i ghohia mkpuru vaini ke ẹkwu, kwnornu nū vaini ke ọwa chnanam.”

¹⁹ Enine izi wam yisi ama a, ghohia mkpuru vaini, tubna be nū rime hne be joozosna manya okne ovu owe ẹhni Chiokike.

²⁰ Be zosna manya vaini wam n'aznu ẹli-ohna, ọvnarna a gbahia nū hne be nozosna manya wam du nhne nū lele riwhu maili lawuru, du oknesni onu iyinya n'olu.

15

Nhne awhnụwhnu ẹsau

1 M whnụ nhne berere n'oligwe, okne nhne ndu-ẹhni. Enine izi ẹsau vu nhne awhnụwhnu ẹsau ke ipne-aznụ, okne ovu owe ẹhni Chiokike ke ipne-aznụ zị nụ rime be.

2 M whnụ kwno nhne nụ lele osimini nyno be gwarụ bẹkwnu, nụ ele wam megburu anọhia wam nụ igbudu a nụ ọnu ọgwugwu rẹwhna a, hne be gwuzo nụ ngeri osimini nyno wam, be ji ọbo Chiokike nyernu be.

3 Be nọogwnu eri Mozizi nye izi Chiokike nụ eri Nnwọ Atnurnu wam,

“Erunu i tų n'anya, zị masi rikne!

Nyenwe aị Chiokike ke Meli Nhne Dum,

Kpakara apna i snịrni asni bụru ezi ọka,

Eze zị ọkwnukokwnu.

4 Nyele jóotu ogwnu i, Nyenwe aị?

Nyele jóokwuhia igwugwu ke rẹwhna i?

Kwnornu nụ jị nụ nsnunu i zị nsọ,

kpakara mba jaava kpọ risi ẹli nụ ruwhnu i,

kwnornu nụ ikpe bụru ọma i zuru kpakara ọwa.”

5 Nga ka mekworu, m whnụ Ọro Nsọ Chiokike n'oligwe gbamarnụ bụ Ọro-Ẹka ruwhnu Chiokike.

6 Enine izi ẹsau wam vu nhne awhnụwhnu ẹsau hi nụ rime Ọro Nsọ wam whụya, be wogwu iwo noonwu onwu,

be ji ajnị mkpọma golu kne nụ mkpọma be.

7 Otu nhne zị bụdnu wam nyega enine izi ẹsau wam obele ẹsau okne ovu owe ẹhni Chiokike jiharuru nụ rime be, bụ nye zị bụdnu ọkwnukokwnu.

8 Rụnwurnu jihia Ọro Nsọ wam hite n'igwugwu nụ ikn-ernema Chiokike, ọ zá nye nwernu rikne ọ bna Ọro Nsọ wam tem awhnụwhnu ẹsau wam enine izi ẹsau wam vu-yarụ kwome.

16

Obele ẹsau ovu owe ẹhni Chiokike

1 Ige wam, m nurnu m otu okne nkọli hi n'Ọro Nsọ wam naakanụ enine izi ẹsau wam, “Anụ zne wusa obele ẹsau ovu owe ẹhni Chiokike n'ọwa.”

2 Enine izi ke mbom zne wusa obele a n'ọwa, esuso ẹhni tų ogwnu noogbu igbugbu se kpakara ele vu akara anọhia wam n'ẹhni, nụ kpakara ele kpomnu igbudu wam risi n'ẹli.

3 Enine izi ke ẹbo zne wusa obele a n'osimini, ọ ghọ ọvnarna nụ lele ọvnarna nye nwurnu ọnwu, kpakara nhne zị bụdnu nụ rime osimini nwukwo.

4 Enine izi ke ẹto zne wusa obele a nụ mini nụ kpakara risi mini, be ghọ ọvnarna.

5 M nurnu m nga enine izi ke neelegidne mini karụ,

“Ji bụ nye mee mma n'ikpe

jị bụ nye zị, nye zị nụ mbom, Nye zị Nsọ,

kwnornu nụ i kperu ikpe nụ kpa.

6 Be wusaru ọvna ele nsọ ị
nụ ele ọwhnurninya ị,
i nyee be ọvna be nwo
lele mini,
kwnornu nụ be kwesiri
a.”

7 M nurnu m otu nkọli hi n'ọjọ
ariọhna naakaa,
“Owe! Nyenwe aị Chiokike ke
Meli Nhne Dum,
ikpe i buru ọma, bu masi
ezi ọka.”

8 Enine izi ke ẹno zne wusa
obele a n'ẹnam, o neerne ele
badnụ lele bẹkwnu.

9 Okne okpe bẹkwnu rne
ele badnụ, be kọsna rẹwhna
Chiokike nye nwernu rikne
nụ hne awhnụwhnu ka zị.
Kọvu be kwéle ọ tughnasna nụ
mmehie be znarni Chiokike.

10 Enine izi ke isne zne
wusa obele a n'olu ngadna
eze anọhia wam. Okne
ọchichiri gbasni ẹli-eze anọhia
wam, ele badnụ naatabi riro
be kwnornu nhne igbugbu.

11 Be kọsna Chiokike ke
oligwe kwnornu nhne ig-
bugbu be nụ nhne mernu
ẹhni be. Kọvu be kwéle ọ
tughnasna nụ apna ojo be.

12 Enine izi ke isunu zne
wusa obele a n'okne Osimini
Uferetisi, mini a takwo, kpa
mini a takworu, apna ele eze
hi n'ọbosi ẹnam whuya. *

13 M whnụ renwu ẹto zila
richna lele redokpo, hi n'ọnu
agwo wam, nụ ọnu anọhia
wam, nụ ọnu nye ọwhnurninya
aghalaghala wam nọowhuya.

14 Be bu renwu ojo nọornu
ernu ndu-ẹhni. Renwu ẹto
ka znekwnusi ele eze ọwa,

chikota be n'otu kwnornu
ogwnu okne ọbochi Chiokike
ke Meli Nhne Dum.

15 Le, m jaava lele nye
buznu, ngozi zinu nye ọbula
neese nse, bikiwata iwo a, ọ
zi kpa ọ gbaru ẹto zneghari,
iwhnerne tu a n'ọhna.

16 Renwu ojo wam chikota
kpakara eze nụ hne ele Hi-
buru nookwu Amagidoni.

17 Enine izi ke ẹsau zne wusa
obele a nụ ruwhere. Otu
okne nkọli hi nụ ngadna eze
zi n'Oro Nsọ wam, kaa, “Be
menem a.”

18 Agida amuma oligwe, nụ
odidna, nụ egbe oligwe nụ
okne ẹli otne enye dnarnu, ẹli
otne enye nụ kpm zigelele
hite nga Chiokike kpuru
badnụ. Ẹli otne enye ka
kakwo ibne a.

19 Ẹli-ọhna kwu wam
kewamarnu nga ẹto, ẹli-
ọhna kpakara mba lu-
luru. Chiokike chenwanya
Babiloni, mee a ọ nwo manya
hi n'ikiko okne ovu owe ẹhni
a.

20 Kpakara ẹli ọhia esi-
lawuru nụ rugwu gbawhu,
whume.

21 Okne mkpuru mini
neenyi rinya † naadnakwasị
ele badnụ hite n'oligwe. Ele
badnụ nọovu Chiokike ọnu
kwnornu mkpuru mini wam,
nụ kwnornu awhnụwhnu
wam zị ogwnu ke agida.

17

Nwerinya nụ anọhia

1 Otu nụ rime ele enine
izi ẹsau wam vu obele ẹsau

* **16:12** Nga apna wam whuyaru, ele irno be whnurnu oghere bnanya lusi be ogwnu. † **16:21** Mkpuru mini wam neenyi nụ nhne otutu 50 kg.

vakwnusi m kaa, “Vaa, me gesi i awnñuwhnu okne nye ewhere wam ke dazị n'olu agịda mini,

² nye ele eze ke ọwa snornu mee ọyi, ele zị n'ọwa nwọrnụ manya ewhere a.”

³ Enine izi wam vuru m n'Enine zne nụ rime ẹlịkpa, hne me whnñrnụ otu nwerinya dazị n'olu anọhia naachna ihie ihie. Anọhia wam nwernu agịda rẹwhna ọjọ nookwulu Chiokike be gbakwasịri a, o nwernu risi ẹsau, nụ nri mfu.

⁴ Nwerinya wam wogwu iwo odno odno nụ ihie ihie, o jiri nhne ẹyi golu nụ rugwu okne ọnu ahia nụ palị mee ẹhni a mma, o ji ikiko golu n'aka a, nhne ruru ọru nụ nhne zila richna ke ome ọyi a jihiaru nụ rime a.

⁵ Be gbakwasịri a otu rẹwhna n'egedege ruwhnu, Nhne miri emi,

okne Babiloni,

nne kpakara ele ewhere

nụ nhne ruru ọru ke ọwa.

⁶ Ọvnarna ele nsọ nụ ele be gburu kwnornu Jizọsi noogbu a lele manya.

Ọ gbarụ m anya agharị nga me whnñrnụ a.

⁷ Enine izi wam kanụ m, “Ndaa kpa o jiri naagba i anya gharị? M jaakanụ i nhne tugwaru otugwa gbasịri nwerinya ka nụ anọhia ke vu a, bụ anọhia ke nwernu risi ẹsau nụ nri mfu.

⁸ Anọhia ke i whnñrnụ zị bụdnụ nụ mbom, kọvu ọ nwñrnụ, o jeehi n'olulu awnñuwhnu whuya zne

n'ẹnwu a. Kpakara ele wu n'ọwa ele be gbála rẹwhna be n'okwukwo ke bụdnụ hite n'okike ọwa, ọ jọotu be n'anya nga be whnñrnụ anọhia wam zị bụdnụ nụ mbom, kọvu ọ nwñrnụ, ọ jaazị kwno bụdnụ.

⁹ “A kwesiri o nwe ovu ke nwernu akoniche, risi ẹsau wam bụ rugwu matị ẹsau ke nwerinya wam dazị n'olu a. Be bụ masị ele eze ẹsau,

¹⁰ isne dnanam, otu nẹchi kọriri, otu ya váge. Nga ọ varụ, ọ jaadazị ige matị.

¹¹ Anọhia wam zị bụdnụ nụ mbom, ke nwñrnụ, bụ eze ke ẹsato, nye zị n'esilawuru eze ẹsau wam, jaala n'iyi.

¹² “Nri mfu wam i whnñrnụ bụ masị nri eze ele ya váge ẹchi, kọvu be jeenye be rikne otu ọtnu-ige lele eze snornu anọhia wam chị.

¹³ Be nwernu otu mkpọma, be jeenye anọhia wam ikn-ernema nụ rikne be.

¹⁴ Ele ka joolusi Nnwọ Atnñrnụ wam ọgwnu, kọvu Nnwọ Atnñrnụ wam jeemegbu be, kwnornu nụ ọ bụ Nyenwe ke kakwo ele nwe nụ Eze kakwo ele eze. Ele sno a bụ ele o sukwuru, ele ọ hohiaru nụ ele kwesiri okwnata ovu.”

¹⁵ Ọ kanụ m, “Mini ke i whnñrnụ hne nwerinya ewhere wam dazị, bụ ele badnụ, nụ agịda ele badnụ, nụ mba nụ ikwu-ọnu zị ọdo n'odo.

¹⁶ Anọhia wam nụ nri mfu wam i whnñrnụ joosno nwerinya ewhere wam irno, be jaanahọru a kpakara nhne o nwernu, gbata a ẹto, be

jeeri anọ-ẹhni a, kpọrne a nọ
bẹkwnu.

17 Kwnornu nọ Chiokike
yisiri a nọ mkpọma be, ma
be mee echiche a, be jeek-
werikọta o nyee anọhia wam
ẹli-eze be, ọ jaachi be tem
Chiokike mezu ikwu-ọnu a.

18 Nwerinya wam ị
whnurnu bụ okne ẹli-ọhna
wam ke nẹchi kpakara ele
eze ke ọwa.”

18

Ọdudna Babìloni

1 Nga nhne ka mekworu,
m whnurnu m enine izi
berere hi n'oligwe neehidna,
o nwernu okne iknernema,
ogbu marna marna ruwhnu
a neenye iwhe n'ọwa.

2 O gweru okne nkọli si-
wama, kaa,

“Ọ dnanam, okne Babìloni
dnanam,
ọ ghọlam hne rọmu rẹnwu
ọjọ wu,

oro ikelu kpakara rẹnwu zịla
rịchna,

kpakara ọnunu ọjọ ke be
rị eri zị nọ rime a.

3 Kwnornu nọ kpakara mba
nwọrnunụ manya okne ome
ọyi a,

ele eze ke ọwa snornu a mee
ọyi,

ele nọozu ahia ke ọwa
barụ eze hite nọ okne
ewhere a.”

4 M nọ kwno okne nkọli hi
n'oligwe kaa,

“Ele ke m, anọ hi n'esilawuru
a whaya,

ọ zị anọ snornu a kehia
igwe nọ mmehie a,

ọ zị anọ snornu a ta
awhnuwhnu.

5 Kwnornu nọ mmehie a
gwuzo dọ oligwe,
Chiokike chenwanyalam
kpakara mmehie a.

6 Anọ mesno a lele kpa o
mernu anọ,
anọ mesno a mgba lawuru
kpa o mernu,
okiko ọ gbajiri, anọ gba-
jite a mgba lawuru ma
ọ nwọrnunụ.

7 Anọ ta a awhnuwhnu nọ
anya-mini

lele kpa o nyernu ẹhni a
igwugwu nọ ẹgwnurnu
ọjọ a,

kwnornu nọ ọ karu nọ
mkpọma a,

‘M bụ m eze nyerinya, m bula
m nnwerne nwée nzi,
m jaagba mkpe.’

8 Kam kpayarụ, n'otu ọbochi, ọ
jọowhnuji anya,

ẹnwu, mkpe, nọ ọknunyo,
bẹkwnu jeernegbu a,

kwnornu nọ Nyenwe aị
Chiokike ke neekpe a
ikpe bụ dikne.

9 “Nga ele eze ke ọwa ele
snornu a mee ọyi, n'ẹgwnurnu
ọjọ a, jọowhnu rẹnwurnu
bẹkwnu a, be jaakwana ẹkwana,
gbanu a mkpe.

10 Be joogwuzo nọ hne
zị ikere kwnornu ogwnu
awhnuwhnu a, kaa,

‘Chei, chei, okne ẹli-ọhna,
Babìloni, bụ dikne,
Chiokike taru ị awhnuwhnu
n'otu ọtnu-ige.’

11 “Ele nọozu ahia ke ọwa
jaakwanu a ẹkwana, gbanu a
mkpe, kwnornu nọ ọ zá nye
nọozu kwno mgwana ahia be
berere.

12 Be bụ ele nọozu ahia golu,
siliva, rugwu okne ọnu ahia,

palì, iwo marnu mma, iwo naachna odno odno, siliki nu iwo naachna ihie ihie, isisi obula, nhne obula be jiri ize eni kpu, nhne obula be jiri isisi zi okne onu ahia pniò, òla, rugwe, rugwu mabulu,

13 nu sinamoni, nu nhne nwernu eknarna, isensi, maa, franki-isensi, nu manya, nu mono olivu, nu ikpa nu wheti, nu anohia, nu atnuru, nu iyinya, nu ogbo-eli iyinya nòdopnu, nu ohi, ma mkpuru ovu badnu masi.

14 “Be kaa, ‘Nhne i pioru whnunahoru i, kpakara ekwnu i nu ebube i whuru etekne, i jeeuwe kwno be berere.’

15 Ele noozu ahia, ele baru eze kwnornu nu be neere nhne ka, joogwuzo nu hne zi ikere, ogwnu nootu be kwnornu awhnuwhnu a, be naakwna ekwna, gba masi mkpe.

16 Be jeesiwama okokoba, kaa,

‘Chei, chei, eli-ohna kwu,
ke jiri iwo marnu mma
odno odno nu ihie ihie,
nu golu noogbu marna
marna, nu aka-
worugwu okne onu
ahia nu palì mee ehni
a mma.

17 Agida ekwnu hna kpa whuru etekne n'otu otnu-ige.’

“Kpakara ele nookwo ogbo mini nu ele ji ogbo mini neezne, nu ele ernu mini, nu kpakara ele nhne be jiri wuru budnu hi nu mini whuya, joogwuzo nu hne zi ikere.

18 Nga be jowhnu runwurnu bekwnu a, be jaakaa, ‘O zi eli ke nu lele okne eli-ohna ka?’

19 Be jowukwasi retnu nu risi be, kwna ekwna, gba mkpe, kaa,

‘Chei, chei, okne eli-ohna,
hne kpakara ele nwernu
ogbo mini

baru eze hite n'ekwnu a,
n'otu otnu-ige hne o ko
tubiri etekne.

20 Ovu so i n'onu, su oligwe,
ele nsò nu ele izi nu ele
owhnurninya snornu
anu nwudna,

Chiokike kperu a ikpe
kwnornu nhne o
mernu anu.’ ”

21 Otu enine izi gbasiri rikne gweru otu aka-
worugwu hna lele okne
rugwu ogwe wiri tubna nu
rime osimini, kaa,

“O bu kpa be jeeji nhne rikne
kwnadna okne eli-ohna
Babiloni,

o za nye jowhnu a berere.

22 Be jonu kwno eri, mobu
obo, opi,

mobu okwodu nu rime i
berere,
nye obula ke nwernu nka ernu
jaazi nu rime i berere,

o za nye jonu odidna ogwe
wiri
nu rime i berere.

23 Tonji jónwuma
nu rime i berere,
akpiri nye nolu nnwerne
ikne nu nye noogbo nzi
ikne,

jaazima nu rime i berere,
kwnornu nu ele noozu ahia i
bu ele dikne ke owa,

i jiri amusu i duwhu
kpakara mba.

24 Be pioh̄iaru n̄u rime a
 ọv̄narna ele ọwhnurninya
 n̄u ọv̄narna ele ns̄o,
 n̄u kpakara ele be gburu
 ogbu n̄u rime ọwa.”

19

1 Nga nhne ele ka whe-
 mernu, m n̄urnu m nhne n̄u
 lele okne nk̄oli igbudu badn̄u
 n'oligwe, naakaa,
 “Aleluya,

ọznohia, n̄u igwugwu n̄u
 rikne b̄u ke Chiokike
 āi,

2 kwnornu n̄u ikpe a b̄uru ọma
 n̄u ezi ọka,
 ọ marn̄u nwerinya okne
 ewhere wam ikpe
 nye jiri ome ọyi a meru
 ọwa,
 o megwnah̄ialam ọv̄narna
 ele ns̄o a n'aka a.”

3 Berere kwno be siwama,
 kaa,
 “Aleluya,

r̄unwurnu b̄ekwnu a naala
 olu d̄u ọkw̄nukokwnu.”

4 Ele okno badn̄u nri
 law̄uru n̄u ẹno n̄u nhne ẹno
 wam z̄i b̄udnu wam dna
 n'ẹli kp̄o risi ẹli n̄u ruwhnu
 Chiokike nye daz̄i n̄u ngadna
 eze. Be kaa,
 “Am̄im, Aleluya.”

*Olulu nnwerne
 ke Nnw̄o Atn̄urnu*

5 Otu nk̄oli hiri n̄u ngadna
 eze wam wh̄uya kaa,
 “Znarn̄i Chiokike āi,
 an̄u ele izi a,
 an̄u ele n̄ootu ogwnu a,
 ma nye mat̄i ma nye
 kwu.”

6 M n̄urnu m nhne n̄u
 lele nk̄oli igbudu badn̄u lele
 ọdidna aḡida mini, lele okne
 egbe oligwe, naakaa,
 “Aleluya,

Nyenwe āi Chiokike ke
 Meli Nhne Dum n̄echei.

7 Ngwa ma a nw̄udna, ovu s̄o
 āi n'ọnu,
 a nyee a igwugwu,
 kwnornu n̄u ọlulu nnwerne
 ke Nnw̄o Atn̄urnu wam
 val̄em,
 nnwerne a jikn̄ernunem
 ẹhni a.

8 Be nyernu nnwerne a iwo
 ab̄ochna, z̄i r̄ichna,
 noonwu onwu va-a-a,
 o woru.”
 (Iwo ab̄ochna wam b̄u ome
 mma ke ele ns̄o.)

9 Enine izi wam kan̄u m,
 “Gba n'ọkwukwo, 'Nḡozi z̄inu
 nye ọbula be sukwuru va
 n'iriri ọlulu nnwerne Nnw̄o
 Atn̄urnu wam.' ” O kaa
 kwno, “Ik̄wu-ọnu ka b̄u ezi
 ọka Chiokike.”

10 M dna n'ẹli n'ọchi enine
 izi wam ma m kp̄onu m a risi
 ẹli, k̄ovu ọ kan̄u m, “I m̄ee
 kpam, m b̄u m nye izi ibne i
 n̄u ke r̄umu nda ī ele berere
 b̄u ele ji akebne Jiz̄osi. Kp̄onu
 Chiokike risi ẹli. Kwnornu n̄u
 akebne Jiz̄osi gbar̄u b̄u enine
 ọwhnurninya.”*

*Nye naagba
 iyinya ab̄ochna*

11 M wh̄urnu m oligwe
 kpumernu n̄u otu iyinya
 ab̄ochna, r̄ewhna nye z̄i n'olu a
 b̄u Nye Ọkw̄nata Ovu n̄u Nye
 Ezi Ọka. O ji ikpe b̄uru ọma
 neekpe ikpe, n̄oolu ogwnu.

* 19:10 ke neeyinu ele badn̄u aka kp̄o okwo ik̄wu-ọnu Chiokike.

12 Anya a lawuru nụ lele roo bękwu, o kpu agida okpu-eze nụ risi a. O nwernu ręwhna be gbakwasiri a ke o zą nye magwu, okwolem ya magwu nhne o bu.

13 Iwo o wogwu bu ke be tururu n'ovnarna, be noosukwu a Ikwu-Onu Chiokike.

14 Ele ogwu ke oligwe sno a n'aznu n'olu iyinya abochna woru iwo abochna marnu mma.

15 Ama-ogwu zi buko hi n'onu a n'owhuya, ke o ji neemegbu kpakara mba. "O jeeji mkpara rugwe nęchi be."† O n'ozosna manya ke okne ovu owe ęni Chiokike ke Meli Nhne Dum.

16 Be gbakwasiri n'olu iwo a ma nu ochi a ręwhna,
 "EZE KAKWO ELE EZE NU
 NYENWE KAKWO ELE
 NWE."

17 M whnu otu enine izi gwuzo n'ęnam, o ji okne nkoli si okokoba, kanu kpakara onunu oligwe, "Anu va gbako n'okne iriri Chiokike.

18 Anu va ri ano-ęni ele eze, nu ke ele risi ogwu, nu ke ele dikne, nu ke iyinya nu ke ele gba be, nu ano-ęni kpakara ele badnu, ma ohi nu ke ele buo ohi, nye kwu nu nye mati."

19 M whnu anohia wam nu ele eze ke owa nu ele ogwu be gbakoru n'otu ma be lusi nye wam dazi n'olu iyinya ogwu ya nu ele ogwu a.

20 Kovu be nwudnenu anohia wam ya nu nye

owhnurninya aghalaghala wam nye rnuru ęnu ndu-ęni wam nu ruwhnu a, nye ji ęnu ndu-ęni wam rnawhu ele nwernu akara anohia wam nu ele kponnu igbudu anohia wam risi eli. Anohia wam nu nye owhnurninya aghalaghala wam, be tubna be nu budnu nu rime olulu bękwu ji rugwu bękwu neerne.

21 Be ji ama-ogwu neehi n'onu nye wam dazi n'olu iyinya wam gbu kpakara ele ogwu be, onunu oligwe rijiri ruwho hite n'ano-ęni be.

20

Otu pokwu awha

1 M whnu otu enine izi hi n'oligwe neehiedna, o ji snambi onuhna olulu awnwhnu, ji masi ijigba hna okpotokpo n'aka a.

2 O nwudne agwo wam, bu agwo gbaka wam, nye bu Ek-wensu, nu Setani kne a eriri otu pokwu awha.

3 O tubna a nu rime olulu awnwhnu, kasni a akara, ma o gharu o duwhu kpakara mba berere tem otu pokwu awha wheme. Omekwo, be jootoma a eriri ige mati.

4 M whnu agida ngadna eze, be nyee ele dazi n'olu be rikne be jeeji kpe ikpe. M whnu mkpuru ovu ele be gburu kwnornu akebne be gbannu Jizosi nu ikwu-onu Chiokike, ele kpola risi eli nyee anohia wam, mobu igbudu a, mobu nahoru akara a n'egedege ruwhnu be,

† 19:15 Eri Qma 2:9

mọbu n'aka be. Be ziri bụdnu snornu Karaịsi nēchi otu pokwu awha.

⁵ (Ele berere ke nwurru ọnwu lizola n'enuw tem otu pokwu awha wheme.) Ka bu olizo n'enuw ke mbom.

⁶ Chiokike joggozi ele ke a, ele jeekehia igwe n'olizo n'enuw ke mbom. Enwu ke gba lawuru jēnwe rikne n'ehni be. Be jobu ele okwa ariohna Chiokike nu ke Karaịsi, be joosno a chi otu pokwu awha.

O megburu Setani

⁷ Nga otu pokwu awha whemernu, be jootoma Setani, o whuya n'ikelu a.

⁸ O jowhoga duwhu agida mba ke gbasaru nu nkala eno ke owa, Gogi, nu Magogi, chikota be zne ogwnu. Onu ogwnugwnu be hna lele rizna zi nu ngeri osimini.

⁹ Be gbasu kpakara owa, gahnata gburugburu hne ele nsọ zi, nu eli-ohna wam Chiokike whurru n'anya, kovu bekwnu hiri n'oligwe dna rnegbu kpakara be.

¹⁰ Be tubna Ekwensu wam, nye duwhuru be nu rime olulu bekwnu be ji rugwu bekwnu neerne hne anohia wam nu nye owhnurninya aghalaghala wam zi. Be jaata be awnwhnu iwhnehnue nu abali hna okwnukokwnu.

Ikpe ipne-aznu

¹¹ M whnu otu ngadna eze abochna okpotokpo, nu nye dazi n'olu a, owa nu oligwe gbawhuru nu ruwhnu a, be whuna be berere.

¹² M whnu ele nwurru onwu, ele kwu nu ele mati, gwuzo nu ruwhnu ngadna eze wam. Be kpume agida okwukwo, be kpume kwno okwukwo berere, ke bu okwukwo ke budsonu. Chiokike kpe ele nwurru onwu ikpe hite nu nhne be gbaru n'okwukwo wam lele kpa enu be jiri ziri.

¹³ Osimini gwehia ele nwurru nu rime a, enwu nu eli renwu gwehia ele zi nu rime be, be kpe nye obula ikpe lele kpa enu o rnrnu jiri ziri.

¹⁴ Be tubna enwu nu eli renwu nu rime olulu bekwnu. Olulu bekwnu ka bu enwu ke mgbalawuru.

¹⁵ Nye obula ke be gbala renwhna a nu rime okwukwo ke budsonu, be tubna nu rime olulu bekwnu.

21

Oligwe ikne nu owa ikne

¹ Omekwo, m whnu oligwe ikne nu owa ikne, kwnornu nu oligwe ke mbom nu owa ke mbom gawheru, osimini zima masi.

² M whnu eli-ohna nsọ wam, Jeruselem ikne, hi n'oligwe hne Chiokike zi neehiedna, be jiknenu a lele nnwerne ikne naalakwnusi nzi a.

³ M nrnu m okne nkoli hi nu ngadna eze wam nookwu oka, kaa, "Le, Oro Nso Chiokike zi n'esilawuru rumu badnu, Chiokike jaadazinu be, be jobu ele ke a, o jobu Chiokike be, dazigidnenu be.

4 O jookwnosnama kpakara anya-mini n'anya be, ẹnwu jáazịma, mọbu ọgba mkpe, mọbu ọkwana ẹkwana, nhne igbugbu jáazịma, kwnornu nụ nhne ọknani gawhelem."

5 Nye wam dazị nụ ngadna eze wam, kaa, "Le, m neeme kpakara nhne bụru nhne ikne." O kanụ m, "Gba nhne ka n'ọkwukwo, kwnornu nụ ikwu-ọnu ka bụ ezi ọka ke kwesiri ọkwadata ovu."

6 O kanụ m, "Be menem a. Mawa bụ Alifa nụ Omega, Opanizo nụ Okwukwo. Nye ọbula akpịri nọokpo bẹkwnu, m jeenye a mini ke hi nụ risi mini ke bụdnu n'etekne.

7 Nye megburu, jeekehia kpakara nhne ka, m jọoburu Chiokike a, o jọoburu nnwọ m.

8 Kọvu ele ogwnu nụ ele kwé ekwe, nụ ele ruru ọru, ele noogbu badnụ, nụ ele neeme ọyi, nụ ele amusu, nụ ele naakwa ẹnwu, nụ kpakara ele aghalaghala jeekehia igwe nụ rime olulu bẹkwnu ji rugwu bẹkwnu neerne. Ka bụ ẹnwu ke mgba lawuru."

Jeruselem ikne

9 Otu n'esilawuru ele enine izi ẹsau wam vu obele awhnụwhnu ipne-aznụ wam vakwnusi m, kaa, "Vaa, m jeegesi i nnwerne be nọolu ikne, bụ nnwerne Nnwọ Atnurnu wam."

10 O vuru m n'Enine zne n'olu okne rugwu zị n'olu, gesi m ẹli-ọhna nsọ wam, bụ Jeruselem hi n'oligwe hne Chiokike zị neehiedna.

11 O vu igwugwu Chiokike, noonwu lele akaworugwu zị okne ọnu ahia, lele jasipa, ziri snam lele nyno.

12 O nwernu mkpọ be tūru a hna n'olu, o nwernu nri nụ ọnuhna lawuru, nụ nri enine izi lawuru neese ọnuhna. Be gbasiri ẹnwhna nri nụ avnurnu lawuru rumu Izireli n'ọnuhna a.

13 Ọnuhna ẹto zị n'ọbosi ẹhnam, n'olu olu ọnuhna ẹto, n'ẹli ẹli ọnuhna ẹto, n'ọdidna ẹhnam, ọnuhna ẹto.

14 Mkpọ ẹli wam nwernu ntụ-ẹli n'olu nri nụ akaworugwu lawuru, hne be gbakwasiri ẹnwhna ele izi nri nụ ẹbo ke Nnwọ Atnurnu wam.

15 Nye wam naakanụ m ọka ji otu nhne golu be neeji nọotu nhne, nọotu ike ẹli-ọhna wam, kpakara ọnuhna a, nụ ẹhni mkpọ a.

16 Ẹli-ọhna wam hna n'otu. Ogologo a nụ rude a hna n'otu. O gweru nhne be tū nhne tū ẹli-ọhna wam, o tūhia otu pokwu nụ riwhu maili ẹno, ogologo a, nụ rude a, nụ olu a, hna n'otu.

17 O tū ẹhni mkpọ wam, tūhia riwhu rula lawuru, lele kpa ọtutu ke badnụ jiri zị, ke enine izi ji nọotu.

18 Ẹhni mkpọ wam bụ jasipa, ẹli-ọhna wam bụ golu zị snam, lele nyno.

19 Be ji agida akaworugwu zị okne ọnu ahia mee ntụ-ẹli mkpọ ẹli-ọhna wam mma. Ntụ-ẹli ke mbom bụ jasipa, ke ẹbo bụ safia, ke ẹto bụ kasidoni, ke ẹno bụ emiradi,

20 ke isne bụ sadonisi, ke

isunu bu kanelia, ke esau bu kirisoliti, ke esato bu berili, ke tolu bu topasi, ke nri bu kirisopasisi, ke nri nu otu bu jasinti, ke nri nu ebo bu ametisi.

²¹ Nri nu onuhna lawuru wam bu pali nri nu ebo, otu onuhna otu pali. Ogoto apna eli-ohna wam bu golu zi snam noowhnu osno lele nyno.

²² M whnuna m Oro Nso n'eli-ohna wam, kwnornu nu Nyenwe a Chiokike ke Meli Nhne Dum nu Nnwọ Atnurnu wam bu Oro Nso a.

²³ Mkpa ehnam mọbu enwa za naakpa a, be za noomu nu rime a, kwnornu nu igwugwu Chiokike noomu nu rime a, Nnwọ Atnurnu wam bu iwhne a.

²⁴ Ele mba ke owa jeezne izne n'iwhne a, ele eze ke owa jeegweya igwugwu be nu rime a.

²⁵ Be jaagbasni onuhna eli wam, o jeegberu anya kwnornu nu ochichiri zila nu rime a.

²⁶ Be jeegwebnanya nhne igwugwu nu oson'anya kpakara mba nu rime a.

²⁷ Nhne obula ke zila richna jaabna nu rime a rja rja, mọbu nye obula ke neeme nhne ruru oru, mọbu nye aghalaghala, okwolem ele be gbaru rewhna be nu rime okwukwo ke budnu ke Nnwọ Atnurnu wam.

22

Mini ke budnu

¹ Enine izi wam gesi m osimini ke budnu noonwu lele nyno, hi nu ngadna

eze Chiokike nu ke Nnwọ Atnurnu wam naagbahia.

² Naagbawhe n'esilawuru ogoto apna eli-ohna wam, nu ngeri lawuru mini wam isisi ke budnu zi, ke naami nri nu mgba mkpuru lawuru n'awha ke bu otu mgba n'enwa. Okwukwo isisi wam bu nhne be ji noogwo ehni igbugbu ele kpakara mba.

³ Ovu onu zima rja rja. Ngadna eze Chiokike nu ke Nnwọ Atnurnu wam jaazi n'eli-ohna wam, ele izi a jeeznenu a izi.

⁴ Be jowhnu ruwhnu a, rewhna a jaazi n'egedege ruwhnu be.

⁵ Abali jaaziima berere, be jomu tonji, ehnam jomu, kwnornu nu Nyenwe a Chiokike jeenye be iwhne, be jechi lele eze tim tom.

⁶ Enine izi wam kanu m, "Ikwu-onu ka bu ezi oka ke kwesiri okwnata ovu. Nyenwe a Chiokike ke enine ele owhnurninya ziyaru enine izi a gesi ele izi a kpakara nhne jeemeriri n'ige mati vazne nu ruwhnu."

Jizosi wawa

⁷ "Le, m wawa wara wara, ngozi jaazinu ele jaabita ikwu-onu owhnurninya ke okwukwo ka."

⁸ Mawa, Joni, nurnu, whnu masi kpakara nhne ka. Nga me nurnu, whnu kwo masi, m dna n'eli n'ochi enine izi nye gesiri m kpakara nhne ka ma m kponu m a risi eli.

⁹ Kovu o kannu m, "I mee kpam, m bu m nye izi ibne i, nu ke rumu nda i ele

ọwhnurninya, nụ kpakara ele jaabita ikwu-ọnu ọkwukwo ka. Kpọnu Chiokike risi ẹli.”

¹⁰ Ọ kanu m, “I tuga ikwu-ọnu ke ọkwukwo ọwhnurninya ka, kwnornu nụ ige zi ndundu.

¹¹ Nye ojo mernu nhne ojo a zne ruwhnu, nye zila richna, ọ zila richna a zne ruwhnu, nye mee mma, mernu mma a zne ruwhnu, nye zi nsọ, ziri nsọ a zne ruwhnu.”

¹² “Le, m vawa wara wara, ọgwo ẹnu m zi m n'aka, m jeenye nye ọbula lele kpa ẹnu a jiri ziri.

¹³ Mawa bu Alifa nụ Omega, Nye Mbom nụ Nye Ipne-aznụ, Opanizo nụ Okwukwo.

¹⁴ “Ngọzi jaazinu ele snurnu iwo awura be, be nwernu rikne o ri mkpuru isisi ke budnu wam, be jeehi n'ogodo ọnuhna bnazne nụ rime ẹli-ọhna wam.

¹⁵ Kọvu rumu nkita, nụ ele amusu, nụ ele neeme ọyi, nụ ele noogbu badnụ, nụ ele naakwa renwu, nụ ele whnurnu aghalaghala n'anya neeme be jaazi n'ederezi.

¹⁶ “Mawa Jizosi, ziyaru enine izi m ọ gba akebne

kpakara nhne ka nụ rime kpakara ọgbako Chiokike. Mawa bu Mgbaregnugwnu nụ Nnwọ Devidi, Mbọ ọsisi marnu mma.”

¹⁷ Enine Nso nụ nnwerne ikne karu, “Vaa.” Nye ọbula ke nurnu, kaa, “Vaa.” Nye ọbula akpiri nọkpo bekwnu, vaa, nye ọ masiri gweru mini ke budnu n'etekne nwornu.

¹⁸ M nọdo nye ọbula ke nurnu ikwu-ọnu ke ọkwukwo ọwhnurninya ka aka nụ nsni, nye ọbula ke tukwasiri nhne n'olu a, Chiokike jọtukwasinu a nhne nụ kpakara awhnuwhnu be gbaru n'okwukwo ka.

¹⁹ Nye ọbula ke gwemernu nhne n'ikwu-ọnu ke ọkwukwo ọwhnurninya ka, Chiokike jeegweme igwe a n'isisi ke budnu nụ ẹli-ọhna nsọ, ke bu nhne be gbaru n'okwukwo ka.

²⁰ Nye gbaru akebne kpakara nhne ka karu, “Owe, m vawa wara wara.”

Amim. Vaa, Nyenwe aji Jizosi.

²¹ Oru ke Nyenwe aji Jizosi dazinu kpakara anu. Amim.